


बघल्याणी नवां
वधिन



The holy Bible in the Baghlayani dialect of the Mahasu
Pahari language of India

बघल्याणी नवां विधान
**The holy Bible in the Baghlayani dialect of the Mahasu Pahari
language of India**

Copyright © 2021 The Love Fellowship

Language: Mahasui (Pahari, Mahasu)

Dialect: Baghlayani

Contributor: The Love Fellowship

Read and download Bible and several other Christian materials in various formats :
www.freebiblesindia.in

This translation is made available to you under the terms of the Creative Commons Attribution
Share-Alike license 4.0.

You have permission to share and redistribute this Bible translation in any format and to make
reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear
that the original licensor is not necessarily endorsing your changes.

If you redistribute this text, you must distribute your contributions under the same license as the
original.

Pictures included with Scriptures and other documents on this site are licensed just for use with
those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great
responsibility to be true to God's Word. See Revelation 22:18-19.

2023-04-13

PDF generated using Haiola and XeLaTeX on 21 Feb 2024 from source files dated 14 Apr 2023
25cbbaab-b912-509b-9c5f-40c159506df3

Contents

मत्तीए रा सुसमाचार	1
मरकुस	46
लूका	75
यूहन्ना	122
प्रेरितों रे काम	155
रोमियों	198
1 कुरिन्थियों	219
2 कुरिन्थियों	238
गलातियों	251
इफिसियों	259
फिलिप्पियों	266
कुलुस्सियों	272
1 थिस्सलुनी	277
2 थिस्सलुनी	282
1 तीमुथियुस	285
2 तीमुथियुस	291
तीतुस	296
फिलेमोन्	299
इब्रानियों	301
याकूब	317
1 पतरस	323
2 पतरस	330
1 यूहन्ना	334
2 यूहन्ना	340
3 यूहन्ना	341
यहूदा	342
प्रकाशितवाक्य	344

मत्ती मत्तीए रा लिखेया रा सुसमाचार

भूमिका

मत्ती रचित सुसमाचार ये संदेश देओआ कि यीशु मसीह ई से उद्धारकर्ता ए जेसरे आऊणे री भविष्यवाणी कित्ती थी। परमेशरे पुराणे नियमो रे हजरो साल पईले आपणे लोका साथे कित्ती री वाचा खे तेस ई उद्धारकर्ता रे जरिए पूरा कित्तेया। ये शुभ संदेश बस यहूदी लोका खेई निए, जिना रे यीशु मसीह पैदा ऊआ और पालेया पोषेया गया, बल्कि सारी दुनिया खे ए।

मत्ती रचित सुसमाचार बऊत ई चौकसिया साथे क्रमबद्ध तरीके रे लिखी राखेया। इजी री शुरूआत यीशु मसीह रे जन्मो ते ओई, तेवे तिना रे बपतिस्मा और परीक्षा रे बारे रे लिखी राखेया, तेवे गलील प्रदेशो रे प्रचार, शिक्षा और चंगा करने री सेवा रे बारे रे लिखी राखेया। इजी ते बाद एते सुसमाचारो रे यीशुए री गलीलो ते यरूशलेमो तको रा सफर और यीशुए री जिन्दगिया रे आखरी अफते री घटना रे बारे रे लिखी राखेया, जेतेरा मकसद तिना रा कूसो पाँदे चढ़ाया जाणा और तिना रा दुबारा जिऊंदा ऊणा ए।

एते सुसमाचारो रे यीशु एक महान् गुरुओ रे रूपो रे दखाई राखेया। तेसखे परमेशरो रे बिधानो री व्याख्या करने रा अक्क ए और से परमेशरो रे राज्य री शिक्षा देओआ। तेसरी शिक्षा खे पाँज पाअगा रे बांडी सकोए : (1) पाहूडी उपदेश, जो स्वर्ग राज्य रे नागरिको रे चाल-चलण, फर्ज, खास अक्क और आखरी उम्मीदा ते मिलदा-जुलदा ए (पाठ 5-7); (2) बारा चलेया खे सेवा रा काम करने खे शिक्षा देणा (पाठ 10); (3) स्वर्गो रे राज्य ते मिलदा-जुलदा उदारण (पाठ 13); (4) चलेया ते मिलदी-जुलदी शिक्षा (पाठ 18) और (5) स्वर्ग राज्य रे आऊणे और एस जुगो ते मिलदी-जुलदी शिक्षा (पाठ 24, 25)

रूप-रेखा:

वंशावली और यीशु मसीह रा जन्म 1:1-2:23

यहून्ना बपतिस्मा देणे वाले रा सेवा रा काम 3:1-12

यीशुए रा बपतिस्मा और परीक्षा 3:1-4:11

गलील प्रदेशो रे यीशुए री जनसेवा 4:12-18:25

गलील प्रदेशो ते यरूशलेम नगरो तक सफर 19:1-20:34

यरूशलेम नगरो रे आखरी अफता 21:1-27:66

यीशुए रा मरे रेया बीचा ते दुबारा जिऊंदा ऊणा और तिना रा दिशणा 28:1-20

~~~~~  
(~~~~~ 3:23-38)

1 ये यीशु मसीह रे पुर्वजा रे नाओ ए जो राजा दाऊद और अब्राहमो रे वंशो रे थे।<sup>2</sup> अब्राहमो ते इसहाक ऊआ; इसहाको ते याकूब ऊआ, याकूबो ते यहूदा और तेसरे ओर बी बऊत पाई ऊए।<sup>3</sup> यहूदा री लाडी तामारा ते फिरिस और जोरह ऊआ, फिरिसो ते हिस्रोन जम्मेया और हिस्रोनो ते एराम ऊआ,<sup>4</sup> एरामो ते अम्मीनादाब ऊआ, अम्मीनादाबो ते नहशोन ऊआ और नहशोनो ते सलमोन ऊआ।<sup>5</sup> सलमोन और तेसरी लाडी राहाबा ते बोअज ऊआ, बोअज और रूता ते ओबेद ऊआ और ओबेदो ते यिशै ऊआ।<sup>6</sup> यिशै ते दाऊद राजा जम्मेया। दाऊदो ते सुलेमान तेसा जवाणसा ते ऊआ, जो पईले ऊरिय्याहो री लाडी थी।<sup>7</sup> सुलेमानो ते रहवाम ऊआ, रहवामो ते अबिय्याह ऊआ, अबिय्याहो ते आसा ऊआ,<sup>8</sup> आसा ते यहोशफात ऊआ, यहोशफातो ते योराम और योरामो ते उज्जियाह ऊआ।<sup>9</sup> उज्जियाहो ते योताम, योतामो ते आहाज और आहाजो ते हिजिकिय्याह ऊआ।<sup>10</sup> हिजिकिय्याहो ते मनशिशह, मनशिशहो ते आमोन और आमोनो ते योशिय्याह ऊआ।

11 इस्राएली लोका खे बेबीलोनो खे बन्दी बणाई की लई जाणे ते पईले योशिय्याहो रे पोते यकुन्याह और तेसरे पाई ऊए।

12 बन्दी ऊई की बेबीलोनो रे पऊँछाणे ते बाद यकुन्याहो ते शालतिएल जम्मेया और शालतिएलो रा पोता जरूबाबिल ऊआ। 13 जरूबाबिलो ते अबीहूद, अबीहूदो ते इल्ल्याकीम और इल्ल्याकीमो ते अजोर ऊआ। 14 अजोरो ते सदोक, सदोको ते अखीम और अखीमो ते इलीहूद ऊआ। 15 इलीहूदो ते इलियाजार, इलियाजारो ते मत्तान और मत्तानो ते याकूब ऊआ। 16 याकूबो ते यूसुफ ऊआ, जो मरियमा रा लाड़ा था। मरियमा रे यीशु पवित्त्र आत्मा ते जम्मेया, जिना खे मसीह बोलेया जाओआ। 17 अब्राहमो ते दाऊदो तक सारिया चौदा पीढ़िया ऊईया और दाऊदो ते इस्राएलिया खे बाबेलो तक बन्दी बणाई की पऊँछाणे तक चौदा पीढ़िया ऊईया और बेबीलोनो तक बन्दी बणाई की पऊँछाणे ते मसीह तक चौदा पीढ़िया ऊईया।

~~~~~

(~~~~~ 1:26-38; ~~~~~ 2:1-7)

18 एवे यीशु मसीह रा जन्म ईयां ऊआ, कि जेवे तिना री आम्मा मरियमा री मंगणी यूसुफो साथे ऊई, तेवे तिना रा व्या ऊणे ते पईले ई मरियम पवित्त्र आत्मा री तरफा ते गर्भवती ऊईगी। 19 तेवे तेसा रा ऊणे वाला लाड़ा यूसुफ जो तर्मी था, से तेसा खे बदनाम नि करना चाओ था, तिने आपणे मनो रे सोचेया कि मां ये चुपचाप छाडी देणी।

20 जेवे से एड़ा सोचणे ई लगी रा था, तेवे प्रभुए रा स्वर्गदूत तेसखे सुपने रे दिशेया और से तेसखे बोलणे लगेया, “ओ दाऊदो रे वंशो रे यूसुफ! तूँ आपणी ऊणे वाली लाडी मरियमा खे आपणे कअरे ल्याऊणे ते नि डर, कऊँकि जो तेसा रे पेटो रे बच्चा ए, से पवित्त्र आत्मा रिया तरफा तेआ। 21 तेसा रे एक पाऊ जमणा, तँ तेसरा नाओं यीशु राखणा। कऊँकि तेस आपणे लोक तिना रे पापो ते बचाई देणें।”

22 ये सब कुछ तेवे ऊआ ताकि जो वचन प्रभुए भविष्यवक्ता ते बुलाई राखे, सेयो पूरे ओ 23 “देखो, एक कुआँरी गर्भवती ऊणी और तेसा रे एक पाऊ जमणा और तेसरा नाओं इम्मानुएल ऊणा.” जेतरा मतलब ए “परमेशर आसा साथे ए।” 24 तेवे यूसुफ सयी की उठेया और जियाँ ई तेसखे परमेशरो रे स्वर्गदूते बोलेया था, तियाँ ई से आपणी ऊणे वाली लाडिया खे आपणे कअरे ली आया 25 और जदुओ तक, तेसा रे पाऊ नि जम्मेया, तदुओ तक यूसुफ तेसा गे नि गया और तेवे तेसा रे पाऊ जम्मेया और तिने तेसरा नाओं यीशु राखेया।

2

~~~~~

1 हेरोदेस राजे रे राज्य रे बखते जेवे यहूदिया प्रदेशो रे बैतलहम नगरो रे यीशुए रा जन्म ऊआ, तेवे देखो, पूर्व देशो ते कई ज्योतषी यरूशलेम नगरो रे आए और पूछणे लगे, 2 “जो यहूदिया रा राजा जम्मी रा, से केई ए? कऊँकि आसे पूर्वो रे तेसरा तारा देखेया जो तेसरे जन्मो रे बारे रे बताओआ और आसे तेसगे माथा टेकणे आयी रे।” 3 ये सुणी की हेरोदेस राजा और तेस साथे पूरा यरूशलेम कवराईगा। 4 तिने लोका रे सब बडे पुरोईत और शास्त्री कट्टे कित्ते और पूछेया, “मसीह रा जन्म केई ऊणा चाईयो?” 5 तिने सबी हेरोदेस राजे खे बोलेया, “यहूदिया प्रदेशो रे बैतलहम नगरो रे; कऊँकि परमेशरे मीका भविष्यवक्ते रे जरिए एई अया बोलेया रा

6 “‘ओ बैतलहम, जो यहूदा रे प्रदेशो रे,

तूँ कियाँ बी यहूदा रे अधिकारिया रे सबी ते छोट्टा निया;

कऊँकि तां बीचा ते एक राज करने वाला निकलना

जो मेरी प्रजा इस्राएलो रा रखवाला ऊणा।”

7 तेबे हेरोदेसे ज्योतषी चोरिए जे बुलाए और तिना ते पूछेया कि तारा ठीक केस बखते दिशेया था? 8 तिने ये बोली की सेयो बैतलहमो खे पेजे, “जाओ, और जाई की तेस बच्चे रे बारे रे ठीक-ठीक पता करो। जेबे से मिली जाओगा, तो आईकि मांगे बताओ, ताकि आऊँ बी आईकि तेसगे माथा टेकी सकूँ।”

9 सेयो राजे री गल्ल सुणी की चली गे और देखो, जो तारा तिने पूर्वो रे देखेया था, से तिना ते आगे-आगे चलणे लगेया और जेती बच्चा था, तेती जाई की रुकी गा। 10 तेस तारे खे देखी की सेयो बऊत खुश ऊए। 11 तेबे सेयो तेस कअरो रे पऊँछे और तिने बच्चा तेसरी माए मरियमा साथे देखेया, तेबे तिने मुँओ रे पारे लेटी की यीशुए गे माथा टेकेया और आपणा-आपणा चोला खोलेया और सुईना, लोबान और गन्धरसो री पेंट चढ़ाई। 12 तेबे सुपने रे तिना खे ये आज्ञा मिली कि हेरोदेस राजे गे फेर नि जाणा, तेबे सेयो दुजिया बाटा रिये आपणे देशो खे चली गे।

~~~~~

13 तिना ज्योतषिया रे चली जाणे ते बाद परमेशरो रे एक स्वर्गदूते यूसुफो खे सुपने रे दिशणे ते बाद बोलेया, “उठ, और एस बच्चे और एसरी माया खे लयी की मिस्र देशो खे नटी जा और जदुओ तक आऊँ ताखे नि बोलूँ, तदुओ तक तेथी रणा, कऊँकि हेरोदेस राजा एस बच्चे खे काणा चाओआ और से एसखे टोलने लगी रा।”

14 तेबे से रातो-रात उठेया और बच्चे और बच्चे री माया खे लई की मिस्र देशो खे चली गा।

15 जदुओ तक हेरोदेस नि मरेया, तदुओ तक से तेथी रया, ताकि जो वचन पूरभुए होशे भविष्यवक्ता ते बुलाई राखे, सेयो पूरे ओ कि, “मैं आपणा पाऊ मिस्र देशो ते बुलाया।”

16 जेबे हेरोदेसो खे पता चलेया कि ज्योतषिये आऊँ टगी ता, तेबे तेसखे बड़ा पारी रोष आया। तेबे तिने ज्योतषिया रे जरिए सई बखत पूछे रे मुताबिक आपणे माणू बैतलहम और नेडे-तेडे पेजे और जो दो साला रे पाऊ थे और तिना ते छोटे थे, कुलाई ते। 17 तेबे जो वचन यिर्मयाह भविष्यवक्ते बोलेया था, से पूरा ऊआ;

18 “रामाह नगरो रे बड़िया-पारी राड़िया सुणिया, रोणा और शोग;

राहेल आपणे बच्चेया खे रोणे लगी री थी

और चुप नि ऊणा चाओ थी,

कऊँकि तिना रे बच्चे काईते थे।”

~~~~~

19 हेरोदेसो रे मरने ते बाद, परमेशरो रे स्वर्गदूते मिस्र देशो रे यूसुफो खे सुपने रे बोलेया 20 “उठ और बच्चे और तेसरी आम्मा खे लई की इस्राएल देशो खे चली जा, कऊँकि जो बच्चे खे काणा चाओ थे, सेयो तो मरी गे।” 21 से उठेया और बच्चे और तेसरी आम्मा खे साथे लई की इस्राएल देशो खे आईगा। 22 पर जेबे तिने सुणेया कि हेरोदेसो री जगा पाँदे एबे तेसरा पाऊ अरखिलाऊस यहूदिया प्रदेशो रे राज्य लगी रा चलाणे, तो से तेती जाणे ते डरीगा। तेबे सुपने रे तेसखे चेतावणी मिली और से गलील देशो खे चली गा। 23 तेबे से नासरत नाओं रे नगरो रे बसी गा, ताकि भविष्यवक्ते रे जरिए बोलेया रा वचन पूरा ओ कि, “तेसखे नासरी बोलेया जाणा।”

### 3

~~~~~

(~~~~~ 1:1-8; ~~~~~ 3:1-18; ~~~~~ 1:6-8,15-34)

1 तिना दिना रे यहून्ना बपतिस्मा देणे वाला यहूदिया रे सुणसाण जगा रे आयी की ये प्रचार करने लगेया, 2 “मन फेरो; कऊँकि स्वर्गो रा राज्य नेडे आईगा रा।” 3 ये सेई माणू ए, जेसरी गल्ल यशायाह भविष्यवक्ते किती थी कि,

“सुणसाण जगा रे एक आक्का पाणे वाले री आवाज ओई,

“पूरभुए री बाट त्यार करो,

और तिना री सड़का सीदिया करो ।”

4 तिने यूहन्ने ऊँटो रे बालो रे टाले पईनी राखे थे और आपणे लको रे चामडे रा पट्टू बानेया रा था और तेसरी रोटी टिड्डिया और बणो रा सईत था । 5 तेवे यरूशलेमो रे, सारे यहूदिया प्रदेशो रे और सारे यरदन देशो रे ओरले-पोरले माणू तेसगे आए । 6 तेवे तिने आपणे-आपणे पापो खे मानी की यरदन नदिया रे तेसते बपतिस्मा लया ।

7 जेवे तिने देखेया कि बऊत सारे फरीसी और सद्की मांगे बपतिस्मा लणे लगी रे आऊणे, तेवे तिना खे बोलेया, “ओ सापो जेडे जईरीले लोको! तुसा खे किने जताई ता कि आऊणे वाले परमेशरो रे रोषो ते नडो? 8 इजी री खातर मन फिराओ और अच्छे काम करो । 9 और आपणे-आपणे मनो रे एड़ा नि सोचो, ‘आसा रा बाओ अब्राहम ए ।’ कऊँकि आऊँ तुसा खे बोलूँ आ कि परमेशर इना पात्थरा ते अब्राहमो खे त्वाद पैदा करी सकोआ । 10 एवे परमेशर तुसा खे सजा देणे वाला ए, तेवेई तो जो-जो डाल खरा फल नि ल्याऊँदे, से बाडे और आगी रे सेटे जाओए ।

11 “आऊँ तो पाणिए की तुसा खे मन फेरने रा बपतिस्मा देऊँआ, पर जो मांते बाद आऊणे वाला ए से मांते बी जादा महान् ए, आऊँ तेसरे जोड़े चकणे जोगा पनिए । तेस तुसा खे पवित्तर आत्मा और आगी साथे बपतिस्मा देणा । 12 तेसरा सूप तेसरे आथो रे ए और तेस आपणा खल्याण ठीक टंगो ते साफ करना और कणक तो आपणे पण्डारो रे राखी देणी, पर जो पूऊ ऊणा, से एड़िया आगी रे सेटणा, जो कदी नि विजणी ।”

?????? ? ? ???? ???? ? ? ???? ???? ?

(????? 1:9-11; ???? 3:21,22; ???? 1:31-34)

13 तेस बखते यीशु मसीह गलीलो ते यरदन नदिया रे कनारे यूहन्ने ते बपतिस्मा लणे आये । 14 पर यूहन्ना तेसखे ये बोली की रोकणे लगेया, “माखे तो तुसा रे आथो ते बपतिस्मा लणे री जरूरत ए और तुसे मांगे आयी रे” 15 यीशुए तेसखे ये जवाब दित्तेया, “एवे तो एड़ा ई ऊणे दे; कऊँकि आसा खे ईयाँ ई सारी धार्मिकता पूरी करनी ठीक ए ।” तेवे तिने यीशुए री गल्ल मानी 16 और यीशु मसीहे फटाफट बपतिस्मा लया और पाणिए ते पँदि आए, और देखो, तिना खे सर्ग खुली गा; तेवे तिने परमेशरो री पवित्तर आत्मा खे जिंयाँ कबूतर उड़दा ऊआ थाले आओआ तियाँ ई तिने आपू पँदि आऊँदे ऊए देखेया 17 और देखो, स्वर्गो ते ये आवाज आयी, “ये मेरा प्यारा पुत्र ए, आऊँ एसते बऊत खुश ए ।”

4

????? ? ? ???? ?

(????? 1:12-13; ???? 4:1-13)

1 तेवे पवित्तर आत्मा यीशुए खे सुणसाण जगा रे लईगा, ताकि शैतानो ते तिना री परीक्षा ओ । 2 सेयो चाली दिन और चाली राती पूखे रये और तेवे तिना खे पूख लगी । 3 तेवे शैताने यीशुए गे आई की बोलेया, “जे तूँ परमेशरो रा पुत्र ए, तो इना पात्थरा खे बोल कि रोटी बणी जाओ ।” 4 यीशुए जवाब दित्तेया, “पवित्तर शास्त्रो रे लिखी राखेया,

“भाणू रोटिया साथे ई जिऊँदा नि रणा,

पर हर एक वचन, जो परमेशरो रे मुँओ ते निकली रे तिना खे मानी की जिऊँदा रओआ ।”

5 तेवे शैतान यीशुए खे पवित्तर नगर यरूशलेमो खे लईगा और सेयो मन्दरो री चूँडिया पँदि खडे करी ते । 6 तेवे तिना खे बोलणे लगेया, “जे तूँ परमेशरो रा पुत्र ए, तो आपू खे एथा ते थाले रुड़ाई दे; कऊँकि पवित्तर शास्त्रो रे लिखी राखेया कि परमेशरो तेरिया तँई आपणे स्वर्गदूता खे आज्ञा देणी, “और तिना तूँ आपणे आथो-आथ चकी लणा,

केथी एड़ा नि ओ कि तेरे पैरो रे पात्थरो साथे बूड़ो ।”

7 यीशुए तेसखे बोलेया, “पवित्तर शास्त्रो रे एड़ा बीए लिखे रा, तूँ परभु, आपणे परमेशरो खे नि परख ।”

8 तेबे शैतान तिना खे एक ऊच्चे पाहड़ो पाँदे लईगा और सारी दुनिया रे सारे राज्य और तिजरी रे एशो-आराम दखाई की 9 तिना खे बोलेया, “जे तां मांगे माथा टेकणा, तो मां ताखे ये सब कुछ देई देणा।” 10 तेबे यीशुए तेसखे बोलेया, “हईओ शैतान; मेरी नजरा ते दूर ऊई जा, कऊँकि पवित्र शास्त्रो रे एडा लिखी राखेया, ‘तूँ परभु आपणे परमेशरो गे ई माथा टेक और बस तिना री ई आराधना कर।’” 11 तेबे शैतान यीशुए गे ते चली गा और स्वर्गदूत तिना री सेवा करने लगे।

ⓂⓂⓂⓂ ⓂⓂ ⓂⓂⓂⓂⓂ ⓂⓂ ⓂⓂⓂⓂⓂ ⓂⓂ ⓂⓂⓂⓂⓂ
(ⓂⓂⓂⓂ 1:14,15; ⓂⓂⓂⓂ 4:14; ⓂⓂⓂⓂ 15:31)

12 जेबे यीशुए सुणेया कि यूहन्ना पकड़वाईता, तेबे सेयो यहूदिया प्रदेशो खे छाडी की गलील प्रदेशो रे नासरत नगरो खे चली गे। 13 और फेर सेयो नासरत नगरो खे छाडी की कफरनहूम नगरो रे रणे लगे, जो जबूलून और नप्ताली इलाके रे समुद्रो रे कनारे था। 14 ताकि जो यशायाह भविष्यबक्ते बोलेया था, से पूरा ओ, 15 “जबूलून और नप्तालिया रे इलाके, समुद्रो री बाटा रिये यरदन नदिया रे पार, दूजि जातिया रा गलील।” 16 जो माणू परमेशरो खे नि जाणदे और न्हैरे रे जिऊणे लगी रे थे, तिने बडी जोति देखी; और जो मौता ते डरी की जिऊणे लगी रे थे, तिना पाँदे जोति चमकी।” 17 तेस बखतो ते यीशुए ये प्रचार करना और ये बोलणा शुरू करी ता कि, “मन फेरो कऊँकि स्वर्गो रा राज्य नेडे आईगा रा।”

ⓂⓂⓂⓂ ⓂⓂ ⓂⓂⓂⓂⓂⓂ ⓂⓂ ⓂⓂⓂⓂⓂⓂ
(ⓂⓂⓂⓂ 1:16-20; ⓂⓂⓂⓂ 5:1-11; ⓂⓂⓂⓂⓂⓂ 1:35-42)

18 तेबे तिने गलीलो रे समुद्रो रे कनारे कूमदे ऊए दो पाई, मतलब-शमौन, जेसखे पतरस बी बोलोए और तेसरा पाई अन्दरयास समुद्रो रे जाल पाँदे ऊए देखेया, कऊँकि सेयो मच्छलिया पकड़ने वाले थे। 19 तेबे यीशुए तिना खे बोलेया, “मां पीछे आओ और जियाँ तुसे मच्छली पकड़ना जाणोए तियाँ ई मां तुसा खे परमेशरो गे माणू पकड़ी की ल्याऊणे सिखाणे।” 20 सेयो तेबुई जाल छाडी की यीशुए पीछे चली पड़े।

21 तेथा ते आगे जाई की यीशुए और दो पाई मतलब जब्दिए रे पाऊ याकूब और तेसरा पाई यूहन्ना आपणे पिते साथे किस्तिया पाँदे जाल ठीक करदे ऊए देखे और तिने सेयो बी बुलाए। 22 सेयो तेबुई आपणी किस्ती और आपणे पिते खे छाडी की यीशुए रे पीछे चली पड़े।

ⓂⓂⓂⓂ ⓂⓂ ⓂⓂⓂⓂⓂⓂ ⓂⓂ ⓂⓂⓂⓂⓂⓂ
(ⓂⓂⓂⓂ 6:17-19)

23 यीशु गलील प्रदेशो रे बऊत सारी जगा रे कूमदे रए और तिना री प्रार्थना रे कअरो रे उपदेश और राज्य रा सुसमाचार प्रचार करदे रए और लोका री बमारिया और कमजोरिया खे दूर करदे रए। 24 तेबे सारे सीरिया प्रदेशो रे सेयो मशुर ऊईगे और लोक सारे बमारा खे, जो कई प्रकारा रिया बमारिया ते और दुःखो रे जकड़ी रे थे, जिना रे दुष्टात्मा थिया, मिर्गी वाले और अदरंगो रे रोगिया खे यीशुए गे ल्याए और तिने सेयो ठीक किते। 25 तेबे गलील प्रदेश, दिकापुलिस इलाका, यरूशलेम नगर, यहूदिया प्रदेश और यरदनो री नदिया ते पारो ते पीड़ा री पीड़ तिना पीछे आईगी।

5

ⓂⓂⓂⓂ ⓂⓂ ⓂⓂⓂⓂⓂⓂⓂ ⓂⓂⓂⓂⓂ

1 यीशु तेसा पीड़ा खे देखी की पाहड़ो पाँदे चढ़ी गे, जेबे सेयो उपदेश देणे बैठे, तेबे तिना रे चले तिना गे आए। 2 तेबे यीशु ये उपदेश देणे लगे:

ⓂⓂⓂⓂ ⓂⓂⓂ
(ⓂⓂⓂⓂ 6:20-23)

- 3 “धन्य ए सेयो, जो मनो रे सलीन ए,
कऊँकि स्वर्गो रा राज्य तिना रा ईए।
- 4 धन्य ए सेयो, जो शोग करीए,

- कऊँकि परमेशरो तिना खे शान्ति देणी ।
 5 धन्य ए सेयो, जो नम्र ए,
 कऊँकि सेयो तरतिया रे अक्कदार ऊणे ।
 6 धन्य ए सेयो, जो धार्मिकता री जिन्दगी जिऊणे खे पूखे ए और त्याय ए,
 कऊँकि सेयो रजाए जाणे ।
 7 धन्य ए सेयो, जो दयालु ए,
 कऊँकि परमेशरो तिना पाँदे दया करनी ।
 8 धन्य ए सेयो, जिना रे मन साफ ए,
 कऊँकि तिना परमेशर देखणा ।
 9 धन्य ए सेयो, जो मेल-जोल कराओए,
 कऊँकि तिना खे परमेशरो रे बच्चे बोलेया जाणा,
 10 धन्य ए सेयो, जो धार्मिकता री जिन्दगी जिऊणे री तँई सताए जाओए,
 कऊँकि स्वर्गो रा राज्य तिना रा ईए ।

11 “धन्य ए तुसे, जेबे लोक मेरी बजअ ते तुसा री निन्दा करोए, तुसा खे सताओए और चूट बोली-बोली की तुसा रे खलाफ बुरी-बुरी गल्ला बोलोए । 12 तेबे खुश और मगन ऊणा, कऊँकि तुसा खे स्वर्गो रे बऊत बड़ा ईनाम मिलणा, कऊँकि तिने, जो तुसा ते बऊत पईले भविष्यवक्ता थे, सेयो बी ईयाँ ई सताए थे ।

☞☞☞ ☞☞ ☞☞☞☞

(☞☞☞☞ 9:50; ☞☞☞☞ 14:34,35)

13 “तुसे तरतिया रे रणे वाले लोका खे लूणो जेडे ए । पर जे लूणो रा स्वाद बिगड़ी जाओ, तेबे कुण जी एड़ी चीज ए जेते की लूणका ऊई जाओ । तेबे से किजी कामो रा नि रंदा सिवाए एतेरे कि तेसखे बारे सेटी देयो और लोक तिजी खे पैरा निठे केसदे रओ । 14 तुसे दुनिया री जोति ए, जो नगर पाहूडो पाँदे बसी रा, से लूकी नि सकदा । 15 लोक दिऊआ वाली की टोकरूप निठे नि राखदे, पर फटिया पाँदे राखोए, तेबे तिजी साथे कअरो रे सारे माणूआ खे परयासा ओआ । 16 तियाँ ई तुसा रा परयासा बी लोका सामणे चमको, ताकि तुसा रे खरे काम देखी की सेयो तुसा रे पिते री, जो स्वर्गो रे ए, तिना री तारीफ करो ।

☞☞☞☞☞ ☞☞ ☞☞☞☞☞

17 “एड़ा नि समजो कि आऊँ मूसे रा विधान या भविष्यवक्ता री कताबा खे रचाणे आयी रा, आऊँ रचाणे नि, पर पूरा करने आयी रा । 18 कऊँकि आऊँ तुसा खे सच लगी रा बोलणे कि जदुओ तक सर्ग और तरती नि टली जाओगी, तदुओ तक विधानो ते एक बी मात्रा या एक बी बिन्दु बिना पूरा ऊए नि टलना । 19 तेबेई तो जो कोई इना छोटिया ते छोटो आज़ा बीचा ते केसी एकी खे पनि मानोगा और तेड़ा ई लोका खे सिखाओगा, से स्वर्गो रे राज्य रे सबी ते छोटो ऊणा, पर जो कोई तिना आज़ा खे मानोगा और तिना खे बी सिखाओगा, सेई स्वर्गो रे राज्य रे बड़ा ऊणा । 20 कऊँकि आऊँ तुसा खे बोलूँआ कि जे तुसे परमेशरो री आज़ा खे शास्त्री और फरीसिया री आज़ा ते बड़ी की नि मानो, तो तुसे कदी बी स्वर्गो रे राज्य रे नि जाई सकदे ।

☞☞☞ ☞☞ ☞☞☞☞

21 “तुसे सुणी चुकी रे कि पुराणे बखतो रे माणूआ खे बोलेया था कि ‘अत्या नि करनी’, और जो कोई बी अत्या करोगा तेसखे कचैरिया रे सजा मिलणी । 22 पर आऊँ तुसा खे ये बोलूँआ कि जो बी आपणे पाईए पाँदे रोष करोगा, तेसखे कचैरिया रे सजा मिलणी और जो कोई आपणे पाईए खे नकम्मा बोलोगा, तेसखे बडिया सभा रे सजा मिलणी और जो कोई दूजे खे ‘अरे मूर्ख’ बोलोगा से नरको री आगी री सजा जोगा ऊणा । 23 इजी री खातर जेबे तूँ आपणी पेंट बेदिया पाँदे ल्याओ और तेती तूँ याद करे कि तेरे पाईए रे मनो रे तेरिया तँई खोट ए, 24 तो आपणी पेंट तेथी बेदिया रे सामणे छाडी दे और पईले जाई की आपणे पाईए साथे मेल-जोल कर, तेबे आयी की आपणी पेंट चढ़ा ।

25 जदुओ तक तू आपणे दुश्मणो साथे बाटा रेईए, तेस साथे फटाफट मेल-जोल करी लो, केथी एडा नि ओ कि तेरा दुश्मण ताखे हाकिमो रे आथो रे देई देओ और हाकिम ताखे सिपाईया रे आथो रे देई देओ और ताखे जेला रे पाई देओ। 26 आऊँ ताखे सच बोलूँआ कि जदुओ तक तू पाई-पाई नि देई देओगा, तदुओ तक तेथा ते छुटणा नि।

??????????

27 “तुसे सुणी चुकी रे कि बोलेया था, ‘व्याभिचार नि करना।’ 28 पर आऊँ तुसा खे ये बोलूँआ कि जो कोई बी कसी जवाणसा खे बुरी नजरा ते देखोआ, तो तिने आपणे मनो रेई तेसा साथे व्याभिचार करी ला। 29 जे तेरी दाँणी आख ताखे टोकरा री बजअ बणो ई, तो तू तेसा खे काडी की सेटी दे; कऊँकि ताखे येई ठीक ए कि तेरे अंगा बीचा ते एक नाश बी ऊई जाओ, तो सारा शरीर नरको रे नि सेटेया जाओ 30 जे तेरा दाँणा आथ ताखे टोकरा री बजअ बणोआ, तो तेस बाडी की सेटी दे, कऊँकि ताखे येई ठीक ए कि तेरे अंगा बीचा ते एक नाश बी ऊई जाओ तो सारा शरीर नरको रे नि पडना। (एतेरा मतलब ये नियाँ कि आसा आपणी आख काडी की सेटी देणी या आपणा आथ बाडी देणा पर ये कि जो काम तुसा खे परमेशरो रे राज्य रे आगे बडने ते रोको ए या जो माणू तुसा खे गलत करने खे उकसाओ ए तो तुसा से माणू या चीज छाडी देणी चाईयो।)

????

(???? 19:9; ????? 10:11; ???? 16:18)

31 “ये बी बोलेया रा था, ‘जो कोई आपणी लाडिया खे तलाक देणा चाओ, तो से तेसा खे त्यागपत्र देयो।’ 32 पर आऊँ तुसा खे ये बोलूँआ कि जो कोई आपणी लाडिया खे व्याभिचारो ते अलावा किजी ओरी बजअ ते छाडोगा, तो से तेसा ते व्याभिचार करवाओआ और जो कोई तेसा छाडी रिया जवाणसा साथे व्या करोआ, से बी व्याभिचार करोआ।

????

33 “फेर तुसे सुणी चुकी रे कि पुराणे जमाने रे लोका खे बोलेया रा था, ‘चूटी कसम नि खाणी, पर परभुए री खातर आपणी कसम पूरी करनी।’ 34 पर आऊँ तुसा खे ये बोलूँआ, कि कदी कसम नि खाणी, ना तो स्वर्गो री, कऊँकि से परमेशरो रा सिंहासन ए। 35 ना तरतिया री, कऊँकि से तिना रे पैरो री चौकी ए, ना यरूशलेमो री, कऊँकि से महाराजे रा नगर ए। 36 आपणे सियो री कसम पनि खाणा, कऊँकि तू एक बी बालो खे न तो सफेद करी सकदा, ना ई काला। 37 पर तुसा री गल्ल ‘आ री आ’ और ‘ना री ना’ ऊणी चाईयो; कऊँकि जो गल्ल इजी ते जादा ओई, से शैतानो री तरफा तेई ओई।

????

(???? 6:29,30)

38 “तुसे सुणी चुकी रे कि बिधानो रे बोलेया रा था, ‘आखी रे बदले आख, और दाँदो रे बदले दाँद।’ 39 पर आऊँ तुसा खे ये बोलूँआ कि जो कोई तां साथे बुरा करो तेतेरा बदला नि लणा, पर जो कोई तुसा री दाँणी खाखा रे थप्पड बाओआ, तो तेस कनारो खे दूजी खाख बी करी देओ। 40 जे कोई तां पाँदे दोष लगाई की तांते तेरा कुरता लणा चाओआ, तो तेसखे तोती बी लणे देओ। 41 जे कोई जबरदस्ती ताखे एक मील लई चलोआ, तो तू दो मील तेस साथे चल। 42 जो कोई तांते माँगो, तेसखे दे और जो कोई तांते त्वार लणा चाओआ, तो तू तेसते मूँ नि फेर।

???????? ???? ?????

(???? 6:27,28,32,36)

43 “तुसे सुणी चुकी रे कि बिधानो रे बोलेया रा था, ‘आपणे पडोसिये साथे प्यार राखो और आपणे बैरिया साथे बैर।’ 44 पर आऊँ तुसा खे बोलूँआ कि आपणे दुश्मणा साथे प्यार राखो और जो तुसा खे सताओआ, तो तेसखे प्रार्थना करेया करो। 45 ताकि तुसे आपणे स्वर्गो रे पिते रे बच्चे ठईरो, कऊँकि से खरे लोका और बुरे लोका दूई पाँदे आपणा सूरज निकयालोआ और तर्मी लोका और पापी लोका

दूई पाँदे बरखा करोआ। ⁴⁶कऊँकि जे तुसे आपू साथे प्यार राखणे वालेया साथे ई प्यार राखोगे, तो तुसा खे क्या फाईदा ऊणा? क्या कर लणे वाले बी एड़ा ई नि करदे?

⁴⁷“जे तुसे आपणे पाईए खेई नमस्कार करोए, तो कुण जा बड़ा काम करोए? क्या दूजी जातिया रे बी एड़ा ई नि करदे? ⁴⁸इजी री तँई तुसे सिद्ध बणो, जेड़ा तुसा रा स्वर्गिय पिता सिद्ध ए।

6

???

¹“सावधान रओ! तुसे लोका खे दखाणे रिया तँई तर्मो रे काम नि करो, नई तो आपणे स्वर्गिय पिते ते कुछ बी फल नि मिलणा। ²तेवेई तो जेबे तू दान करे, तो सबी गे राग नि लगा, जेड़ा कपटी, प्रार्थना रे कअरो रे और गलिया रे करोए, ताकि लोक तिना री तारीफ करो। आऊँ तुसा खे सच बोलूँआ कि सेयो आपणा फल पाई चुके। ³पर जेबे तू दान करे, तो जो तेरा दाँणा आध करोआ, से तेरे खूँजे आथो खे पता नि ऊणा चाईए। ⁴ताकि तेरा दान गुप्त रओ और तेबे तेरा पिता जो गुप्तो रे देखोआ, तेस ताखे फल देणा।

????????

(???? 11:2-4)

⁵“जेबे तू प्रार्थना करे, तो कपटिया जेड़ी नि ऊणी चाईयो, कऊँकि लोका खे दखाणे रिया तँई प्रार्थना रे कअरो रे और सड़का रे मोड़ो रे खड़े ऊई की प्रार्थना करना तिना खे अच्छा लगोआ, पर आऊँ तुसा खे सच बोलूँआ कि सेयो आपणा फल पाई चुके। ⁶पर जेबे तू प्रार्थना करे, तो आपणे कमरे रे जा और दरवाजा बन्द करी की आपणे पिते ते, जो गुप्तो रे ए, प्रार्थना कर। तेबे तेरा पिता, जो गुप्तो रे देखोआ, तेस ताखे फल देणा। ⁷जेबे तू प्रार्थना करे तो दूजी जातिया जेड़ी बक-बक नि कर, कऊँकि सेयो समजोए कि तिना रे बऊत बोलणे ते तिना री सुणनी। ⁸इजी री खातर तुसे तिना जेड़े नि बणो, कऊँकि तुसा रा पिता पईले ई जाणोआ कि तुसा री क्या-क्या जरूरता ए।

⁹“तो तुसे ईयां प्रार्थना करेया करो;

“ओ म्हारे पिता, तुसे जो स्वर्गो रे ए,
तुसा रा नाओ पवित्तर मानेया जाओ।

¹⁰तुसा रा राज्य आओ,

जेड़ी तुसा री इच्छा स्वर्गो रे पूरी ओई, तेड़ी ई, तरतिया पाँदे बी ओ।

¹¹आसा रे पूरे दिनो री रोटी आज आसा खे दे।

¹²और जियौ आसे आपणे अपराधिया खे माफ किचेया,

तियाँ ई म्हारे अपराध बी माफ करो।

¹³आसा खे परीक्षा रे नि ल्याओ,

पर शैतानो ते बचाओ, कऊँकि राज्य, पराक्रम और महिमा तुसा री ए। आमीन।

¹⁴“तेवेई तो जे तुसे लोका रे अपराध माफ करोगे, तो तुसा रे स्वर्गिय पिते बी तुसा रे अपराध माफ करने। ¹⁵जे तुसे लोका रे अपराध माफ करो, तुसा रे पिते बी तुसा रे अपराध माफ करने।

????

¹⁶“जेबे तुसे बअरत करोए, तो कपटिया जेड़ी तुसा रे मुँओ पाँदे उदासी नि रओ, कऊँकि सेयो आपणा मूँ एतेरी तँई बणाई राखोए, ताकि लोक तिना खे बअरततारी जाणो; आऊँ तुसा खे सच बोलूँआ कि सेयो आपणा फल पाई चुके। ¹⁷पर जेबे तू बअरत करे, तो आपणे सिरो रे तेल मल और मूँ तोओ। ¹⁸ताकि लोक नि, पर तेरा पिता, जो गुप्तो रे ए, से ताखे बअरततारी जाणो, एड़िया दशा रे तेरा पिता, जो गुप्तो रे ए, से देखोआ और तेस ताखे फल देणा।

???????? ? ? ? ?

(???? 12:33,34)

19 “आपणी तई तरतिया पाँदे धन कट्टा नि करो, जेती कीड़ा और केअट लगी जाओई और जेती चोरा खे पता लगी जाओआ और चोरी करोए। 20 पर आपू खे खरा काम करी की स्वर्गो रे धन कट्टा करो, जेती ना कीड़ा लगे, ना खराब ओ, ना तेती चोरो खे पता लगेआ और ना ई चोरी करदे। 21 कऊँकि जेती तेरा धन ए, तेती तेरा मन बी लगेया रा रणा।

☞☞☞☞ ☞☞☞☞
(☞☞☞ 11:34-36)

22 “शरीरो रा दिऊआ तो आखी ए, तेबे जे तेरी आखी साफ ए, तो तेरे सारे शरीरो रे बी परयासा ऊणा। 23 पर जे तेरी आखी बुरिया ए, तो तेरे सारे शरीरो रे बी न्हेरा ई ऊणा, इजी बजअ ते से परयासा, जो तांदे ए, जे न्हेरा ओ, तो से न्हेरा कितणा बड़ा ऊणा!

☞☞☞☞☞ ☞☞ ☞☞
(☞☞☞ 16:13; 12:22-31)

24 “कोई बी माणू एकी बखतो रे दो मालका री सेवा नि करी सकदा, कऊँकि तेस एकी साथे प्यार और दूजे साथे बैर राखणा या एकी साथे मिले रा रणा और दूजा तेस तुच्छ जाणना। तुसे परमेशर और धन दूई री सेवा नि करी सकदे। 25 तेबेई तो आऊँ तुसा खे बोलूँआ कि आपणी जिन्दगिया रे बारे रे ये चिन्ता नि करो कि आसे क्या खाऊँगे और क्या पिऊँगे? ना आपणे शरीरो रे बारे रे कि क्या पईनुँगे? क्या जिन्दगी रोटिया ते और शरीर टालेया ते बढ़ी की निए? 26 सर्गो रे पछिया खे देखो, सेयो ना बांदे, ना बाडदे और ना ई पण्डारो रे कट्टा करदे, तेबे बी आसा रा स्वर्गिय पिता तिना खे खुलाओआ। क्या तुसे तिना ते जादा किमती निए? 27 तुसा बीचा ते एड़ा कुण ए, जो चिन्ता करी की आपणिया जिन्दगिया री एक कअड़ी बी बढ़ाई सकीआ?

28 “तुसे टालेया री चिन्ता कऊँ करोए? बाँके जंगली फूला पाँदे त्यान करो कि सेयो कियो बड़ोए? सेयो ना तो मईणत करदे ना आपू खे टाले बणाओए। 29 पर आऊँ तुसा खे बोलूँआ कि राजा सुलेमान आपणे सारे एशो-आरामो रे रओ था और बऊत बाँके टाले पईनो था, पर तेबे बी तेसरे टाले तिना जंगली फूला ते जादा बाँके नि थे। 30 तेबेई तो जेबे परमेशर मैदानो रे काओ खे, जो आज आए और काल आगी बीचे फूकी देणा, तो जो तिदे बी एडे बाँके फूल खिलाओआ, तो ओ कम विश्वास करने वालेयो! तुसा खे तेस इना ते बढ़ी की बाँके टाले कऊँ नि पनयाणे?

31 “तेबेई तो तुसे चिन्ता करी की ये नि बोलणा, ‘आसे क्या खाऊँगे?’ और ‘क्या पिऊँगे?’ और ‘क्या पईनुँगे?’ 32 दूजी जातिया रे लोक इना सवी चीजा री चिन्ता करोईया, पर तुसे इना चीजा री चिन्ता नि करो। कऊँकि तुसा रा स्वर्गिय पिता जाणोआ कि तुसा खे इना सवी चीजा री जरूरत ए। 33 इजी री खातर, जे पइले तुसे परमेशरो रे राज्य री टोल करो और धार्मिकता री जिन्दगी जिओ, तो यो सब चीजा तुसा खे मिली जाणिया। 34 इजी खे कालकी चिन्ता नि करो, कऊँकि काल का जो दिन ऊणा, तेस आपणी चिन्ता आपू करी लणी, आजो खे तो आजका दुःख ई बऊत ए।

7

☞☞☞☞☞ ☞☞☞☞ ☞☞ ☞☞ ☞☞☞☞
(☞☞☞ 6:37,38,41,42)

1 “दोष मत लगाओ, ताकि तुसा पाँदे बी दोष नि लगाया जाओ। 2 कऊँकि जियाँ तुसे दोष लगाओए, तियाँ ई परमेशरो तुसा पाँदे बी दोष लगाणा और जेड़ा बताव तुसे लोका साथे करोए परमेशरो बी तेड़ा ई बताव तुसा साथे करना।

3 “तूँ कऊँ आपणे पाईए री छोटी-छोटी गलतिया टालेया तांदे आपणिया बड़ी-बड़ी गलतिया नजर कऊँ नि आऊँदिया? 4 जेबे तांदे आपू दे बड़ी-बड़ी गलतिया ए, तो तूँ आपणे पाईए खे कियो बली सकेया, ‘तूँ गलत ए?’ 5 ओ कपटी! पईले आपणी बड़ी-बड़ी गलतिया देख, तेबेई तो तूँ आपणे पाईए री गलतिया ठीक-टंगो रे देखी की निकयाली सकेया।

6 “पवित्र चीज कुतेया खे नि देओ और आपणे मोती सूअरो रे आगे नि सेटो, एडा नि ओ कि सेयो तिना खे आपणे पैरा निटे केली देयो और ताखे खाणे पड़ो।

~~~~~  
 (~~~~~ 11:9-13)

7 “तुसारी जो बी जरूरत ए से परमेशरो ते माँगो और परमेशरो ते पाणे री उम्मीद बी राखो। 8 कऊँकि जो कोई माँगोआ तेसखे मिलोआ। जो टोलोआ, से पाओआ। जो खटखटाओआ तेसखे खोलेया जाओआ। 9 तुसा बीचा ते कुण एडा माणू ए कि तेसरा पाऊ तेसते रोटी माँगोगा और से तेसखे पात्थर देओ? 10 या मछली माँगो और तेसखे साप देओ? 11 तो तेवे तुसे बुरे ऊई की आपणे बच्चेया खे खरी चीजा देणा जाणोए, तो तुसा रे स्वर्गिय पिते आपणे मांगणे वालेया खे अच्छी चीजा कऊँ नि देणियां? 12 इजी बजअ ते जो कुछ तुसे चाओए कि माणू तुसा साथे करो, तुसे बी तिना साथे तेडा ई करो, कऊँकि मूसे रा बिधान और भविष्यवक्तेया री येई शिक्षा ए।

~~~~~  
 (~~~~~ 13:24)

13 “स्वर्गो रे परमेशरो तक पऊँछणे री बाट बऊत कठण ए। पर एते बाटा रिये तुसा चलणा ईए। एक और चौड़ी बाट ए जिदे जादातर लोक चलणा पसंद करोए, से बाट नरको खे जाओई और लोक तिदे मरी जाणे। 14 कऊँकि संगडा ए से फाटक और कठण ए से बाट, जो अनन्त जिन्दगिया खे पऊँछाओई और सेयो थोडे ईए, जिना खे से मिलोई।

~~~~~  
 (~~~~~ 6:43,44,46; 13:25-27)

15 “चूटे भविष्यवक्तेया ते सावधान रओ, जो पेडा रे पेशो रे तुसा गे आओए, पर पीतरो ते सेयो फाड़ने वाले भेड़िए ओए। 16 तिना रे बुरे कामो ते तुसा सेयो पछ्याणी लणे, क्या जाडो रे अँगूर और कांडेया ते दाऊगले तोडे जाओए? 17 तियाँ ई हर एक अच्छा डाल अच्छा फल ल्याओआ और नकम्मा डाल बुरा फल। 18 अच्छा डाल बुरा फल नि ल्याई सकदा और ना नकम्मा डाल अच्छा फल ल्याई सकदा। 19 जियाँ जो-जो डाल अच्छा फल नि ल्याऊँदे, सेयो बाडे जाओए और आगी बीचे सेटे जाओए। तियाँ ई चूटे भविष्यवक्ता बी नरको री आगी रे सेटे जाणे। 20 ईयां तिना रे कामो ते तुसा सेयो पछ्याणी लणे।

21 “जो माखे, ‘ओ परभु, ओ परभु’ बोलोआ, तिना बीचा ते हर एक स्वर्गो रे राज्य रे नि जाणा, पर सेई, जो-जो मेरे स्वर्गिय पिते री इच्छा पाँदे चलोआ। 22 न्याय रे तेस दिने बऊत माणूआ माखे बोलणा, ‘ओ परभु, ओ परभु, क्या आसे तेरे नाओं ते भविष्यवाणी नि किती, और तेरे नाओं ते दुष्टात्मा नि निकयालिया, और तेरे नाओं ते बऊत सामर्थो रे काम नि किन्ते?’ 23 तेवे मां तिना खे खुली की बोली देणा, ‘आऊँ तो तुसा खे कदी नि जाणदा। ओ कुकर्म करने वालेयो, मांगा गे ते चली जाओ।’

~~~~~  
 (~~~~~ 6:47-49)

24 “इजी री खातर जो कोई मेरिया गल्ला सुणी की तिना खे मानोआ, से तेस अक्लमंद माणूए जेडा ऊणा, जिने आपणा कअर चट्टानी पाँदे बणाया। 25 तेवे बरखा उईया, बादा आईया और तूफान चले, और तेस कअरो रे टकराए, पर से कअर नि टलेया, कऊँकि तिजी री निऊँ चट्टानी पाँदे थी बणाई री। 26 पर जो कोई मेरी इना गल्ला तो सुणोआ, पर मानदा नि, से तेस मूखं माणूए जेडा ऊणा, जिने आपणा कअर बालूए पाँदे बणाया। 27 जेवे बरखा ऊईया, बादा आईया, तूफान चले और तेस कअरो साथे टकराए और से कअर तेबुई टलीगा और सत्यानाश ऊईगा।”

28 जेवे यीशु इना गल्ला करी चुके, तो एडा ऊआ कि जो तेती पीड़ थी, से हैरान उईगी। 29 कऊँकि सेयो तिना शास्त्रिया जेडे नि, पर अक्को साथे उपदेश देयो थे।

8

ⓂⓂⓂⓂⓂ ⓂⓂ ⓂⓂⓂⓂⓂ ⓂⓂ ⓂⓂⓂⓂⓂ
(ⓂⓂⓂⓂⓂ 1:40-45; ⓂⓂⓂⓂⓂ 5:12-16)

1 जेबे यीशु तेस पाहड़ो ते उतरे, तो एक बऊत बड़ी पीड़ तिना पीछे आईगी। 2 तेबे देखो, एक कोदिए तिना गे आयी की तिना गे माथा टेकेया और बोलेया, “ओ प्रभु, जे तुसे चाओ तो माखे ठीक करी सकोए।” 3 यीशुए आपणा आध आगे कितेया और से छूँयां और तेसखे बोलेया, “आऊँ चाऊँआ कि तूँ ठीक ऊई जाए।” से तेबुई आपणे कोदो ते ठीक ऊईगा। 4 यीशुए तेसखे बोलेया, “देख, केसी गे नि बताणा, पर जाई की आपू खे पुरोईतो गे दखा और जो कुछ मूसे नबीए चढावा टराई राखेया, तेस चढा, ताकि तिना खे गवाई ओ कि तूँ ठीक ऊईगा।”

ⓂⓂⓂⓂⓂⓂⓂⓂ ⓂⓂ ⓂⓂⓂⓂⓂⓂⓂⓂ
(ⓂⓂⓂⓂⓂ 7:1-10)

5 जेबे यीशु कफरनहूम नगरो रे आए, तो एकी सूबेदारे तिना गे आयी की तिना ते बिनती किती, 6 “ओ प्रभु! मेरा दास कअरे अदरंगो ते दुःखी पड़ी रा।” 7 यीशुए तेसखे बोलेया, “आऊँ आयी की तेसखे ठीक करूंगा।” 8 सूबेदारे जवाब दितेया, “ओ प्रभु! आऊँ एते जोगा निए कि तुसे मेरे कअरे आयी सको, पर जे तुसे आपणे मुंओ तेई बोली देओ, तो से मेरा दास ठीक ऊई जाणा। 9 कऊँकि आऊँ बी पराधीन माणू ए और सिपाई मेरे आथो रे ए। जेबे एकी खे बोलूँआ, ‘जा,’ तो से जाओआ और दूजे खे बोलूँ, ‘आओ,’ तो से आओआ। आपणे दासा खे बोलूँ, ‘थे कर,’ तो से करोए।”

10 ये सुणी की यीशु हैरान ऊईगे और जो तिना पीछे आऊणे लगी रे थे, तिने तिना खे बोलेया, “आऊँ तुसा खे सच लगी रा बोलणे कि मैं इस्राएलो रे बी एड़ा विश्वास नि देखेया। 11 आऊँ तुसा खे बोलूँआ कि बऊत सारे दूजिया जातिया रे लोक पूर्वा और पच्छिमो ते आयी की अब्राहम, इसहाक और याकूबो साथे स्वर्गो रे राज्य रे रोटी खाणे बैठणे। 12 पर बऊत सारे इस्राएली जिना खे स्वर्गो रा राज्य त्यार कितेया राए, बारे न्हरे रे पाई देणा, तेती रोणा और दाँदा रा किरइना ई ऊणा।” 13 तेबे यीशुए सूबेदारो खे बोलेया, “कअरे जा, जेड़ा तेरा विश्वास ए, तेड़ा ई ताखे ओ।” और तेबुई तेसरा दास ठीक ऊईगा।

ⓂⓂ ⓂⓂⓂⓂⓂ ⓂⓂ ⓂⓂⓂⓂⓂ
(ⓂⓂⓂⓂⓂ 1:29-34; ⓂⓂⓂⓂⓂ 4:38-41)

14 जेबे यीशु पतरसो रे कअरे आए, तो तिने पतरसो री सासु बुखारो साथे पड़ी री देखी। 15 तिने तेसा रा आथ छूँयां और तेसा रा बुखार उतरी गा। तेबे से उठी की तिना री सेवा करने लगी। 16 जेबे साँज ऊई, तेबे सेयो बऊत लोका खे यीशुए गे ल्याए, जिना रे दुष्टात्मा थिया और तिने दुष्टात्मा आपणे वचनो साथे निकयालिया और सब बमार ठीक किते। 17 ताकि जो वचन यशायाह भविष्यबक्ते बोलेया था से पूरा ओ
“तिने आपू ई म्हारिया कमजोरिया लयी लिया
और म्हारिया बमारिया चकी तिया।”

ⓂⓂⓂⓂⓂ ⓂⓂ ⓂⓂⓂⓂⓂ ⓂⓂⓂⓂⓂ ⓂⓂ ⓂⓂⓂ
(ⓂⓂⓂⓂⓂ 9:57-62)

18 यीशुए जेबे आपणे चऊँ कनारे लोका री एक बड़ी पीड़ देखी, तो तिने आपणे चलेया खे गलीली समुद्रो ते पार जाणे री आज्ञा दिती। 19 तेबे एक शास्त्रिए तिना गे नेडे आयी की बोलेया, “ओ गुरु! जेती केथी तुसे जाओगे, मां तुसा पीछे-पीछे चली पड़ना।” 20 यीशुए तेसखे बोलेया, “गीदड़िया रे डवार और सर्गो रे पछिया रे बसेरे ओए, पर मां माणू रे पुत्रो खे सिर राखणे खे बी आपणा कअर निए।” 21 एक और चले तिना खे बोलेया, “ओ प्रभु! पईले माखे जाणे दे कि आऊँ आपणे पिते खे दवाई आऊँआ। तेबे तां पीछे चली पड़ुंगा।” 22 यीशुए तेसखे बोलेया, “तूँ मां पीछे आईजा, और जो आत्मिक रूपो रे मरे रे ए तिना खे आपणे मुड़दे दबाणे दे।”

॥॥॥॥॥॥ ॥॥ ॥॥॥॥॥॥ ॥॥॥॥

(॥॥॥॥॥॥ 4:35-41; ॥॥॥॥॥॥ 8:22-25)

23 जेबे यीशु किस्तिया रे चढ़े, तो तिना रे चले तिना पीछे आईगे। 24 तेबे देखो, समुद्रो रे बऊत बड़ा तूफान आया जेते की किस्ती पाणिए साथे टखी गी और यीशु सये रे थे। 25 तेबे चलेया नेड़े आयी की यीशु जगाए और तिना खे बोलेया, “ओ प्रभु! आसा खे बचा, आसे डूबणे वाले ए।” 26 यीशुए आपणे चलेया खे बोलेया, “ओ कम विश्वास करने वालेयो! कऊँ डरोए?” तेबे यीशु उठे और तूफान और पाणिए खे बकणे लगे और तेबे सब शान्त ऊईगा। 27 तेबे लोक हैरान ऊई की बोलणे लगे, “ये केड़ा माणूए? तूफान और पाणी बी एसरी आज्ञा खे मानोए।”

॥॥॥॥॥॥॥॥॥ ॥॥ ॥॥॥॥॥॥ ॥॥ ॥॥॥॥॥॥ ॥॥ ॥॥॥ ॥॥॥॥

(॥॥॥॥॥॥ 5:1-20; ॥॥॥॥॥॥ 8:26-39)

28 जेबे सेयो पार गदरेनिया रे देशो रे पऊँछे, तेबे दो माणू जिना रे दुष्टात्मा थिया कबरा ते निकलदे ऊए तिना खे मिले। सेयो इतणे प्रचण्ड थे कि कोई बी तेसा बाटा रिये जाई नि सको था। 29 तेबे तिने चींगी की बोलेया, “ओ परमेशरो रे पुत्र! आसा रा तां साथे क्या काम? क्या तूँ बखतो ते पडले ई आसा खे एती दुःख देणे आयी रा?” 30 तिना ते थोड़ी जी दूर सूअरो रा एक चूण्ड चरने लगी रा था। 31 दुष्टात्मे तिना ते ये बोली की बिनती किती, “जे तूँ आसा खे निकयालने ई लगी रा तो सूअरा रे चूण्डो रे पेजी दे।” 32 तिने तिना खे बोलेया, “जाओ!” सेयो निकली की सूअरा रे बैठी गिया और सारा चूण्ड काअड़ी ते छवाल लयी की डूबी गा और मरी गा। 33 तिना खे चरणे वाले नटे और नगरो रे गए और जिना रे दुष्टात्मा थिया तिना रा सारा आल सुणाया। 34 तेबे सारे नगरो रे लोक यीशुए खे मिलणे आए, और तिना खे देखी की बिनती किती कि म्हारे वन्ने ते निकली जाओ।

9

॥॥॥॥॥॥ ॥॥ ॥॥॥॥॥॥ ॥॥ ॥॥॥ ॥॥॥॥

(॥॥॥॥॥॥ 2:1-12; ॥॥॥॥॥॥ 5:17-26)

1 तेबे यीशु किस्तिया रे चढ़ी की पार गए, और आपणे नगरो खे आए। 2 तेबे यीशुए देखेया, कई लोक एक अदरंगो रे रोगिए खे माँजे पाँदे चकी की तिना गे ल्याए, यीशुए तेसरा विश्वास देखेया और तेस अदरंगो रे रोगिए खे बोलेया, “ओ पाऊआ! याओ राख; तेरे पाप माफ ऊईगे।” 3 तेबे कई शास्त्रिए सोचेया, “ये तो परमेशरो री निन्दा करने लगी रा।” 4 यीशुए तिना रे मनो री गल्ल जाणी की तिना खे बोलेया, “तुसे आपणे मनो रे बुरा बिचार कऊँ करने लगी रे? 5 ये बोलणा बऊत आसान ए कि, तेरे पाप माफ ऊईगे, पर ये बोलणा बऊत कठण ए कि, आपणा मांजा चकी की चल फिर।” 6 पर इजी री खातर कि तुसे जाणी लओ कि मां माणू रे पुत्रो खे तरतिया पाँदे पाप माफ करने रा बी अक्क ए।” यीशुए तेस अदरंगो रे रोगिए खे बोलेया, “उठ, आपणा मांजा चक और आपणे कअरो खे चली जा।” 7 से उठी की आपणे कअरो खे चली गा। 8 लोक ये देखी की डरी गे और परमेशरो री महिमा लगे करने, जिने माणूआ खे एड़ा अक्क देई राखेया।

॥॥॥॥॥॥ ॥॥ ॥॥॥॥॥॥॥ ॥॥॥॥

(॥॥॥॥॥॥ 2:13-17; ॥॥॥॥॥॥ 5:27-32)

9 तेथा ते आगे चली की यीशुए मत्ती नाओं रा एक माणू करो री चौकिया पाँदे बैठेया रा देखेया और तिने तेसखे बोलेया, “मां पीछे आओ।” से उठेया और तिना पीछे चली पड़ेया।

10 जेबे यीशु कअरे रोटी खाणे बैठेया, तेबे बऊत जणे कर लणे वाले और पापी आयी की यीशु और तिना रे चलेया साथे रोटी खाणे बैठे। 11 ये देखी कि फरीसिये तिना रे चलेया खे बोलेया, “तुसा रा गुरू इना कर लणे वाले और पापिया साथे रोटी खाणे कऊँ बैठी रा।” 12 यीशुए ये सुणी की तिना खे बोलेया, “बैद बमारा खे चाईयो, पलेया-चंगेया खे नि। 13 तो तुसे जाओ और इजी रा मतलब जाणी लओ कि, ‘आऊँ बलिदान नि, पर दया चाऊँआ।’ कऊँकि आऊँ तर्मिया खे नि, पर पापिया खे बुलाणे आयी रा।”

⚬⚬⚬⚬⚬ ⚬⚬ ⚬⚬⚬⚬

(⚬⚬⚬⚬⚬ 2:18-22; ⚬⚬⚬⚬⚬ 5:33-39)

14 तेबे बपतिस्मा देणे वाले यूहन्ने रे चलेला तिना गे आयी की बोलेला, “क्या बजअ ए कि आसे और फरीसी इतणे बअरत करूँए और तेरे चले बअरत नि करदे?” 15 यीशुए तिना खे बोलेला, “क्या बराती, जदुओ तक लाडा तिना साथे ए, तदुओ तक शोग मनाई सको ए? पर सेयो दिन आऊणे, जेबे लाडा बरातिया ते लग करेया जाणा, तेस बखते तिना बअरत करना। 16 नये टाले री टाली, पुराणे टालेया रे कोई नि लगांदा, कऊँकि टाली पुराणे टालेया खे ओर बी कटटा करी देओ ई, मतलब-नया टाला पुराणे साथे ओर बी जादा फटी जाओआ। 17 नया अँगूरा रा रस पुराणे खल्लडुआ रे कोई नि परदा। कऊँकि एडा करने ते खल्लडु फटी जाओए और अँगूरा रा रस बारे निकली जाओआ और खल्लडु नाश ऊई जाओ। पर जे नया अँगूरा रा रस नये खल्लडुआ रे परो तो दोनो बचे रे रओए।”

⚬⚬⚬⚬⚬ ⚬⚬ ⚬⚬⚬⚬⚬ ⚬⚬ ⚬⚬⚬⚬ ⚬⚬⚬⚬⚬

(⚬⚬⚬⚬⚬ 5:21-43; ⚬⚬⚬⚬⚬ 8:40-56)

18 जेबे यीशु इना गल्ला तिना खे बोलणे ई लगी रे थे, तेबे एक अधिकारी तिना गे आया और तिना गे माथा टेकेया और बोलेला, “मेरी बेटी एबु-एबु मरी गी, पर जे तुसे चलो और आपणा आथ राखो तो से जिऊँदी ऊई जाणी।” 19 यीशु उठे और आपणे चलेला लयी की तेस पीछे चली गे। 20 तेबे एक जवाणस आयी, तेसा खे बारा साला ते खून बइणे री बमारी थी, से पीछे ते आयी और तेसे यीशुए रे टालेया रा कनारा छूँयां। 21 कऊँकि से आपणे मनो रे बोलो थी, “जे आऊँ तिना रे टाले ई छूँई लऊँगी, तो ठीक ऊई जाणी।” 22 यीशुए तेसा खे मुडी की बोलेला, “बेटिये! याओ राख, तेरे विश्वासे तूँ बचाईती।” तेबे से जवाणस तेबुई ठीक ऊईगी। 23 जेबे यीशु तेस अधिकारिए रे कअरे पऊँछे, तेबे तिने बांसली बजाणे वाले और पीड़ आल्ला-गोल्ला करदे ऊए देखी। 24 तेबे यीशुए बोलेला, “आटी जाओ, मुन्नी मरी नि रई, पर सऊणे लगी री।” ये सुणी की सेयो तिना रा मजाक लगे ऊडाणे। 25 पर जेबे पीड़ तथा निकयाली ती, तेबे तिने पीतरे जाई की तेसा मुन्निया रा आथ पकड़या और से ठीक ऊईगी। 26 तेबे ये गल्ल पूरे देशो रे फैली गी।

⚬⚬ ⚬⚬⚬⚬⚬⚬ ⚬⚬ ⚬⚬⚬⚬ ⚬⚬⚬⚬

27 जेबे यीशु तथा ते आगे गए, तेबे दो अन्दे तिना पीछे ये बोली की आक्का लगे पाणे, “ओ दाऊदो री ल्वाद! आसा पाँदे दया कर।” 28 जेबे सेयो कअरे पऊँछे, तेबे सेयो दो अन्दे तिना गे आए, तेबे यीशुए तिना खे बोलेला, “क्या तुसा खे विश्वास ए कि आऊँ तुसा खे ठीक करी सकूँआ?” तिने बोलेला, “आ प्रभु।” 29 तेबे यीशुए तिना रिया आखिया छूँई की तिना खे बोलेला, “तुसा रे विश्वासो रे मुताबिक तुसा साथे ओ।” 30 और सेयो तेबुई देखणे लगे। यीशुए तिना खे सावधान करदे ऊए बोलेला, “देखो! कोई बी एसा गल्ला खे नि जाणो।” 31 पर तिने बारे निकली की तिना रा यश सारे देशो रे फैलाई ता।

⚬⚬ ⚬⚬⚬⚬⚬⚬ ⚬⚬ ⚬⚬⚬⚬ ⚬⚬⚬⚬

32 जेबे सेयो बार लगी रे थे जाण, तेबे लोक एक गुँगे खे जेसरे दुष्टात्मा थी, यीशुए गे ल्याए।

33 जेबे यीशुए दुष्टात्मा निकयाली ती, तेबे गुँगा बोलणे लगेया और लोके हैरान ऊई की बोलेला, “इसराएलो रे एडा कदी नि देखेया।” 34 पर फरीसिये बोलेला, “थे तो दुष्टात्मा रे सरदारो री मतादा ते दुष्टात्मा खे निकयालोआ।”

⚬⚬⚬⚬⚬⚬ ⚬⚬ ⚬

35 यीशु और तिना रे चले गलील प्रदेशो रे कई नगर और कई गांव रे कूमदे एए और तिना रे प्रार्थना रे कअरो रे उपदेश देंदे एए और परमेशरो रे राज्य रा सुसमाचार प्रचार करदे एए और हर बमारी और कमजोरी दूर करदे एए। 36 जेबे तिने पीड़ देखी तो तिना खे लोका पाँदे तरस आया, कऊँकि सेयो तिना पेडा जेडे, जिना रा कोई रखवाला नि ऊँदा, बेचैन और पटक ऊए रे थे। 37 तेबे यीशुए आपणे चलेला खे बोलेला, “पाक्के रे डोरू तो बऊत ए, पर मजूरदार कम ए। 38 इजी री खातर डोरूआ रे मालको ते प्रार्थना करो कि सेयो आपणे डोरूआ बडाणे खे मजूरदार पेजो।”

10

ⓂⓂⓂⓂ ⓂⓂ ⓂⓂⓂⓂ ⓂⓂⓂⓂⓂⓂⓂⓂ
(ⓂⓂⓂⓂ 3:13-19; ⓂⓂⓂⓂ 6:12-16)

1 तेबे यीशुए आपणे बारा चले बुलाए और तिना खे दुष्टात्मा पाँदे अक्क दित्तिया कि हर बमारिया खे निकयालो और हर कमजोरिया खे दूर करो। 2 इना बारा प्रेरिता रे नाओं यो ए-पईला शमौन, जेसखे पतरस बी बोलोए, और तेसरा पाई अन्दिरयास, जब्दियो रा पाऊ याकूब और तेसरा पाई यूहन्ना। 3 फिलिप्पुस, बरतुलमै थोमा, कर लणे वाला मत्ती, हलफईसो रा पाऊ याकूब और तद्दै। 4 शमौन कनानी, यहूदा इस्करियोती, जिने सेयो पकड़वाए बी थे।

ⓂⓂⓂⓂ ⓂⓂⓂⓂⓂⓂ ⓂⓂ ⓂⓂⓂⓂ ⓂⓂ ⓂⓂⓂ
(ⓂⓂⓂⓂ 6:7-13; ⓂⓂⓂⓂ 9:1-6; 10:4-12)

5 यो बारा जणे यीशुए ये आज्ञा देई की पेजे कि ओरी जातिया बीचे नि जाणा, “ना ई सामरिया रे कसी बी देशो रे जाणा। 6 पर इस्राएलो रे कराने री राची रिया पेडा गे ई जाणा 7 और चलदे-चलदे ये प्रचार करो कि स्वर्गो रा राज्य नेडे आईगा रा। 8 बमारा खे ठीक करो, मरेया रे खे जिऊंदा करो, कोदिया खे शुद्ध करो, दुष्टात्मा खे निकयालो, तुसे मुफ्त पाई राखेया और मुफ्त ई देओ। 9 आपणी गाठड़िया रे ना सुईना, ना रूपा और ना तांबा राखणा। 10 बाटा खे ना चोला, ना दो कुरते, ना जोडे और ना ई सोटा लओ, कऊँकि मजूरदारो खे तेसरी रोटी तो मिलणी ई चाईयो।

11 “तुसे जेते बी गांव या नगरो रे जाओ तो पता लगाओ कि कुण खरा ए? और जदुओ तक तेथा ते नि निकलो, तेसगे ई रओ। 12 जेबे तुसे तेसरे कअरे जाओ तो तेसखे आशीष देणी। 13 जे तेस कअरो रे माणू खरे ओगे तो तुसा रा कल्याण तिना गे पऊँछणा, पर सेयो खरे नि ओगे तो तुसा रा कल्याण तुसा गे वापस आयी जाणा। 14 जो कोई तुसा खे मानोगा नि और तुसा री गल्ला नि सुणो, तो तेस कअरो या नगरो ते निकलदे ऊए आपणे पैरा री तूड तेथी चाडी देयो। 15 आऊँ तुसा खे सच बोल्नुआ कि जेबे न्याय रा दिन आऊणा, तेबे तेस नगरो री दशा ते, सदोम और गमोरा रे देशो री दशा जादा सईणे जोगी ऊणी।”

ⓂⓂⓂⓂ ⓂⓂⓂⓂⓂⓂ ⓂⓂⓂⓂ
(ⓂⓂⓂⓂ 13:9-13; ⓂⓂⓂⓂ 21:12-17)

16 और यीशुए बोलेया, “देखो, आऊँ तुसा खे पेडा जेडे तिना लोका बीचे पेजुँआ जो भेड़िए जेडे खतरनाक ए, तो तुसे सापो जेडे अक्लमंद और कबूतरो जेडे शरीफ रओ वणे रे। 17 पर लोका ते चौकस रओ, कऊँकि तिना तुसे पंचायती रे देई देणे और आपणी प्रार्थना रे कअरो रे तुसा खे कोडे बाणे। 18 तुसे मेरी तई हाकिमो और राजेया रे सामणे तिना पाँदे और दूजी जातिया पाँदे गवा ऊणे खे पऊँछाए जाणे। 19 जेबे सेयो तुसा खे पकड़वाओगे, तेबे ये चिन्ता नि करनी कि आसा कियौँ और क्या करना, कऊँकि जो बी तुसा बोलणा ओगा, से तुसा खे तेस बखते ई बताई देणा। 20 कऊँकि बोलणे वाले तुसे नि, पर तुसा रे पिते रा पवित्र आत्मा तुसा रे बोलोआ।

21 “पाईया आपणे पाई और पितेया आपणे पाऊ कुलवाणे खे पकड़वाणे और बच्चे आपणे माया-बाओ रे खलाफ उठणे और तिना सेयो कुलाई देणे। 22 मेरे नाओं री बजअ ते सबी लोका तुसा ते बैर राखणा, पर जो आखरी तक सबर राखोगा, तेसरा ई उद्धार ऊणा। 23 जेबे सेयो तुसा खे एकी जगा रे सताओगे, तो तुसे दूजी जगा खे नठी जाणा। आऊँ तुसा खे सच लगी रा बोलणे कि तुसे इस्राएलो रे सारे देशो रे कूमी नि चुकणे कि तदुओ खे माणू रा पुत्र आयी जाणा।

24 “चेला आपणे गुरूओ ते बड़ा नि ऊँदा; ना दास आपणे मालको ते। 25 चले रा गुरूओ रे और दासो रा मालको रे बराबर ऊणा ई बऊत ए; जेबे तिने कअरो रे मालको खे शैतान बोलेया, तो तेसरे कअरो वालेया खे क्या कुछ नि बोलणा?

ⓂⓂⓂ ⓂⓂ ⓂⓂⓂⓂ ⓂⓂⓂⓂⓂⓂ
(ⓂⓂⓂⓂ 12:2-7)

तुसे तो भविष्यबक्ते ते बी बड़े खे देखणे गए थे। ¹⁰ये सेईए, जेसरे बारे रे पवित्तर शास्त्रो रे लिखी राखेया कि

“देख, आऊँ आपणे दूतो खे तांते आगे-आगे पेजुँआ,

जेस तांते आगे जाई की तेरी बाट त्यार करनी।”

¹¹“आऊँ तुसा खे सच लगी रा बोलणे कि जो जवाणसा ते जम्मी रे, तिना बीचा ते यूहन्ना बपतिस्मा देणे वाले ते, कोई बी बड़ा नि ऊआ, पर जो स्वर्गो रे राज्य रे छोटटे ते छोटा ए से तेसते बड़ा ए। ¹²यूहन्ना बपतिस्मा देणे वाले रे दिना ते लयी की एबुए तक स्वर्गो रे राज्य रे बलपूर्वक प्रवेश ऊँदा रया, पर तागतबर तेसखे जबरदस्ती छुड़ाई लओए। ¹³यूहन्ना बपतिस्मा देणे वाले तक सारे भविष्यबक्ता और बिधान भविष्यवाणी करदे रए। ¹⁴जे चाओ, तो मानो कि एलिय्याह जो आऊणे वाला था, से येईए। ¹⁵जो समजी सकोआ से तिजी खे त्यानो साथे सुणो और मानी बी लओ।

¹⁶“आऊँ आजकाल के लोका री उपमा किजी साथे करूँ? सेयो तिना बच्चेया जेड़े ए, जो बजारो रे बैठी की एकी-दूजे खे आक्का पाई की बोलोए ¹⁷कि आसे तुसा खे बांसली बजाई, पर तुसे नि नाचे; आसे शोग कितेया, पर तुसे छाती नि बजाई। ¹⁸कऊँकि यूहन्ना ना खांदा आया और ना पींदा आया और सेयो बोलोए, तेसरे दुष्टात्मा ए।” ¹⁹पर आऊँ माणू रा पुत्र खांदा-पींदा ऊआ आया और सेयो बोलोए कि देखो, पेटू और पियक्कड़ माणू, कर लणे वालेया रा और पापिया रा दोस्त ए, पर ज्ञान आपणे कामो की सच्चा ठराई राखेया।”

~~~~~

(~~~~~ 10:13-15)

<sup>20</sup>तेवे यीशु तिना रे लोका नगरा खे लवामे देणे लगेया, जिना बीचे तिने बऊत सामर्था रे काम किते थे, कऊँकि तिने आपणा मन नि था फेरया रा। <sup>21</sup>“हाय खुराजीन! हाय बैतसैदा! जो सामर्था रे काम तुसा रे किते, जे सेयो सूर और सैदा रे नगरा रे ऊँदे, तो टाटा रे शोको रे टाल्ले पईनी की और आपू दे स्वा मली की और दुःखी ऊई की सेयो कदका मन फिराई देंदे। <sup>22</sup>पर आऊँ तुसा खे बोलूँआ कि जेबे न्याय रा दिन ऊणा, तेवे तुसा री दशा ते, सूर और सैदा नगरो री दशा जादा सईणे जोगी ऊणी। <sup>23</sup>ओ कफरनहूम! क्या तूँ स्वर्गो तक ऊच्चा करेया जाणा? तूँ तो नरको तक थाले करेया जाणा। जो सामर्था रे काम तांदे ऊए, जे सेयो काम, सदोम नगरो रे ऊँदे, तो से आजो तक बणेया रा रणा था। <sup>24</sup>पर आऊँ तुसा खे बोलूँआ कि जेबे न्याय रा दिन आऊणा तेवे, तेरी दशा ते सदोमो रे नगरो री दशा जादा सईणे जोगी ऊणी।”

~~~~~

(~~~~~ 10:21,22)

²⁵तेस ई बखते यीशुए बोलेया, “ओ पिता! स्वर्ग और तरतिया रे प्रभु! आऊँ तुसा रा धन्यवाद करूँआ कि तुसे यो गल्ला ज्ञानी और समजदारा ते लकोई रिया राखिया और बालका गे बताईया। ओ पिता! कऊँकि तुसा खे येई खरा लगेया।” ²⁶आ, ओ पिता! कऊँकि तुसा खे येई खरा लगेया।

²⁷“मेरे पिते मांगे सब कुछ संबाली राखेया। कोई पुत्रो खे नि जाणदा, बस पिता जाणोआ। कोई पिते खे नि जाणदा, बस पुत्र जाणोआ और से, जेस पाँदे पुत्र तिजी खे परगट करना चाओ। ²⁸ओ सब मईणत करने वालेयो! और बोजे की दवे रे लोको, मांगे आओ, मां तुसा खे आराम देणा।

²⁹“मेरे चले बणो और मेरी गल्ल मानेया करो कऊँकि आऊँ नमूर और मनो ते दीन ए, और तेवे तुसा आपणे मनो रे आराम पाणा। ³⁰कऊँकि मेरा काम आसान ए और बोज अलका ए।”

12

~~~~~

(~~~~~ 2:23-28; ~~~~~ 6:1-5)

<sup>1</sup>तेस बखते यीशु आरामो रे दिने डोरूआ रिये जाणे लगी रे थे। जेबे तिना रे चलेया के पूख लगी, तेवे सेयो सिल्ले तोड़ी-तोड़ी की खाणे लगे। <sup>2</sup>तेवे फरीसिये तिना खे देखी की यीशुए खे बोलेया,

“देख, तेरे चले से काम लगी रे करने, जो आरामो रे दिने करना ठीक निए।” 3 यीशुए तिना खे बोलेया, “क्या तुसे पढ़ी नि राखेया कि जेबे दाऊद और तेसरे साथिया खे पूख लगी, तो तिने क्या कित्तेया? 4 सेयो कियाँ परमेशरो रे भवनो रे गये और तिने पेंटा रिया रोटिया खाईया, जबकि बिधानो रे मुताबिक तिना, ना तो से और ना तेसरे साथी खाई सको थे, पर पुरोईत ई खाई सको थे। 5 क्या तुसे बिधानो रे नि पढ़ेया कि पुरोईत आरामो रे दिनो रे मन्दरो रे नियम तोड़ने रे बी निर्दोष ठईरो थे? 6 पर आऊँ तुसा खे बोळूँ कि ऐती से ए, जो मन्दरो ते बी बड़ा ए। 7 जे तुसे एतेरा मतलब जाणदे कि, ‘आऊँ कृपा ते खुश ए,’ बलिदानो ते नि, तो तुसे निर्दोषो खे दोषी नि ठरदे। 8 आऊँ माणू रा पुत्र आरामो रे दिनो रा बी प्रभु ए।”

ⓂⓂⓂⓂ ⓂⓂ ⓂⓂⓂⓂⓂⓂⓂⓂⓂⓂ ⓂⓂ ⓂⓂⓂ ⓂⓂⓂⓂ

(ⓂⓂⓂⓂⓂ 3:1-6; ⓂⓂⓂⓂ 6:6-11)

9 तथा ते चली की सेयो तिना रे प्रार्थना रे कअरो रे आए। 10 तेती एक माणू था, जेसरा आथ सूकेया रा था। तिने यीशुए पाँदे दोष लगाणे रिया तई तिना ते पूछेया, “क्या आरामो रे दिने चंगा करना ठीक ए?” 11 यीशुए तिना खे बोलेया, “तुसा बीचा ते एड़ा कूणे, जेसगे एक ई पेड ओ और से आरामो रे दिने गड्डे रे पड़ी जाओ और से तेसा खे नि निकयालो? 12 पला, माणूए री कीमत तो पेडा ते कितणी बड़ी की ए। इजी री खातर बिधानो रे मुताबिक आरामो रे दिने पला करना ठीक ए।” 13 तेबे यीशुए तेस माणूए खे बोलेया, “आपणा आथ आगे कर” तिने आगे कित्तेया, तेबे तेसरा आथ दूजे आथो जेड़ा ठीक ऊईगा। 14 तेबे फरीसिये बारे जाई की यीशुए रे खलाफ योजना बनाई कि तिना खे कियाँ बर्बाद करिए।

ⓂⓂⓂⓂⓂⓂⓂⓂ ⓂⓂ ⓂⓂⓂⓂⓂⓂⓂⓂⓂⓂ ⓂⓂ ⓂⓂⓂⓂⓂ

15 ये जाणी की यीशु तथा ते चली गे और बऊत जणे तिना पीछे आईगे और यीशुए सबी खे चंगाई दिती। 16 तेबे यीशुए सेयो सावधान कित्ते कि मेरे बारे रे केसी गे नि बताणा, “आऊँ परमेशरो रा पुत्र ए।” 17 ताकि जो वचन यशायाह भविष्यवक्ते बोलेया था, से पूरा ओ;

18 “देखो, ये मेरा सेवक ए, जो मैं चूणी राखेया।

मेरा प्यारा, जेसते मेरा मन खुश ए,

मां आपणा पवित्तर आत्मा तेसरे पाणा;

और तेस अन्य जातिया खे न्याय रा सुसमाचार देणा।

19 तेस ना चगाड़ा करना, ना चिल्लाणा,

और ना ई केसी बजारो रे तेसरी आवाज सुणनी।

20 जो लोक बेसहारा ए, तेस तिना साथे नरमाईया ते पेश आऊणा।

तेस सेयो मरने नि देणे और तिना रा न्याय करना,

जदुओ तक तिना खे निर्दोष नि ठराई देओ।

21 जो दुजिया जातिया ऊणिया तिना खे तेसरे नाओं पाँदे उम्मीद रणी।”

ⓂⓂⓂⓂ ⓂⓂ ⓂⓂⓂⓂⓂⓂⓂⓂⓂⓂⓂⓂⓂⓂⓂⓂ ⓂⓂ ⓂⓂⓂⓂⓂ

22 तेबे लोक एक माणूए खे तिना गे ल्याए, जो अन्दा और गुँगा था, तिने से ठीक कित्तेया और से देखणे और बोलणे लगेया। 23 ये देखी की लोक हैरान ऊई की बोलणे लगे, “क्या ये दाऊदो री ल्वाद ए?” 24 पर फरीसिये ये सुणी की बोलेया, “ये तो दुष्टात्मा रे सरदार शैतानो री मतादा ते दुष्टात्मा खे निकयालोआ।” 25 यीशुए तिना रे मनो री गल्ल जाणी ली और तिना खे बोलेया, “जेस बी राज्य रे फूट ओई, से ऊजड़ी जाओआ, और कोई बी नगर या कराना, जिदे फूट ओई, से कदी नि बसी सकदा। 26 और जे शैतान ई शैतानो खे लगेया निकयालने, तो से तो आपणा ई बिरोदी ऊईगा। तेबे तेसरा राज्य कियाँ बणेया रा रणा? 27 जे आऊँ शैतानो री मतादा ते दुष्टात्मा खे निकयालूँआ, तो तुसा रे वंश केसरी मतादा ते निकयालोए? बस, तेबे सेयो ई तुसा रा न्याय करोगे। 28 पर जे आऊँ परमेशरो री पवित्तर आत्मा री मतादा ते दुष्टात्मा खे निकयालूँआ, तो परमेशरो रा राज्य तुसा गे आईगा रा।

29 “या कियों कोई माणू केसी तागतबरो रे कअरे कूसी की तेसरा माल लूटी सकोआ, जदुओ तक से तेसखे बानी नि लओगे? तेबेई से तेसरा माल लूटी सकोआ।

30 “जो मां साथे निए, से मेरे खलाफ ए और जो मां साथे कट्टा नि करदा, से बखेरोआ। 31 इजी री खातर आऊँ तुसा खे बोलूँ आ कि माणूए रे सारे पाप और निन्दा माफ ऊई जाणे, पर पवित्तर आत्मा री निन्दा माफ नि ऊणी। 32 जो कोई मां माणू रे पुत्रो रे खलाफ कोई बी गल्ल बोलोगा, तेसरा ये अपराध माफ ऊई जाणा। पर जो कोई पवित्तर आत्मा रे खलाफ कुछ बी बोलोगा, तेसरा अपराध ना तो एते लोको रे और ना ई परलोको रे माफ ऊणा।

~~~~~  
(~~~~~ 6:43-45)

33 “जे डालो खे अच्छा बोलो, तो तिजी रे फलो खे बी अच्छा बोलो। या डालो खे नकम्मा बोलो, तो तिजी रे फलो खे बी नकम्मा ई बोलो; कऊँकि डाल आपणे फलो साथे ई पछयाणा जाओआ। 34 ओ सापो जेडे जईरीले लोको! तुसे बुरे ऊई की कियों खरिया गल्ला बोली सकोए? कऊँकि जो तुसा रे मनो रे ओआ, सेई तुसा री जबानी पदि आओआ। 35 खरा माणू आपणे खरे मनो रे पण्डारो ते खरिया गल्ला निकयालोआ और बुरा माणू आपणे बुरे मनो रे पण्डारो ते बुरिया गल्ला निकयालोआ। 36 आऊँ तुसा खे बोलूँ आ कि जो-जो नकम्मिया गल्ला माणूआ बोलणिया, जेवे न्याय रा दिन आऊणा, तेवे तिना खे हर गल्ला रा लेखा देणा पडना। 37 कऊँकि तूँ आपणिया गल्ला तेई, दोषी और निर्दोष ऊणा।”

~~~~~  
(~~~~~ 8:11,12; ~~~~~ 11:29-32)

38 ये सुणी की कुछ शास्त्रिए और कुछ फरीसिये तिना खे बोलेया, “ओ गुरु! आसे तुसा ते एक चिह्न देखणा चाऊँए।” 39 यीशुए तिना खे जवाब दित्तेया, “एते जुगो रे बुरे और व्याभिचारी लोक चिह्न टोलोए; पर, योना भविष्यबक्ते रे चिह्नो खे छाडी की कोई ओर चिह्न तिना खे नि देणा। 40 योना, तीन रात-दिन पाणिए रे बडी मच्छलिया रे पेटो रे रया, तियों ई आऊँ माणू रा पुत्र, तीन रात-दिन तरतिया ते पीतरे रणा। 41 नीनवे रे लोक न्याय रे दिनो दे, एस बखतो रे लोका साथे उठणे, और तिना सेयो ई दोषी ठरणे, कऊँकि तिने योने रा प्रचार सुणी की मन फेरया, पर देखो, एती तो से ए, जो योना ते बड़ा ए। 42 दखणो री राणी, न्याय रे दिनो रे, एस बखतो रे लोका साथे उठणी और सेयो दोषी ठरणे, कऊँकि से सुलेमानो रा ज्ञान सुणने खे तरतिया रे दूजे कनारे पाँदा ते आयी थी और देखो, एती तो से ए, जो सुलेमानो ते बी बड़ा ए।

~~~~~  
(~~~~~ 11:24-26)

43 “जेवे दुष्टात्मा माणूए ते निकली जाओई, तेवे से सूकी जगा आराम करने खे टोलो ई, पर तेसा खे मिलदी नि। 44 तेवे से आपणे आपू रे बोलोई, भां आपणे तेस माणूए रेई, जेथा ते से आयी थी, तेथी वापस चली जाणा। जेवे से वापस आओई, तेवे तेसा खे से माणू कअरो जेडा, कल्ला, साफ-सुथरा और सजाया रा मिलोआ। 45 तेवे से दुष्टात्मा आपू साथे सात ओर दुष्टात्मा खे ल्याओई और सेयो तेस माणूए रे बैठी जाओईया और तेथी वास करोईया और तेस माणूए री दशा पईलकी दशा ते बी खराब ऊई जाओई। एस जुगो रे बुरे लोका री दशा बी एडी ई ऊणी।”

~~~~~  
(~~~~~ 3:31-35; ~~~~~ 8:19-21)

46 जेवे यीशु पीडा साथे इना गल्ला करने ई लगी रे थे, तेवे तिना री आम्मा और पाई वारे खडी रे थे और तिना साथे कुछ गल्ल करना चाओ थे। 47 तेवे किने तिना खे बोलेया, “देखो, तुसा री आम्मा और पाई और बईण वारे खडी रे और तुसा साथे गल्ल करना चाओए।” 48 ये सुणी की तिने बोलणे वाले खे जवाब दित्तेया, “कुण मेरी आम्मा ए? और कुण मेरा पाई ए?” 49 तेवे तिने आपणे चलेया

री तरफा खे आथ कित्तेया और बोलेया, “देखो, मेरी आम्मा और मेरे पाई तो यो ए।<sup>50</sup> कऊँकि जो कोई मेरे स्वर्गिय पिते री इच्छा पाँदे चलोआ, सेई मेरा पाई, बईण और आम्मा ए।”

## 13

⚬⚬⚬⚬ ⚬⚬⚬⚬ ⚬⚬⚬⚬⚬ ⚬⚬ ⚬⚬⚬⚬⚬  
(⚬⚬⚬⚬ 4:1-9; ⚬⚬⚬⚬ 8:4-8)

1 तेस दिने यीशु कअरो ते निकली की समुद्रो रे कनारे बैठीगे।<sup>2</sup> तेवे तिना गे बऊत बड़ी पीड़ कट्टी ऊईगी। तेवे सेयो किस्तिया पाँदे चढ़ी गे और सारी पीड़ कनारे पाँदे खड़ी री रई।<sup>3</sup> तेवे यीशुए तिना खे बऊत गल्ला उदारणा रे बोलिया, “एक बार बाणे वाला, बेजा बाणे निकलेया।<sup>4</sup> बाँदे ऊए कुछ बिऊ बाटा रे कनारे छूटी गे और पंछी आए और तिने बीज चूगी ले।<sup>5</sup> कुछ बिऊ सापड़ी वाली जगा रे छूटी गे, जेती तिना खे जादा माट्टी नि मिली और जादा गईरी माट्टी ना मिलणे री बजअ ते सेयो चट-चट जम्मी गे।<sup>6</sup> पर सूरज निकलदे ई सेयो फूकी गे और जड़ ना पकड़ने री बजअ ते सेयो सूकी गे।<sup>7</sup> कुछ बिऊ जाड़ो रे छूटे, तेवे जाड़ बड़ा ऊईगा और तिने सेयो दबाई ते।<sup>8</sup> पर कुछ बिऊ अच्छी जमीना पाँदे छूटे और फल ल्याए, कोई सौ गुणा, कोई साठ गुणा और कोई तीइ गुणा।<sup>9</sup> जो समजी सकोआ से तिजी खे त्यानो साथे सुणो और मानी बी लओ।”

⚬⚬⚬⚬⚬⚬ ⚬⚬ ⚬⚬⚬⚬  
(⚬⚬⚬⚬ 4:10-12; ⚬⚬⚬⚬ 8:9-10)

10 चेलिया नेडे आयी की तिना खे बोलेया, “तुसे उदारणा रे लोका साथे गल्ला कऊँ करोए?”  
11 यीशुए तिना खे जवाब दित्तेया, “तुसा खे तो स्वर्गो रे राज्य रे पेतो री समज दित्ती रिये, पर तिना खे निए।<sup>12</sup> कऊँकि जेसगे आए तेसखे ओर बी देणा, तेवे तेसगे बऊत ऊई जाणा। पर जेसगे कुछ पनिए, तेसगे जो कुछ बी आए से बी लई लया जाणा।<sup>13</sup> आऊँ तिना साथे उदारणा रे इजी री खातर गल्ला कँआ, कऊँकि सेयो, देखदे ऊए पनि देखदे, सुणदे ऊए पनि सुणदे और ना समजदे।<sup>14</sup> तिना रे बारे रे यशयाह भविष्यबक्ते री ये भविष्यवाणी पूरी ओई,

“तुसा कानो ते तो सुणना, पर समजणा नि  
और आखी ते तो देखणा, पर दिशणा नि।

15 कऊँकि इना लोका रा मन मोटा ऊईगा रा  
और सेयो कानो ते ऊच्चा सुणोए, तिने आपणी आखी बन्द करी ती रिया।

केथी एडा नि ओ कि सेयो, आखी ते देखणे लगो,  
कानो ते सुणने लगो, मनो ते समजणे लगो,  
और फिरी जाओ और आऊँ तिना खे ठीक करी देऊँ।”

16 “पर धन्य ए तुसा री आखी जो देखोईया और तुसा रे कान, जो सुणोए।<sup>17</sup> कऊँकि आऊँ तुसा खे सच बोलूँआ कि बऊत सारे भविष्यबक्ते और तर्मी लोके चाया कि जो गल्ला तुसे देखोए, तिना देखो, पर देखी नि सके, और जो गल्ला तुसे सुणोए, सुणो, पर सुणी नि सके।

⚬⚬⚬ ⚬⚬⚬⚬ ⚬⚬⚬⚬⚬ ⚬⚬⚬⚬⚬⚬⚬ ⚬⚬ ⚬⚬⚬⚬  
(⚬⚬⚬⚬ 4:13-20; ⚬⚬⚬⚬ 8:11-15)

18 “एवे तुसे बाणे वाले रे उदारणो रा मतलब सुणो।<sup>19</sup> जो कोई परमेशरो रा वचन सुणी की नि समजदा, तेसरे मनो रे जो कुछ बाई राखेया था, तेसखे से दुष्ट आयी की छुड़ाई की लई जाओआ। ये सेईए जो बाटा रे कनारे बाई राखेया था।<sup>20</sup> जो सापड़ी पाँदली जमीना पाँदे बाई राखेया था, ये से ए, जो वचन सुणी की फटाफट खुशिया साथे मानी लओआ।<sup>21</sup> पर आपू रे जड़ ना राखणे री बजअ ते से, थोड़े ई दिनों खे ए और जेबे वचनो री बजअ ते क्लेश या बुरा ओआ, तो चट ई टोकर खाई लओआ।<sup>22</sup> जो जाड़ो रे बाया, से ये ए, जो वचनो खे तो सुणोआ, पर दुनिया री चिन्ता, धनो रा तोखा, वचनो खे दबाई देओआ और से फल नि ल्याऊँदा।<sup>23</sup> जो अच्छी जमीना रे बाया, से ये

जो वचनो खे सुणी की समजोआ और फल ल्याओआ, कोई सौ गुणा, कोई साठ गुणा और कोई तीइ गुणा।”

?????? ???? ?? ?????

24 यीशुए तिना खे एक ओर उदारण दित्तेया, “स्वर्गो रा राज्य, तेस जिम्मीदारो जेड़ा ए, जिने आपणे डोरूआ रे अच्छा बीज बाया। 25 पर जेबे लोक सऊणे लगी रे थे, तेबे तेसरा दुश्मण आया और कणका बीचे जंगली बीज बाई की चली गा। 26 जेबे लूंग आयी और सिल्ले लगे, तेबे जंगली दाणेया री डाली बी दिशणे लगे। 27 तेबे कअरो रे दासे आयी की तेसखे बोलया, ‘ओ मालक! क्या तुसे आपणे डोरूआ रे टंगो रा बीज नि था बाए रा? तेबे जंगली दाणे रिया डालिया तेते बीचे केथा ते आईया?’ 28 तिने तिना खे बोलेया, ‘ये तो केसी दुश्मणो रा काम ए।’ तेबे जो दास थे, तिने तेसखे बोलेया, ‘क्या तेरी इच्छा ए कि आसे जाई की तिना खे कट्टा करी देऊँ?’ 29 तिने बोलेया, ‘ना, एड़ा नि ओ कि जंगली दाणेया री डालिया खे कट्टे करदे-करदे, कणका खे बी पटी देयो। 30 बाडणे रे बखतो तक तिना दूई खे साथे-साथे बड़ने देयो और जेबे बाडणे रा बखत आऊणा तेबे मां बाडणे वाले खे बोलणा कि जंगली दाणे कट्टे करी की फूकणे खे, तिना रे विंडे बानी देयो, और कणका खे मेरे पण्डारो रे कट्टा करी देयो।”

?????? ?? ???? ?? ?????

(?????? 4:30-32; ????? 13:18-19)

31 यीशुए तिना खे एक ओर उदारण दित्तेया, “स्वर्गो रा राज्य अऊरिया रे एक दाणे जेड़ा ए, जो एकी माणूए लया और आपणे डोरूआ रे बीजी ता। 32 से सबी बीजो ते तो छोटा ए, पर जेबे से बढोआ, तेबे सबी सागो-पातो ते बड़ा ओआ और एड़ा डाल ऊई जाओआ कि सर्गो रे पंछी आयी की तेतेरी डालिया रे आपणा बसेरा करोए।”

?????? ?? ?????

33 तिने एक ओर उदारण सुणाया, “स्वर्गो रा राज्य, सजेडे जेड़ा ए, जो एकी जवाणसे लया और बीइ किलो ते जादा आटे रे गूदी ता और ऊँदे-ऊँदे सारा आटा सजेड़ा ऊईगा।”

?????? ?? ?????????

(?????? 4:33,34)

34 ये सब गल्ला यीशुए लोका खे उदारणा रे बोलिया और बिना उदारणो ते सेयो तिना खे कुछ नि बोलो थे। 35 ताकि जो वचन भविष्यबक्ते बोलेया था, से पूरा ओ कि “मां उदारण बोलणे खे आपणा मूँ खोलणा;

मां सेयो गल्ला बोलणिया, जो दुनिया री शुरूआता ते गुप्त ए।”

?????? ???? ?? ??????? ?? ???? ??

36 तेबे यीशु पीड़ा खे छाडी की कअरे आए, तेबे तिना रे चलेया तिना गे आयी की बोलेया, “डोरूआ रे जंगली दाणे रा उदारण आसा खे समजयाई देओ।” 37 यीशुए तिना खे जवाब दित्तेया, “अच्छे बीज बाणे वाला माणू रा पुत्र ए। 38 डोरू दुनिया रे लोक ए, अच्छा बीज राज्य रे से लोक ए जिना पाँदे परमेश्वर राज करने ते खुश ए और जंगली बीज, दुष्टो री से त्वाद ए जो शैतानो री आज्ञा मानी की काम करोए। 39 जिने दुश्मणे सेयो बीजे, से शैतान ए; बडाई दुनिया रा अंत ए और बाडणे वाले स्वर्गदूत ए। 40 तेबे जिंयाँ जंगली दाणे कट्टे करोए और फूकी देओए, तेड़ा ई दुनिया रे अंतो रे ऊणा। 41 मां माणू रे पुत्रो आपणे स्वर्गदूत पेजणे, तिना तेसरे राज्य रे, सब, जो ठोकरा री बजअ ओ ए और पाप करने वाले, कट्टे करने 42 और सेयो आगी रे कुण्डो रे सेटी देणे, जेती रोणा और दौंद किरड़ना ई ऊणा। 43 तेस बखते तर्मी आपणे पिते रे राज्य रे सूरजो जेडे चमकणे, जो समजी सकोआ से तिजी खे त्यानो साथे सुणो और मानी बी लओ।

???? ?? ??????? ?? ???????

44 “स्वर्गो रा राज्य डोरूआ रे लूके रे खजाने जेड़ा ए, जो केसी माणूए खे मिलेया और तिने लकोईता, तेबे तिने खुश ई की आपणा सब कुछ बेची ता और से डोरू खरीदी ला।

████████████████████

45 “स्वर्गो रा राज्य एक बपारिए जेड़ा ए, जो खरे मोतिए री टोला रे था। 46 जेबे तेसखे एक किमती मोती मिली गा, तेबे तिने जाई की आपणा सब कुछ बेची ता और से मोती खरीदी ला।

██████████ ██████████

47 “फर, स्वर्गो रा राज्य तेस बड़े जालो जेड़ा ए, जो समुद्रो रे पाया और हर प्रकारा रिया मछलिया तिदे आयी गिया 48 और जेबे जाल फरी गा, तेबे मछली पकड़ने वाले तिजी खे कनारे पदि खिंजी की ली आए और जो अच्छी-अच्छी मछलिया थिया सेयो पांडे रे राखी तिया और जो नकम्मिया थिया सेयो सेटी तिया। 49 दुनिया रे अंतो रे एड़ा ई ऊणा, तेबे स्वर्गदूता आयी की दुष्ट तर्मिया ते लग करने, 50 और सेयो आगी रे कुण्डो रे सेटी देणे। तेती रोणा और दाँद किरड़ना ई ऊणा।

██████████ ██████████ ██████████ ██████████

(██████████ 6:1-6; ██████████ 4:16-30)

51 “क्या तुसे यो सब गल्ला समजिया?” तिने यीशुए खे बोलेया, “आ।” 52 तेबे यीशुए तिना खे बोलेया, “हर एक शास्त्री, जो स्वर्गो रे राज्य रा चेला बणी रा, तेस करेलू मांणूए जेड़ा ए, जो आपणे पण्डारो ते नईया और पुराणिया चीजा निकयालो आ।”

██████████ ██████████ ██████████ ██████████

(██████████ 6:1-6; ██████████ 4:16-30)

53 जेबे यीशु इना सारे उदारणा बोली चुके, तेबे सेयो तेथा ते चली गो। 54 तेबे आपणे नगरो रे आयी की तिना रे प्रार्थना रे कअरो रे तिना खे एड़ा उपदेश लगे देणे कि सेयो हैरान ऊई की तिना खे बोलणे लगे, “इना खे इतणा ज्ञान और सामर्थो रे काम केथा ते मिले? 55 क्या ये मिस्त्रियो रा पाऊ निए? क्या इना री आम्मा रा नाओं मरियम निए और पाईयो रा नाओं याकूब, यूसुफ, शमोन और यहूदा निए? 56 क्या इना रिया सारिया बईणा आसा बीचे नि रंदिया? तेबे इना खे ये सब कुछ केथा ते मिलेया?” 57 यीशुए तिना री बजअ ते टोकर खाई पर तिने तिना खे बोलेया, “भविष्यबक्ते रा आपणे देश और आपणे कअरो खे छाडी की ओरथी केथी बी नरादर नि ऊँदा।” 58 तेबे यीशुए तिना रे अविश्वासो री बजअ ते जादा सामर्था रे काम नि कित्ते।

## 14

██████████ ██████████ ██████████ ██████████

(██████████ 6:14-29; ██████████ 9:7-9)

1 तेस बखते चौथाई देशो रे राजे हेरोदेसे यीशुए री चर्चा सुणी, 2 और तेबे तिने आपणे दासा खे बोलेया, “ये यूहन्ना बपतिस्मा देणे वाला ए और मरे रेया बीचा ते जिऊँदा ऊईगा रा, तेबेई तो एसते सामर्था रे काम ओए।”

3 कऊँकि हेरोदेसे, आपणे पाई फिलिप्पुसो री लाड़ी हेरोदियासा री बजअ ते, यूहन्ना पकड़ी की बानेया और जेला रे पाईता था। 4 कऊँकि यूहन्ने तेसखे बोलेया था, “एसा खे राखणा बिधानो रे मुताबिक ताखे ठीक निए।” 5 इजी री बजअ ते से यूहन्ने खे काणा चाओ था, पर लोका ते डरो था, कऊँकि लोक तेसखे भविष्यबक्ता मानो थे।

6 पर जेबे हेरोदेसो रा जन्मदिन आया, तेबे हेरोदियासा री बेटिये त्योआरो रे नाची की हेरोदेस खुश करी ता। 7 तेबे तिने कसम खाई की वचन दित्तेया, “जो कुछ तूँ मांगेगी, मां ताखे देणा।” 8 से आपणी आम्मा री संकेली री थी और तेसे बोलेया, “यूहन्ने बपतिस्मे रा सिर थालिया रे एथी माखे मंगवाई दे।” 9 राजा दुःखी ऊईगा, पर आपणी कसमा री और आपू साथे बैठणे वालेया री बजअ ते, तिने आज्ञा दित्ती कि देई दो। 10 तेबे तिने जेला रे आपणे मांणूआ खे पेजी की यूहन्ने रा सिर बडवाईता 11 और तेसरा सिर थालिया रे ल्याया और मुन्निया खे दित्तेया और से तिजी खे आपणी आम्मा गे लईगी। 12 तेबे यूहन्ने रे चले आए और तेसरी लोथ लई की दवाई ती और यीशुए खे एतेरा समाचार सुणाया।



ⓂⓂⓂⓂ ⓂⓂⓂⓂⓂ ⓂⓂⓂⓂⓂⓂ ⓂⓂ ⓂⓂⓂⓂⓂⓂ

(ⓂⓂⓂⓂⓂ 6:30-44; ⓂⓂⓂⓂⓂ 9:10-17; ⓂⓂⓂⓂⓂⓂⓂ 6:1-14)

13 जेबे यीशुए ये सब सुणैया, तेबे सेयो किस्तिया रे बैठी की सुणसाण जगा रे लग जे चली गो और जेबे लोके ये सुणैया तेबे सेयो नगरो-नगरो रिये हांडी की तिना पीछे आईगे। 14 यीशुए निकली की एक बड़ी पीड़ देखी और तिना पाँदे तिना खे तरस आया और तिने तिना रे बमार ठीक किते।

15 जेबे साँज ऊई, तेबे तिना रे चले तिना गो आए और बोलणे लगे, “एती तो सुणसाण जगा ए और देर लगी री ऊणे, तुसे लोका खे बिदा करो, ताकि सेयो जाई की बस्तिया रे आपू खे रोटी खरीदी सको।”

16 यीशुए तिना खे बोलेया, “तिना रा जाणा जरूरी निए, तुसेई इना खे खाणे खे देयो।” 17 तिने बोलेया, “एती तो आसा गे पाँज रोटिया और दो मछलिया छाडी की कुछ निए।” 18 यीशुए बोलेया, “तिना खे मांगे ली आओ।” 19 तेबे तिने लोका खे काओ पाँदे बैठणे खे बोलेया, तेबे तिने सेयो पाँज रोटिया और दो मछलिया लईया और स्वर्गो खे देखेया और धन्यवाद कितेया और रोटिया तोड़ी-तोड़ी की चलेया खे दित्तिया और चलेया लोका खे। 20 जेबे सब खाई की रजी गे, तेबे चलेया जो टुकड़े थे बचे रे तिना रिया बारा टोकरिया परिया और चकिया। 21 खाणे वाले जवाणसा और बच्चेया खे छाडी की तकरीबन पाँज हजार मर्द थे।

ⓂⓂⓂⓂ ⓂⓂ ⓂⓂⓂⓂⓂ ⓂⓂⓂⓂ ⓂⓂⓂⓂ

(ⓂⓂⓂⓂⓂ 6:45-52; ⓂⓂⓂⓂⓂⓂⓂ 6:15-21)

22 तेबे यीशुए तेबुई आपणे चले किस्तिया रे चढाणे खे मजबूर किते कि जदुओ तक आऊँ लोका खे बिदा कऱूआ, तुसे तिजी ते पईले पार चली जाओ। 23 तेबे यीशु लोका खे बिदा करी की प्रार्थना करने खे लग पाहूडो पाँदे चली गो और साँजा तक तेती कल्ले थे। 24 तेस बखते किस्ती समुद्रो रे लईरा साथे छनके खाणे लगी, कऊँकि सामणी अवा थी। 25 तेबे यीशु राधियो रे चौथे पडरो रे समुद्रो रे चली की तिना गो आए। 26 चले तिना खे समुद्रो रे चलदे ऊए देखी की कवराइगे और बोलणे लगे, “ए तो पूत ए,” और सेयो डरी गो और चिंगण लगे। 27 यीशुए तेबुई तिना साथे गल्ला कित्तिया और बोलेया, “इम्मत राखो, आऊँ ए, डरो नि।” 28 पतरसे तिना खे बोलेया, “ओ प्रभु! जे तुसे ईए, तो माखे आपू गे चली की आऊणे री आज्ञा देयो।” 29 यीशुए बोलेया, “आईजा।” तेबे पतरस किस्तिया ते पाणिए बीचे उतरेया और यीशुए गे जाणे खे पाणिए बीचे चलणे लगेया।

30 पर से पाणिए खे देखी की जो समुद्रो रे अवा साथे लईरा उठणे लगी री धिया देखी की डरीगा और जेबे डूबणे लगेया, तेबे चींगी की बोलणे लगेया, “ओ प्रभु, माखे बचा।” 31 यीशुए फटाफट आपणा आथ आगे कितेया और से बचाईता और तेसखे बोलेया, “ओ कम विश्वास करने वाले, तँ शक कऊँ कितेया?” 32 जेबे सेयो किस्तिया रे चढ़ी गो, तेबे अवा रुकी गी। 33 ये देखी की जो किस्तिया रे थे तिने तिना गे माथा टेकी की बोलेया, “सच्ची तुसे परमेशरो रे पुतर ए।”

ⓂⓂⓂⓂⓂⓂⓂⓂ ⓂⓂ ⓂⓂⓂⓂⓂ ⓂⓂ ⓂⓂⓂⓂⓂⓂ

(ⓂⓂⓂⓂⓂ 6:53-56)

34 सेयो पार उतरी की गन्नेसरत देशो रे पऊँछे। 35 तेथो रे लोके सेयो पछयाणी ले और ओरे-पोरे सबी गे बोलेया और सब लोक बमारा खे तिना गे ल्याए 36 और यीशुए ते प्रार्थना करने लगे कि आसा खे बस आपणे टाले रा पल्ला ई छूणे दे, और जितणेया बी सेयो छूँए, सब ठीक ऊईगे।

## 15

ⓂⓂⓂⓂ ⓂⓂⓂⓂⓂⓂⓂ ⓂⓂⓂⓂⓂ ⓂⓂⓂⓂ

(ⓂⓂⓂⓂⓂ 7:1-13)

1 तेबे यरूशलेमो रे बऊत शास्त्री और फरीसी यीशुए गे आए और बोलणे लगे, 2 “तुसा रे चले बुजुगां री रवाजा खे कऊँ नि मानदे और बिना आथ तोए रोटी खाओए?” 3 यीशुए तिना खे जवाब दितेया, “तुसे बी आपणिया रवाजा रे खलाफ कऊँ परमेशरो रिया आज्ञा खे तोडोए? 4 कऊँकि परमेशरे बोलेया था, ‘आपणे माया-बाओ रा आदर करो,’ और ‘जो कोई आपणे माया-बावा खे बुरा

बोलोगा से काया जाओ।<sup>5</sup> पर तुसे बोलोए कि जे कोई आपणे माया-बावा से बोलो, 'जो कुछ ताखे मांते फाईदा ऊई सको था, से परमेशरो से पेंट चढ़ाईता।'<sup>6</sup> तो से आपणे पिते रा आदर नि करो, तुसे आपणी रवाजा री बजअ ते परमेशरो रा वचन टाली ता।<sup>7</sup> ओ कपटियो! यशायाहे तुसा रे बारे ये भविष्यवाणी ठीक किती:

8 "यो लोक मुंओ ते तो मेरा आदर करोए,

पर मनो ते मांते दूर रओए

9 और यो बेकार ई मेरी भक्ति करोए,

कऊँकि मांणूए रिया रवाजा से तर्मा रा उपदेश मानोए।"

~~~~~

10 तेबे यीशुए लोका से आपू गे बुलाई की बोलेया, "सुणो, और समजो।¹¹ जो मुंओ रे जाओआ से मांणूए से अशुद्ध नि करदा, पर जो मुंओ रिये निकलोआ से मांणूए से अशुद्ध करोआ।"¹² तेबे चलेया आयी की तिना से बोलेया, "क्या तुसे जाणोए कि फरीसिये ये वचन सुणी की ठोकर खाई?"¹³ यीशुए जवाब दित्तेया, "हर डाली जो मेरे स्वर्गिय पिते निए लगाई री, से पटी देणी।¹⁴ तिना से जाणे देयो, सेयो अन्दी बाट दखाणे वाले ए और अन्दा जे अन्दे खेई बाट बताओगा तो दोनो गड्डे रे पडी जाणे।"

15 ये सुणी की पतरसे तिना से बोलेया, "एस उदारणो आसा से समजयाई दो।"¹⁶ यीशुए बोलेया, "क्या तुसे बी एबुए तक नि समजो रे?¹⁷ क्या तुसे नि जाणदे कि जो कुछ मुंओ रिये जाओआ, से पेटो रे पडोआ और सड़यानी साथे बारे निकलोआ।¹⁸ पर जो कुछ मुंओ रिये निकलोआ, से मनो ते निकलोआ और सेई मांणूए से अशुद्ध बणाओआ।¹⁹ कऊँकि बुरे बिचार, अत्या, परस्त्रीगमन, व्याभिचार, चोरी, चूठी गवाई और निन्दा मनो तेई निकलोई।²⁰ येईए जो मांणूए से अशुद्ध करोए, पर बिना आथ तोए रोटी खाणा मांणूए से अशुद्ध नि करदा।"

~~~~~

(~~~~~ 7:24-30)

21 यीशु तेथा ते निकली की सूर और सैदा रे नगरो से चली गे।<sup>22</sup> तेबे तेस देशो ते एक कनानी जवाणस निकली, और से चींगी की बोलणे लगी, "ओ प्रभु दाऊदो री ल्वाद! मां पाँदे दया कर, मेरी मुन्निया से दृष्टात्मा बऊत तंग लगी री करने।"<sup>23</sup> पर तिने तेसा से कोई बी जवाब नि दित्तेया, तेबे तिना रे चलेया बोलेया, "एसा से एथा ते पेजी दे, कऊँकि ये तो आसा पीछे आल्ला पाँदी ऊई आऊणे लगी री।"<sup>24</sup> तिने बोलेया, "इस्राएलो रे कराने रिया राची रिया पेडा से छाडी की आऊँ केसी गे निए पेजेया रा।"<sup>25</sup> पर से आयी और तिना गे माथा टेकी की बोलणे लगी, "ओ प्रभु! मेरी मताद करो।"<sup>26</sup> प्रभुए तेसा से बोलेया, "बच्चेया री रोटी कुत्तेया रे आगे देणे ते कोई फाईदा निए।"<sup>27</sup> जवाणसे बोलेया, "सच ए प्रभु, पर कुत्ते बी तेस चुरा-चुरा खाओए, जो तिना रे मालका री मेजा ते छुटोआ।"<sup>28</sup> ये सुणी की यीशुए तेसा से बोलेया, "ओ जवाणसे! तेरा विश्वास बड़ा ए, जेड़ा तूँ चाए ई तेड़ा ई ओ" और तेसा री मुन्नी तेबुई ठीक ऊईगी।

~~~~~

29 यीशु तेथा ते गलीलौ रे समुद्रो रे आए और पाहड़ो पाँदे चढ़ी की बैठीगे।³⁰ तेबे पीडा री पीड यीशुए गे आयी और अन्दे, लंगड़े, गूँगे, टूण्डे और ओर बी कई जणेया से यीशुए गे ल्याए और सेयो तिना रे पैरा पाँदे राखी ते और तिने सेयो ठीक कित्ते।³¹ तेबे, जेबे लोके देखेया कि गूँगे बोलणे लगे, अन्दे देखणे लगे, टूण्डे ठीक ऊईगे, लंगड़े चलणे लगी गे तो तिने हैरान ऊई की इस्राएलो रे परमेशरो री तारीफ किती।

~~~~~

(~~~~~ 8:1-10)

32 यीशुए आपणे चले बुलाए और तिना से बोलेया, "माखे एसा पीडा पाँदे तरस आओए, कऊँकि ये तीन दिना ते मां साथे ए और इना गे कुछ बी खाणे से निए। आऊँ तिना से पूखे नि पेजणा चांदा,

केथी एडा नि ओ कि यो बाटा रे थकी जाओ।”<sup>33</sup> चलेया तिना खे बोलेया, “आसा खे जंगलो रे इतणिया सारिया रोटिया केथा ते मिलणिया कि आसे इतणी बडी पीडा खे रजाई सकिए?”<sup>34</sup> यीशुए तिना ते पूछेया, “तुसा गे कितणी रोटिया ए?” तिने बोलेया, “सात, और कुछ छोटिया मछलिया ए।”<sup>35</sup> तेबे तिने लोका खे जमीना पाँदे बैठणे री आज्ञा दिती।<sup>36</sup> और तिने सेयो सात रोटिया और मछलिया लईया और धन्यवाद करी की तोड़िया और आपणे चलेया खे दितिया और चलेया लोका खे।<sup>37</sup> तेबे सब तिना खाई की रज्जी गे और चलेया बचे रे टुकड़ेया ते परे रे सात टोकरे चके।<sup>38</sup> खाणे वाले, जवाणसा और बच्चेया खे छाडी की चार हजार मर्द थे<sup>39</sup> तेबे सेयो पीडा खे विदा करी की किस्तिया पाँदे चढ़ी गे और मगदन देशो रे बन्ने रे आए।

## 16

**१६:१-१३**  
(**१६:११-१३**; **१६:१२-१४**)

1 तेबे फरीसिये और सद्किये नेडे आयी की यीशुए खे परखणे खे बोलेया, “आसा खे स्वर्गो रा कोई चिह्न दखाओ।”<sup>2</sup> तिने तिना खे जवाब दित्तेया, “साँजा खे तुसे बोलोए, ‘भौसम साफ रणा, कऊँकि सर्ग लाल ए,’<sup>3</sup> और प्यागा खे बोलोए, ‘आज तूफान आऊणा, कऊँकि सर्ग लाल और तूँदला ए।’ तुसे सर्गो खे देखी की पेट बताई सकोए, पर बखतो रे चिह्नो रा पेट नि बताई सकदे? 4 एस जुगो रे बुरे और व्याभिचारी लोक चिह्न टोलोए; पर योने रे चिह्नो खे छाडी की कोई और चिह्न तिना खे नि देणा।” यीशु इना खे छाडी की चली जाणा।

**१६:१५-१८**  
(**१६:१५-१८**; **१६:१९-२१**)

5 चले समुद्रो ते पार पऊँछी गे, पर सेयो रोटी लणा पूली गे थे।<sup>6</sup> यीशुए तिना खे बोलेया, “देखो, फरीसी और सद्किये रे सजेडे ते चौकस रणा।”<sup>7</sup> सेयो आपू बीचे सोचणे लगे, “आसे तो रोटी ल्याई नि राखी, तेबेई तो यो आसा खे एडा बोलणे लगी रे।”<sup>8</sup> ये जाणी की यीशुए तिना खे बोलेया, “ओ कम विश्वास करने वालेयो! तुसे आपू बीचे कऊँ लगी रे सोचणे कि आसा गे रोटी निए? 9 क्या तुसे एबुए तक नि समजे? क्या तुसा खे सेयो पाँज हजारा रिया पाँज रोटिया याद निए, और ना ये कि तुसे कितणिया टोकरिया चकिया थिया? 10 ना तिना चार हजारा रिया सात रोटिया; और ना ये कि तुसे कितणे टोकरे चके थे? 11 तुसे कऊँ नि समजदे कि मै तुसा खे रोटिया रे बारे रे नि बोलेया? पर ये की तुसे फरीसी और सद्किये रे सजेडे ते चौकस रएयो।”<sup>12</sup> तेबे तिना खे समज आया कि प्रभुए तिना खे रोटिया रे सजेडे ते नि पर फरीसी और सद्कियो रिया शिक्षा ते चौकस रणे खे बोलेया था।

**१६:२२-२६**  
(**१६:२२-२६**; **१६:२७-२९**)

13 यीशु केसरिया और फिलिप्पिया रे देशो रे आयी की आपणे चलेया खे पूछणे लगे, “लोक माखे माणू रे पुत्रो खे क्या बोलोए?”<sup>14</sup> तिने बोलेया, “कोई तो यूहन्ना बपतिस्मा देणे वाला, कोई एलिय्याह, कोई यिर्मयाह और कोई बोलोए कि ये तो भविष्यबक्तेया बीचा ते कोई एक ए।”<sup>15</sup> तेबे तिने तिना खे बोलेया, “तुसे माखे क्या बोलोए?”<sup>16</sup> शमौन पतरसे जवाब दित्तेया, “तुसे जिऊँदे परमेशरो रे पुत्र मसीह ए।”<sup>17</sup> यीशुए तेसखे जवाब दित्तेया, “ओ शमौन, योने रा पाऊ! तूँ धन्य ए; कऊँकि मांस और खूने नि, पर मेरा पिता जो स्वर्गो रे ए, तिने ये गल्ल तांते बुलाई राखी<sup>18</sup> और आऊँ बी ताखे बोलूँ आ कि तूँ पतरस ए और मां एस पात्थरो पाँदे आपणी मण्डली बनाणी और नरको रे फाटक एस पाँदे प्रबल नि ऊणे।”<sup>19</sup> मां ताखे स्वर्गो रे राज्य रिया कुँजियाँ देणियाँ और तां जो कुछ तरतिया पाँदे वानणा, से स्वर्गो रे बानेया जाणा और जो कुछ तां तरतिया रे खोलणा, से स्वर्गो रे खुलणा।<sup>20</sup> तेबे तिने चलेया खे सावधान करी की बोलेया कि केसी गे नि बोलणा कि आऊँ मसीह ए।

**१६:३१-३३**  
(**१६:३१-३३**; **१६:३४**)

21 तेस बखतो ते यीशु आपणे चलेया खे बताणे लगे, “जरूरी ए कि आऊँ यरूशलेमो खे जाऊँ और बुजुर्गा ते, बड़े पुरोईता ते और शास्त्रिया ते दुःख उठाऊँ और कुलाया जाऊँ और तीजे दिने जिऊँदा ऊई जाऊँ।” 22 ये सुणी की पतरस तिना खे लग जे लईगा और थिङकणे लगेया, “ओ प्रभु! परमेशर नि करो तुसा साथे कदी एड़ा ओ।” 23 यीशुए मुड़ी की पतरसो खे बोलेया, “ओ शैतान! मेरी नजरा ते दूर ऊई जा, तूँ माखे ठोकरा रा कारण ए, कऊँकि तूँ परमेशरो री गल्ला पाँदि नि, पर माणूए रिया गल्ला पाँदि मन लगाएया।”

XXXXXXXXXX XX XXXX XX XXXXX

(XXXXXXXX 8:34; XXXXXX 9:1; XXXXX 9:23-27)

24 तेबे यीशुए आपणे चलेया खे बोलेया, “जे कोई मां पीछे आऊणा चाओआ तो आपणे आपू खे ना करी दो और आपणा करूस आपू चको और मां पीछे आयी जाओ। 25 कऊँकि जो कोई आपणा प्राण बचाणा चाओगा, तेस से खोणा और जो कोई आपणा प्राण मेरी बजअ ते खोओगा, तेस से पाणा। 26 जे माणूए खे सारी दुनिया मिली जाओ और आपणे प्राण निरओ, तो क्या फाईदा ऊणा? या माणूए आपणे प्राणो रे बदले क्या देणा। 27 मां माणू रे पुत्रो आपणे स्वगंदूता साथे आपणे पिते रिया महिमा रे आऊणा, और तेस बखते मां हर एकी खे तेसरे कामो रे मुताबिक फल देणा। 28 आऊँ तुसा खे सच लगी रा बोलणे कि जो एती खड़ी रे, तिना बीचा ते कुछ एडे ए, जो तदुओ तक नि मरने, जदुओ तक माणू रे पुत्रो खे तेसरे राज्य रे आऊँदा ऊआ नि देखी लओगे।”

## 17

XXXXXXXXXX XX XXXXX XXXXXXX

(XXXXXXXX 9:2-13; XXXXX 9:28-36)

1 छे दिनो ते बाद यीशुए, पतरस, याकूब और तेसरा पाई यूहन्ना साथे लये और तिना खे लग जे केथी पाहडो पाँदि लईगे। 2 तेबे तिना सामणे यीशुए री शकल बदली गी और तिना रा मूँ सूरजो जेड़ा चमकीगा, तिना रे टालेया रे जोतिया जेड़ा प्रयासा ऊईगा। 3 तेबे तिना खे मूसा और एलिव्याह, यीशुए साथे गल्ला करदे ऊए दिखे।

4 ये देखी की पतरसे यीशुए खे बोलेया, “ओ प्रभु! आसा रा एती रणा ठीक ए! जे तेरी इच्छा ए तो आऊँ एती तीन तम्बू बणाई देऊँ, एक तुसा खे, एक मूसे खे और एक एलिव्याह खे।” 5 से ये बोलणे ई लगी रा था कि एक प्रयासे वाला बादल तिना पाँदि छाईगा और तेस बादलो ते परमेशरो री ये आवाज आई, “ये मेरा प्यारा पुत्र ए, आऊँ एसते बऊत खुश ए; एसरी सुणो।” 6 चले ये सुणी की मुओ रे पारे रूड़ी गे और बऊत जादा डरी गे। 7 यीशुए नेडे आयी की सेयो छूँएँ और तिना खे बोलेया, “उठी जाओ, डरो नि।” 8 तेबे तिने आपणी आखी ऊबे चकिया और यीशुए खे छाडी की और कोई नि देखेया।

9 जेबे सेयो पाहडो ते उतरने लगी रे थे, तेबे यीशुए तिना खे ये आज्ञा दित्ती, “जदुओ तक आँऊ माणू रा पुत्र मरे रेया बीचा ते जिऊँदा नि ऊई जाओ, तदुओ तक जो कुछ तुसे देखेया, से केसी गे नि बताणा।” 10 तेबे तिना रे चलेया तिना ते पृछेया, “तेबे शास्त्री कऊँ बोलोए कि एलिव्याह रा पईले आऊणा जरूरी ए?” 11 यीशुए जवाब दित्तेया, “एलिव्याह तो जरूर आऊणा और तेस सब कुछ सुदारना। 12 पर आऊँ तुसा खे बोलूँआ कि एलिव्याह तो आयी चुकेया रा और लोके से नि पछ्याणेया; पर जो चाया, से तेस साथे कित्तेया, तियाँ ई माणू रे पुत्रो बी तिना रे आयो ते दुःख उठाणा।” 13 तेबे चलेया खे समज आया कि तिने आसा गे यूहन्ना बपतिस्मा देणे वाले रे बारे बोलेया।

XXXXXXXXXXXXXXXX XX XXXX XX XXXXXXX XX XXX XXXX

(XXXXXXXX 9:14-29; XXXXX 9:37-43)

14 जेबे यीशु पीडा रे नेडे आए, तेबे एक माणू तिना गे आया और कुटणे टेकी की बोलणे लगेया, 15 “ओ प्रभु! मेरे पाऊए पाँदि दया कर, कऊँकि तेसखे मिर्गी ए और तेसखे बऊत दुःख ओआ, से



दे। काणा ऊई कि जिन्दगिया रे जाणा ताखे ये पला ए कि दो आखी रंदे ऊए तूँ नरको रिया आगी रे सेटेया जाओ।

ⓂⓂⓂⓂ ⓂⓂ ⓂⓂⓂⓂ ⓂⓂ ⓂⓂⓂⓂ  
(ⓂⓂⓂⓂ 15:3-7)

10 “देखो, तुसे इना छोटेया बीचा ते केसी खे बी तुच्छ नि जाणना। कऊँकि आऊँ तुसा खे सच लगी रा बोलणे कि स्वर्गो रे तिना रे स्वर्गदूत मेरे स्वर्गिय पिते रे सामणे बिनती करने रे मकसदो ते सदा तिना सामणे आजीर रओए। 11 कऊँकि आँऊ माणूँ रा पुत्र राचेया रे खे बचाणे आयी रा।

12 “तुसे क्या सोचोए? जे मानी लो केसी माणूँए गे सी पेडा ए और तिना बीचा ते एक पेड राची जाओ, तो क्या से तिना नडिनूँए पेडा खे छाडी की और पाहुँडो पाँडे जाई की तेसा राची रिया पेडा खे टोलने नि जाणा? 13 और जेबे तेसखे से पेड मिली जाओ तो आऊँ तुसा खे सच लगी रा बोलणे कि से तिना नडिनूँए पेडा खे, जो राची नि रईया थिया, ईतणा खुश नि ऊणा, जितणा तेसा राची री एक पेडा खे। 14 एड़ी ई इच्छा, तुसा रे स्वर्गिय पिते री निए कि इना छोटेया बीचा ते एक बी नाश ओ।

ⓂⓂⓂⓂⓂⓂⓂ ⓂⓂ ⓂⓂⓂⓂ ⓂⓂⓂⓂⓂⓂ

15 “जे तेरा कोई विश्वासी पाई तेरे खलाफ अपराध करो, तो तेसखे कल्ले जे लई जाई की समजेया, जे से तेरी सुणोगा तो तँ आपणा विश्वासी पाई पायी ला। 16 जे से तेरी नि सुणोगा, तो तूँ आपू साथे, एकी-दूई जणे खे ओरी खे बी लई जा, ताकि भूसे रा बिधानो रे मुताबिक हर एक गल्ला री गवाई, दो या तीन जणेया रे मुँओ ते पक्की किती जाओ। 17 जे से तिना री पनि मानो, तो तूँ मण्डलिया खे बोल, पर जे से मण्डलिया री पनि सुणोगा, तो तूँ तेसखे दूजी जातिया रा और कर लणे वाला जेडा समज।

ⓂⓂⓂⓂⓂ ⓂⓂ ⓂⓂⓂⓂ ⓂⓂⓂⓂ

18 “आऊँ तुसा खे सच लगी रा बोलणे कि जो कुछ तुसा तरतिया रे बानणा, से स्वर्गो रे बानेया जाणा और जो कुछ तुसा तरतिया रे खोलणा, से स्वर्गो रे खोलेया जाणा। 19 फेर आऊँ तुसा खे बोलूँआ कि जो कोई तरतिया रे दो जणे एक मन ऊई की तिजी खे माँगो, तो से मेरे स्वर्गिय पिते री तरफा ते, जो स्वर्गो रे ए, से तिना खे ऊई जाणा। 20 कऊँकि जेती दो या तीन जणे मेरे नाओँ ते कट्टे ओए, तेती आऊँ तिना बीचे ओऊँआ।”

ⓂⓂⓂⓂⓂ ⓂⓂⓂⓂ ⓂⓂ ⓂⓂⓂⓂⓂ

21 तेबे पतरसे नेडे आयी की यीशुए खे बोलेया, “ओ प्रभु! जे मेरा विश्वासी पाई अपराध ई करदा रओ, तो आऊँ कितणी बार तेसखे माफ करूँ? क्या सात बार तक?” 22 यीशुए तेसखे बोलेया, “आऊँ तुसा खे ये नि बोलदा कि सात बार, बल्कि सात बारा रे सत्तर गुणे तक माफ करो।

23 “तेबेई तो स्वर्गो रा राज्य तेस राजे जेडा ए, जिने आपणे दासा ते लेखा लणा चाया। 24 जेबे से लेखा लणे लगेया, तेबे एक माणूँ तेस सामणे ल्याया जो दस हजार सुईने रे सिक्के रा कर्जदार था। 25 जबकि तेसगे कर्ज चुकाणे खे कुछ पनि था। तेबे तेसरे मालके बोलेया, एसखे, एसरी लाडी, एसरे बच्चे और जो कुछ एसरे कअरो रे ए, से सब बेची देयो और तेबे एसरा कर्ज चुकदा ऊई जाणा। 26 तेबे से दास, आपणे मालको रे पैरा पाँडे पडी गा और माथा टेकणे लगेया, और बोलणे लगेया, ‘सबर राख, मां सब वापस करी देणा।’ 27 तेबे तेस दासो रे मालको खे तेस पाँडे तरस आईगा और तिने तेसरा सारा त्वार माफ करी ता।

28 “पर जेबे से दास बारे निकलेया तेबे तेस साथले दासा बीचा ते तेसखे एक जणा मिलेया, जो, तेसरे सौ चाँदिए रे सिक्के\* रा कर्जदार था; तिने से पकड़ी की तेसरा गला कोटेया और बोलेया, ‘जो तांगे मेरा त्वार ए तेस वापस कर।’ 29 तेबे तेस साथला दास तेसरे पैरा पाँडे पडी की बोलणे लगेया, ‘सबर राख, मां तेरा कर्ज चुकाई देणा।’ 30 पर से नि मानेया और तिने से जेला रे पाईता कि जदुओ

\* 18:28 18:28 सौ चाँदिए रे सिक्के मतलब सौ दिना री मजदूरिया रे बराबर

तक इने मेरा कर्ज नि दित्तेया, तदुओ तक ये एथी रणा। <sup>31</sup> तेसरा साथी ये देखी की बऊत दुःखी ऊईगा और तिने सारा आल जाई की आपणे मालको गे बताया।

<sup>32</sup> “तेबे तेसरे मालके से बुलाया और तेसखे बोलेया, ओ दुष्ट दास! जेबे तैं मांते प्रार्थना किन्ती थी, तेबे मैं तो तेरा सारा कर्ज माफ करी ता था। <sup>33</sup> जेबे मैं तां पाँदे दया किन्ती, तो ताखे एस पाँदे दया नि करनी चाईयो थी? <sup>34</sup> तेबे मालको खे रोष आईगा और तिने से सजा देणे वालेया गे देईता और बोलेया कि जदुओ तक ये कर्ज नि देई देंदा, तदुओ तक एसखे आपू गे ई राखो। <sup>35</sup> तेबेई तो जो कोई तुसा बीचा ते आपणे विश्वासी पाईए रे पाप माफ नि करदा, तो मेरा पिता जो स्वर्गो रे ए, तिना बी तुसा साथे एड़ा ई करना।”

## 19

XXXXXXXXXX  
(XXXXXXXX 10:1-12)

<sup>1</sup> जेबे यीशु इना गल्ला बोली चुके, तेबे सेयो गलील प्रदेशो ते चली गे और यरदन नदिया ते पार यहूदिया प्रदेशो रे आए। <sup>2</sup> तेबे एक बड़ी पीड़ तिना पीछे आईगी और तिने सेयो तेती ठीक कित्ते। <sup>3</sup> तेबे फरीसी तिना खे परखणे खे तिना गे आए और बोलणे लगे, “क्या हर एक बजअ ते आपणी लाड़ी छाडणी खरी गल्ल ए?” <sup>4</sup> यीशुए जवाब दित्तेया, “क्या तुसे नि पड़ी राखेया, जिने सेयो बणाई राखे तिने शुरुओ तेई मर्द और जवाणस बणाई की बोलेया, <sup>5</sup> इजी बजअ ते माणू आपणे माया-बावा ते लग ऊई की आपणिया लाडिया साथे रणा और सेयो दोनो एक तन ऊणे <sup>6</sup> तो एबे सेयो, दो नि पर एक तन ए। इजी री खातर, जो परमेशेर जोड़ी राखेया, तिना खे माणू लग नि करो।”

<sup>7</sup> तिने यीशुए खे बोलेया, “तेबे मूसे कऊँ ठराई राखेया कि त्यागपत्र देई की तेसा खे छाडी देओ?” <sup>8</sup> तिने तिना खे बोलेया, “मूसे तुसा रे मनो रे जिद्दी स्वभाव री बजअ ते तुसा खे आपणी लाड़ी छाडणे री आज्ञा दित्ती; पर शुरुओ रे एड़ा नि था। <sup>9</sup> पर आऊँ तुसा खे सच बोलूँ आ कि जो कोई व्याभिचार छाडी की ओर केशी बजअ ते आपणी लाडिया खे त्यागपत्र देई की, केशी दुजिया साथे ब्या करोआ, से व्याभिचार करोआ। जो कोई तेसा छाडी रिया जवाणसा साथे ब्या करोआ, से बी व्याभिचार करोआ।” <sup>10</sup> चेलेया तिना खे बोलेया, “जे मर्दो रा जवाणसा साथे एड़ा सम्बन्ध ए, तो क्या ब्या करना खरा निए?”

<sup>11</sup> तिने तिना खे बोलेया, “सारे ये वचन मानी नि सकदे, बस सेयो ई जिना खे परमेशेर एतेरा दान देई राखेया। <sup>12</sup> कऊँकि कुछ नपुंसक एड़े ए, जो माया रे पेटो तेई एड़े जम्मी रे; और कुछ नपुंसक एड़े ए, जो माणूए नपुंसक बणाए और कुछ नपुंसक एड़े ए, जिने स्वर्गो रे राज्य खे आपू खेई नपुंसक बणाई राखेया। जो कोई इजी खे समजी सकोआ, ओ समजी लओ।”

XXXXXXXXXX  
(XXXXXXXX 10:13-16; XXXXXX 18:15-17)

<sup>13</sup> तेबे लोक बच्चेया खे तिना गे ल्याए, ताकि सेयो तिना पाँदे आपणा आथ राखो और प्रार्थना करो; पर चेले तिना खे बकणे लगे। <sup>14</sup> यीशुए तिना खे बोलेया, “बच्चेया खे मांगे आऊणे देयो और तिना खे ना नि करो, कऊँकि स्वर्गो रा राज्य एड़ेया रा ईए।” <sup>15</sup> तेबे सेयो तिना पाँदे आथ राखी की तेथा ते चली गे।

XXXXXXXXXX  
(XXXXXXXX 10:17-31; XXXXXX 18:18-30)

<sup>16</sup> तेबे एक माणूए तिना गे आयी की बोलेया, “ओ गुरु! आऊँ एड़ा कुण जा खरा काम करूँ कि अनन्त जीवन पाऊँ?” <sup>17</sup> यीशुए तेसखे बोलेया, “तूँ मांते पलाईया रे बारे रे कऊँ लगी रा पूछणे? खरा तो एक ईए, पर जे तूँ जिन्दगिया रे जाणा चाओ तो, आज्ञा खे मानेया कर।” <sup>18</sup> तिने यीशुए ते पूछेया, “कुण जी आज्ञा ए?” तिने बोलेया, “अत्या, व्याभिचार, चोरी नि करना और ना चूटी गवाई देणा, <sup>19</sup> आपणे माया-बावा रा आदर करना और आपणे पड़ोसिये साथे आपू जेड़ा प्यार करना।”

20 तिनने जवाने तिना खे बोलेया, “इना सबी गल्ला खे तो आऊँ मानूँआ, एवे मांदि किजी गल्ला री कमी ए?” 21 यीशुए तेसखे बोलेया, “जे तूँ सिद्ध बणना चाया, तो जा, आपणा सारा माल बेची की कंगाला खे देई दे; तेबे ताखे स्वर्गो रे खजाना मिलणा और आयी की, मां पीछे आईजा।” 22 पर इना गल्ला सुणी की से उदास ऊईगा और तेथा ते चली गा, कऊँकि से बऊत साऊकार था।

23 तेबे यीशुए आपणे चलेया खे बोलेया, “आऊँ तुसा खे सच लगी रा बोलणे कि अमीरा रा स्वर्गो रे राज्य रे जाणा मुश्किल ए। 24 आऊँ तुसा खे फेर बोलूँआ कि परमेशरो रे राज्य रे अमीरा रा जाणा, ऊँटो रा सूईया रे नाके ते निकलना सान ए।” 25 ये सुणी की चलेया हैरान ऊई की बोलेया, “तेबे केसरा उद्धार ऊई सकोआ?” 26 यीशुए तिना री तरफा खे देखेया और बोलेया, “माणूआ ते तो ये ऊई नि सकदा, पर परमेशरो ते सब कुछ ऊई सकोआ।” 27 तेबे पतरसे बोलेया, “देखो, आसे तो सब कुछ, छाडी की तुसा पीछे आईगे रे, तो आसा खे क्या मिलणा?”

28 यीशुए तिना खे बोलेया, “आऊँ तुसा खे सच लगी रा बोलणे कि जेबे नई सृष्टि ऊणी और आऊँ माणू रा पुत्र महिमा रे सिंहासनो रे बैठणा, तो तुसे बी, जो मां पीछे आयी रे, बारा सिंहासनो पाँदे बैठणे और इस्राएलो रे बारा गोत्रा रा न्याय करना 29 और जिने बी आपणे कअर, पाई, बईण, बाओ, माए, लाडी, बाल-बच्चे और डोरू मां पीछे, छाडी राखे, तेसखे सौ गुणा मिलणा और से अनन्त जीवनो रा अक्कदार ऊणा। 30 पर एवे बऊत सारे लोक जो आपणे आपू खे एते दुनिया रे बडे समजोए, सेयो परमेशरो री नजरा रे छोटै ऊई जाणे, और जिना खे संसार एवु छोटोटा समजोआ, सेयो परमेशरो री नजरा रे बडे समजे जाणे।”

## 20

### एक दिन एके ठाणे एके ठाणे एके ठाणे

1 यीशुए फेर बोलेया, “स्वर्गो रा राज्य केसी कअरो रे मालको जेडा ए, जो प्यागा निकलेया, ताकि आपणे अँगूरा रे बगीचे रे मजूरदार लगाओ। 2 तेबे तिनने मजूरदारा री त्याडी एक चाँदिए रे सिक्के रे बराबर देणी किती और सेयो आपणे अँगूरा रे बगीचे रे पेजे। 3 तेबे तिनने पईले पईरे बजारो रे जाई की कुछ ओर मजूरदार बेकार खडे रे देखे। 4 तिनने तिना खे बोलेया, ‘तुसे बी अँगूरा रे बगीचे रे जाओ और जो कुछ ठीक ऊणा, से तुसा खे देऊँगा।’ तेबे सेयो बी काम करने खे चली गे। 5 तेबे तिनने दूजे और तीजे पईरो रे नेडे निकली की एडा ई कित्तेया। 6 तेबे एक कंटा दिन रये और तिनने फेर दूजे खडे देखे ओर तिना खे बोलेया, ‘तुसे पूरे दिन एती बेकार कऊँ खडे रे रये?’ तिनने तेसखे बोलेया, ‘कऊँकि आसे किने त्याडिया पाँदि लिए लगाए रे।’ 7 तिनने तिना खे बी बोलेया, ‘तुसे बी अँगूरा रे बगीचे रे काम करने जाओ।’

8 “साँजा अँगूरा रे बगीचे रे मालके आपणे पण्डारिये खे बोलेया, ‘मजूरदारा खे बुलाई की पिछलेया ते लई की आगलेया तक सबी खे मजदूरी देई दे।’ 9 जेबे सेयो आए तेबे जो एक कंटे री त्याडिया पाँदि थे आए रे, तिना खे एक दिनो री त्याडी एक चाँदिए रे सिक्के रे बराबर मिली। 10 जो पईले थे आए रे तिनने सोचेया कि आसा खे तो जादा मिलणा, पर तिना खे बी एकी दिनो री त्याडी एक चाँदिए रे सिक्के रे बराबर मिली। 11 जेबे त्याडी मिलीगी, तेबे सेयो मनो रे मालको खे कुडकुड़ाणे लगे और बोलणे लगे 12 कि जो आसा ते बादो ते आए थे तिनने तो एक ई कंटा काम कित्तेया था और तिना खे बी आसा बराबर ई दित्तेया और जिने पूरा दिन काम कित्तेया, पाअर चकेया और तूप सईन किती?’ 13 तिनने तिना बीचा ते एकी जणे खे जवाब दित्तेया, ‘ओ दोस्त! मैं तां साथे कोई अन्याय लिए कित्तेया रा, क्या तैं ई माखे एक दिनो री त्याडिया खे नि बोलेया था?’ 14 जो तेरी त्याडी बणो ई, तेस चक और चली जा; मेरी ये इच्छा ए कि जितणा ताखे देऊँ, तिथणा ई पिछले खे बी देऊँ। 15 क्या ये ठीक लिए कि आऊँ आपणे मालो साथे जो चाऊँ से करूँ। क्या तूँ मेरे खरे ऊँदे ऊए बी माखे बुरी नजरा ते देखेया?’ 16 पर एवे बऊत सारे लोक जो आपणे आपू खे एते दुनिया रे बडे समजोए, सेयो परमेशरो री नजरा रे छोटै ऊई जाणे, और जिना खे संसार एवु छोटोटा समजोआ, सेयो परमेशरो री नजरा रे बडे समजे जाणे।”



⚠⚠⚠⚠ ⚠⚠⚠⚠ ⚠⚠ ⚠⚠⚠⚠ ⚠⚠ ⚠⚠⚠⚠⚠⚠ ⚠⚠ ⚠⚠⚠⚠⚠⚠⚠⚠⚠⚠⚠⚠

(⚠⚠⚠⚠ 10:32-34; ⚠⚠⚠⚠ 18:31-34)

17 यीशु यरूशलेम नगरो खे जादे ऊए आपणे बारा चलेया खे लग जे लईगे और बाटा रे तिना खे बोलणे लगे, 18 “देखो, आसे यरूशलेम नगरो खे चली रे और आँऊ माणू रा पुत्र, बड़े पुरोईत और शास्त्रिया ते पकड़वाऊणा और तिना आँऊ काणे जोगा ठराणा । 19 तिना आँऊ द्वजिया जातिया रे आयो रे देई देणा, ताकि सेयो मेरा मजाक ऊड़ाओ, कोडे वाओ और क्रूसो पाँदे चढ़ाओ । पर आँऊ तीजे दिने जिऊँदा ऊई जाणा ।”

⚠⚠⚠ ⚠⚠⚠⚠ ⚠⚠ ⚠⚠⚠⚠

(⚠⚠⚠⚠ 10:35-45)

20 तेबे जब्दिए रे पाऊआ री आम्मा आपणे पाऊआ साथे आयी और यीशुए गे माथा टेकेया और तिना ते कुछ मांगणे लगी । 21 यीशुए तेसा खे बोलेया, “तू क्या चाए ई?” तेसे बोलेया, “आऊँ चाऊँई कि तू वादा कर कि मेरे ये दोनो पाऊ, तेरे राज्य रे, एक दाँणे और एक खूँजे कनारे बैटो ।”

22 यीशुए जवाब दितेया, “तुसे नि जाणदे कि क्या लगी रे मांगणे? जो दुःख आँऊ सईन करने वाला ए, क्या से दुःख तुसे सईन करी सकोए?” तिने बोलेया, “आसे सईन करी सकूँए ।” 23 यीशुए तिना खे बोलेया, “तुसे मेरा दुःख तो सईन करी सकोए, पर आपणे दाँणे और खूँजे बठयालना मेरा काम निए, पर जो मेरे पिते री तरफा ते त्यार ए किते रे, तिना राए ।”

24 ये सुणी की बाकि दस चलेया खे तिना दूँई पाईया पाँदे रोष आया । 25 यीशुए सेयो आपू गे बुलाए और बोलेया, “तुसे जाणोए कि द्वजी जातिया रे हाकिम तिना पाँदे राज करोए और जो बड़े ए, सेयो तिना पाँदे अक्क जमाओए । 26 पर तुसा बीचे एड़ा नि ऊणा; पर जो कोई तुसा बीचा ते बड़ा ऊणा चाओआ, से तुसा रा दास बणो 27 और जो तुसा बीचा ते परदान ऊणा चाओआ, से तुसा रा दास बणो । 28 जेड़ा की माणू रा पुत्र, से इजी खे नि आयी रा कि तेसरी देख-बाल करो, पर इजी खे आयी रा कि से देख-बाल करो और बऊत जणेया खे छुड़ाणे री खातर आपणे प्राण देई देओ ।”

⚠⚠⚠⚠⚠⚠⚠⚠⚠ ⚠⚠ ⚠⚠⚠⚠ ⚠⚠ ⚠⚠⚠⚠

(⚠⚠⚠⚠⚠ 10:46-52; ⚠⚠⚠⚠⚠ 18:35-43)

29 जेबे सेयो यरीहो नगरो ते निकलने लगी रे थे, तेबे एक बड़ी पीड़ तिना पीछे आईगी । 30 तेबे दो अन्दे, जो सड़का रे कनारे बैठी रे थे, तिने जेबे ये सुणेया कि यीशु जाणे लगी रे, तो सेयो आक्का पायी की बोलणे लगे, “ओ प्रभु! दाऊदो री ल्वाद, आसा पाँदे दया कर ।” 31 लोक तिना खे बकणे लगे कि चुप रओ, पर सेयो ओर बी चींगी की बोलणे लगे, “ओ प्रभु! दाऊदो री ल्वाद, आसा पाँदे दया कर ।” 32 तेबे यीशुए खड़े ऊई की सेयो बुलाए और बोलेया, “तुसे क्या चाओए कि आऊँ तुसा खे करूँ?” 33 तिने बोलेया, “ओ प्रभु! ये कि म्हारिया आखी खुली जाओ” 34 यीशुए खे तिना पाँदे तरस आया और तिने तिना रिया आखिया छूँईया और सेयो तेबुई देखणे लगे और सेयो तिना पीछे चलणे लगे ।

## 21

⚠⚠⚠⚠⚠⚠⚠⚠⚠ ⚠⚠ ⚠⚠⚠⚠ ⚠⚠⚠⚠⚠⚠⚠

(⚠⚠⚠⚠⚠ 11:1-11; ⚠⚠⚠⚠ 19:28-40; ⚠⚠⚠⚠⚠⚠⚠⚠ 12:12-19)

1 जेबे सेयो यरूशलेम नगरो रे नेड़े पऊँछी की जैतून पाहूँओ पाँदे बैतफगे गांव रे नेड़े आए, तेबे यीशुए आपणे दो चले ये बोली की पेजे 2 “आपणे सामणे रे गांव रे जाओ, तेती पऊँछदे ई तुसा खे एक गहूदी बानी री मिलणी और तेसा साथे एक बच्चा तुसा खे मिलणा, तिना खे खोली की मांगे ली आओ । 3 जे तुसा खे कोई कुछ बोलोगा, तेबे तिना खे बोलणा कि प्रभुए खे इना ते कुछ मतलब ए, तेबे तिना तेबुई से पेजी देणे ।” 4 ये तेबे ऊआ ताकि जो वचन भविष्यबक्ते बोलेया था, से पूरा ओ; 5 “सिय्योनो री बेटिया खे बोलो,

देख, तेरा राजा तांगे आओआ,

से नम्र ए और गहूदे पाँदे बैठी रा,

बल्कि लादूओ रे बच्चे पाँदे । ”

6 चेलेया जाई की जियाँ यीशुए बोलेया था तियाँ ई कित्तेया । 7 गहूदिया और बच्चे खे ल्याई की तिना पाँदे आपणे टाले पाए और यीशु तिना पाँदे बैठीगे । 8 तेबे बऊत जणेया आपणी-आपणी चादरी बाटा रे बछ्हाइतिया और कईए खजूरो रिया डालिया बाडी-बाडी की तिना रे स्वागतो खे की बछ्हाइतिया । 9 जो पीड़ आगे-आगे और पीछे-पीछे चली री थी, से आक्का पाई-पाई की बोलणे लगी री थी,

“दाऊदो री ल्वादा खे होशन्ना;

धन्य ए से, जो प्रभुए रे नाओ ते आओआ, स्वर्गो रे होशन्ना ।”

10 जेबे सेयो यरूशलेमो नगरो रे पऊँछे, तो सारे नगरो रे अलचल ऊईगी और लोक बोलणे लगे, “ये कुण ए?” 11 लोके बोलेया, “ये गलीलो रे नासरतो रा भविष्यवक्ता यीशु ए ।”

~~~~~

(~~~~~ 11:15-19; ~~~~~ 19:45-48; ~~~~~ 2:13-22)

12 यीशुए परमेशरो रे मन्दरो रे जाई की सेयो सब जणे निकयाली ते, जो लेण-देण लगी रे थे करने और सर्गोफो रे पीढ़े और कबूतरा खे बेचणे वालिया चौकिया मूँदिया करी तिया । 13 और तिना खे बोलेया, “लिखी राखेया, भेरे कअरो खे प्रार्थना रा मन्दर बोलोए, पर तुसे से डाकूआ रा डवार बणाई ता रा ।” 14 तेबे अन्दे और लंगडे, मन्दरो रे तिना गे आए और तिने सेयो ठीक करी ते । 15 पर जेबे, बडे पुरोईत और शास्त्रए, ये अचम्बे वाले काम, जो तिने कित्ते थे और लोका खे मन्दरो रे “दाऊदो री ल्वादा खे होशन्ना,” बोलदे उए देखेया, तो सेयो बऊत रोषे ऊईगे 16 और बोलणे लगे, “क्या तूँ सुणने लगी रा कि लोक क्या लगी रे बोलणे?” यीशुए तिना खे बोलेया, “आ; क्या तैं ये कदी नि पढ़ेया कि, ‘बालक और दूद पीणे वाले बच्चेया रे मुँओ ते तैं अपार स्तुति कराई?’ ” 17 तेबे सेयो तिना खे छाडी की नगरो ते बारे बैतनिथ्याहो खे गए, और राथियो खे तेथी ए ।

~~~~~

(~~~~~ 11:12-14,20-24)

18 प्यागा जेबे सेयो नगरो खे आऊणे लगी रे थे, तो तिना खे पूख लगी । 19 तेबे तिने सडका रे कनारे दाऊगले रा एक डाल देखी की तेसगे चली गे, पर तिदे पत्तेया खे छाडी की ओर कुछ नि था, तेबे तिने बोलेया, “आजो ते ताँदे कोई फल नि लगणा!” और दाऊगले रा डाल तेबुई सूकी गा । 20 ये देखी की चले हैरान ऊईगे और पूछणे लगे, “ये दाऊगले रा डाल एबु ई कियाँ सूकी गा?” 21 यीशुए तिना खे जवाब दित्तेया, “आऊँ तुसा खे सच लगी रा बोलणे कि जे तुसे विश्वास राखो और शक नि करो तो, तुसा इतणा ई नि करना, जो एस दाऊगले रे डालो साथे ऊआ; पर जे एस पाहूँडे खे बी बोलोगे, कि ‘पट्टी जा, और समुद्रो रे पड़ी जा,’ तो ऊई जाणा । 22 और जो कुछ तुसे प्रार्थना रे विश्वासो साथे मांगोगे, तो से सब तुसा खे मिली जाणा ।”

~~~~~

(~~~~~ 11:27-31; ~~~~~ 20:1-8)

23 जेबे सेयो मन्दरो रे उपदेश लगी रे थे करने, तेबे बडे पुरोईत और लोका रे बुजुर्ग तिना गे आए और पूछणे लगे, “तूँ इना कामा केसरे अक्को ते करेया? और ताखे ये अक्क किने देई राखेया?” 24 यीशुए तिना खे जवाब दित्तेया, “आऊँ बी तुसा ते एक गल्ल पुछूँआ, जे तुसे बताओगे, तो मां बी बताई देणा कि आऊँ इना कामा केस अक्को ते करूँआ । 25 यूहन्ने रा वपतिस्मा केथा ते था? स्वर्गो रिया तरफा ते या मांणूए रिया तरफा ते?” सेयो आपू बीचे विचार करने लगे, “जे आसे बोलूँगे कि ‘स्वर्गो री तरफा ते,’ तो एस पूछणा, ‘तेबे तुसे तेसरा विश्वास कऊँ नि कित्तेया?’ ” 26 और जे बोलूँगे, ‘मांणूए री तरफा ते,’ तो आसा खे लोका रा डर ए, कऊँकि यो सब तेसखे भविष्यवक्ता जाणो थे ।” 27 तो, तेबे तिने यीशुए खे जवाब दित्तेया, “आसे नि जाणदे ।” तेबे तिने बी तिना खे बोलेया, “तेबे आऊँ बी तुसा खे कुछ नि बतांदा कि इना कामा केसरे अक्को ते करूँआ ।

ⓂⓂⓂⓂ ⓂⓂⓂⓂ ⓂⓂ ⓂⓂⓂⓂⓂ

28 “एस उदारणो रे बारे रे तुसे क्या समजोए? केसी मांणूए रे दो पाऊ थे; तिने पईले पाऊए गे जाई की बोलेया, ‘ओ पाऊ, आज अँगूरा रे बगीचे रे जा और काम कर।’ 29 तिने बोलेया, ‘मां नि जाणा; पर से बादो ते मनो रे पछ्ताई की चली गा।’ 30 तेवे पिते दूजे गे जाई की बी एड़ा ई बोलेया, तिने जवाब दित्तेया, ‘अच्छा जी जाऊँआ,’ पर गया नि। 31 इना दूई बीचा ते किने पिते री इच्छा पूरी कित्ती?’ तिने बोलेया “पईले।” यीशुए तिना खे बोलेया, “आऊँ तुसा खे सच लगी रा बोलणे कि कर लणे वाले और वेश्या, तुसा ते पइले परमेशरो रे राज्य रे जाओए। 32 कऊँकि बपतिस्मा देणे वाला यूहन्ना तर्मो री बाट बतांदि ऊए तुसा गे आया और तुसे तेसरा विश्वास नि कित्तेया, पर कर लणे वाले और वेश्या तेसरा विश्वास कित्तेया और तुसे ये देखी की बादो ते पनि पछ्ताए कि तेसरा विश्वास करी लंदे।

ⓂⓂⓂⓂ ⓂⓂⓂⓂⓂⓂⓂⓂⓂⓂⓂⓂ ⓂⓂ ⓂⓂⓂⓂⓂ

(ⓂⓂⓂⓂ 12:1-12; ⓂⓂⓂⓂ 20:9-19)

33 “एक ओर उदारण सुणो कि एक करेलू मालक था। जिने अँगूरा रा बगीचा लगाया और तिजी रे चऊँ कनारे बाड़ लगाया और अँगूरा रे रसो खे पात्थरो दे एक गड्डा खणेया, जुगाली बणाई और ठेकेदारा खे तिजी रा ठेका देई की परदेशो खे चली गा। 34 जेवे फलो रा बखत नेडे आया तेवे तिने आपणे दास तिजी रा फल लणे तिना ठेकेदारा गे पेजे। 35 पर ठेकेदारो तेसरे दास पकड़ी की कोई कूटे, कोई काई ते और केसी खे पात्थर बाए। 36 तेवे तिने पईले ते जादा दास पेजे, पर तिने तिना साथे बी तेड़ा ई कित्तेया। 37 आखरी रे तिने आपणे पाऊए तिना गे ये सोची की पेजेया कि तिना मेरे पाऊए रा आदर करना। 38 पर ठेकेदारो पाऊए खे देखी की आपू बीचे ये बोलेया, ‘ये तो बारस ए, आओ एसखे काई देऊँ और एसरी जायदात लयी लऊँए।’ 39 तेवे तिने से पकड़ेया और अँगूरा रे बगीचे ते बारे निकयाली की काई ता। 40 बादो ते जेवे अँगूरा रे बगीचे रा मालक आऊणा, तो तेस तिना ठेकेदारा साथे क्या करना?’ 41 तिने यीशुए खे जवाब दित्तेया, “तेस बुरे लोक बुरी तरअ ते नाश करने और अँगूरा रे बगीचे रा ठेका केसी ओरी ठेकेदारा गे देई देणा। जिना बखतो पाँदे तेसखे फल देई देया करना।” 42 यीशुए तिना खे बोलेया, “क्या तुसे पवित्तर शास्तुरो रे ये कदी नि पढ़ेया, “जो पात्थर राजमिस्तिरए नकम्मा ठराया, सेई कूणे रे सिरे रा पात्थर ऊईगा।

ये परभुए रिया तरफा ते ऊआ, पर आसा री नजरा रे नऊखा ईए?”

43 “तेवेई तो आऊँ तुसा खे बोळूँआ कि परमेशरो रा राज्य तुसा ते लई लणा और एडिया जातिया गे देई देणा, जो फल ल्याओ। 44 जो एस पात्थरो पाँदे पडना, से चूर-चूर ऊई जाणा और जेस पाँदे ये पडना, तेस से पीसी देणा।” 45 बडे पुरोईत और फरीसी तिना रे उदारण सुणी की समजी गे कि सेयो आसा रे बारे रे लगी रे बोलणे। 46 तेवे तिने सेयो पकड़ने चाए, पर लोका ते डरी गे, कऊँकि सेयो तिना खे भविष्यबक्ता मानो थे।

22

ⓂⓂⓂⓂ ⓂⓂ ⓂⓂⓂⓂⓂⓂⓂⓂ ⓂⓂ ⓂⓂⓂⓂⓂ

(ⓂⓂⓂⓂ 14:15-24)

1 तेवे फेर यीशु तिना साथे उदारणा रे बोलणे लगे, 2 “स्वर्गो रा राज्य तेस राजे जेड़ा ए, जिने आपणे पाऊए रा ब्या कित्तेया। 3 तेवे तिने आपणे दास पेजे कि जाओ, निऊँदा दित्ते रे लोका खे ब्याओ री पाट्टिया रे बुलाओ, पर तिने आऊणा नि चाया। 4 तेवे तिने आपणे दास ये बोली की पेजे, निऊँदा दित्ते रे लोका खे बोलो, देखो, आऊँ पाट्टी त्यार करी चुकेया रा। मेरे बलद और पाले रे डांगर सब बाडी ते रे; और सब कुछ त्यार ए, ब्याओ री पाट्टिया रे आओ। 5 पर तिने कोई परवा नि कित्ती और कोई आपणे डोरूआ खे और कोई आपणे कामो खे चली गा। 6 और जो बचे, तिने सेयो दास पकड़े और तिना रा मजाक ऊड़ाया और काई ते। 7 जेवे राजे ये सुणेया तेवे तिना खे रोष आईगा और तिने आपणी सेना पेजी और जो अत्यारे थे, तिना रा सत्यानाश करी ता और तिना रे नगर फूकी ते। 8 तेवे तिने आपणे दासा खे बोलेया, ब्याओ री रोटी तो त्यार ए, पर खाणे वाले नि

आए।⁹ एबे एडा करो कि चौको रे जाओ और जितणे लोक तुसा खे मिलोगे, तिना खे रोटी खाणे ली आओ।¹⁰ तेबे तिने दासे सडका दे जाई की क्या खरे बुरे जो बी मिले सबी खे कट्टे करी की ली आया और ब्याओ रा कअर मांणूआ साथे फरी गा।

11 “जेबे राजा मईमाना खे देखणे पीतरे गया, तेबे तिने देखेया कि एक मांणूए ब्याओ रे टाले नि थे पडने रे जो राजे ब्याओ खे तेसखे पईनणे खे दित्ते थे।¹² तिने तेसते पूछेया, ओ दोस्त, तूँ एती ब्याओ रे टाले पडनी की कऊँ नि आयी रा, जो ताखे मँ पईनणे खे दित्ते थे? और से मांणू चुप ऊईगा।¹³ तेबे राजे, दासा खे बोलेया कि एसरे आथ-पैर बानो और एसखे बारे न्हरे रे राखी देओ, तेती रोणा और दाँद किरडना ई ऊणा।¹⁴ कऊँकि बुलाए रे तो बऊत ए, पर चुणे रे थोडे ईए।”

~~~~~

(~~~~~ 12:13-17; ~~~~~ 20:20-26)

15 तेबे फरीसी गए और आपू बीचे सोच-बिचार लगे करने कि एसखे कियौँ फसाइए? <sup>16</sup> तेबे यहूदी अगुवे यीशु गल्ला रे फसाणे री तंई कई फरीसी चले और हेरोदेस राजे रा समर्थन करने वाले यहूदी तिना गे पेजे। और तिने आयी की तिना खे बोलेया, “ओ गुरू! आसे जाणूए कि तुसे सच्चे और परमेशरो री बाट सच्चाईया साथे सिखाओए, और केसी री परवा नि करदे, कऊँकि तुसे मांणूए रा मूँ देखी की गल्ल नि करदे।<sup>17</sup> तो तुसे आसा खे बताओ कि तुसे क्या समजोए? कैसरो खे कर देणा खरा ए, या नई।”<sup>18</sup> यीशुए खे तिना री दुष्टता पता थी और तिने बोलेया, “ओ कपटियो; माखे कऊँ परखोए? <sup>19</sup> करो रा सिक्का मांगे दखाओ।” तेबे सेयो तिना गे एक चाँदिए रा सिक्का ली आए।<sup>20</sup> तिने तिना ते पूछेया, “ये मूर्ति और ये नाओं केसरा ए?”<sup>21</sup> तिने बोलेया, “कैसरो रा।” तेबे तिने बोलेया, “जो कैसरो राए से कैसरो खे और जो परमेशरो राए से परमेशरो खे देओ।”<sup>22</sup> ये सुणी की सेयो हैरान ऊईगे और तिना खे छाडी की चली गे।

~~~~~

(~~~~~ 12:18-27; ~~~~~ 20:27-40)

23 तेसी दिने सद्की, जो बोलो थे कि जो मरी जाओए तिना रा दुबारा जन्म नि ऊँदा, यीशुए गे आए और पूछणे लगे,²⁴ “ओ गुरू, मूसे बोलेया था कि जे कोई बिना ल्वादा ते मरी जाओ, तो तेसरा पाई तेसरी लाडिया साथे ब्या करी लओ और आपणे पाईए खे वंश पैदा करो।²⁵ एबे आसा रे सात पाई थे, पईला पाई ब्या करी की बिना ल्वादा तेई मरी गा और ल्वाद ना ऊणे री बजअ ते आपणी लाडिया खे आपणे पाईए खे छाडी गा।²⁶ तियोँ ई दूजे और तीजे बी एडा ई कित्तेया और साता साथे एडा ई ऊआ।²⁷ सबी ते बादो ते, से जवाणस बी मरी गी।²⁸ जेबे से जिऊँदी ऊणी तो केसरी लाडी ऊणी? कऊँकि से तो सबी री लाडी रई चुकी थी।”²⁹ यीशुए तिना खे जवाब दित्तेया, “तुसे पवित्र शास्त्र और परमेशरो री सामर्थ नि जाणदे, तेबई तो तुसा ते पूल ऊई री।³⁰ कऊँकि जेबे जिऊँदे ऊणे, तेबे ब्या-शादिया नि ऊणिया, पर सेयो स्वर्गो रे परमेशरो रे स्वर्गदूतो जेडे ऊणे।³¹ पर क्या तुसे, मरे रे जिऊँदे ऊणे रे बारे रे ये वचन नि पढ़ेया, जो परमेशरे तुसा खे बोलेया,³² आऊँ अब्राहमो रा परमेशर, इसहाको रा परमेशर और याकूबो रा परमेशर आ? सेयो मरे रेया रे नि, पर जिऊँदेया रे परमेशर ए।”³³ ये सुणी की लोक तिना रे उपदेशो ते हैरान ऊईगे।

~~~~~

(~~~~~ 12:28-34; ~~~~~ 10:25-28)

34 जेबे फरीसिये सुणेया कि तिने सद्किये रे मूँ बन्द करी ते, तो सेयो कट्टे ऊईगे।<sup>35</sup> तेबे तिना बीचा ते एक धर्मशास्त्रीए परखणे खे तिना ते पूछेया,<sup>36</sup> “ओ गुरू! बिधानो रे कुण जी गल्ल बडी ए?”<sup>37</sup> यीशुए तेसखे बोलेया, “तूँ परमेशर आपणे प्रभुए साथे, आपणे पुरे मन, आपणे पुरे प्राण और आपणी पूरी अक्ला साथे प्यार राख।<sup>38</sup> बडी और मुख्य आज्ञा तो येईए।<sup>39</sup> और एसा ई जेडी ये दूजी बी ए, तूँ आपणे पडोसिये साथे आपू जेडा प्यार राख।”<sup>40</sup> येई दो आज्ञा सारा बिधान और भविष्यवक्तेया रा आधार ए।”

॥२२२२ ॥२२२२२ ॥२२२२ ॥

(॥२२२२२ ॥ 12:35-37; ॥२२२२ ॥ 20:41-44)

41 जेबे फरीसी कट्टे थे, तेबे यीशुए तिना ते पूछेया, 42 “मसीह रे बारे रे तुसे क्या समजोए? से केसरी ल्वाद ए?” फरीसिये बोलेया, “दाऊदो री।” 43 तेबे तिने फेर पूछेया, “तेबे दाऊद आत्मा रे परी की तेसखे प्रभु कऊँ बोलोआ? 44 प्रभुए, मेरे प्रभुए खे बोलेया, ‘मेरे दाँणे बैठ, जदुओ तक आऊँ तेरे बैरिया खे तेरे पैरा निठे नि ल्याई देऊँ।’ 45 तो, जेबे दाऊद तेसखे प्रभु बोलोआ, तो से तेसरा पुत्र कियोँ ऊआ?” 46 इजी रा जवाब कोई नि देई सकेया। पर तिजी ते बादो ते केसी खे बी तिना ते कुछ पूछणे री इम्मत नि ऊई।

## 23

॥२२२२२२२ ॥२ ॥२२२२२२२ ॥२ ॥२२२ ॥२ ॥२२२

(॥२२२२२ ॥ 12:38,39; ॥२२२२ ॥ 11:43,46; 20:45,46)

1 तेबे यीशुए पीड़ा खे और आपणे चलेया खे बोलेया, 2 “शास्त्री और फरीसी, मूसे रे बिधानो खे अक्को साथे बताओ थे। 3 तो, सेयो तुसा खे जो कुछ बोलो, से करना और मानणा, पर तिना जेडे काम नि करना, कऊँकि सेयो ओरी खे सिखाओ तो आए, पर आपू तिना कामा खे करदे नि। 4 सेयो लोका खे एडे-एडे कडे नियम मानणे खे मजबूर करो थे जिना खे मानणा तिना खे बऊत कठण ए। पर आपू तिना नियमा खे मानणे री बी कोशिश तक नि करदे। 5 सेयो आपणे सारे काम लोका खे दखाणे री तँई करोए, सेयो आपणे जन्तर चौडे करोए और आपणे टालेया रे पल्ले बड़ाओ ए। 6 पाट्टिया रे खास-खास जगा और प्रार्थना रे कअरो रे खास-खास जगा 7 और बजारो रे नमस्ते और माणूआ ते गुरू बुलाणा तिना खे अच्छा लगोआ। 8 पर तुसे आपणे आपू खे गुरू नि बुलवाणा; कऊँकि तुसा रा एक ई गुरूए और तुसे सब आपू बीचे पाई ए। 9 तरतिया रे केसी खे आपणा पिता नि बोलणा, कऊँकि तुसा रा एक ई पिता ए, परमेशर जो स्वर्गो रे ए। 10 और मालक पनि बुलाणा, कऊँकि तुसा रा एक ई मालक ए, मतलब-मसीह। 11 जो तुसा बीचा ते बड़ा ओ, से तुसा रा दास बणो। 12 जो कोई आपू खे बड़ा बणाओगा, से छोटा ऊणा; और जो कोई आपू खे छोटा बणाओगा से बड़ा ऊणा।

॥२२२२२२ ॥२ ॥२२२२२२२ ॥२ ॥२२२२ ॥२ ॥२२२२

(॥२२२२२ ॥ 12:40; ॥२२२२ ॥ 11:39-42,44,52; 20:47)

13 “ओ कपटी शास्त्री और फरीसियो तुसा पाँदे हाय! तुसे माणूआ खे स्वर्गो रे राज्य रा द्वार बंद करोए। तुसे ना तो आपू ई तेती जादे और ना ई तिदे जाणे वालेया खे जाणे देंदे। 14 ओ कपटी शास्त्री और फरीसियो तुसा खे हाय! तुसे बिदुआ रे कअर खाई जाओए और दखाणे री तँई बऊत देर तक प्रार्थना करदे रओए, तेबेई तो तुसा खे जादा सजा मिलणी।

15 “ओ कपटी शास्त्री और फरीसियो तुसा खे हाय! तुसे एकी जणे खे आपणे मतो रे ल्याऊणे री तँई सारे जल और थलो रे फिरोए और जेबे से तुसा रे मतो रे आयी जाओआ, तो तेसखे आपू ते दुगणा नरको री सजा जोगा बणाई देओए।

16 “ओ अन्दे अगुओ तुसा खे हाय! जो बोलोए कि जे कोई मन्दरो री कसम खाओ तो कुछ नि, पर जो मन्दरो रे सुईने री कसम खाओगा तो तिना खे तेसा कसमा खे पूरा करना जरूरी ए। 17 ओ मूर्खो और अन्दो कुण बड़ा ए, सुईना या से मन्दर, जेते साथे सुईना पवित्र ओआ? 18 फेर बोलोए कि जे कोई बेदिया री कसम खाओ तो कुछ नि, पर से पेंट जो तिजी पाँदे ए, तेतेरी कसम खाओगा, तो तिना खे तेसा कसमा खे पूरा करना जरूरी ए। 19 ओ अन्दो! कुण बड़ा ए, पेंट या बेदी; जेते साथे पेंट पवित्र ओई? 20 तेबेई तो, जो बेदिया री कसम खाओआ, से तेतेरी और जो बी तेते पाँदे ए, तेतेरी बी कसम खाओआ। 21 जो मन्दरो री कसम खाओआ, से तेतेरी और तिदे रणे वालेया री बी कसम खाओआ। 22 जो स्वर्गो री कसम खाओआ, से परमेशरो रे सिंहासनो री और तिदे बैठणे वालेया री बी कसम खाओआ।

23 “ओ कपटी शास्त्री और फरीसियो तुसा खे हाय! तुसे पदीने, संफ और जीरे रा दसुआ पाअग देओए, पर तुसे बिधानो रिया गृढ़ गल्ला मतलब न्याय, कृपा और विश्वास छाडी ते रे, तुसा खे चाईयो था कि इना खे बी करदे रंदे और तिना खे पनि छाडदे। 24 ओ अन्दे अगुओ! तुसे छोटिया-छोटिया गल्ला रे नियम तो ईयां मानी लओए जियाँ माच्छरो खे पाणिए ते कनारे ताली देओए! पर परमेशरो री खास आज्ञा खे टालना, तुसा खे ऊँटो खे निगली जाणे रे बराबर ए।

25 “ओ कपटी शास्त्रियो और फरीसियो तुसा खे हाय! तुसे तिना कटोरे और थालिया जेडे ए, जिना खे पाँदा-पाँदा ते तो मांजी लओए, पर पितरे तिना रे गन्दगी परी री रओई। 26 हे अन्दे फरीसी, पईले कटोरे और थालिया खे पीतरा ते मांजी लओ ताकि से बारा ते बी साफ ओ।

27 “ओ कपटी शास्त्रियो और फरीसियो तुसा खे हाय! तुसे चूना फिरी री कब्रा जेडे ए, जो पाँदा ते तो सुन्दर दिशोई पर, पर पीतरा ते मरेया रिया आइडिया और सारिया गन्दे कामो साथे फरी रिये। 28 तियाँ ई तुसे बी, सामणे तो आपणे-आपू खे लोका खे तर्मी दखाओ ए, पर पीतरा ते कपट और पापो साथे फरे रे ए।

**XXXXXXXXXX XX XXXXXXXXXXXXXXXXXXXXXXX**

**(XXXXXX 11:47-51)**

29 “ओ कपटी शास्त्रियो और फरीसियो तुसा खे हाय! तुसे भविष्यवक्तेया रिया कब्रा सजाओए और तर्मिया रे समारक बणाओए। 30 और बोलोए, ‘जे आसे आपणे बाप-दादेया रे बखतो रे ऊँदे, तो भविष्यवक्तेया रिया अत्या रे तिना रा साथ नि देंदे।’ 31 इजी ते तो तुसे आपू ई आपणे खलाफ गवाई देओए कि तुसे भविष्यवक्तेया खे काणे वालेया रे ल्वाद ए। 32 तो तुसे आपणे बाप-दादेया रे जो बुरे काम तिने करी राखे तिजी खे पूरा करने वाले ओ। 33 ओ जईरीले सापो जेडे लोको, और जईरीले सापो री ल्वाद! तुसे ये कियाँ सोचा ला तुसे नरको रे दण्डो ते बची जाणे? 34 तेबई तो देखो, आऊँ तुसा गे भविष्यवक्ता खे, अकलमंदा खे और शास्त्रिया खे पेजुँआ और तुसा तिना बीचा ते कुछ लोक काणे और कुछ लोक करूसो पाँदे चढ़ाई देणे और कईया खे आपणे परार्थना रे कअरो रे कोडे बाणे और सेयो एकी नगरो ते दूजे नगरो खे नठाणे। 35 जिदे तर्मी हाबिलो ते लई की बिरक्याहो रा पाऊ जकरयाहो तक, जो तुसे मन्दरो रे और वेदिया बीचे काए थे, जितणे तर्मिया रा खून तरतिया रे बयी रा, तेतेरी सजा तुसा सवी खे मिलणी। 36 आऊँ तुसा खे सच बोलूँआ कि इना सवी अत्या री सजा एस बखतो रे सवी लोका खे मिलणी।

**XXXXXXXXXX XX XXXXX**

**(XXXXXX 13:34,35)**

37 “ओ यरूशलेमो रे लोको, ओ यरूशलेमो रे लोको! तूँ जो भविष्यवक्तेया खे काओआ और जो तांगे पेजी राखे, तिना खे पात्थर बाएआ, कितणी बार मैं चाया कि जियाँ मुर्गी आपणे बच्चेया खे आपणे पंखो निटे कट्टा करी की समालोई, तियाँ ई आऊँ बी चाऊँआ कि तेरे बालका खे कट्टा करी की समालूँ। पर तुसे नि चाया। 38 देखो, तुसा रा कअर तुसा खे उजाड़ी की छाडीता। 39 कऊँकि आऊँ तुसा खे बोलूँआ कि एबुए ते जडुओ तक तुसे नि बोलोगे, ‘धन्य ए सेयो, जो प्रभुए रे नाओं ते आओए’ तदुओ तक तुसा आऊँ फेर कदी नि देखणा।”

## 24

**XXXXXXXXXX XX XXXXXXXXXXXXXXXXXXXXXXX**

**(XXXXXX 13:1,2; XXXXX 21:5,6)**

1 जेबे यीशु मन्दरो ते निकली की जाणे लगी रे थे, तेबे तिना रे चले मन्दरो री रचना दखाणे खे तिना गे आए। 2 यीशुए तिना खे बोलेया, “तुसे जो ये सब कुछ लगी रे ना देखणे, आऊँ तुसा खे सच लगी रा बोलणे कि एती जो पात्थरो पदि पात्थर लगी रे, सब टाले जाणे।”

**XXXXXXXXXX XX XXXXXXX**

**(XXXXXX 13:3-13; XXXXX 21:7-19)**

3 जेबे यीशु जैतूनो पाहड़ो पाँदे बैठे रे थे, तेबे चलेया लग जे आयी की तिना खे बोलेया, “आसा गे बताओ कि यो गल्ला कदी ऊणिया? तुसा रे आऊणे रा और दुनिया रे आखरी रा क्या चिह्न ऊणा?”  
 4 यीशुए तिना खे जवाब दितेया, “चौकस रओ कि कोई तुसा खे बईकाओ नि। 5 कऊँकि बऊत जणे एड़े ऊणे जो, मेरे नाओं ते आऊणे और बोलणा, ‘आऊँ मसीह ए’, और तिना बऊत जणे भरमाणे।  
 6 तुसा लड़ाई और लड़ाईया रे बारे रे सुणो, पर कबराणा नि कऊँकि इना रा ऊणा जरूरी ए, पर तेस बखते अंत नि ऊणा। 7 कऊँकि जातिया पाँदे जातिया और राज्य पाँदे राज्य अमला करना और जगा-जगा अकाल पड़ना और ईल्लण ऊणे। 8 इना सबी गल्ला ते, पीड़ा री शुरूआत ऊणी। 9 तेबे सेयो लोक जो तुसा रे खलाफ ए क्लेश देणे खे तुसे पकड़वाणे और तुसे काणे और मां पाँदि विश्वास करने री बजअ ते सबी जातिया रे लोका तुसा ते बैर राखणा। 10 तेबे बऊत जणेया विश्वास करना छाडी देणा और एकी-दूजे पकड़वाणे और एकी-दूजे ते बैर राखणा। 11 बऊत सारे चूटे भविष्यबक्ता आऊणे और तिना बऊत लोक भरमाणे। 12 पापो रे बड़ने ते बऊत जणेया एकी दूजे साथे प्यार नि राखणा। 13 पर जो आखरी तक सबूर राखोगा, तेसरा ई उद्धार ऊणा। 14 और राज्य रा ये सुसमाचार सारी दुनिया रे प्रचार ऊणा, ताकि सब देशो रे लोका खे सुसमाचारो खे मानणे रा मौका मिलो, तेबे दुनिया रा अन्त आयी जाणा।

☞☞☞ ☞☞☞ ☞☞☞☞☞ ☞☞ ☞☞☞☞☞  
 (☞☞☞☞ 13:14-23; ☞☞☞☞ 21:20-24)

15 “पढ़ने वाला समजी लओ, जेबे तुसे, तेसा उजाड़ने वाली घृणित चीज जेतेरे बारे रे दानिय्यल भविष्यबक्ते बोलेया था, जेती ठीक निए तेती मतलब मन्दरो रे खड़ी री देखो। 16 तेबे जो यहूदिया रे ओ, सेयो पाहड़ो खे नटी जाओ। 17 जो कोई छूतो पाँदे ओ, सेयो आपणे कअरे कुछ बी लणे खे थाले नि आओ और ना ई पीतरे जाओ

18 “और जो कोई डोरूआ रे ओ, सेयो आपणे टाले लणे पीछे नि आटो। 19 तिना दिना रे जो गर्भवती ऊणी और जो दूद पलयाणे वाली ऊणी तिना खे हाय! हाय! 20 प्रार्थना करेया करो कि तुसा खे टण्डी रे और आरामो रे दिने नठणा नि पड़ो। 21 कऊँकि तेस बखते एड़ा पारी क्लेश ऊणा, जेड़ा दुनिया री शुरूओ ते लई की एवुए तक कदी नि ऊआ और ना ऊणा। 22 जे सेयो दिन कटाए रे नि ऊँदे, तो कोई पराणी नि बचना था; पर चुणे ऊए री बजअ ते सेयो दिन कटाए जाणे। 23 तेस बखते जे कोई तुसा खे बोलो कि देखो, मसीह एती ए, या तेती ए, तो विश्वास नि करना।

24 “कऊँकि चूटे मसीह और चूटे भविष्यबक्ता खड़े ऊणे और तिना बड़े-बड़े चिह्न और अचम्बे रे काम दखाणे, जे ऊई सको तो जो परमेशरो रे चुणे रे ए, तिना खे बी भरमाई देओ। 25 देखो, मैं पइले तेई तुसा खे ये सब कुछ बोली ता रा। 26 तेबे जे सेयो तुसा खे बोलो, देखो, से जंगलो रे ए, तो चली नि जाणा, या देखो, से छूतो पाँदे ए, तो विश्वास नि करना।

27 “कऊँकि जिंयाँ बिजली पूर्वो ते निकली की पच्छमो तक चमकोई, तियाँ ई मां माणू रे पुत्रो रा आऊणा बी ऊणा। 28 जेती लोथ ऊणी, तेथी इल्ला कट्टिया ऊणिया।

☞☞☞☞☞ ☞☞ ☞☞☞☞☞☞ ☞☞ ☞☞☞☞☞☞☞  
 (☞☞☞☞☞ 13:24-27; ☞☞☞☞☞ 12:25-28)

29 “तिना दिना रे, तेस क्लेशो ते बाद सूरजो रा चमकदा प्रयासा न्हेरा पड़ी जाणा और चाँदे प्रयासा नि देणा। और सर्गो ते तारे छूटणे शुरू ऊणे और सर्गो रिया शक्तिया इलाईया जाणिया। 30 तेबे माणू रे पुत्रो रा चिह्न सर्गो रे दिशणा। तेबे तरतिया रे सबी कुला रे लोका छातिया पीटणियाँ और माणू रा पुत्र बड़ी सामर्थ और महिमा साथे सर्गो रे बादला पाँदे आऊँदे ऊए देखणा। 31 तेस तुरहिया रे बड़ी आवाजा साथे, आपणे स्वर्गदूत पेजणे और तिना सर्गो रे एकी कनारे ते लई की दूजे कनारे तक, चारो दिशा रे तेसरे चुणे रे कटटे करने।

☞☞☞☞☞☞☞ ☞☞ ☞☞☞☞☞☞ ☞☞☞☞☞  
 (☞☞☞☞☞ 13:28-31; ☞☞☞☞☞ 21:29-33)

32 “दाऊगले रे डालो ते ये उदारण सीखो, जेबे तेतेरी डाली नरम ऊई जाओई और पत्ते निकलने लगोए, तो तुसे जाणी लओए कि तऊँदी नेडे ए। 33 ईयाँ ई जेबे तुसे इना गल्ला खे ऊँदे ऊए देखो, तो समजी जाणा कि एबे आऊँ नेडे ईए, बल्कि द्वारो पाँदे ईए खड़ेया रा। 34 आऊँ तुसा खे सच लगी रा बोलणे कि जदुओ तक यो सब गल्ला पूरिया नि ऊई जाओगिया, तदुओ तक एसा पीढिया रे लोका री मौत नि ऊणी। 35 सर्ग और तरती टली जाओगी, पर मेरा वचन कदी नि टलना।”

□□□□□ □□

(□□□□□ 13:32-37; □□□□□ 17:26-30,34-36)

36 तेस दिनो रे बारे रे और तेसा कअडिया रे बारे रे कोई नि जाणदा, न स्वर्गदूत, ना पुत्र, पर बस पिता। 37 जेडे न्होरे रे दिन थे, तियाँ ई मां माणू रे पुत्रो रा आऊणा बी ऊणा। 38 कऊँकि जियाँ जल-प्रलय ते पईले, जदुओ तक नूह जाहूजो रे नि चढ़ेया, तदुओ तक लोक खाओ-पीओ थे और तिना रे ब्या-शादिया ओ थे 39 और जदुओ तक जल-प्रलय तिना सबी खे हड़ाई की नि लईगा, तदुओ तक तिना खे कुछ बी पता नि चलेया; तियाँ ई मां माणू रे पुत्रो रा बी आऊणा ऊणा। 40 तेस बखते दो जणे डोरूआ रे ऊणे, एक लयी लणा और दूजा छाडी देणा। 41 दो जवाणसा चाक्की पीशणे लगी री ऊणिया, एक लयी जाणी और दूजी छाडी देणी। 42 तेबेई तो, जागदे रओ, कऊँकि तुसे नि जाणदे कि तुसा रा प्रभु केस दिने आयी जाणा। 43 पर ये जाणी लओ कि जे कअरो रा मालक जाणदा कि चोर कदी जे आऊणा तो, से जागदा रंदा और आपणे कअरे चोरी नि ऊणे देंदा। 44 इजी री खातर तुसे बी त्यार रओ, कऊँकि जेसा कअडिया रे बारे रे तुसे सोचदे पनि, तेसी कअडिया रे आऊँ माणू रा पुत्र आयी जाणा।

□□□□□□□□ □□□□ □□ □□ □□□□□ □□□

(□□□□□ 12:41-48)

45 एक विश्वासो जोगा और अकलमंद दास एड़ा ए: जेसखे कअरो रा मालक दूजे दासा पाँदे निगरानी और बखतो पाँदे रोटी देणे खे जिम्मेवारी देओआ। तिजी ते बाद से परदेशो खे चली जाओआ। 46 धन्य ए से दास, जेसखे तेसरा मालक आयी की एड़ा ई करदा ऊआ पाओ। 47 आऊँ तुसा खे सच लगी रा बोलणे कि तेस से आपणी सारी सम्पतिया पाँदे अक्कदार ठराणा। 48 पर जे से दुष्ट दास सोचणे लगो कि मेरे मालको खे आऊणे रे देर ए 49 और आपणे साथलेया दासा खे कुटणे लगी जाओ और पीणे वालेया साथे खाओ-पीओ, 50 तो तेस दासो रा मालक एडे दिने आऊणा, जेबे से तेसखे न्यालदा ई ना ओ और एडिया कअडिया रे, जेतेखे से नि जाणदा ओ। 51 तेबे तेस तेसखे बऊत दण्ड देणा और तेसरा इस्सा कपटिया साथे ठराणा; तेती रोणा और दाँद किरइना ऊणा।”

## 25

□□ □□□□□□□□ □□ □□□□□

1 तेबे यीशुए आपण चलेया खे फेर बोलेया, “जेबे आऊँ माणू रा पुत्र आऊणा, तेबे स्वर्गो रा राज्य लाडिया री तिना दस कुआँरिया सहेलिया जेडा ऊणा, जो आपणिया मशाला लयी की तेसा रे लाडे साथे मिलणे खे निकलिया। 2 तिना बीचा ते पाँज मूखँ और पाँज समजदार थिया। 3 जो मूखँ थिया तिने आपणिया मशाला तो लईया, पर आपू साथे फालतू तेल नि लया। 4 पर समजदार आपणिया मशाला साथे आपणिया कूपिया रे तेल बी परी ला। 5 जेबे लाडे खे आऊणे रे देर ऊईगी, तेबे तिना खे नीजा रे टमके लगणे लगे और सेयो सयी गिया।

6 “आदिया राती आल्ला-गोल्ला लगेया ऊणे कि देखो, लाडा आऊणे लगी रा, तेस साथे मिलणे चलो। 7 तेबे सेयो सब कुआँरिया उठिया और आपणी-आपणी मशाला ठीक करने लगिया। 8 तेबे जो मूखँ थिया सेयो समजदार खे लगिया बोलणे, ‘आपणे तेलो बीचा ते आसा खे बी थोडा जा तेल देई दो, कऊँकि आसा री मशाला बिजणे लगी रिया।’ 9 पर समजदार बोलेया, ‘ये आसा और तुसा खे पूरा नि ऊणा। खरा तो ये कि तुसे जाओ और बेचणे वालेया ते खरीदी की ली आओ।’ 10 जदुओ खे सेयो खरीदणे गईया, तदुओ खे लाडा आईगा और जो त्यार थिया, सेयो तेस साथे ब्याओ रे कअरे चली गिया और द्वार बंद करी ता। 11 तिजी ते बाद सेयो दुजिया कुआँरिया बी आयी की लाडे खे बोलणे



लगिया, 'ओ मालक, ओ मालक, आसा खे बी दरवाजा खोलो।' <sup>12</sup> तिने जवाब दितेया, 'आऊँ तुसा खे सच लगी रा बोलणे कि आऊँ तुसा खे नि जाणदा।' <sup>13</sup> इजी री खातर जागदे रओ, कऊँकि तुसे ना तो मेरे आऊणे रे तेस दिनो खे जाणोए और ना तेसा कअडिया खे।

ⓂⓂⓂⓂⓂⓂ ⓂⓂ ⓂⓂⓂⓂⓂⓂ  
(ⓂⓂⓂⓂ 19:11-27)

<sup>14</sup> "स्वर्गो रा राज्य तेस मांणूए जेड़ा बी ए, जिने परदेशो खे जांदि ऊए आपणी सारी सम्पति, आपणे दासा खे बुलाई की तिना गे सम्बाली ती। <sup>15</sup> तिने एकी खे पाँज तोड़े, (एक तोड़ा मतलब पन्द्रहा साला री ल्याड़ी) दूजे खे दो और तीजे खे एक, मतलब हर एकी खे तेसरी काबलियता रे मुताबिक दितेया और तेबे परदेशो खे चली गा। <sup>16</sup> तेबे, जेसखे पाँज तोड़े मिले थे, से गया और तिने जाई की तिजी साथे लेण-देण कितेया और पाँज तोड़े ओर कमाए। <sup>17</sup> ईयाँ ई जेसखे दो तोड़े मिले थे तिने बी दो तोड़े ओर कमाए। <sup>18</sup> पर जेसखे एक तोड़ा मिलेया था, तिने जाई की माट्टी खणी और आपणे मालको रे पैसे लकोई ते।

<sup>19</sup> "बऊत दिन बाद तिना दासा रा मालक आया और तिना ते लेखा लगेया लणे। <sup>20</sup> जेसखे पाँज तोड़े मिले थे, तिने पाँज तोड़े ओर ल्याई की बोलया, 'ओ मालक, तुसे माखे पाँज तोड़े दिते थे और मैं इजी ते पाँज तोड़े ओर कमाए।' <sup>21</sup> तेसरे मालके तेसखे बोलेया, 'धन्य ए तूँ, खरे और विश्वास जोगे दास, तूँ थोड़े रेई विश्वासो जोगा रया, मां तूँ बऊत चीजा रा अक्कदार बनाणा, आओ मां साथे खुशिया रे शामिल ओ।' <sup>22</sup> "तेबे जेसखे दो तोड़े मिले थे, तिने बी आयी की बोलेया, 'ओ मालक! तुसे माखे दो तोड़े दिते थे, देखो, मैं दो तोड़े ओर कमाए।' <sup>23</sup> तेसरे मालके तेसखे बोलेया, 'धन्य ए तूँ, खरे और विश्वास जोगे दास, तूँ थोड़े रेई विश्वासो जोगा रया, मां तूँ बऊत चीजा रा अक्कदार बनाणा, आओ मां साथे खुशिया रे शामिल ओ।' <sup>24</sup> "तेबे जेसखे एक तोड़े मिलेया था, तिने आयी की बोलेया, 'ओ मालक! आऊँ तुसा खे जाणूआ कि तुसे कठोर माणू ए। तुसे जेती बांदि नि तेती, बाडोए और जेती फरकांदा नि, तेती कट्टा करोए।' <sup>25</sup> तो आऊँ डरीगा और जाई की तुसा रा तोड़ा माट्टिया रे लकोईता, देखो, 'जो तुसा राए, से ये ए।' <sup>26</sup> तेसरे मालके तेसखे जवाब दितेया, 'ओ दुष्ट और आलसी दास, जेबे तूँ जाणेया था कि जेती मैं नि बायी राखेया, से बाडी देऊँआ और जेती फरकांदा नि, तथा ते कट्टा करूँआ। <sup>27</sup> तो ताखे चाईयो था कि तूँ मेरे पैसे साऊकारो गे देई देंदा, तेबे आऊँ आयी की आपणा पैसा ब्याजो समेत लई लंदा। <sup>28</sup> इजी खे ये तोड़ा एसते लई लो और जेसगे दस तोड़े ए, तेसखे देई देओ' <sup>29</sup> कऊँकि जेस केसी गे आए, तेसखे ओर देणा और तेसगे ओर ऊई जाणा, पर जेसगे कुछ निए, तेसते से बी, जो तेसगे आए, लई लणा। <sup>30</sup> एस नकम्मे दासो खे बारे न्हरे रे सेटी देओ, जेती रोणा और दाँद किरडना ई ऊणा।

ⓂⓂⓂⓂⓂⓂ ⓂⓂ ⓂⓂⓂⓂⓂⓂ

<sup>31</sup> "जेबे आऊँ माणू रा पुतर आपणी महिमा रे आऊणा, तेबे सब स्वर्गदूत मां साथे आऊणे, तेबे मां आपणी महिमा रे सिंहासनो रे बैठणा। <sup>32</sup> तेबे सब जातिया तेस सामणे कट्टिया करी देणियाँ और जियाँ गाद्दी बाकरिया खे पेडा ते लग करी देओआ, तियाँ ई तेस सेयो एकी-दूजे ते लग करी देणियाँ। <sup>33</sup> तेस पेडा मतलब तर्मी लोक आपणे दाणे कनारे खड़े करने और बाकरिया मतलब पापी लोक खूँजे कनारे। <sup>34</sup> तेबे मां राजे आपणी दाँणे कनारे वालेया खे बोलणा, 'ओ मेरे पिते रे धन्य लोको; आओ, तेस राज्य रे अक्कदार ऊई जाओ, जो दुनिया रे सृष्टिया ते तुसा खे त्यार ए किते रा। <sup>35</sup> कऊँकि जेबे आऊँ पूखा था और तुसे माखे खाणे खे दितेया, जेबे आऊँ त्याया था, तुसे माखे पाणी पलयाया, जेबे आऊँ परदेशी था, तुसे आऊँ आपणे कअरे ठराया। <sup>36</sup> जेबे आऊँ नांगा था, तुसे माखे टाले दिते, जेबे आऊँ बमार था और तुसे मेरी सम्बाल लई, जेबे आऊँ जेला रे था और तुसे माखे मिलणे आए।' <sup>37</sup> "तेबे तर्मिया तेसते पूछणा, 'आसे कदी तूँ पूखा देखेया और ताखे खुलाया? या त्याया देखेया और पाणी पलयाया? <sup>38</sup> आसे कदी तूँ परदेशी देखेया और आपणे कअरे ठराया? या नांगा देखेया

और टाले पणयाए? 39 आसे कदी तूँ जेला रे या बमार देखेया और ताखे मिलणे आए? 40 तेबे राजे तिना खे जवाब देणा, 'आऊँ तुसा खे सच लगी रा बोलणे कि तुसे इना मेरे छोटेट्या ते छोटेट्या, केसी एकी पाईए साथे बी कित्तेया, से मां ई साथे कित्तेया ।'

41 'तेबे तेस खूँजे कनारे वालेया खे बोलणा, 'ओ सुरापित लोको! मां सामणे ते एसा अनन्त आगी रे चली जाओ, जो परमेशेरे शैतानो खे और तेसरे दूतो खे त्यार ए कित्ती री। 42 कऊँकि आऊँ पूखा था, पर तुसे माखे रोटी नि दित्ती और आऊँ त्याया था, पर तुसे माखे पाणी नि पलयाया? 43 आऊँ परदेशी था, पर तुसे माखे आपणे कअरे जगा नि दित्ती, आऊँ नांगा था, पर तुसे माखे टाले नि दित्ते । आऊँ जेला रे और बमार था, पर तुसे माखे मिलणे नि आए ।'

44 'तेबे तिना जवाब देणा, 'ओ प्रभु! आसे कदी तूँ पूखा, त्याया, परदेशी, नांगा, बमार और जेला रे देखेया और तेरी सेवा नि कित्ती?' 45 तेबे मां तिना खे जवाब देणा, 'आऊँ तुसा खे सच लगी रा बोलणे कि जो तुसे इना छोटेट्या ते छोटेटे बीचा ते केसी एकी साथे पनि कित्तेया, से मां साथे पनि कित्तेया' 46 और तिना खे अनन्त सजा मिलणी, पर तर्मी, अनन्त जीवनों खे जाणे ।'

## 26

XXXXXXXXXXXXXXXXXXXX (22-222)

(XXXXXXXX 14:1,2; XXXXXX 22:1,2; XXXXXXXX 11:45-53)

1 जेबे यीशु इना सबी गल्ला बोली चुके, तेबे आपणे चलेया खे बोलणे लगे, 2 'तुसे जाणोए कि दो दिन बाद फसह रा त्योआर ए और माणू रा पुत्र कूरुसो पाँदि चढाणे रिया तंई पकड़वाया जाणा ।'

3 तेबे बड़े पुरोईत और लोकारे रे बुजुर्ग, कैफा नाओ रे परदान पुरोईतो रे आँगणो रे कट्टे ऊए 4 और आपू बीचे बिचार करने लगे कि यीशुए खे तोखे रे पकड़ी की काई देऊँए। 5 पर सेयो बोलो थे, 'त्योआरो रे बखते नि, केथी एड़ा नि ओ कि लोका बीचे हुड़दंग मची जाओ ।'

XXXXXXXXXXXXXXXXXXXX

(XXXXXXXX 14:3-9; XXXXXXXX 12:1-8)

6 जेबे यीशु बैतनिय्याह गांव रे शमौन कोदिए रे कअरे थे 7 तेबे एक जवाणस संगमरमरो रे पांडे री सुराइया रे मईगा इतर लयी की तिना गे आयी और जेबे सेयो रोटी खाणे बैठे रे थे, तेबे तेसे तिना रे सिरों पाँदि उलटाईता । 8 ये देखी की तिना रे चले जलने लगे और बोलणे लगे, 'एते इतरो रा सत्यानाश कऊँ कित्तेया? 9 एस इतरो खे खरे दामो रे बेची की कंगाला खे बांडी सको थे ।' 10 ये जाणी की यीशुए तिना खे बोलेया, 'एसा जवाणसा खे तंग कऊँ लगी रे करने? एसे मां साथे पलाई करी राखी । 11 कंगाल तो तुसा साथे सदा रओए, पर आऊँ तुसा साथे सदा नि रणा । 12 तेसे मेरे शरीरो रे जो ये इतर उलटाया, से मेरे दबाणे खे करी राखेया । 13 आऊँ तुसा खे सच लगी रा बोलणे कि सारी दुनिया रे जेती केथी बी ये सुसमाचार प्रचार ऊणा, तेती एस कामो री चर्चा तेसा री यादा रे ऊणी ।'

XXXXXXXXXXXXXXXXXXXX

(XXXXXXXX 14:10-11; XXXXXX 22:3-6)

14 तेबे यहूदा इस्करियोतो जो बारा चलेया बीचा ते एक था, तिने बड़े पुरोईतो गे जाई की बोलेया, 15 'जे आऊँ तिना खे तुसा रे आथो रे पकड़वाई देऊँ तो माखे क्या देणा?' तिने तेसखे तीई चाँदिए रे सिक्के तोली की देई ते । 16 तेबे से तेसी बखतो ते यीशुए खे पकड़वाणे रा मोका टोलने लगेया ।

XXXXXXXXXXXXXXXXXXXX

(XXXXXXXX 14:12-21; XXXXXX 22:7-13,21,23)

17 तेबे बिना सजेड़े री रोटिया रे त्योआरो रे पईलके दिने चले आयी की यीशुए ते पूछणे लगे, 'तुसे केयी चाओए कि आसे तुसा खे फसह रे त्योआरो री रोटी खाणे री त्यारी करिए?' 18 यीशुए बोलेया, 'नगरो रे अमुक नाओ रे माणूए गे जाओ और तेसखे बोलो कि गुरू बोलोआ कि मेरा बखत

नेड़े ए, मां आपणे चेलैया साथे तेरे कअरे ये फसह रा त्योआर मनाणा ।” 19 तेबे चेलैया यीशुए री आज्ञा मानी और फसह रे त्योआरो री रोटी त्यार किती ।

20 जेबे साँज ऊई तेबे सेयो आपणे बारा चेलैया साथे रोटी खाणे बैटे । 21 जेबे सेयो खाणे लगी रे थे तेबे तिने बोलेया, “आऊँ तुसा खे सच लगी रा बोलणे कि तुसा बीचा ते एकी जणे आऊँ पकड़वाणा ।” 22 ये सुणी की सेयो बऊत दुःखी ऊईगे और सब तिना ते पूछणे लगे, “ओ गुरु! क्या से आऊँ ए?” 23 तिने जवाब दित्तेया, “जिने मां साथे थालिया रे आध पाई राखेया, तेस आऊँ पकड़वाणा । 24 आऊँ माणूं रा पुत्र पक्का ई मारेया जाणा जेड़ा मेरे बारे रे पवित्र शास्त्रो रे लिखी राखेया, पर तेस माणूए खे हाय, जेस आऊँ पकड़वाणा । तेस माणूए खे खरा था कि से जमदा ई नि ।” 25 तेबे तिना खे पकड़वाणे वाले यहूदे बोलेया, “ओ गुरु! क्या से आऊँ ए?” तिने तेसखे बोलेया, “तू आपू ई बोली चुकेया ।”

????-??

(???? 14:22-26; ???? 22:14-20; 1 ????????????? 11:23-25)

26 जेबे सेयो खाणे लगी रे थे, तेबे यीशुए रोटी लयी और आशीष मांगी की तोड़ी और चेलैया खे दित्ती और बोलेया, “लओ खाओ; ये मेरा शरीर ए ।” 27 तेबे तिने कटोरा लयी की धन्यवाद कित्तेया और तिना खे देई की बोलेया, “तुसे सब एते बीचा ते पियो । 28 कऊँकि ये वाचा रा मेरा से खून ए, जो बऊत जणेया रे पापो री माफिया खे बाह्या जाओआ । 29 आऊँ तुसा खे सच बोळूँआ कि मां अँगूरा रा रस तेस दिनो तक फेर कदी नि पीणा, जदुओ तक तुसा साथे आपणे पिते रे राज्य रे नया नि पीऊँ ।” 30 तेबे सेयो पअजन गायी की जैतूनो रे पाहड़ो पाँदे गए ।

???? ?? ??????? ?? ???????????

(???? 14:27-31; ???? 22:31-34; ??????? 13:36-38)

31 तेबे यीशुए तिना खे बोलेया, “तुसा सबी आजो राती मेरे बारे रे टोकर खाणी; कऊँकि लिखी राखेया, मां गादी काणे और चूण्डा रिया पेडा ओरे-पोरे ऊई जाणिया ।” 32 पर मेरे रया बीचा ते जिऊँदे ऊणे ते बाद, मां तुसा ते पईले गलीलो खे जाणा ।” 33 ये सुणी की पतरसे तिना खे बोलेया, “चाए सब तुसा रे बारे रे टोकर खाओ तो खाओ, पर मां कदी नि खाणी ।” 34 यीशुए तेसखे बोलेया, “आऊँ ताखे सच लगी रा बोलणे कि आज राती मुर्गे री बांग देणे ते पडले, तू तीन बार माखे जाणने ते मुकरी जाणा ।” 35 पतरसे तिना खे बोलेया, “जे माखे तुसा साथे मरना बी पड़ोगा, तो बी मां कदी ना नि करनी” और सबी चले बी एड़ा ई बोलेया ।

?????? ?? ???????????

(???? 1:32-42; ???? 22:39-46)

36 तेबे यीशु आपणे चेलैया साथे गतसमनी नाओं री जगा रे आए और आपणे चेलैया खे बोलणे लगे, “एथी बैठे रे रणा, जदुओ तक आऊँ तेती जाई की प्रार्थना करूं ।” 37 सेयो पतरस और जब्दिए रे दोनो पाऊए खे साथे लईगे और उदास और बेचैन ऊणे लगे । 38 तेबे यीशुए तिना खे बोलेया, “मेरा जिऊ बऊत उदास ए, एथो तक कि मेरे प्राण निकलने लगी रे; तुसे एथी रूको और मां साथे जागदे रओ ।” 39 तेबे सेयो थोड़ी जी आगे चली की मुओ रे पारे रुड़ी गे और ये प्रार्थना करने लगे, “ओ मेरे पिता! ऊई सको तो ये दुःख मांगा गे ते टली जाओ, पर तेबे बी जेड़ा आऊँ चाऊँआ, तेड़ा नि, पर जेड़ा तुसे चाओए तेड़ा ओ ।” 40 तेबे जेबे सेयो वापस आए तो चले सऊणे लगी रे थे, तेबे तिने पतरसो खे बोलेया, “क्या तुसे मां साथे एक कअड़ी पनि जागी सके? 41 जागदे रओ और प्रार्थना करदे रओ कि केथी तुसे परीक्षा रे नि पड़ी जाओ; आत्मा तो त्यार ए, पर शरीर कमजोर ए ।” 42 फेर तिने दूजी बार जाई की प्रार्थना किती, “ओ मेरे पिता! जे ये मेरे पीणे ते बिना नि आटी सकदा, तो तुसा री इच्छा पूरी ओ ।” 43 तेबे फेर जेबे सेयो आए तो तिने आपणे चले सए रे पाए, कऊँकि तिना री आखी रे नीज थी । 44 तिना खे छाडी की सेयो फेर चली गे और तिना ई शब्दा ते तिने तीन बार प्रार्थना किती । 45 तेबे यीशुए चेलैया गे आयी की बोलेया, “एबे सऊँदे रओ और आराम करो ।

देखो, से कअड़ी आईगी री कि आऊँ माणूं रा पुत्र पापिया रे आथे पकड़वाणे वाला ए।<sup>46</sup> उठो, चलो, देखो, माखे पकड़वाणे वाला नेड़े आईगा रा।”

**XXXXXXXXXX**

(XXXXXXXX 14:43-50; XXXXX 22:47-53; XXXXXXXX 18:3-12)

47 यीशु ये बोलणे ई लगी रे थे तदुओ कि यहूदा, जो बारा चेलैया बीचा ते एक था, आया और तेस साथे बड़े पुरोईत और लोकारे बुजुर्गा री तरफा ते एक बड़ी पीड़, तलवार और डण्डे लयी की आयी।<sup>48</sup> तिना खे पकड़वाणे वाले तिना खे बताई ता था कि, “जेसखे आऊँ नमस्ते करूं और गले लगूं, सेई ऊणा और तुसे से पकड़ी की लई जाणा।”<sup>49</sup> तेवे तिने फटाफट यीशुए गे आयी की बोलेया, “ओ गुरू!” और तेसखे नमस्ते किन्ती और गले लगेया।<sup>50</sup> यीशुए तेसखे बोलेया, “ओ दोस्त! जेते कामो खे तू आयी रा तेस कर।” तेवे तिने नेड़े आयी की यीशु पकड़ी ले।<sup>51</sup> तेवे यीशुए रे चेलैया बीचा ते एकी जणे आथ आगे करी की आपणी तलवार खिंजी ली और प्रदान पुरोईतो रे एकी दासो पाँदे चलाई और तेसरा कान ऊड़ाई ता।<sup>52</sup> तेवे यीशुए तेसखे बोलेया, “आपणी तलवार म्यानो रे राखी दे, कऊँकि जो तलवार चलाओए, तिना रा तलवारी साथे नाश ऊणा।<sup>53</sup> क्या तू नि जाणदा कि आऊँ आपणे पिते ते बिनती करी सकूँआ और सेयो आपणे स्वर्गदूतो रिया बारा पलटणा ते बी जादा एबु मांगे पेजी सकोए? <sup>54</sup> पर पवित्तर शास्त्रो रिया गल्ला कि ईयाँ ई ऊणा जरूरी ए, कियाँ पूरिया ऊणिया।”<sup>55</sup> तेस बखते यीशुए पीड़ा खे बोलेया, “क्या तुसे माखे डाकू समजोए कि तलवारी और डण्डे लयी की माखे पकड़ने आयी रे? आऊँ रोज मन्दरो रे बैठी की उपदेश देऊँ था, तेवे तुसे कऊँ नि पकड़ैया? <sup>56</sup> पर ये सब तेवे ऊआ ताकि भविष्यवक्ते रे वचन पूरे ओ” और सब चले तिना खे छाड़ी की नटीगे।

**XXXXXXXXXX**

(XXXXXXXX 14:53-65; XXXXX 22:54,55,63,71; XXXXXXXX 18:13,14,19-24)

57 तेवे यीशुए खे पकड़ने वाले तिना खे कैफा नाओं रे प्रदान पुरोईतो गे लईगे। जेती शास्त्री और बुजुर्ग कट्टे थे ऊए रे।<sup>58</sup> पतरस दूरो तेई तिना ते पीछे-पीछे प्रदान पुरोईतो रे आँगणो तक गया और पीतरे जाई की अन्त देखणे खे प्यादेया साथे बैठी गा।<sup>59</sup> बड़े पुरोईत और सारी बड़ी सभा यीशुए खे काणे रिया तई चूठी गवाई सोचणे लगी रे थे।<sup>60</sup> पर बऊत चूटे गवा आए, पर तेवे पनि मिली।<sup>61</sup> बादो ते दो जणया आयी की बोलेया, “इने बोली राखेया कि आऊँ परमेशरो रे मन्दरो खे टाली सकूँआ और तीजे दिने दूजा बणाई सकूँआ।”

62 तेवे प्रदान पुरोईते खडे ऊई की बोलेया, “क्या तू कोई जवाब नि देणा चांदा? यो लोक तेरे बारे रे क्या गवाई लगी रे देणे?”<sup>63</sup> पर यीशु चुप राए। तेवे प्रदान पुरोईते तिना खे बोलेया, “आऊँ ताखे जिऊँदे परमेशरो री कसम देऊँआ कि जे तू परमेशरो रा पुत्र मसीह ए तो आसा गे बोली दे।”<sup>64</sup> यीशुए तेसखे बोलेया, “तै आपू ई बोली ता; बल्कि आऊँ तुसा खे ये बी बोलूँआ कि आजो ते तुसा आऊँ माणूं रा पुत्र, सर्वशक्तिमानो रे दाँणे कनारे और सर्गो रे बादला पाँदे आऊँदे ऊए देखणा।”<sup>65</sup> तेवे प्रदान पुरोईते आपणे टाले फाड़े और बोलेया, “इने परमेशरो री निन्दा करी राखी, एवे आसा खे गवाओ री क्या जरूरत ए। देखो, तुसे एबु ये निन्दा सुणी राखी।<sup>66</sup> तुसे क्या सोचोए?” तिने जवाब दितेया, “ये तो काणे जोगा ए।”<sup>67</sup> तेवे तिने यीशुए रे मुँओ पाँदे थूकैया और तिना खे मुक्के बाए और किने तो थप्पड़ बाए और बोलेया,<sup>68</sup> “ओ मसीह, आसा खे भविष्यवाणी करी की बोल कि ताँदे किने बाई?”

**XXXXXXXXXX**

(XXXXXXXX 14:66-72; XXXXX 22:56-62; XXXXXXXX 18:15-18,25-27)

69 पतरस बारे आँगणो रे बैठे रा था, तेवे एक दासी तेसगे आयी और बोलेया, “तू बी तो यीशु गलीलीए साथे था?”<sup>70</sup> तेवे से सबी सामणे मुकरी गा और तिने बोलेया, “आऊँ नि जाणदा कि तू क्या लगी री बोलणे।”<sup>71</sup> जेवे से बारे देऊलिया गे चली गा, तेवे दूजी दासिये बी तेसखे देखी की जो तेती थे तिना खे बोलया, “ये बी तो यीशु नासरियो साथे था।”<sup>72</sup> पतरस फेर कसम खाई की बोलेया,

“आऊँ एस माणूए खे नि जाणदा।” <sup>73</sup> थोड़ी देर बाद लोके जो तेती खड़ी रे थे, तिने पतरसो गे आयी की तेसखे बोलेया, “सच्ची तूँ बी तिना बीचा ते एक ए, कऊँकि तेरी पाषा तेरा पेत बताओई।” <sup>74</sup> तेबे से आपू खे कोसणे लगेया और कसम खाणे लगेया, “आऊँ एस माणूए खे नि जाणदा” और तेबुई मुर्गे बांग दित्ती। <sup>75</sup> तेबे पतरसो खे यीशुए री गल्ल याद आयी कि, “मुर्गे री तीन बार बांग देणे ते पडले तां मेरे बारे रे जाणने ते ना करनी,” तेबे से बारे जाई की फुटी-फुटी की रोणे लगेया।

## 27

⚬⚬⚬⚬⚬⚬⚬⚬⚬⚬⚬⚬⚬⚬⚬⚬⚬⚬

(⚬⚬⚬⚬⚬ 15:1; ⚬⚬⚬⚬⚬ 23:12; ⚬⚬⚬⚬⚬⚬⚬ 18:28-32)

- 1 जेबे प्याग ऊई तेबे सबी बड़े पुरोईत और लोका रे बुजुर्ग यीशुए खे काणे री योजना बणाई।
- 2 तेबे सेयो यीशुए खे बानी की लईगे और पिलातुस हाकिमो रे आथो रे देई ते।

⚬⚬⚬⚬⚬⚬⚬⚬⚬⚬⚬⚬⚬⚬⚬⚬⚬⚬

(⚬⚬⚬⚬⚬⚬⚬⚬⚬⚬⚬⚬⚬⚬⚬⚬⚬ 1:18-19)

3 जेबे यीशुए खे तोखे ते पकड़वाणे वाले यहूदे देखेया कि सेयो दोषी ठराई ते, तेबे से बऊत पछताया और तिना चाँदिए रे तीई सिक्केया लयी की बड़े पुरोईता गे और बुजुर्गो गे फेर ली आया <sup>4</sup> और बोलणे लगेया, “मैं बेकसुर माणूए री मौत करवाणे खे पकड़वाई की पाप करी राखेया।” तेबे तिने बोलेया, “आसा खे क्या ए? तूँ ई जाण।” <sup>5</sup> तेबे यहूदा तिना सिक्केया खे मन्दरो रे सेटी की चली गा और जाई की आपू खे गलफा लगाईता।

6 तेबे बड़े पुरोईते तिना सिक्केया खे लयी की बोलेया, “इना खे पण्डारो रे राखणा ठीक निए, कऊँकि ये खून करणे खे दित्ती री कीमत ए।” <sup>7</sup> तेबे तिने योजना बणाई की तिना सिक्केया ते परदेशिया खे दवाणे रिया तई कुम्हारो रा डोरू मोले लयी ला। <sup>8</sup> तेबेई तो आजो तक तेस डोरूआ खे खूनो रा डोरू बोलेओ। <sup>9</sup> तेबे जो वचन यिर्मयाह भविष्यबक्ते बोलेया था, से पूरा ऊआ, “तिने सेयो तीई सिक्के, मतलब जो मोल था राखेया रा (जो इस्राएलो री ल्वादा बीचा ते कितणेया जणे ठराया था) लयी ला <sup>10</sup> और जिंयाँ माखे प्रभुए आज्ञा दित्ती थी, तियाँ ई से कुम्हारो रे डोरूआ रे मोलो रे देईता।”

⚬⚬⚬⚬⚬⚬⚬⚬⚬⚬⚬⚬⚬⚬⚬⚬⚬⚬

(⚬⚬⚬⚬⚬ 15:2-5; ⚬⚬⚬⚬⚬ 23:3-5; ⚬⚬⚬⚬⚬⚬⚬ 18:33-38)

- 11 जेबे यीशु हाकिमो सामणे खडे थे, तेबे हाकिमे पूछेया, “क्या तूँ यहूदिये रा राजा ए?” यीशुए तेसखे बोलेया, “तूँ आपू ई लगी रा बोलणे।” <sup>12</sup> जेबे बड़े पुरोईत और बुजुर्ग तिना पाँदे दोष लगी रे थे लगाणे, तेबे तिने कोई जवाब नि दित्तेया। <sup>13</sup> तेबे पिलातुसे तिना खे बोलेया, “क्या तूँ सुणने नि लगी रा कि यो तेरे खलाफ कितणिया गवाईया लगी रे देणे।” <sup>14</sup> पर यीशुए तेसरी एक बी गल्ला रा जवाब नि दित्तेया, ये देखी की हाकिमो खे बऊत हैरानी ऊई।

⚬⚬⚬⚬⚬⚬⚬⚬⚬⚬⚬⚬⚬⚬⚬⚬⚬⚬

(⚬⚬⚬⚬⚬ 15:6-15; ⚬⚬⚬⚬⚬ 23:13-25; ⚬⚬⚬⚬⚬⚬⚬ 18:39; ⚬⚬⚬⚬⚬⚬⚬ 19:16)

15 हाकिमो रा ये रवाज था कि तेस त्योआरो खे लोका री तई जेसखे सेयो चाओ थे, एकी बन्दुओ खे छाडी देयो था। <sup>16</sup> तेस बखते तिना गे बरअब्बा नाओ रा एक मानेया रा बन्दुआ था। <sup>17</sup> तेबे, जेबे सेयो कट्टे ऊए, तेबे पिलातुसे तिना खे बोलेया, “तुसे केसखे चाओए कि आऊँ तुसा री तई छाडी देऊँ? बरअब्बे खे या यीशुए खे, जेसखे मसीह बी बोलेओ?” <sup>18</sup> कऊँकि पिलातुस जाणो था कि तिने से जलनी रे पकड़वाया। <sup>19</sup> जेबे से न्याय आसणो री गददिया पाँदे था बैठे रा, तेबे तेसरी लाड़िए तेसखे सन्देशा पेजेया कि, “तूँ तेस तर्मी माणूए रे बारे रे दखलंदाजी नि कर; कऊँकि आज माखे सुपने रे तेसरी बजअ ते बऊत दुःख ऊआ।”

- 20 बड़े पुरोईत और बुजुर्ग लोक ऊकसाए कि तुसे बरअब्बे खे माँगो और यीशुए खे नाश कराओ।
- 21 हाकिमे तिना ते पूछेया, “तुसे इना दूई बीचा ते केसखे चाओए कि आऊँ तुसा खे छाडी देऊँ?”

तिने बोलेया, “बरअब्बे खे।” 22 पिलातुसे तिना ते पूछेया, “तेबे यीशुए खे, जेसखे मसीह बोलोए, तेस साथे क्या करूँ?” सबी तेसखे बोलेया, “एसखे करूसो पाँदे चढ़ाओ।” 23 हाकिमे पूछेया, “कऊँ, तिने क्या बुरा करी राखेया?” पर सेयो ओर बी चींगी-चींगी की बोलणे लगे, “एसखे करूसो पाँदे चढ़ाओ।” 24 जेबे पिलातुसे देखेया कि कोई बात नि लगी री बणने, बल्कि बिगड़ने ई लगी री, तेबे तिने पाणी लई की पीड़ा सामणे आपणे आथ तोए और बोलेया, “आऊँ एस तर्मियों रे खूनो ते निर्दोष ए; तुसेई जाणो।” 25 सबी जवाब दितेया, “एसरे खूनो री अत्या आसा खे और आसा री ल्वादा खे लगो!” 26 तेबे तिने बरअब्बा तिना खे छाडीता और यीशु कोड़े लगवाई की तिना खे देई ते कि करूसो पाँदे चढ़ाई देयो।

⚠️⚠️⚠️ ⚠️⚠️⚠️ ⚠️⚠️⚠️ ⚠️⚠️⚠️ ⚠️⚠️⚠️

(⚠️⚠️⚠️ 15:16-20; ⚠️⚠️⚠️ 19:2,3)

27 तेबे हाकिमो रे सिपाई यीशुए खे किले दे लईगे और सारी पलटण तिना रे चऊँ कनारे कट्टी करी ती, 28 और तिना रे टाले खोली की तिना खे लाल रंगो रा चौगा पणयाई ता 29 और कांडेया रा मुकट बूणी की तिना रे सिरो पाँदे राखेया और तिना रे दाँणे आथो रे एक नगलो रा डण्डा देईता और तिना रे आगे कुटणे टेकी की तिना रा मजाक ऊड़ाणे लगे और बोलणे लगे, “ओ यहूदिया रे राजा नमस्कार!” 30 और तिना पाँदे थूकेया और सेई नगलो रा डण्डा लयी की तिना रे सिरो पाँदे बाणे लगे। 31 जेबे सेयो तिना रा मजाक ऊड़ाई चुके, तेबे तिने तिना पाँदो ते से चौगा उतारेया और तिना खे तिना रेई टाल्ले पणयाईते और करूसो पाँदे चढ़ाणे खे लयी चले।

⚠️⚠️⚠️ ⚠️⚠️⚠️ ⚠️⚠️⚠️ ⚠️⚠️⚠️

(⚠️⚠️⚠️ 15:21-32; ⚠️⚠️⚠️ 23:26-43; ⚠️⚠️⚠️⚠️ 19:17-27)

32 बारे जाई की तिना खे शमौन नाओं रा एक कुरेनी माणू, जो दूजे गांव ते आऊणे लगी रा था, तेसी बखते से तिसिये निकलेया। तेबे सिपाईए से ईयां ई पकड़ी ता कि यीशु रा करूस चकी की लई चल। 33 तेसा जगा रे जो गुलगुता, मतलब-जेथो खे खोपड़िया री जगा बी बोलोए, तेती पऊँछी की 34 तिने यीशुए खे पित्त मलाए रा अँगूरा रा रस पीणे खे दितेया, पर तिने चाखी की पीणा नि चाया। 35 तेबे तिने यीशु करूसो पाँदे चढ़ाई ते और चिट्ठिया पाई की तिना रे टाले बांडी ते 36 और तेती वैठी की तिना रा पईरा देणे लगे। 37 तेबे तिना रा दोष पत्र तिना रे सिरो पाँदे लगाया, “ये यहूदिया रा राजा यीशु ए।”

38 तेबे तिना साथे दो डाकू, एक दाँणे कनारे और दूजा खूँजे कनारे करूसो पाँदे चढ़ाए। 39 आऊणे जाणे वाले सिर इलाई-इलाई की तिना री निन्दा करदे रओ थे 40 और ये बोलदे रओ थे, “ओ मन्दरो खे टालने वाले और तीन दिना रे बनाणे वाले, आपू खे तो बचा! जे तूँ परमेशरो रा पुत्र ए, तो करूसो पाँदो ते उतरी की थाले आओ।” 41 तियाँ ई बड़े पुरोईत, शास्तरी और बुजुर्ग मजाक ऊड़ाई की बोलो थे, 42 इने ओर बचाए, पर आपू खे नि बचाई सकदा। ये तो ‘इस्राएलो रा राजा’ ए जे एबे करूसो ते ऊतरी की आओ, तो आसे विश्वास करिए। 43 इने तो परमेशरो पाँदे विश्वास राखी राखेया, जे से एसखे चाओआ, तो एबे एसखे छुड़ाई लो, कऊँकि इने बोलेया था, कि आऊँ परमेशरो रा पुत्र ए” 44 तियाँ ई सेयो डाकू बी, जो यीशुए साथे करूसो पाँदे चढ़ाई राखे थे, निन्दा करदे रओ थे।

⚠️⚠️⚠️ ⚠️⚠️⚠️ ⚠️⚠️⚠️

(⚠️⚠️⚠️ 15:33-41; ⚠️⚠️⚠️ 23:44-49; ⚠️⚠️⚠️⚠️ 19:28-30)

45 त्याड़िया ते लयी की तीजे पईरो तक सारे देशो रे न्हेरा ई रया। 46 तीजे पईरो रे नेडे यीशुए जोरे की आक्का पाई की बोलेया, “एली, एली, लमा शबक्तनी?” मतलब “ओ मेरे परमेश, ओ मेरे परमेश! तैं आऊँ कऊँ छाडीता?” 47 जो तेती थे खड़े रे, तिना बीचा ते बऊत जणेया ये सुणी की बोलेया, “ये एलिय्याह खे लगी रा आक्का पाणे।” 48 तिना बीचा ते एक फटाफट दौड़ेया और स्पंज लयी की सिरके बीचे डबोया और नगलो रे डण्डे रे राखी की तिना खे चुसाया। 49 तेबे ओरी बोलेया, “देखी लऊँए कि एलिय्याह एसखे बचाणे आओआ कि नई।” 50 तेबे यीशु फेर जोरे की चींगे और

प्राण छ्हाडी ते।<sup>51</sup> तेवे मन्दरो रा पड़दा पाँदो ते लई की थालो तक फटीगा और तिजी रे दो टुकड़े ऊईगे। ये ए दखाओआ कि एवे कोई बी माणू परमेशरो री हजुरिया रे जाई सकोआ। तरती ईलणे लगी और जानी तिड़की गिया<sup>52</sup> और कबरा खुली गिया और मरे रे पवित्तर लोका रिया बऊत लोथा उठी गिया।<sup>53</sup> और तिना रे जिऊँदे ऊणे ते बाद सेयो कबरा ते निकली की पवित्तर नगरो खे गए और बऊत लोका खे दिखे।<sup>54</sup> तेवे सूबेदार और जो तेस साथे पईरा देणे लगी रे थे, ईल्लण और जो कुछ तेती ऊआ, देखी की बऊत डरी गे और बोलणे लगे, “सच्ची, ये तो परमेशरो रा ई पुत्र था।”<sup>55</sup> तेती बऊत जवाणसा, जो गलील प्रदेशो ते यीशुए साथे तिना री सेवा करदिया ऊईया आईया थिया, ये दूरो ते लगी री थिया देखणे।<sup>56</sup> तिना बीच मरियम मगदलिनी और याकूब और योसेसो री आम्मा मरियम और जब्दिए रे पाऊए री आम्मा थी।

~~~~~

(~~~~~ 15:42-47; ~~~~~ 23:50-56; ~~~~~ 19:38-42)

⁵⁷ जेवे साँज ऊई तेवे यूसुफ नाओं रा अरिमतियाह रा एक अमीर माणू, जो आपू बी यीशुए रा चेला था, आया।⁵⁸ तिने पिलातुसो गे जाई की यीशुए री लोथ मांगी। तेवे पिलातुसे देणे री आज्ञा देईती।⁵⁹ यूसुफे लोथ लई और सफेद चादरी रे लपेटी ती⁶⁰ और से आपणी नईया कबरा रे राखी, जो तिने चट्टानी रे थी खणवाई री और कबरा रे द्वारो पाँदे एक बड़ा पात्थर खसकेयी की चली गा।⁶¹ मरियम मगदलिनी और दूजी मरियम तेती कबरा सामणे बैठी रिया थिया।

~~~~~

<sup>62</sup> दूजे दिने, जो आरामो रा दिन था, बड़े पुरोईत और फरीसिये कट्टे ऊई की पिलातुसो खे बोलेया,<sup>63</sup> “ओ महाराज! आसा खे याद ए कि तिने भरमाणे वाले, जेवे से जिऊँदा था तिने बोलेया था कि, मां मरने ते बाद तीजे दिने जिऊँदा ऊई जाणा।<sup>64</sup> तो आज्ञा दे कि तीन दिना तक कबरा री रखवाली ओ, एड़ा नि ओ कि तेसरे चले आयी की तेसखे चोरी की लयी जाओ और लोका खे बोलो कि, से मरे रे बीचा ते जिऊँदा ऊईगा; तेवे पिछला तोखा, पईले ते बी बुरा ऊणा।”<sup>65</sup> पिलातुसे तिना खे बोलेया, “तुसा गे पईरेदार आए। तिना खे लयी जाओ और आपणी समजा रे मुताबिक रखवाली करो।”<sup>66</sup> तेवे सेयो पईरेदारा खे साथे लयी गे और पात्थरो पाँदे मोहर लगाई की कबरा री रखवाली करने लगे।

## 28

~~~~~

(~~~~~ 16:1-10; ~~~~~ 24:1-12; ~~~~~ 20:1-10)

¹ आरामो रे दिनो ते बाद, अप्तरे रे पईले दिने, तड़के-तड़के मरियम मगदलिनी और दूजी मरियम, कबर देखणे आईया।² तेवे देखो, बऊत बड़ा ईल्लण ऊआ, कऊँकि प्रभुए रा एक स्वर्गदूत स्वर्गो ते उतरेया और तिने नेड़े आयी की कबरा रा पात्थर कनारे खसकेयी ता और तेते पाँदे बैठी गा।³ तेसरा रूप बिजलिया जेड़ा और टाले पाले जेड़े चमकीले थे।⁴ तेस देखी की पईरेदार थरथराईगे और बेओश ऊईगे।⁵ स्वर्गदूते तिना जवाणसा खे बोलेया, “डरो नि; कऊँकि माखे पता ए कि तुसे यीशुए खे, जो कूरुसो पाँदे चढ़ाया था, तेसखे टोलने लगी रिया।⁶ से एती निए, पर आपणे वचनो रे मुताबिक जिऊँदा ऊईगा रा। आओ, एसा जगा खे देखो, जेती प्रभु थे राखे रे⁷ और फटाफट जाई की तिना रे चलेया खे बोलो कि सेयो मरे रे बीचा ते जिऊँदे ऊईगे रे और सेयो तुसा ते पईले गलील प्रदेशो रे पऊँछी जाणे, तेती तुसा खे तिना रा दर्शन ऊणा, मैं तुसा खे बोली ता।”

⁸ सेयो जवाणसा डर और खुशिया साथे कबरा ते फटाफट वापस ऊई की चलेया खे ये समाचार देणे दौड़ी गिया।⁹ तेवे यीशु तिना खे मिले और बोलेया, “नमस्ते!” सेयो नेड़े आईया और तिना रे पैर पकड़ी की तिना गे माथा टेकेया।¹⁰ तेवे प्रभु यीशुए तिना खे बोलेया, “डरो नि; मेरे चलेया खे जाई की बोलो कि गलीलो खे चली जाओ। तेती तिना आऊँ देखणा।”

~~~~~

11 जेबे सेयो जवाणसा चलेया खे ये समाचार देणे जाणे ई लगी रिया थिया, तदुओ तक पईरदारा बीचा ते कई जणेया नगरो रे आयी की सारा आल बड़े पुरोईता गे सुणाया। 12 तेबे बड़े पुरोईते और बुजुर्गा साथे कट्टे ऊई की सम्मति किती और पईरदारा खे बऊत चाँदी देई की बोलेया, 13 “तुसे सबी लोका गे ये बोलणा कि जेबे राती आसे सऊणे लगी रे थे, तेबे तेसरे चले आए और तेसखे चोरी की लईगे 14 और जे ये बात हाकिमो तक पऊँछी गी तो आसे तेसखे समजयाई लऊँगे और तुसा खे मुश्किला ते बचाई लऊँगे।” 15 तेबे तिने पैसे लए और जेड़ा बोलेया था, तेड़ा ई कितेया। ये गल्ल आजो तक बी यहूदिया बीचे प्रचलित ए।

☞☞☞☞ ☞☞ ☞☞☞☞ ☞☞ ☞☞☞☞ ☞☞☞☞

(☞☞☞☞ 16:14-18; ☞☞☞☞ 24:36-49; ☞☞☞☞☞☞☞ 20:19-23; ☞☞☞☞☞☞☞☞ 1:6-8)

16 तेबे ग्यारा चले गलील प्रदेशो रे तेस पाहूडो पदि गए, जो यीशुए तिना खे बताई राखेया था। 17 तेबे तिने यीशुए रे दर्शन किते और तिना गे माथा टेकेया, पर तिना बीचा ते केसी-केसी खे शक ऊआ कि से जिऊँदा ऊईगा रा 18 यीशुए तिना रे नेड़े आयी की बोलेया, “स्वर्ग और तरतिया रा सारा अक्क मांगे देई राखेया। 19 तो, तुसे जाओ और सब जातिया रे लोका खे चेला बणाओ, और तिना खे पिता, पुत्र और पवित्र आत्मा रे नाओं ते बपतिस्मा देओ 20 और तिना खे सब गल्ला, जो मैं तुसा खे आज्ञा देई राखिया, मानणा सिखाओ; और देखो, आऊँ दुनिया रे आखरी तक सदा तुसा साथे ए।”



## मरकुस मरकुसो रा लिखेया रा सुसमाचार

??????

मरकुस रचित सुसमाचार इना गल्ला ते शुरू ओआ, “परमेशरो रे पुत्र यीशु मसीह रा सुसमाचार।” इदे यीशुए खे एक पूरे अक्को साथे और काम करने वाले मांणूए रे रूपो रे दखाई राखेया। तेसरा अक्क तेसरी शिक्षा रे, दुष्टात्मा पाँदे तेसरे अधिकारा पाँदे और लोका रे पाप माफ करने रे प्रगट ऊई रा। ईदे यीशु आपू खे मांणूए रा पुत्र बोलीआ। से इजी री खातर आया ताकि लोका खे पापो ते आजाद करने रिया तँई आपणे प्राण देओ।

मरकुस यीशुए रे वचन और शिक्षा पाँदे नि, बल्कि तेसरे कामा पाँदे जोर देओआ। इजी री तँई से तेसरी काणियां खे सीदा, साअन और असरदार रूपो रे दखाओआ। यूहन्ना बपतिस्मा देणे वाला, यीशुए रा बपतिस्मा और तेसरी शिक्षा ते मिलदा-जुलदा एक संक्षिप्त भूमिका ते बाद, लेखक सीदे ई यीशुए री चंगाई और शिक्षा सेवा रा काम करने रा वर्णन करने लगीआ। जियाँ-जियाँ बखत बितदा गया तियाँ-तियाँ यीशुए खे मानणे वाले तेसखे ओर अच्छी तरअ ते समजदे गये, पर यीशुए रे बिरोदी ओर बी जादा बिरोद करदे गये। आखरी रे पाठ यीशुए रे तरतिया पाँदली जिन्दगिया रे आखरी अफ्रते री घटना रे बारे दखाओए, जिना रे खास ए, तेसरा कूसो पाँदे चढ़ाया जाणा और तेसरा दुबारा जिऊंदा ऊणा।

रूप-रेखा

सुसमाचारो री शुरूआत 1:1-13

गलीलो रे यीशुए री जनसेवा 1:14-9:50

गलीलो ते यरूशलेमो तक यात्रा 10:1-52

यरूशलेमो रे आखरी अफ्रता 11:1-15:47

यीशुए रा दुबारा जिऊंदा ऊणा 16:1-8

जिऊंदा ऊए रे प्रभुए रा दिशणा और स्वर्गो खे जाणा 16:9-20

???????? ???? ???? ???? ???? ??

(???? 3:1-12; ???? 3:1-18; ????? 1:19-28)

1 यीशु मसीह जो परमेशरो रा पुत्र ए, तेसरे बारे रे सुसमाचारो री शुरूआत।<sup>2</sup> जेड़ा यशायाह भविष्यबक्ते री कताबा रे लिखी राखेया, परमेशरे आपणे पुत्रो खे बोलेया।

“देख, आऊँ आपणे दूतो खे तांते पईले पेजुआ,

तेस लोका रे मन ताखे त्यार करने।”

3 “सुणसाण जगा रे एक आक्का पाणे वाले री आवाज सुणने लगी री, ‘प्रभुए री खातर लोका रे मनो खे त्यार करो,

और तिना रे मनो खे सीदा करो।’”

4 यूहन्ना आया, जो सुणसाण जगा रे बपतिस्मा देओ था और पापो री माफिया खे मन फेरने रे बपतिस्मे रा प्रचार करो था।<sup>5</sup> तेबे बऊत सारे यहूदिया प्रदेशो रे लोक और यरूशलेम नगरो रे बी बऊत सारे रणे वाले लोक निकली की तेसगे गये और आपणे पापो खे मानी की यरदन नदिया रे तेसते बपतिस्मा लया।<sup>6</sup> यूहन्ना ऊँटो रे बालो रे टाले पईनो था और आपणे लको रे चामड़े रा पट्टू बानी राखो था और टिड्डिया और बणो रा सईत खाया करो था।<sup>7</sup> से ये प्रचार करो था, “जो मांते बाद आऊणे वाला ए, से मांते बी जादा महान् ए, आऊँ तो एते जोगा पनिए कि चुकी की तेसरे जोड़े रे फिथे खोलूँ।”<sup>8</sup> में तो तुसा खे पाणिए साथे बपतिस्मा दित्तेया, पर तेस तुसा खे खवित्तर आत्मा साथे बपतिस्मा देणा।”

३:१३; ४:११; ३:२१-२२; ४:१-१३)

(३:१३; ४:११; ३:२१-२२; ४:१-१३)

९ तेस बखते यीशुए, गलील प्रदेशो रे नासरत नगरो ते आई की यरदन नदिया रे यूहन्ने ते बपतिस्मा लया। १० जेबे यीशु पाणिण ए बीचा ते निकली की पाँदे आए, तेबे तिने तेबु सर्ग खुलदा ऊआ और जियाँ कबूतर उड़दा ऊआ थाले आओआ तियाँ ई तिने पवितर आत्मा आपू पाँदे आऊँदे ऊए देखेया। ११ तेबे स्वर्गो ते ये आवाज आई, “तूँ मेरा प्यारा पुत्र ए और आऊँ तांते खुश ए।”

१२ तेबे पवितर आत्मा तेबुई यीशुए खे सुणसाण जगा रे लईगा। १३ सुणसाण जगा रे चाली दिन तक शैतान तिना री परीक्षा करदा रया और सेयो जंगली जानवरो साथे एए और स्वर्गदूत तिना री सेवा करदे रये।

४:१२-१७; ४:१४,१५)

(४:१२-१७; ४:१४,१५)

१४ यूहन्ने रे पकड़वाए जाणे ते बाद, यीशुए गलील प्रदेशो रे आई की परमेशरो रे राज्य रा सुसमाचार प्रचार कितेया। १५ तिने बोलेया, “बखत पूरा ऊईगा रा और परमेशरो रा राज्य नेडे आईगा रा, मन फेरो और सुसमाचारो पाँदे विश्वास करो।”

४:१८-२२; ५:१-११)

(४:१८-२२; ५:१-११)

१६ गलीलो रे समुद्रो रे कनारे-कनारे जाँदे ऊए यीशुए शमौन और तेसरा पाई अन्दरयास समुद्रो रे जाल पाँदे ऊए देखेया, कऊँकि सेयो मच्छलीया पकड़ने वाले थे। १७ तेबे यीशुए तिना खे बोलेया, “मां पीछे आओ और जियाँ तुसे मच्छली पकड़ना जाणोए तियाँ ई मां तुसा खे परमेशरो गे मांणू पकड़ी की ल्याऊणे सिखाणे।” १८ सेयो तेबुई जाल छाडी की यीशुए पीछे चली पड़े।

१९ तेबे थोड़ी जी आगे जाई की यीशुए, जब्दिए रे पाऊ याकूब और तेसरा पाई यूहन्ना किस्तिया पाँदे जाल ठीक करदे ऊए देखे। २० तिने तेबुई सेयो बुलाए और सेयो आपणे पिते जब्दियो खे मजदूरा साथे, किस्तिया पाँदे छाडी की यीशुए रे पीछे चली पड़े।

४:३१-३७)

(४:३१-३७)

२१ तेबे यीशु और तिना रे चले कफरनहूम नगरो रे आए और यीशु आरामो रे दिने प्रार्थना रे कअरो रे गए और उपदेश देणे लगे। २२ लोक तिना रे उपदेशो ते हैरान ऊईगे, कऊँकि सेयो तिना खे शास्त्रिया जेडे नि, पर अधिकारो साथे उपदेश देओ थे। २३ तेबे तेस बखते तिना रे प्रार्थना रे कअरो रे एक एड़ा मांणू था, जेसरे दुष्टात्मा थी। २४ तिने चींगी की बोलेया, “ओ यीशु नासरी! आसा खे तांते क्या काम ए? क्या तूँ आसा खे नाश करने आई रा? आऊँ ताखे जाणूँआ कि तूँ कृण ए? तूँ परमेशरो रा पवितर पुत्र ए।” २५ यीशु तेसखे बक्के और बोलेया, “चुप रओ और एसते निकली जा।” २६ तेबे दुष्टात्मा तेसखे मकरेडी की ओर जोरे की चींगदी ऊई, तेसते निकली गी। २७ ये देखी की सब लोक हैरान ऊईगे और आपू बीचे बईस करने लगे, “ये केडी गल्ल ए? ये तो कोई नया ई उपदेश ए। ये तो अधिकारो साथे दुष्टात्मा खे बी आज्ञा देओआ और सेयो एसरी आज्ञा खे मानोईया।” २८ तेबे यीशुए रा नाओ गलीलो रे सारे प्रदेशो रे फैली गा।

८:१४-१७; ४:३८-४१)

(८:१४-१७; ४:३८-४१)

२९ तेबे यीशु तेबुई प्रार्थना रे कअरो ते निकली की याकूब और यूहन्ने साथे, शमौन और अन्दरयासो रे कअरे आए। ३० शमौनो री सासुआ खे बऊत बुखार था से माँजे पाँदे सुती री थी और तेबे तिने फटाफट तेसा रे बारे रे यीशुए खे बोलेया। ३१ तेबे यीशुए नेडे जाई की तेसा रा आथ पकड़ी की से ऊबे ठवाली और तेसा रा बुखार उतरी गा और तेबे से तिना री सेवा करने लगी। ३२ साँजके बखते जेबे सूरज डूबी गा तेबे लोक बऊत सारे बमारा खे और जिना रे दुष्टात्मा थिया, तिना खे लई की यीशुए गे आए। ३३ तेबे नगरो रे बऊत सारे लोक द्वारा पाँदे कट्टा ऊईगे। ३४ तेबे

यीशुए, जो कईया प्रकारा रिया बमारिया ते दुःखी थे, सब ठीक किते, कई दुष्टात्मा निकयालिया और दुष्टात्मा खे बोलणे नि देओ थे, कऊँकि सेयो तिना खे जाणो धिया कि सेयो परमेशरो रे पुत्र ए।

॥॥॥॥ ॥॥ ॥॥॥॥ ॥॥ ॥॥॥॥॥॥॥ ॥॥॥॥  
(॥॥॥॥ 4:42-44)

35 तेबे यीशु तड़के ई उठी गे और सुनसाण जगा खे चली गे और तेती प्रार्थना करने लगे। 36 तेबे शमौन और तेसरे साथी तिना खे टोलदे ऊए गए। 37 जेबे सेयो मिली गे, तेबे तिना खे बोलेया, “बऊत सारे लोक तुसा खे टोलने लगी रे।” 38 तेबे यीशुए तिना खे बोलेया, “चलो, आसे केथी नेडे-तेडे बस्तिया रे चलूँए, ताकि आऊँ तेती बी प्रचार करी सकूँ, कऊँकि आऊँ आई इजी खे रया।” 39 तेबे सेयो गलील प्रदेशो रे बऊत सारी जगा रे और तिना रे प्रार्थना रे कअरो रे जाई-जाई की प्रचार करदे और दुष्टात्मा खे निकयालदे रओ थे।

॥॥॥॥ ॥॥ ॥॥॥॥ ॥॥ ॥॥॥ ॥॥॥॥  
(॥॥॥॥ 8:1-4; ॥॥॥॥ 5:12-16)

40 तेबे एक कोदिए यीशुए गे आई की बिनती किती और तिना रे सामणे कूटणे टेकी की तिना खे बोलेया, “जे तुसे चाओ, तो माखे ठीक करी सकोए।” 41 तेबे यीशुए तेस पाँदे तरस खाई की आपणा आथ आगे कितेया और तेसखे छुँई की बोलेया, “आऊँ चाऊँआ कि तूँ ठीक ऊई जाए।” 42 तेबे तेबुई तेसरा कोद निकली गा और से ठीक ऊईगा। 43 तेबे यीशुए सावधान करी की से तेथा ते फटाफट पेजी ता। 44 और तेसखे बोलेया, “देख, केसी गे नि बताणा, पर जाई की आपू खे पुरोईतो गे दखा और आपणे ठीक ऊणे रे बारे रे जो कुछ मूसे नबीए चढावा टराई राखेया, तेस चढा, ताकि लोका बीचे तेरी गवाई ओ कि तूँ ठीक ऊईगा।” 45 और से बारे जाई की एसा गल्ला रा बऊत प्रचार करने लगेया और एसा गल्ला खे एथो तक फैलाणे लगेया कि यीशु फेर नगरो रे खुल्लमखुल्ले नि जाई सके, पर सेयो सुणसाण जगा रे रए, पर तेती बी लोक चऊँ कनारे ते तिना गे आऊँदे रये।

## 2

॥॥॥॥ ॥॥ ॥॥॥॥ ॥॥ ॥॥॥ ॥॥॥॥  
(॥॥॥॥ 9:1-8; ॥॥॥॥ 5:17-26)

1 कुछ दिना ते बाद यीशु फेर कफरनहूमो नगरो खे आए और सुणने बीचे आया कि सेयो कअरे ए। 2 तेबे इतणे लोक कटटे ऊईगे कि द्वारो पाँदे बी खडने खे जगा नि रई और यीशु तिना खे वचन सुनाणे लगी रे थे। 3 तेबे लोक एक अदरंगो रे रोगिए खे चार माणूआ ते चकाई की तिना गे ली आए। 4 पर जेबे सेयो पीड़ा रिया बजअ ते यीशुए गे नि पऊँछी सके, तेबे तिने से छत जेते निटे यीशु थे, खोली ता और जेबे सेयो तेस पटी चुके, तेबे से मांजा जेते पाँदे अदरंगो रा रोगी पडी रा था, यीशुए रे सामणे त्वारेया। 5 यीशुए तिना रा विश्वास देखी की तेस अदरंगो रे रोगिए खे बोलेया, “ओ पाऊआ, तेरे पाप माफ ऊईगे।”

6 तेबे कुछ शास्त्री जो तेती बैठी रे थे, आपणे-आपणे मनो रे सोचणे लगे, 7 “ये माणू कऊँ एडा बोलोआ? ये तो परमेशरो री निन्दा करने लगी रा। परमेशरो खे छाडी की ओर कृण पाप माफ करी सकोआ?” 8 यीशुए तेबुई आपणी आत्मा रे जाणी ला कि सेयो आपणे मनो रे एडा लगी रे सोचणे तेबे तिने तिना खे बोलेया, “तुसे आपणे-आपणे मनो रे एडा बिचार कऊँ करने लगी रे? 9 ये बोलणा बऊत आसान ए कि तेरे पाप माफ ऊईगे पर ये बोलणा बऊत कठण ए कि आपणा मांजा चकी की चल फिर। 10 इजी री खातर तुसे जाणी लओ कि मां माणू रे पुत्रो खे तरतिया पाँदे पाप माफ करने रा बी अक्क ए।” यीशुए तेस अदरंगो रे रोगिए खे बोलेया, 11 “आऊँ ताखे बोलूँआ कि उठ! आपणा मांजा चकी की आपणे कअरो खे चली जा” 12 से उठेया और तेबु आपणा मांजा चकी की सबी रे सामणे ते निकली की चली गा। तेबे सब हैरान ऊईगे और परमेशरो री तारीफ करी की बोलणे लगे, “आसे एडा कदी पनि देखेया।”

॥॥॥॥ ॥॥ ॥॥॥॥॥

(॥॥॥॥ 9:9-13; ॥॥॥॥ 5:27-32)

13 यीशु तथा ते निकली कि समुद्रो रे कनारे चली गे और सारी पीड़ तिना गे आईगी, तेबे सेयो तिना खे उपदेश देणे लगे। 14 तेबे जांदि ऊए तिनै हलफइसो रा पाऊ लेवी चुंगी लणे री चौकिया पाँदि बैठे रा देखेया और तेसखे बोलेया, “मां पीछे आओ” और से उठी की तिना पीछे चली पड़ेया।

15 जेबे यीशु लेवीए रे कअरे रोटी खाणे बैठेया, तेबे बऊत चुंगी लणे वाले और पापी, यीशु और तेसरे चलेया साथे रोटी खाणे बैठे, और सेयो बऊत थे जो तिना पीछे आइंगे थे। 16 शास्त्रए और फरीसिये ये देखी खे की ये तो पापिया और चुंगी लणे वालेया साथे रोटी खाणे लगी रा, तेसरे चलेया खे बोलेया, “ये तो चुंगी लणे वाले और पापिया साथे कऊँ खाओ पीओआ?” 17 यीशुए ये सुणी की तिना खे बोलेया, “जो पले चंगे ए, तिना खे वैदो री जरूरत नि ऊँदी, पर बमारा खे ओई। आऊँ एड़ेया लोका खे बुलाणे नि आई रा जो सोचोए कि आऊँ तर्मी ए, पर आऊँ पापिया खे बुलाणे और तिना रा उद्धार करने आई रा।”

॥॥॥॥ ॥॥॥॥ ॥॥॥॥

(॥॥॥॥ 9:14-17; ॥॥॥॥ 5:33-39)

18 बपतिस्मा देणे वाले यूहन्ने रे चले और फरीसी बअरत करोए। तेबे कुछ लोक यीशुए गे आये और पूछेया, “यूहन्ने रे चले और फरीसी बअरत राखोए, पर तेरे चले कऊँ बअरत नि करदे?”

19 यीशुए तिना खे बोलेया, “जदुओ तक लाडा बरातिया साथे रओआ, क्या सेयो बअरत करी सकोए? ना, जदुओ तक लाडा तिना साथे ए, तदुओ तक सेयो बअरत नि करी सकदे। 20 पर, सेयो दिन आऊणे, जेबे लाडा बरातिया ते लग करेया जाणा, तेस बखते तिना बअरत करना।

21 “नये कपड़े री टाली, पुराणे टालेया रे कोई नि लगांदा, कऊँकि टाली पुराणे टालेया खे ओर बी कटटा करी देओ ई, मतलब-नया टाला पुराणे साथे ओर बी जादा फटी जाओआ। 22 नया अँगूरा रा रस पुराणे खल्लडुआ रे कोई नि परदा, नई तो अँगूरा रा रस फैली जाणा और तेस खल्लडु फाड़ी देणे और अँगूरा रा रस और खल्लडु दोनो ई खराब ऊई जाणे, पर नया अँगूरा रा रस, नये खल्लडुआ रे परेया जाओआ।”

॥॥॥॥ ॥॥ ॥॥॥॥ ॥॥ ॥॥॥॥

(॥॥॥॥ 12:1-8; ॥॥॥॥ 6:1-5)

23 एडा ऊआ कि यीशु और तिना रे चले आरामो रे दिने डोरूआ रिये जाणे लगी रे थे और तिना रे चले जांदि ऊए सिल्ले तोड़ने लगे। 24 तेबे फरीसिये ये देखी की यीशुए खे बोलेया, “तेरे चले आरामो रे दिने एडा काम कऊँ लगी रे करने? क्या इना खे एडा करना बिधानो रे मुताबिक खरा ए?” 25 यीशुए तिना खे बोलेया, “क्या तुसे पढ़ी नि राखेया कि जेबे दाऊदो खे जरूरत पड़ी और जेबे तेसखे और तेसरे साथिया खे पूख लगी, तेबे तिनै क्या कित्तेया था? 26 तिनै कियौं अबियातार परदान पुरोईतो रे बखते परमेशरो रे भवनो रे जाई की पेंटा रिया रोटीया खाईया, बिधानो रे मुताबिक पुरोईतो खे छडाडी की ओर केली खे बी खाणा ठीक नि ए और आपणे साथिया खे बी दित्तिया।” 27 यीशुए तिना खे बोलेया, “आरामो रा दिन माणूआ खे बणाई राखेया, माणू आरामो खे नि ए बणाए रे। 28 तेबेई तो आऊँ माणू रा पुत्र आरामो रे दिनो रा बी परभु ए।”

### 3

॥॥॥॥ ॥॥ ॥॥ ॥॥॥॥ ॥॥॥॥॥ ॥॥ ॥॥ ॥॥॥॥

(॥॥॥॥ 12:9-14; ॥॥॥॥ 6:6-11)

1 यीशु प्रार्थना रे कअरो रे फेर गए, तेबे तेती एक माणू था, जेसरा आथ सूकेया रा था। 2 तेबे कुछ फरीसी यीशुए पाँदि दोष लगाणे खे और तिना खे काणे रे चकुरो रे थे कि देखूँ कि आरामो रे दिने तेसखे ये ठीक करोआ की नयी। 3 तिनै सूके रे आथो वाले माणूए खे बोलेया, “बीचे जे खडा ऊई जा।” 4 तेबे यीशुए फरीसिया खे बोलेया, “आरामो रे दिने बिधानो रे मुताबिक खरा करना ठीक ए या बुरा करना, प्राण बचाणा या मारना।” पर सेयो चुप ए। 5 तेबे यीशुए तिना रे मनो रे जिद्दी सबाओ

ते उदास ऊई की तिना खे रोषो रे चऊँ कनारो खे देखेया और तेस मांणूए खे बोलेया, “आपणा आथ आगे कर” तिने आगे कित्तेया और तेसरा आथ ठीक ऊईगा। <sup>6</sup> तेबे फरीसी बारे गए और हेरोदेसो खे समर्थन देणे वाले यहूदिया साथे मिली की तिना रे खलाफ योजना बणाई कि तिना खे कियाँ नाश करिए?

???? (????) ?? ????????? ???? ???? ?

<sup>7</sup> यीशु आपणे चलेया साथे समुद्रो रे कनारे चली गे और गलील प्रदेश ते एक बड़ी पीड़ तिना पीछे आईगी। <sup>8</sup> तेबे तिना रे अचम्बे रे काम सुणी की यरूशलेम नगरो, यहूदिया प्रदेश, इदुमिया प्रदेश और यरदन नदिया रे पारो ते सूर और सैदा नगरो रे नेडे ते एक बड़ी पीड़ तिना गे आई। <sup>9</sup> तेबे यीशुए आपणे चलेया खे बोलेया, “पीड़ मुखती ए, एडा नि ओ केथी आऊँ दवी जाऊँ, तो तुसे माखे एक किस्ती त्यार करी दो।” <sup>10</sup> कऊँकि तिने बऊत ठीक कित्ते थे, तेबे जितणे लोका खे बमारिया थिया, सेयो तिना खे छूणे री खातर तिना पँदि टूटी पड़ी थे। <sup>11</sup> दुष्टात्मा बी, जेबे यीशुए खे देखो थिया, तो सेयो तिना रे सामणे रूड़ी जाओ थिया; और चींगी की बोलो थिया, “तूँ परमेशरो रा पुत्र ए।” <sup>12</sup> यीशुए दुष्टात्मा बऊत सावधान कित्तिया कि केसी गे मेरे बारे रे नि बताणा, “आऊँ परमेशरो रा पुत्र ए।”

???? ????????? ?? ??????

(???? 10:1-4; ???? 6:12-16)

<sup>13</sup> इजी ते बाद यीशु पाहूडो पँदि चली गे, और जिना खे से चाओ थे, सेयो आपू गे बुलाए और सेयो तिना गे चली गे। <sup>14</sup> तेबे यीशुए बारा मर्दा खे पुरेरिता री पदवी दिती ताकि सेयो तिना साथे-साथे रओ और तिना खे प्रचार करने खे पेजो। <sup>15</sup> और तिना खे दुष्टात्मा खे निकयालने रा अक्क ओ। <sup>16</sup> और सेयो यो ए, शमौन जेसरा नाओ यीशुए पतरस राखेया। <sup>17</sup> जब्दिए रे पाऊ याकूब और तेसरा पाई यहून्ना, जिना रा नाओ तिने वूअनरगिस, मतलब, गर्जणो रे पाऊ राखेया। <sup>18</sup> और अन्दिरयास, फिलिप्पुस, बरतुल्मै, मत्ती, थोमा, हलफईसो रा पाऊ याकूब, तदै और दूजा शमौन कनानी, देशभक्त तेते समूह रा सदस्य था जो रोमी सरकारा रे खलाफ थे। <sup>19</sup> और यहूदा इस्करियोती, जिने यीशु बादो ते तोखे ते पकड़वाए बी थे।

???? ?? ????????? (???????? ???? ???? ?)

(???? 12:22-32; ???? 11:14-23; ???? 12:10)

<sup>20</sup> तेबे यीशु और तिना रे चले कअरे आए और तिना गे फेर इतणी पीड़ कट्टी ऊईगी कि सेयो रोटी पनि खाई सके। <sup>21</sup> जेबे तिना रे टब्बरो वालेया ये सुणेया, तो सेयो तिना खे पकड़ने खे निकले, कऊँकि तिना रा मानणा था कि एसरा दमाक टकाणे निए।

<sup>22</sup> जो शास्त्री यरूशलेम नगरो ते आए थे सेयो बोलो थे, “एसरे शैतान ए,” और “ये दुष्टात्मा रे सरदारो री मतादा साथे दुष्टात्मा खे निकयालोआ।”

<sup>23</sup> तेबे यीशु तिना खे नेडे बुलाई की तिना ते उदारणो रे बोलणे लगे, “शैतान आपणे आपू खे और आपणी दुष्टात्मा खे कियाँ निकयाली सकोआ? <sup>24</sup> और जे केसी राज्य रे फूट पड़ी जाओ तो, से राज्य कियाँ खड़ा रई सकोआ? <sup>25</sup> और केसी रे कअरे फूट पड़ी जाओ तो, से कअर कियाँ बणेया रा रई सकोआ? <sup>26</sup> और जे शैतान आपणेया रा रई वैरी बणी जाओगा, तो, से कियाँ बणेया रा रई सकोआ? तेसरा तो अन्त ई ऊई जाणा।

<sup>27</sup> “पर कोई मांणू केसी तागतबरो रे कअरे कूसी की, तेसरा माल कियाँ लूटी सकोआ? जदुओ तक से तेसखे बानी नि लओगा और तिजी ते बाद ई से तेसरा माल लूटी सकोआ।

<sup>28</sup> “आऊँ तुसा खे सच लगी रा बोलणे कि मांणूए रे सारे पाप और निन्दा जो से करोआ, माफ ऊई जाणे। <sup>29</sup> पर जो पवित्तर आत्मा री निन्दा करोआ, तेसखे कदी बी माफी नि मिलणी, और से अनन्त पापो रा अपराधी ऊई जाओ आ।” <sup>30</sup> यीशुए ये तेबे बोलेया कऊँकि सेयो ईयाँ बोलो थे, “एसरे दुष्टात्मा ए।”

ⓂⓂⓂⓂⓂ ⓂⓂ ⓂⓂⓂⓂⓂ ⓂⓂ ⓂⓂⓂ (ⓂⓂⓂⓂ)  
(ⓂⓂⓂⓂⓂ 12:46-50; ⓂⓂⓂⓂⓂ 8:19-21)

31 तेबे यीशुए री आम्मा और तेसरे पाई आए और तेबे तिने बारे खड़ी की तिना खे सन्देशा पेजेया ।  
32 यीशुए रे नेडे पीड धी बैठी री, तेबे तिने यीशुए खे बोलेया, “देख, तुसा री आम्मा और पाई और बईण तुसा ते मिलणा चाओए ।” 33 यीशुए तिना खे बोलेया, “मेरी आम्मा और पाई कूणे?” 34 तेबे तिने, जो तिना रे नेडे थे बैठे रे, तिना खे देखेया और बोलेया, “देखो, मेरी आम्मा और पाई यो ईए ।”  
35 कऊँकि जो परमेशरो री इच्छा पाँदे चलोआ, सेई मेरे पाई, बईण और आम्मा ए ।”

## 4

ⓂⓂⓂ ⓂⓂⓂⓂ ⓂⓂⓂⓂⓂ ⓂⓂ ⓂⓂⓂⓂⓂⓂ  
(ⓂⓂⓂⓂⓂ 13:1-9; ⓂⓂⓂⓂⓂ 8:1-4)

1 यीशु फेर समुद्रो रे कनारे उपदेश देणे लगे, तेबे लोका री इतणी बड़ी पीड तेती कट्टी ऊईगी कि सेयो समुद्रो रे एक किस्तिया रे बैठीगे और लोक कनारे पाँदे खडे रे रये । 2 तेबे से उदारणो रे तिना खे बऊत गल्ला सिखाणे लगे और उपदेशो रे तिना खे बोलणे लगेया, 3 “सुणो! देखो, एक बेजा बाणे वाला, बेजा बाणे निकलेया । 4 तेबे कुछ बिऊ बांदे बखते बाटा रे छूटी गे और सेयो पँछिए चुगी ले । 5 कुछ बिऊ सापड़ी पाँदे छूटी गे और तेती जादा माट्टी ना ऊणे री बजअ ते सेयो चट-चट जम्मी गे 6 और जेबे सूरज निकलेया तो तूपा रे फूकी गे और जड़ ना पकडने री बजअ ते सूकी गे । 7 तेबे कुछ बिऊ जाड़ो रे छूटी गे और जाड़ बड़ी गा और सेयो दबी गे और तिना रे कोई फल नि लगेया । 8 पर कुछ बिऊ अच्छी जमीना पाँदे छूटे और सेयो जम्मी गे और बड़े ऊई की फल ल्याए, कोई तीइ गुणा, कोई साठ गुणा और कोई सौ गुणा ।” 9 तेबे तिने बोलेया, “जो समजी सकोआ से तिजी खे त्यानो साथे सुणो और मानी बी लओ ।”

ⓂⓂⓂⓂⓂ ⓂⓂ ⓂⓂⓂⓂ  
(ⓂⓂⓂⓂⓂ 13:10-17; ⓂⓂⓂⓂⓂ 8:9-10)

10 जेबे यीशु आपणे बारा चलेया और कुछ साथिया साथे कल्ले थे तेबे तिने यीशुए ते इना उदारणा रे बारे रे पृछेया । 11 यीशुए तिना खे बोलेया, “तुसा खे तो परमेशरो रे राज्य रे पेतो री समज दित्ती रिये, पर बाकि लोका खे उदारणा रेई सारिया गल्ला बोलणिया पड़ोईया । 12 कऊँकि “सेयो देखोए, पर तिना खे सुजदा नि, सेयो सुणदे ऊए तो सुणोए, पर समजदे नि, एडा नि ओ केथी तिना रा मन फिरी जाओ और तिना रे पाप माफ ऊई जाओ ।”

ⓂⓂⓂ ⓂⓂⓂⓂ ⓂⓂⓂⓂⓂⓂ ⓂⓂⓂⓂⓂⓂⓂⓂ ⓂⓂ ⓂⓂⓂⓂⓂⓂⓂⓂ  
(ⓂⓂⓂⓂⓂ 13:18-23; ⓂⓂⓂⓂⓂ 8:11-15)

13 तेबे यीशुए तिना खे बोलेया, “अगर तुसे एस उदारणो खे नि समजदे? तो तुसा ओर क्या उदारण समजण 14 बाणे वाला परमेशरो रा वचन लगी रा बाणे । 15 जो बिऊ बाटा रे छूटे थे, सेयो ये लोक ए जिने परमेशरो रा वचन सुणेया, पर श्रैतान तिना खे फटाफट जो तिने सुणी राखेया था, चोरी की लई जाओआ । 16 तियाँ ई जो सापड़ी पाँदली जमीना पाँदे बाए जाओए, सेयो ये लोक ए जो परमेशरो रा वचन सुणी की खुशी-खुशी मानी लओए । 17 पर सेयो लोक तिना छोटो जी डालिया जेडे जो जड़ ना राखणे री बजअ ते सेयो थोडे ई दिना खे ओईया; जेबे वचनो री बजअ ते तिना पाँदे क्लेश या उपदरव ओए, तो सेयो चट ई टोकर खाई लओए 18 और जो जाड़ो रे बाए थे, सेयो ये लोक ए, जिने परमेशरो रा वचन सुणेया, 19 पर दुनिया री चिन्ता, पैसे रा तोखा और कई चीजा रा लोब तिना रे बसी की वचनो खे दबाई देओआ और से निष्फल रई जाओआ । 20 जो अच्छी जमीना रे बाए थे, सेयो यो लोक ए, जो परमेशरो रा वचन सुणी की मानी लओए और आत्मिक फल ल्याओ ए, कोई तीइ गुणा, कोई साठ गुणा और कोई सौ गुणा ।”

ⓀⓀⓀⓀ ⓀⓀ ⓀⓀⓀⓀⓀ  
 (ⓀⓀⓀⓀ 8:16-18)

21 तेबे यीशुए तिना खे बोलेया, “क्या दिऊए खे इजी री खातर ल्याओ कि टोकरूए या माँजे निठे राखो? क्या इजी री खातर नि कि फटिया पाँदे राखो? 22 कऊँकि कोई बी चीज छिपी नि सकदी; पर सामणे आओई ना कुछ गुप्त ए, पर सामणे आई जाओआ। 23 जो समजी सकोआ से तिजी खे ल्यानो साथे सुणो और मानी बी लओ।” 24 तेबे यीशुए तिना खे बोलेया, “चौकस रओ कि क्या लगी रे सुणने? जेते नापे की तुसे नापोए, तिजी नापो साथे तुसा खे बी नापेया जाणा और तुसा खे जादा देणा। 25 जो मेरा वचन सुणोआ तेसखे ओर बी अक्ल दिती जाणी, पर जो मेरा वचन नि सुणदा, तेसते से बी जो तेसगे आए लई लणा।”

ⓀⓀⓀⓀ ⓀⓀⓀⓀⓀ ⓀⓀⓀⓀ ⓀⓀ ⓀⓀⓀⓀⓀ

26 तेबे यीशुए बोलेया, “परमेशरो रा राज्य एडा ए, जियाँ कोई माणू डेरूआ रे बीज सेटोआ 27 और ये जिम्मीदार राती सओआ, दिने जागोआ और सेयो विऊ एडे जम्मोए और बडोए कि तेसखे पता ई नि लगदा। 28 तरती आपू फल ल्याओ ई पईले लुंग तेबे सिल्ले और तेबे सिल्लेया रे ल्यार दाँणा। 29 पर जेबे दाँणा पाक्की जाओआ, तेबे ये जिम्मीदार फटाफट दराटी लगाओआ, कऊँकि बाडणे रा बखत ऊई जाओआ।”

ⓀⓀⓀⓀⓀⓀ ⓀⓀ ⓀⓀⓀⓀⓀ ⓀⓀⓀⓀ ⓀⓀⓀⓀⓀ  
 (ⓀⓀⓀⓀⓀ 13:31,32,34; ⓀⓀⓀⓀⓀ 13:18,19)

30 तेबे यीशुए बोलेया, “आसे परमेशरो रे राज्य री तुलना किजी साथे करिए और केस उदारणो साथे परमेशरो रे राज्य रे बारे रे बताईए? 31 परमेशरो रा राज्य अऊरिया रे दाणे जेडा ए कि जेबे जमीना रे बाओए, तेबे सबी दाणेया ते छोटा ओआ। 32 पर जेबे से जम्मोआ, तेबे सबी सागो-पातो ते बडा ऊई जाओआ और तिजी रिया इतणिया बडिया डालिया निकलोईया कि सर्गो रे पंछी तिजी री छ्याँयाँ रे बसेरा करी सकोए।” 33 यीशु एडे बऊत उदारण देई की तिना रे समजणे रे मुताबिक तिना खे परमेशरो रा वचन सुणाओ थे 34 और सब कुछ उदारणो साथे बोलो थे, पर सेयो कल्ले जे आपणे चलेया खे बुलाओ थे और हर उदारणा रा मतलब समजयाओ थे।

ⓀⓀⓀⓀⓀⓀ ⓀⓀ ⓀⓀⓀⓀⓀⓀ ⓀⓀⓀⓀ  
 (ⓀⓀⓀⓀⓀ 8:23-27; ⓀⓀⓀⓀⓀ 8:22-25)

35 तेसी दिने जेबे साँज ऊई, तेबे यीशुए चलेया खे बोलेया, “आओ, आसे समुद्रो ते पार चलूए।” 36 तेबे चले पीडा खे छाडी की तेते किस्तिया रे गए, जेते किस्तिया रे यीशु पईले तेई बैठे रे थे और सेयो यीशुए खे लई की पार चली गे और तिना साथे ओर बी किस्तिया थिया। 37 तेबे बऊत बडा पारी तूफान आया और लईरा एडिया आईया कि किस्ती पाणिए साथे फरने वाली थी। 38 यीशु पीछे गददिया पाँदे सऊणे लगी रे थे, तेबे चलेया यीशुए खे जगाई की बोलेया, “ओ गुरु! क्या तुसा खे फिकर निए कि आसे डूबणे वाले ए?” 39 तेबे यीशु उठी की तूफानो खे बके और पाणिए खे बोलेया, “शान्त रओ और रूकी जा!” और तूफान रूकी गा, तेबे बडी शांति ऊईगी। 40 तेबे यीशुए चलेया खे बोलेया, “तुसे कऊँ डरोए? क्या तुसा खे एबुए तक विश्वास निए?” 41 तेबे चले बऊत डरी गे और आपू बीचे बोलणे लगे, “ये कूणे, जो न केवल दुष्टात्मा बल्कि तूफान और पाणी बी एसरी आजा खे मानोए?”

## 5

ⓀⓀⓀⓀⓀⓀⓀⓀⓀⓀⓀ ⓀⓀ ⓀⓀⓀⓀⓀ ⓀⓀ ⓀⓀⓀⓀⓀⓀⓀⓀⓀ ⓀⓀ ⓀⓀⓀⓀⓀⓀ  
 (ⓀⓀⓀⓀⓀⓀ 8:28-34; ⓀⓀⓀⓀⓀ 8:26-39)

1 तेबे यीशु और तिना रे चले गलीली समुद्रो ते पार गिरासेनियो रे प्रदेशो रे पऊँछी गे। 2 जेबे यीशु किस्तिया ते उतरे, तेबे तेबुई एक माणू, जेसरे दुष्टात्मा थी, कबरा ते निकली की तिना खे मिलेया। 3 से कबिरस्तानो रे रओ था और बऊत ई हुड़दंग मचाणे वाला था। तेसखे कोई बी एबुए तक साँगलो रे बानी की नि राखी सको था। 4 कऊँकि से कई बार वेडिये की और साँगलो साथे बानेया,

पर तिने साँगल तोड़ी ते और बेड़िया रे टुकड़े-टुकड़े करी ते, तेसखे कोई बी वशो रे नि करी सको था। 5 से रात-दिन कबिरस्तानो रे और पाहूड़ो रे चीगदा रओ था और आपू खे पात्थरो साथे काईल करदा रओ था।

6 से यीशुए खे देखी की दूरो तेई दौड़ी गा और तिने तिना गे माथा टेकेया। 7 तेबे तिने ऊच्ची आवाजा रे चींगी की बोलेया, “ओ यीशु परमप्रदान परमेशरो रे पुत्र! माखे तांते क्या काम? आऊँ ताखे परमेशरो री कसम देऊँआ कि माखे दुःखी न कर।” 8 कऊँकि तिने तेसखे बोलेया था, “ओ दुष्टात्मा, एस माणूए ते निकली जा।” 9 यीशुए तेसते पृछेया, “तेरा नाओं क्या ए?” दुष्टात्मे बोलेया, “सेना कऊँकि आसे बऊत सारे ए।” 10 तेबे तिने तिना ते बऊत बिनती किती, “आसा खे एसा जगा ते बारे नि पेज।”

11 तेती पाहूड़ो पाँदे सूअरो रा एक चूण्ड चरने लगी रा था। 12 तेबे दुष्टात्मा यीशुए ते बिनती किती, “आसा खे इना सूअरा बीचे पेजी दे, ताकि आसे इना रे पीतरे चली जाऊँ।” 13 तेबे यीशुए तिना खे आज्ञा दिती, और दुष्टात्मा निकली और सूअरा रे चूण्डा रे समाई गी। जो दो हूजारा रा था। तेबे से काअड़ी पाँदो ते छवाल खाई की समुद्रो रे पड़ी गा और डूबी की मरी गा।

14 तेबे तिना खे चराणे वालेया दौड़ी की गांव और शईरो रे खबर दिती और जो ऊआ था लोक तेस देखणे आए। 15 यीशुए गे आई की सेयो, जेसरे दुष्टात्मा थी, मतलब-जेसरे सेना समाई री थी, से बिल्कुल ओशा रे और टाले पईनी की बैठे रा देखेया, और डरी गे। 16 एस आदसे खे देखणे वालेया, तेसरा, जेसरे दुष्टात्मा थी और सूअरा रा पूरा आल तिना खे सुणाया। 17 तेबे सेयो यीशुए ते बिनती करने लगे, “म्हारे वन्ने ते चली जाओ।”

18 जेबे यीशु किस्तिया रे चढ़ने लगे और जेसरे दुष्टात्मा थी, तिने बोलेया, “माखे बी आपू साथे आऊणे दे। 19 पर यीशुए तेसखे ना करी ती और तेसखे बोलेया कि आपणे कअरो खे वापस चली जा और लोका खे बता कि तां पाँदे परभूए केड़ी दया किती और तेरी तंई कितणे बड़े काम किते।” 20 तेबे से दिकापुलिस परदेशो खे गया और इना गल्ला रा परचार करने लगेया, “यीशुए मेरिया तंई कितणे बड़े काम किते।” ये सुणी की सब लोक हैरान उई गे।

~~~~~  
 (~~~~~9:18-26; ~~~~~8:40-56)

21 जेबे यीशु किस्तिया रे वारले कनारे आए और समुद्रो रे कनारे पऊँछी गे तेबे एक बड़ी पारी पीड़ तिना गे कट्टी ऊईगी। 22 तेबे याईर नाओं रे प्रार्थना रे कअरो रे सरदारा बीचा ते एक तेती आया और यीशुए खे देखी की तिना रे पैरो पाँदे पड़ी गा। 23 तेबे तिने बिनती किती और बोलेया, “मेरी छोटी बेटी मरने वाली ए, तुसे मेरे कअरे आई की तेसा पाँदे आथ राखो, ताकि से ठीक ऊई जाओ और जिऊँदी रओ।” 24 तेबे यीशु तेस साथे चली गे, और एक बड़ी पारी पीड़ बी तिना साथे आईगी, एथो तक की लोक तिना पाँदे रूड़ी जाओ थे।

25 तेबे एक जवाणस जो तेसा पीड़ा रे थी, जेसा खे बारा साला ते खून बइणे री बमारी थी 26 और से आपू खे ठीक ऊणे री तंई कई बैदा गे गई और आपणा सब कुछ खर्च करी ता, पर से ओर बी बमार ऊईगी और कुछ फाईदा नि ऊआ। 27 यीशुए रे बारे रे सुणी की से पीड़ा ते पीछे, ते आई और तिना रे टाले छूँए। 28 कऊँकि से बोलो थी, “जे आऊँ तिना रे टाले ई छूँई लऊँगी, तो ठीक ऊई जाणी।” 29 और तेबुई तेसा रा खून बइणा बंद ऊईगा और तेसे आपणे शरीरो ते जाणी ला कि मेरी बमारी ठीक ऊईगी। 30 यीशुए तेबुई आपू रे जाणी ला, “मांते सामर्थ निकली री।” तेबे तिने पीड़ा रे पीछे, मुड़ी की पृछेया, “मेरे टाले किने छूँए?” 31 तिना रे चलेया तिना खे बोलेया, “तुसा खे पता तो आए कि इतणी पीड़ तुसा पाँदे पड़ी री और तुसे बोलोए, ‘आऊँ किने छूँया?’ ” 32 तेबे यीशु ये देखणे री तंई, “आऊँ किने छूँया” सेयो चऊँ कनारे देखणे लगे। 33 तेबे से जवाणस ये जाणी गी कि मां साथे केड़ी पलाई ऊई री, से डरदी और थरथरादी ऊई आई और यीशुए रे पैरा पाँदे पड़ी गी और तेसे सारा

आल सच-सच तिना खे सुणाया। ³⁴ यीशुए तेसा खे बोलेया, “बेटिये, तेरे विश्वासे तू ठीक किती। बेफिकर ऊई की जा और आपणी एसा बमारिया ते बची री रओ।”

³⁵ यीशु ये बोलणे ई लगी रे थे कि प्रार्थना रे कअरो रे सरदारो रे कअरो ते कुछ लोक आए और बोलेया, “तेरी मुन्नी मरी गी। एबे गुरूओ खे कष्ट कऊँ लगी रा देणे?” ³⁶ जो गल्ल सेयो करने लगी रे थे, से यीशुए अणसुणी करी की प्रार्थना रे कअरो रे सरदारो खे बोलेया, “डर नि; बस विश्वास राख।” ³⁷ तेबे यीशुए पतरस, याकूब और तेसरा पाई यूहन्ने खे छाडी की कोई बी आपू साथे आऊणे नि दित्तेया। ³⁸ तेबे प्रार्थना रे कअरो रे सरदारो रे कअरे पऊँछी की तिने लोक रोदे ऊए और राडिया देंदे ऊए देखे। ³⁹ तेबे यीशुए पीतरे जाई की तिना खे बोलेया, “तुसे रोणे और राडिया कऊँ लगी रे देणे? तेरी मुन्नी मरी नि रई, पर सऊणे लगी री।” ⁴⁰ सेयो ये गल्ल सुणी की यीशुए रा मजाक लगे ऊड़ाणे, पर तिने सब जणे बारे निकयाली की मुन्निया रे माए-बाओ और आपणे तीनो चलेया साथे पितरे गया, जेती मुन्नी थी पड़ी री। ⁴¹ तेबे तिने मुन्निया रा आथ पकड़ी की तेसा खे बोलेया, “तलीता कूमी!” मतलब “ओ मुन्निए आऊँ ताखे बोलूँआ कि उठ।” ⁴² तेबे मुन्नी उठी और फटाफट चलणे-फिरने लगी। से बारा साला री थी। ये देखी की सारे लोक बऊत हैरान रई गे। ⁴³ तेबे तिने तिना खे सावधान करी की बोलेया, “ये गल्ल कसी गे नि बोलणी और एसा मुन्निया खे कुछ खाणे खे देओ।”

6

ⓂⓂⓂⓂⓂ ⓂⓂ ⓂⓂⓂⓂⓂ ⓂⓂ ⓂⓂⓂⓂⓂ

(ⓂⓂⓂⓂⓂ 13:53-58; ⓂⓂⓂⓂⓂ 4:16-30)

¹ यीशु कफरनहूमो ते निकली की आपणे नगर नासरतो खे आए और तिना रे चले बी तिना साथे आए। ² आरामो रे दिने सेयो प्रार्थना रे कअरो रे उपदेश देणे लगे, उपदेश सुणी की लोक हैरान ऊईगे और बोलणे लगे, “यो गल्ला एसखे कियाँ ए पता? और ये कुण जा ज्ञान ए, जो एसखे देई राखेया? और एसरे आथो साथे यो सामर्थो रे काम कियाँ ओए? ³ आसे जाणूँए कि ये लकडिया रा मिस्त्री ए, जो मरियमो रा पाऊ ए और याकूब, योसेस, यहूदा और शमौनो रा पाई ए और क्या एसरिया बईणी आसा बीचे ई नि रंदिद्या?” इजी बजअ ते तिने तेसखे अपनाणे ते न किती। ⁴ यीशुए तिना खे बोलेया, “भविष्यबक्ता रा आपणे इलाके रे, आपणे टब्बर और आपणे कअरो खे छाडी की ओरथी सारी जगा आदर ओआ।” ⁵ तेबे सेयो नासरत नगरो रे बऊत सामर्थो रे काम नि करी सके, बस तिने कुछ बमारा पाँदे आथ राखी की सेयो ठीक कित्ते। ⁶ तेबे सेयो, तिना रा अविश्वास देखी की हैरान ऊईगे, और तेबे सेयो गांव रे चऊँ कनारे कूमदे ऊए उपदेश देणे लगे।

ⓂⓂⓂⓂⓂ ⓂⓂⓂⓂⓂⓂⓂ ⓂⓂ ⓂⓂⓂⓂⓂ

(ⓂⓂⓂⓂⓂ 10:5-15; ⓂⓂⓂⓂⓂ 9:1-6)

⁷ तेबे यीशुए बारा चले बुलाई की दो-दो करी की पेजे और तिना खे दुष्टात्मा खे निकयालने रा अक्क दित्तेया। ⁸ तेबे यीशुए तिना खे आज्ञा दित्ती, “बाटा खे आपू साथे डण्डा छाडी की ओर कुछ नि लणा; ना रोटी, ना चोली और ना बटुए रे पैसे। ⁹ पर जोड़े पईनो, और आपू साथे दो जोड़ी टाल्ले नि राखो।” ¹⁰ तेबे तिने तिना खे बोलेया, “जेबे तुसे कसी नगरो रे जाओ और कोई तुसा खे आपणे कअरे बुलाओ, तो जदुओ तक तुसे तेस इलाके ते चली नि जाओ, तदुओ तक तेस ई कअरो रे रओ। ¹¹ जेते जगा रे लोक तुसा खे नि मानो और तुसा री नि सुणो, तो तेथा ते चलदे बणो और आपणे पैरा री तूड तेथी चाडी देओ, ताकि तिना रे खलाफ सबूत ओ।” ¹² तेबे चलेया जाई की प्रचार कित्तेया, “मन फिराओ।” ¹³ तिने बऊत दुष्टात्मा निकयालिया और बऊत बमार तेल मली की ठीक कित्ते।

ⓂⓂⓂⓂⓂⓂⓂ ⓂⓂⓂⓂⓂⓂⓂⓂⓂ ⓂⓂⓂⓂⓂⓂⓂ ⓂⓂ ⓂⓂⓂⓂⓂⓂⓂ

(ⓂⓂⓂⓂⓂ 14:1-12; ⓂⓂⓂⓂⓂ 9:7-9)

¹⁴ तेबे हेरोदेस राजे यीशुए रे बारे रे सुणेया, कऊँकि तिना रा नाओ बऊत फैली गा था। तेबे कुछ लोक ईयाँ बोलो थे, “यूहन्ना बपतिस्मा देणे वाला मरे रेया बीचा ते जिऊँदा उई गा रा, तेबई तो

तेसते यो सामर्था रे काम ओए ।¹⁵ तेवे कुछ जणे बोलेया, “ये तो एलिय्याह ए”, कुछ जणे बोलेया, “भविष्यबक्तेया बीचा ते कोई एक ए ।”¹⁶ हेरोदेसे राजे ये सुणी की बोलेया, “जेस यूहन्ने रा सिर मैं बडवाया था, ये सेई जिऊंदा ऊईगा रा ।”¹⁷ कऊँकि हेरोदेसे आपणे पाई फिलिप्पुसो री लाड़ी हेरोदियासा री बजअ ते, जेसा साथे तिने ब्या कित्तेया था, लोका से पेजी की यूहन्ना पकड़वाया और जेला रे पाईता था ।¹⁸ कऊँकि यूहन्ने हेरोदेसो से बोलेया था, “आपणे पाईए री लाड़ी राखणा ताखे खरी गल्ल निए ।”¹⁹ तेवेई तो हेरोदियास यूहन्ने साथे दुश्मणी राखो थी और ये चाओ थी कि एसखे कुलवाई देऊँ, पर एड़ा नि ऊई सकेया ।²⁰ कऊँकि हेरोदेस यूहन्ने से तर्मी और पवित्तर माणू मानो था और तेसते डरो था और तेसखे बचाए रे राखो था और तेसरी सुणी की बऊत कवराओ था, पर बऊत खुश ओ था ।

²¹ तेवे ठीक मोके पदि, जेवे हेरोदेसो रा जन्मदिन था, तेवे तिने आपणे प्रदाना खे, सेनापतिया और गलीलो रे बडे लोका खे पाट्टी राखी ।²² तेवे हेरोदियासा री मुन्नी पीतरे आई और नाचणे लगी, तेसा रा नाच देखी की हेरोदेस और तेस साथे बैठणे वाले खुश ऊईगे । तेवे हेरोदेस राजे तेसा खे बोलेया, “मांग, जो ताखे चाईयो, मां ताखे देणा”²³ और तिने कसम खाई, “आदे राज्य तक, जो तू मांगेगी, मां ताखे देणा ।”²⁴ तेसे बारे जाई की आपणी आम्मा ते पूछेया, “आऊँ क्या मांगू?” माए बोलेया, “यूहन्ना बपतिस्मा देणे वालेया रा सिर चाईयो ।”²⁵ तेवे मुन्नी फटाफट राजे गे पितरे आई और तेसते बिनती करी की बोलेया, “आऊँ चाऊँई कि तू एबू यूहन्ना बपतिस्मा देणे वाले रा सिर एक थालिया रे माखे मंगवाई दे ।”

²⁶ तेवे हेरोदेस राजा बऊत उदास ऊईगा, पर आपणी कसमा री बजअ ते और आपू साथे बैठे रे लोका री बजअ ते, से तेसा री गल्ल टाली नि सकेया ।²⁷ तेवे राजे तेबुई एक जलाद पेजेया और तेसखे आज्ञा दिती कि तेसरा सिर बाडी की ल्याओ ।²⁸ तेवे तिने जेला रे जाई की तेसरा सिर बाडेया और एक थालिया रे पाई की ल्याया और हेरोदियासा री मुन्निया खे दित्तेया, और मुन्निए आपणी आम्मा खे दित्तेया ।²⁹ ये बुरी खबर सुणी की यूहन्ना रे चले आए और तेसरी लोथ चकी की कवरा रे राखी ।

⚬⚬⚬⚬⚬ ⚬⚬⚬⚬⚬ ⚬⚬⚬⚬⚬⚬ ⚬⚬⚬⚬⚬⚬ ⚬⚬⚬⚬⚬
(⚬⚬⚬⚬⚬ 14:13,14; ⚬⚬⚬⚬⚬ 9:10)

³⁰ जेवे बारा प्रेरित जो यीशुए दुष्टात्माओं खे निकालने रा अक्क देई की दो-दो करी की पेजे थे वापस आए तो जो कुछ तिने कित्तेया और जो सिखाई राखेया था, सब तिना गे बताया ।³¹ यीशुए चलेया खे बोलेया, “तुसे आपू बी केथी जंगलो रे जाई की आराम करी लो ।” तिने ये इजी खे बोलेया था, कऊँकि बऊत लोक आओ थे और तिना खे रोटी खाणे खे बी बखत नि मिलो था ।³² तेवे यीशु और तिना रे चले किस्तिया रे चढ़ी की, सुणसाण जगा रे चली गे ।

⚬⚬⚬⚬⚬ ⚬⚬⚬⚬⚬⚬ ⚬⚬⚬⚬⚬⚬⚬ ⚬⚬⚬⚬⚬⚬
(⚬⚬⚬⚬⚬ 14:15-21; ⚬⚬⚬⚬⚬ 9:11-17; ⚬⚬⚬⚬⚬⚬⚬ 6:1-14)

³³ तेवे बऊत जणेया यीशु और तिना रे चले जादे ऊए देखी ले और तेवे सब नगरो रे लोक कट्टे ऊई की पैदल ई दौड़ी गे और तिना ते पडले तेती पऊँछी गे ।³⁴ तेवे तिने किस्तिया ते उतरी की एक बड़ी पीड़ देखी और तिना खे तेसा पीड़ा पाँदे तरस आया, कऊँकि सेयो तिना पेडा जेडे थे, जिना रा कोई रखवाला नि ऊँदा । तेवे यीशु तिना खे बऊत गल्ला सिखाणे लगे ।

³⁵ जेवे साँज ऊणे वाली थी, तेवे तिना रे चले तिना खे बोलणे लगे, “ये सुणसाण जगा ए और दिन बऊत चढ़ी गा रा ।³⁶ एवे इना खे बिदा करी देयो, ताकि यो गांव, और बस्तिया रे जाई की आपू खे खाणे खे कुछ खरीदी सको ।”³⁷ यीशुए तिना खे बोलेया, “तुसेई इना खे खाणे खे देयो ।” चलेया बोलेया, “क्या आसे इना खे दो सौ चाँदिए रे सिक्केया रे मोलो रे बराबर (मतलब दो सौ दिनो री मजदूरिया रे बराबर ए) रोटिया खरीदी लईये और इना खे खुलाईए?”³⁸ यीशुए तिना खे बोलेया, “जाओ और देखो तुसा गे कितणिया रोटिया ए?” तिने पता करी की बोलेया, “पाँज रोटिया और दो मछलिया ए ।”

39 तेबे यीशुए चेलैया खे आज्ञा दिती कि सबी खे अरे काओ पाँदे बाईंठी रे बठयाली देओ। 40 सेयो सौ-सौ और पंजा-पंजा, बाईंठी रे बैठीगे। 41 तेबे यीशुए सेयो दो मछलिया और पाँज रोटिया लईया और स्वर्गो खे देखी की धन्यवाद कित्तैया और रोटिया तो डी-तोड़ी की आपणे चेलैया खे दित्तिया कि लोका खे बाँडी देओ और सेयो मछलिया बी बाँडिया। 42 तेबे सब खाई की रजी गो। 43 और तेबे तिने बचे रे टुकड़ेया रिया बारा टोकरिया परी की चकिया और कुछ मछलिया बी थिया। 44 जिने रोटिया खाईया, तिना बीचे जादातर पाँज हूजार तो मर्द थे।

????? ? ? ? ? ? ? ? ? ? ? ? ? ?

(?????? 14:22-33; ????????? 6:15-21)

45 तेबे यीशुए तेबुई आपणे चले किस्तिया रे चढाए, ताकि सेयो तिना ते पईले, पार बैतसैदा नगरो खे चली जाओ, जदुओ तक की सेयो लोका खे बिदा करेए। 46 तेबे से पीडा खे बिदा करी की पाहूडो पाँदे प्रार्थना करने खे गए। 47 जेबे साँज ऊई, तेबे चेलैया री किस्ती समुद्रो रे थी और यीशु कल्ले जमीना पाँदे थे। 48 यीशुए देखेया कि तिना रे चले बड़ी मुश्किला साथे चप्पू चलादे-चलादे ऊए कवराणे लगी रे, कऊँकि अवा तिना रे खलाफ थी, तेबे सेयो राधियो रे चौथे पडरो रे नेडे, समुद्रो रे पाणिए पाँदे चली की तिना गे आए और सेयो तिना ते आगे निकलना चाओ थे। 49 पर जिंयाँ ई चेलैया यीशुए खे समुद्रो रे पाणिए पाँदे चलदे ऊए देखी की सोचेया कि ये तो पूत ए और सब डरो रे मारे जीगणे लगे। 50 कऊँकि सब तिना खे देखी की कबराई गे थे, पर यीशुए फटाफट तिना साथे गल्ल किती और बोलेया, “याओ राखो। आऊँ ए। डरो नि।” 51 तेबे सेयो तिना साथे किस्तिया रे आए और अवा रूकी गी, तिना रे चले ये देखी की हैरान ऊईगे। 52 कऊँकि सेयो एथो तक तिना रोटिया रे बारे रे नि समजे थे। और तिना रे मन कठोर ऊईगे थे।

?????????? ? ? ? ? ? ? ? ? ? ? ? ? ? ?

(?????? 14:34-36)

53 तेबे यीशु और तिना रे चले गलीली समुद्रो ते उतरी की गन्नेसरत नगरो री जगा रे पऊँछे और किस्ती कनारे पाँदे लगाईती। 54 जेबे सेयो किस्तिया ते उतरे, तेबे लोक तिना खे पछ्याणने लगे 55 और ओरे-पोरे सारे-देशो रे दौड़े और बमारा खे माँजे पाँदे लटयाली की, जेती-जेती सुणेया कि यीशु तेती ए, 56 सेयो तेथी-तेथी पऊँछी गे। और जेती केथी सेयो, गांव, नगर और बस्तिया रे जाओ थे, तेबे लोक बमारा खे बजारो रे छाडी की तिना ते बिनती करो थे कि बमारा खे बस आपणे टाले रा पल्ला ई छूणे दे। और जितणे तिना खे छूँओ थे, सेयो ठीक ऊई जाओ थे।

7

????? ??????? ? ? ? ? ? ? ? ?

(?????? 15:1-9)

1 तेबे फरीसी और कई शास्त्री यीशुए गे कट्टे ऊए, जो यरूशलेम नगरो ते आए थे। 2 तेबे तिने तिना रे चले बिना आथ तोए रोटी खाँदे ऊए देखे। 3 कऊँकि फरीसी और सब यहूदी बुजुर्गा रिया रवाजा पाँदे चलते थे और जदुओ तक तिना री रवाजा रे मुताबिक ठीक टंगो रे आथ नि तोई लओ थे, तदुओ तक नि खाओ थे। 4 और बजारो ते आई की जदुओ तक नाई नि लओ थे, तदुओ तक नि खाओ थे और बऊत एडिया गल्ला ए, जो सेयो मानोए-जेडे-कटोर, लोटे और ताबेया रे पांडे मांजणे।

5 तेबेई तो तिने फरीसिये और शास्त्रिए यीशुए ते पूछेया, “तेरे चले बुजुर्गा रिया गल्ला कऊँ नि मानदे और बिना आथ तोए रोटी खाओए?” 6 यीशुए तिना खे बोलेया, “यशयाह भविष्यबक्ते तुसा कपटिया रे बारे रे ठीक भविष्यवाणी ए किती री; जेड़ा लिखी राखेया, “यो लोक मुँओ ते तो मेरा आदर करेए, पर मनो ते मांते दूर रओए।

7 यो बिना मतलबो ते मेरी भक्ति करेए,

कऊँकि माणूए री आज्ञा खे यो तमों रा उपदेश करी की सिखाओए।⁸ कऊँकि तुसे परमेशरो री आज्ञा खे टाली की माणूए री रवाजा खे मानोए।”

9 तेवे यीशुए तिना खे बोलेया, “तुसे माणूए रे जरिए बणाई री रीति-रिवाजा खे मानणे री तंदई परमेशरो री आज्ञा खे कितणी चलाकिया साथे टाली देओए।¹⁰ कऊँकि मूसे नबीए विधानो रे बोली राखेया, ‘आपणे माया-बावा रा आदर कर’ और ‘जो कोई तिना खे बुरा बोलोगा से जरूर काया जाणा।’¹¹ पर तुसे बोलोए कि जे कोई आपणे माया-बावा खे बोलो, ‘जो कुछ तुसा खे मांते फाईदा ऊई सकोआ, से कुरबान ए, सब कुछ परमेशरो खे।’ क्या एड़ा बोलणा ठीक ए? ¹² तो तेवे तुसे तेसखे आपणे माया-बावा री कुछ बी सेवा करने नि देंदे।¹³ ईयां ई तुसे आपणी रवाजा ते, जो तुसे बणाई राखिया, परमेशरो रा वचन टाली देओए और एड़े-एड़े ई बऊत बुरे काम करोए।”

XX
(XXXXXXXX 15:10-20)

14 तेवे यीशुए लोका खे आपू गो बुलाई की बोलेया, “तुसे सब मेरी सुणो और समजो।¹⁵ एड़ी कोई बी चीज नि ए जो माणूआ खे बाअरा ते अशुद्ध करोई, पर जो गल्ला माणूए रे पीतरो ते निकलोई, से माणूए खे अशुद्ध करोई।¹⁶ जो समजी सकोआ से तीजी खे त्यानो साथे सुणो और मानी बी लओ।”¹⁷ जेवे यीशु पीड़ा गे ते कअरो खे गए, तेवे तिना रे चलेया तिना ते एस उदारणो रे बारे रे पूछेया।¹⁸ तिने तिना खे बोलेया, “क्या तुसे बी एड़े ई नासमज ए? क्या तुसे नि जाणदे कि जो रोटी माणू खाओआ, से तिजी ते अशुद्ध नि ऊई सकदा? ¹⁹ कऊँकि से तेसरे मनो रे नि, पर पेटो रे जाओई, और सड़यानी साथे निकलोई।” ये बोली की तिने सारी खाणे रिया चीजा शुद्ध ठईराई राखिया।²⁰ तेवे तिने बोलेया, “जो बुरिया गल्ला माणूआ रे मुंओ ते निकलोईया, सेई तेसखे अशुद्ध बणाओईया।²¹ कऊँकि माणूए रे मनो रे बुरे-बुरे विचार, व्याभिचार, चोरी, अत्या, ²² परस्त्रीगमन, लोब, दुष्टता, छल, लुचपण, बुरी नजर, निन्दा, कमण्ड और मुखंता निकलोई।²³ यो सब बुरिया गल्ला पीतरो तेई निकलोईया और माणूए खे बुरा बणाओईया।”

XX
(XXXXXXXX 15:21-28)

24 तेवे यीशु और तिना रे चले गलील प्रदेशो ते उठी की सूर और सैदा रे नगरो खे आए और एक कअरो रे गए और सेयो चाओ थे कि कोई बी तिना रे बारे रे नि जाणो, पर सेयो लुकी नि सके।²⁵ तेवे एक जवाणस थी, जेसा री छोटी मुन्निया रे दुष्टात्मा आत्मा थी, तेसे यीशुए रे बारे रे सुणेया और तेवे से तिना गे आई और तिना रे पैरो पँदि पड़ी गी।²⁶ ये यूनानी और सूरूफिनीकी जातिया री थी, तेसे यीशुए ते बिनती किती, “मेरी मुन्निया ते दुष्टात्मा निकयाली दे।”²⁷ तिने तेसा खे बोलेया, “पईले बच्चेया खे रजणे दे, कऊँकि बच्चेया री रोटी कुत्तेया रे आगे राखणा खरी गल्ल नि ए।”²⁸ तेसे जवाणसे बोलेया, “सच ए प्रभु, पर तेवे बी तो छोटे कुत्ते बी बच्चेया री रोटिया ते बचे रे टुकड़ेया रा चूरा खाई लओए।”²⁹ यीशुए तेसा खे बोलेया, “जे एड़ी गल्ल ए, तेवे तो तू चली जा; दुष्टात्मा तेरी मुन्निया ते निकली गी री।”³⁰ तेवे से आपणे कअरे आई और तेसे देखेया कि तेसा री मुन्नी माँजे पँदि ए और दुष्टात्मा निकली गी री।

XX

31 तेवे यीशु सूर और सैदा रे नगरो ते निकली की सिदोन और दिकापुलिसो रे प्रदेशो रे ऊँदे ऊए गलीलो रे समुद्रो रे नेडे पऊँछे।³² तेवे लोके एक माणू तिना गे ल्याया जो टौणा और तूतला था, तेवे तिने यीशुए ते बिनती करी की बोलेया, “आपणा आथ एस पँदि राखी देयो।”³³ तेवे यीशु तेसखे पीड़ा ते लग जे लईगे और आपणिया गुठिया तेसरे कानो रे पाईया और धूक लगाई की तेसरी जीब छुई।³⁴ तेवे तिने स्वर्गो खे लांबा साआ परी की देखेया और बोलेया, “ईफ्तह!” मतलब “खुली जा!”³⁵ तेवे से तेबुई सुणने लगेया और तेसरी जीब खुली गी और से साफ-साफ बोलणे लगेया।³⁶ तेवे तिने तेसखे सावधान करी की बोलेया, “कैसी गे नि बोलणा।” पर जितणा तिने से सावधान

कित्तेया, तिथणा ई से ओर बी प्रचार करने लगेया।³⁷ तेवे सेयो लोक बऊत हैरान ऊई की बोलणे लगे, “तिने जो कुछ कित्तेया, अच्छा कित्तेया, सेयो टौणेया खे सुणने री और गूंगेया खे बोलणे री शक्ति देओ ए।”

8

मरकुस 15:32-39

1 तिना दिना रे जेवे बड़ी पीड़ कट्टी ऊई और तिना गे कुछ खाणे खे नि था, तेवे तिने आपणे चलेया खे आपू गे बुलाई की बोलेया,² “माखे एसा पीड़ा पाँदे तरस आओआ, कऊँकि ये तीन दिना ते बराबर मां साथे ए और इना गे कुछ बी एवे खाणे खे नि ए।³ जे आऊँ इना खे पूखा कअरो खे पेजुंगा, तो यो वाटा रेई थकी जाणे, कऊँकि इना बीचा ते कोई-कोई बड़ी दूरो ते आई रे।”⁴ तिना रे चलेया तिना खे बोलेया, “एती सुणसाण जगा रे इतणिया सारिया रोटिया केथा ते ल्याईए, ताकि यो रज्जी जाओ?”⁵ यीशुए तिना ते पूछेया, “तुसा गे कितणी रोटिया ए?” तिने बोलेया, “सात।”

6 तेवे यीशुए तिना खे बोलेया, “जमीना पाँदे बैठी जाओ।” तिने सेयो सात रोटिया लईया और परमेशरो रा धन्यवाद करी की तोड़िया और आपणे चलेया खे देदे गए कि इना लोका खे देओ, और सेयो लोका खे देदे गए।⁷ तिना गे थोड़ी जीया छोटिया मछलिया बी थिया और यीशुए सेयो बी धन्यवाद करी की लोका खे देणे खे बोलेया।⁸ तेवे सेयो खाई की रज्जी गे और जो टुकडे बची रे थे तिना रे सात बड़े टोकरू परी की चके।⁹ खाणे वाले तकरीबन चार हूजार लोक थे; तेवे तिने सेयो विदा करी ते।¹⁰ तेवे यीशु आपणेया चलेया साथे किस्तिया पाँदे चढी की दलमनूता नाओं रे नगरो खे चली गे।

मरकुस 16:1-4

11 तेवे फरीसी यीशुए साथे बईस करने लगे और तिना खे परखणे खे बोलेया, “कोई स्वर्गिय चिह्न बता।”¹² तिने लांबा साआ परी की बोलेया, “एते जमाने रे लोक चिह्न कऊँ टोलोए? आऊँ तुसा खे सच बोलूँआ कि एस बखतो रे लोका खे कोई बी चिह्न नि देणा।”¹³ तेवे सेयो तिना खे छाडी की किस्तिया रे बैठे और पार चली गे।

मरकुस 16:5-12

14 चले रोटिया लणा पूली गे थे और किस्तिया रे तिना गे बस एक ई रोटी थी।¹⁵ तेवे यीशुए सेयो सावधान कित्ते कि देखो, “फरीसिये रे सजेड़े और हेरोदेसो रे सजेड़े ते चौकस रएयो”¹⁶ चले आपू बीचे सोच-बिचार करी की बोलणे लगे, “से इजी खे बोलोआ कऊँकि आसा गे तो रोटी आए ई नि।”¹⁷ ये जाणी की यीशुए तिना खे बोलेया, “तुसे आपू बीचे ये बिचार कऊँ लगी रे करने कि आसा गे रोटी नि ए? क्या एबुए तक नि जाणदे और समजदे नि? क्या तुसा रे अक्ल नि ए? ¹⁸ क्या आखी ऊँदे ऊए पनि देखदे और कान ऊँदे ऊए पनि सुणदे? क्या तुसा खे याद नि ए? ¹⁹ कि जेवे मैं पाँज हूजार लोका खे पाँज रोटिया तोड़िया थिया और तुसे टुकडे रिया कितणिया टोकरिया चकिया थिया?” तिने तिना खे बोलेया, “बारा टोकरिया।”²⁰ यीशुए फेर पूछेया, “जेवे चार हूजारा लोका खे सात रोटिया थिया, तो तेवे तुसे टुकडे रिया कितणिया टोकरिया चकिया थिया?” चलेया बोलेया, “सात टोकरिया।”²¹ यीशुए तिना खे बोलेया, “क्या तुसे एबुए तक नि समजदे?”

मरकुस 16:13-20

22 तेवे सेयो बेतसेदा नगरो खे आए और लोक एक अन्दे खे यीशुए गे ल्याए और बिनती कित्ती कि तुसे एसखे छुई देओ।²³ तेवे यीशु तेस अन्दे खे आथ पकड़ी की गांव ते बारे लईगे और तेसरी आखी पाँदे थूकी की आथ राखे और तेसते पूछेया, “क्या तू देखी संकेया?”²⁴ तिने आखी चकी की बोलेया, “आऊँ माणूआ खे देखी सकूँआ, सेयो माखे चलदे ऊए डाला जेड़े दिशोए।”²⁵ तेवे यीशुए

तेसरी आखी पाँदे फेर आध राखे और तेबे तिने अन्दे त्यानो साथे देखेया और से ठीक ऊईगा और सब कुछ साफ-साफ देखणे लगेया। ²⁶ यीशुए से कअरो खे पेजेया और तेसखे बोलेया, “एस गांव रे पीतरे पैर पनि राखणा।”

ⓂⓂⓂⓂ ⓂⓂ ⓂⓂⓂⓂ ⓂⓂ ⓂⓂⓂⓂ ⓂⓂⓂⓂ
(ⓂⓂⓂⓂ 16:13-20; ⓂⓂⓂⓂ 9:18-21)

²⁷ यीशु और तिना रे चले केसरिया फिलिप्पिया नगरो रे नेडे-तेडे गांव खे चली गे; तेबे यीशुए बाटा रे तिना ते पूछेया, “लोक माखे क्या बोलोए?” ²⁸ चलेया जबाब दितेया, “यूहन्ना बपतिस्मा देणे वाला; पर कोई-कोई एलिय्याह और कोई-कोई भविष्यवक्ता बीचा ते एक बी बोलोए।” ²⁹ यीशुए तिना ते पूछेया, “पर तुसे माखे क्या बोलोए?” पतरसे तिना खे बोलेया, “तुसे मसीह ए, परमेशरो रे पेजे रे।” ³⁰ तेबे यीशुए तिना खे सावधान करी की बोलेया, ये केसी गे नि बताणा, “आऊँ ई मसीह ए।”

ⓂⓂⓂⓂ ⓂⓂⓂⓂ ⓂⓂ ⓂⓂⓂⓂ ⓂⓂ ⓂⓂⓂⓂ ⓂⓂ ⓂⓂⓂⓂⓂⓂⓂⓂⓂⓂ
(ⓂⓂⓂⓂ 16:21-23; ⓂⓂⓂⓂ 9:22)

³¹ तेबे यीशु तिना खे बताणे लगे कि, “मां माणू रे पुत्रो खे जरूरी ए कि आऊँ बऊत दुःख उटाऊँ और वुजुर्ग, बडे पुरोईत और शास्तरी माखे तुच्छ जाणी की काई देओ और आऊँ तीजे दिने जिऊँदा ऊई जाऊँ।” ³² यीशुए तिना खे साफ-साफ बताई ता। ये सुणी की पतरस तिना खे लग जे लईगा और थिड़कणे लगेया। ³³ पर यीशु मुडे और आपणेया चलेया खे देखी की पतरसो खे थिड़कणे लगे, “ओ शैतान! मेरी नजरा ते दूर ऊई जा; कऊँकि तूँ परमेशरो रिया गल्ला रे नि, पर माणूए रिया गल्ला पाँदे आपणा मन लगाएया।”

ⓂⓂⓂⓂ ⓂⓂⓂⓂ ⓂⓂⓂⓂ ⓂⓂ ⓂⓂⓂⓂ
(ⓂⓂⓂⓂ 16:24-28; ⓂⓂⓂⓂ 9:23-27)

³⁴ यीशुए पीड़ा समेत आपणे चले आपू गे बुलाए और तिना खे बोलेया, “जो कोई मां पीछे आऊणा चाओआ, से आपणा सब कुछ छाडी की और आपणे दुःखो और कष्टा रा क्रूस चकी की आपणी इच्छा ते मां पीछे आई जाओ। ³⁵ कऊँकि जो कोई आपणा प्राण बचाणा चाओगा, तेस से खोणा, पर जो कोई मेरिया और सुसमाचारो रिया तंई आपणे प्राण देओगा, तेस सच्ची ई आपणे प्राण बचाणे। ³⁶ जे माणूए खे सारी दुनिया मिली जाओ, और आपणे ई प्राण नि रओ, तो तेसखे क्या फाईदा? ³⁷ और माणूए आपणे प्राणो रे बदले ओर क्या देई सकोआ? ³⁸ जो कोई एसा व्याभिचारिया और पापी जातिया बीचे, मांते और मेरिया गल्ला ते शर्माओगा, तो तेबे मां माणू रा पुत्रो बी, जेबे पवित्र स्वर्गदूता साथे आपणे पिते री महिमा साथे आऊणा, तो मां बी तेसते शर्माणा।”

9

¹ यीशुए तिना खे बोलेया, “आऊँ तुसा खे सच लगी रा बोलणे कि जो एती खडी रे तिना बीचा ते कई एडे ए, कि जदुओ तक परमेशरो रे राज्य खे सामथां साथे आऊँदा ऊआ नि देखी लओगे, तदुओ तक नि मरने।”

ⓂⓂⓂⓂ ⓂⓂ ⓂⓂⓂⓂ ⓂⓂⓂⓂⓂⓂ
(ⓂⓂⓂⓂ 17:1-13; ⓂⓂⓂⓂ 9:28-36)

² छे दिनो ते बाद यीशुए पतरस, याकूब और यूहन्ना आपू साथे लए और लग जे ऊच्चे जे पाहड़ो पाँदे चली गे और तेती तिना सामणे यीशुए री शकल बदली गी। ³ तेबे तिना रे टाले ईतणे चमकणे लगे कि बडे पारी साफ ऊईगे और तरतिया रे कोई बी तोबी इतणा साफ नि करी सकदा। ⁴ तेबे चलेया खे पुराणे बखतो रे दो भविष्यवक्ता मूसा और एलिय्याह दिशे और सेयो यीशुए साथे गल्ला करो थे। ⁵ ये देखी की पतरसे यीशुए खे बोलेया, “ओ गुरु! आसा रा एती रणा ठीक ए और आसे एड़ा करूँए कि तीन तम्बू बणाऊँए; एक तुसा खे, एक मूस खे और एक एलिय्याहो खे।” ⁶ कऊँकि सेयो बऊत डरी गे थे और पतरस नि जाणो था कि क्या जबाब देऊँ। ⁷ तेबे एक बादल तिना पाँदे छाईगा

और तेस बादलो ते परमेशरो री ये आवाज आई, “ये मेरा प्यारा पुत्र ए, एसरी सुणो।”⁸ तेबे सेयो फटाफट चऊँ कनारे देखणे लगे और यीशुए खे छाडी की तिने ओर कोई नि देखेया।

⁹ पाहड़ो ते उतरदे ऊए यीशुए तिना खे आज्ञा दित्ती कि, “जदुओ तक आऊँ माणूं रा पुत्र, मरे रेया बीचा ते जिऊँदा नि ऊई जाऊँ, तदुओ तक जो कुछ तुसे देखी राखेया, से केसी गे नि बताणा।”¹⁰ चलेया ये गल्ल आपू तक ई राखी और आपू बीचे बात-बीत करने लगे, “मरे रेया बीचा ते जिऊँदा ऊणे रा क्या मतलब ए?”¹¹ तेबे तिने यीशुए ते पूछेया, “शास्त्री कऊँ बोलोए कि मसीह रे आऊणे ते पईले एलिय्याहो रा आऊणा जरूरी ए?”¹² यीशुए तिना खे जवाब दित्तेया, “एलिय्याह रा तो सच्ची पईले आऊणा और लोका रे मनो खे मेरिया तई त्यार करना जरूरी ए। पर पवित्तर शास्त्रो रे माणूं रे पुत्रो रे बारे रे बी एड़ा कऊँ लिखी राखेया कि तेसखे बऊत दुःख ऊणे और से तुच्छ समजेया जाणा? ¹³ पर आऊँ तुसा खे सच बोळूँआ कि एलिय्याह तो आई चुकेया रा और जो तेसरे बारे रे लिखी राखेया था, तिने जो कुछ चाया तेस साथे कित्तेया।”

XXXXXXXXXX XX XXXX XX XXXXXX XX XXX XXXX
(XXXXXXXX 17:14-21; XXXXX 9:37-43)

¹⁴ और जेबे यीशु आपणे तीनो चलेया साथे ओरी चलेया नेडे आए तो तेबे तिने देखेया कि तिना रे चऊँ कनारे पीड़ लगी री और शास्त्री तिना साथे बईस करने लगी रे थे।¹⁵ तेबे यीशुए खे देखी की सब हैरान ऊईगे और तिना गे दौडी की तिना खे नमस्कार कित्तेया।¹⁶ यीशुए तिना ते पूछेया, “तुसे इना साथे क्या बईस लगी रे करने?”¹⁷ पीड़ा बीचा ते एकी जणे बोलेया, “ओ गुरू! आऊँ आपणे पाऊए खे तुसा गे ल्याई राखेया, जेसे दुष्टात्मे ये गूंगा करी राखेया।¹⁸ जेती-केथी से तेसखे पकड़ोई, तेथी पटकी देओई और एसरे मुँओ ते जगुड़ निकलने लगी जाओआ और से दाँद किरडदा रओआ और सूकदा रओआ। मै तुसा रे चलेया खे बोलेया, ‘तुसे एसा खे निकयाली देओ, पर सेयो निकयाली नि सके।’”

¹⁹ ये सुणी की यीशुए तिना खे जवाब दित्तेया, “ओ अविश्वासी लोको! मां कदुओ तक तुसा साथे रणा? और कदुओ तक तुसा खे सईन करूँ? बच्चे खे मांगे ल्याओ।”²⁰ तेबे सेयो बच्चे खे यीशुए गे ल्याए; और जेबे दुष्टात्मे यीशुए खे देखेया, तो तेबे दुष्टात्मे बच्चा फटाफट मकरेडी ता और बच्चा जमीना पाँदे पड़ी गा, और से मुँओ ते जगुड़ निकयालदे ऊए कजणे लगेया।²¹ यीशुए तेसरे बाओ ते पूछेया, “एसरी ये आलत कदुओ ते ए?”²² तिने बोलेया, “बचपनो ते। दुष्टात्मा एसरा नाश करने री तई, कदी ये आगी रे और कदी पाणिए रे रुड़ाया। पर जे तुसे कुछ करी सकोए तो आसा पाँदे तरस खाई की एसखे ठीक करी देयो।”²³ यीशुए तेसखे बोलेया, “जे तुसे करी सकोए तो, ये क्या गल्ल ऊई? विश्वास करने वालेया खे सब कुछ ऊई सकोआ।”²⁴ तेस पाऊए रे बाओ फटाफट गिड़गिड़ाई की बोलेया, “ओ प्रभु! आऊँ विश्वास करूँआ। मेरे विश्वासो खे और बड़ाई देओ।”

²⁵ जेबे यीशुए देखेया कि लोक दौडी की पीड़ लगी रे लगाणे, तो सेयो दुष्टात्मा खे बके कि ओ ‘गूंगा और टोणा करने वाली दुष्टात्मा, आऊँ ताखे आज्ञा देऊँआ कि एस बच्चे ते निकली जा; और एसरे कदी दुबारा नि आऊणा।”²⁶ तेबे से चींगी की और तेसखे मकरेडी की निकली गी और पाऊ मरे रे जेड़ा ऊईगा। एथो तक बऊत लोक बोलणे लगे, “ये तो मरी गा रा।”²⁷ पर यीशुए तेसरा आथ पकड़ी की से ठवालेया और से खड़ा ऊईगा।

²⁸ जेबे यीशु कअरे आए, तेबे तिना रे चलेया तिना ते लग जे जाई की पूछेया, “आसे तेसा खे कऊँ नि निकयाली सके?”²⁹ यीशुए तिना खे बोलेया, “ये एड़ी दुष्टात्मा ए जो बअरतो साथे प्रार्थना करने ते अलावा कोई और उपाय ते नि निकली सकदी।”

XXXX XXXX XX XXXX XX XXXXXX XX XXXXXX XXXXXXXXXXXXX
(XXXXXXXX 17:22,23; XXXXX 9:43-45)

³⁰ तेबे यीशु और तिना रे चले तथा ते चली की गलील प्रदेशो ते ऊई की जाणे लगी रे थे और सेयो नि चाओ थे कि कोई जाणो।³¹ तेबे यीशु आपणे चलेया खे उपदेश देणा चाओ था और बोलणे लगे, “आऊँ माणूं रा पुत्र, माणूंआ रे आथो रे पकड़वाऊणा और तिना आऊँ काई देणा और आऊँ

मरने ते तीजे दिने जिऊंदा ऊई जाणा।” 32 पर ये गल्ल तिना री समजा रे नि आई और सेयो तिना ते पूच्छणे ते डरो थे।

ⓃⓃⓃⓃ ⓃⓃⓃⓃ ⓃⓃⓃⓃ

(ⓃⓃⓃⓃ 18:1-5; ⓃⓃⓃⓃ 9:46-48)

33 तेबे यीशु आपणे चलेया साथे कफरनहूम नगरो खे आए और कअरे आई की यीशुए तिना ते पूच्छेया, “बाटा रे तुसे कुण जी गल्ला रे बईस लगी रे थे करने?” 34 सेयो चुप रए, कऊँकि बाटा रे तिने बईस कित्ती थी, “आसा बीचा ते बडा कूण ए?” 35 तेबे यीशुए आपणे बारा चले बुलाए और बोलेया, “जे कोई बडा ऊणा चाओआ तो, सबी ते छोटा और सबी रा सेवक बणो।” 36 तेबे तिने एक बालक आपणी गोदा रे लया और तिना बीचे खडा कित्तेया और तिना खे बोलेया, 37 “जो मेरे नाओं ते एडे केसी एकी बालको खे बी मानोआ, से माखे मानोआ, और जो माखे मानोआ, से माखे नि, पर मेरे पेजणे वाले खे मानोआ।”

ⓃⓃ ⓃⓃⓃⓃⓃⓃ ⓃⓃⓃⓃ ⓃⓃⓃⓃ, ⓃⓃ ⓃⓃⓃ ⓃⓃⓃⓃ Ⓝ

(ⓃⓃⓃⓃ 9:49,50)

38 तेबे यूहन्ने नाओं रे चले यीशुए खे बोलेया, “ओ गुरू! आसे एक माणू तुसा रे नाओं ते दुष्तात्मा खे निकयालदा ऊआ देखेया और आसे तेसखे एडा करने ते ना कित्ती। कऊँकि से तेरा चेला नि था।” 39 यीशुए बोलेया, “तेसखे ना नि करो, कऊँकि एडा कोई निए जो मेरे नाओं ते सामर्था रे काम नि करो और फटाफट माखे बुरा बोली सको। 40 कऊँकि जो म्हारे खलाफ निए, से आसा साथे ए। 41 जो कोई तुसा खे एक कटोरा पाणिए रा इजी री खातर पलयाओ कि तुसे मसीहे रे ए, तो आऊँ तुसा खे सच लगी रा बोलणे कि तेस आपणा प्रतिफल कियोँ पनि खोणा।”

ⓃⓃⓃⓃ ⓃⓃ ⓃⓃⓃ ⓃⓃⓃⓃ

(ⓃⓃⓃⓃ 18:6-9; ⓃⓃⓃⓃ 17:1,2)

42 यीशुए बोलेया, “पर जो इना छोटेया बीचा ते, जो मां पाँदे विश्वास राखोए, केसी खे बी पापो रे पाओ तिना खे बऊत खतरनाक सजा मिलणी। तेसखे ये पला ऊँदा कि तेसरे गले रे एक बडा चाक्किया रा पूड लटकाई देओ और तेसखे समुद्रो रे सेटी देओ। 43 जे तेरा आथ ताखे पापो री बजअ बणोआ तो, तेस बाडी दे और टुण्डा ऊई की जिन्दगी जियो। ताखे येई ठीक ए कि दो आथ रंदे ऊए ताखे नरको री आगी रे सेटी देओ जो कदी विजणी नि। 44 जेती कीडा शरीरो खे सदा खांदा रओआ और मरदा नि और आग बी सदा बलदी रओई। 45 जे तेरा पैर पापो री बजअ बणोआ, तो तेस बाडी दे। लंगडा ऊई की तेरा जिऊणा इजी ते खरा ए कि दो पैर रंदे ऊए ताखे नरको रे सेटी देओ। 46 जेती कीडा शरीरो खे सदा खांदा रओआ और मरदा नि और आग बी सदा बलदी रओई। 47 जे तेरी आख ताखे पापो री बजअ बणोई, तो तेसा निकयाली दे। काणा ऊई कि परमेशरो रे राज्य रे जाणा ताखे ये पला ए कि दो आखी रंदे ऊए तूँ नरको रे सेटेया जाओ। 48 जेती कीडा शरीरो खे सदा खांदा रओआ और मरदा नि और आग बी सदा बलदी रओई। 49 कऊँकि हर एक माणू आगी साथे ईयाँ परखेया जाणा, जिंयाँ खाणे दे लूणो रा स्वाद चाखेया जाओआ। 50 लूण अच्छा ए, पर जे लूणो रा स्वाद बिगडी जाओ तो से किजी साथे लूणका करना? आपू रे लूणो जेडा मित्रता रा स्वभाव राखो और आपू बीचे मिली-जुली की रओ।”

10

ⓃⓃⓃⓃⓃ ⓃⓃ ⓃⓃⓃⓃ ⓃⓃ ⓃⓃⓃⓃⓃⓃ ⓃⓃ ⓃⓃⓃⓃⓃⓃ

(ⓃⓃⓃⓃ 19:1-12; ⓃⓃⓃⓃ 16:18)

1 तेबे यीशु और तिना रे चले कफरनहूम नगरो ते उठी की यहूदिया प्रदेशो रे बन्ने रे और यरदनो नदिया ते पार आए। पीड फेर तिना गे कट्टी ऊईगी और यीशु तिना खे आपणे तरीके ते उपदेश देणे लगे।

2 तेवे फरीसिये तिना खे परखणे री तँई तिना ते पूछेया, “क्या माणूए खे आपणी लाडिया खे छाडणा खरी गल्ल ए?” 3 यीशुए तिना खे जवाब दित्त्या, “मूसे बिधानों रे मुताबिक तुसा खे क्या आज्ञा देई राखी?” 4 फरीसिये बोलेया, “मूसे त्यागपत्र लिखणे री और छाडणे री आज्ञा देई राखी।” 5 यीशुए बोलेया, “तुसा रे मनो रे जिद्दी सबाओ री बजअ ते तिने तुसा खे ये आज्ञा लिखी राखी। 6 पर मृष्टिया री शुरूआता तेई परमेशरे मर्द और जवाणस करी की सेयो बणाई राखे। 7 इजी बजअ ते माणू आपणे माया-बावा ते लग ऊई की आपणी लाडिया साथे रणा 8 और सेयो दोनो एक तन ऊणे। एवे सेयो दो नि, पर एक तन ए। 9 इजी री खातर जो परमेशरे जोडी राखे, तो लाडा-लाडी आपू बीचे एकी-दूजे खे नि छाडो।”

10 कअरे जाई की चलेया एतेरे बारे रे फेर यीशुए ते पूछेया। 11 यीशुए तिना खे बोलेया, “जो कोई आपणी लाडिया खे छाडी की केसी ओरी साथे ब्या करोआ, तो से तेसा पईलकिया रे खलाफ ब्याभिचार करोआ। 12 जे लाडी आपणे लाडे खे छाडी की दूजा ब्या करो, तो से ब्याभिचार करोई।”

~~~~~

(~~~~~ 19:13-15; ~~~~~ 18:15-17)

13 तेवे लोक बच्चेया खे यीशुए गे ल्याऊणे लगे, ताकि सेयो तिना पाँदे आथ राखी की आशीवांद देओ, पर चले तिना खे बकणे लगे। 14 यीशुए ये देखी की तिना खे रोषो रे बोलेया, “बालका खे मांगे आऊणे देओ और तिना खे ना नि करो, कऊँकि परमेशरो रा राज्य एडे रा ईए। 15 आऊँ तुसा खे सच लगी रा बोलणे कि जो कोई परमेशरो रा राज्य बालको जेडा समजी की मानदा नि, से कदी तिदे नि जाणा।” 16 तेवे यीशुए बच्चे गोदा रे लए और तिना रे सिरा पाँदे आथ राखी की तिना खे आशीष दिती।

~~~~~

(~~~~~ 19:16-30; ~~~~~ 18:18-30)

17 जेवे यीशु तेथा ते निकली की बाटा रे चली रे थे, तेवे एक माणू तिना गे दौडदा ऊआ आया और तिना रे पैरो पाँदे पडी की तिना ते पूछेया, “ओ उत्तम गुरु! अनन्त जीवनों रा अधिकारी ऊणे खे आऊँ क्या करूँ?” 18 यीशुए तेसखे बोलेया, “तूँ माखे उत्तम कऊँ बोलेया? कोई उत्तम निए, बस एक-मतलब, परमेशर ई उत्तम ए। 19 तूँ आज्ञा खे तो जाणेया, ‘अत्या, ब्याभिचार, चोरी नि करना, चूठी गवाई नि देणी, छल नि करना, आपणे माया-बावा रा आदर करना।’” 20 तिने माणूए बोलेया, “ओ गुरु! इना सवी आज्ञा खे तो आऊँ बचपनो ते मानूँआ।” 21 यीशुए तेसखे प्यारो ते देखेया और तेसखे बोलेया, “तांदि एक गल्ला री कमी ए, जा, जो कुछ तांगे आए, से बेची की कंगाला खे देई दे और ताखे स्वर्गो रे सच्चा धन मिलणा, और मां पीछे आईजा।” 22 ये सुणी की से उदास ऊईगा और से दुःखी उई की कअरो खे चली गा, कऊँकि से बऊत अमीर था।

23 यीशुए चऊँ कनारे देखी की आपणे चलेया खे बोलेया, “अमीर लोका खे परमेशरो रे राज्य रे जाणा बऊत कठण ए।” 24 चले तिना री गल्ला ते हैरान ऊईगे, ये देखी की यीशुए तिना खे फेर बताया, “ओ बालको! जो धनो पाँदे विश्वास राखोए, तिना खे परमेशरो रे राज्य रे जाणा बऊत कठण ए। 25 परमेशरो रे राज्य रे अमीरा रा जाणा ईयां बऊत कठण ए, जिंयाँ की ऊँटो रा सूईया रे छेदो रिये निकलना कठण ए।” 26 चले बऊत हैरान ऊईगे और आपू बीचे बोलणे लगे, “तेवे केसरा उद्धार ऊई सकोआ?” 27 यीशुए तिना खे देखी की बोलेया, “माणूआ ते तो ये ऊई नि सकदा, पर परमेशरो ते सब कुछ उई सकोआ। कऊँकि परमेशरो खे सब कुछ सम्भव ए” 28 पतरस तिना खे बोलणे लगेया, “देखो, आसे तो सब कुछ छाडी की तुसा पीछे आईगे रे।” 29 यीशुए तिना खे बोलेया, “आऊँ तुसा खे सच लगी रा बोलणे कि हर कोई जिने माखे और सुसमाचारो री तँई कअर, पाई, बईण, माए-बाओ, बाल-बच्चे या डोरू छाडे ओ, 30 और तेस एवे एस बखते सौ गुणा फल पाणा। कअर, पाई, बईण माए, बाल-बच्चे और डोरू सताव साथे पाणे और परलोको रे अनन्त जीवन पाणा। 31 पर एवे

बऊत सारे लोक जो आपणे आपू खे एते दुनिया रे बड़े समजोए, सेयो परमेशरो री नजरा रे छोट्टे ऊई जाणे, और जिना खे संसार एबु छोट्टा समजोआ, सेयो परमेशरो री नजरा रे बड़े समजे जाणे ।”

XXXXXXXX XX XXXX XX XXXX XX XXXX XXXXXXXXXXXXXXX
(**XXXXX 20:17-19; XXXXX 18:31-34**)

32 सेयो यरूशलेम नगरो खे जादे ऊए बाटा रे थे और यीशु तिना ते आगे चली रे थे और चले हैरान ऊईगे और जो लोक पीछे चली रे थे सेयो डरने लगे । तेवे यीशु तिना बारा चलेया खे लई की तिना खे सेयो गल्ला बताणे लगे, जो तिना पाँदे आऊणे वालिया थिया । 33 यीशुए बोलेया, “देखो, आसे यरूशलेम नगरो खे जाणे लगी रे और आऊ माणू रा पुत्र बड़े पुरोईत और शास्त्रिया रे आथो रे देई देणा और तिना आऊ काणे जोगा ठराणा और दुजिया जातिया रे आथो रे देई देणा । 34 तिना मेरा मजाक उड़ाणा, मां पाँदे धूकणा, माखे कोडे वाणे, आऊ काणा और आऊ तीजे दिने जिऊंदा ऊई जाणा ।”

XXXXXXXX XX XXXXXXXX XX XXXXX
(**XXXXXX 20:20-28**)

35 तेवे जब्दिए रे पाऊए, याकूब और यूहन्ने तिना गे आई की बोलेया, “ओ गुरू! आसे चाऊँ ए कि जो कुछ आसे तुसा ते मांगू, तेड़ा ई तुसे आसा खे करो ।” 36 यीशुए तिना खे बोलेया, “तुसे क्या चाओए कि आऊँ तुसा खे करूँ?” 37 तिने बोलेया, “आसे चाऊँ कि जेवे तुसे आपणी महिमामय राज्य रे आओ तो आसे दोनो एक तुसा रे दाँणे और एक खूँजे कनारे बैठिए ।” 38 यीशुए तिना खे बोलेया, “तुसे नि जाणदे कि क्या लगी रे मांगणे? जो दुःख आऊँ सईन करने वाला ए, क्या से दुःख तुसे सईन करी सकोए? और जो मौता रा बपतिस्मा आऊँ लणे वाला ए, क्या तुसे लई सकोए?” 39 तिने बोलेया, “आसे करी सकूँए ।” यीशुए तिना खे बोलेया, “जो दुःख आऊँ सईन करने वाला ए, से तुसे सईन करी सकोए; और जो मौता बपतिस्मा आऊँ लणे वाला ए, से तुसा लणा । 40 पर जो त्यार कित्ते रे ए, तिना खे छाडी की ओर कोई आपणे दाँणे और खूँजे बठयालना मेरा काम निए ।”

41 ये सुणी की बाकि दस चले, याकूब और यूहन्ने पाँदे रोष करने लगे । 42 यीशुए सेयो आपू गे बुलाए और तिना खे बोलेया, “तुसे जाणोए कि जो दुजिया जातिया रे हाकिम समजे जाओए, सेयो तिना पाँदे जबरदस्ती राज करोए और जो तिना बीचे बड़े ए, तिना पाँदे अक्क जताओए । 43 पर तुसा बीचे एड़ा नि ऊणा चाईयो, बल्कि जो कोई तुसा बीचा ते बड़ा ऊणा चाओआ, से तुसा रा दास बणो । 44 और जो कोई तुसा रा प्रदान बणना चाओआ, से सबी रा दास बणो । 45 कऊँकि आऊँ माणू रा पुत्र इजी खे नि आया कि मेरी सेवा करो, बल्कि इजी खे आया कि से आपू सेवा करो और बऊत जणेया छुड़ाणे खे आपणा प्राण देई देओ ।”

XXXXXXXXXXXXXXXXXX XX XXXX XX XXX
(**XXXXXX 20:29-34; XXXXX 18:35-43**)

46 यीशु और तिना रे चले यरीहो नगरो रे आए । और जेवे सेयो और तिना रे चले बाटा रे थे, तेवे एक बड़ी पीड़ तिना पीछे-पीछे जाणे लगी री थी, तेवे तिमाईयो रा पाऊ बरतिमाई एक अन्दा भिखारी सड़का रे कनारे बैठेया रा था । 47 जेवे तिने ये सुणेया कि यीशु नासरी ये, तेवे से जोरे-जोरे की आक्का पाणे लगेया कि, “ओ दाऊदो री ल्वाद, यीशु! मां पाँदे दया कर ।” 48 कई जणे तेसखे बकणे लगे कि चुप रओ, पर से ओर बी आक्का पाणे लगेया कि, “ओ दाऊदो री ल्वाद! मां पाँदे दया कर ।” 49 तेवे यीशुए रूकी की बोलेया, “तेसखे बुलाओ ।” तेवे लोके से अन्दा बुलाई की तेसखे बोलेया, “याओ राख, उठ, यीशु ताखे बुलाणे लगी रे ।” 50 से आपणी चादर सेटी की फटाफट उठी गा और यीशुए गे आईगा । 51 तेवे यीशुए तेसखे बोलेया, “तूँ क्या चाएया कि आऊँ ताखे क्या करूँ?” अन्दे बोलेया, “ओ गुरू! ये कि आऊँ देखणे लगी जाऊँ ।” 52 यीशुए तेसखे बोलेया, “चली जा, तेरे विश्वास तूँ ठीक करी ता” और से तेबुई देखणे लगेया और बाटा रे से तिना पीछे चलणे लगेया ।

11

XXXXXXXXXX XX XXXX XXXXXXXX

(XXXXXXXX 21:1-11; XXXXX 19:28-40; XXXXXXXX 12:12-19)

1 जेबे यीशु और तिना रे चले यरूशलेम नगरो रे नेड़े जैतून पाहड़ो पाँदि, बैतफगे और बैतनिय्याहो गांव रे नेड़े आए, तो तेबे यीशुए आपणे चलेया बीचा ते दो जणे ये बोली की पेजे, 2 “सामणे रे गांव रे जाओ, और तेती पऊँछी की तुसा खे एक गहदिया रा बच्चा, जेस पाँदि कदी कोई नि बैठी रा, बाने रा तुसा खे मिलणा, तेस खोली की ल्याओ। 3 जे तुसा खे कोई पूछो गा ‘एडा कऊँ लगी रे करने?’ तो बोलणा, ‘मेरे परभुए खे एसते कुछ काम ए,’ और तिना फटाफट से एती पेजी देणा।”

4 चलेया से गहदिया रा बच्चा बाअरे गलिया रे दरवाजे रे नेड़े बाने रा देखेया और सेयो तेसखे खोलणे लगे। 5 तेबे जो तेती खड़ी रे थे, तिना बीचा ते कोई-कोई बोलणे लगे, “ये क्या लगी रे करने? गहदिया रे बच्चे खे कऊँ लगी रे खोलणे?” 6 चलेया, जियाँ यीशुए था बोले रा, तियाँ ई तिना खे बोलणे लगे, तेबे तिने सेयो जाणे दिन्ते। 7 चलेया से गहदिया रा बच्चा यीशुए गे ल्याया और तेस पाँदि आपणे टाले पाए और यीशु तेस पाँदि बैठीगे। 8 तेबे बऊत जणेया आपणी-आपणी चादरी बाटा रे बछ्हाइतिया और कईए डोरूआ ते खजूरो रिया डालिया बाडी-बाडी की तिना रे स्वागतो खे बछ्हाइतिया। 9 तेबे जो यीशुए रे आगे और पीछे चली रे थे, सेयो जोरे-जोरे की बोलणे लगी रे थे, “होशन्ना, धन्य ए से, जो परभुए रे नाओं ते आओआ। 10 आसा रे पिता दाऊदो रा राज्य जो आऊणे लगी रा; से धन्य ए; स्वर्गो रे होशन्ना।”

11 तेबे यीशु यरूशलेमो नगरो रे पऊँछी की मन्दरो रे आए और चऊँ कनारे सब कुछ देखी की आपणे बारा चलेया साथे बैतनिय्याहो गांव खे गए, कऊँकि साँज ऊईगी थी।

XXXXXXXXXX XX XXXX XXXXXXXX XX XXXX

(XXXXXXXX 21:18-19)

12 दूजे दिने जेबे सेयो बैतनिय्याहो गांव ते निकले, तेबे यीशुए खे पूख लगी। 13 तेबे तिने दूरो ते एक दाऊगले रा अरा डाल देखेया और तेस डालो रे नेड़े आए कि क्या पता ईदे कुछ लगी रा ओगा, पर पत्तेया खे छाडी की ओर कुछ नि मिलेया, कऊँकि फल लगणे रा बखत नि था। 14 तेबे यीशुए तेस डालो खे बोलेया, “आजो ते बाद तेरा फल केली नि खाणा” और तिना रे चले सुणने लगी रे थे।

XXXXXXXXXX XX XXXXXXXX XX XXXXXXXXXX

(XXXXXXXX 21:12-17; XXXXX 19:45-48; XXXXXXXX 2:13-22)

15 तेबे यीशु यरूशलेमो नगरो खे आए और मन्दरो रे गए, तेबे जो तेती लेण-देण लगी रे थे करने, सेयो तिना खे बारे निकयालने लगे और सरांफे रिया पेटिया और कबूतरा खे बेचणे वालिया चौकिया मूँदिया करी तिया 16 और मन्दरो रिये कोई बी सामान लई की आऊणे-जाणे नि दिन्तेया। 17 तेबे उपदेश देई की तिना खे बोलेया, “एडा लिखी राखेया, मेरा मन्दर, सब जातिया खे प्रार्थना रा कअर ऊणा। पर तुसे ये डाकूआ री गुफा बणाई ती री।” 18 ये सुणी की बड़े पुरोईत और शास्त्री यीशुए खे बर्बाद करने रा मोका टोलने लगे, कऊँकि सेयो तिना ते डरो थे और लोक बी तिना रे उपदेशो ते हैरान थे। 19 साँज ऊँदे ई यीशु और तिना रे चले नगरो ते बाअरे चली गे।

XXXXX XXXXXXXX XX XXXXX XX XXXXXXX

(XXXXXXXX 21:20-22)

20 तेबे प्यागा सेयो तिसिये गए और चलेया से दाऊगले रा डाल जडा ते सूकेया रा देखेया। 21 पतरसो खे से गल्ल याद आई और तिने यीशुए खे बोलेया, “ओ गुरु! देख, ये दाऊगले रा डाल, जेसखे तुसे सुराप दिन्तेया था, सूकी गा रा।” 22 यीशुए जवाब दिन्तेया, “परमेशरो पाँदि विश्वास राखो। 23 आऊँ तुसा खे सच बोलूआ कि जे कोई एस पाहड़ो खे बोलो, ‘तूँ पट्टी जा और समुद्रो रे पडी जा,’ और आपणे मनो रे शक नि करो, बल्कि विश्वास राखो कि जो बोलूआ, से ऊई जाणा, तो तेसखे से ऊई जाणा। 24 तेबेई तो आऊँ तुसा खे बोलूआ कि जो कुछ तुसे प्रार्थना करी की मांगोगे,

तो विश्वास राखो कि तुसा खे मिली गा और तुसा खे ऊई जाणा। ²⁵ जेबे कदी तुसे खड़े ऊई की पूरार्थना करोए और तुसा रे मनो रे केसी रे खलाफ कोई गल्ल ओ, तो तेसखे माफ करी देओ। तुसा रा स्वर्गिय पिता बी तुसा रे पाप माफ करोआ। ²⁶ और जे तुसे माफ नि करोगे, तो तुसा रे स्वर्गिय पिते बी तुसा रे अपराध माफ नि करने।”

☞☞☞☞ ☞☞☞☞ ☞☞☞☞ ☞☞☞☞
(☞☞☞☞ 21:23-27; ☞☞☞☞ 20:1-8)

²⁷ तेबे यीशु और तिना रे चले फेर यरूशलेमो नगरो खे आए और जेबे यीशु मन्दरो रे कूमणे लगी रे थे, तेबे बड़े पुरोईत, शास्त्री और वुजुर्ग तिना गे आई की पूछणे लगे, ²⁸ “तू इना कामा केस अक्को ते करेया? और ताखे ये अक्क किने देई राखेया कि तू इना कामा खे करे?” ²⁹ यीशुए तिना खे बोलेया, “आऊँ बी तुसा ते एक गल्ल पुछूँआ, माखे जवाब देओ, तो मां बी तुसा खे बताणा कि इना कामा केस अक्को ते करूँआ? ³⁰ यूहन्ने रा बपतिस्मा क्या स्वर्गो ते था या माणूए री तरफा ते था? माखे जवाब देओ।” ³¹ तेबे सेयो आपू बीचे बात-चीत करने लगे, “जे आसे बोलूँ कि ‘स्वर्गो री तरफा ते था,’ तो एस बोलणा, ‘तेबे तुसे तेस पाँदे विश्वास कऊँ नि कित्तेया?’” ³² और जे आसे बोलूँगे, ‘माणूए री तरफा ते ए,’ तो लोका रा डर ए, कि लोक गुस्सा ऊई जाणे; कऊँकि सब जाणोए कि यूहन्ना भविष्यवक्ता था।” ³³ तो तेबे तिने यीशुए खे जवाब दित्तेया, “आसे नि जाणदे।” यीशुए बी तिना खे बोलेया, “मां पनि बताणा कि ये काम केसरे अक्को ते करूँआ।”

12

☞☞☞☞☞☞☞☞☞ ☞☞☞☞☞☞☞☞☞
(☞☞☞☞ 21:33-46; ☞☞☞☞ 20:9-19)

¹ यीशु उदारणा रे तिना साथे गल्ला करने लगे, “एकी माणूए अँगूरा रा बगीचा लगाया और तिजी रे चऊँ कनारे बाड़ लगाया और अँगूरा रे रसो खे पात्थरो दे एक गड्डा खणेया, जुगाली बणाई और टेकेदारा खे तिजी रा टेका देई की परदेशो खे चली गा। ² जेबे फल लगणे रा बखत ऊआ तेबे तिने आपणा एक दास टेकेदारा गे पेजेया कि तिना ते अँगूरा रे बगीचे रे फलो रा इस्सा ल्याओ। ³ पर टेकेदारे से पकड़ी की कूटेया और खाली आथे पेजी ता। ⁴ तेबे तिने एक ओर दास पेजेया और तिने तेसरा सिर फोड़ी ता और तेसरी बेज्जती किती। ⁵ तेबे तिने एक ओर पेजेया और तिने से काई ता; तेबे तिने ओर कई जणे पेजे; तिना बीचा ते तिने कई जणे कूटे और कई जणे काई ते। ⁶ एबे एक ई रई गा था, जो तेसरा प्यारा पाऊ था, तिने आखरी रे से बी ये सोची की पेजेया, ‘तिना मेरे पाऊए रा तो आदर करना।’ ⁷ पर तिने टेकेदारे आपू बीचे बोलेया, ‘येई तो बारस ए,’ आओ एसखे काई देऊँए, तेबे जायदात म्हारी ऊई जाणी। ⁸ तेबे तिने से पकड़ी की काई ता और अँगूरा रे बगीचे ते बारे सेटी ता।”

⁹ यीशुए पूछेया, “तो तेबे अँगूरा रे बगीचे रे मालके क्या करना? तेस आई की तिना टेकेदारो रा नाश करी देणा और अँगूरा रा बगीचा ओरी गे देई देणा। ¹⁰ क्या तुसे पवित्र शास्त्रो रे ये वचन नि पढ़ेया,

“जेस पात्थरो खे राजमिस्त्रए नकम्मा बोलेया था,
सेई कृणे रा सिरा ऊईगा”

¹¹ ये परभूए री तरफा ते ऊआ,
और आसा री नजरा रे नऊखा ए?”

¹² तेबे तिने से पकड़ना चाया, कऊँकि सेयो समजी गे थे, “तिने ये उदारण आसा रे बारे रे बोलेया।” पर सेयो लोका ते डरी गे और तिना खे छाडी की चली गे।

☞☞☞☞☞☞☞☞☞ ☞☞☞☞☞☞☞☞☞
(☞☞☞☞ 22:15-22; ☞☞☞☞ 20:20-26)

¹³ तेबे यहूदी अगुवे यीशु गल्ला रे फसाणे री तई कई फरीसी और हेरोदेस राजे रा समर्थन करने वाले यहूदी तिना गे पेजे। ¹⁴ और तिने आई की तिना खे बोलेया, “ओ गुरु! आसे जाणूए कि तुसे

सच्चे ए और केसी री परवा नि करदे, कऊँकि तुसे माणूआ रा मूँ देखी की गल्ल नि करदे, पर परमेशरो री बाट सच्चाईया साथे बताओए। तो क्या कैसरो खे कर देणा खरी गल्ल या नि? 15 आसे देऊँ या नई देऊँ?” यीशुए तिना रा कपट जाणी की बोलेया, “माखे कऊँ परखोए? एक चाँदिए रा सिक्का मांगे ल्याओ ताकि आऊँ देखूँ।” 16 सेयो ली आए और तिने तिना खे बोलेया, “ये मूर्ति और नाओं केसरा ए?” तिने बोलेया, “रोमो रे राजा कैसरो रा।” 17 यीशुए तिना खे बोलेया, “जो कैसरो राए, से कैसरो खे और जो परमेशरो राए, से परमेशरो खे देयो।” तेबे सेयो तिना पाँदे हैरानी करने लगे।

ⓂⓂⓂⓂⓂ ⓂⓂⓂⓂⓂ ⓂⓂ ⓂⓂ ⓂⓂⓂⓂ
(ⓂⓂⓂⓂⓂ 22:23-33; ⓂⓂⓂⓂⓂ 20:27-40)

18 तेबे सद्किये बी जो एड़ा बोलो थे कि मरेया रा जिऊँदा ऊई नि सकदा, तिने यीशुए गे आई की पूछेया, 19 “ओ गुरू, मूसे आसा खे लिखी राखेया कि जे केसी माणूए रा पाई बिना ल्वादा ते मरी जाओ और तेसरी लाड़ी रई जाओ, तो तेसरा पाई तेसा बिदुआ साथे ब्या करी लओ और आपणे पाईए खे ल्वाद पैदा करो। 20 एक बार सात पाई थे; पईला पाई ब्या करी की बिना ल्वादा ते मरी गा। 21 तेबे दूजे पाईए तेसा बिदुआ साथे ब्या करी ला और से बी बिना ल्वादा ते मरी गा; और तियाँ ई तीजे बी कितेया। 22 साता पाईया ते ल्वाद नि ऊई। सबी ते बाद से जवाणस बी मरी गी। 23 तो तेबे, जेबे सेयो जिऊँदे ऊणे, तो से तिना बीचा ते केसरी लाड़ी ऊणी? कऊँकि से साता जणेया री लाड़ी ऊई चुकी थी।”

24 यीशुए तिना खे बोलेया, “तुसे केथी एते पूला रे तो निए कि ना तुसे पवित्र शास्त्रो खेई जाणदे और ना ई परमेशरो री सामर्था खे? 25 कऊँकि जेबे सेयो मरेया रे बीचा ते जिऊँदे ऊणे, तो तिना बीचे शादी-ब्या नि ऊणे, पर स्वर्गदूतो जेड़े ऊणे। 26 मरे रे बीचा ते जिऊँदे ऊणे रे बारे रे क्या तुसे मूसे री कताबा रे बलदे ऊए जाड़ा री काणियां रे नि पदेया कि परमेशरे तेसखे बोलेया, ‘आऊँ अब्राहमो रा परमेशर, इसहाको रा परमेशर और याकूबो रा परमेशर ए?’ 27 परमेशर मरेया रा नि, पर जिऊँदेया रा परमेशर ए। तो तुसे बऊत बड़ी पूला रे पड़ी रे।”

ⓂⓂ ⓂⓂ ⓂⓂⓂⓂ ⓂⓂⓂⓂⓂ
(ⓂⓂⓂⓂⓂ 22:34-40; ⓂⓂⓂⓂⓂ 10:25-28)

28 तेबे शास्त्रिया बीचा ते एकी जणे आई की सेयो बईस करदे ऊए सुणे और ये जाणी की कि यीशुए तिना खे खरा जवाब दितेया, तेबे तिने यीशुए ते पूछेया, “सबी ते खास आज्ञा कृण जिए।” 29 यीशुए तेसखे जवाब दितेया, “सबी आज्ञा बीचा ते ये आज्ञा बड़ी ए कि, ‘ओ इस्त्राएल सुण, परभु आसा रा परमेशर एक ई परभु ए’ 30 और तूँ परभु आपणे परमेशरो साथे आपणे पुरे मनो ते, पुरे प्राणो ते, पुरे दमाको ते और आपणी पुरिया तागता ते प्यार राख।’ 31 और दूजी ये कि, ‘तूँ आपणे पड़ोसिये साथे आपू जेड़ा प्यार राख’ इजी ते बड़ी ओर कोई आज्ञा निए।”

32 शास्त्रिए तिना खे बोलेया, “ओ गुरू! बऊत खरा।” तुसे सच बोलेया, “परमेशर एक ईए और परमेशरो खे छाडी की ओर कोई बड़ा निए 33 और तेस साथे पुरे मन, पुरे दमाक और पुरिया तागता साथे प्यार राख और आपणे पड़ोसिये साथे आपू जेड़ा प्यार राख। सारे अवन और बलिदानो ते बड़ी की ए।” 34 जेबे यीशुए देखेया कि तिने समजदारिया साथे जवाब दितेया, तो तेसखे बोलेया, “तूँ परमेशरो रे राज्य ते दूर निए।” तेबे केसी खे बी तिना ते कुछ पूछणे री इम्मत नि ऊई।

ⓂⓂⓂⓂ ⓂⓂⓂⓂⓂ ⓂⓂⓂ Ⓜ
(ⓂⓂⓂⓂⓂ 22:41-46; ⓂⓂⓂⓂⓂ 20:41-44)

35 तेबे यीशुए मन्दरो रे ये उपदेश देदे ऊए बोलेया, “शास्त्री कऊँ बोलोए, कि मसीह दाऊदो रा पाऊ ए? 36 दाऊदे आपू ई पवित्र आत्मा रे परी की बोलेया था कि:

“परभुए मरे परभुए खे बोलेया:

“मरे दाँणे कनारे बैठ

जदुओ तक आऊँ तेरे वैरिया खे

तेरे पैरो निठे नि करी देऊँ।”

37 दाऊद तो आपू ई तेसखे प्रभु बोलोआ, तो आँऊ तेसरा पुत्र कियाँ ऊआ?"

और जो पीड़ा रे लोक थे सेयो तिना री गल्ल खुश ऊई की सुणो थे।

23:1-36; 20:45-47

38 यीशुए तिना खे आपणे उपदेशो रे बोलेया, "शास्त्रिया ते चौकस रओ, जो लाम्बे टाले पईनी की कूमदे रओए और बजारो रे नमस्कार, 39 और प्रार्थना रे कअरो रे खास-खास जगा और पाट्टिया रे खास जगा चाओए। 40 सेयो विदुआ रे कअरो खे खाई जाओए और दखाणे खे मुखती देर तक प्रार्थना करोए, इना खे जादा सजा मिलणी।"

21:1-4

41 यीशु मन्दरो रे दान-पात्रो रे सामणे बैठी की देखणे लगी रे थे कि लोक मन्दरो रे दान-पात्रो रे कियाँ पैसे पाओए और जादा अमीर लोके बऊत पाया। 42 तेबे एक कंगाल विदुआ आई और तेसे दो दमड़िया* पाईया, जो एक तेअले रे बराबर थिया। 43 तेबे यीशुए आपणे चलेया खे बुलाई की बोलेया, "आऊँ तुसा खे सच लगी रा बोलणे कि जिने मन्दरो रे दान-पात्रो रे पाया, तिना बीचा ते एसे कंगाल विदुए सबी ते जादा पाई राखेया। 44 कऊँकि सबी आपणे बऊत सारे खजाने बीचा ते थोड़ा जा पाया, पर एसे आपणी कमिया बीचा ते जो कुछ एसा गे था-मतलब-आपणी सारी कमाई पाई ती।"

13

24:1,2; 21:5,6

1 जेबे यीशु मन्दरो ते निकलने लगी रे थे, तेबे तिना रे चलेया बीचा ते एकी जणे तिना खे बोलेया, "ओ गुरु! देखो, कितणे बड़े-बड़े पात्थर ए और कितणे अच्छे-अच्छे भवन ए।" 2 यीशुए तेसखे बोलेया, "क्या तूँ ये बड़े-बड़े भवन लगी रा देखणे? इदे जो पात्थरो पाँदे पात्थर लगी रे, सब टाले जाणे।"

24:3-14; 21:7-19

3 जेबे यीशु जैतनो रे पाहड़ो पाँदे, मन्दरो रे सामणे थे बैठे रे, तेबे पतरस, याकूब, यूहन्ने और अन्दरियासे तिना ते लग जे जाई की पूछेया, 4 "आसा गे बताओ कि यो गल्ला कदी ऊणिया? और जेस बखते यो गल्ला पुरिया ऊणे वालिया ऊणिया, तेस बखते क्या चिह्न ऊणे?" 5 यीशुए तिना खे बोलेया, "चौकस रओ कि कोई तुसा खे बईकाओ नि। 6 बऊत एड़े ऊणे, जो मेरे नाओँ ते आऊणे और बोलणा, 'आऊँ ई मसीह ए,' और बऊत जणे बईकाणे। 7 जेबे तुसे लड़ाई और लड़ाईया रे बारे रे सुणो, तो कबराणा नि; कऊँकि इना रा ऊणा जरूरी ए, पर तेस बखते अंत नि ऊणा। 8 कऊँकि जातिया पाँदे जातिया और राज्य पाँदे राज्य अमला करना और बऊत जगा दे ईल्लण ऊणे, अकाल पड़ने। ये तो पीड़ा री शुरूआत ई ऊणी।"

9 "पर तुसे आपणे बारे रे चौकस रओ, कऊँकि लोका तुसे पंचायती रे देई देणे और प्रार्थना रे कअरो रे कूटणे और मेरी बजअ ते हाकिमो और राजेया रे सामणे खड़े करने, पर ये तुसा खे सुसमाचार सुनाणे रा मोका ऊणा। 10 पर जरूरी ए कि अंत आऊणे ते पईले सुसमाचार सबी जातिया रे प्रचार ओ। 11 जेबे सेयो तुसा खे लयी जाई की अधिकारिए रे आथो रे देई देओगे, तो पईले तेई चिन्ता नि करनी, 'आसा क्या बोलणा।' पर जो कुछ तुसा गे तेस बखते बताणा, सेई बोलणा, कऊँकि बोलणे वाले तुसे नि ऊणे, बल्कि पवित्तर आत्मा ऊणा। 12 पाईए आपणा पाई और पिते आपणे बच्चे काणे खे देई देणे, बाल-बच्चे आपणे माया-बावा रे खलाफ ऊणे और तिना सेयो कुलवाणे। 13 तुसे मां पाँदे

* 12:42 12:42 दो दमड़िया मतलब दो छोट तांबे रे सिक्के

विश्वास कितेया इजी बजअ ते सबी लोका तुसा ते बैर राखणा, पर जो आखरी तक सबर राखोगा, तेसरा ई उद्धार ऊणा ।

24:15-28; 21:20-24)

14 “पढ़ने वाला समजी लओ। जेबे तुसे तेसा उजाड़ने वाली धृणित चीज जेतेरे बारे दानिय्यल भविष्यवक्ते बोलेया था, जेती ठीक निए तेती मतलब मन्दरो रे खड़ी री देखो, तेबे जो लोक यहूदिया प्रदेशो रे ओ, सेयो पाहूडो खे नठी जाओ। 15 जो कोई छतो पाँदे ओ, सेयो आपणे कअरे कुछ बी लणे खे थाले नि आओ और ना ई पीतरे जाओ 16 और जो कोई डोरूआ रे ओ, सेयो आपणे टाले लणे पीछे नि आटो। 17 तिना दिना रे जो गर्भवती ऊणी और जो दूद पलयाणे वाली ऊणी तिना खे हाय! हाय! 18 प्रार्थना करेया करो कि ये सब कुछ ठण्डी रे दिना रे नि ओ। 19 कऊँकि तेस बखते एडे क्लेशे ऊणे, जो सृष्टिया री शुरूआता दे, जो परमेशरे बणाई थी, आजो तक ना ऊआ और ना कदी फेर ऊणा। 20 और जे प्रभु तिना दिना खे नि कटाँदे, तो कोई प्राणी नि बचणा था; पर तिना परमेशरो रे चुणेया री बजअ ते, सेयो मुश्किल दिन कटाँदेते। 21 तेस बखते जे कोई तुसा खे बोलो, ‘देखो, मसीह एती ये’ या ‘देखो, मसीह तेती ये’ तो विश्वास नि करना। 22 कऊँकि चूटे मसीह और चूटे भविष्यवक्ता खड़े ऊणे और तिना बड़े-बड़े चिह्न और अचम्बे रे काम दखाणे, जे ऊई सको तो जो परमेशरो रे चूणे रे ए, तिना खे बी भरमाई देओ। 23 पर तुसे चौकस रओ। देखो, मैं तुसा खे सारी गल्ला मुसीबत आऊणे ते पईले ई बताई ती रिया।

24:29-31; 21:25-28)

24 “तिना दिना रे, तेस क्लेशो ते बाद सूरजो रा चमकदा प्रयासा न्हेरा पड़ी जाणा और चाँदे प्रयासा नि देणा। 25 और सर्गो ते तारे छुटणे शुरू ऊणे और सर्गो रिया शक्तिया इलाईया जाणिया। 26 तेबे लोका आँऊ माणू रा पुत्र बड़ी सामर्थ और महिमा साथे बादला रे आऊँदे ऊए देखणा। 27 तेस बखते मां आपणे स्वर्गदूत पेजणे और तरतिया रे एकी कनारे ते लई की सर्गो रे दूजे कनारे तक, चऊँ दिशा ते आपणे चूणे रे लोक कटटे करने।

24:32-35; 21:29-33)

28 “दाऊगले रे डालो ते एस उदारणो खे सीखो, जेबे तिजी री डाली नरम ऊई जाओई और पत्ते निकलने लगी जाओए, तो तुसा खे पता लगी जाओआ कि तऊँदी आऊणे वाली ए। 29 ईयां ई जेबे तुसे इना गल्ला खे ऊँदे ऊए देखो, तो समजी जाणा कि एबे आँऊ नेडे ईए, बल्कि द्वारो पाँदे ईए खड़या रा। 30 आऊँ तुसा खे सच लगी रा बोलणे कि जदुओ तक यो सब गल्ला पूरिया नि ऊई जाओगिया, तदुओ तक एसा पीढ़िया रे लोका री मौत नि ऊणी। 31 सर्ग और तरती टली जाओगी, पर मेरा वचन कदी नि टलना।

24:36-40)

32 “यो गल्ला कदी ऊणिया तेस दिनो रे बारे रे या तेसा कअड़िया रे बारे रे कोई नि जाणदा, न स्वर्गदूत और ना पुत्र, पर बस पिता जाणोआ। 33 देखो, जागदे और प्रार्थना करदे रओ; कऊँकि तुसे नि जाणदे कि से बखत कदी जे आई जाणा। 34 ये तेस माणूए री जी दशा ए, जो परदेशो खे जाँदे ऊए आपणा कअर छाडी जाओ और आपणे दासा खे अक्क देई दो और हर एकी खे तेसरा काम बताई देओ और चौकीदार खे जागणे री आज्ञा देओ।

35 “जागदे रओ, कऊँकि तुसे नि जाणदे कि कअरो रा मालक कदी जे आई जाणा, साँजा या आदी राधियो रे या मुर्गे री बांग देणे रे बखते या प्यागा। 36 एड़ा नि ओ कि से केथी अचाणक ई आई जाओ और तुसा खे सऊँदा ऊआ देखो। 37 से जो आऊँ तुसा खे बोलूँआ, सेई सबी खे बोलूँआ कि जागदे रओ!”

14

संस्कृत संस्कृत संस्कृत (12-12)

(संस्कृत 26:1-5; संस्कृत 22:1,2; संस्कृत 11:45-53)

1 दो दिन बाद फसह रा त्योआर और बिना सजेडे री रोटीया रा त्योआर ऊणे वाला था। बडे पुरोईत और शास्त्री एडी गल्ला री टोला रे थे कि कियौं यीशुए खे तोखे रे मरवाईए। 2 पर बोलो थे, "त्योआरो रे दिने नि, केथी एड़ा नि ओ कि लोका बीचे हुडदंग मची जाओ।"

संस्कृत संस्कृत संस्कृत संस्कृत संस्कृत

(संस्कृत 26:6-13; संस्कृत 12:1-8)

3 जेबे यीशु बैतनिय्याह गांव रे शमीन जेसखे पईले कोढ़ था तेसरे कअरे रोटी खाणे बैठे रे थे, तेबे एक जवाणस संगमरमरो रे पांडे (सुराई) रे जटामासिया रा मईगा और साफ इत्र लई की आई और पांडा तोड़ी की इत्र तिना रे सिरा रे लटी ता। 4 तेबे कोई-कोई गुस्सा करी की बोलणे लगे, "एस इत्रो रा सत्यानाश कऊँ कित्तेया? 5 कऊँकि ये इत्र तो तीन सौ चाँदिए रे सिक्केया* रे मोलो ते जादा पैसेया रा बेची की कंगाला खे बांडी सको थे।" सेयो तेसा खे थिड़कणे लगे। 6 यीशुए बोलेया, "एसा खे छाडी देओ। एसा खे कऊँ सताणे लगी रे? एसे तो मां साथे पलाई ए कित्ती री। 7 कंगाल तो तुसा साथे सदा रओए और तुसे जेबे चाओ, तेबे तिना साथे पलाई करी सकोए। पर आऊँ तुसा साथे सदा नि रणा। 8 जो कुछ ये करी सको थी, एसे कित्तेया, एसे मेरे दबाणे री त्यारिया ते पईले ई मेरे शरीरो रे इत्र मलीता। 9 आऊँ तुसा खे सच बोलुँआ कि सारी दुनिया रे जेती, केथी सुसमाचार प्रचार ऊणा, तेती एसा रे एस कामो री र्चा, एसा री यादा रे ऊणी।"

संस्कृत संस्कृत संस्कृत संस्कृत संस्कृत

(संस्कृत 26:14-16; संस्कृत 22:3-6)

10 तेबे यहूदा इस्करियोती, जो बारा चलेया बीचा ते एक था, बडे पुरोईतो गे गया, ताकि यीशु तिना रे आथे पकड़वाया जाओ। 11 सेयो ये सुणी की खुश ऊईगे और तेसखे पैसे देणा मंजूर कित्तेया। तेबे से मोका टोलने लगेया कि यीशुए खे कियौं पकड़वाऊँ।

संस्कृत संस्कृत संस्कृत संस्कृत संस्कृत संस्कृत

(संस्कृत 26:17-25; संस्कृत 22:7-14; संस्कृत 22:21-23; संस्कृत 13:21-30)

12 बिना सजेडे री रोटीया रे त्योआरो रे पईले दिने, जिदे सेयो फसह रे मिन्दूओ रा बलिदान करो थे, तिना रे चले तिना ते पृछेया, "तुसे केयी चाओए कि आसे तुसा खे फसह रे त्योआरो री रोटी खाणे री त्यारी करुँ?" 13 यीशु आपणे चलेया बीचा ते दो जणे ये बोली की पेजे, "नगरो रे जाओ और तेती तुसा खे एक माणूं मिलणा, जिने एक पाणिए रा कअड़ा ऊणा चकेया रा, तेस पीछे चली जाणा 14 और से जेते कअरो रे जाओगा, तेस कअरो रे मालको खे बोलणा, गुरू बोलोआ, "मेरा बैठका रा कमरा, जेती आऊँ आपणे चलेया साथे फसह रे त्योआरो री रोटी खाऊँ, से केयी ए?" 15 तेस तुसा खे एक सजी-सजाई री और त्यार कित्ती री बड़ी बाऊडो दखाणी। तेती आसा खे फसह खाणे री त्यारी करो। 16 तेबे चले निकली की नगरो खे आए और जेड़ा यीशुए तिना खे बोलेया था, तेड़ा ई पाया और फसह रे त्योआरो री रोटी त्यार कित्ती।

17 जेबे साँज ऊई, तेबे यीशु बारा चलेया साथे तेती आए। 18 और जेबे सेयो रोटी खाणे लगी रे थे, तेबे यीशुए बोलेया, "आऊँ तुसा खे सच लगी रा बोलणे कि तुसा बीचा ते एक ए, जो मां साथे रोटी लगी रा खाणे, तेस आऊँ पकड़वाणा।" 19 चले उदास ऊईगे और तिना बीचा ते एक-एक तिना खे पृछणे लगेया, "क्या से आऊँ ए?" 20 यीशुए तिना खे बोलेया, "से बारा बीचा ते एक ए, जो मां साथे थालिया रे आथ पाओआ। 21 आऊँ माणूं रा पुत्र पक्का ई मारेया जाणा जेड़ा मेरे बारे रे पवित्र शास्त्रो रे लिखी राखेया, पर तेस माणूंए खे हाय, जेस आऊँ पकड़वाणा। तेस माणूंए खे खरा था कि से जमदा ई नि।"

* 14:5 14:5 मतलब एकी सालो री मजदूरिया रे बराबर

22 जेबे सेयो खाणे ई लगी रे थे, तेबे यीशुए रोटी लयी और आशीष मांगी की तोड़ी और चलेया

(26:26-30; 22:14-20; 1 11:23-25)

खे दिती और बोलेया, “लओ और खाओ, ये मेरा शरीर ए।” 23 तेबे तिने कटोरा लयी की धन्यवाद कित्तेया और तिना खे दित्तेया और तिने सबी तिजी ते पिया। 24 यीशुए तिना खे बोलेया, “थे मेरा से खून ए, जो परमेशर और तिना रे लोका बीचे नई वाचा ए, और बऊत जणेया रे पापो री माफिया खे बाह्या जाओआ। 25 आऊँ तुसा खे सच बोलूँआ कि मां अँगूरा रा रस तेस दिनो तक फेर कदी नि पीणा, जदुओ तक परमेशरो रे राज्य रे नया नि पीऊँगा।” 26 तेबे सेयो पअजन गायी की बारे जैतूनो रे पाहडो पाँदे गए।

27 तेबे यीशुए तिना खे बोलेया, “तुसे सब माखे छाडी की चली जाणे, कऊँकि लिखी राखेया, भां

(26:31-35; 22:31-34; 13:36-38)

रखवाला काई देणा और पेडा ओरे-पोरे ऊई जाणिया। 28 पर मां मुडदेया बीचा ते जिऊँदा ऊणे ते बाद, तुसा ते पईले गलीलो खे जाणा। 29 पतरसे तिना खे बोलेया, “जे तुसा खे छाडी की सब जणे चली बी जाओ, तेबे बी मां तुसा खे छाडी की कदी नि जाणा।” 30 यीशुए तेसखे बोलेया, “आऊँ ताखे सच लगी रा बोलणे कि आज ई राती रे मुर्गे री दो बार बांग देणे ते पईले तूँ तीन बार माखे जाणने ते मुकरना।” 31 पर पतरसे ओर बी जोर देई की बोलेया, “जे माखे तुसा साथे मरना बी पडो, तो तेबे बी मां तुसा खे ना नि करनी।” ईयां ई ओरी सबी बी बोलेया।

32 तेबे सेयो गतसमनी नाओ री जगारे आए और यीशुए आपणे चलेया खे बोलेया, “जदुओ तक

(26:36-46; 22:39-46)

आऊँ प्रार्थना करूँआ, तदुओ तक तुसे एथी बैठे रे रओ।” 33 यीशु पतरस, यूहन्ना और याकूबो खे आपू साथे लईगे और बऊत ई बेचेन और परेशान ऊणे लगे। 34 तेबे यीशुए तिना खे बोलेया, “मेरा जिऊ बऊत उदास ए, एथो तक कि आऊँ मरने पाँदे ए। तुसे एथी रूको और जागदे रओ।” 35 यीशु थोडे जे आगे गए और जमीना पाँदे पडी की प्रार्थना करने लगे कि, “जे ऊई सको तो ये दुःखो री कअडी मां पाँदो ते टली जाओ।” 36 और बोलेया, “ओ अब्बा! ओ पिता! तुसा ते सब कुछ ऊई सकोआ, एस दुःखो खे मांगा गे ते टाई दे, पर तेबे बी जेडा आऊँ चाऊँआ, तेडा नि, पर जो तुसे चाओए सेई ओ।” 37 तेबे यीशु आए और चले सये रे देखी की पतरसो खे बोलेया, “ओ शमौन तूँ सऊणे लगी रा? क्या तूँ एक कअडी पनि जागी सकेया? 38 जागदे और प्रार्थना करदे रओ, ताकि परीक्षा रे नि पडो; आत्मा तो त्यार ए, पर शरीर कमजोर ए।” 39 यीशु फेर चली गे और सेई प्रार्थना किती। 40 तेबे दूजी बार आई की सेयो सये रे देखे, कऊँकि तिना री आखी रे नीज थी और सेयो नि जाणो थे कि यीशुए खे क्या जवाब देईए। 41 तेबे यीशुए तीजी बार आई की बोलेया, “एबे सऊँदे रओ और आराम करदे रओ, बस से कअडी आईगी री। देखो, आऊँ माणू रा पुत्र पापिया रे आथे पकडवाई जाऊणा। 42 उठो चलो। देखो, माखे पकडवाणे वाला नेडे आईगा रा।”

43 सेयो ये बोलणे ई लगी रे थे कि यहूदा, जो बारा चलेया बीचा ते एक था, से आया। और तेस

(26:47-56; 22:47-53; 18:3-12)

साथे बडे पुरोईत, शास्त्री, और बुजुर्गा री तरफा ते एक बडी पीड, तलवार और डण्डे लयी की फटाफट आईगी। 44 तिना खे पकडवाणे वाले तिना खे बताई ता था, “जेसखे आऊँ नमस्ते करूँ और गले लगूँ, सेई ऊणा और तुसे से पकडी की लई जाणा।” 45 तेबे यहूदा यीशुए गे आया और बोलेया, “ओ गुरू!” और तेसखे नमस्ते किती और गले लगेया। 46 तेबे तिने सेयो आथ पाई की पकडी ले। 47 तिना बीचा ते जो नेडे खडी रे थे, एकी जणे तलवार खिंजी की प्रदान पुरोईतो रे दासो पाँदे चलाई और तेसरा कान ऊडाई ता। 48 यीशुए तिना खे बोलेया, “क्या तुसे आऊँ डाकू समजी राखेया, जो

माखे पकड़ने री तँई डण्डे और तलवारी लई की आई रे? 49 आऊँ तो हर दिन तुसा साथे मन्दरो रे उपदेश देऊँ था और तेबे तो तुसे आऊँ नि पकड़ेया। पर ये सब कुछ तेबे ऊआ, ताकि पवित्र शास्त्रो रे मेरे बारे जो गल्ल भविष्यवक्ते लिखी राखी थी, से पूरी ओ।” 50 तेबे तिना रे सारे चले तिना खे छाडी की नटीगे।

51 तेबे एक जवान आपणे नांगे शरीरो रे चादर टखी की तिना पीछे-पीछे चली गा और लोके से चेला समजी की पकड़ी ता। 52 पर से चादर छाडी की नांगा ई नटी गा।

ⓂⓂⓂⓂ ⓂⓂ ⓂⓂⓂⓂ ⓂⓂⓂⓂ

(ⓂⓂⓂⓂⓂ 26:57-68; ⓂⓂⓂⓂ 22:54-55; ⓂⓂⓂⓂ 22:63-71; ⓂⓂⓂⓂⓂⓂ 18:13-14; ⓂⓂⓂⓂⓂⓂ 18:19-24)

53 तेबे सेयो यीशुए खे बड़े पुरोईतो रे कअरे लईगे और सब प्रदान पुरोईत, शास्त्री और बुजुर्ग तेसगे कट्टे ऊईगे। 54 पतरस दूरो तेई तिना पीछे-पीछे प्रदान पुरोईतो रे आँगणो रे पीतरो तक गया और चौकीदारा साथे वैठी की आग सेखणे लगेया। 55 बड़े पुरोईत और सारी बड़ी सभा यीशुए खे काणे री तँई, तिना रे खलाफ गवाई लगी रे थे टोलने, पर मिली नि। 56 कऊँकि बऊत जणे तिना रे खलाफ चूठी गवाई लगी रे थे देणे, पर तिना री गवाई एक जेड़ी नि थी। 57 तेबे बऊत जणेया तिना रे खलाफ ये चूठी गवाई दिती कि 58 “आसे ये, ए बोलदे ऊए सुणी राखेया, भां ये आथो साथे बणाया रा मन्दर टाली देणा और तीजे दिने दूजा बणाई देणा, जो आथो साथे नि बणे रा ऊणा।” 59 एते पाँदे बी सबी री गवाई एक जेड़ी नि निकली।

60 तेबे प्रदान पुरोईते, बीचे खड़े ऊई की, यीशुए ते पूछेया, “क्या तूँ कोई जवाब नि देणा चांदा? यो लोक तेरे बारे रे क्या गवाई लगी रे देणे?” 61 पर यीशु चुप राए और कुछ बी जवाब नि दितेया। प्रदान पुरोईते तिना ते फेर पूछेया, “क्या तूँ परमधन्य परमेशरो रा पुत्र मसीह ए?” 62 यीशुए बोलेया, “आ, आऊँ आए; और तुसा आऊँ माणूँ रा पुत्र सर्वशक्तिमानो रे दाँणे कनारे बैठे रा और सर्गो रे बादलो पाँदे आऊँदा ऊआ देखणा।” 63 तेबे प्रदान पुरोईते आपणे टाले फाड़ी की बोलेया, “एबे आसा खे गवाओ रा क्या काम ए? 64 तुसे ये निन्दा सुणी, तुसा री क्या राय ए?” तिने सबी बोलेया, “ये तो काणे जोगा ए।” 65 तेबे कोई तिना पाँदे थूकणे लगे, कोई मूँ टखणे लगे, कोई मुक्के बाणे लगे और तिना ते बोलणे लगे, “भविष्यवाणी कर।” और सिपाई तिना खे पकड़ी की थप्पड़ बाणे लगे।

ⓂⓂⓂⓂ ⓂⓂ ⓂⓂⓂⓂⓂ

(ⓂⓂⓂⓂⓂ 26:69-75; ⓂⓂⓂⓂ 22:56-62; ⓂⓂⓂⓂⓂⓂⓂ 18:15-18,25-27)

66 जेबे पतरस आँगणो रे था, तेबे प्रदान पुरोईतो री दासिया बीचा ते एक तेती आई 67 और जेबे पतरस आग सेखणे लगी रा था, तेबे से तेसखे टकटक करी की देखणे लगी और बोलणे लगी, “तूँ बी तो तेस यीशु नासरियो साथे था।” 68 से मुकरी गा, और बोलणे लगेया, “आऊँ तो नि जाणदा और मेरी समजा रे नि आऊँदा कि तूँ क्या लगी री बोलणे।” तेबे से बारे देऊलिया गे गया और मुर्गे बांग दिती। 69 तेबे से दासी फेर तेसखे देखी की, जो तेती नेड़े खड़ी रे थे, तिना गे बोलणे लगी, “ये तो तिना बीचा ते एक ए।” 70 पर से फेर मुकरी गा और थोड़ी देर बाद जो तेती खड़ी रे थे, तिने फेर पतरसो खे बोलेया, “पक्का तूँ तिना बीचा ते एक ए, तूँ बी तो गलीली ए, कऊँकि तेरी बोलिया ते तूँ गलीली लगेआ।” 71 तेबे से आपू खे कोसणे लगेया और कसम खाणे लगेया, “जेस माणूँए रे बारे रे तुसे बोलणे लगी रे, आऊँ तेसखे बिल्कुल पनि जाणदा।” 72 तेबे तेबुई मुर्गे दूजी बार फेर बांग दिती। तेबे पतरसो खे से गल्ल, जो यीशुए तेसखे बोली थी, याद आई कि, “मुर्गे री दो बार बांग देणे ते पईले तूँ तीन बार माखे जाणने ते मुकरना।” तेबे से एसा गल्ला सोची की जोरे-जोरे की रोणे लगेया।

15

ⓂⓂⓂⓂⓂⓂⓂ ⓂⓂⓂⓂ ⓂⓂⓂⓂ

(ⓂⓂⓂⓂⓂ 27:1-2,11-14; ⓂⓂⓂⓂ 23:1-5; ⓂⓂⓂⓂⓂⓂⓂ 18:28-38)

1 प्यागा ऊँदे ई फटाफट बड़े पुरोईत, बुजुर्ग, शास्त्री और सारी बड़ी सभा सलाह किती कि एस साथे क्या करिए। तेबे यीशु बानी ते और तिना खे लईगे और पिलातुस हाकिमो रे आथो रे देई ते। 2 तेबे पिलातुसे तिना ते पूछेया, “क्या तूँ यहूदिया रा राजा ए?” यीशुए तेसखे बोलेया, “तूँ आपू ई लगी रा बोलणे।” 3 बड़े पुरोईत तिना पाँदे बऊत दोष लगाणे लगी रे थे। 4 पिलातुसे तिना ते फेर पूछेया, “क्या तांगे कोई जवाब ए देणे खे? देख, यो तां पाँदे कितणे दोष लगी रे लगाणे।” 5 यीशुए फेर बी कुछ जवाब नि दित्तेया। ये देखी की पिलातुस हैरान ऊईगा।

पूरा पाठ पढ़ें

(**पूरा पाठ पढ़ें** 27:15-26; **पूरा पाठ पढ़ें** 23:13-25; **पूरा पाठ पढ़ें** 18:39; **पूरा पाठ पढ़ें** 19:16)

6 पिलातुस हर साल फसह रे त्योआरो रे एकी कैदियो खे, जेसखे सेयो बोलो थे, तिना खे छाडी देओ था। 7 तेस बखते बरअब्बा नाओं रा एक माणू तिना हुइदंग करने वालेया साथे जेला रे था, जिने दंगेया रे अत्या किती थी। 8 तेबे पीड ऊबे जाई की तेसते विनती करने लगी, “जेडा तुसे आसा खे करदे आए, तेडा ई करो।” 9 पिलातुसे तिना खे बोलेया, “क्या तुसे ये चाओए कि आऊँ तुसा खे यहूदिये रे राजे खे छाडी देऊँ?” 10 पिलातुस जाणो था कि बड़े पुरोईते यीशुए ते जलन राखोए, तेबेई तिने से पकड़वाया। 11 पर बड़े पुरोईते लोक ऊकसाए, “बरअब्बे खे आसा खे छाडी देओ।” 12 ये सुणी की पिलातुसे तिना ते फेर पूछेया, “जेसखे तुसे यहूदिया रा राजा बोलोए, तेस साथे क्या करूँ?” 13 सेयो ओर बी चिंगणे लगे, “एसखे करूसो पाँदे चढ़ाओ।” 14 पिलातुसे तिना खे बोलेया, “करूँ?, इने क्या बुरा करी राखेया?” पर सेयो और बी चिंगणे लगे, “एसखे करूसो पाँदे चढ़ाओ।” 15 तेबे पिलातुसे पीडा खे खुश करने री ईच्छा ते बरअब्बा तिना खे छाडीता, और यीशुए खे कोडे लगवाई की तिना गे सम्बाली ता कि करूसो पाँदे चढ़ाया जाओ।

पूरा पाठ पढ़ें

(**पूरा पाठ पढ़ें** 27:27-31; **पूरा पाठ पढ़ें** 19:2,3)

16 तेबे रोमी सिपाई यीशुए खे पीतरे आँगणो दे लईगे, जेतेखे परीटोरियुम राज्यपालो रा मुख्यालय बी बोलोए, और सारी सिपाईया री पलटण बुलाई। 17 तेबे तिने यीशुए खे बैगणी टाले पणयाए और कांडेया रा मुकट बूणी की तिना रे सिरो पाँदे राखी ता। 18 और तिना खे ये बोली की तिना रा मजाक उड़ाणे लगे, “हे यहूदिया रे राजा, नमस्कार।” 19 सेयो तिना रे सिरो पाँदे नगलो रे डण्डे की वाओ थे, तिना पाँदे थुको थे और कूटणे टेकी की माथा टेको थे। 20 जेबे सेयो तिना रा मजाक उड़ाई चूके, तेबे तिना पाँदो ते बैगणी टाले खुलाई ते और तिना रेई टाले पणयाईते और यीशुए खे करूसो पाँदे चढ़ाणे खे बारे ली आए।

पूरा पाठ पढ़ें

(**पूरा पाठ पढ़ें** 27:32-44; **पूरा पाठ पढ़ें** 23:26-43; **पूरा पाठ पढ़ें** 19:17-27)

21 जेबे सेयो यीशुए खे करूसो पाँदे चढ़ाणे खे लयी चली रे थे। तेबे सिकन्दर और रूफुसो रा पिता, शमौन नाओं रा एक कुरेनी माणू, जो दूजे गांव ते आऊणे लगी रा था, तेसी बखते से तिसिये निकलेया। तेबे सिपाईए से ईयां ई पकड़ी ता कि यीशु रा करूस चकी की लई चल। 22 तेबे सेयो यीशुए खे गुलगुता नाओं री जगा रे पकड़ी की लईगे, जेतेखे खोपड़िया री जगा बी बोलोए। 23 तेबे सेयो तिना खे मुरं नाओं री जड़ी बूटी मलाई की अँगूरा रा रस पीणे खे देणे लगे, पर तिने नि पिया। 24 तेबे तिने यीशु करूसो पाँदे चढ़ाए और तेबे तिना रे टाले रिया चिट्ठिया पाईया कि केशी खे क्या मिलणा, और सेयो बांडी ते। 25 तेबे प्यागा रे नौ बजे रा बखत था, जेबे तिने सेयो करूसो पाँदे चढ़ाई ते। 26 और तिना रा दोष-पत्र लिखी की करूसो पाँदे तिना पाँदे लगाई ता कि “यहूदिया रा राजा।”

27 तेबे तिने दो डाकू, एक तिना रे दाँणे कनारे और एक सूँजे कनारे, करूसो पाँदे चढ़ाए। 28 तेबे धर्मशास्त्रो रा से वचन कि, “से अपराधिया साथे गिणेया जाणा” पूरा ऊआ। 29 बाटा रे जाणे वाले सिर इलाई-इलाई की ये बोली की तिना री निन्दा करो थे, “वाह! मन्दरो खे टालने वाले और तीन दिना रे बनाणे वाले, 30 करूसो पाँदा ते उतरी की आपणे आपू खे बचा।” 31 ईयां ई बड़े पुरोईत बी,

शास्त्रिया साथे, आपू बीचे मजाक करो थे, “इने ओर तो बचाए, पर आपू खे नि बचाई सकेया।³² इस्राएलो रा राजा मसीह, एबे कुरूसो ते ऊतरी की तो आओ, ताकि आसे बी देखी की विश्वास करिए।” जो तिना साथे कुरूसो पाँदे चढ़ाए राखे थे, सेयो बी तिना री निन्दा करो थे।

ⓂⓂⓂⓂ ⓂⓂ ⓂⓂⓂⓂ ⓂⓂⓂⓂ

(ⓂⓂⓂⓂ 27:45-56; ⓂⓂⓂⓂ 23:44-49; ⓂⓂⓂⓂⓂⓂ 19:28-30)

³³ और जेबे त्याड़ी ऊई, तेबे सारे देशो रे न्हेरा ऊईगा और तीजे पईरो तक रया।³⁴ तीजे पइरो रे यीशुए जोरे की बोलेया, “इलोई, इलोई लमा शबक्तनी?” जेतेरा मतलब ए, “ओ मेरे परमेशर, ओ मेरे परमेशर! तुसे आऊँ कऊँ छाडीता?”³⁵ जो नेडे थे खडे रे, तिना बीचा ते कुछ जणेया ये सुणी की बोलेया, “देखो, ये एलिय्याहो खे आक्का पाणे लगी रा।”³⁶ तेबे एकी जणे दौड़ी की स्पंज सिरके रे डबोया और नगलो रे डण्डे पाँदे राखेया और तिना खे चुसाया, और बोलेया, “चलो थोड़ा रूकी कि देखूँ कि एलिय्याह एसखे उतारने आओआ कि नि।”³⁷ तेबे यीशुए जोरे की चींगी की प्राण छाडी ते।

³⁸ तेबे मन्दरो रा पइदा पाँदो ते लई की थालो तक फटीगा और तिजी रे दो टुकडे ऊईगे। ए ये दखाओ कि एबे कोई बी माणू परमेशरो री हजुरिया रे जाई सकोआ।^{*}³⁹ जो सूबेदार तेती था खडे रा, जेबे तिने यीशु ईयां चींगी की प्राण छाडडे ऊए देखे, तो तेबे तिने बोलेया, “सच्ची ये तो परमेशरो रा पुत्र था।”

⁴⁰ कुछ जवाणसा दूरो ते देखणे लगी री थिया, तिना बीचा ते मरियम मगदलिनी और छोटे याकूब और योसेसो री आम्मा मरियम और सलोमी थिया।⁴¹ जेबे यीशु गलील प्रदेशो रे थे, तेबे सेयो तिना पीछे-पीछे जाओ थिया और तिना री सेवा करो थिया, ओर बी कई जवाणसा थिया, जो तिना साथे यरूशलेम नगरो रे आईया थिया।

ⓂⓂⓂⓂ ⓂⓂ ⓂⓂⓂⓂ

(ⓂⓂⓂⓂ 27:57-61; ⓂⓂⓂⓂ 23:50-56; ⓂⓂⓂⓂⓂⓂ 19:38-42)

⁴² जेबे साँज ऊई, तेबे, कऊँकि से त्यारिया रा दिन था, जो आरामो रे एक दिन पईले ओआ,⁴³ तेबे अरिमतियाह रा रणे वाला यूसुफ आया, जो बड़ी सभा रा खास जाणेया-मानेया रा सदस्य था और आपू बी परमेशरो रे राज्य री बाट न्यालो था। से याओ करी की पिलातुसो गे गया और यीशुए री लोथ मांगी।⁴⁴ पिलातुस हैरान ऊईगा कि से ईतणे चट मरी गा; तेबे तिने सूबेदार बुलाया और तेसते पूछेया, “क्या यीशु सच्ची मरी गा?”⁴⁵ जेबे तिने सूबेदारो ते सारा आल जाणी ला, तेबे पिलातुसे लोथ यूसुफो खे दलाई ती।⁴⁶ तेबे तिने एक मलमलो री चादर खरीदी और लोथ ऊतारी की चादरी रे लपटी और कबरा रे राखी, जो चट्टानी रे थी खणी री। तेबे कबरा रे द्वारो पाँदे एक पात्थर खसकेईता।⁴⁷ तेबे मरियम मगदलिनी और योसेसो री आम्मा मरियम देखणे लगी री थिया कि तिने यीशुए री लोथ केयी राखी रिये।

16

ⓂⓂⓂⓂ ⓂⓂ ⓂⓂⓂⓂ ⓂⓂⓂⓂⓂⓂ ⓂⓂ

(ⓂⓂⓂⓂ 28:1-8; ⓂⓂⓂⓂ 24:1-12; ⓂⓂⓂⓂⓂⓂ 20:1-10)

¹ जेबे आरामो रा दिन बीती गा, तेबे मरियम मगदलिनी और याकूबो री आम्मा मरियम और सलोमिए, अच्छी बासी वालिया चीजा मोले लईया, ताकि आई की तिना पाँदे मलिए।² और अफते रे पईले दिने, जेबे प्याग ऊई और सूरज निकलेया ई था, तेबे सेयो कबरा गे आईया।³ और आपू बीचे बोलणे लगीया, “आसा खे कबरा रे द्वारो पाँदो ते पात्थर केस टाणा?”⁴ जेबे तिने आखी चकिया तो देखेया कि पात्थर तो कनारे टाये राए। कऊँकि से बऊत बड़ा था।⁵ तेबे कबरा रे पीतरे जाई की तिने एक जवान सफेद टाले पइने रा और दाणे कनारे बैठे रा देखेया और सेयो बऊत हैरान ऊई गया।⁶ तिने तिना खे बोलेया, “डरो नि। तुसे जेस यीशु नासरिये खे, जो कुरूसो पाँदे लटकाया

* 15:38 15:38 ए ये दखाओ कि एबे कोई बी माणू परमेशरो री हजुरिया रे जाई सकोआ

था, टोलने लगी रिया। से जिऊँदा ऊईगा रा, से एती निए देखी लो; ये सेई जगा ए जेती से राखी राखेया था। ⁷ पर तुसे जाओ और तिना रे चलेया खे और पतरसो खे बोलो, 'सेयो तुसा ते पईले गलील प्रदेशो रे पऊँछी जाणे, जेड़ा तिने तुसा खे बोलेया था, तुसा से तेथी देखणा।' ⁸ तेवे सेयो कबरा गे ते नठी गया, कऊँकि सेयो कबराई गया थिया और तिना रे थुरनी छूटी गी थी, तिने डरो रे मारे केसी गे कुछ नि बोलेया।

मरकुस 28:9-10; मरकुस 20:11-18

⁹ अफते रे पईले दिने प्यागा ई, जेवे यीशु मरे रेया बीचा ते जिऊँदे ऊए तेवे सबी ते पईले मरियम मगदलिनिया खे दिशे। पईले जेसा ते तिने सात दुष्टात्मा निकयालिया थिया। ¹⁰ तेसे जाई की तिना रे चलेया गे, जो बऊत दुःखी थे और रोणे लगी रे थे, तिना गे समाचार सुणाया। ¹¹ पर तिने मरियम मगदलीनिया री गल्ला पाँदे विश्वास नि कित्तेया कि यीशु जिऊँदे ऊईगे रे और तेसे सेयो देखे।

मरकुस 24:13-35

¹² तिजी ते बाद यीशु दूजे रूपो रे तिना बीचा ते दूई जणेया खे दिशे, जेवे सेयो गांव खे जाणे लगी रे थे। ¹³ तिने बी जाई की ओरी खे समाचार दित्तेया, पर तिने तिना पाँदे बी विश्वास नि कित्तेया।

मरकुस 28:16-20; मरकुस 24:36-49; मरकुस 20:19-23; मरकुस 1:6-8

¹⁴ बादो ते यीशु तिना ग्यारा चलेया खे बी दिशी गे, जेवे सेयो रोटी लगी रे थे खाणे और तिना रे अविश्वासो और काठे मनो खे लवामा दित्तेया, कऊँकि जिने सेयो जिऊँदे ऊणे ते बाद देखे थे, तिने तिना रा विश्वास नि कित्तेया। ¹⁵ यीशुए तिना खे बोलेया, 'तुसे सारी दुनिया रे जाई की सारी सृष्टिया रे लोका खे सुसमाचार प्रचार करो। ¹⁶ जेस विश्वास करना और बपतिस्मा लणा, तेसरा ई उद्धार ऊणा, पर जेस विश्वास नि करना से दोषी ठईराया जाणा। ¹⁷ और विश्वास करने वालेया रे ये चिह्न ऊणे कि तिना मेरे नाओ ते दुष्टात्मा निकयालनिया; नई-नई पाषा बोलणिया; ¹⁸ साप चकी देणे और जे सेयो नाश करने वाली चीज बी पी लओगे, तो तेवे बी तिना खे कुछ नि ऊणा, तिना बमारा पाँदे आथ राखणा और सेयो ठीक ऊई जाणे।'

मरकुस 24:50-53; मरकुस 1:9-11

¹⁹ तिना साथे गल्ला करने ते बाद प्रभु यीशु स्वर्गो खे चकी ते और सेयो परमेशरो रे दाँणे कनारे बैठे। ²⁰ तेवे चलेया हर जगा प्रचार कित्तेया, प्रभु तिना साथे काम करदे रए, और तिना चिह्न साथे, जो साथे-साथे ऊणे लगी रे थे, और ये सामणे ल्याऊँदे रए कि परमेशरो रा ये सन्देश सच्चा ए। आमीन्।

लूका लूके रा लिखेया रा सुसमाचार

??????

लूका रचित सुसमाचार यीशुए खे इसराएलो री प्रतिज्ञा याद करने वाला उद्धारकर्ता और सारी मानव जातिया रे उद्धारकर्ता दूई रेई रूपो रे दखाओआ। लूका लिखोआ कि यीशु कंगाला खे सुसमाचार सुनाणे खे प्रभुए री आत्मे बुलाई राखेया था। इजी बजअ ते ये सुसमाचार कई प्रकारा रिया समस्या रे पड़े रे लोका रिया चिन्ता ते फरी रा। लूका रचित सुसमाचारो रे खुशिया साथे फरे री खासियत ए, खास करी की शुरूओ रे पाठा रे, जिना रे यीशुए रे आऊणे री घोषणा करी राखी और आखरी रे बी जेती यीशुए रे स्वर्गो रे जाणे रा वर्णन ए। यीशुए रे स्वर्गो रे जाणे ते बाद मसीही विश्वासो रा विकास और विस्तारो रा खुलासा एस ई लेखको रे जरिए प्रेरितों रे काम नाओं री कतावा रे देई राखेया।

दूजे और छुटे पाअगो रे (धाले दित्ती री रूप-रेखा रे देखो) वर्णित बऊत सारिया गल्ला बस एते सुसमाचारो रेईए। उदारणो खे-यीशुए रे जन्मो पाँदे स्वर्गदूता रा गीत, ग्वालेया रा यीशुए खे देखणे जाणा, यरूशलेमो रे मन्दरो रे बालक यीशु, कृपालु सामरी और उडाऊ पुत्रो रे उदारण बगेरा। सारे सुसमाचारो रे प्रार्थना, पवित्र आत्मा, यीशुए री जनसेवा रे जवाणसा री भूमिका और परमेशरो रे जरिए पापो री माफिया पाँदे बऊत जादा जोर देई राखेया।

रूप-रेखा

भूमिका 1:1-4

यूहन्ना बपतिस्मा देणे वाला, यीशुए रा जन्म और बचपन 1:5-2:52

यूहन्ना बपतिस्मा देणे वाले री जनसेवा 3:1-20

यीशुए रा बपतिस्मा और परीक्षा 3:21-4:13

गलीलो रे यीशुए री जनसेवा 4:1-9:50

गलीलो ते यरूशलेमो तक सफर 9:51-19:27

यरूशलेमो रे आखरी अफ्रता 19:28-23:56

प्रभुए रा दुबारा जिऊंदा ऊणा, दिशणा और स्वर्गो खे जाणा 24:1-53

??????

1 बऊत जणेया सेयो गल्ला, जो आसा बीचे ओईया, इतियास लिखणे रे आसा री मताद किती, 2 जेडा कि पईले ई तिने जो इना गल्ला खे देखणे वाले और वचनो खे मानणे वाले सेवक थे, आसा गे पऊँछाईया। 3 तेबेई तो, ओ श्रीमान थियुफिलुस! माखे बी ये ठीक लगेया कि तिना सबी गल्ला रा सारा आल शुरूओ तेई ठीक-ठीक पता लगाई की तिना ताखे एक-एक करी की लिखूँ। 4 ताकि तूँ ये जाणी लो कि यो गल्ला, जिना री तैँ शिक्षा पाई राखी, केडिया अटल ए।

???????? ?? ???? ?? (????) ?????

5 यहूदिया प्रदेशो रे राजा हेरोदेसो रे बखते अबिय्याहो रे दलो रे जकरयाह नाओं रा एक पुरोईत था और तेसरी लाडिया रा नाओं इलीशिवा था। ये दोनो लाडा-लाडा हारूणो रे कुलो रे थे। 6 सेयो दोनो परमेशरो सामणे तर्मी थे और परमेशरो री सारी आज्ञा और बिधिया पाँदे निर्दोष चलो थे। 7 तिना रे कोई ल्वाद नि थी, कऊँकि इलीशिवा बाँझ थी और सेयो दोनो स्याणे ऊईगे थे।

8 एक दिन जेबे जकरयाह आपणे दलो री बारिया पाँदे परमेशरो सामणे पुरोईतो रा काम करो था। 9 तेबे पुरोईता री रवाजा रे मुताबिक, तेसरे नाओं री चिट्ठी निकली, कि परमेशरो रे मन्दरो रे जाई की तूप बाल। 10 और तूप बालने रे बखते, लोका री सारी मण्डली बारे मन्दरो रे आँगणो रे प्रार्थना करने लगी री थी। 11 तेबे जकरयाहो खे प्रभुए रा स्वर्गदूत तूपो री वेदिया रे दाँणे कनारे खडेया रा दिशेया।

12 जकरयाह तेसखे देखी की कवराईगा और बऊत डरीगा। 13 पर स्वर्गदूते तेसखे बोलेया, “ओ जकरयाह! डर नि, कऊँकि परमेशरे तेरी प्रार्थना सुणी ली री और जो तेरी लाड़ी इलीशिबा ए, तेसा रे ताखे एक पाऊ जमणा और तें तेसरा नाओं यूहन्ना राखणा। 14 ताखे आनन्द और खुशी ऊणी और बऊत सारे लोक तेसरे जमणे ते खुश ऊणे। 15 कऊँकि से परमेशरो सामणे महान ऊणा, तेस अँगूरा रा रस और शराब कदी नि पीणा और से आपणी माया रे गर्भो तेई पवित्तर आत्मा ते परेया रा ऊणा। 16 तेस इस्राएलो वीचा ते कई जणे, तिना रे प्रभु परमेशरो री तरफा खे फेरने। 17 से एलिय्याह री आत्मा और सामर्था रे ऊई की तेसरे आगे-आगे चलणा ताकि पितरा रा मन बाल-बच्चेया री तरफा खे फेरो। आज्ञा नि मानणे वालेया खे तर्मिया री समजा रे ल्याओ और प्रभुए खे एक लायक प्रजा त्यार करो।”

18 जकरयाहे स्वर्गदूतो ते पूछेया, “ये आऊँ कियाँ जाणुँ कि एडा ई मां साथे ऊणा? कऊँकि आऊँ और मेरी लाड़ी तो स्याणे ऊईगे रे।” 19 स्वर्गदूते तेसखे बोलेया, “आऊँ जिवराईल ए, जो परमेशरो सामणे खड़ा रओआ। आऊँ तां साथे गल्ला करने और ये सुसमाचार सुनाणे रिया तँई पेजी राखेया 20 और देख जदुओ तक यो गल्ला पूरिया नि ऊई जाओगिया, तदुओ तक तूँ चुप रणा और बोली नि सकदा। कऊँकि तें मेरिया गल्ला पाँदे कि सेयो आपणे बखते पूरिया ऊणिया, विश्वास नि कितेया।” 21 लोक जकरयाहो खे न्यालदे रए और हैरान ऊईगे कि तेसखे मन्दरो रे इतणी देर कियाँ ऊईगी? 22 जेबे से बारे आया, तेबे से तिना साथे गलाई नि संकेया, तेबे तिना खे पता लगी गा कि तिने मन्दरो रे कोई दर्शन पाई राखेया, से तिना साथे साअरे रे गल्ला करदा रया और गूंगा ऊईगा। 23 जेबे मन्दरो रे तेसरे पुरोईतो रे कामो री सेवा करने रे दिन पूरे ऊईगे, तेबे से यरूशलेमो नगरो खे छाड़ी की आपणे कअरो खे चली गा।

24 तेबे तेसरी लाड़ी इलीशिबा गर्भवती ऊईगी और पाँज मीन्ने तक आपू खे कअरे ये बोली की लकोए रे राखेया, 25 “माणूए जो मेरी बेज्जती करी राखी, तिजी खे दूर करने खे, परमेशरे मां पाँदे कृपा करने खे एडा करी राखेया।”

CHAPTER 12

26 इलीशिबा रे गर्भावस्था रे छट्टुए मीन्ने परमेशरो री तरफा ते जिवराईल स्वर्गदूत गलील प्रदेशो रे नासरत नाओं नगरो रे, 27 एक कुआँरिया गे पेजेया। तेसारी मंगणी यूसुफ नाओं रे दाऊदो रे कराने रे एक माटे साथे ऊई थी। तेसा कुआँरिया रा नाओं मरियम था। 28 स्वर्गदूते तेसा गे पीतेरे आयी की बोलेया, “खुशी और जय तेरी ओ, जेस पाँदे परमेशरो री कृपा ऊई री, प्रभु तां साथे ए।” 29 से तेस वचनो ते बऊत कवराई गी और सोचणे लगी कि ये केड़ी गल्ल ए? 30 स्वर्गदूते तेसा खे बोलेया, “ओ मरियम! डर नि कऊँकि परमेशरो री कृपा तां पाँदे ऊई री। 31 देख, तूँ गर्भवती ऊणी, तेरे एक पाऊ जमणा और तें तेसरा नाओं यीशु राखणा। 32 से महान ऊणा, और परमप्रदानो रा पुत्र ऊणा और प्रभु परमेशरे तेसरे पुरखा दाऊदो रा सिंहासन तेसखे देणा। 33 और तेस याकुबो रे कराने रे सदा राज्य करना और तेसरे राज्य रा अंत कदी नि ऊणा।” 34 मरियमे स्वर्गदूतो खे बोलेया, “ये कियाँ ऊणा? आऊँ तो मर्दो खे जाणदी ई नि, कऊँकि आऊँ तो एवु कुँवारी ए।” 35 स्वर्गदूते तेसा खे जवाब दितेया, “पवित्तर आत्मा तां पाँदे उतरना और परमप्रदानो री सामर्थ तां पाँदे छाँयाँ करनी, तेबेई तो से, जो जमणे वाला ए, तेसखे पवित्तर और परमेशरो रा पुत्र बोलेया जाणा। 36 देख, तेरे टव्वरो री इलीशिबा रे वी स्याणदे बखते पाऊ ऊणे वाला ए। ये तेसा रा, जेसा खे बाँझ बोलोए, छुटा मीन्ना चली रा। 37 कऊँकि परमेशर सब कुछ करी सकोआ।” 38 मरियमे बोलेया, “देख, आऊँ परमेशरो री दासी ए, मां साथे तेरे वचनो रे मुताबिक ओ।” तेबे स्वर्गदूत तेसा गे ते चली गा।

CHAPTER 13

39 तिना दिना रे मरियम उठी की फटाफट पाहूडी इलाके रे यहूदा प्रदेशो रे एक नगरो खे गई 40 और तेसे जकरयाहो रे कअरे जाई की इलीशिबा खे नमस्ते किती। 41 जियाँ ई इलीशिबे मरियमा री नमस्ते सुणी, तियाँ ई बच्चा तेसा रे पेटो रे उटकेया और इलीशिबा पवित्तर आत्मा ते फरी गी। 42 तेबे तेसे मरियमा खे जोरे की बोलेया, “तूँ सबी जवाणसा वीचे धन्य ए और जेस बच्चे खे तां जन्म

देणा से बी धन्य ए। 43 ये कृपा मां पाँद केथा ऊई कि मेरे प्रभुए री आम्मा मांगे आयी? 44 जियाँ ई में तेरी नमस्ते सुणी, तियाँ ई बच्चा मेरे पेटो रे खुश ऊई की उटकणे लगेया। 45 धन्य ए से, जिने विश्वास कित्तेया कि जो गल्ला प्रभुए री तरफा ते तेसा गे बोलिया, सेयो पुरिया ऊणिया।”

~~~~~

46 तेबे मरियम बोलया,

“मेरा प्राण प्रभुए री बढ़ाई करोआ।

47 और मेरी आत्मा मेरा उद्धार करने वाले परमेशरो ते खुश ए।

48 कऊँकि तिने आपणी दासिया कनारो खे देखेया,  
तेबेई तो, देखो, आजो ते सारे जुगा-जुगा रे लोका माखे धन्य बोलणा।

49 कऊँकि तिने शक्तिमाने मेरे बड़े-बड़े काम करी राखे  
और तेसरा नाओं पवित्तर ए।

50 तेस परमेशरो री दया, जो तेसते डरोए,  
पीढ़िया री पीढ़िया तक बणी री रओई।

51 तिने आपणे आथो रे जरिए सामर्था रे काम दिखाए  
और जो आपू खे बड़ा समजोए, सेयो रूलाई ते।

52 तिने राजेया रा राज खत्म करी ता  
और शरीफ ऊच्चे कित्ते।

53 तिने पूखे अच्छी चीजा ते रजाए  
और अमीर खाली आथे निकयाली ते।

54 तिने आपणा सेवक इस्राएल सम्बाली ता।  
ताकि आपणी तेसा दया रे वादे खे याद करूँ,

55 जो अब्राहम और तेसरे कुलो पाँद सदा रणी,  
जेड़ा तिने म्हारे बाओ-दादेया खे बोलेया था।”

56 मरियम तकरीबन तीन मीन्ने तक तेती रई और तेबे कअरो खे चली गी।

~~~~~

57 तेबे इलीशिबा रे बच्चा पैदा करने रा बखत पूरा ऊईगा और तेसा रे एक पाऊ जम्मेया। 58 तेसा रे पड़ोसी और टब्बरो वालेया जेबे ये सुणेया कि प्रभुए तेसा पाँद बड़ी पारी दया करी राखी, सेयो तेसा साथे बऊत खुश ऊए।

59 तेबे एड़ा ऊआ कि सेयो आटुए दिने बालको रा खतना करने आए और तेसरा नाओं, तेसरे बाओ रे नाओं पाँद जकरयाह राखणे लगे। 60 तेबे बच्चे री आम्मे बोलेया, “ना; एसरा नाओं यूहन्ना राखणा।” 61 तेबे तिने बोलेया, “तेरे टब्बरो रे एड़ा नाओं केली रा निए।” 62 तेबे तिने तेसरे बाओ ते साअरे रे पूछेया, “तूँ एसरा क्या नाओं राखणा चाएया?” 63 तेबे तिने लिखणे री पट्टी मुंगाई की लिखी ता, “एसरा नाओं यूहन्ना ए” और सब हैरान ऊईगे। 64 तेबे तेसरा मूँ और जीब तेबुई खुली गी। तेबे से बोलणे जोगा ऊईगा और परमेशरो रा धन्यवाद करने लगेया। 65 तेसरे ओरे-पोरे रणे वाले लोक डरी गे और तिना सबी गल्ला री चर्चा यहूदिया प्रदेशो रे सारे पाहूडी इलाके रे फैली गी। 66 सब सुणने वाले आपणे-आपणे मनो रे बिचार करने लगे, “थे बालक केड़ा ऊणा?” कऊँकि परमेशरो रा आथ तेस साथे ए।

~~~~~

67 तेबे तेसरा पिता जकरयाह पवित्तर आत्मा ते परी गा और भविष्यबाणी करने लगेया,

68 “प्रभु इस्राएलो रा परमेशर धन्य ए,  
जो तिने आपणे लोका कनारो खे देखेया और तिना खे छुटकारा दित्तेया

69 और आपणे सेवक दाऊदो रे कराने रे  
आसा खे उद्धारकर्ता पेजी राखेया।

70 जेड़ा तिने आपणे पवित्तर भविष्यबक्तेया ते बुलवाया था,



जो दुनिया रे शुरूओ ते ऊँदे ऊए आयी रे

- 71 मतलब-आसा रे दुश्मणा ते  
और बैरिया रे आथो ते म्हारा उद्धार करी राखेया ।
- 72 ताकि आसा रे बाप-दादेया पाँदे कृपा करी की आपणी  
पवित्र वाचा याद राखो
- 73 और से कसम जो तिने आसा रे पिते  
अब्राहमो साथे खाई थी
- 74 कि तेस आसा खे ये देणा, ताकि आसे आपणे  
दुश्मणा रे आथो ते बची की
- 75 परमेशरो सामणे पवित्रता, और धार्मिकता साथे  
सारी जिन्दगी नचचके रई की तेसरी सेवा करदे रईए ।
- 76 ओ बालक! ताखे परमप्रदान परमेशरो रा भविष्यवक्ता बोलेया जाणा,  
कऊँकि तूँ प्रभुए री बाट त्यार करने खे तिना रे आगे-आगे चलणा ।
- 77 ताकि तिना रे लोका खे उद्धारो रा ज्ञान देई सके,  
जो तिना रे पापो री माफिया ते मिलोआ ।
- 78 ये आसा रे परमेशरो री तेसा बड़िया दया ते ऊणा;  
जेसरी बजअ ते, स्वर्गो ते आसा पाँदे प्यागा रा प्रयासा ऊणा ।
- 79 ताकि न्हरे रे और मरने वालेया खे जिन्दगी देई सको,  
और आसा रे पैरा खे शान्तिया री बाटा रे सिदे चलाई सको ।”
- 80 तेवे से बालक यहून्ना बड़दा और आत्मा रे तागतवर ऊँदा गया और इस्राएलो रे सामणे  
आऊणे रे दिना तक, जंगलो रे रया ।

## 2

????? ?? ????  
(????? 1:18-25)

1 तिना दिना रे रोमी महाराजा अगस्तुस कैसरो री तरफा ते आज्ञा निकली की सारे रोमी साम्राज्य  
रे लोका री गणना कित्ती जाओ । 2 ये पईली गणना तेस बखते ऊई, जेवे क्विरिनियुस सीरिया प्रदेशो  
रा राज्यपाल था । 3 तेवे सब लोक नाओं लिखाणे खे आपणे-आपणे नगरो खे गए । 4 तेवे यूसुफ बी  
इजी री खातर कि से दाऊदो रे कराने और कुलो रा था, गलीलो रे नासरत नगरो ते, यहूदिया दे,  
दाऊदो रे नगर बैतलहमो खे गया । 5 ताकि आपणी मंगेतर मरियमा साथे, जो गर्भवती ए, नाओं  
लिखाऊँ । 6 जेवे सेयो बैतलहम पऊँछे, तेवे मरियमा रे बच्चा जमणे रिया पीड़ा लगी गिया । 7 तेसा  
रे पईला बच्चा पाऊ ऊआ, तेसे से टालेया साथे लपेटी की डांगरा री खुरलिया रे राखेया, कऊँकि  
तिना खे संरायी रे रणे खे जगा नि मिली ।

?????????????? ?? ???? ???? ?????????? ?? ?????

8 तेस देशो रे बऊत गाही थे, जो राती मैदाना रे रई की आपणे चूण्डो रा पईरा देयो थे । 9 तेवे  
परमेशरो रा एक स्वर्गदूत तिना रे सामणे आयी की खड़ा ऊईगा और परमेशरो रा तेज तिना रे चऊँ  
कनारो चमकणे लगेया और सेयो बऊत डरी गे । 10 तेवे स्वर्गदूते तिना खे बोलेया, “डरो नि, कऊँकि  
देखो आऊँ तुसा खे बऊत खुशिया रा सुसमाचार सुनाणे आयी रा, जो सारे लोका खे ऊणा । 11 कि  
आज दाऊदो रे नगर बैतलहमो रे तुसा खे एक उद्धारकर्ता जम्मी रा और येई मसीह प्रभु ए । 12 और  
इजी रा पता तुसा खे ईयाँ लगणा, तुसा खे एक बालक टालेया रे लपेटेया रा और डांगरा री खुरलिया  
रे पड़ेया रा मिलणा ।”

13 तेवे एकदम तेस स्वर्गदूतो साथे, स्वर्गदूता रा एक दल, परमेशरो री स्तुति करदे ऊए और ये  
बोलदे ऊए दिशेया,

14 “स्वर्गो रे परमेशरो री महिमा

और तरतिया रे, तिना माणूआ खे जिना ते आऊँ खुश ए, शान्ति ओ ।”

15 जेबे स्वर्गदूत तिना गे ते स्वर्गो खे चली गे, तेबे गाद्दी आपू बीचे बोलणे लगे, “आओ आसे बैतलहमो खे चलूँ और जो गल्ल परभुए आसा गे बताई राखी, तेसा देखूँ।” 16 तेबे तिने तेबुई जाई की मरियम और यूसुफ और डांगरा री खुरलिया रे से बालक लेटेया रा देखेया। 17 इना खे देखी की से गल्ल जो एस बालको रे बारे रे तिने बोली थी, सामणे आयी। 18 सबी सुणने वालेया, तिना गल्ला ते जो गाददिये तिना गे बताईया थिया, हैरान ऊईगे। 19 पर मरियम इना सबी गल्ला खे आपणे मनो रे सोचदी रई। 20 तेबे गाद्दी परमेशरो री स्तुति और गुणगाण करदे ऊए वापस चली गे, कऊँकि जो कुछ तिने देखी राखेया था, से ठीक तेड़ा ई था जेड़ा स्वर्गदूते तिना खे बोली राखेया था।

~~~~~

21 जेबे आठ दिन पूरे ऊईगे और खतने रा बखत आया, तेबे तेसरा नाओं यीशु राखेया, जो स्वर्गदूते तेसरे मरियमा रे पेटो रे आऊणे ते पईले बताया था।

~~~~~

22 जेबे मूसे रा बिधानो रे मुताबिक मरियम और यूसुफो रे शुद्ध ऊणे रे दिन पूरे ऊए, तेबे सेयो यरूशलम मन्दरो खे गए। सेयो बालक यीशुए खे बी आपू साथे यरूशलमो रे मन्दरो रे ल्याए कि तेसखे परभुए रे सामणे अर्पण करो 23 जेड़ा परभुए रा बिधानो रे लिखी राखेया, “हर एक जेठा बालक परभुए खे पवित्तर ऊणा।” 24 मरियम और यूसुफो रे शुद्ध ऊणे खे परभुए रा बिधानो रे वचनो रे मुताबिक कृगीया रा एक जोड़ा या कबूतरो रे दो बच्चे ल्याई की बलिदान करो।

~~~~~

25 तेस बखते यरूशलमो रे शमौन नाओं रा एक माणू था, से तर्मी और भक्त था और इस्राएलो री शान्ति और मसीह रे आऊणे री बाट न्यालो था और पवित्तर आत्मा तेस पाँदे था। 26 पवित्तर आत्मा ते तेसखे चेतावणी मिली थी कि जदुओ तक तूँ परभुए रे मसीह खे नि देखी लएगा, तदुओ तक मरना नि। 27 तेबे से आत्मा रा सिखाया, मन्दरो रे आया, जेबे माए-बाओ बालक यीशुए खे पीतरे ल्याए, ताकि तेसखे बिधानो री रवाजा रे मुताबिक करूँए 28 तेबे तिने से बालक आपणी गोदा रे लया और परमेशरो रा धन्यवाद करी की बोलेया,

29 “ओ स्वामी! एबे तूँ आपणे दासो खे आपणे वचनो रे मुताबिक बेफिकर ऊई की एते दुनिया ते विदा कर।

30 कऊँकि मेरी आखी तेरा उद्धार देखी ला रा।

31 जो तुसे सबी लोका रे सामणे त्यार करी राखेया।

32 ताकि से दूजी जातिया खे सच्चाईया खे सामणे ल्याऊणे खे एक जोति देओ और तेरे आपणे इस्राएलो रे लोका री महिमा ओ।”

33 यीशुए रे माए-बाओ, तिना गल्ला ते, जो शमौने तेसरे बारे रे बोली थी, हैरान ऊईगे। 34 तेबे शमौने तेसखे आशीष देई की तेसरी आम्मा मरियमा खे बोलेया, “देख ये तो इस्राएलो रे बऊत जणेया रे रूडने, उठणे खे और एक एड़ा चिहू ऊणे खे ठईराई राखेया, जेसरे खलाफ बऊत गल्ला ऊणिया। 35 एथो तक तेरा प्राण बी तलवारी रे वारो साथे पार छीदी जाऊणा। इजी ते बऊत मनो रे बिचार प्रगट ऊणे।”

~~~~~

36 आशरो रे गोतरो बीचा ते हन्नाह नाओं री फनुएलो री बेटी एक भविष्यबक्तणी थी। से बऊत स्याणी थी और ब्या ऊणे ते बाद आपणे लाड़े साथे बस सात साल तक ई रई। 37 से चुरासी साला ते बिदुआ थी और जादातर मन्दरो रे रओ थी, से बअरत और प्रार्थना करी की रात-दिन भक्ति करदी रओ थी। 38 तेबे से तेस बखते तेती आयी की परमेशरो रा धन्यवाद करने लगी और तिना सबी खे जो यरूशलमो रे लोका खे छुटकारे री बाट न्यालो थे, तेसरे बारे रे गल्ल करने लगी

~~~~~

39 जेबे यूसुफ और मरियम प्रभुए रा बिधानो रे मुताबिक सब कुछ नपटेई चूके, तेबे गलीलो रे आपणे नगर नासरतो खे चली गे। 40 तेबे बालक बड़दा, और तागतबर और अक्ला ते परिपूर्ण ऊँदा गया और परमेशरो री कृपा तेस साथे थी।

~~~~~

41 यीशुए रे माए-बाओ हर साल फसह रे त्योआरो खे यरूशलेमो खे जाओ थे। 42 जेबे से बारा साला रा ऊआ, तेबे सेयो त्योआरो रे रवाजा रे मुताबिक, यरूशलेमो खे गये। 43 जेबे सेयो तिना दिना खे पूरा करी की आऊणे लगे, तेबे से बालक यीशु, यरूशलेमो रेई रई गा और ये गल्ल तेसरे माए-बाओ खे नि थी पता। 44 तिने सोचेया कि से ओरी यात्रिया साथे ऊणा, एक दिन बीती गा और तेबे सेयो तेसखे आपणे टब्बरो और जाण-पछयाण वालेया गे टोलने लगे। 45 पर जेबे मिलेया नि, तेबे टोलदे-टोलदे यरूशलेमो रे पऊँछी गे। 46 और तेबे तीन दिन बाद तिना खे से मन्दरो रे आँगणो रे, उपदेशका साथे बैठे रे, तिना री सुणदे और तिना ते प्रश्न करदा ऊआ मिलेया। 47 जितणे जणे तेसरी सुणने लगी रे थे, सेयो सब तेसरी समज और जवाबो ते हैरान थे। 48 तेबे सेयो तेसखे देखी की हैरान ऊईगे और तेसरी आम्मे तेसखे बोलेया, “ओ पाऊ! तें आसा साथे एड़ा कऊँ कित्तेया? देख, तेरे पिता जी और आऊँ ताखे रोषो रे टोलने लगी रे थे।” 49 यीशुए तिना खे बोलेया, “तुसे माखे कऊँ लगी रे टोलने? क्या जाणो नि थे कि मेरा मेरे परमेशरो रे भवनों रे ऊणा जरूरी ए?” 50 पर जो गल्ल तिने तिना खे बोली, से तिना खे समज नि आयी। 51 तेबे से तिना साथे चली गा और नासरतो खे आया और तिना रे कुलो रे रया, तेसरी आम्मे यो सारिया गल्ला आपणे मनो रेई राखिया। 52 यीशु बुद्धि और डील-डौल, परमेशर और मांपूए री कृपा रे बड़दे गये।

### 3

~~~~~  
 (~~~~~ 3:1-12; ~~~~~ 1:1-8; ~~~~~ 1:19-28)

1 तिबिरियुस महाराजा कैसरो रे राज्य रे पन्दरूए साले जेबे पुन्तियुस पिलातुस यहूदिया प्रदेशो रा राज्यपाल था, और गलीलो रे हेरोदेस, इतुरैया और त्रखेनितीसो रे तेसरा पाई फिलिप्पुस और अबिलेनो रे लिसानियास रे राजा थे। 2 जेबे हन्ना और कैफा प्रदान पुरोईत थे, तेस बखते परमेशरो रा वचन सुनसाण जगा रे जकरयाहो रे पाऊ यूहन्ने गे पऊँछेया। 3 तेबे से यरदन नदिया रे नेडे-तेडे रे सारे देशो रे आयी की, पापो री माफिया खे, मन फेरने रे और बपतिस्मा लणे रा प्रचार करने लगेया। 4 जेड़ा यशयाह भविष्यवक्ते रे बोले रे वचनो री कताबा रे लिखे राए कि,

“सुणसाण जगा रे एक आक्का पाणे री आवाज ओई कि,

प्रभुए री बाट त्यार करो, तिना री सड़का सीदिया करो।

5 हर एक काअटी परी जाणी, हर एक पाहड़ और टीला थाले करेया जाणा और जो टेडा ए, से सीदा और जो थाले पाँदे ए, से चौड़ी (सवी) बाट बगनी

6 और सबी लोका परमेशरो रा उद्धार देखणा।”

7 जो पीड़ा री पीड़ तेसते बपतिस्मा लणे आओ थी, तिना खे से बोलो था, “ओ सापो जेडे जईरीले लोको! तुसा खे किने जताई ता कि आऊणे वाले परमेशरो रे रोषो ते नटो? 8 इजी री खातर मन फिराओ और अच्छे काम करो; और आपणे-आपणे मनो रे एड़ा नि सोचो, ‘आसा रा बाओ अब्राहम ए।’ कऊँकि आऊँ तुसा खे बोलूँआ कि परमेशर इना पात्थरा ते अब्राहमो खे ल्वाद पैदा करी सकोआ। 9 एबे परमेशर तुसा खे सजा देणे वाला ए, तेबेई तो जो-जो डाल खरा फल नि ल्याऊँदे, से बाडे और आगी रे सेट जाओए।” 10 तेबे लोक तेसते पूछेया, “परमेशरो री सजा ते बचणे खे आसे क्या करहँ?” 11 यूहन्ने बोलेया, “जेसगे दो कुरते ए, से तेसखे बांडी देओ, जेसगे आए नि और जेसगे रोटी ओ, से बी एड़ा ई करो।” 12 तेबे कर लणे वाले बी बपतिस्मा लणे आए और तेसते पूछेया, “ओ गुरू! आसे क्या करहँ?” 13 तिने बोलेया, “जो तुसा खे रोमी सरकारे ठराई राखेया, तिजी ते जादा नि

लणा ।” 14 तेबे सिपाईए वी तेसते पूछेया, “आसे क्या करुँ?” तिने बोलेया, “केसी खे नाजाईज तंग नि करना, ना चूटा दोष लगाणा और आपणी मजदूरिया पाँदे सन्तुष्टी राखणी ।”

15 जेबे सबी लोके मसीह रे आऊणे री उम्मीद लगाई राखी थी और आपणे-आपणे मनो रे यूहन्ने रे बारे रे बिचार करने लगी रे थे कि केथी येई तो मसीह तो निए? 16 तेबे यूहन्ने तिना सबी खे जबाब दित्तेया, “आऊँ तो तुसा खे पाणिए साथे बपतिस्मा देऊँआ, पर जो आऊणे वाला ए, से मांते वी जादा महान ए । आऊँ तो एते जोगा पनिए कि तेसरे जोड़े रे फिथे खोली सकूँ । तेस तुसा खे पवित्र आत्मा और आगी साथे बपतिस्मा देणा । 17 तेसरा सूप तेसरे आथो रे ए और तेस आपणा खल्याण ठीक टंगो ते साफ करना और कणक तो आपणे पण्डारो रे राखी देणी पर जो पूऊ ऊणा से एडिया आगी रे सेटणा जो कदी नि बिजणी ।”

18 तेबे से बऊत शिक्षा देई-देई की लोका खे सुसमाचार सुणांदा रया । 19 पर जेबे तिने गलील प्रदेशो रे चौथाई देशो रे राजा हेरोदेसो खे, तेसरे पाई फिलिप्पुसो री लाडी हेरोदियासा रे बारे रे और सब कुकर्मा रे बारे रे जो तिने कित्ते थे, फटकार दित्ती । 20 हेरोदेसे तिना ते बढ़ी की कुकर्म वी कित्तेया कि यूहन्ना जेला रे पाईता ।

~~~~~

(~~~~~ 3:13-17; ~~~~~ 1:9-11)

21 जेबे सबी लोके बपतिस्मा लया और यीशु वी बपतिस्मा लयी की प्रार्थना करने लगी रे थे, तेबे सर्ग खुली गा । 22 तेबे पवित्र आत्मा शारीरिक रूपो रे जियाँ कबूतर उड़दा ऊआ थाले आओआ तियाँ तिने आपू पाँदे उतरदे ऊए देखेया और स्वर्गो ते ये आवाज आयी, “तू मेरा प्यारा पुत्र ए और आऊँ तांते खुश ए ।”

~~~~~

(~~~~~ 1:1-17)

23 जेबे यीशु आपू उपदेश देणे लगे, तेबे सेयो तकरीबन तीई साला रे थे (और जेडा समजेया जाओआ) यीशु यूसुफो रे पाऊ थे और यूसुफ एलीयो रा पाऊ था 24 और एली, मत्तातो रा पाऊ था, मत्तात लेवियो रा पाऊ था, लेवी मलकियो रा पाऊ था, मलकी यन्ना रा पाऊ था और यन्ना यूसुफो रा पाऊ था । 25 यूसुफ मत्तियाहो रा पाऊ था, मत्तियाह आमोसो रा पाऊ था, आमोस नहूमो रा पाऊ था, नहूम असल्याहो रा पाऊ था, असल्याह नोगह रा पाऊ था । 26 नोगह मातो रा पाऊ था, मात मत्तियाहो रा पाऊ था, मत्तियाह शिमियो रा पाऊ था, शिमी योसेखो रा पाऊ था और योसेख योदाह रा पाऊ था । 27 योदाह यूहन्ने रा पाऊ था, यूहन्ना रेसा रा पाऊ था, रेसा जरूब्बाबिलो रा पाऊ था, जरूब्बाबिल शालतियेलो रा पाऊ था और शालतियेल नेरियो रा पाऊ था । 28 नेरी मलकियो रा पाऊ था, मलकी अददियो रा पाऊ था, अदी कोसामो रा पाऊ था, कोसाम इलमोदामो रा पाऊ था और से एरो रा पाऊ था । 29 एर येशुओ रा पाऊ था, येशु इलाजारो रा पाऊ था, इलाजार योरिमो रा पाऊ था, योरिम मत्तातो रा पाऊ था, मत्तात लेवियो रा पाऊ था । 30 लेवी शमोनो रा पाऊ था, शमोन यहूदाह रा पाऊ था, यहूदाह यूसुफो रा पाऊ था, यूसुफ योनानो रा पाऊ था, योनान इलयाकीमो रा पाऊ था । 31 और इलयाकीम मलेआहो रा पाऊ था, मलेआह मिन्नाहो रा पाऊ था, मिन्नाह मत्ता रा पाऊ था, मत्ता नातानो रा पाऊ था, नातान दाऊदो रा पाऊ था । 32 दाऊद यिशै रा पाऊ था, यिशै ओबेदो रा पाऊ था, ओबेद बोअजो रा पाऊ था, बोअज सलमोनो रा पाऊ था, सलमोन नहशोनो रा पाऊ था । 33 नहशोन अम्मीनादावो रा पाऊ था, अम्मीनादाव अरनीयो रा पाऊ था, अरनी हिस्रोनो रा पाऊ था, हिस्रोन फिरिसो रा पाऊ था, फिरिस यहूदाहो रा पाऊ था । 34 यहूदाह याकूबो रा पाऊ था, याकूब इसहाको रा पाऊ था, इसहाक अब्राहमो रा पाऊ था, अब्राहम तिरहो रा पाऊ था, तिरह नाहोरो रा पाऊ था । 35 नारोहो रा सरूगो रा पाऊ था, सरूग रऊओ रा पाऊ था, रऊ फिलिगो रा पाऊ था, फिलिग एबिरो रा पाऊ था, एबिर शिलहो रा पाऊ था । 36 शिलह केनानो रा पाऊ था, केनान अरफक्षदो रा पाऊ था, अरफक्षद शेमो रा पाऊ था, शेम नूहो रा पाऊ था, नूह लिमिको रा पाऊ था । 37 लिमिक मथूशिलहो रा पाऊ था, मथूशिलह

हनुको रा पाऊ था, हनुक यिरिदो रा पाऊ था, यिरिद महललेलो रा पाऊ था, महललेल केनानो रा पाऊ था।³⁸ केनान इनोशो रा पाऊ था, इनोश शेतो रा पाऊ था, शेत आदमो रा पाऊ था और से परमेशरो रा पाऊ था।

4

????? ?? ????????

(????? 4:1-11; ?????? 1:12,13)

1 तेबे यीशु पवित्र आत्मा ते परी की यरदनो नदिया ते वापस आये और चाली दिन तक आत्मा रे सिखाणे खे सुणसाण जगा रे फिरदे रये; 2 और शैतान चाली दिना तक तिना री परीक्षा करदा रया। तिना दिना रे तिने कुछ नि खाया और जेबे सेयो दिन पूरे ऊईगे तेबे तिना खे पूख लगी। 3 तेबे शैताने यीशुए खे बोलेया, “जे तूँ परमेशरो रा पुत्र ए, तो एस पात्थरो खे बोल कि रोटी बणी जाओ।” 4 यीशुए तेसखे जवाब दित्तेया, “लिखी राखेया कि मांणू रोटीया साथे ई जिऊंदा नि रणा।” 5 तेबे शैतान तिना खे लईगा और तिना खे एकदम दुनिया रे सारे राज्य दखाए। 6 और शैताने तिना खे बोलेया, “मां यो सब अक्क और इना रे एशो-आराम ताखे देई देणे, कऊँकि ये सब कुछ मांगे सम्बाली राखेया और जेसखे चाऊँआ, तेसखे देई देऊँआ।” 7 तेबे तिने यीशुए खे फेर बोलेया, “जे तां मांगे माथा टेकणा, तो ये सब कुछ तेरा ऊई जाणा।” 8 यीशुए तेसखे जवाब दित्तेया, “लिखी राखेया कि तूँ बस प्रभु आपणे परमेशरो गे ई माथा टेक और बस तिना री ई आराधना कर।” 9 तेबे शैताने यीशु यरूशलेमो रे लयी जाई की मन्दरो री चूँडिया पाँदे खडे करी ते। तेबे तिना खे बोलणे लगेया, “जे तूँ परमेशरो रा पुत्र ए, तो आपू खे एथा ते थाले रुडाई दे।” 10 कऊँकि पवित्र शास्त्रो रे लिखी राखेया कि परमेशरो तेरिया तंई आपणे स्वर्गदूता खे आज्ञा देणी कि सेयो तुसा खे बचाओ। 11 और तिना तूँ आपणे आथो-आथ चकी लणा, केथी एडा नि ओ कि तेरे पैरो रे पात्थरो साथे बूडो।” 12 यीशुए तेसखे जवाब दित्तेया, “पवित्र शास्त्रो रे ये बीए लिखेया राए, तूँ प्रभु आपणे परमेशरो खे नि परख।” 13 जेबे शैतान तिना री सारिया परीक्षा करी चुकेया, तेबे कुछ बखतो खे यीशुए खे छाडी की चली गा।

????? ?? ?????? ?? ??? ?????? ?? ????????

(????? 4:12-17; ?????? 1:14,15)

14 तेबे यीशु पवित्र आत्मा री सामर्थां ते परी की गलीलो खे चली गे और तिना री चर्चा ओरे-पोरे सारे देशो रे फैली गी। 15 तेबे सेयो तिना रे प्रार्थना रे कअरो रे उपदेश देंदे रये और सब तिना री तारीफ करदे रये।

????? ?? ?????? ?? ????????

(????? 13:53-58; ?????? 6:1-6)

16 तेबे सेयो नासरतो गांव खे वापस आए, जेती सेयो पाले थे ओर आपणी रवाजा रे मुताबिक आरामो रे दिने प्रार्थना रे कअरो रे जाई की पढ़ने खे खडे ऊए। 17 यशायाह भविष्यवक्ते री कताब तिना खे दिती और तिने कताब खोली की से जगा निकयाली जेती ये लिखी राखेया था,

18 “प्रभुए रा पवित्र आत्मा मां पाँदे ए, कऊँकि तिने मेरा अभिषेक कंगाला खे सुसमाचार सुनाणे खे करी राखेया और आऊँ इजी खे पेजी राखेया ताकि दुष्टात्मा रे वशो रे पड़े रे लोका खे छुटकारे रा और अन्देया खे देखणे रा सुसमाचार प्रचार करूँ और केसेया रे खे छुडाऊँ।” 19 और प्रभुए खे खुश रणे रे सालो रा प्रचार करूँ।”

20 तेबे तिने कताब बंद करी की सेवको रे आथो रे देईती और बैठीगे और प्रार्थना रे कअरो रे सब लोक तिना खे देखदे ई रये। 21 तेबे सेयो तिना खे बोलणे लगे, “आज ई ये लेख तुसा सामणे पूरा ऊई रा।” 22 सबी तिना री तारीफ किती और जो कृपा री गल्ल तिना रे मुओ ते निकलो थी, तिना ते हैरान ऊईगे और बोलणे लगे, “क्या ये यूसुफो रा पाऊ निए?” 23 तिने तेसखे बोलेया, “तुसा ये कहावत मां पाँदे जरूर बोलणी, ‘ओ वैद आपू खे ठीक कर! जो कुछ आसे सुणी राखेया कि कफरनहूमो रे

करी राखेया, से एती आपणे देशो रे बी कर।” 24 यीशुए बोलेया, “आऊँ तुसा खे सच लगी रा बोलणे कि कोई बी भविष्यबक्ता आपणे देशो रे मान-सम्मान नि पाँदा। 25 आऊँ तुसा खे सच लगी रा बोलणे कि जेबे एलिय्याह नबीए रे दिना रे साडे तीन साल तक सर्ग बंद रया, एथो तक कि सारे देशो रे अकाल पड़ी गा था और इस्राएलो रे बऊत सारी बिदुआ थिया। 26 पर एलिय्याह तिना बीचा ते केसी गे नि पेजेया, बस सिदोनो रे सारफत गांव रे एक बिदुआ ते अलावा। 27 और एलीशा भविष्यबक्ता रे बखते इस्राएलो रे बऊत सारे कोढ़ी थे, पर सीरिया देशो रे नामानो खे छाडी की तिना बीचा ते कोई बी ठीक नि कित्तेया।” 28 इना सारिया गल्ला खे सुणी की जो प्रार्थना रे कअरो रे थे तिना सबी खे रोष आईगा। 29 तेबे तिने सबी उठी की सेयो बारे निकयाली ते और जेते पाहुड़ो पाँदे तिना रा नगर था, तेतेरी चूँडिया पाँदे लयी चले, ताकि तेथा ते तिना खे थाले सेटी की मारी देओ। 30 पर यीशु तिना बीचा ते निकली की चली गे।

XXXXXXXXXX XX XXXX XX XXXXXXXX XXXX
(XXXXXXXX 1:21-28)

31 तेबे सेयो गलीलो रे कफरनहूम नगरो खे गये और आरामो रे दिने लोका खे उपदेश देणे लगी रे थे। 32 सेयो तिना रे उपदेशो ते हैरान ऊईगे, कऊँकि तिना रा वचन अक्को साथे था। 33 प्रार्थना रे कअरो रे एक माणू था, जेसरे दुष्टात्मा थी। 34 से जोरे की चींगणे लगेया कि, “ओ यीशु नासरी! आसा खे तांते क्या काम ए? क्या तूँ आसा खे नाश करने आयी रा? आऊँ ताखे जाणूआ कि तूँ कुण ए? तूँ परमेशरो रा पवित्तर पुत्र ए।” 35 यीशु तेसखे बक्के और बोलेया, “चुप रओ; और एसते निकली जा; तेबे दुष्टात्मा तेसखे बीचे पटकी की बिना नुकशाण पऊँछाए तेसते निकली गी।” 36 ये देखी की सब हैरान ऊईगे और सेयो आपू बीचे बोलणे लगे, “ये केड़ा वचन ए? और ये अक्क और सामर्था साथे दुष्टात्मा खे आज्ञा देओआ और सेयो निकली जाओईया।” 37 तेबे चऊँ कनारे तिना रा बोल-बाला फेली गा।

XXXXXXXXXX XX XXXX XX XXXXXXXX XXXX
(XXXXXXXX 8:14-17; XXXXXX 1:29-34)

38 यीशु प्रार्थना रे कअरो ते उठी की शमौनो रे कअरो खे गये और शमौनो री सासुआ खे बुखार था और तिने तेसा री खातर, यीशुए ते प्रार्थना किती। 39 सेयो तेसा रे नेडे जाई की बुखारो खे बके और तेसा रा बुखार ऊतरी गा और से फटाफट उठी की तिना री सेवा करने लगी। 40 सूरज डूबणे ते पईले जेती-जेती लोक कईया प्रकारा रिया बमारिया रे पड़ी रे थे, सेयो सब तिना खे तेसगे ली आए और तिने एकी-एकी पाँदे आथ राखी की सेयो ठीक कित्ते। 41 तेबे दुष्टात्मा चींगदी ऊई और ये बोलदी उई, “तूँ परमेशरो रा पुत्र ए,” बऊत जणेया ते निकली गी पर सेयो तिना खे बको थे और बोलणे नि देओ थे, कऊँकि सेयो तिना खे जाणो थिया कि ये मसीह ए।

XXXXXXXXXX XX XXXX XX XXXXXXXX XXXX
(XXXXXXXX 1:35-41)

42 जेबे दिन ऊआ तेबे सेयो निकली की सुनसाण जगा खे चली गे और पीड़ा री पीड़ तिना खे टोलदी उई तिना गे आयी और तिना खे रोकणे लगी कि आसा गे ते नि जाओ। 43 पर तिने तिना खे बोलेया, “माखे ओरी नगरो रे बी परमेशरो रे राज्य रा सुसमाचार सुनाणा जरूरी ए, कऊँकि आऊँ इजी खेई पेजी राखेया।” 44 तेबे यीशु यहूदिया प्रदेशो रे प्रार्थना रे कअरो रे प्रचार करदे रये।

5

XXXXXXXXXX XX XXXX XX XXXXXXXX XXXX
(XXXXXXXX 4:18-22; XXXXXX 1:16-20)

1 जेबे पीड़ यीशुए पाँदे पड़ो थी और परमेशरो रे वचन सुणो थी और सेयो गन्नेसरतो री झीला रे कनारे थे खड़े रे, तेबे एड़ा ऊआ 2 कि तिने झीला रे कनारे दो किस्तिया खड़ी रिया देखिया और मच्छुआरे तिना पाँदो ते ऊतरी की आपणे जाल लगी रे थे तोणे। 3 तिना किस्तिया बीचा ते एक

किस्ती जो शमौनो री थी, चढ़ी की यीशुए तेसखे बोलेया, “थोड़ी जी कनारे जे लई चल।” तेबे सेयो किस्तिया पाँदे बैठी की लोका खे उपदेश देणे लगे। 4 जेबे सेयो लोका साथे गल्ला करी चुके, तेबे तिने शमौनो खे बोलेया, “डूगे पाणिए रे लयी चल और मछलिया पकड़ने खे आपणे जाल पाओ।” 5 शमौने बोलेया, “स्वामी! आसे सारी रात मईणत किती पर कुछ नि पकड़ेया, पर तेबे बी तेरे बोलणे ते जाल पाई देऊँआ।” 6 जेबे पतरस और तिना रे साथिए जाल पाईता तेबे बऊत सारिया मछलिया करिया और तिना रे जाल फटणे लगे। 7 तेबे तिने आपणे साथिया खे, जो दूजी किस्तिया रे थे, तिना खे साअरा कित्तेया, “आयी की म्हारी मताद करो।” तिने आयी की आपणिया दोनो किस्तिया मच्छलिया ते इतणिया परी तिया कि सेयो डूबणे लगिया। 8 ये देखी की शमौन पतरस यीशुए रे पैरा पाँदे पड़ी गा और बोलणे लगेया, “ओ प्रभु! मांगा गे ते चली जा, कऊँकि आऊँ पापी माणू ए।” 9 कऊँकि इतणिया सारिया मछलिया पकड़ी की देखी की से और तेसरे साथी हैरान ऊईगे। 10 तियाँ ई जब्दी और तेसरे पाऊ याकूब और यूहन्ने खे बी, जो शमौनो साथे थे, सेयो बी हैरान ऊईगे, तेबे यीशुए शमौनो खे बोलेया, “डर नि, आजो ते तां माणू परमेशरो री तरफा खे फेरने।” 11 तेबे सेयो किस्तिया खे कनारे पाँदे ली आए और सब कुछ छाडी की यीशुए पीछे चली पड़े।

ⓄⓄⓄⓄⓄ ⓄⓄ ⓄⓄⓄⓄⓄⓄ ⓄⓄ ⓄⓄⓄ ⓄⓄⓄⓄⓄ
(ⓄⓄⓄⓄⓄ 8:1-4; ⓄⓄⓄⓄⓄ 1:40-45)

12 जेबे सेयो नगरो रे थे, तेबे तिना खे तेती एक कोढ़ी मिलेया और से प्रभुए खे देखी की तिना रे पैरो पाँदे पड़ी गा और बिनती किती, “ओ प्रभु! जे तुसे चाओ तो माखे ठीक करी सकोए।” 13 यीशुए आपणा आथ आगे कित्तेया और से छूँयाँ और तेसखे बोलेया, “आऊँ चाऊँआ कि तूँ ठीक ऊई जाएँ” और तेबुई तेसरा कोढ़ चली गा। 14 तेबे यीशुए से सावधान कित्तेया, “केसी गे नि बताणा, पर जाई की आपू खे पुरोईतो गे दखा, और आपणे ठीक ऊणे रे वारे रे, जो कुछ मूसे नवीए चढावा ठईराई राखेया, तेस चढा ताकि तिना खे गवाई ओ कि तूँ ठीक ऊईगा।” 15 पर यीशुए रे इना कामा री चर्चा ओर बी फैली गी और पीड़ा री पीड़ तिना खे सुणने खे और आपणी बमारिया खे ठीक कराने खे कट्टी ऊईगी। 16 यीशु सुनसाण जगा रे जाई की कल्ले जे प्रार्थना करेया करो थे।

ⓄⓄⓄⓄⓄⓄ ⓄⓄ ⓄⓄⓄⓄⓄⓄ ⓄⓄ ⓄⓄⓄ ⓄⓄⓄⓄⓄ
(ⓄⓄⓄⓄⓄ 9:1-8; ⓄⓄⓄⓄⓄ 2:1-12)

17 तेबे एक दिन एडा ऊआ कि सेयो उपदेश देणे लगी रे थे तेबे फरीसी और धर्मशास्त्री तेती थे बैठे रे, जो गलील और यहूदिया प्रदेशो रे हर एक गांव ते और यरूशलेम नगरो ते थे आए रे और ठीक करने खे प्रभुए री सामर्थ तिना साथे थी। 18 तेबे कई लोक एक माणूए खे, जो अदरंगो रा रोगी था, माँजे पाँदे ल्याए और सेयो तेसखे पीतरे लयी जाणे खे और यीशुए सामणे राखणे रा तरीका टोलने लगी रे थे। 19 जेबे पीड़ा री बजअ ते सेयो तेसखे पीतरे नि लयी जाई सके, तेबे तिने छतो पाँदे चढ़ी की और खेपरे टाई की, से माँजे समेत बीचे यीशुए रे सामणे त्वारेया। 20 यीशुए तिना रा विश्वास देखी की तेस अदरंगो रे रोगिए खे बोलेया, “ओ माणू! तेरे पाप माफ ऊईगे।” 21 तेबे शास्त्री और फरीसी बईस करने लगे, “ये कूणे, जो परमेशरो री निन्दा करने लगी रा? परमेशरो खे छाडी की ओर कुण पाप माफ करी सकोआ?” 22 यीशुए तिना रे मनो री गल्ल जाणी की तिना खे बोलेया, “तुसे आपणे मनो रे क्या सोचणे लगी रे? 23 ये बोलणा बऊत आसान ए कि तेरे पाप माफ ऊईगे पर ये बोलणा बऊत कठण ए कि आपणा मांजा चकी की चल फिर। 24 पर इजी री खातर कि तुसे जाणी लओ कि माणू रे पुत्रो खे तरतिया पाँदे पाप माफ करने रा बी अक्क ए।” यीशुए तेस अदरंगो रे रोगिए खे बोलेया, “आऊँ ताखे बोळूँआ कि उठ और आपणा मांजा चकी की आपणे कअरो खे चली जा।” 25 से तेबु आपणा मांजा चकी की तिना सामणे उठेया और परमेशरो री तारीफ करदा ऊआ आपणे कअरो खे चली गा। 26 तेबे सब हैरान ऊईगे और परमेशरो री तारीफ करने लगे और बऊत डरी की बोलणे लगे कि आज आसे नऊखिया गल्ला देखिया।

॥॥॥॥ ॥॥ ॥॥॥॥ ॥॥ ॥॥॥॥

(॥॥॥॥ 9:9-13; ॥॥॥॥ 2:13-17)

27 तेबे इजी ते बाद यीशु बारे चली गे और लेवी नाओं रा एक कर लणे वाला करो री चौकिया पंदि बैठे रा देखेया और तिने तेसखे बोलेया, “मां पीछे आओ और मेरे चले बणो।” 28 तेबे से सब कुछ छाडी की तिना पीछे चली पड़ेया। 29 तेबे लेविए तिना खे आपणे कअरे एक बड़ा भोज राखेया और कर लणे वालेया री और ओरी लोका री जो तिना साथे रोटी खाणे बैटी रे थे तिना री एक बड़ी पीड़ थी। 30 तेबे फरीसी और शास्त्री, तिना रे चलेया ते कुड़कुड़ाणे लगे और बोलणे लगे, “तुसे कर लणे वालेया साथे और पापिया साथे कऊँ खाओ-पियोए?” 31 यीशुए तिना खे जवाब दित्तेया, “बैद पलेया-चंगेया खे नि, पर, बमारा खे जरूरी ए।” 32 आऊँ तर्मिया खे नि, पर पापिया रा मन फिराणे खे बुलाणे आयी रा।”

(॥॥॥॥ 9:14-17; ॥॥॥॥ 2:18-22)

33 तेबे तिने तिना खे बोलेया, “बपतिस्मा देणे वाले यूहन्ने रे चले तो सदा बअरत और प्रार्थना करदे रओए और तियाँ ई फरीसी बी, पर तेरे चले तो खाओ पियो ए।” 34 यीशुए तिना खे बोलेया, “क्या बराती, जदुओ तक लाड़ा तिना साथे ए, तदुओ तक तिना ते बअरत करवाई सको ए? 35 पर सेयो दिन आऊणे, जेबे लाड़ा बरातिया ते लग करेया जाणा, तेस बखते तिना बअरत करना।” 36 यीशुए तिना खे एक उदारण बोलेया, “कोई बी माणू नए टाले ते फाड़ी की पुराणे टाले रे टाली नि लगान्दा, नई तो नया फटी जाणा और तेस पुराणे साथे मेल पनि खाणा। 37 नया अँगूरा रा रस पुराणे खल्लडुआ रे कोई नि परदा, नई तो नया अँगूरा रा रस खल्लडुआ खे फाड़ी की बारे निकली जाणा और खल्लडुआ रा बी नाश ऊई जाणा। 38 पर जो नया अँगूरा रा रस ओआ, से नये खल्लडुआ रे परना चाईयो। 39 कोई बी माणू पुराणा अँगूरा रा रस पी की नया नि चांदा, कऊँकि से बोलोआ कि पुराणा ई अच्छा ए।”

6

॥॥॥॥ ॥॥ ॥॥॥॥ ॥॥ ॥॥॥॥

(॥॥॥॥ 12:1-8; ॥॥॥॥ 2:23-28)

1 तेबे आरामो रे दिने यीशु डोरूआ रिये जाणे लगी रे थे और तिना रे चले सिल्ले तोड़ी-तोड़ी की और मली-मली की खाणे लगी रे थे। 2 तेबे फरीसिया बीचा ते कई जणे बोलणे लगे, “तुसे से काम कऊँ करोए, जो आरामो रे दिने करना ठीक निए?” 3 यीशुए तिना खे जवाब दित्तेया, “क्या तुसे ये नि पढ़ी राखेया कि जेबे दाऊद और तेसरे साथी पूखे थे, तो, तेबे तिने क्या कित्तेया। 4 से कऊँ परमेशरो रे भवनो दे गया? और पंटा रिया रोटिया खाईया, जबकि बिधानो रे मुताबिक सेयो खाणिया पुरोईता खे छाडी की ओरी खे ठीक नि थिया और तिने आपणे चलेया खे बी दित्तिया।” 5 तेबे तिने तिना खे बोलेया, “आऊँ माणू रा पुत्र आरामो रे दिनो रा बी प्रभु ए।”

॥॥॥॥ ॥॥ ॥॥ ॥॥॥॥ ॥॥॥॥॥॥ ॥॥ ॥॥॥ ॥॥॥॥

(॥॥॥॥ 12:9-14; ॥॥॥॥ 3:1-6)

6 तेबे एड़ा ऊआ कि केसी ओरी आरामो रे दिने सेयो प्रार्थना रे कअरो रे उपदेश देणे लगी रे थे, तेबे तेती एक माणू आया, जेसरा आथ सूकेया रा था। 7 शास्त्री और फरीसी यीशुए पंदि दोष लगाणे री ताका रे थे कि देखूँ कि आरामो रे दिने तेसखे ये ठीक करोआ की नयी। 8 पर यीशु तिना रे विचार जाणो थे, तेबे तिने सूके रे आथो रे माणूए खे बोलेया, “उठ और बीचे खड़े ऊई जा।” से उठेया और खड़ा ऊईगा। 9 यीशुए तिना खे बोलेया, “आऊँ तुसा ते पुछूँआ कि बिधानो रे मुताबिक आरामो रे दिने क्या ठीक ए, पला करना या बुरा करना, प्राणो खे बचाणा या नाश करना?” 10 तेबे तिने चऊँ कनारे तिना सबी खे देखी की तेस सूके रे आथो वाले माणूए खे बोलेया, “आपणा आथ आगे कर।” तिने आगे कित्तेया और तेसरा आथ ठीक ऊईगा। 11 पर शास्त्री और फरीसी आपणे आपू ते बारे ऊईगे और आपू बीचे बईस करने लगे कि आसे यीशुए साथे क्या करिए?

॥॥॥॥ ॥॥॥॥॥॥ ॥॥॥॥॥॥

(॥॥॥॥॥ 10:1-4; ॥॥॥॥॥ 3:13-19)

12 तेबे तिना दिना रे यीशु पाहूडो पाँदे प्रार्थना करने खे निकले और सारी रात परमेशरो ते प्रार्थना करदे रये। 13 जेबे दिन ऊआ तेबे तिने आपणे खास चले बुलाई की तिना बीचा ते बारा चूणी ले और तिना खे प्रेरित करी की बोलेया। 14 और सेयो यो ए, शमौन जेसरा नाओं तिने पतरस राखेया, तेसरा पाई अन्दरयास, याकूब, यूहन्ना, फिलिप्पुस, बरतुल्लै 15 मत्ती, थोमा, हलफईसो रा पाऊ याकूब, शमौन जेसखे जेलोतेस बी बोलोए 16 याकूबो रा पाऊ यहूदा और यहूदा इस्करियोती, जो तिना खे पकड़वाणे वाला बी था।

॥॥॥॥॥ ॥॥॥॥ ॥॥ ॥॥॥ ॥॥॥॥॥

(॥॥॥॥॥ 4:23-25)

17 तेबे सेयो तिना साथे उतरी की चौड़ी जगा रे खडे ऊईगे और तिना रे चलेया री बड़ी पीड़, और सारे यहूदिया प्रदेश, यरूशलेम नगर, सूर और सैदा नगरो रे समुद्रो रे कनारे रे बऊत लोक, 18 जो तिना री सुणने और आपणी बमारिया ते ठीक ऊणे खे तिना गे आए थे, तेती थे। और दुष्टात्मा रे सताए रे लोक बी ठीक ऊई जाओ थे। 19 तेबे सब यीशुए खे छूणा चाओ थे, कऊँकि तिना ते सामर्थ निकली की सबी खे चंगा करी देयो थी।

॥॥॥॥ ॥॥ ॥॥॥ ॥॥॥

(॥॥॥॥॥ 5:1-12)

20 तेबे यीशुए आपणया चलेया खे देखी कि बोलेया,

“धन्य ए तुसे, जो सलीन ए,

कऊँकि परमेशरो रा राज्य तिना रा ईए।

21 धन्य ए तुसे, जो एबु पूखे ए, कऊँकि रजाए जाणे,

धन्य ए तुसे, जो एबु रोए, कऊँकि आसणे।

22 धन्य ए तुसे, जेबे माणू रे पुत्रो री बजअ ते लोका तुसा ते बैर राखणा

और तुसे निकयाली देणे, तुसा री निन्दा करनी और तुसा रा नाओं बुरा जाणी की कटी देणा।

23 “तेस दिने खुश ऊई की उटकणा, कऊँकि देखो तुसा खे स्वर्गो रे बऊत बड़ा ईनाम मिलणा, तिना रे बाप-दादे, भविष्यवक्तेया साथे बी एड़ा ई करो थे।

24 “पर हाय! तुसा खे, जो पैसे वाले ए,

कऊँकि तुसे आपणे सारे सुख पईले ई पाई चुके रे।

25 पर हाय तुसा खे जो एबु रज्जे रे ए, कऊँकि पूखे ऊणे,

हाय तुसा खे, जो एबु आसोए, कऊँकि शोग करना और रोणे।

26 हाय तुसा खे, जेबे सब तुसा खे खरा बोलोए,

कऊँकि तिना रे बाप-दादे बी चूटे भविष्यवक्तेया साथे एड़ा ई करो थे।

॥॥॥॥॥ ॥॥ ॥॥॥॥॥

(॥॥॥॥॥ 5:38-48; 7:12)

27 “पर आऊँ तुसा सुणने वालेया खे बोलूँआ कि आपणे दुश्मणा साथे प्यार राखो, जो तुसा साथे बैर राखोए, तिना रा पला करो। 28 जो तुसा खे स्राप देओ, तिना खे आशीष देओ, जो तुसा रा मजाक करो, तिना खे प्रार्थना करो। 29 जो तुसा री खाखा रे थप्पड़ बाओआ, तो तेस कनारो खे दूजी खाख बी करी देओ और जो तेरा दोहर (तोती) छुड़ाई लओआ, तेसखे कुरता लणे ते पनि रोक। 30 जो कोई तांते माँगो, तेसखे दे और जो तेरी चीज छुड़ाई लओआ, तेसते माँग नि 31 और जेड़ा तुसे चाओए कि लोक तुसा साथे करो, तुसे बी तिना साथे तेड़ा ई करो।

32 “जे तुसे आपू साथे प्यार राखणे वालेया साथे प्यार राखो, तो तुसा री क्या तारीफ? कऊँकि पापी बी आपू साथे प्यार राखणेया वालेया साथे प्यार राखोए। 33 जे तुसे आपू साथे खरा करने वालेया साथे ई खरा करोए, तो तुसा री क्या तारीफ? कऊँकि पापी बी एड़ा ई करोए। 34 जे तुसे

तिना खे त्वार देओ, जिना ते फेर लणे री उम्मीद राखोए, तो तुसा री क्या तारीफ? कऊँकि पापी बी पापिया खे त्वार देओए, ताकि तिथणा ई फेर पाओ। ³⁵ बल्कि आपणे दुश्मणा साथे प्यार राखो और तिना रा पला करो, और फेर पाणे री उम्मीद नि राखी की त्वार देओ। तेबे तुसा खे बड़ा फल मिलणा और तुसे परमप्रदान परमेशरो रे बच्चे ठईरने। कऊँकि से तिना पाँदे जो धन्यवाद नि करदे और बुरेया पाँदे बी कृपा करोआ। ³⁶ जेड़ा तुसा रा पिता परमेशर दयालु ए, तेडे ई तुसे बी दयालु बणो।

🔗🔗🔗 🔗🔗🔗
(🔗🔗🔗🔗 7:1-4)

³⁷ “दोष मत लगाओ, तो तुसा पाँदे बी दोष नि लगाया जाणा, दोषी नि ठराओ, तो तुसे बी दोषी नि ठराए जाणे, माफ करो, तो तुसा खे बी माफ कित्तेया जाणा। ³⁸ देया करो, तेबे तुसा खे बी दित्तेया जाणा, लोका पूरा नाप दवाई-दवाई की और इलाई-इलाई की और ऊबरदे ऊए तुसा री गोदा रे पाणा, कऊँकि जेस नापो साथे तुसे नापोए, तेसी साथे तुसा खे बी नापेया जाणा।”

³⁹ तेबे यीशुए तिना खे एक उदारण बोलेया, “क्या अन्दा, अन्देया खे बाट दशी सकोआ? क्या दोनो गडडे रे नि पडने। ⁴⁰ चेला आपणे गुरूओ ते बड़ा नि ऊँदा, पर जो कोई सिद्ध ऊणा, से आपणे गुरूओ जेड़ा ऊणा। ⁴¹ तूँ कऊँ आपणे पाईए री छोटी-छोटी गलतिया टोलेया, ताँदे आपणिया बड़ी-बड़ी गलतिया नजर कऊँ नि आऊँदिया? ⁴² जेबे ताँदे आपू रे बड़ी-बड़ी गलतिया ए, तो तूँ आपणे पाईए खे कियाँ बोली सकेया कि ओ पाई! तूँ गलत ए? ओ कपटी! पईले आपणी बड़ी-बड़ी गलतिया देख, तेबेई तो तूँ आपणे पाईए री गलतिया ठीक टंगो रे देखी की निकयाली सकेया।

🔗🔗🔗🔗 🔗🔗🔗🔗 🔗🔗
(🔗🔗🔗🔗 7:16-20; 12:33-35)

⁴³ “कोई बी अच्छा डाल निए, जो नकम्मा फल ल्याओ और ना तो नकम्मा डाल ए, जो अच्छा फल ल्याओ। ⁴⁴ हर एक डाल आपणे फलो साथे पछ्याणा जाओआ, कऊँकि लोक जाड़ो ते दाऊगले नि तोडदे और ना कांडेया ते अँगूर। ⁴⁵ खरा माणू आपणे खरे मनो रे पण्डारो ते खरिया गल्ला निकयालोआ और बुरा माणू आपणे बुरे मनो रे पण्डारो ते बुरिया गल्ला निकयालोआ, कऊँकि जो, जेसरे मनो रे परे रा ओआ, तेड़ा ई मुँओ ते निकलोआ।

🔗🔗 🔗🔗🔗🔗 🔗🔗🔗🔗 🔗🔗
(🔗🔗🔗🔗 7:24-27)

⁴⁶ “जेबे तुसे मेरा कईणा नि मानदे, तो, तेबे कऊँ माखे ओ प्रभु, ओ प्रभु बोलोए? ⁴⁷ जो कोई मांगे आओआ और मेरिया गल्ला सुणी की तिना खे मानोआ, आऊँ तुसा खे बताऊँआ कि से केस जेड़ा ए। ⁴⁸ से तेस माणूए जेड़ा ए, जिने कअर बणाँदे बखते, तरतिया रे डूगी निऊँ खणी की पात्थरा री निऊँ पाई और जेबे बाढ़ आयी तो ताअर तेस कअरो रे लगी, पर से इलाई नि सकी, कऊँकि से पक्का था। ⁴⁹ पर जो सुणी की नि मानदा, से तेस माणूए जेड़ा ए, जिने माट्टिया पाँदे बिना निऊँआ रा कअर बणाया और जेबे तेस कअरो पाँदे ताअर लगी, तो से कअर तेबुई टलीगा और सत्यानाश ऊईगा।”

7

🔗🔗 🔗🔗🔗🔗🔗🔗 🔗🔗 🔗🔗🔗🔗
(🔗🔗🔗🔗 8:5-13)

¹ जेबे यीशु लोका खे इना सबी गल्ला बताई चुके, तेबे सेयो कफरनहूम नगरो रे आए। ² तेबे केसी सूबेदारो रा दास, जो तेसखे बऊत प्यारा था, बमारिया ते मरने वाला था। ³ तिने यीशुए रे बारे रे सुणी की कई यहूदिया रे बुजुर्ग तिना गे ये बिनती करने पेजे कि आयी की मेरे दासो खे बचा। ⁴ सेयो यीशुए गे आयी की तिना ते बड़ी बिनती करी की बोलणे लगे, “से एते जोगा आए कि तुसे तेसखे ठीक करी सको। ⁵ कऊँकि से म्हारी जातिया खे प्यार करोआ और तिने ई आसा रा प्रार्थना रा

कअर बणाई राखेया ।" 6 यीशु तिना साथे चलणे लगे, जेबे सेयो कअरो रे नेडे पऊँछणे वाले थे, तेबे तिने सूबेदार तिना खे आपणे कई दोस्ता रे जरिए सन्देशा पेजेया, "ओ प्रभु कष्ट नि कर कऊँकि आऊँ एते जोगा नि ए कि तुसे मेरे कअरे आयी सकी । 7 इजी बजअ ते आऊँ आपू खे एते जोगा पनि समजदा कि तुसा गे आऊँ, पर तुसे आपणे मुँओ तेई बोली देओ, तो से मेरा दास ठीक ऊई जाणा । 8 आऊँ बी पराधीन माणू ए और सिपाई मेरे आथो रे ए । जेबे एकी खे बोलूँआ, 'जा,' तो से जाओआ और दूजे खे बोलूँ, 'आओ,' तो से आओआ । आपणे दासा खे बोलूँ, 'थे कर,' तो से करोआ ।" 9 ये सुणी की यीशु हैरान ऊईगे, तेबे तिने मूँ फेरी की तेसा पीड़ा खे जो तिना पीछे आऊणे लगी री थी बोलेया, "आऊँ तुसा खे सच लगी रा बोलणे कि मैं इसराएलो रे बी एड़ा विश्वास नि देखेया ।" 10 तेबे जो दोस्त सूबेदार पेजी राखे थे तिने कअरे जाई की से दास ठीक देखेया ।

~~~~~

11 थोडे दिन बाद सेयो नाईन नाओं रे एक नगरो रे गये और तिना रे चले और बऊत बड़ी पीड़ा तिना साथे चली री थी । 12 जेबे सेयो नगरो रे फाटको गे पऊँछे, तेबे लोक एक मुडदे खे बारे निणे लगी रे थे । जो जवान मरी रा था से आपणी बिदुआ माया रा इकलौता पाऊ था । नगरो रे बऊत सारे लोक तेसा साथे थे । 13 तेसा बिदुआ माया खे देखी की यीशु खे तरस आया और तेसा खे बोलेया, "रोओ नि ।" 14 तेबे तिने नेडे जाई की सीढ़ छूँई और सीढ़ चकणे वाले रूकी गे, तेबे तिने बोलेया, "ओ जवान आऊँ ताखे बोलूँ कि उठ ।" 15 तेबे से मुडदा उठी गा और बोलणे लगेया, तेबे यीशु ए से तेसरी माया गे सम्बाली ता । 16 तेबे सब डरी गे और सेयो परमेशरो री तारीफ करदे ऊए बोलणे लगे, "आसा बीचे एक बऊत बड़ा भविष्यवक्ता आईगा रा और परमेशरे आसा लोका पाँदि कृपा दृष्टि करी राखी ।" 17 और तिना रे बारे रे ये गल्ल सारे रे यहूदिया प्रदेशो और नेडे-नेडे सारे देशो रे फैली गी ।

~~~~~  
 (~~~~~ 11:2-19)

18 यूहन्ने खे तेसरे चलेया इना सबी गल्ला रा समाचार सुणाया । 19 तेबे यूहन्ने आपणे चलेया बीचा ते दो जणे बुलाई की यीशु ए गे ये पूछणे पेजे, "क्या आऊणे वाले तुसे ईए या आसे केसी ओरी री बाट देखिये?" 20 तिने यीशु ए गे आयी की बोलेया, "यूहन्ने बपतिस्मे देणे वाले आसे ये पूछणे पेजी राखे कि क्या आऊणे वाला तूँ ई ये या आसे केसी ओरी री बाट देखिये?" 21 तेसी बखते तिने बऊत जणे बमार और पीड़ा ते ठीक किते और दुष्टात्मा ते छुड़ाए और बऊत जणेया अन्देया खे आखी दित्तिया । 22 यीशु ए तिना खे बोलेया, "जो कुछ तुसे देखेया और सुणेया, जाई की यूहन्ने खे बताओ कि अन्दे देखोए, लंगड़े चलोए, कोढ़ी शुद्ध ऊई जाओए, टऊणे सुणोए और मुडदे जिऊँदे ऊई जाओए और कंगाला खे सुसमाचार सुणाया जाओआ । 23 धन्य ए सेयो, जो मेरी बजअ ते आपणा विश्वास नि छाडदे ।"

24 जेबे यूहन्ने रे पेजे रे चले चली गे, तेबे यीशु यूहन्ने रे बारे रे लोका खे बोलणे लगे, "तुसे जंगलो रे क्या देखणे गये थे? क्या अवा साथे ईलदे ऊए काओ जेडे नगलो खे? 25 तो तुसे तेबे क्या देखणे गये थे? क्या नरम टाले पईने रे माणूए खे? देखो जो भड़किले टाले पईनोए और सुख-विलासो रे रओए, सेयो राजभवनो रे रओए । 26 तो तेबे क्या देखणे गए थे? क्या केसी भविष्यवक्ते खे? आ, आऊँ तुसा खे बोलूँआ कि भविष्यवक्ते ते बी बड़े खे । 27 से येई, जेसरे बारे रे लिखी राखेया कि, "देख, आऊँ आपणे दूतो खे तांते आगे-आगे पेजुँआ,

जेस तांते आगे जाई की बाट ठीक करनी ।

28 "आऊँ तुसा खे बोलूँआ कि जो जवाणसा ते जम्मी रे तिना बीचा ते यूहन्ने ते बड़ा कोई नि ए पर जो परमेशरो रे राज्य रे छोट्टे ते बी छोट्टा ए, से तेसते बी बड़ा ए ।" 29 तेबे सबी आम माणूए सुणी की और कर लणे वालेया बी यूहन्ने रा बपतिस्मा लयी की परमेशरो खे सच्चा मानी ला । 30 पर फरीसिये और धर्मशास्त्री तेसते बपतिस्मा ना लयी की परमेशरो री इच्छा आपणे बारे रे टाली ती ।

31 यीशुए फेर बोलेया, “आऊँ आजकाल के लोका री उपमा किजी साथे करूँ? 32 सेयो तिना बच्चेया जेड़े ए, जो बजारो रे बैठी की एकी-दूजे खे आक्का पाई की बोलोए, ‘आसे तुसा खे बांसली बजाई, पर तुसे नि नाचे; आसे शोग कित्तेया, पर तुसे छाती नि बजाई।’ 33 कऊँकि यूहन्ना बपतिस्मा देणे वाला न तो रोटी खांदा आया और ना अँगूरा रा रस पींदा आया और तुसे बोलोए कि तेसरे दुष्टात्मा ए? 34 पर आऊँ माणू रा पुत्र खांदा-पींदा ऊआ आया और तुसे बोलोए कि, ‘देखो, पेदू और पियक्कड़ माणू कर लणे वालेया रा और पापिया रा दोस्त ए।’ 35 पर ज्ञान आपणी ल्वादा ते सच्चा ठराई राखेया।”

XX

36 तेबे किने फरीसियो तिना ते बिनती कित्ती कि मां साथे रोटी खाओ; तेबे सेयो तेसरे कअरे जाई की रोटी खाणे लगे। 37 तेस नगरो री एक पापी जवाणस ये जाणी की कि यीशु एक फरीसियो रे कअरे रोटी खाणे बैठी रा, संगमरमरो रे पांडे (सुराई) रे इत्र ल्याई 38 और तेबे तिना रे पैरा गे पीछे खड़ी ऊई की रोणे लगी और आपणे आसूआ साथे तिना रे पैर तोए और आपणे सियो रे बालो साथे साफ कित्ते और तिना रे पैर बार-बार चूमि की तिना पँदे इत्र मलेया। 39 ये देखी की से फरीसी, जिने यीशु बुलाए थे, आपणे मनो रे सोचणे लगेया, “जे ये भविष्यबक्ता ऊँदा तो जाणी लंदा कि ये जो जवाणस एसखे छूणे लगी री, ये कूणे और केड़ी जवाणस ए? कऊँकि से तो पापी ए?” 40 ये जाणी की यीशुए बोलेया, “ओ शमोन मां ताखे कुछ बोलणा,” शमौने बोलेया, “ओ गुरू बोलो।” 41 तेबे यीशुए बोलेया, “कसी साऊकारो रे दो देणदार थे, एक पाँज सौ चाँदिए रे सिक्के और दूजा पंजा चाँदिए रे सिक्केया रा देणदार था। 42 जेबे तिना गे वापस करने खे कुछ नि था, तो तेबे तिने दूँई जणेया रा करज माफ करी ता, तो बता तिना बीचा ते केस तेसखे जादा प्यार करना।”

43 शमौने जवाब दित्तेया, “मेरी समजा ते तेस, जेसरा तिने जादा करज माफ कित्तेया।” यीशुए तेसखे बोलेया, “तैं ठीक उतर देई राखेया।” 44 तेबे तेसा जवाणसा कनारे फिरी की तिने शमौनो खे बोलेया, “क्या तूँ एसा जवाणसा खे देखणे लगी रा? आऊँ तेरे कअरे आया, पर तैं माखे पैर तोणे खे पाणी नि दित्तेया पर एसे मेरे पैर आपणे आसूआ साथे तोए और आपणे बाला साथे साफ कित्ते। 45 तैं मेरे गले लगी की मेरा स्वागत नि कित्तेया, पर जदुओ ते आऊँ आयी रा, तदुओ ते एसे मेरे पैर चूमणे नि छाडी राखे। 46 तैं मेरे सियो रे तेल नि मलेया, पर एसे मेरे पैरो रे इत्र मलेया। 47 तेबेई तो आऊँ ताखे बोलूँआ कि एसा रे जो बी पाप थे, सेयो माफ ऊईगे कऊँकि एसे बऊत प्यार कित्तेया, पर जेसरा थोडा माफ ऊआ, से थोडा ई प्यार करोआ।” 48 तेबे यीशुए तेसा जवाणसा खे बोलेया, “तेरे पाप माफ ऊईगे।” 49 तेबे जो लोक तिना साथे रोटी खाणे बैठी रे थे, सेयो आपणे-आपणे मनो रे सोचणे लगे, “ये कूणे जो पाप बी माफ करी देओआ? जेते खे सिर्फ परमेशर ई माफ करी सकोआ।” 50 पर तिने तेसा जवाणसा खे बोलेया, “तेरे विश्वासे तूँ बचाई ली, बेफिकर ऊई की चली जा।”

8

XX

1 इजी ते बाद सेयो नगर-नगर और गांव-गांव रे प्रचार करदे ऊए और परमेशरो रे राज्य रा सुसमाचार सुणांदे ऊए, फिरने लगे, और सेयो बारा चले तिना साथे थे, 2 और कुछ जवाणसा बी जो दुष्टात्मा ते और बमारिया ते छुड़ाई राखिया थिया, और तिना बीचा ते यो ए-मरियम मगदलिनी, जेसा ते सात दुष्टात्मा निकाली राखिया थिया 3 और हेरोदेस राजे रे पण्डारी खोजे री लाड़ी योअन्ना और सूसन्नाह और मुखती सारिया जवाणसा, जो आपणे पैसे साथे यीशु और तिना रे चलेया री मताद करो थिया।

XX
 (XXXXXXXX 13:1-9; XXXXXXXX 4:1-9)

4 जेबे बड़ी पीड़ कट्टी ऊई और जगा-जगा रे लोक तिना गे आओ थे, तेबे तिने उदारणो रे बोलेया, 5 “एक बेजा बाणे वाला बेजा बाणे निकलेया और बांदि बखते कुछ दाँणे बाटा रे छूटे और सर्गाँ रे

पंछिए सेयो चूगी ले।⁶ कुछ सापड़ी पाँदे छूटे और जम्मे पर सिनक ना मिलणे री बजअ ते सूकी गे।
⁷ कुछ विऊ जाडो बीचे छूटे और जाडे साथे-साथे बढ़ी की सेयो दबाई ते।⁸ कुछ अच्छी जमीना पाँदे छूटे और जम्मी की सौ गुणा फल ल्याए।⁹ ये बोली की तिने जोरे की बोलेया, “जो समजी सकोआ से तिजी खे त्यानो साथे सुणो और मानी बी लओ।”

ⓂⓂⓂⓂⓂ ⓂⓂ ⓂⓂⓂⓂ

(ⓂⓂⓂⓂⓂ 13:10-17; ⓂⓂⓂⓂⓂ 4:10-12)

⁹ तिना रे चलेया तिना ते पूछेया, “ये उदारण क्या ए?”¹⁰ यीशुए बोलेया, “तुसा खे परमेशरो रे राज्य रे पेतो री समज दिती रिये, पर ओरी खे उदारणो रे सुणाया जाओआ,तेवेई,
 “सेयो देखदे ऊए पनि देखदे,
 और सुणदे ऊए पनि समजदे।

ⓂⓂⓂⓂⓂ ⓂⓂⓂ ⓂⓂⓂⓂⓂ ⓂⓂⓂⓂⓂ ⓂⓂⓂⓂⓂ ⓂⓂ ⓂⓂⓂ

(ⓂⓂⓂⓂⓂ 13:18-23; ⓂⓂⓂⓂⓂ 4:13-20)

¹¹ “उदारणो रा मतलब तो ए: दाँणे परमेशरो रा वचन ए।¹² बाटा रे कनारले सेयो दाँणे ए, जिने सुणेया पर श्रैतान तिना रे मनो चकी की लई जाओआ केथी एडा नि ओ कि सेयो विश्वास करी की उद्धार पाओ।¹³ सापड़ी पाँदले सेयो ए कि जेबे सुणोए, तेबे खुश ओए, पर जड ना पकडने री बजअ ते थोड़ी देर तक विश्वास करोए और परीक्षा रे बखते पटकी जाओए।¹⁴ जो जाडो रे छूटे सेयो ये कि जो सुणो तो आए, पर चिन्ता, पैसा, जिन्दगिया रे सुख-बिलासा रे फसी जाओए और तिना रा फल नि पाकदा।¹⁵ पर अच्छी जमीना रे सेयो ए, जो वचन सुणी की खरे और खरे मनो ते सम्बाली कि राखोए और सबरा साथे फल लयाओए।

ⓂⓂⓂⓂ ⓂⓂ ⓂⓂⓂⓂⓂ

(ⓂⓂⓂⓂⓂ 4:21-25)

¹⁶ “कोई बी दिऊए खे पांडे साथे नि टकदा और ना माँजे निटे राखदा, पर फटिया पाँदे राखोआ, ताकि पीतरे आऊणे वालेया खे प्रयासा ओ।¹⁷ जो कुछ बी छिपेया राए, से सामणे आऊणा और जो कुछ गुप्त ए, से जाणेया जाणा और सामणे बी आऊणा।¹⁸ इजी री खातर चौकसर ओ कि तुसे कियो सुणोए? कऊँकि जेसगे आया, तेसखे देणा और जेसगे आए नि, तेसते से बी लयी लणा, जेतखे से आपणा समजोआ।”

ⓂⓂⓂⓂⓂ ⓂⓂ ⓂⓂⓂⓂⓂⓂ ⓂⓂ ⓂⓂⓂ

(ⓂⓂⓂⓂⓂ 12:46-50; ⓂⓂⓂⓂⓂ 3:31-35)

¹⁹ यीशुए री आम्मा और पाई तिना गे आए, पर पीड़ा री बजअ ते तिना खे मिली नि सके।²⁰ तेबे तिना खे बोलेया, “तुसा री आम्मा और पाई और बईण वारे खड़ी रे और तुसा खे मिलणा चाओए।”
²¹ यीशुए तिना खे जवाबो रे बोलेया, “तिना खे बोलो कि मेरी आम्मा और पाई तो यो ई ये, जो परमेशरो रा वचन सुणोए और मानोए।”

ⓂⓂⓂⓂⓂⓂ ⓂⓂ ⓂⓂⓂⓂⓂⓂ ⓂⓂⓂⓂ

(ⓂⓂⓂⓂⓂ 8:23-27; ⓂⓂⓂⓂⓂ 4:35-41)

²² तेबे एक दिन यीशु और तिना रे चले किस्तिया रे चढ़े और तिने तिना खे बोलेया, “आओ, गलीली समुद्रो ते पार चलूँए।” तेबे तिने किस्ती खोली ती।²³ पर जेबे किस्ती चली री थी, तेबे यीशु सयी गे और समुद्रो रे तूफान आया और किस्तिया रे पाणी फरने लगेया और सेयो मुसीबता रे थे।²⁴ तेबे चलेया नेड़ आयी की यीशु जगाए और बोलेया, “ओ स्वामी! स्वामी! आसे डूबणे वाले ए।” तेबे यीशु उठी की तूफानो खे, पाणिए खे और लईरा खे बकणे लगे और सेयो रूकी गे और चैन ऊईगा।²⁵ तेबे यीशुए चलेया खे बोलेया, “तुसा रा विश्वास केथी था?” पर सेयो डरी गे और हैरान ऊई की आपू बीचे बोलणे लगे, “ये कूणे, जो तूफान और पाणिए खे आज्ञा देओआ और सेयो एसरी आज्ञा खे मानोए?”

XXXXXXXXXX XX XXXX XX XXXXXXXX XX XXX XXXXX

(XXXXXXXX 8:28-34; XXXXXX 5:1-20)

26 तेबे सेयो गिरासेनियो रे देशो रे पऊँछे, जो गलीलो ते पार, सामणे ए। 27 जेबे यीशु कनारे पाँदे उतरे, तेबे तिना खे तेस नगरो रा एक माणू मिलेया, जेसरे दुष्टात्मा थी और कई दिना ते ना टाले पईनो था और ना कअरे जाओ था, पर कबरा रे रओ था। 28 से यीशुए खे देखी की चींगेया और तिना सामणे रूडी की जोरे की बोलणे लगेया, “ओ परमप्रदान परमेशरो रे पुत्र यीशु! माखे तांते क्या काम? मेरी तांते बिनती ये कि माखे कष्ट नि दे।” 29 कऊँकि यीशु तेस माणूए रे जो अशुद्ध आत्मा थी तेसा खे निकलने री आज्ञा लगी रे थे देणे, कऊँकि से बार-बार तेसखे कष्ट देओ थी। लोक तेसखे साँगलो और बेड़िये की बानी की राखो थे, पर से तिना खे तोड़ी की बणो खे नटी जाओ था और दुष्टात्मा तेसरे बैठी गी थी। 30 यीशुए तेसते पूछेया कि तेरा नाओं क्या ए? तिने बोलेया सेना। कऊँकि मुखती सारिया दुष्टात्मा तेसरे बैठी गी थिया। 31 और तिने यीशुए ते प्रार्थना कित्ती कि माखे डूगे गड्डे रे सेटणे री आज्ञा नि दे। 32 तेती पाहडो पंदि सूअरो रा एक चूण्ड चरने लगी रा था, तो तेबे तिने तिना ते बिनती कित्ती, “आसा खे एते चूण्डो रे बैठणे दे।” तो तिने सेयो जाणे दितिया। 33 तेबे दुष्टात्मा तेस माणूए ते निकली की सूअरो रे चली गिया और से चूण्ड काअड़ी पाँदो ते छवाल लयी की समुद्रो रे डूबी की मरी गा।

34 गवाले जो ऊआ था तेस देखी की नटीगे। और नगरो और गांव रे जाई की सारा आल सुणाया। 35 तेबे लोक जो ऊआ था, तेस देखणे खे आए, तेबे तिने से माणू, जेसरे दुष्टात्मा थिया, से यीशुए रे पैरा पाँदे पड़े रा और टाले पईनी की ओशा रे बैठे रा देखेया और डरी गे। 36 देखणे वालेया तिना गे बताया कि से दुष्टात्मा रा सताया रा माणू कियो ठीक ऊआ। 37 तेबे गिरासेनियो रे ओरले-पोरले लोक यीशुए ते बिनती कित्ती कि एथा ते चली जा, कऊँकि सेयो बऊत डरी गे थे, तेबे सेयो किस्तिया रे बैठी की वापस ऊईगे। 38 जेस माणूए ते दुष्टात्मा निकली गी थी, से तिना ते बिनती करने लगेया कि माखे आप साथे आऊणे दे, पर यीशुए तेसखे विदा करदे ऊए बोलेया, 39 “आपणे कअरो खे चली जा और लोका गे बता कि परमेशरे तेरिया तई कितणे बडे काम करी राखे।” तेबे से सारे नगरो रे जाई की प्रचार करने लगेया कि यीशुए मेरिया तई कितणे बडे काम करी राखे।

XXXXXXXXXX XX XXXX XX XXXXX XX XXX XXXXX XXXXXX

(XXXXXXXX 9:18-26; XXXXXX 5:21-43)

40 जेबे यीशु वापस ऊणे लगी रे थे, तेबे लोक तिना साथे खुशिया साथे मिले, कऊँकि सेयो सब जणे तिना खे न्यालो थे। 41 तेबे याईर नाओं रा एक माणू, जो प्रार्थना रे कअरो रा अधिकारी था, यीशुए गे आया और तिना रे पैरो पाँदे पड़ी की प्रार्थना करने लगेया कि मेरे कअरे चलो। 42 कऊँकि तेसरी बारा साला री इकलौती बेटी मरने वाली थी; जेबे सेयो जाणे लगी रे थे, तेबे लोक तिना पाँदे रूडी जाओ थे।

43 तेबे एक जवाणस जेसा खे बारा साला ते खून बइणे री बमारी थी और से आपणी सारी सम्पति बैदा खे देई चुकी थी पर तेबे बी से केसी रे आथो की ठीक नि ऊई। 44 तेबे तेसे पीछे ते आयी की यीशुए रे टाले छूँए और तेबुई तेसा रा खून बईणा बन्द ऊईगा। 45 तेबे यीशुए बोलेया, “आऊँ किने छूँया?” जेबे सब मुकरी गे, तेबे पतरसे और तेसरे साथिये बोलेया, “ओ स्वामी! तुसे तो पीडे जिक्की ते और ये तो तुसा पाँदे ई पड़ी गी।” 46 पर यीशुए बोलेया, “आऊँ किने तो छूँई राखेया।” कऊँकि माखे पता लगी गा रा कि मांते सामर्थ निकली री। 47 जेबे जवाणसे देखेया कि आऊँ छिपी नि सकदी, तेबे से बऊत डरदे-डरदे आयी और तिना रे पैरा पाँदे पड़ी की तेसे सबी लोका सामणे बताया कि मैं किजी री बजअ ते तुसे छूँए और कियो फटाफट ठीक ऊईगी। 48 यीशुए तेसा खे बोलेया, “बटिये! तेरे विश्वासे तू बचाईती, बेफिकर ऊई की चली जा।”

49 सेयो ये बोलणे ई लगी रे थे कि किने प्रार्थना रे कअरो रे सरदारो रे कअरो ते आयी की बोलेया, “तेरी बेटी तो मरी गी और गुरूओ खे कष्ट नि दे।” 50 यीशुए ये सुणी की बोलेया, “डर नि; बस विश्वास राख तो से बची जाणी।” 51 सरदारो रे कअरे जाई की यीशुए पतरस, यूहन्ना याकूब

और तेसा बेटिया रे माए-बाओ खे छाडी की ओर कोई बी पीतरे नि आऊणे दित्ते। ⁵² सब तेसा खे रोणे-पीटणे लगी रे थे, पर यीशुए बोलेया, “रोओ नि; कऊँकि ये मरी नि रई, पर सयी री।” ⁵³ सेयो ये जाणी की कि ये तो मरी गी री, तिना रा मजाक ऊड़ाणे लगे। ⁵⁴ पर यीशुए तेसा रा आथ पकड़ेया और बोलेया, “ओ बेटिये उठ!” ⁵⁵ तेबे तेसा रे पूराण आईगे और तेबे से फटाफट उठी गी। तेबे यीशुए तिना खे आज्ञा दिती कि एसा खे कुछ खाणे खे देयो। ⁵⁶ तेसा रे माए-बाओ हैरान ऊईगे, पर यीशुए तिना खे सावधान करी की बोलेया, “एती जो कुछ ऊआ, से केली गे नि बताणा।”

9

ⓂⓂⓂⓂ ⓂⓂⓂⓂⓂⓂ ⓂⓂ ⓂⓂⓂⓂⓂⓂ

(ⓂⓂⓂⓂⓂ 10:5-15; ⓂⓂⓂⓂⓂ 6:7-13)

¹ तेबे यीशुए बारा चलेया खे बुलाई की तिना खे सारिया दुष्टात्मा पाँदे और बमारिया खे दूर करने री सामर्थ और अक्क दित्तेया ² और तिना खे परमेशरो रे राज्य रा प्रचार करने और बमारा खे ठीक करने पेजे। ³ तेबे यीशुए तिना खे बोलेया, “बाटा खे कुछ नि लणा, ना डण्डा, ना चोली, ना रोटी, ना पैसे और ना दो कुरते। ⁴ जेस केली रे बी कअरे तुसे जाओ, तेथी रओ और तेथा तेई बिदा ओ। ⁵ जो कोई तुसा खे मानोगा नि, तेस नगरो ते निकलदे ऊए आपणे पैरा री तूड तेथी चाड़ी देओ, ताकि तिना पाँदे गवाई ओ।” ⁶ तेबे सेयो निकली की गांव-गांव रे सुसमाचार सुणादे ऊए और हर केथी लोका खे ठीक करदे ऊए कुमदे-फिरदे रये।

ⓂⓂⓂⓂⓂⓂⓂⓂ ⓂⓂ ⓂⓂⓂⓂⓂⓂ

(ⓂⓂⓂⓂⓂ 14:1-12; ⓂⓂⓂⓂⓂ 6:14-29)

⁷ तेबे देशो रे चौथाईया रा राजा हेरोदेस ये सब सुणी की कबराईगा, कऊँकि बऊत जणे बोलेया, “यूहन्ना बपतिस्मा देणे वाला मरे रेया बीचा ते जिऊँदा ऊईगा रा।” ⁸ कई जणेया ये कि एलिय्याह दिशेया। कईए बोलेया कि पुराणे भविष्यबक्तेया बीचा ते कोई जिऊँदा ऊईगा रा। ⁹ हेरोदेसे बोलेया, “यूहन्ने रा तो मैं सिर बडाय़ा, एबे ये कूणे, जेसरे बारे रे एडिया गल्ला सुणूआ?” तेबे तिने से देखणा चांया।

ⓂⓂⓂⓂⓂⓂⓂⓂⓂⓂ ⓂⓂ ⓂⓂⓂⓂⓂⓂⓂⓂ

(ⓂⓂⓂⓂⓂ 14:13-21; ⓂⓂⓂⓂⓂ 6:30-44; ⓂⓂⓂⓂⓂⓂⓂ 6:1-14)

¹⁰ तेबे परेरिते वापस आयी की जो कुछ तिने कित्तेया था, तिना गे बताई ता, तेबे सेयो तिना खे लग करी की बैतसैदा नाओं रे एक नगरो खे लयी गा। ¹¹ ये जाणी की पीड तेस पीछे चली पडी और से खुशिया ते तिना साथे मिलेया और तिना साथे परमेशरो रे राज्य री गल्ला करने लगेया और जो ठीक ऊणा चाओ थे सेयो ठीक कित्ते। ¹² जेबे साँज ऊणे वाली थी, तेबे बारा चलेया तिना गे आयी की बोलेया, “पीडा खे बिदा करो, ताकि चऊँ कनारे रे गांव और बस्तिया रे जाई की रओ और रोटिया रा उपाय करो, कऊँकि आसे एती सुणसाण जगा रे ए।” ¹³ यीशुए तिना खे बोलेया, “तुसेई तिना खे खाणे खे देयो।” चलेया बोलेया, “आसा गे तो पाँज रोटिया और दो मछलिया खे छाडी की ओर कुछ निए, पर आ, जे आसे जाई की इना सबी लोका खे रोटी खरीदी लईए, तो ऊई सकोआ।” सेयो लोक पाँज हजार मर्दा रे तकरीबन थे। ¹⁴ तेबे यीशुए चलेया खे बोलेया, “तिना खे पंजा-पंजा करी की बाँडी रे बठयाली देओ।” ¹⁵ तिने तेडा ई कित्तेया और सब बठयाली ते। ¹⁶ तेबे यीशुए सेयो पाँज रोटिया और दो मछलिया लईया और स्वर्गा रे कनारे देखी की धन्यवाद कित्तेया और रोटिया तोड़ी-तोड़ी की चलेया खे देंदे गये कि लोका खे देओ। ¹⁷ तेबे सब खाई की रज्जी गे और बचे रे टुकड़ेया रिया बारा टोकरिया परी की चकिया।

ⓂⓂⓂⓂⓂ ⓂⓂ ⓂⓂⓂⓂⓂⓂⓂ ⓂⓂ ⓂⓂⓂⓂⓂⓂⓂⓂ

(ⓂⓂⓂⓂⓂ 16:13-20; ⓂⓂⓂⓂⓂ 8:27-30)

¹⁸ जेबे यीशु कल्ले जे प्रार्थना करने लगी रे थे और चले तिना साथे थे, तेबे तिने चलेया ते पूछेया, “लोक माखे क्या बोलोए?” ¹⁹ तिने जवाब दित्तेया, “यूहन्ना बपतिस्मा देणे वाला, और कोई-कोई एलिय्याह और कोई-कोई ये बोलोए कि पुराणे भविष्यबक्तेया बीचा ते कोई जिऊँदा ऊईगा रा।”

20 यीशुए तिना ते पृछेया, “पर तुसे माखे क्या बोलोए?” पतरसे जवाब दित्तेया, “परमेशरो रा मसीह ।” 21 तेबे यीशुए तिना खे सावधान करी की बोलेया, “थे केसी गे नि बोलणा ।”

(***** 16:21-23; ***** 8:31-33)

22 तेबे तिने बोलेया, “मां माणूं रे पुत्रो खे जरूरी ए कि आँऊ बरूत दुःख उठाऊं, बुजुर्ग, बड़े पुरोईत और शास्त्री माखे तुच्छ जाणी की काई देओ और आँऊ तीजे दिने जिऊँदा ऊई जाऊँ ।”

(***** 16:24-28; ***** 8:34; ***** 9:1)

23 तिने सबी खे बोलेया, “जे कोई मां पीछे आऊणा चाओ, तो आपणे आपू खे ना करी की और हर रोज आपणा कूस चकी की मां पीछे आयी जाया करो। 24 कऊँकि जो कोई आपणा प्राण बचाणा चाओगा, तेस से खोणा, पर जो कोई मां पीछे आपणे प्राण खोओगा, तेस ई से बचाणा। 25 जे मांणूए खे सारी दुनिया मिली जाओ और आपणे प्राण नि रओ या तिजी रा नुकशाण ओ, तो तेसखे क्या फाईदा ऊणा। 26 जो कोई मांते और मेरी गल्ला ते शर्माओगा, माणूं रा पुत्र बी, जेबे आपणी, आपणे पिते री और पवित्तर स्वर्गदूता री महिमा साथे आऊणा, तो से बी तेसते शर्माणा। 27 आऊँ तुसा खे सच लगी रा बोलणे कि जो एती खड़ी रे, तिना बीचा ते कई एड़े ए कि जदुओ तक परमेशरो रा राज्य नि देखी लओगे, तदुओ तक नि मरने ।”

(***** 17:1-8; ***** 9:2-8)

28 इना गल्ला ते कोई आठ दिन बाद यीशु, पतरस, याकूब और यूहन्ने खे लयी की प्रार्थना करने खे पाहड़ो पाँदे गये। 29 जेबे सेयो प्रार्थना करने ई लगी रे थे, तो तिना रे मुँओ री शकल बदली गी और तिना रे टाले सफेद ऊई की चमकणे लगे। 30 तेबे देखो, मूसा और एलिव्याह, यो दोनो मर्द यीशुए साथे गल्ला करने लगी रे थे। 31 यो महिमा साथे दिखे और यीशुए रे मरने री चर्चा करने लगी रे थे, जो यरूशलेम रे ऊणे वाला था। 32 पतरस और तेसरे साथी नीजा रे थे और जेबे ठीक टंगो रे ओश आयी, तेबे यीशुए री महिमा और तिना दूई मर्दो खे, जो तिना साथे खड़ी रे थे, देखेया। 33 जेबे सेयो यीशुए गे ते जाणे लगे, तेबे पतरसे यीशुए खे बोलेया, “ओ मालक! आसा रा एती रणा ठीक ए, तो आसे तीन तम्बू बणाऊँए, एक तुसा खे, एक मूसे खे और एक एलिव्याह खे ।” तेसखे पता नि था कि से क्या बोलणे लगी रा। 34 से ये बोलणे ई लगी रा था कि एक बादल तिना पाँदे छाईगा और जेबे सेयो तेस बादलो ते किरने लगे, तो डरी गे। 35 तेबे तेस बादलो ते परमेशरो री ये आवाज आई, “थे मेरा पुत्र और मेरा चूणेया राए, एसरी सुणो ।” 36 ये आवाज ऊँदे ई यीशु तिना खे कल्ले मिले और सेयो चुप रये और तिना री कोई गल्ल तिना दिना रे किने नि बोली।

(***** 17:14-18; ***** 9:14-27)

37 और दूजे दिने जेबे यीशु पाहड़ो ते उतरे, तेबे एक बरूत बड़ी पीड़ तिना खे आयी की मिली। 38 देखो, पीड़ा बीचा ते मांणूए चींगी की बोलेया, “ओ गुरू! आऊँ तुसा ते बिनती कहुँआ कि मेरे पाऊए पाँदे कृपा करो, कऊँकि से मेरा एकलौता ए। 39 देख, एक दुष्टात्मा तेसखे पकड़ोई, ये एकदम चींगणे लगी जाओआ और से एसखे एडा मरोड़ोई कि एसरे मुँओ ते जगुड़ निकलने लगी जाओआ और एसखे माण्डी की, मुशिकला साथे छाड़ोई। 40 मैं तुसा रे चलेया ते बिनती किती कि दुष्टात्मा खे निकयाली देओ, पर सेयो नि निकयाली सके।” 41 यीशुए जवाब दित्तेया, “ओ अविश्वास करने वालेयो और टीट लोको! मां कदुओ तक तुसा साथे रणा? कदुओ तक तुसा खे सईन करुँ? तेसखे ओरे ल्याओ मांगे।” 42 से आऊणे ई लगी रा था कि दुष्टात्मे से पटकी की मकरेड्या, पर यीशु दुष्टात्मा खे बके और पाऊए खे ठीक करी की तेसरे पिते गे सम्बाली ता।

(***** 17:22,23; ***** 9:30-32)

43 तेबे सारे लोक परमेशरो री महान् सामर्या ते हैरान ऊईगे। पर जेबे सब लोक तिना सबी कामा ते जो से करो था, अचम्बा करने लगी रे थे, तो तिने आपणे चलेया खे बोलेया, 44 “चौकस रओ और यो गल्ला तुसे याद राखो, कऊँकि आऊँ माणूँ रा पुत्र माणूँआ रे आथो रे पकड़वाऊणे वाला ए।” 45 पर सेयो एसा गल्ला खे नि समजो थे और ये तिना ते छिपी री रई, ताकि तिना खे तिजी रे बारे रे पता नि लगेओ और सेयो एसा गल्ला रे बारे रे पूछणे ते तिना ते डरो थे।

ⓃⓃⓃ ⓃⓃ ⓃⓃⓃⓃ ⓃⓃⓃ
(ⓃⓃⓃⓃⓃ 18:1-5; ⓃⓃⓃⓃⓃ 9:33-37)

46 तेबे तिना बीचे ये बईस ऊणे लगी कि आसा बीचा ते बड़ा कुण ए? 47 पर यीशुए खे तिना रे मनो री गल्ल पता लगी गी, तेबे तिने एक बालक लयी की आपू गे खड़ा कितेया। 48 तेबे तिना खे बोलेया, “जो कोई मेरे नाओं ते एस बालको खे मानोआ, से माखे मानोआ, जो माखे मानोआ, से मेरे पेजणे वाले खे मानोआ, कऊँकि जो कोई तुसा बीचा ते छोटे ते छोटा ए, सेई बड़ा ए।”

ⓃⓃ ⓃⓃⓃⓃⓃⓃⓃ ⓃⓃⓃⓃ ⓃⓃⓃ, ⓃⓃ ⓃⓃⓃ ⓃⓃⓃⓃ Ⓝ
(ⓃⓃⓃⓃⓃ 9:38-40)

49 तेबे यूहन्ने बोलेया, “ओ मालक! आसे एक माणूँ तुसा रे नाओं ते दुष्टात्मा खे निकयालदा ऊआ देखेया और आसे तेसखे एड़ा करने ते ना किती। कऊँकि से तेरा चेला नि था।” 50 यीशुए तिना खे बोलेया, “तेसखे ना नि करो, कऊँकि जो तुसा रे बिरोदो रे निए, से तुसा साथे ए।”

ⓃⓃⓃⓃⓃⓃⓃⓃ ⓃⓃ ⓃⓃⓃⓃ ⓃⓃⓃⓃⓃⓃ ⓃⓃ ⓃⓃⓃⓃⓃ

51 जेबे तिना रे ऊबे चकणे रे दिन पूरे ऊणे वाले थे, तेबे तिने यरूशलेमो खे जाणे रे बारे रे पक्का विचार करी ला। 52 तेबे तिने आपू ते आगे दूत पेजे। सेयो सामरिया रे गांव रे गये, ताकि तिना खे जगा त्यार करो। 53 पर तिने लोके सेयो उतरने नि दित्ते, कऊँकि सेयो यरूशलेमो खे जाणे लगी रे थे। 54 ये देखी की तिना रे चले याकूब और यूहन्ने बोलेया, “ओ प्रभु! क्या तुसे चाओए कि आसे आज्ञा देऊँ कि सर्गों ते आग पड़ी की तिना खे स्वा करी देओ।” 55 पर यीशु मुडी की तिना खे बकणे लगेओ और बोलेया, “तुसे नि जाणदे कि तुसे केडी आत्मा रे ए? 56 कऊँकि माणूँ रा पुत्र लोका रे प्राणा खे नाश करने नि, बलिक बचाणे खे आयी रा।” तेबे सेयो केसी ओरी रे नगरो खे चली गे।

ⓃⓃⓃⓃⓃ ⓃⓃ ⓃⓃⓃⓃ ⓃⓃⓃⓃⓃ ⓃⓃ ⓃⓃⓃ
(ⓃⓃⓃⓃⓃ 8:19-22)

57 जेबे सेयो बाटा रिये चलणे लगी रे थे, तेबे किने तिना खे बोलेया, “जेती-जेती तुसे जाओगे, मां तुसा पीछे चली पड़ना।” 58 यीशुए तेसखे बोलेया, “गीदड़िया रे डवार और सर्गों रे पंछिया रे बसेरे ओए, पर मां माणूँ रे पुत्रो खे सिर राखणे बी आपणा कअर निए।” 59 यीशुए दूजे खे बोलेया, “मां पीछे आयी जा।” तिने बोलेया, “ओ प्रभु, पईले माखे जाणे दे, कि आऊँ आपणे पिते खे दबाई आऊँआ। तेबे तां पीछे चली पड़ुंगा।” 60 यीशुए तेसखे बोलेया, “जो आत्मिक रूपो रे मरे रे ए तिना खे आपणे मुड़दे दबाणे दे, पर तू जाई की परमेशरो रे राज्य रा सुसमाचार सुणा।” 61 एकी ओरी बी बोलेया, “ओ प्रभु! मां तुसा पीछे आयी जाणा, पर पईले माखे जाणे दे, ताकि आऊँ आपणे कअरो वालेया ते विदा लऊँ।” 62 यीशुए तेसखे बोलेया, “जो कोई आपणा आथ अलो पँदि राखी की पीछे देखोआ, से परमेशरो रे राज्य जोगा निए।”

10

ⓃⓃⓃⓃⓃ ⓃⓃⓃⓃⓃⓃⓃⓃ ⓃⓃ ⓃⓃⓃⓃⓃ

1 इना गल्ला ते बाद प्रभुए सत्तर और चले ओर नियुक्त कित्ते और जेती-जेती नगर और जगा रे सेयो आपू जाणे वाले थे, तती तिने सेयो दो-दो करी की आपू ते आगे पेजे 2 और यीशुए तिना खे बोलेया, “पाक्के रे डोरू तो बऊत ए, पर मजूरदार कम ए इजी री खातर डोरूआ रे मालको ते प्रार्थना करो कि सेयो आपणे डोरूआ बडाणे खे मजूरदार पेजो। 3 जाओ; देखो, आऊँ तुसा खे पेडा जेड़ तिना लोका बीचे पेजुँआ जो भेड़िए जेड़े खतरनाक ए। 4 तेबेई तो ना बटुआ, ना चोली, ना जोड़े

लणे और ना ई वाटा रे केसी खे नमस्ते करनी। ⁵ जेस केसी रे कअरो रे जाओ पईले बोलो, 'एस कअरो रा कल्याण ओ।' ⁶ जे तेती कोई कल्याणो जोगा ओगा, तो तुसा रा कल्याण तेसखे लगणा, नई तो तुसा गे वापस आयी जाणा ⁷ और तेसी कअरो रे रओ और जो कुछ तुसा खे खाणे-पीणे खे मिलो, खाओ-पीओ, कऊँकि मजूरदारो खे तिना री मजदूरी मिलणी चाईयो; और कअरे-कअरे जाई की नि कूमणा

⁸ "और जेते नगरो रे जाओ और तेथो रे लोक तुसा खे मानो, तो जो सेयो तुसा रे सामणे राखो, सेई खाओ। ⁹ तेथो रे बमारा खे ठीक करो और तिना खे बोलो कि परमेशरो रा राज्य तुसा रे नेडे आयी पऊँछी रा। ¹⁰ पर जेस नगरो रे जाओ और तेथो रे लोक तुसा खे नि मानो, तो तिना रे बजारो रे जाई की बोलो ¹¹ तुसा रे नगरो री तूड बी जो म्हारे पैरो रे लगगी री, आसे तुसा सामणे चाडी देऊँए, तेवे बी ये जाणी लो कि परमेशरो रा राज्य तुसा रे नेडे आयी पऊँछी रा।' ¹² आऊँ तुसा खे बोलूँआ कि तेस दिने, तेस नगरो री दशा ते, सदोम नगरो री दशा जादा सईणे जोगी ऊणी।

~~~~~  
(~~~~~ 11:20-24)

<sup>13</sup> "हाय खुराजीन! हाय बैतसैदा! जो सामथो रे काम तुसा रे कित्ते, जे सेयो सूर और सैदा रे नगरा ऊँदे, तो टाट टखी की और स्वाई बीचे बैठी की सेयो कदका मन फिराई देंदे। <sup>14</sup> पर न्याय रे दिना रे तुसा री दशा ते, सूर और सैदा री दशा जादा सईणे जोगी ऊणी। <sup>15</sup> ओ कफरनहूम! क्या तूँ स्वर्गो तक ऊच्चा करेया जाणा? तूँ तो नरको तक थाले करेया जाणा। <sup>16</sup> जो तुसा री सुणोआ, से मेरी सुणोआ और जो तुसा खे तुच्छ जाणोआ, से माखे तुच्छ जाणोआ और जो माखे तुच्छ जाणोआ, से मेरे पेजणे वाले खे तुच्छ जाणोआ।"

~~~~~

¹⁷ सेयो सत्तर चले खुश ऊई की आयी की फेर बोलणे लगे, "ओ परभु! तुसा रे नाओं ते दुष्टात्मा बी आसा रे वशो रे ए।" ¹⁸ यीशुए तिना खे बोलेया, "आऊँ शैतानो खे बिजलिया जेड़ा, स्वर्गो ते ऊतरदा ऊआ देखणे लगगी रा था। ¹⁹ देखो; मैं तुसा खे सापो और बिच्छुआ खे केसणे रा और तुसा रे दुश्मण शैतानो री सारी सामथा पॉदे अक्क देई राखेया और केसी बी चीजा ते तुसा खे नुकशाण नि ऊणा। ²⁰ तेवे बी इजी ते खुश नि ओ कि दुष्टात्मा तुसा रे वशो रे, पर इजी ते खुश ओ कि तुसा रे नाओं स्वर्गो रे लिखे रे।"

~~~~~

(~~~~~ 11:25-27; 13:16,17)

<sup>21</sup> तेसी बखते यीशु पवित्तर आत्मा रे खुश ऊई की बोलणे लगे, "ओ पिता! स्वर्ग और तरतिया रे परभु! आऊँ तुसा रा धन्यवाद करूँआ कि तुसे यो गल्ला ज्ञानी और समजदारा ते लकोई रिया राखिया और बालका गे बताईया। आ,ओ पिता! कऊँकि तुसा खे येई खरा लगेया। <sup>22</sup> मेरे पिते मांगे सब कुछ सम्बाली ता रा, और कोई नि जाणदा कि पुत्र कूणे? बस पिता और पिता कूणे? ये बी कोई नि जाणदा। बस पुत्र और जेस पॉदे पुत्र परगट करना चाओ।" <sup>23</sup> तेवे तिने चलेया री तरफा खे फिरी की बोलेया, "धन्य ए सेयो आखी, जो इना गल्ला खे जो तुसे देखोए, सेयो बी देखोईया। <sup>24</sup> कऊँकि आऊँ तुसा खे बोलूँआ कि बऊत सारे भविष्यबक्ते और राजे चाया कि जो गल्ला तुसे देखोए, देखो, पर देखी नि सके और जो गल्ला तुसे सुणोए, सुणो, पर सुणी नि सके।"

~~~~~

²⁵ एक दिन जेवे यीशु लोका खे उपदेश देणे लगगी रे थे तेवे एक धर्मशास्त्री उठेया और ये बोली की तिना री परीक्षा करने लगेया, "ओ गुरु! अनन्त जीवनो रा बास ऊणे खे आऊँ क्या कई?" ²⁶ यीशुए तेसखे बोलेया, "मूसे रा विधानो रे क्या लिखी राखेया? तूँ तिजी रा बखाण कियोँ करेया?" ²⁷ तिने जवाब दिन्तेया, "तूँ परभु आपणे परमेशरो साथे आपणे पूरे मन, पूरे प्राण, पूरी शक्ति और

परिया अक्ला साथे प्यार राख और आपणे पड़ोसिये खे आपू जेड़ा प्यार राख ।” 28 यीशुए तेसखे बोलेया, “तैं ठीक बोलेया, येई कर, तो तां अनन्त जिन्दगी पाणी ।”

29 पर तिने आपणे आपू खे तर्मी ऊणे री तंई पृछेया, “तो मेरा पड़ोसी कूणे?” 30 यीशुए बोलेया, “एक माणू यरूशलेमो ते यरीहो नगरो खे जाणे लगी रा था, तेबे डाकूए से पकड़ेया और तेसरे टाले खुलाई ते और तेसखे कुटी की और अदमुआ करी की चली गे । 31 तेबे एड़ा ऊआ कि तेसा ई बाटा ते एक यहूदी पुरोईत जाणे लगी रा था, पर तेसखे देखी की बिना मताद कित्ते गलयान करी की चली गा । 32 ईयां ई एक लेवी जो मन्दरो रे काम करोआ तिसिये आया, से बी तेसखे देखी की बिना मताद कित्ते गलयान करी की चली गा । 33 पर सामरी प्रदेशो रा एक यात्री तिसिये आया । जेबे तेसरी नजर तेस काईल माणूए पाँदे पड़ी, तेबे तेसखे देखी की तेस सामरिये खे तेस पाँदे तरस आईगा । 34 तेबे तिने तेसगे आयी की, जेती बूड़ी री थी, तेती तेल और दवाई लगाई की और पटटिया बानिया और आपणी सवारिया पाँदे चढ़ाई की संरायी खे लयी गा और तेसरी सेवा कित्ती । 35 दूजे दिने आयी की तिने दो चाँदिए रे सिक्के निकयाली की संरायी रे मालको खे दित्ते और बोलेया, ‘एसरी सेवा करनी और जो कुछ तेरा ओर लगणा से जेबे आऊँ वापस आऊणा, तेबे ताखे देई देऊंगा ।’ 36 एबे बताओ कि जो डाकूआ रे गेडे रे आईगा था, इना तित्ते बीचा ते तेसरा पड़ोसी कूणे?” 37 तिने बोलेया से, “जिने तेस पाँदे दया कित्ती ।” यीशुए तेसखे बोलेया, “जा तूँ बी एड़ा ई कर ।”

?????? ?? ??????? ?? ???? ???? ?

38 यीशु और तिना रे चले सफर करदे ऊए एक गांव रे पऊँछे, जेती मार्था नाओं री एक जवाणसे सेयो आपणे कअरे बुलाए । 39 मरियम नाओं री तेसा री एक बईण थी, से यीशुए रे पैरा गे बैठी की तिना रा उपदेश सुणने लगी री थी । 40 पर मार्था कअरो रा काम करी-करी की थकी गी और तिना गे आयी की बोलणे लगी, “ओ प्रभु! क्या तुसा खे पता निए कि मेरी बईणे आऊँ कअरो रा काम करने खे कल्ली छाडी ती री? तो एसा खे बोलो कि मेरी मताद कर ।” 41 यीशुए तेसा खे बोलेया, “मार्था ओ मार्था! तूँ बऊत गल्ला री चिन्ता करेई और कबराएई । 42 पर एक गल्ल जरूर ए और से उत्तम इस्सा मरियमे चूणी ला रा, जो तेसा ते छुड़ाया नि जाणा ।”

11

?????? ?? ?????????? ???? ???? ?

(?????? 6:9-13)

1 तेबे यीशु एकी जगा रे प्रार्थना लगी रे थे करने और जेबे सेयो प्रार्थना करी चुके, तेबे तिना रे चलेया बीचा ते एकी जणे तिना खे बोलेया, “ओ प्रभु! जिंयाँ यूहन्ने आपणे चलेया खे प्रार्थना करना सिखाया, तियाँ ई तुसे बी आसा खे सिखाई देओ ।” 2 यीशुए तिना खे बोलेया, “जेबे तुसे प्रार्थना करो, तो बोलो;

“ओ पिता तुसा रा नाओं पवित्र मानेया जाओ,

तुसा रा राज्य आओ ।

3 आसा रे पूरे दिनो री रोटी,

हर दिन आसा खे देया करो ।

4 म्हारे पाप माफ करो, कऊँकि आसे बी आपणे हर एक अपराधिया खे माफ करूँए और आसा खे परीक्षा रे नि ल्याओ ।”

?????????? ?? ???? ?? ??????? ?? ???????

(?????? 7:7-11)

5 यीशुए तिना खे बोलेया, “तुसा बीचा ते कूणे कि तेसरा एक दोस्त ओ और तुसे आदी राती जाई की तेसखे बोलो कि ओ दोस्त! माखे तीन रोटिया दे । 6 कऊँकि एक यात्री मांगे आयी रा और तेसखे देणे खे मांगे कुछ निए 7 और से पीतरो ते जवाब देओ कि माखे तंग नि कर, एबे तो द्वार बंद ऊईगे रे और मेरे बालक मांगे बछ्छाऊणे रे ए, तेबेई तो आऊँ ताखे उठी की देई नि सकदा । 8 आऊँ तुसा

खे बोलूँआ कि जे तेसरा दोस्त ऊई की बी, तेसखे उठी की ना करो, तेबे बी तेसखे शर्म छाडी की मांगणे री बजअ ते, जितणी तेसखे जरूरत ए, तिथणा उठी की देणा।⁹ आऊँ तुसा खे बोलूँआ कि तुसा री जो बी जरूरत ए से परमेशरो ते माँगो और परमेशरो ते पाणे री उम्मीद बी राखो।¹⁰ कऊँकि जो कोई माँगोआ, तेसखे मिलोआ, और जो टोलोआ, से पाओआ और जो खटखटाओआ, तेसखे खोलेया जाओआ।¹¹ तुसा बीचा ते कुण एडा पिता ए कि तेसरा पाऊ तेसते रोटी माँगो और से तेसखे पाल्थर देओगा या मछली माँगो और से मछलिया रे बदले साप देओ।¹² या अण्डा माँगो और तेसखे बिच्छु देओ? ¹³ तो तेबे तुसे बुरे ऊई की आपणे बच्चेया खे खरी चीजा देणा जाणोए, तो तुसा रे स्वर्गिय पिते आपणे मांगणे वालेया खे पवित्र आत्मा कऊँ नि देणो?"

????? ???? (?????? ?? ????)
(?????? 12:22-30; ?????? 3:20-27)

¹⁴ तेबे तिने एक गूंगी दुष्टात्मा निकयाली, जेबे दुष्टात्मा निकली गी, तेबे गूंगा बोलणे लगेया और लोक हैरान ऊईगे। ¹⁵ पर तिना बीचा ते कई जणे बोलेया, "ये तो दुष्टात्मा रे सरदार शैतानो री मतादा ते दुष्टात्मा खे निकयालोआ।" ¹⁶ तेबे कईए तिना खे परखणे खे सर्गो रा एक चिह्न मांगेया।

¹⁷ पर यीशुए तिना रे मनो री गल्ल जाणी की तिना खे बोलेया, "जेस-जेस राज्य रे फूट ओई, से राज्य ऊजड़ी जाओआ। और जेस कअरो रे फूट ओई, से नाश ऊई जाओआ। ¹⁸ और जे शैतान आपणा ई बिरोदी ऊई जाओगा, तो तेसरा राज्य कियोँ बणे रा रई सकोआ? कऊँकि तुसे मेरे बारे रे तो बोलोए कि शैतानो री मतादा ते दुष्टात्मा खे निकयालोआ। ¹⁹ जे आऊँ शैतानो री मतादा ते दुष्टात्मा खे निकयालूँआ, तो तुसा री ल्वादा केसरी मतादा ते निकयालोए? इजी री खातर तिना ई तुसा रा न्याय चुकाणा। ²⁰ पर जे आऊँ परमेशरो री सामर्था ते दुष्टात्मा खे निकयालूँआ, तो परमेशरो रा राज्य तुसा रे नेडे आयी पऊँछी रा ²¹ जेबे तागतबर माणू अधियार बानी की आपणे कअरो री रखवाली करोआ, तो तेबे तेसरे कअरो री सारी सम्पति बची री रओई। ²² पर जेबे कोई तेसते बी बलवान, तेस पाँदे चढाई करी की तेसा जीती लओआ, तेबे तेसरे सेयो अधियार जिना पाँदे तेसखे विश्वास था, छुडाई लओए और तेसरी सम्पति लूटी की बांडी देओआ। ²³ जो मां साथे निए, से मेरे खलाफ ए और जो मां साथे कट्टा नि करदा, से बखरोआ।

????? ?????? ?? ????????? (???)
(?????? 12:43-45)

²⁴ "जेबे दुष्टात्मा माणूए ते निकली जाओई, तेबे से राम करने खे सूकी जगा टोलो ई और जेबे मिलदी नि, तेबे बोलोई कि मां आपणे तेस कअरो रेई, जेथा आऊँ निकली थी, वापस चली जाणा। ²⁵ और तेबे तेसा खे आयी की से, साफ-सुथरा और सजाया रा मिलोआ। ²⁶ तेबे से आपू साथे सात ओर दुष्टात्मा खे ल्याओई और सेयो तेथी बैठी जाओईया और तेस माणूए री दशा पईलकी दशा ते बी खराब ऊई जाओई।"

????? ???? ??

²⁷ जेबे यीशु इना गल्ला करने ई लगी रे थे, तेबे पीडा बीचा ते एक जवाणसे जोरे की बोलेया, "धन्य से माए जेसे ताखे जन्म देई राखेया और सेयो स्तन, जो तँ चूसी राखे।" ²⁸ यीशुए बोलेया, "आ; पर धन्य ए सेयो, जो परमेशरो रा वचन सुणोए और मानोए।"

????????? ?? ?????? ???????
(?????? 12:38-42)

²⁹ जेबे बड़ी पीडा कट्टी ऊईगी, तेबे यीशु बोलणे लगे, "एस जुगो रे लोक बुरे ए, सेयो चिह्न टोलोए, पर योना रे चिह्नो खे छाडी की तिना खे ओर कोई चिह्न नि देणा। ³⁰ जेडा योना नीनवे रे लोका खे चिह्न ऊआ, तियोँ ई माणू रा पुत्र बी एस जुगो रे लोका खे ऊणा। ³¹ देखखणो री राणी न्याय रे दिनो रे एस बखतो रे लोका साथे उठणी और सेयो दोषी ठरणे, कऊँकि से सुलेमानो रा ज्ञान सुणने खे तरतिया रे दूजे कनारे पाँदा ते आयी थी और देखो एती तो से ए, जो सुलेमानो ते बी बड़ा

ए। ³² नीनवे रे लोक न्याय रे दिनो दे, एस बखतो रे लोका साथे खड़े ऊई की, सेयो दोषी ठराणे, कऊँकि तिने योना रा प्रचार सुणी की मन फेरया और देखो एती से ए, जो नीनवे ते बी बड़ा ए।

ⓂⓂⓂⓂⓂⓂ ⓂⓂ ⓂⓂⓂⓂ

(ⓂⓂⓂⓂⓂ 5:15; 6:22,23)

³³ “कोई बी माणू दिऊए खे टोकरूए निठे या पैमाने ते थाले नि राखदा, पर फटिया पाँद राखोआ, ताकि पीतरे आऊणे वालेया खे प्रयासा ओ। ³⁴ तेरे शरीरो रा दिऊआ, तेरी आखी ए, तेबेई तो जेबे तेरी आखी साफ ए, तो तेरे सारे शरीरो रे बी प्रयासा ऊणा; पर जे से बुरी ए, तो तेरे शरीरो रे बी न्हेरा ए। ³⁵ इजी री खातर चौकस रणा कि जो सफाई ताँदे आए, से मईली नि ऊई जाओ। ³⁶ तेबेई तो जे तेरा सारा शरीर साफ ए और तीजी रा कोई बी इस्सा मईला नि ए, तो तेबे सारी जगा रे एड़ा प्रयासा ऊणा, जेड़ा तेस बखते ओआ, जेबे दिऊआ आपणी चमका ते ताखे प्रयासा देओआ।”

ⓂⓂⓂⓂⓂⓂⓂⓂ ⓂⓂ ⓂⓂⓂⓂⓂⓂⓂⓂ ⓂⓂ ⓂⓂⓂⓂⓂⓂⓂⓂ

(ⓂⓂⓂⓂⓂ 23:1-36; ⓂⓂⓂⓂⓂ 12:38-40)

³⁷ जेबे यीशु इना गल्ला करने लगी रे थे, तेबे एक फरीसिये तिना ते बिनती किचि कि मेरे कअरे रोटी खाओ और तेबे सेयो पीतरे जाई की रोटी खाणे बैठे। ³⁸ फरीसी ये देखी की हैरान ऊईगा कि ये रोटी खाणे ते पईले नाया नि। ³⁹ यीशुए तेसखे बोलेया, “ओ फरीसियो! तुसे तिना कटोरे और थालिया जेड़े ए, जिना खे पाँदा-पाँदा ते तो मांजी लओए, पर पितरे तिना रे गन्दगी परी री रओई। ⁴⁰ ओ मूर्खो! जिने बारला इस्सा बणाई राखेया, क्या तिने पितरला इस्सा नि बणाया? ⁴¹ पर आ; पितरलिया चीजा खे दान करी देओ, तो देखो, सब कुछ तुसा खे शुद्ध ऊई जाणा।

⁴² “पर ओ फरीसियो! तुसा पाँद हाय! तुसे पदीने, सुदाब और सब पांती-पांती रे साग पातो रा दसुआ पाअग देओए, पर न्याय और परमेशरो रे प्यारो खे टाली देओए, तुसा खे चाईयो था कि इना खे बी करदे रंदे और तिना खे पनि छाडदे। ⁴³ ओ फरीसियो तुसा पाँद हाय! तुसे प्रार्थना रे कअरो रे खास-खास आसण और बजारो रे नमस्ते चाओए। ⁴⁴ तुसा खे हाय! कऊँकि तुसे तिना छिपी री कबरा जेड़े ए, जिना पाँद लोक चलोए, पर जाणदे नि।”

⁴⁵ तेबे एक धर्मशास्त्री तिना खे जवाब दित्तेया, “ओ गुरू! इना गल्ला करने ते तुसे म्हारी निन्दा लगी रे करने।” ⁴⁶ यीशुए बोलेया, “ओ धर्मशास्त्री! तुसा पाँद हाय! तुसे लोका खे एड़े-एड़े कड़े नियम मानणे खे मजबूर करो थे जिना खे मानणा तिना बऊत कठण ए। पर आपू तिना नियमा खे मानणे री बी कोशिश तक नि करदे। ⁴⁷ हाय तुसा खे! तुसे तिना भविष्यबक्तेया रिया कबरा बणाओए, जो तुसा रे बाप-दादेया काये थे। ⁴⁸ तो तुसे गवा ए और आपणे बाप-दादेया रे कामो ते सईमत ए। कऊँकि तिने सेयो काये और तुसे तिना खे कबरा बणाओए। ⁴⁹ तेबेई तो परमेशरो री बुद्धि ए बी बोलेया कि मां तिना गे भविष्यबक्ता और परेरित पेजणे और तिना, तिना बीचा ते कितणे जणे काणे और कितणे जणे सताणे। ⁵⁰ ताकि जितणे बी भविष्यबक्ते रा खून दुनिया री शुरूआता ते बाह्यी राखेया, सबी रा लेखा एस जुगो रे लोका ते लया जाओ।

⁵¹ “हाबिलो री अत्या ते लयी की जकरयाहो री अत्या तक, जो बेदिया ते लयी की मन्दरो रे बीचा तक काया, आऊँ तुसा खे सच बोलूँआ कि तीजी रा लेखा एस बखतो रे लोका ते लया जाणा। ⁵² हाय तुसा धर्मशास्त्री खे! कऊँकि तुसे ज्ञानो री कुँजी लयी तो लयी, तुसे ना तो आपू ई तेंती जाँदे और ना ई तिदे जाणे वालेया खे जाणे दँदे।” ⁵³ जेबे यीशु तेथा ते निकले, तेबे शास्त्री और फरीसी बऊत पीछे पड़ी गे और तिना खे छेड़ने लगे कि सेयो मुखती सारिया गल्ला बताओ। ⁵⁴ और तिना री ताका रे लगे रये कि तिना रे मुओ री केंसी गल्ला खे पकड़िए।

12

ⓂⓂⓂⓂⓂⓂⓂⓂ ⓂⓂ ⓂⓂⓂⓂⓂⓂⓂⓂⓂⓂⓂⓂⓂⓂ

(ⓂⓂⓂⓂⓂ 10:26-27)

1 तद्दुओ की जेबे हजारा री पीड़ लगी गी, एधो तक कि एकी-दूजे पाँदे पड़ने लगी रे थे। तेबे यीशु सबी ते पईले आपणे चलेया खे बोलणे लगे, “फरीसिये रे कपटी सजेडे ते चौकस रणा। 2 कुछ बी टकेया रा निए, जो खोलेया नि जाणा और ना कुछ छिपेया राए, जो जाणी नि सकदे। 3 तेबेई तो, जो कुछ तुसे न्हरे रे बोली राखेया, से सामणे मुण्येया जाणा और जो तुसे कोठरिया रे आपणे कानो रे खसफस करी की बोली राखेया, से छतोर पाँदो ते बोलेया करो।

☞☞☞☞ ☞☞☞☞ ☞☞☞☞
(☞☞☞☞ 10:28-31)

4 “आऊँ तुसा खे, जो मेरे दोस्त ए, बोलूँआ कि जो शरीरो खे काओए, पर तीजी ते पीछे ओर कुछ नि करी सकदे, तिना ते नि डरो। 5 आऊँ तुसा खे बताऊँआ कि केस ते डरना चाईयो, घात करने ते बाद, जेसखे नरको रे सेटणे रा अक्क ए, तेसते ई डरो; बल्कि आऊँ तुसा खे बोलूँआ कि तेसते ई डरो। 6 दो पैसे रिया पाँज चिडिया बिकाईया? तेबे बी परमेशर तिना बीचा ते एकी खे पनि पुलदा। 7 बल्कि तुसा रे सियो रे बाल बी सारे गिणे रे ए, तो डरो नि, तुसे बऊत चिडिया ते बढ़ी की ए।

☞☞☞☞☞ ☞☞☞☞☞☞☞☞ ☞☞☞☞☞
(☞☞☞☞☞ 10:32,33; 12:32; 10:19,20)

8 “आऊँ तुसा खे बोलूँआ कि जो कोई माणूआ सामणे माखे मानी लओगा, तेबे से बी मां माणू रे पुत्रो परमेशरो रे स्वर्गदूता सामणे मानी लणा। 9 पर जो माणूआ सामणे माखे ना करो, तेसखे परमेशरो रे स्वर्गदूता सामणे ना ऊणी। 10 जो कोई माणू रे पुत्रो रे खलाफ कोई गल्ल बोलोगा, तेसरा से अपराध माफ ऊई जाणा, पर जो कोई पवित्तर आत्मा री निन्दा करोगा, तेसरा से अपराध माफ नि ऊणा 11 जेबे लोक तुसा खे प्रार्थना रे कअरो रे, हाकिम और अधिकारिए सामणे लयी जाओगे, तो चिन्ता नि करना कि आसे कियाँ और क्या जवाब देईए। 12 कऊँकि पवित्तर आत्मा तुसा गे तेसी बखते बताई देणा कि क्या बोलणा चाईयो।”

☞☞☞☞☞☞☞☞☞☞☞☞☞☞☞☞☞☞☞☞☞☞

13 तेबे पीड़ा बीचा ते एकी जणे यीशुए खे बोलेया, “ओ गुरू! मेरे पाईयो खे बोलो कि पिते री सम्पति माखे बांडी दे।” 14 यीशुए तेसखे बोलेया, “ओ माणू! आऊँ किने तुसा रा न्यायी और बांडणे वाला बणाई राखेया?” 15 तेबे तिने तिना खे बोलेया, “चौकस रओ; और हर प्रकारा रे लोबो ते आपू खे बचाई की राखो, कऊँकि केसी री बी जिन्दगी, तेसरी सम्पतिया ते बड़ी नि ऊँदी।”

16 यीशुए तिना खे एक उदारण बोलेया, “एक धनवानो री जमीनारे मुखती फसल ऊई। 17 तेबे से आपणे मनो रे सोचणे लगेया कि आऊँ क्या करूँ? कऊँकि मांगे तो जगा निए, जेती आपणी फसल बगैरा राखूँ। 18 तेबे तिने सोचेया कि मां आपणे पण्डार तोड़ी की ओर बड़े पण्डार बनाणे और तेती मां आपणी सारी फसल और सम्पति राखणी 19 और तिजी ते बाद आपणे प्राणो खे बोलणा कि ओ प्राण! ताखे कई साला तक मुखती सम्पति राखी ती री; चैन कर, खा-पी सुखो साथे रओ। 20 पर परमेशरे तेसखे बोलेया, ‘ओ मूर्ख! आज की राती ई तेरी मौत ऊई जाणी, तेबे जो कुछ तें कट्टा करी राखेया, से केसरा ऊणा?’ 21 एड़ा ई से माणू बीए, जो आपू खे पैसा कट्टा करी राखेया, पर परमेशरो री नजरा रे अमीर निए।”

☞☞☞☞☞☞☞☞☞☞☞☞☞☞☞☞☞☞☞☞☞☞
(☞☞☞☞☞ 6:25-34)

22 तेबे यीशुए आपणे चलेया खे बोलेया, “तेबेई तो आऊँ तुसा खे बोलूँआ कि आपणी जिन्दगिया रे बारे रे ये चिन्ता नि करो कि आसे क्या खाऊँगे, ना आपणे शरीरो रे बारे रे कि क्या पईनुँगे। 23 कऊँकि रोटिया ते जिन्दगी और टालेया ते शरीर केथी जादा किमती ए। 24 कावा पाँदे त्यान देओ, सेयो ना बाँदे, ना बाडदे, ना तिना रे पण्डार ए और ना पेदू ऊँदा, तेबे बी परमेशर तिना खे पालोआ, तुसा री कीमत पंछिया ते केथी बढ़ी की ए। 25 तुसा बीचा ते एड़ा कुण ए, जो चिन्ता करी की आपणिया जिन्दगिया री एक कअड़ी बी बढ़ाई सकीआ? 26 तेबेई तो जे तुसे सबी ते छोटो काम पनि करी सकदे, तो ओरी बड़ी गल्ला खे चिन्ता करी क्या फाईदा? 27 बाँक जंगली फूला पाँदे त्यान करो कि

सेयो कियौ बडोए, सेयो ना तो मईणत करदे, ना आपू खे टाले बणाओए, तेबे बी आऊँ तुसा खे बोलूँआ कि राजा सुलेमान बी आपणे सारे एशो-आरामो रे बी, तिना बीचा ते केसी एकी जेडे बी टाले नि पईने रा था। ²⁸ तेबेई तो जेबे परमेशर मैदानो रे काओ खे, जो आज आए, और काल आगी बीचे फूकी देणा, तो जो तिदे बी एडे बांके फूल खिलाओआ, तो ओ कम विश्वास करने वालेयो! तुसा खे तेस इना ते बढी की बांके टाले कऊँ नि पनयाणे? ²⁹ और तुसे एसा गल्ला री टोला रे नि रओ कि आसे क्या खाऊँगे, क्या पिऊँगे और ना शक करो। ³⁰ कऊँकि दुनिया री जातिया इना सबी चीजा री टोला रे रओईया और तुसा रा पिता जाणोआ कि तुसा खे इना सबी चीजा री जरूरत ए। ³¹ पर परमेशरो रे राज्य री टोला रे रओ, तो यो सब चीजा बी तुसा खे मिली जाणिया।

~~~~~  
 (~~~~~ 6:19-21)

<sup>32</sup> “ओ छोटै चूण्ड, डर नि; कऊँकि तुसा रे पिता परमेशरो खे ये अच्छा लगेया कि तुसा खे राज्य देऊँ। <sup>33</sup> आपणी सम्पति बेची की दान करी देओ और आपू खे एडे बटुए बणाओ, जो पुराणे नि ऊँदे, मतलब-स्वर्गो रे एडा धन कट्टा करो, जो कट्टा नि और तीजी रे नेडे चोर नि जांदा और कीडा नि खांदा। <sup>34</sup> कऊँकि जेती तुसा रा धन ए, तेती तुसा रा मन बी लगेया रा रणा।

~~~~~

³⁵ “तुसा परमेशरो रा काम करने खे सदा त्यार रओ और मसीह रे आऊणे रे बखते और तेसखे ग्रहण करने खे एडे त्यार रओ जेडे दिऊए बलदे दिऊए रओ। ³⁶ मेरे वापस आऊणे खे तिना दासा जेडे त्यार रओ, जो आपणे स्वामिए खे न्यालदे रओए कि से ब्याओ ते कदी जे आऊणा कि जेबे से आओ और द्वार खटखटाओ तो तेसखे फटाफट खोलेया जाओ। ³⁷ धन्य ए सेयो दास, जिना खे स्वामी आयी की जागदे ऊए देखोए, आऊँ तुसा खे सच बोलूँआ कि स्वामिए एडे टाले पईनणे जेडे दास पईनोए और तेस दासा खे बठयाली की से रोटी खाणे खे देणी जो तिने ब्याओ ते पिरया ल्याई राखेया। ³⁸ जे सेयो तिना खे राती रे दूजे या तीजे पईरे आयी की जागदा ऊआ पाओ, तो सेयो दास धन्य ए। ³⁹ पर तुसे जाणी लओ कि जे कअरो रा मालक जाणदा कि चोर कदी जे आऊणा, तो जागदा रंदा और आपणे कअरे चोरी नि ऊणे देंदा। ⁴⁰ तेबेई तुसे बी त्यार रओ, कऊँकि जेसा कअडिया रे बारे रे तुसे सोचदे पनि, तेसी कअडिया आऊँ माणू रा पुत्र आयी जाणा।”

~~~~~  
 (~~~~~ 24:45-51)

<sup>41</sup> तेबे पतरसे बोलेया, “ओ प्रभु! क्या तुसे ये उदारण आसा खेई बोलणे लगी रे या सबी खे।” <sup>42</sup> यीशुए बोलेया, “एक विश्वासो जोगा और अक्लमंद पण्डारी एडा ए: जेसखे कअरो रा मालक दूजे दासा पंदि निगरानी और बखतो पंदि रोटी देणे खे जिम्मेवारी देओआ। तिजी ते बाद से परदेशो खे चली जाओआ। <sup>43</sup> धन्य ए से दास, जेसखे तेसरा मालक आयी की एडा ई करदा ऊआ पाओ। <sup>44</sup> आऊँ तुसा खे सच लगी रा बोलणे कि तेस से आपणी सारी सम्पतिया पंदि अक्कदार ठराणा। <sup>45</sup> पर जे से दास सोचणे लगी कि मेरा मालक आऊणे रे देर करने लगी रा और दास-दासिया खे कुटणे-फानणे और खाणे-पीणे और पियक्कड ऊणे लगी <sup>46</sup> तो तेस दासो रा मालक एडे दिने आऊणा, जेबे से तेसखे न्यालदा ई ना ओ और एडिया कअडिया दे, जेतेखे से नि जाणदा ओ। तेबे तेस तेसखे बऊत दण्ड देणा और तेसरा इस्सा कपटिया साथे ठराणा। <sup>47</sup> से दास, जो आपणे मालको री इच्छा जाणोआ पर त्यार नि रया और ना तेसरी इच्छा रे मुताबिक चलेया, तो तेस बऊत मार खाणी। <sup>48</sup> पर जो ना जाणी की मार खाणे जोगा काम करोगा, तेस थोड़ी मार खाणी, तेबेई तो जेसखे बऊत देई राखेया, तेसते बऊत मांगेया जाणा और जेसगे बऊत सम्बाली राखेया, तेसते बऊत लया जाणा।

~~~~~  
 (~~~~~ 10:34-36)

⁴⁹ “आऊँ तरतिया पंदि आग लगाणे आयी रा और ये चाऊँआ कि एबु ई सुलगी जांदी। ⁵⁰ मां तो एक दु:खदाई बपतिस्मा लणा ए और जदुओ तक से नि ऊई लो, तदुओ तक आऊँ केडिया दशा रे

रणा? 51 क्या तुसे एड़ा समजोए कि आऊँ तरतिया पाँदे मेल-जोल करने आयी रा? आऊँ बोलूँआ कि ना, बल्कि लग करने आयी रा। 52 कऊँकि आजो ते एकी कअरे पाँज जणे बिरोदी रणे। तीना, दूँई ते और दूँई तीना ते। 53 पिते पाऊए ते और पाऊए, पिते ते, माया बेटिया ते और बेटिया माया ते, सासुआ बऊआ ते और बऊआ सासुआ ते बिरोद राखणा।”

ⓂⓂⓂⓂ ⓂⓂ ⓂⓂⓂⓂ
(ⓂⓂⓂⓂ 16:2,3)

54 यीशुए पीड़ा खे बी बोलेया, “जेबे बादलो खे पच्छमा ते उडदे ऊए देखोए, तेबे फटाफट बोलोए कि बखाँ ऊणी और एड़ा ई ओआ। 55 और जेबे अवा दक्खणो खे चलदी ऊई देखोए, तो बोलोए कि लू चलणी और एड़ा ई ओआ। 56 ओ कपटियो! तुसे तरती और सर्गो रे रूप-रंगो रे भेद करी सकोए, पर एस जुगो रे बारे रे कऊँ भेद करना नि जाणदे?”

ⓂⓂⓂⓂ ⓂⓂⓂⓂⓂⓂⓂⓂ ⓂⓂⓂⓂ ⓂⓂⓂⓂⓂⓂ
(ⓂⓂⓂⓂ 5:25,26)

57 “तुसे आपू ई न्याय कऊँ नि करी लंदे कि अच्छा क्या ए? 58 जेबे तूँ आपणे दुश्मणो साथे हाकिमो गे जाणे लगी रा, तो बाटा रेई तेसते छुटणे री कोशिश करी लो, एड़ा नि ओ कि से ताखे न्यायियो गे खिंजी की ल्याओ और न्यायी ताखे सिपाईया गे देयो और सिपाई ताखे जेला रे पाई देओ। 59 आऊँ तुसा खे बोलूँआ कि जदुओ तक तुसे दमडी-दमडी (पाई-पाई) नि देई देओगे, तदुओ तक तेथा ते छुटणा नि।”

13

ⓂⓂ ⓂⓂⓂⓂ ⓂⓂ ⓂⓂⓂ Ⓜ

1 तेस बखते कुछ लोक आए और यीशुए खे बोलेया कि पिलातुसे गलील प्रदेशो रे कुछ लोका री अत्या करी ती, जेबे सेयो मन्दरो रे बलिदान करने चढ़ाणे लगी रे थे। 2 ये सुणी की यीशुए तिना खे जवाब दित्तेया, “क्या तुसे समजोए कि यो गलीली लोक ओर सबी गलीलिया ते जादा पापी थे कि तिना पाँदे एड़ी बिपदा पडी? 3 आऊँ तुसा खे बोलूँआ कि ना; पर जे तुसे मन नि फेरोगे तुसे बी सब ईयाँ ई नाश ऊणे। 4 या तुसे समजोए कि सेयो ठारा जणे जिना पाँदे श्रीलोहो रा गुम्मत पड़ेया था और सेयो दबी की मरी गे थे, क्या यरूशलेम और सबी रणे वालेया ते जादा पापी थे? 5 आऊँ तुसा खे बोलूँआ कि ना, पर जे तुसे मन नि फेरोगे, तो तुसे बी ईयाँ ई नाश ऊणे।”

ⓂⓂⓂⓂ ⓂⓂ ⓂⓂⓂⓂ ⓂⓂⓂⓂⓂⓂⓂⓂ ⓂⓂ ⓂⓂⓂⓂⓂⓂ ⓂⓂ ⓂⓂⓂⓂⓂⓂ

6 तेबे यीशुए ये उदारण सुणाया, “कसी रे अंगूरा रे बगीचे रे दाऊगले रा एक डाल लगी रा था, से तिदे फल टोलने आया, पर मिलेया नि। 7 तेबे तिने बगीचे रे रखवाले खे बोलेया, ‘देख आऊँ तीन साला ते इदे फल टोलने आऊँआ, पर मिलदा नि, एसखे बाडी दे, ताकि ये खरी जमीना खे पनि रोको।’ 8 तिने तेसखे बोलेया कि ओ स्वामी! एसखे एस सालो रे ओर रणी दे कि आऊँ एतेरे चऊँ कनारे खणी की खाद सेटूँ। 9 तो जे आगो खे फल लगेया तो ठीक, नई तो बाडी देयो।”

ⓂⓂⓂⓂⓂⓂ ⓂⓂ ⓂⓂⓂⓂ ⓂⓂⓂⓂⓂⓂⓂⓂⓂⓂⓂⓂⓂⓂⓂⓂ ⓂⓂ ⓂⓂⓂⓂⓂⓂⓂ

10 आरामो रे दिने यीशु प्रार्थना रे कअरो रे उपदेश देण लगी रे थे। 11 तेबे एक जवाणस आयी, जेसा रे ठारा साला ते, कमजोर करने वाली दुष्टात्मा थी और से कुवड़ी ऊईगी थी और कियाँ बी सीदी नि ऊई सको थी। 12 यीशुए से देखी की बुलाई और तेसा खे बोलेया, “ओ जवाणसे! तूँ आपणी कमजोरिया ते छूटी गी।” 13 तेबे तिने तेसा पाँदे आथ राखे और से फटाफट सीदी ऊईगी और परमेशरो री तारीफ करने लगी। 14 कऊँकि यीशुए से आरामो रे दिने ठीक किती थी, प्रार्थना रे कअरो रा सरदार जली की लोका खे बोलणे लगेया, “अप्रते रे छे दिन ए जिदे काम करना चाईयो, तो तिना दिना रे आयी की ठीक ओ, आरामो रे दिने नि।” 15 ये सुणी की यीशुए जवाब दित्तेया, “ओ कपटियो! क्या आरामो रे दिने तुसा बीचा ते हर एक आपणे बलदा और गहदेया खे गवाईणी ते खोली की पाणी पलयाणे नि लयी जांदा? 16 तो क्या ठीक नि था कि ये जवाणस जो अब्राहमो रे वंशो ते ए

जो शैताने ठारा साला ते बानी राखी थी, आरामो रे दिने एसा खे बन्दनो ते छुड़ाया जाओ।”¹⁷ जेबे यीशुए यो गल्ला बोलिया, तेबे तिना रे सब बिरोदी शर्मिदा ऊईगे और सारी पीड़ तिना हैरान करने वालेया रे कामा ते, जो सेयो करो थे, खुश ऊई।

☞☞☞☞☞ ☞☞ ☞☞☞☞☞ ☞☞☞☞☞
(☞☞☞☞☞ 13:31,32; ☞☞☞☞☞ 4:30-32)

18 तेबे यीशुए बोलेया, “परमेशरो रा राज्य केस जेड़ा ए? और आऊँ तिजी री तुलना किजी साथे करूँ? 19 से अऊरिया रे एक दाणे जेड़ा ए, जो किने मांगूए लयी की आपणे डोरूआ रे बाया और से बड़ा ऊई की डाल बणीगा और सर्गो रे पंछिया तेते पाँदे आपणा बसेरा कित्तेया।”

☞☞☞☞☞ ☞☞ ☞☞☞☞☞
(☞☞☞☞☞ 13:33)

20 तिने फेर बोलेया, “आऊँ परमेशरो रे राज्य री उपमा किजी साथे करूँ? 21 से सजेड़े जेड़ा ए, जो एकी जवाणसे लया और बीई किलो ते जादा आटे रे गूँदी ता और ऊँदे-ऊँदे सारा आटा सजेड़ा ऊईगा।”

☞☞☞☞☞ ☞☞☞☞☞
(☞☞☞☞☞ 7:13,14; ☞☞☞☞☞ 7:21-23)

22 यीशु नगर-नगर और गांव-गांव रे आपणे चलेया साथे उपदेश देंदे ऊए यरूशलेमो खे जाणे लगी रे थे।²³ तेबे किने तिना ते पूछेया, “ओ प्रभु, क्या उद्धार पाणे वाले थोड़े ईए?” यीशुए तिना खे बोलेया, “स्वर्गो रे परमेशरो तक पऊँछणे री बाट बऊत कठण ए। पर एते बाटा रिये तुसा चलणा ईए, कऊँकि आऊँ तुसा खे बोलूँआ कि बऊत जणेया चाणा कि पीतरे जाईए, पर जाई नि सकणे।²⁵ जेबे परमेशर, कअरो रा मालक उठी की द्वार बंद करी चुकेया ओगा और तुसे बारे खड़ी की द्वार खटखटाई की बोलणे लगो, ‘ओ प्रभु! आसा खे खोली देओ,’ और से जवाब देओ, ‘आऊँ तुसा खे नि जानदा, तुसे केथो रे ए?’²⁶ तेबे तुसा बोलणे लगणा कि आसे तां सामणे खाया-पिया और तैं आसा रे बजारो रे उपदेश कित्तेया।²⁷ पर तेस बोलणा, आऊँ तुसा खे बोलूँआ, ‘आऊँ नि जानदा कि तुसे केथो रे ए? ओ कुकर्म करने वालेयो, तुसे सब मांते दूर रओ।’²⁸ तेती रोणा और दौंदा रा किरड़ना ई ऊणा; जेबे तुसा अब्राहम, इसहाक, याकूब और सब भविष्यबक्ता परमेशरो रे राज्य रे बैठे रे देखणे और आपणे आपू खे बारे निकयाले रा देखणा।²⁹ पूर्व और पच्छिम, उतर और दक्खणो रे लोका आयी की परमेशरो रे राज्य रे, साथे रोटी खाणी³⁰ पर एबे बऊत सारे लोक जो आपणे आपू खे एते दुनिया रे बड़े समजोए, सेयो परमेशरो री नजरा रे छोटे ऊई जाणे, और जिना खे संसार एबु छोटा समजोआ, सेयो परमेशरो री नजरा रे बड़े समजे जाणे।”

☞☞☞☞☞☞☞ ☞☞ ☞☞☞☞☞☞☞☞

31 तेसी कअड़िया रे बऊत फरोसिये तिना खे आयी की बोलेया, “एथा ते निकली जा, कऊँकि हेरोदेस तुसा खे काणा चाओआ।”³² यीशुए तिना खे बोलेया, “जाई की तेसा लोमड़िया खे बोली देओ कि देख, माखे आज और काल दुष्टात्मा खे निकयालने और बमारा खे ठीक करदे ऊए तीन दिन लगी जाणे।³³ तेबे वी मेरा आज, काल और परसु चलणा जरूरी ए, कऊँकि एड़ा ऊई नि सकदा कि कोई भविष्यबक्ता यरूशलेमो ते बारे मारेया जाओ।

☞☞☞☞☞☞☞ ☞☞ ☞☞☞☞☞☞☞☞
(☞☞☞☞☞ 23:37-39)

34 “ओ यरूशलेमो रे लोको, ओ यरूशलेमो रे लोको! तूँ जो भविष्यबक्तेया खे काओआ और जो तांगे पेजी राखे, तिना खे पात्थर बाएआ, कितणी बार मैं चाया कि जियाँ मुर्गी आपणे बच्चेया खे आपणे पंखो निटे कट्टा करी की समालोई, तियाँ ई आऊँ वी चाऊँआ कि तेरे बालका खे कट्टा करी की समालूँ। पर तुसे नि चाया।³⁵ देखो, तुसा रा कअर तुसा खे उजाड़ी की छाडीता। कऊँकि आऊँ तुसा खे बोलूँआ कि एबुए ते जदुओ तक तुसे नि बोलोगे, ‘भन्थ ए सेयो, जो प्रभुए रे नाओ ते आओए’ तदुओ तक तुसा आऊँ फेर कदी नि देखणा।”

14

1 तेबे यीशु आरामो रे दिन फरीसिया रे अधिकारिया बीचा ते केसी एकी रे कअरे रोटी खाणे गये और सेयो तिना रे कोई गलती टोलने री ताका रे थे, ताकि तिना पाँदे कोई दोष लगाई सको। 2 तेती एक माणू था जेसरे आधो रे और पैरा रे सोजा था 3 तेबे यीशुए धर्मशास्त्री खे और फरीसिया खे बोलेया, “क्या आरामो रे दिने अच्छा करना विधानो रे मुताबिक ठीक ए कि गलत?” 4 पर सेयो चुपचाप रये। तेबे यीशुए से आथ लगाई की ठीक कित्तेया और जाणे दित्तेया 5 और तिना खे बोलेया, “तुसा बीचा ते एडा कूणे कि जेसरा पाऊ या बलद कुँए रे पड़ी जाओ और तेस आरामो रे दिने ई तेसखे बारे नि निकयालो?” 6 सेयो इना गल्ला रा कोई बी जवाब नि देई सके।

7 जेबे यीशुए देखेया कि निऊँदे वाले लोक खास-खास जगा चूणी लओए, तेबे तिने एक उदारण सुणाई की तिना खे बोलेया, 8 “जेबे कोई ताखे ब्याओ खे बुलाओ, तो खास जगा रे नि बैठणा, केथी एडा नि ओ कि तिने तांते बी केसी बडे खे निऊँदा देई राखेया ओ। 9 और जिने ताखे और तेसखे, दूँई खे निऊँदा देई राखेया, आयी की ताखे बोलो कि एसखे जगा छडा और तेबे ताखे सबी ते शर्मिंदा ऊई की सबी ते थालली जगा रे बैठणा पड़ो। 10 पर जेबे ताखे बुलाओ, तेबे सबी ते थालली जगा रे जाई की बैठ, ताकि तेबे जिने तूँ बुलाई राखेया, से आओ और ताखे बोलो कि ओ दोस्त! आगे जे बैठ। तेबे तां साथे बैठणे वालेया सामणे तेरी तारीफ ऊणी 11 कऊँकि जो कोई आपू खे बड़ा बणाओगा, से छोटा कित्तेया जाणा और जो आपू खे छोटा बणाओगा, से बड़ा कित्तेया जाणा।”

12 तेबे यीशुए आपणे निऊँदा देणे वालेया खे बोलेया, “जेबे तूँ दिनो री या साँजा री रोटी खाए तो तेबे तैं, आपणे दोस्त, पाई, टब्वरो वाले और अमीर दोस्त नि बुलाणे, केथी एडा नि ओ कि सेयो ताखे बी निऊँदा देओ और तेरा बदला चुकाई देओ। 13 पर जेबे तूँ रोटी खाए, तेबे कंगाला खे, टूण्डेया खे, लंगडेया खे और अन्देया खे बुला। 14 तेबे तूँ धन्य ऊणा, कऊँकि तिना गे ताखे बदला देणे खे कुछ निए, पर ताखे तर्मिया लोका रे मुडदेया बीचा ते जिऊँदे ऊणे पाँदे इजी रा ईनाम मिलणा।”

(लूका 22:1-10)

15 तिना साथे रोटी खाणे वालेया बीचा ते एकी जणे इना गल्ला खे सुणी की बोलेया, “धन्य ए सेयो, जिना परमेशरो रे राज्य रे रोटी खाणी।” 16 यीशुए तेसखे बोलेया, “एकी माणूए बऊत बडिया पाट्टिया कित्तेया और बऊत जणे बुलाए। 17 जेबे रोटी त्यार ऊईगी, तेबे तिने आपणे दासो रे जरिए निऊँदा दित्ते रे लोका खे बोलेया, ‘आयी जाओ और रोटी त्यार ए।’ 18 पर सेयो सब जणे माफी मांगणे लगे, एकी जणे बोलेया, ‘मैं तो डोरू मोले लयी राखे और माखे सेयो देखणे जरूरी ए, आऊँ तांते बिनती करूँआ कि माखे माफ करी दे।’ 19 दूजे बोलेया, ‘मैं पाँज जोड़े बलदा रे खरीदी राखे और आऊँ तिना खे परखणे खे चली रा, मेरी तांते बिनती ए कि माखे माफ करी दे।’ 20 एकी ओरी बोलेया, ‘मैं ब्या करी राखेया आऊँ नि आयी सकदा।’ 21 तिने दासे सारी गल्ल मालको गे सुणाई, तेबे तिने रोषो रे आयी की आपणे दासो खे बोलेया, ‘नगरो दे, बजारो और गल्लिया रे जाई की कंगाल, लंगडे, टूण्डे और अन्देया खे एती ली आओ।’ 22 दासे फेर बोलेया, ‘जियाँ तुसे बोलेया था, तियाँ ई कित्तेया, पर फेर बी जगा ए।’ 23 स्वामिए दासो खे बोलेया, ‘सड़का ते और बाटा ते लोका खे जबरदस्ती ली आओ, ताकि मेरा कअर फरी जाओ।’ 24 कऊँकि आऊँ तुसा खे बोलूँआ कि तिना, जिना खे निऊँदा देई राखेया था, तिना निऊँदा दित्ते रे लोका बीचा ते एकी जणे पनि मेरे कअरे पाट्टी चाखणी।”

(लूका 10:37,38)

25 तेबे यीशुए पीछे एक बड़ी पारी पीड़ जाणे लगी री थी, तेबे तिने तिना खे पीछे मुड़ी की बोलेया, 26 “जे कोई मांगे आओ और आपणे माए-बाओ, लाड़ी, बाल-बच्चे, पाई, बईण, बल्कि

आपणे पुराणो ते बी बड़ी की मांते प्यार नि करो, तो से मेरा चेला नि ऊई सकदा। ²⁷जे तुसे मेरे चले बणना चाओए, पर मेरिया तंई मरने से त्यार निए और मां पीछे नि आओ, तो तुसे मेरे चले नि ऊई सकदे। ²⁸तुसा बीचा ते कूणे, जो गढ बनाणा चाओआ और पईले बैठी की खचं नि जोड़ो कि पूरा बनाणे लायक आए कि नई। ²⁹केथी एड़ा नि ओ कि जेबे निऊँ पाई की त्यार नि करी सको और सब देखणे वाले ये बोली की तेसरा मजाक ऊड़ाणे लगो ³⁰कि ये मांणू बनाणे तो लगेया, पर त्यार नि करी सकेया। ³¹या कुण एड़ा राजा ए, जो दूजे राजे साथे लड़ने जाओआ और पईले बैठी की विचार नि करी लो कि जो बीई हजार लई की मां पाँदे चढ़ाई करने आऊणे लगी रा क्या आऊँ दस हजार लई की तेसरा सामणा करी सकोआ कि नई। ³²नई तो तेसते दूर रई की तेस आपणा दूत पेजी की मिलाप करना चाणा। ³³ईयां ई तुसा बीचा ते जो कोई आपणा सब कुछ नि छाडी देओगा, से मेरा चेला नि ऊई सकदा।

ⓂⓂⓂⓂ ⓂⓂⓂⓂⓂⓂ ⓂⓂ ⓂⓂⓂⓂ
(ⓂⓂⓂⓂⓂ 5:13; ⓂⓂⓂⓂⓂ 9:50)

³⁴“लूण तो अच्छा ए, पर जे लूणो रा स्वाद बिगड़ी जाओ, तो से किजी चीजा साथे स्वाद कितेया जाणा? ³⁵से ना तो जमीना से और ना खादा से कामे आओआ, तेसखे तो लोक बारे सेटी देओए। जो समजी सकोआ से तिजी से त्यानो साथे सुणो और मानी बी लओ।”

15

ⓂⓂⓂⓂ ⓂⓂ ⓂⓂⓂⓂⓂⓂ ⓂⓂ ⓂⓂⓂⓂⓂⓂ
(ⓂⓂⓂⓂⓂ 18:12-14)

¹बऊत सारे चूगी लणे वाले और पापी यीशुए गे आया करो थे, ताकि तिना री सुणो ²तेबे फरीसी और शास्त्री कुड़कुड़ाई की बोलणे लगे, “ये तो पापिया साथे मिलोआ और तिना साथे खाओ-पीओआ।” ³तेबे यीशुए तिना से ये उदारण बोलेया, ⁴“जे तुसा बीचा ते केसी एकी गे सौ पेडा ए। तिना बीचा ते एक पेड राची जाओ, तो नड़िनूआ से जंगलो रे छाडी की तेसा एकी से जो राची री, जदुओ तक से मिली नि जाओ, तदुओ तक से तेसा से टोलदा रणा ⁵और जेबे मिली जाओई, तेबे से तेसा से बड़ी खुशिया साथे कांदा पाँदे चकी लओआ ⁶और आपणे कअरे जाईकी आपणे दोस्ता और पड़ोसिया से कटटे करी की बोलोआ कि मां साथे खुशी मनाओ, कऊँकि मेरी राची री पेड मिलीगी री। ⁷आऊँ तुसा से बोलूँआ ईयां ई एक मन फिराणे वाले पापिया रे बारे रे स्वर्गो रे बी एड़ी ई खुशी ऊणी, जितणा नड़िनूए एड़े तर्मिया रे बारे रे नि ऊणी, जिना से मन फिराणे री जरूरत निए।

ⓂⓂⓂⓂ ⓂⓂ ⓂⓂⓂⓂⓂⓂⓂⓂ ⓂⓂ ⓂⓂⓂⓂⓂⓂⓂⓂ

⁸“या कुण एड़ी जवाणस ऊणी, जेसा गे दस सिक्के ओ और तिना बीचा ते एक राची जाओ और से दिऊआ बाली की सारे कअरो रे सुण-प्वार करी की, जदुओ तक मिली नि जाओ, तदुओ तक मन लगाई की टोलदी नि रओ? ⁹और जेबे मिली जाओआ, तेबे से आपणी सेलिया और पड़ोसणिया से कटटी करी की बोलोई कि मां साथे खुशी मनाओ, कऊँकि मेरा राचे रा सिक्का माखे मिली गा रा। ¹⁰आऊँ तुसा से बोलूँआ कि ईयां ई एक मन फिराणे वाले पापिया रे बारे रे परमेशरो रे स्वर्गदूता सामणे खुशी ओई।”

ⓂⓂⓂⓂⓂⓂⓂⓂ ⓂⓂ ⓂⓂⓂⓂⓂⓂⓂⓂ

¹¹तेबे यीशुए एक और उदारण बोलेया, “एक मांणूए रे दो पाऊ थे। ¹²तिना बीचा ते छोटो पाऊए आपणे पिते से बोलेया, ‘ओ पिता सम्पतिया बीचा ते जो मेरा इस्सा आए, तेस माखे एबु देई दे।’ तिने तिना से आपणी सम्पति बांडी ती। ¹³तेबे जादा दिन नि थे ऊए रे कि छोटो पाऊ आपणा सब कुछ कटटा करी की दूर देशो से चली गा और तेती कुकर्मा रे आपणी सम्पति ऊड़ाई ती। ¹⁴जेबे से सब कुछ खचं करी चुकेया, तेबे तेते देशो रे बड़ा अकाल पड़ी गा और से कंगाल ऊईगा और तेसगे खाणे से कुछ बी नि रया। ¹⁵तेबे से तेस देशो रे रणे वालेया बीचा ते एकी रे कअरे काम करने गया। तिने से आपणे डोरूआ रे सूअर चरणे पेजेया ¹⁶और से इतणा पूखा था और चाओ था कि

तिना फलिया ते जो सूंअर खाओ ए, तिना साथे आपणा पेट पऱूँ और तेसखे कोई कुछ नि देओ था। 17 जेबे से आपणी ओशा रे आया, तेबे बोलणे लगेया, 'मेरे पिते रे मजूरदारा खे रोटिया ते जादी रोटी मिलो थी और आऊँ एती पूखा मरने लगी रा। 18 मां एबे उटी की आपणे पिते गे जाणा और तेसखे बोलणा कि मैं परमेशरो रे खलाफ और तेरी नजरा रे पाप करी राखेया। 19 एबे एते जोगा नि रया कि तेरा पाऊ ओऊँ, माखे आपू गे एक मजूरदार जेड़ा राखी दे।'

20 'तेबे से तेस देशो खे छाडी की आपणे पिते गे चली गा। से एबु दूर ई था कि तेसरे पिते तेसखे देखी की तरस खाया और दौड़ी की आपणे पाऊए खे गले लगाया और बऊत चूमेया। 21 पाऊए तेसखे बोलेया, 'पिता जी! मैं परमेशरो रे खलाफ और तेरी नजरा रे पाप करी राखेया और एबे एते जोगा नि रया कि तेरा पाऊ ओऊँ।' 22 पर पिते आपणे दासा खे बोलेया, 'फटाफट अच्छे ते अच्छे टाले एसखे पणयाओ और एसरे आथो रे छाप और पैरो रे जुतिया पणयाओ 23 और सबी ते बढ़िया ते बढ़िया खाणा बणाओ, ताकि आसे खाऊँ और खुशी मनाऊँ। 24 कऊँकि मेरा ये पाऊ मरी गा था और फेर जिऊँदा ऊईगा रा, राची गा था, पर एबे मिली गा रा।' सेयो खुशी मनाणे लगे।

25 "पर तेसरा बड़ा पाऊ डोरूआ रे था और जेबे से आऊँदा ऊआ कअरो रे नेडे पऊँछेया, तेबे तिने गाणे बजाणे रा और नाचणे रा आल्ला सुणेया। 26 तेबे तिने एकी दासो ते पूछेया, 'ये क्या लगी रा ऊणे?' 27 दासे बोलेया, 'तेरा पाई वापस आयी रा और तेरे पिते सबी ते बढ़िया ते बढ़िया खाणा बणवाई राखेया, कऊँकि से ठीक-ठाक मिलेया।' 28 ये सुणी की तेसखे रोष आईगा और पीतरे नि जाणा चाया, पर तेसरा पिता बारे आयी की तेसखे मनाणे लगेया। 29 तिने पिते खे बोलेया, 'देख, आऊँ इतणे साला ते तेरी सेवा करने लगी रा और कदी बी तेरी आज्ञा नि टाली और तेबे बी तें माखे कदी बी बढ़िया खाणा नि दित्तेया, ताकि आऊँ आपणे दोस्ता साथे मजे करूँ? 30 पर जेबे तेरा ये पाऊ आया, जिने तेरी सम्पति वेश्या रे ऊड़ाई ती और आया तो तें एसरी खुशिया रे बड़ी पाट्टी किती।' 31 पिते तेसखे बोलेया, 'ओ मेरे पाऊ, तू सदा मां साथे ईए और जो कुछ मेरा ए, से सब तेरा ईए। 32 पर एबे खुश और मग्न ऊणा चाईयो, कऊँकि ये तेरा पाई मरी गा था और फेर जिऊँदा ऊईगा और राची गा था, पर फेर मिली गा।' "

16



1 तेबे यीशुए आपणे चलेया खे बी ये उदारण बोलेया, 'कैसी अमीरो रा एक पण्डारी था और लोके तेस सामणे तेस पाँदे ये दोष लगाया कि ये तेरा सारा पैसा उड़ाई देओआ। 2 तेबे तिने अमीर मांपूए से बुलाया और बोलेया, 'ये क्या ए, जो आऊँ तेरे बारे रे सुणने लगी रा? आपणे पण्डारो रा लेखा दे, कऊँकि तू आगे ते पण्डारी नि रई सकदा।' 3 तेबे पण्डारी सोचणे लगेया कि एबे आऊँ क्या करूँ? कऊँकि मेरा मालक तो एबे पण्डारो री जगा मांते छुड़ाणे लगी रा। माट्टी तो मांते खणदी नि और पीख मांगणे ते तो माखे शर्म आओई। 4 माखे समज आयी की क्या करना; ताकि जेबे पण्डारियो रे कामो ते छुड़ाया जाऊँ तो लोक आपणे कअरे बुलाई लो। 5 तेबे तिने आपणे मालको रे देणदारा बीचा ते एक-एक बुलाए और पईले ते पूछेया कि तां मेरे मालको रा कितणा कर्ज देणा? 6 तिने बोलेया, 'सौ मण जैतूनो तेल।' तेबे तिने तेसखे बोलेया, 'जा और आपणे खाते रे पंजा लिखी दे।' 7 तेबे तिने दूजे ते पूछेया कि तां मेरे मालको रा कितणा कर्ज देणा? तिने बोलेया सौ मण कणक; तिने तेसखे बोलेया, 'जा और आपणे खाते रे की अस्सी लिखी दे।'

8 "मालके से पापी पण्डारी सराया कि तिने चंट ऊई की काम कित्तेया, कऊँकि एसा दुनिया रे लोक, आपणे बखतो रे लोका रे रीति-रखाजा रे जोतिया रे लोका ते जादा ऊशियार ए। 9 आऊँ तुसा खे बोलूँआ कि पापो रे पैसे ते आपू खे दोस्त बणाई लो, ताकि जेबे से जाओ, तेबे सेयो तुसा खे अनन्त निवासो रे लयी लो। 10 जो थोड़े ते थोड़े रे सच्चा ए, से बऊत रे बी सच्चा ए और जो थोड़े ते थोड़े रे पापी ए, से बऊत रे बी पापी ए। 11 तेबे, जे तुसे पापो रे धनो रे सच्चे नि ऊए, तो सच्चा धन तुसा

गे केस सम्बालना? ¹² और जे तुसे पराये धनो रे सच्चे नि ठईरे, तो तेबे जो तुसा राए, से तुसा खे केस देणा?

¹³ “कोई बी दास दो मालका री सेवा नि करी सकदा; कऊँकि तेस एकी साथे बैर और दूजे साथे प्यार राखणा, या एकी साथे मिले रा रणा और दूजा तेस तुच्छ जाणना। तुसे परमेशर और धन दई री सेवा नि करी सकदे।”

????? ? ? ? ? ? ? ?

(????? 11:12,13; 5:31,32; ????? 10:11,12)

¹⁴ फरीसी जो लालची थे, ये सुणी की तिना रा मजाक करने लगे। ¹⁵ यीशुए तिना खे बोलेया, “तुसे तो माणूआ सामणे आपू खे तर्मी ठराओए, पर परमेशर तुसा रे मनो खे जाणोआ, कऊँकि जो चीज माणूआ री नजरा रे महान ए, से परमेशरो सामणे घृणित ए।

¹⁶ “यूहन्ना बपतिस्मा देणे वाले तक मूसे रा बिधान और भविष्यबक्ता रा संदेश तुसा री अगुवाई करदे रये। पर एबे परमेशरो रे राज्य रा सुसमाचार सुणाया जाणे लगी रा और हर कोई तिदे बऊत मईणत करी की जाओआ। ¹⁷ सर्ग और तरतिया रा टली जाणा, बिधानो रे एक बिन्दुओ रे खोणे बराबर ए।

¹⁸ “जो कोई आपणी लाड़िया खे छाडी की केसी ओरी साथे ब्या करोआ, से व्याभिचार करोआ और जो कोई एडी छाडी रिया जवाणसा साथे ब्या करोआ, से बी व्याभिचार करोआ।

????? ????? ? ? ? ? ? ? ? ?

¹⁹ “एक अमीर माणू था जो बैगणी टाले और मलमलो रे टाले पईनो था और हर रोज सुख-बिलासो रे और मौज-मस्तिया साथे रओ था। ²⁰ लाजर नाओं रा एक गरीब माणू था, जेसरे सारे शरीरो रे जख्म थे, तेसखे तेस अमीर माणूए री देऊलिया पाँदे छाडी देओ थे। ²¹ और से चाओ था कि अमीरो री मेजा री जूटा ते आपणा पेट परूँ, एथो तक कि कुत्ते बी तेसरे जख्मा खे चाटी देओ थे। ²² तेबे एडा ऊआ कि से कंगाल मरी गा और स्वर्गदूते से लयी की अब्राहमो री गोदा रे पऊँछाई ता और से अमीर बी मरी गा और दवाई ता। ²³ तेबे तिने नरको री पीडा ते ऊबो खे देखेया और दूरो ते अब्राहमो री गोदा रे लाजर देखेया। ²⁴ तेबे तिने आक्का पायी की बोलेया, ‘ओ पिता अब्राहम! मां पाँदे दया करी की लाजरो खे पेजी दे, ताकि से आपणी गुठिया रा सिरा पाणिणए साथे सेडी की मेरी जीबा खे ठण्डी करो, कऊँकि आऊँ एते आगी रे तड़फणे लगी रा।’ ²⁵ पर अब्राहमे बोलेया, ‘ओ पाऊ! याद कर कि तूँ आपणी जिन्दगिया रे अच्छी चीजा लयी चुकेया रा और तियाँ ई बुरिया चीजा खे लाजर बी, पर एबे से एती शान्ति पाणे लगी रा और तूँ तेती पीडा ते तड़फणे लगी रा। ²⁶ इना सबी गल्ला खे छाडी की आसा बीचे और तां बीचे पारी गड्डा ए ठराए रा, ताकि कोई एथा ते तांगे पार नि जाई सको और ना पारा ते कोई एती आसा गे आयी सको।’ ²⁷ तिने बोलेया, ‘ओ पिता! तेबे आऊँ तांते बिनती करूँआ कि तूँ लाजरो खे मेरे पिते रे कअरे पेज। ²⁸ कऊँकि मेरे पाँज पाई ए, ये तिना सामणे इना गल्ला री गवाई देओ, एडा नि ओ कि सेयो बी मरी की एते पीडा री जगा रे आओ।’ ²⁹ अब्राहमे तेसखे बोलेया, ‘तिना गे तो चेतावणी देणे खे मूसे रा बिधान और भविष्यबक्ते री कतावा ए, सेयो तिना री सुणो।’ ³⁰ तिने बोलेया, ‘ना, ओ पिता अब्राहम! पर जे कोई एथा ते मरे रे बीचा ते तिना गे जाओगा, तो तिना मन फिराणा।’ ³¹ तिने तेसखे बोलेया, ‘जेबे सेयो मूसे और भविष्यबक्ते री नि सुणदे, तो जे मरे रे बीचा ते कोई बी जिऊँदा उठोगा, तेबे बी तेसरी नि मानणी।’”

17

????? ? ? ? ? ? ? ?

(????? 18:6; 7:21,22; ????? 9:42)

¹ तेबे यीशुए आपणे चलेया खे बोलेया, “एडा ऊई नि सकदा कि ठोकरा नि लगे, पर हाय! तेस माणूए खे, जेसरी बजअ ते सेयो आओईया। ² जो इना छोटिया बीचा ते केसी एकी खे बी ठोकर देओगा, तेसखे तो ये पला ऊँदा कि तेसरे गले रे चाक्किया रा एक पूड़ लटकाई देओ और समुद्रो

रे सेटी देखो। ³ चौकस रओ, जे तेरा विश्वासी पाई अपराध करो, तो तेसखे समजेया और जे से पछताओ, तो तेसखे माफ कर। ⁴ जे एकी दिनो रे से तेरे खलाफ सात बार अपराध करो और सातो बार तांगे फेर आयी की बोलो कि आऊँ पछताऊँआ, तो तेसखे माफ कर।”

⁵ तेबे पुररिते यीशुए खे बोलेया, “आसा रा विश्वास बढ़ा।” ⁶ यीशुए बोलेया, “जे तुसा खे अऊरिया रे दाणे रे बराबर बी विश्वास ऊँदा, तो एस करयूँओ रे डालो खे बोलदे कि जड़ा ते पट्टी की समुद्रो रे लगी जा, तो से तुसा री मानी लंदा।

⁷ “तुसा बीचा ते एड़ा कूणे कि जेसरा दास अल बाओ या पेडा खे चराओआ और जेबे से डोरूआ ते आओ, तेबे तेसखे बोलो, ‘फटाफट आओ और रोटी खाणे बैठी जा?’” ⁸ और ये नि बोलो कि माखे रोटी बना, और जदुओ तक आऊँ खाऊँ, तदुओ तक लक बानी की मेरी सेवा कर, तिजी ते बाद तैं बी खाई-पी लणा। ⁹ क्या तेस, तेस दासो रा एहसान मानणा कि तिने सेयो ई काम कित्ते, जेसरी तिने आज्ञा दित्ती थी। ¹⁰ ईयाँ ई तुसे बी, जेबे तिना सबी कामा खे करी चुकोगे, जिना खे करने री आज्ञा तुसा खे देई राखी थी, तो बोलो, ‘आसे नक्कमे दास ए; कऊँकि जो आसा करना चाईयो था, बस सेई करी राखेया।’”

¹¹ और तेबे एड़ा ऊआ कि यीशु और तिना रे चले यरूशलेमो खे जांदे ऊए सामरिया और गलीलो परदेशो रिये जाणे लगी रे थे। ¹² तेबे केसी गांव रे जांदे ऊए तिना खे दस कोढ़ी मिले। ¹³ तेबे तिने दूर खड़ी की जोरे की आक्का पाई की बोलेया, “ओ यीशु! ओ स्वामी! आसा पाँदे दया कर।” ¹⁴ यीशुए तिना खे देखी की बोलेया, “यरूशलेमो रे मन्दरो रे जाओ और आपू खे पुरोईतो गे बताओ।” सेयो जांदे-जांदे ई ठीक ऊईगे। ¹⁵ तेबे तिना बीचा ते एक ये देखी की कि आऊँ ठीक ऊईगा, जोरे-जोरे साथे परमेशरो री तारीफ करदा ऊआ वापस यीशुए गे आया। ¹⁶ और यीशुए रे पैरा पाँदे मुँओ रे पारे पड़ी की तिना रा धन्यवाद करने लगेया और से सामरी था। ¹⁷ तेबे यीशुए बोलेया, “क्या दस के दस माणू ठीक नि ऊए, तेबे सेयो नौ माणू केयी ए? ¹⁸ क्या एस परदेशिया खे छाडी की ओर कोई नि निकलेया, जो परमेशरो री तारीफ करो?” ¹⁹ तेबे यीशुए तेसखे बोलेया, “उठी की चली जा, तेरे विश्वासे तूँ बचाईता।”

(***** 24:23-28,37,41)

²⁰ जेबे फरीसिये यीशुए ते पछेया कि परमेशरो रा राज्य कदी आऊणा? तेबे तिने जवाब दित्तेया, “परमेशरो रा राज्य परगट रूपो रे नि आऊँदा ²¹ और लोका एड़ा नि बोलणा कि देखो, एती ए या तेती ए, कऊँकि परमेशरो रा राज्य तुसा बीचे ए।”

²² तेबे तिने चलेया खे बोलेया, “सेयो दिन आऊणे, जेबे तुसा माणू रे पुत्रो रे दिना बीचा ते एकी दिनो खे देखणा चाणा और देखी नि सकणा। ²³ लोका तुसा खे बोलणा, ‘देखो, मसीह एती ए!’ या ‘देखो, मसीह तेती ए!’ पर तुसे चली नि जाणा और ना ई तिना पीछे जाणा। ²⁴ कऊँकि जियँ बियजली सर्गो री एकी तरफा ते निकली की सर्गो री दूजी तरफा खे चमकोई, तियाँ ई आऊँ माणू रा पुत्र बी आपणे दिनो रे परगट ऊणा। ²⁵ पर पईले जरूरी ए कि तेसखे दुःख ओ और एस जुगो रे लोक तेसखे तुच्छ ठराओ। ²⁶ जेड़ा नूहो रे दिनो रे ऊआ था, तेड़ा ई माँ माणू रे पुत्रो रे दिनो रे बी ऊणा। ²⁷ जेस दिनो तक नूह जाहजो रे नि चढ़ेया, तेस दिनो तक लोक खाओ-पियो थे और तिना रे ब्या-शादिया ओ धिया, तेबे जल-प्रलय आयी की सेयो सब नाश कित्ते। ²⁸ तियाँ ई जेड़ा लूतो रे दिना रे ऊआ था कि लोक खाओ-पियो और लेण-देण करो थे, डाल लगाओ थे और कअर बणाओ थे। ²⁹ पर जेस दिने लूत सदोमो ते निकलेया, तेस दिने आग और गन्धक सर्गो ते बरसी और तेते नगरो रे सब लोक नाश करी ते।

30 “मां माणू रे पुत्रो रे परगट ऊणे रे दिनो रे बी एड़ा ई ऊणा। 31 तेस दिने जो छतो पाँदे ओ और तेसरा समान कअरे ओ, से तेस लणे खे नि उत्रो और तियाँ ई जो डोरूआ रे ओ, सेयो पीछे नि आटो। 32 लूतो री लाड़िया खे याद राखो कि जो तेसा साथे उआ! 33 जो कोई आपणा प्राण बचाओआ, तेस से खोणा और जो कोई तेसखे खोओआ, तेस अनन्त जिन्दगी पाणी। 34 आऊँ तुसा खे बोलूँआ, कि तेस राती दो लोक आपणे माँजे पाँदे ऊणे, एक लयी लणा और दूजा छाडी देणा। 35 दो जवाणसा साथे-साथे चाक्की पिशणे लगी रिया ऊणिया, एक लयी लणी और दूजी छाडी देणी। 36 दो जणे डोरूआ रे ऊणे, एक लयी लणा और दूजा छाडी देणा।” 37 ये सुणी की चलेया यीशुए ते पूछेया, “ओ प्रभु! ये केयी ऊणा?” तिने तिना खे बोलेया, “जेती लोध ऊणी, तेथी इल्ला कट्टिया ऊणिया।”

18

~~~~~

1 तेबे यीशुए इजी रे बारे रे कि हर रोज प्रार्थना करना और याओ नि छाडणा चाईयो, ये उदारण आपणे चलेया खे बोलेया, 2 “केसी नगरो रे एक न्यायी रओ था, जो ना परमेशरो ते डरो था और ना ई केसी माणूए री परवा करो था 3 और तेसी नगरो रे एक बिदुआ बी रओ थी, जो तेसगे आयी-आयी की बोलदी रओ थी कि मेरा न्याय करी की माखे दुश्मणा ते बचा। 4 से थोडे बखतो तक नि मानेया पर आखरी रे तिने सोचेया कि हालाँकि आऊँ ना परमेशरो ते डरदा और ना ई माणूआ री परवा करदा, 5 तेबे बी ये बिदुआ माखे सतांदी रओई, इजी री खातर मां तेसा ना न्याय चुकाई देणा, एड़ा नि ओ कि कअड़िया रे कअड़िया आयी की आखरी रे मेरे नाको रे दम करी देओ।” 6 यीशुए बोलेया, “त्यानो साथे सोचो, ये पापी न्यायी क्या बोलोआ? 7 तो क्या परमेशरे आपणे चूणे ऊए रा न्याय नि करना, जो रात-दिन तेसरी दुहाई देंदे रओए और क्या तेस तिना रे बारे रे देर करनी? 8 आऊँ तुसा खे बोलूँआ कि तेस फटाफट तिना रा न्याय करना, तेबे बी आऊँ माणू रा पुत्र जेबे आऊणा, तो क्या मां तरतिया पाँदे विश्वास पाणा?”

~~~~~

9 तेबे तिना खे, जो आपू पाँदे विश्वास राखो थे कि आसे तर्मी ए और ओरी खे तुच्छ जाणो थे, ये उदारण बोलेया, 10 “दो माणू प्रार्थना करने खे मन्दरो रे गये, एक फरीसी था और दूजा कर लणे वाला था। 11 फरीसी खड़ा ऊई की ईयां प्रार्थना करने लगेया, ‘ओ परमेशर आऊँ तेरा धन्यवाद करूँआ कि आऊँ ओरी माणूए जेड़ा अन्दर करने वाला, अन्यायी और व्याभिचारी निए और ना एस कर लणे वाले जेड़ा ए। 12 आऊँ अफते रे दो बार बअरत करूँआ और आऊँ आपणी सारी कमाईया रा दसुआ अंश बी तुसा खे देऊँआ।’ 13 पर कर लणे वाले दूर खडे ऊई की स्वर्गो रे कनारो खे आखी पनि चकणिया चाईया, बल्कि आपणी छाती बजाई-बजाई की बोलेया, ‘ओ परमेशर! मां पापिए पाँदे दया कर।’ 14 आऊँ तुसा खे बोलूँआ कि से दूजा नि पर येई माणू तर्मी ठराई की आपणे कअरो खे गया, कऊँकि जो कोई आपू खे बड़ा बणाओगा, से छोटो करेया जाणा और जो आपू खे छोटो बणाओगा, से बड़ा करेया जाणा।”

~~~~~

(~~~~~ 19:13-15; ~~~~~ 10:13-16)

15 तेबे लोक आपणे बच्चेया खे बी तिना गे ल्याऊणे लगे, ताकि सेयो तिना पाँदे आपणा आथ राखो, पर चले तिना खे देखी की बकणे लगे। 16 यीशुए बच्चेया खे आपू गे बुलाई की बोलया, “बालका खे मांगे आऊणे देओ और तिना खे ना नि करो, कऊँकि परमेशरो रा राज्य एडे रा ई ये। 17 आऊँ तुसा खे सच बोलूँआ कि जो कोई परमेशरो रे राज्य खे बालको जेड़ा नि मानोगा, से कदी बी तेती नि जाणा।”

~~~~~

(~~~~~ 19:16-30; ~~~~~ 10:17-31)

18 तेबे एकी अधिकारिए यीशुए ते पूछेया, “ओ उत्तम गुरु! अनन्त जीवन पाणे खे आऊँ क्या करुँ?” 19 यीशुए तेसखे बोलेया, “तूँ माखे उत्तम कऊँ लगी रा बोलणे? कोई बी उत्तम निए, बस एक, मतलब-परमेशर। 20 तूँ आज्ञा खे तो जाणेया कि व्याभिचार नि करना, अत्या नि करना, चोरी नि करना, चूठी गवाई नि देणी, आपणे माए-बाओ रा आदर करना।” 21 तिने बोलेया, “इना गल्ला खे तो आऊँ बचपनो ते मानदा आयी रा।” 22 ये सुणी की यीशुए बोलेया, “तादे एवु बी एक गल्ला री कमी ए, आपणा सब कुछ बेची की कंगाला खे बांडी दे और ताखे स्वर्गो रे धन मिलणा और आयी की मां पीछे आईजा।” 23 से ये सुणी की से बऊत उदास ऊईगा, कऊँकि से बऊत अमीर था।

24 यीशुए तेस देखी की बोलेया, “अमीरा रा परमेशरो रे राज्य रे जाणा कितणा कठण ए। 25 परमेशरो रे राज्य रे अमीरा रा जाणा, ऊँटो रा सूईया रे नाके ते निकलने रे बराबर ए।” 26 तेबे सुणने वालेया बोलेया, “तेबे केसरा उद्धार ऊई सकोआ?” 27 यीशुए बोलेया, “जो मांणूआ ते नि उई सकदा, से परमेशरो ते उई सकोआ।” 28 पतरसे बोलेया, “देख, आसे तो कअर-बार छाडी की तुसा पीछे आईगे रे।” 29 यीशुए बोलेया, “आऊँ तुसा खे सच बोलूँआ जो कोई, परमेशरो रे राज्य खे आपणे कअर, लाडी, पाई, बईण, माए-बाओ या बाल-बच्चे छाडी देओगा 30 तेस एस बखते कई गुणा फल पाणा और आऊणे वाले जुगो रे अनन्त जीवन।”

⚠️⚠️⚠️ ⚠️⚠️⚠️ ⚠️⚠️⚠️ ⚠️⚠️⚠️ ⚠️⚠️⚠️ ⚠️⚠️⚠️ ⚠️⚠️⚠️ ⚠️⚠️⚠️ ⚠️⚠️⚠️ ⚠️⚠️⚠️
(⚠️⚠️⚠️ 20:17-19; ⚠️⚠️⚠️ 10:32-34)

31 तेबे तिने बारा चलेया खे साथे लयी की तिना खे बोलेया, “देखो, आसे यरूशलेम नगरो खे जाणे लगी रे और जितणी गल्ला मां माणू रे पुत्रो रे बारे रे भविष्यबक्ते लिखी राखिया, सेयो सब पुरिया ऊणिया। 32 कऊँकि आऊँ दुजिया जातिया रे आधो रे देई देणा, और तिना मेरा मजाक उड़ाणा, और मां पाँदे धूकणा 33 और माखे कोड़े बाणे और काणा और आऊँ तीजे दिने जिऊँदा ऊई जाणा।” 34 पर चलेया इना गल्ला बीचा ते कोई बी गल्ल नि समजी और ये गल्ल तिना ते छिपी री रई और जो बोली राखेया था, से तिना री समजा रे नि आया।

⚠️⚠️⚠️ ⚠️⚠️⚠️ ⚠️⚠️⚠️ ⚠️⚠️⚠️ ⚠️⚠️⚠️ ⚠️⚠️⚠️ ⚠️⚠️⚠️ ⚠️⚠️⚠️ ⚠️⚠️⚠️ ⚠️⚠️⚠️
(⚠️⚠️⚠️ 20:29-34; ⚠️⚠️⚠️ 10:46-52)

35 जेबे सेयो यरीहो नगरो रे नेड़े पऊँछे, तेबे एक अन्दा सड़का रे कनारे बैठे रा पीख लगी रा था मांगणे। 36 तेबे से पीड़ा रे हांडणे री छेड़ सुणी की पूछणे लगेया, “ये क्या लगी रा ऊणे?” 37 तिने तेसखे बोलेया, “यीशु नासरी लगी रे जाणे।” 38 तेबे तिने आक्का पायी की बोलेया, “ओ दाऊदो री ल्वाद यीशु! मां पाँदे दया कर।” 39 जो आगे-आगे लगी रे थे चलणे, सेयो तेसखे बकणे लगे कि चुप रओ, पर से ओर बी चीगणे लगेया, “ओ दाऊदो री ल्वाद मां पाँदे दया कर!” 40 तेबे यीशुए खड़े ऊई की आज्ञा दिती, “एसखे मांगे ल्याओ।” और जेबे से नेड़े आया, तेबे तिने तेसते पूछेया, 41 “तूँ क्या चाएया कि आऊँ ताखे क्या करुँ?” अन्दे बोलेया, “ओ प्रभु ये कि आऊँ देखणे लगी जाऊँ।” 42 यीशुए बोलेया, “देखणे लग, तेरे विश्वास तूँ ठीक करी ता।” 43 और से तेबुई देखणे लगेया और परमेशरो री तारीफ करदा ऊआ तिना पीछे चलणे लगेया और सबी लोके ये देखी की परमेशरो री स्तुति किती।

19

⚠️⚠️⚠️ ⚠️⚠️⚠️ ⚠️⚠️⚠️ ⚠️⚠️⚠️

1 यीशु यरीहो नगरो ते जाणे लगी रे थे। 2 तेती जक्कई नाओ रा एक मांणू कर लणे वालेया रा सरदार था और अमीर था। 3 से यीशुए खे देखणा चाओ था कि से कुण जा ए? पर पीड़ा री बजअ ते देखी नि सको था, कऊँकि से बाऊणा था। 4 तेबे से तिना खे देखणे खे आगे दौडी की गूलरो रे डालो पाँदे चढी गा, कऊँकि सेयो तिसिये ई जाणे वाले थे। 5 जेबे यीशु तेसा जगा रे पऊँछे, तेबे तिने पाँदे देखी की बोलेया, “ओ जक्कई फटाफट थाले उतरी जा! कऊँकि आज मेरा तेरे कअरे रणा जरूरी ए।” 6 से फटाफट गूलरो रे डालो ते थाले उतरी की तिना खे खुशिया साथे आपणे कअरो खे लयी गा।

7 ये देखी की सब लोक कुड़कुड़ाई की बोलणे लगे, “ये तो एक पापी मांणूए रे कअरे जाणे लगी रा ।”
8 जक्कईये खडे ऊई की यीशुए के बोलेया, “ओ प्रभु यीशु! देखो, आऊँ आपणी आदी जायदात कंगाला खे देऊँआ और जे केसी रा कुछ बी अन्याय करी की लयी राखेया, तो तेसखे चार गुणा वापस करी देऊँआ ।”
9 तेवे यीशुए बोलेया, “आज एते कअरो रे लोका बीचे उद्धार आयी रा, कऊँकि ये बी अबराहमो रे वंशो राए ।
10 कऊँकि आऊँ माणू रा पुत्र राचे रेया खे टोलने और तिना खे वचाणे आयी रा ।”

?????? ??

(????? 25:14-30)

11 जेवे सेयो इना गल्ला सुणने लगी रे थे, तेवे यीशुए एक उदारण बोलेया, कऊँकि सेयो यरूशलेमो रे नेडे थे, और सेयो समजो थे कि परमेशरो रा राज्य एवु प्रगट ऊणे वाला ए ।
12 तेवे यीशुए बोलेया, “एक अमीर माणू दूर देशो खे चली गा, ताकि राजपद पाई की फेर आओ ।
13 तिने आपणे दासा बीचा ते दस दासा खे बुलाई की तिना खे दस सूईने रे सिक्के दित्ते और तिना खे बोलेया कि मेरे वापस आऊणे तक लेण-देण करी लएओ ।
14 पर तेसरे नगरो रे रणे वाले तेसते बैर राखो थे और तेस पीछे दूता खे पेजी की सन्देशा पेजेया कि आसे नि चांदि कि ये आसा पाँदि राज्य करो ।

15 “जेवे से राजपद पाई की वापस आया, तेवे तिने सेयो दास बुलाए जिना खे तिने सूईने रे सिक्के दित्ते थे, ताकि पता लगाई सको कि तिने लेण-देणो ते कया-कया कमाया ।
16 तेवे एकी बोलेया, ओ मालक! तेरे सूईने रे सिक्के साथे दस ओर सिक्के कमाई राखे ।
17 तिने तेसखे बोलेया कि ओ उत्तम दास तूँ धन्य ए कऊँकि तूँ थोड़े रेई विश्वासो जोगा निकलेया, एवे दस नगरो रा अक्क राख ।
18 दूजे बी आयी की बोलेया, ओ मालक! तेरे सूईने रे सिक्के साथे पाँज ओर सिक्के कमाई राखे ।
19 तिने तेसखे बोलेया कि तूँ बी पाँज नगरा रा हाकिम ऊई जा ।
20 तीजे जणे आयी की बोलेया, ओ मालक! देख, तेरे सूईने रे सिक्के ये ए, जो मैं परने रे बानी की थे राखे रे ।
21 कऊँकि आऊँ ताते डरूँ था, कऊँकि तुसे कठोर माणू ए, जो तैं नि राखेया, से चकी लयेआ और जो तैं नि बाया, तेस बाडी देआ ।
22 तिने तेसखे बोलेया, ओ दुष्ट दास! आऊँ तेरे ई मुँओ ते ताखे दोषी ठईराऊँआ, तूँ माखे जाणे था कि कठोर माणू ए, जो मैं नि राखेया, तेस चकी लऊँआ और जो मैं नि बायी राखेया, से बाडी देऊँआ ।
23 तो तेवे तैं मेरे पैसे साऊकारो गे कऊँ नि राखे, ताकि आऊँ आयी की व्याजो समेत लई लदा ।
24 और जो लोक नेडे थे खडे रे, तिने तिना खे बोलेया कि से सिक्का एसते लई लो और जेसगे दस सूईने रे सिक्के ए, तेसखे देई देओ ।
25 तिने तेसखे बोलेया कि ओ स्वामी!, एसगे दस सिक्के तो आए ।
26 आऊँ तुसा खे बोलूँआ कि जेसगे आए, तेसखे देणा, और जेसगे आया नि, तेसते से बी जो तेसगे आया, लयी लणा ।
27 पर मेरे तिना बैरिया खे, जो नई चाओ थे कि आऊँ तिना पाँदि राज्य करूँ, तिना खे एती मां सामणे ल्याई की काओ ।”

???????? ??

(????? 21:1-11; ????? 11:1-11; ????? 12:12-19)

28 ये बोली की यीशु यरूशलेमो री तरफा खे आपणे चलेया ते आगे-आगे चले ।
29 जेवे सेयो जैतून नाओं रे पाहडो पाँदि बैतफगे गांव और बैतनिय्याहो गांव रे नेडे पऊँछे, तेवे तिने आपणे चलेया बीचा ते दो जणे ये बोली की पेजे,
30 “सामणे रे गांव रे जाओ और तेती पऊँछी की एक गहृदिया रा बच्चा, जेस पाँदि कदी कोई नि बैठी रा, बाने रा तुसा खे मिलणा, तेस खोली की ल्याओ
31 और जे तुसा खे कोई पूछो कि कऊँ लगी रे खोलणे? तो बताई देणा कि प्रभुए खे एसते कुछ मतलब ए ।”

32 जो पेजे थे तिने जाई की तेड़ा ई पाया, जो तिना गे बताई राखेया था ।
33 जेवे सेयो गहृदे रे बच्चे खे खोलणे लगी रे थे, तेवे तेसरे मालके तिना ते पूछेया, “एस बच्चे खे कऊँ लगी रे खोलणे?”
34 तिने बोलेया, “प्रभुए खे एसते मतलब ए ।”
35 सेयो तेसखे यीशुए गे लयी गे और आपणे टाले

तेस बच्चे पाँदे पाई की यीशु तेस पाँदे बैठीगे। 36 जेबे सेयो जाणे लगी रे थे, तेबे बऊत जणेया आपणी-आपणी चादरी बाटा रे बछ्छाइतिया।

37 नेडे आयी की जेबे सेयो जैतून पाहड़ो री टलाना रे पऊँछे, तेबे चेलैया री सारी मण्डली, तिना सबी सामर्था रे कामो री बजअ ते, जो तिने देखे थे, खुश ऊई की जोरे-जोरे साथे परमेशरो री स्तुति करने लगी कि,

38 “धन्य ए से राजा, जो प्रभुए रे नाओं ते आओआ, स्वर्गों रे शान्ति और सर्गों रे महिमा ओ।”

39 तेबे पीड़ा बीचा ते कई फरीसी यीशुए खे बोलणे लगे, “ओ गुरु! आपणे चेलैया खे बक।” 40 तिने जवाब दित्तेया, “आऊँ तुसा खे बोलूँआ कि जे यो लोक चुप ऊईगे, तो पात्थर चींगणे लगी जाणे।”

XXXXXXXXXX XX XXXXX

41 जेबे यीशु नेडे पऊँछे, तो नगरो खे देखी की तेस पाँदे रोणे लगे 42 और बोलेया, “पला ऊँदा कि तूँ एस दिनो रे शान्तिया री गल्ला जाणदा। पर एबे बऊत देर ऊईगी री और एबे शान्ति तेरी नजरा ते छीपी गी री। 43 कऊँकि सेयो दिन तां पाँदे आऊणे, जेबे तेरे बैरिया मोर्चा बानी की तूँ केरी लणा और चऊँ कनारे ते तूँ दवाई देणा 44 और तूँ और तेरे बालक, जो तां साथे ए, माट्टिया रे मलाई देणे और एती जो पात्थरो पाँदे पात्थर लगी रे, सब टाले जाणे। कऊँकि तैं से मोका, जेबे तां पाँदे कृपा-दृष्टि किती थी, पछ्याणा नि।”

XXXXXXXXXX XX XXXXXXXXXXXX XX XXXXXXXXXXXX

(XXXXXXXX 21:12-17; XXXXXX 11:15-19; XXXXXXXXXXX 2:13-22)

45 तेबे यीशु मन्दरो रे जाई की बेचणे वालेया खे बारे निकयालने लगे 46 और तिना खे बोलेया, “लिखी राखेया कि मेरा मन्दर प्रार्थना रा कअर ए, पर तुसे से डाकूआ री गुफा बणाई ती।” 47 सेयो हर रोज मन्दरो रे उपदेश करो थे और बडे पुरोईत और शास्त्री और लोका रे खास तिना खे नाश करने रा मोका टोलने लगी रे थे। 48 पर कोई उपाय नि निकयाली सके कि ये कियॉं करिए, कऊँकि सब लोक बडे त्यानो साथे यीशुए री सुणो थे।

20

XXXXXXXXXX XX XXXXX XXXXX XXXXX

(XXXXXXXX 21:23-27; XXXXXX 11:27-33)

1 एक दिन एड़ा ऊआ कि जेबे यीशु मन्दरो रे लोका खे उपदेश और सुसमाचार सुनाणे लगी रे थे, तेबे बडे पुरोईत, शास्त्री और बुजुर्ग नेडे आयी की खडे ऊईगे 2 और बोलणे लगे, “आसा गे बता कि तूँ इना कामा केसरे अक्को ते करया और से कूणे, जिने ताखे ये अक्क देई राखेया?” 3 यीशुए तिना खे जवाब दित्तेया, “आऊँ बी तुसा ते एक गल्ल पुछूँआ। माखे बी बताओ 4 यूहन्ने रा बपतिस्मा स्वर्गों री तरफा ते था या मांणूए री तरफा ते?” 5 तेबे सेयो आपू बीचे बोलणे लगे, “जे आसे बोलूँगे कि स्वर्गों री तरफा ते था, तेबे एस बोलणा कि तेबे तुसे तेस पाँदे विश्वास कऊँ नि कित्तेया? 6 और जे आसे बोलूँगे कि मांणूए री तरफा ते ए, तो सबी लोका आसा खे पात्थर बाणे, कऊँकि तिना खे पक्का पता ए कि यूहन्ना भविष्यबक्ता था।” 7 तेबे तिने जवाब दित्तेया, “आसे नि जाणदे कि से केसरी तरफा ते था।” 8 यीशुए तिना खे बोलेया, “तेबे आऊँ पनि बतांदा कि आऊँ इना कामा केसरे अक्को ते करूँआ।”

XXXXXXXXXXXXXXXXXXXXXXXXXX XX XXXXX

(XXXXXXXX 21:33-46; XXXXXX 12:1-12)

9 तेबे सेयो लोका खे ये उदारण बोलणे लगे, “एकी मांणूए अँगूरा रा बगीचा लगाया और टेकेदारा खे तिजी रा टेका देई की बऊत दिना खे परदेशो खे चली गा। 10 जेबे बखत आया तेबे तिने टेकेदारा गे एक दास पेजेया कि से अँगूरा रे बगीचे रा कुछ इस्सा तेसखे देओ, पर टेकेदार से कुटी की खाली

आथ पेजी ता। 11 तेबे तिने एक ओर दास पेजेया, पर तिने से बी कुटी की और तेसरी बेज्जती करी की खाली आथ पेजी ता। 12 तेबे तिने तीजा पेजेया, तेबे तिने से बी कायल करी की निकयाली ता। 13 तेबे तिने मालके सोचेया कि एबे आऊँ क्या करूँ? आऊँ आपणे प्यारे पाऊए खे तिना गे पेजुआ, क्या पता सेयो तेसरा आदर करो। 14 जेबे ठेकेदारो से देखेया तो आपू बीचे विचार करने लगे कि ये तो बारिस ए आओ एसखे काई देऊँ, ताकि जायदात म्हारी ऊई जाओ। 15 तेबे तिने से अँगूरा रे बगीचे ते बारे निकयाली की काई ता। तेबे अँगूरा रा बगीचे रे मालके तिना साथे क्या करना? 16 तेस आईकि तिना ठेकेदारा रा नाश करी देणा और अँगूरा रा बगीचा ओरी गे सम्बाली देणा।" ये सुणी की तिने बोलेया, "परमेशर करो कि एड़ा नि ओ।" 17 यीशुए तिना री तरफा खे देखी की बोलेया, "तेबे ये क्या लिखी राखेया, "जो पात्थर राजमिस्त्रिए तुच्छ ठराई राखेया था, सेई कूणे रा सिरा ऊईगा।

18 "जो कोई तेस पात्थरो पाँदे पडना, से चूर-चूर ऊई जाणा और जेस पाँदे ये पडना, तेस से पीसी देणा।"

☞☞☞☞ ☞☞ ☞☞ ☞☞☞☞

(☞☞☞☞ 22:15-22; ☞☞☞☞ 12:13-17)

19 तेसी बखते शास्त्रीए और बड़े पुरोईते सेयो पकड़ना चाए, कऊँकि सेयो समजी गे थे कि इने ये उदारण आसा पाँदे ई बोलेया, पर सेयो लोका ते डरी गे। 20 तेबे सेयो तिना री ताका रे रये और आपणे, पेतिये पेजे कि तमो रा पेष बदली की तेसरी कोई ना कोई गल्ल पकड़नी, ताकि तेसखे हाकिमो रे आथो रे और अक्को रे देई देऊँ। 21 तिने यीशुए ते पूछेया, "ओ गुरु! आसा खे पता एक तुसे ठीक बोलोए और सिखाओए और केसी रा पक्षपात नि करदे, पर परमेशरो री बाट सच्चाईया साथे बताओए। 22 तो क्या कैसरो खे कर देणा खरी गल्ल या नि?" 23 यीशुए तिना री चलाकी जाणी की तिना खे बोलेया, 24 "एक चाँदिए रा सिक्का मांगे बताओ। इदे केसरी मूर्ति और नाओ ए?" तिने बोलेया, "कैसरो रा।" 25 यीशुए तिना खे बोलेया, "जो कैसरो राए, से कैसरो खे देओ और जो परमेशरो राए, से परमेशरो खे देओ।" 26 सेयो लोका सामणे एसा गल्ला रे तिना खे पकड़ी नि सके, बल्कि तिना रा जवाब सुणी की हैरान ऊईगे और चुप रये।

☞☞☞☞☞ ☞☞☞☞☞☞ ☞☞☞ ☞☞ ☞☞☞☞

(☞☞☞☞☞ 22:23-33; ☞☞☞☞☞ 12:18-27)

27 तेबे सद्की, जो बोलो थे कि मरेया रा जिऊँदा ऊणा आए ई नि, तिना बीचा ते कई जणेया आयी की यीशुए ते पूछेया, 28 "ओ गुरु! मूसे आसा खे ये लिखी राखेया कि जे केसी रा पाई आपणी लाड़िया रे रंदे ऊए बिना ल्वादा ते मरी जाओ, तो तेसरा पाई तेसरी लाड़िया साथे ब्या करी लो और आपणे पाईए खे कुल पैदा करो। 29 सात पाई थे पईला पाई ब्या करी की बिना ल्वादा तेई मरी गा। 30 तेबे दजे और तीजे बी तेसा जवाणसा साथे ब्या करी ला। 31 ईयां ई सातो पाई बिना ल्वादा ते मरी गे। 32 सबी ते बाद से जवाणस बी मरी गी। 33 तेबे जिऊँदी ऊणे पाँदे से तिना बीचा ते केसरी लाड़ी ऊणी? कऊँकि से साता जणेया री लाड़ी ऊई चुकी थी।"

34 यीशुए तिना खे बोलेया, "एस जुगो रे लोका बीचे तो ब्या-शादिया ओईया। 35 पर जो लोक एते जोगे ऊणे कि तेस जुगो खे और मरे रे बीचा ते जिऊँदे ऊणे ओ, तेबे तिना बीचे ब्या-शादिया नि ऊणिया। 36 सेयो फेर मरने पनि, कऊँकि सेयो स्वर्गदूता जेडे ऊणे, और जिऊँदे ऊणे री ल्वाद ऊणे ते, परमेशरो री बी ल्वाद ऊणे। 37 पर ये गल्ल कि मरे रे बी फेर जिऊँदे ओए, मूसे जाडो री कथा रे प्रगट करी राखी कि से प्रभुए खे अब्राहम, इसहाक और याकूबो रा परमेशर करी की बोलोआ। 38 परमेशर मुडदेया रा नि, बल्कि जिऊँदेया रा परमेशर ए, कऊँकि तेसरे नेडे सब जिऊँदे ए।" 39 तेबे ये सुणी की शास्त्रिया बीचा ते कई जणे बोलेया, "ओ गुरु! तुसे अच्छा बोलेया।" 40 तेबे तिना खे फेर तिना ते कुछे ओर पूछणे री इम्मत नि ऊई।

ⓂⓂⓂⓂⓂⓂⓂⓂⓂⓂⓂⓂⓂⓂⓂⓂ

(ⓂⓂⓂⓂⓂⓂ 22:41-46; ⓂⓂⓂⓂⓂⓂ 12:35-37)

41 तेबे यीशुए तिना ते पूछेया, “मसीहे खे दाऊदो री ल्वाद कऊँ बोलोए? 42 दाऊद आपू ई भजनसंहिता री कताबा रे बोलोआ, “प्रभुए मेरे प्रभुए खे बोलेया, 43 मेरे दाँणे बैठ,

जदुओ तक आऊँ तेरे बैरिया खे तेरे पैरा निटे नि करी देऊँ ।

44 “दाऊद तो तेसखे प्रभु बोलोआ, तो तेबे से तेसरी ल्वाद कियौ ऊआ?”

ⓂⓂⓂⓂⓂⓂⓂⓂⓂⓂⓂⓂⓂⓂⓂⓂ

(ⓂⓂⓂⓂⓂⓂ 23:1-36; ⓂⓂⓂⓂⓂⓂ 12:38-40)

45 जेबे सब लोक सुणने लगी रे थे तेबे यीशुए आपणे चलेया खे बोलेया, 46 “शास्त्रिया ते चौकसरओ, जो लाम्बे टाले पईनी की कूमदे रओए और बजारो रे नमस्कार, और प्रार्थना रे कअरो रे खास-खास जगा और पाट्टिया रे खास जगा चाओए। 47 सेयो बिदुआ रे कअरो खे खाई जाओए और दखाणे खे मुखती देर तक प्रार्थना करोए, इना खे जादा सजा मिलणी।”

21

ⓂⓂⓂⓂⓂⓂⓂⓂⓂⓂⓂⓂⓂⓂⓂⓂ

(ⓂⓂⓂⓂⓂⓂ 12:41-44)

1 तेबे यीशुए आखी चकी की अमीर लोक आपणा-आपणा दान पण्डारो रे पाँदे ऊए देखे। 2 तिने एक कंगाल बिदुआ खे बी तिदे दो दमड़िया पाँदे ऊई देखी। 3 तेबे तिने बोलेया, “आऊँ तुसा खे सच बोलूँआ कि एसे कंगाल बिदुए सबी ते जादा पाई राखेया। 4 कऊँकि तिने सबी आपणिया सारिया सम्पतिया बीचा ते थोड़ा जा पाया, पर एसे आपणी कमाईया ते सारी आऊँदणी पाई ती।”

ⓂⓂⓂⓂⓂⓂⓂⓂⓂⓂⓂⓂⓂⓂⓂⓂ

(ⓂⓂⓂⓂⓂⓂ 24:1,2; ⓂⓂⓂⓂⓂⓂ 13:1,2)

5 जेबे कई जणे मन्दरो रे बारे रे बोलणे लगी रे थे कि यो कितणे सुन्दर पात्थर और पेंटा रिया चीजा साथे सजाई राखेया, तेबे तिने बोलेया, 6 “सेयो दिन आऊणे, जेबे, जो तुसे लगी रे देखणे, तिना बीचा ते एती जो पात्थरो पाँदे पात्थर लगी रे, सब टाले जाणे।”

ⓂⓂ:ⓂⓂⓂⓂⓂⓂⓂⓂⓂⓂ

(ⓂⓂⓂⓂⓂⓂ 24:3-14; ⓂⓂⓂⓂⓂⓂ 13:3-13)

7 तिने यीशुए ते पूछेया, “ओ गुरू! ये सब कदी ऊणा? और जेबे यो सब गल्ला पुरिया ऊणे वालिया ऊणिया, तेबे, तेस बखतो रा क्या चिह्न ऊणा?” 8 यीशुए बोलेया, “चौकसरओ कि कोई तुसा खे बईकाओ नि जाओ, कऊँकि बऊत जणे मेरे नाओं ते आऊणे और बोलणा कि आऊँ सेईए और ये बी कि बखत नेडे आईगा रा, तुसे तिना पीछे नि चली जाणा। 9 जेबे तुसे लड़ाई और हुडदंगा रे बारे रे सुणो, तेबे कबराणा नि, कऊँकि इना रा पईले ऊणा जरूरी ए, पर तेस बखते तेबुई अंत नि ऊणा।”

10 तेबे तिने तिना खे बोलेया, “जातिया पाँदे जातिया और राज्य पाँदे राज्य अमला करना 11 और बऊत ईल्लण ऊणे और जगा-जगा अकाल और बमारिया पड़नियाँ और सर्गों रे डराऊणिया गल्ला और बड़े-बड़े चिह्न प्रगट ऊणे। 12 पर इना सबी गल्ला ते पईले तिना तुसे मेरे नाओं ते पकड़ने और सताणे, प्रार्थना रे कअरो रे देई देणे, जेला रे पाणे और राजेया और हाकिमो सामणे लयी जाणे। 13 पर तुसा खे ये गवाई देणे रा मोका ऊई जाणा। 14 इजी री खातर आपणे-आपणे मनो रे ठाणी लो कि आसे पईले तेई जवाब देणे री चिन्ता नि करूँगे। 15 कऊँकि मां तुसा खे एड़ा बोल और बुद्धि देणी कि तुसा रे सब बिरोदी तुसा रा सामणा या खण्डन नि करी सकदे। 16 तुसा रे माए-बाओ, पाई-वईण, टव्वरो रे और दोस्ता बी तुसे पकड़वाणे, एथो तक कि तुसा बीचा ते कई जणे काई देणे। 17 मेरे नाओं

री वजह ते सभी लोका तुसा ते बैर राखणा। 18 पर तुसा रे सिरों रा एक बी बाल बांगा नि ऊणा। 19 आपणे सबरो ते तुसा आपणे प्राण बचाणे।

XXXXXXXX XX XXXXX XX XXXXXXXXXXXX
(XXXXXXXX 24:15-21; XXXXXX 13:14-19)

20 “जेवे तुसे यरूशलेमो खे सेना ते घिरे रा देखो, तो जाणी लणा कि तीजी रा नाश नेडे ए। 21 तेवे जो यहूदिया प्रदेशो रे ओ, तिने पाहूडो खे नठी जाणा और जो यरूशलेमो नगरो रे पीतरे ओ, सेयो बारे निकली जाएओ और जो गांव रे ओ। सेयो तिदे नि जाओ। 22 कऊँकि यो बदला लणे रे एडे दिन ऊणे, जिना रे लिखी रिया सारिया गल्ला पुरिया ऊई जाणिया। 23 तिना दिना रे जो गर्भवती और दूद पलयाणे वाली ऊणी, तिना खे हाय! हाय! कऊँकि देशो रे बड़ा क्लेश और लोका पाँदे बड़ा प्रकोप ऊणा। 24 सेयो तलवारा रे ग्रा ऊई जाणे और बऊत सारे देशो रे लोका बीचें बन्दुए ऊई की पऊँछाए जाणे और जदुओ तक दुजिया जातिया रा बखत पूरा नि ऊई जाणा, तदुओ तक यरूशलेम दुजिया जातिया साथे केसेया जाणा।

XXXXXX XX XXXXXXXX XX XXXXXXX XXXX
(XXXXXXXX 24:29-31; XXXXXX 13:24-27)

25 “सूरज, चाँद और तारेया रे चिह्न दिखणे और तरतिया पाँदे देशो-देशो रे जातिया रे लोका खे संकट ऊणा, कऊँकि सेयो समुद्रो रे गिड़ने और लईरा री छेड़ा ते कबराई जाणे 26 और डरो रे मारे और दुनिया रे आऊणे वाली घटना री बाट देखदे-देखदे लोका रे जानी पाँदे जान नि रणी, कऊँकि सर्गो रिया शक्तिया इलाईया जाणिया। 27 तेवे तिना माणू रा पुत्र सामर्थ और बड़ी महिमा साथे बादलो पाँदे आऊँदा ऊआ देखणा। 28 जेवे यो गल्ला ऊणे लगो, तेवे सीदे ऊई की आपणा सिर ऊवे चकणा, कऊँकि तुसा रा छुटकारा नेडे ऊणा।”

XXXXXXXX XX XXXXX XX XXXXXXX
(XXXXXXXX 24:32-35; XXXXXX 13:28-31)

29 यीशुए तिना खे एक उदारण बी बोलेया, “दाऊगले रे डालो खे और सभी डाला खे बी देखो। 30 जिंयाँ ई तिना रे पलंगूर निकलोए, तेवे तुसे देखी की आपू ई जाणी लओए कि तऊँदी नेडे ए। 31 ईयाँ ई जेवे तुसे इना गल्ला खे ऊँदे ऊआ देखो, तेवे जाणी लो कि परमेशरो रा राज्य नेडे ए। 32 आऊँ तुसा खे सच लगी रा बोलणे कि जदुओ तक यो सब गल्ला पूरिया नि ऊई जाओगिया, तदुओ तक एसा पीदिया रे लोका री मौत नि ऊणी। 33 सर्ग और तरती टली जाओगी, पर मेरा वचन कदी नि टलना। 34 इजी री खातर सावधान रओ, एड़ा नि ओ कि तुसा रे मन, खुमार, मतवालापण और एसा जिन्दगिया री चिन्ता ते सुस्त ऊई जाओ और सेयो दिन तुसा पाँदे फेदे जेड़ा अचाणक आयी जाओ।

XXXXXX XX
(XXXXXXXX 24:36-44; XXXXXXX 13:32-37)

35 “कऊँकि से सारी तरतिया पाँदे और सब रणे वालेया पाँदे ईयाँ ई पड़ना। 36 इजी री खातर जागदे रओ, हर बखत परार्थना करदे रओ, ताकि तुसे इना सभी आऊणे वालिया घटना ते बचणे, और माणू रे पुत्रो सामणे खडे ऊणे जोगे बणो।” 37 यीशु दिने मन्दरो रे उपदेश करो थे और राती बारे जाई की जैतून नाओं रे पाहूडो पाँदे रओ थे 38 और प्यागा तडके सब लोक तिना री सुणने खे मन्दरो रे तिना गे आया करो थे।

22

XXXXXX XX XXXX XXX-XXXX (XX-XX)
(XXXXXXXX 26:1-5; XXXXXX 14:1,2; XXXXXXX 11:45-53)

1 बिना सजेडे री रोटिया रा त्योआरो, जेतेखे फसह रा त्योआर बी बोलोए, नेडे था 2 और बडे पुरोईत और शास्त्री एड़ी गल्ला री टोला रे थे कि यीशुए खे कियोँ मरवाईए, पर सेयो लोका ते डरो थे।

????? ?? ???????????

(????? 26:14-16; ????? 14:10,11)

3 तेबे शैतान यहूदा रे समायी गा, जेसखे, इस्करियोती बी बोलोए और बारा चलेया बीचे गिणेया जाओ था। 4 तिने जाई की बडे पुरोईत और पईरेदारा रे सरदारा साथे गल्ल कित्ती कि यीशुए खे तिना रे आथो रे कियो पकड़वाईये। 5 सेयो खुश ऊईगे और तेसखे पैसे देणे रा वचन दित्तेया। 6 से मानी गा और बिना उपद्रवो ते यीशुए खे तिना रे आथो रे पकड़वाणे रा मोका लगेया टोलने।

?????? ????? ??? ?? ???? ???????

(????? 26:17-25; ????? 14:12-21; ??????? 13:21-30)

7 तेबे बिना सजेडे री रोटिया रा त्योआरो था, जिदे फसह रे त्योआरो रा मिन्दू बलि करना जरूरी था। 8 यीशुए पतरस और यहून्ना ये बोली की पेजे, “जाई की आसा खे खाणे खे फसह रे त्योआरो री रोटी त्यार करो।” 9 तिने तिना ते पूछेया, “तुसे केयी चाओए कि आसे तुसा खे फसह त्यार कहै?” 10 यीशुए तिना खे बोलेया, “देखो नगरो रे जांदे ई तुसा खे एक माणू पाणिए रा कअड़ा चकी की मिलणा, जेते कअरो रे से जाओ, तुसे तेस पीछे चली जाणा 11 और तेस कअरो रे मालको खे बोलणा कि गुरूए ताखे बोली राखेया कि से मईमाना रा कमरा केयी ए, जेती आऊँ आपणे चलेया साथे फसह रे त्योआरो री रोटी खाऊँ? 12 तेस तुसा खे एक सजी-सजाई री बाऊड़ो दखाणी, तुसे तेथी त्यारी करनी।” 13 चलेया जाई की तेड़ा ई पाया, जेड़ा यीशुए तिना खे बोलेया था तेड़ा ई पाया और फसह रे त्योआरो री रोटी त्यार कित्ती।

?????-???

(????? 26:26-30; ????? 14:22-26; 1 ????????????? 11:23-25)

14 जेबे बखत आया तेबे सेयो परेरिता साथे रोटी खाणे बैठे। 15 तेबे यीशुए तिना खे बोलेया, “मेरी बड़ी इच्छा थी कि दुःख सईन करने और मेरे मरने ते पईले तुसा साथे ये फसह रे त्योआरो री रोटी खाऊँ। 16 कऊँकि आऊँ तुसा खे बोलूँआ कि जदुओ तक से परमेशरो रे राज्य रे पूरा नि ओ, तदुओ तक मां से कदी नि खाणा।” 17 तेबे तिने अँगूरो रे रसो रा कटोरा लयी की परमेशरो रा धन्यवाद कित्तेया और बोलेया, “पकड़ो और आपू बीचे बांडी लओ। 18 कऊँकि आऊँ तुसा खे बोलूँआ कि जदुओ तक परमेशरो रा राज्य नि आओ, तदुओ तक मां अँगूरा रा रस आजो ते कदी नि पीणा।” 19 तेबे तिने रोटी लयी और धन्यवाद करी की तोड़ी और तिना खे ये बोली कि दित्ती, “ये मेरा शरीर ए, जो तुसा खे देणे लगी रा, मेरी यादारे एड़ा ई करेया करना।” 20 ईयां ई तिने रोटिया ते बाद कटोरा लया और ये बोलदे ऊए दित्तेया, “ये कटोरा मेरे तेस खूनो दे, जो तुसा री खातर बाह्या जाओआ, नयी वाचा ए। 21 पर देखो, मेरे पकड़वाणे वाले रा आथ मां साथे मेजो पाँदे ए। 22 कऊँकि आऊँ माणू रा पुत्र, जेड़ा मेरे बारे रे ठराई राखेया, जाणा ई ये। पर हाय! तेस माणूए खे जेसरी बजअ ते आऊँ पकड़वाया जाणा।” 23 तेबे सेयो आपू-बीचे बात-चीत करने लगे कि आसा बीचा ते एड़ा कूणे जेस एड़ा काम करना?

???? ???? ???? ???????

24 तिना बीचे ये बईस बी ऊणे लगी कि आसा बीचा ते बड़ा कूण ए? 25 यीशुए तिना खे बोलेया, “दुजिया जातिया रे राजा तिना पाँदे राज करोए और जो तिना पाँदे अक्क राखोए, तिना खे उपकारक बोलोए। 26 पर तुसे एडे नि ऊणा, बल्कि जो तुसा बीचे बड़ा ए, से छोटिया जेड़ा और जो बड़ा ए, से सेवको जेड़ा बणो। 27 कऊँकि बड़ा कूण ए? क्या से जो रोटिया पाँदे बैठी रा या से जो सेवा करने लगी रा? क्या से नि जो रोटिया पाँदे बैठी रा? पर आऊँ तुसा बीचे सेवको जेड़ा ए।

28 “पर तुसे सेयो ए, जो परीक्षा रे लगातार मां साथे रये 29 और जियाँ मेरे पिते माखे एक राज्य ठराई राखेया। 30 तियाँ ई आऊँ बी तुसा खे ठराऊँआ, ताकि तुसे मेरे राज्य रे मां साथे खाओ-पियो, बल्कि सिंहासनो रे बैठी की इस्त्राएलो रे बारा गोत्रा रा न्याय करो।

????? ?? ??????? ?? ???????????

(????? 26:31-35; ????? 14:27-31; ??????? 13:36-38)

31 “शमौन, ओ शमौन! देख, शैताने तुसे लोक मांगी लये रे, ताकि कणका जेड़े फड़ाकुओ। 32 पर मैं तेरिया तई प्रार्थना किती कि तुसे मां पाँदे विश्वास करना नि छाडी देओ, और जेबे तू आपणा मन फेरो, तो आपणे पाई मजबूत करने।” 33 तिने बोलेया, “ओ परभु! आऊँ तुसा साथे जेला रे जाणे खे, बल्कि मरने खे बी त्यार ए।” 34 परभुए बोलेया, “ओ पतरस! आऊँ ताखे बोलूँआ कि आज मुर्गे बांग नि देणी, जदुओ तक तू माखे तीन बार जाणने ते नि मुकरना।”

~~~~~

35 यीशुए तिना खे बोलेया, “जेबे मैं तुसे सुसमाचार प्रचार करने बटुए, चोली और जोड़ेया ते बिना पेजे थे, तेबे क्या तुसा खे किजी चीजा री कमी ऊई?” तिने बोलेया, “किजी चीजा री नि।” 36 तेबे यीशुए बोलेया, “पर एबे जेसगे बटुआ ए, से लयी लो और तियाँ ई चोला बी और जेसगे तलवार नि ए, से आपणे टाले बेची की एक खरीदी लो। 37 कऊँकि आऊँ तुसा खे बोलूँआ कि ये जो पवित्र शास्त्रो रे लिखी राखेया, से अपराधिया साथे गिणेया गया। से मां पाँदे ऊणा जरूरी ए, कऊँकि मेरे बारे रिया गल्ला पुरिया ऊणे वालिया ए।” 38 चलेया बोलेया, “ओ परभु! देखो, एती दो तलवारी आए, तिने बोलेया बऊत ए।”

~~~~~

(~~~~~ 26:36-46; ~~~~~ 14:32-42)

39 तेबे यीशु बारे निकली की आपणी रवाजा रे मुताबिक जैतूनो रे पाहड़ो पाँदे गये और चले बी तिना पीछे चली गे। 40 तेते जगा रे पऊँछी की तिने आपणे चलेया खे बोलेया, “प्रार्थना करदे रओ, ताकि परीक्षा रे नि पड़ो।” 41 तेबे सेयो आपू तिना ते थोड़ी जी दूर चली गे और कुटणे टेकी की प्रार्थना करने लगे 42 और बोलणे लगे, “ओ पिता! जे तुसे चाओ तो एस दुःखो खे मांगा गे ते दूर करी सकोए, तेबे बी मेरी इच्छा नि पर तुसा री इच्छा पूरी ओ।” 43 तेबे स्वर्गो ते एक स्वर्गदूत तिना खे दिशेया, जो तिना खे सामर्थ देयो था। 44 तेबे सेयो जादा मुश्किला रे, व्याकुल ऊई की ओर बी दिलो ते दुःखी ऊई की प्रार्थना करने लगे और तिना रा पसीना, मानो खूनो रे बड़े-बड़े टीपेया जेड़ा जमीना पाँदे छुटणे लगी रा था। 45 तेबे सेयो प्रार्थना करी की उठे और आपणे चलेया गे गये ओर तिने सेयो उदास ऊई की सये रे देखे। 46 और तिना खे बोलेया, “सऊणे कऊँ लगी रे? उठो और प्रार्थना करो, ताकि परीक्षा रे नि पड़ो।”

~~~~~

(~~~~~ 26:47-56; ~~~~~ 14:43-50; ~~~~~ 18:3-12)

47 सेयो ये बोलणे ई लगी रे थे कि एक बड़ी पीड़ तिना गे आयी और तिना बारा बीचा ते, एक जेसरा नाओं यहूदा था, तिना ते आगे-आगे आऊणे लगी रा था और से यीशुए गे आया, ताकि तेसखे चूमो। 48 यीशुए तेसखे बोलेया, “ओ यहूदा! क्या तू माणू रे पुत्रो खे चूमा लयी की पकड़वाएया?” 49 तिना रे साथिये जेबे देखेया कि क्या ऊणे वाला ए, तेबे बोलेया, “ओ परभु! क्या आसे तलवार चलाऊँ?” 50 तेबे तिना बीचा ते एकी जणे प्रदान पुरोईतो रे दासो पाँदे तलवार चलाई की तेसरा दाँणा कान ऊड़ाई ता। 51 तेबे यीशुए बोलेया, “एबे बस करो” और तेसरा कान छुँई की से ठीक करी ता। 52 तेबे यीशुए बड़े पुरोईतो ते, मन्दरो रे पईरा देणे वाले सरदारो ते, बुजुर्गा ते और जो तिना पाँदे चढ़ने लगी रे थे, तिना खे बोलेया, “क्या तुसे आऊँ डाकु समजी राखेया जो माखे पकड़ने खे तलवारी और डण्डे लयी की निकली रे? 53 जेबे आऊँ मन्दरो रे हर दिन तुसा साथे था, तेबे तो तुसे मां पाँदे आथ नि पाया। पर ये तुसा रा बखत ए और न्हरे रा अक्क ए।”

~~~~~

(~~~~~ 26:57,58,69-75; ~~~~~ 14:53,54,66-72; ~~~~~ 18:12-18,25-27)

54 तेबे सेयो तिना खे पकड़ी की प्रदान पुरोईतो रे आँगणो रे ल्याए और पतरस दूरो-दूरो तेई तिना पीछे-पीछे आईगा 55 और जेबे सेयो आँगणो रे आग वाली की बैठी रे थे, तेबे पतरस बी तिना बीच बैठे गा। 56 तेबे एक दासी तेसखे आगी रे प्रयासे रे देखी की ओर तेसर कनारो खे ताकि की

बोलने लगी, “ये बी तो तेस साथे था?” 57 पर तिने ये बोली की ना करी ती कि, “ओ जवाणसे! आऊँ तेसखे नि जाणदा।” 58 थोड़ी देर बाद किने ओरी तेसखे देखी की बोलेया, “तूँ बी तो तिना बीचा ते ए,” पतरसे बोलेया, “ओ माणू! आऊँ नि ए।” 59 तेबे कोई एक कंटे ते बाद एक ओर माणू पक्का ऊई की बोलणे लगेया, “पक्का ये बी तेस साथे था, कऊँकि ये बी गलीली ए।” 60 पतरसे बोलेया, “ओ माणू! आऊँ नि जाणदा कि तूँ क्या लगी रा बोलणे?” से ये बोलणे ई लगी रा था कि तेबुई मुर्गे बांग दित्ती। 61 तेबे यीशुए तेसखे मुडी की देखेया, तेबे पतरसो खे तिना री गल्ल याद आयी, जो तिने बोली थी कि, “आज मुर्गे री बांग देणे ते पईले तूँ माखे तीन बार जाणने ते मुकरना।” 62 तेबे से बारे निकली की फूटी-फूटी की रोणे लगेया।

(***** 26:67,68; ***** 14:65)

63 जिने माणूए यीशु पकड़ी राखे थे, सेयो तिना रा मजाक ऊड़ाणे लगे और टीशणे लगे 64 और तिना रिया आखी टखी की तिना ते पूछेया, “भविष्यवाणी करी की बता कि तादे किने बाई?” 65 तेबे तिने ओर बी बऊत निन्दा रिया गल्ला तिना रे बिरोदो रे बोलिया।

(***** 26:59-66; ***** 14:55-64; ***** 18:19-24)

66 जेबे दिन ऊआ तेबे, बुजुर्गे, बड़े पुरोईते और शास्त्रिए तिना खे आपणी बड़ी सभा रे ल्याई की पूछेया, 67 “जे तूँ मसीह ए, तो आसा गे बताई दे।” यीशुए बोलेया, “जे आऊँ बोलूंगा तो तुसा विश्वास नि करना। 68 और जे पूछूँ तो जवाब नि देण। 69 पर आजो ते आऊँ माणू रा पुत्र सर्वशक्तिमान् परमेशरो रे दाँणे कनारे बैठे रा रणा।” 70 ये सुणी की सबी जणे बोलेया, “तो क्या तूँ परमेशरो रा पुत्र ए?” तिने तिना खे बोलेया, “तुसे आपू ई बोलणे लगी रे, कऊँकि आऊँ आए।” 71 तेबे तिने बोलेया, “एवे आसा खे गवाईया री क्या जरूरत ए, कऊँकि आसे आपू ई एसरे मुँओ ते सुणी ता रा।”

23

(***** 27:1,2,11-14; ***** 15:1-5; ***** 18:28-38)

1 तेबे सारी सभा उठी की तिना खे पिलातुसो गे लयी गी। 2 सेयो ये बोली की तिना पाँदे दोष लगाणे लगे, “आसे ये लोका खे रोमी सरकारा रे खलाफ बरोद करने खे बईकांदे ऊए और कैसरो खे कर देणे खे ना करदे ऊए और आपू खे मसीह, राजा बोलदे ऊए सुणी राखेया।” 3 पिलातुसे तेसते पूछेया, “क्या तूँ यहूदिये रा राजा ए?” यीशुए तेसखे बोलेया, “तूँ आपू ई लगी रा बोलणे।” 4 तेबे पिलातुसे बड़े पुरोईत और लोका खे बोलेया, “आऊँ एस माणूए रे कोई दोष नि देखदा।” 5 पर सेयो ओर बी पक्के ऊई की बोलणे लगे, “ये गलीलो ते लयी की एथो तक, सारे यहूदिये रे उपदेश देई-देई की लोका खे उकसाओ आ।” 6 ये सुणी की पिलातुसे पूछेया, “क्या ये माणू गलीलो रा रणे वाला ए?” 7 तेबे ये जाणी की कि ये हेरोदेसो री रियासता राए, से हेरोदेसो गे पेजी ता, कऊँकि तिना दिना रे से बी यरूशलेमो रे था।

8 हेरोदेस यीशुए खे देखी की बऊत खुश ऊईगा, कऊँकि से बऊत दिना ते तिना खे देखणा चाओ था, कऊँकि तिने तिना रे बारे रे सुणी राखेया था और यीशुए ते कोई चिह्न देखणे री उम्मीद राखो था। 9 तेबे से तिना ते मुखती गल्ला पूछदा रया, पर तिने तेसखे कुछ बी जवाब नि दिन्तेया। 10 तेबे बड़े पुरोईत और शास्त्री खडे ऊई की तनो-मनो साथे तिना पाँदे दोष लगादे रये। 11 तेबे हेरोदेसे आपण सिपाईया साथे तिना रा मजाक उड़ाया और भड़किले टाले पणयाई की पिलातुसो गे वापस पेजी ता। 12 तेसी दिना ते हेरोदेस और पिलातुस दोस्त बणी गे, इजी ते पईले सेयो एकी-दूजे रे बैरी थे।

॥॥॥॥॥॥॥ ॥॥ ॥॥॥॥ ॥॥॥॥॥॥॥ ॥॥ ॥॥॥॥ ॥॥ ॥॥॥॥ ॥॥ ॥॥॥॥

(॥॥॥॥॥॥ 27:15-26; ॥॥॥॥॥॥ 15:6-15; ॥॥॥॥॥॥॥ 18:39; ॥॥॥॥॥॥॥ 19:16)

13 पिलातुसे बड़े पुरोईत, अधिकारी और लोक बुलाई की तिना खे बोलेया, 14 “तुसे एस माणूए खे लोका खे रोमी सरकारा रे खलाफ बरोद करने खे बईकाणे वाला बोली की मांगे ल्याई राखे और देखो, मैं तुसा सामणे एसरी जांच कित्ती, पर जिना गल्ला रा तुसे एस पाँदे दोष लगी रे लगाणे, तिना गल्ला रे मैं एसरे कोई बी दोष नि पाया। 15 ना ई हेरोदेसे, कऊँकि तिने ये आसा गे वापस पेजी ता रा और देखो, एसते एड़ा कुछ नि ऊई रा, जेतेरी बजअ ते एसखे मृत्यु दण्ड मिलो। 16 तेबे आऊँ तेसखे कोड़े लगवाई की छाडी देऊँआ।” 17 यहूदिया रे फसह रे त्योआरो रे दिने पिलातुस हर साल एकी कैदियो खे तिना खे छाडी देओ था। 18 तेबे सब मिली की चींगणे लगे, “एसरा काम-तमाम कर और आसा खे बरअब्वे खे छाडी दे।” 19 ये सेईए जो हुडदंगो री बजअ ते, जो नंगरो रे ऊआ था और अत्या री बजअ ते जेला रे पायी ता था। 20 पर पिलातुसे यीशुए खे छाडणे री इच्छा ते लोक फेर समजयाए। 21 पर तिने चींगी की बोलेया, “एसखे कूरूसो पाँदे चढ़ाई देओ, कूरूसो पाँदे।” 22 तिने तीजी बार तिना खे बोलेया, “कऊँ, इने कुण जी बुराई करी राखी? मैं एसरे मृत्यु दण्डो लायक कोई बी गल्ल नि देखी। इजी री खातर आऊँ एसखे कुटवाई की पेजी देऊँआ।” 23 पर सेयो चींगी-चींगी की पीछे ई पड़ी गे कि एसखे कूरूसो पाँदे चढ़ाओ और तिना रा चींगणा प्रबल ऊईगा। 24 तेबे पिलातुसे आज्ञा दिती कि इना री बिनतिया रे मुताबिक कित्तेया जाओ।

25 तिने से माणू जो हुडदंग और अत्या री बजअ ते जेला रे पाया था और जेसखे सेयो माँगे थे, छाडीता और यीशु तिना री इच्छा रे मुताबिक तिना रे आथो रे देई ते।

॥॥॥॥॥ ॥॥ ॥॥॥॥॥॥ ॥॥॥॥ ॥॥॥॥॥॥

(॥॥॥॥॥॥ 27:32-44; ॥॥॥॥॥॥ 15:21-32; ॥॥॥॥॥॥॥ 19:17-27)

26 जेबे सेयो यीशुए खे नीणे लगी रे थे, तेबे तिने शमोन नाओ रा एक कुरेनी माणू, जो दूजे गांव ते आऊणे लगी रा था, तेसी बखते से तिसिये निकलेया, पकड़ी की तेस पाँदे कूरूस लादी ता, ताकि एसखे यीशुए पीछे लयी चलो। 27 तेबे लोका री बड़ी पीड तिना पीछे चली पड़ी और मुखती जवाणसा बी, जो तिना पीछे रोओ थिया और छाती पीटो थिया। 28 यीशुए तिना खे मुडी की बोलेया, “ओ यरूशलेमो री बेटियो! माखे नि रोओ, बल्कि आपू और आपणे बालका खे रोओ जो तुसा साथे ऊणे वाला ए 29 कऊँकि सेयो दिन आऊणे, जेबे बोलणा कि धन्य ए से जवाणसा जो बांझ ए और से गर्भ जिने बच्चे पैदा नि कित्ते और सेयो स्तन जिने दूद नि पलयाया। 30 तेस बखते तिना पाहुड़ो ते बोलणा कि आसा पाँदे आयी जाओ और टिलेया खे कि आसा खे टखी देओ।

31 “कऊँकि जेबे सेयो अरेया डाला साथे एड़ा करोए, तो सूकेया साथे क्या कुछ नि करेया जाणा।” 32 सिपाई यीशुए साथे दो ओर माणूआ खे जो कुकर्मी थे, काणे खे लयी चले। 33 तेबे सेयो तेते जगा रे जेतेखे खोपड़ी बोलो थे, पऊँछे, तेबे तिने तेती यीशु और सेयो दो जणे जो कुकर्मी थे, एक दाँणे कनारे और दूजा खूँजे कनारे कूरूसो पाँदे चढ़ाए। 34 तेबे यीशुए बोलेया, “ओ पिता! इना खे माफ कर, कऊँकि यो नि जाणदे कि क्या लगी रे करने?” और तिने चिटठिया पायी की तिना रे टाले बांडी ते। 35 लोक खड़े-खड़े देखणे लगी रे थे और अधिकारी बी मजाक करी-करी की बोलो थे, “इने ओर बचाए, जे ये परमेशरो रा मसीह ए और तेसरा चूणे राए, तो आपणे आपू खे बचाई लो।” 36 सिपाई बी नेडे आओ थे और सिरका देई की तिना रा मजाक करी की बोलो थे, 37 “जे तूँ यहूदिया रा राजा ए, तो आपू खे बचा।” 38 तिना पाँदे एक दोष-पत्र बी था लगे रा कि, “ये यहूदिया रा राजा ए।”

॥॥ ॥॥॥॥॥॥ ॥॥॥॥ ॥॥॥॥॥॥

39 जो कुकर्मी लटाकाई राखे थे, तिना बीचा ते एकी जणे यीशुए री निन्दा करी की बोलेया, “क्या तूँ मसीह निए? तो आपू और आसा खे बचा।” 40 तेबे दूजे जणे तेसखे बकी की बोलेया, “क्या तूँ परमेशरो रा डर पनि मानदा? तूँ बी तो सेई सजा पुगतणे लगी रा। 41 आसे तो न्याय रे मुताबिक सजा पाणे लगी रे, कऊँकि आसे आपणे कामो रा अच्छा फल लगी रे पाणे, पर इने कोई बी बुरा

काम नि कित्तेया ।” 42 तेवे तिने बोलेया, “ओ यीशु! जेबे तूँ आपणे राज्य रे आए, तो मेरी सम्बाल बी लयी लया ।” 43 तिने तेसखे बोलेया, “आऊँ ताखे सच लगी रा बोलणे कि तूँ आज ई मां साथे स्वर्गलोको रे ऊणा ।”

ॐॐॐॐ ॐॐ ॐॐॐॐ ॐॐॐॐ

(ॐॐॐॐ 27:45-56; ॐॐॐॐ 15:33-45; ॐॐॐॐॐॐ 19:28-30)

44 और तकरीबन दोपईरो रे तीजे पईरो तक सारे देशो रे न्हैरा ऊईगा । 45 और सूरजो रा प्रयासा चली गा, तेबे मन्दरो रा पड़दा पाँदो ते लई की थालो तक फटीगा और तिजी रे दो टुकड़े ऊईगे । ए ये दखाओ कि एबे कोई माणू परमेशरो री हजुरिया रे जाई सकोआ । 46 तेबे यीशुए जोरे की बोलेया, “ओ पिता! आऊँ आपणी आत्मा तुसा रे आधो रे सम्बालूँआ और ये बोली की तिने प्राण छाडी ते ।” 47 सूबेदारो जो कुछ ऊई रा था देखी की परमेशरो री तारीफ कित्ती और बोलेया, “सच्ची ये माणू तर्मी था ।” 48 तेबे पीड़ जो ये देखणे खे कट्टी ऊई री थी, ये घटना देखी की छाती पिटदी ऊई वापस ऊईगी । 49 पर तिना रे सब जाण-पछ्याण वाले और जो जवाणसा गलील प्रदेशो ते तिना साथे आयी रिया थिया, दूर खड़िया ऊई की ये सब देखणे लगी री थिया ।

ॐॐॐॐ ॐॐ ॐॐॐॐ

(ॐॐॐॐ 27:57-61; ॐॐॐॐ 15:42-47; ॐॐॐॐॐॐ 19:38-42)

50 तेती यूसुफ नाओं रा बड़ी सभा रा एक सदस्य था, जो पला और तर्मी माणू था 51 और तिना री योजना और तिना रे इना कामो ते खुश नि था । से यहूदिया रे नगर अरिमतियाह रा रणे वाला था और परमेशरो रे राज्य री बाट न्यालने वाला था । 52 तिने पिलातुसो गे जाई की यीशुए री लोध मांगी । 53 और से उतारी की मलमलो री चादरी रे लपेटी और कबरा रे राखी, जो चट्टानी रे खणी राखी थी और तिदे कदी कोई नि राखी राखेया था । 54 से त्यारिया रा दिन था और आरामो रा दिन शुरू ऊणे वाला था । 55 तिने जवाणसे जो गलीलो ते तिना साथे आयी री थिया, पीछे-पीछे जाई की से कबर देखी और ये बी कि तिना री लोध कियौं थी राखी री । 56 तेबे तिने आपणे कअरे वापस आयी की खुशबूदार चीजा और इत्र यीशुए रे शरीरो पाँदे मलने खे त्यार कित्तेया और आरामो रे दिने तिने आज्ञा रे मुताबिक आराम कित्तेया ।

24

ॐॐॐॐ ॐॐ ॐॐॐॐॐ ॐॐॐॐॐ ॐॐॐ

(ॐॐॐॐ 28:1-10; ॐॐॐॐ 16:1-8; ॐॐॐॐॐॐ 20:1-10)

1 तेबे सेयो अफते रे पईले दिने प्यागा-प्यागा खुशबूदार चीजा जो तिने त्यार कित्तेया थिया, कबरा पाँदे लयी की आईया । 2 तिने पात्थर कबरा पाँदा ते कनारे पाँदे खसकेया रा देखेया । 3 पर पीतरे जाई की यीशुए री लोध नि पायी । 4 जेबे सेयो एसा गल्ला ते हैरान ऊणे लगी री थिया, तेबे दो माणू सफेद टाले पईनी की तिना सामणे खड़े ऊईगे, मतलब दो स्वर्गदूत एकदम आयी तिना सामणे खड़े ऊईगे । 5 जेबे सेयो डरी गिया और तरतिया कनारे खे मूँ जूँगेया रा राखेया, तेबे तिने तिना खे बोलेया, “तुसे जिऊँदे खे मरे रेया बीचे कऊँ लगी रिया टोलने? 6 से एती निए बल्कि जिऊँदा ऊईगा रा, याद करो कि तिने गलीलो रे रंदे ऊए तुसा खे बोलेया था, 7 जरूरी ए कि आऊँ माणू रा पुत्र पापिया रे आधो रे पकड़वाया जाओ और करूसो पाँदे लटकाया जाओ और तीजे दिने जिऊँदा ऊई जाओ ।” 8 तेबे यीशुए रिया गल्ला तिना खे याद आईया । 9 तेबे तिने कबरा ते वापस ऊई कि तिना ग्यारा जणेया खे और ओरी सबी खे, यो सब गल्ला बताईया । 10 जिने प्रेरिते यो सब गल्ला बोलिया, सेयो, मरियम मगदलिनी, यूहन्ना और याकूबो री आम्मा मरियम और तिना साथलिया ओर बी जवाणसा थिया । 11 पर तिना खे तिना री गल्ला काणियां जेड़िया लगीया और तिने तिना रा विश्वास नि कित्तेया । 12 तेबे पतरस उठी की कबरा आओखे दौड़ी की चली गा और तिने नपी की बस टाले ई पड़े रे देखे और जो ऊआ था तिजी ते हैरान ऊई की कअरो खे चली गा ।

⚬⚬⚬⚬⚬⚬⚬⚬ ⚬⚬ ⚬⚬⚬⚬ ⚬⚬ ⚬⚬⚬⚬ ⚬⚬⚬⚬⚬⚬ ⚬⚬⚬⚬
(⚬⚬⚬⚬⚬⚬ 16:12,13)

13 तेबे तेसी दिने तिना बीचा ते दो चले इम्माऊस नाओं रे गांव खे जाणे लगी रे थे, जो यरूशलेमो ते तकरीबन ग्यारा किलोमीटर दूर था। 14 सेयो इना सबी गल्ला खे, जो ऊई रिया थिया, आपू बीचे बातचीत करदे ऊए चली रे थे 15 और जेबे सेयो आपू बीचे बातचीत और पृछताछ करने लगी रे थे, तेबे यीशु आपू तिना साथे-साथे चलणे लगे। 16 पर तिना री आखिया एडिया बंद करी ती थिया कि सेयो तिना खे पछयाणी नि सके। 17 यीशुए तिना ते पृछेया, “यो केडिया गल्ला ए, जो तुसे चलदे-चलदे ऊए आपू बीचे करने लगी रे?” सेयो उदास जे खडे रे रई गे। 18 ये सुणी की तिना बीचा ते क्लियुपास नाओं रे माणूए बोलेया, “क्या तू यरूशलेमो रे कल्ला परदेशी ए, जो जाणदा नि कि आजकाल तेती क्या ऊई रा?”

19 तिने तिना ते पृछेया, “कुण जीया गल्ला?” तिने बोलेया, “यीशु नासरियो रे बारे रे, जो परमेशर और सबी लोका रे नेडे काम और वचनो रे सामर्थी भविष्यबक्ता था 20 और बडे पुरोईत और म्हारे अधिकारिए से पकड़वाईता, ताकि तेसखे मौता री सजा दित्ती जाओ और से करूसो पाँदे चढ़ाया। 21 पर आसा खे उम्मीद थी कि एस ई इस्राएलो खे छुटकारा देणा और इना सबी गल्ला ते अलावा एसा घटना खे आज तीजा दिन ए। 22 और एबे आसा बीचा ते बी कई जवाणसे आसे हैरानिया रे पायी ते रे, जो आज प्यागा कबरा पाँदे गईया थिया 23 और जेबे तेसरी लोथ नि मिली, तेबे ये बोलदिया ऊईया आईया कि आसे स्वर्गदूता रा दर्शन पायी राखेया, जिने आसा गे बताया कि यीशु जिऊंदा ए। 24 तेबे आसा रे साथिया बीचा ते कई जणे तेती गये और जेड़ा तिने जवाणसे बोलेया था, तेड़ा ई पाया, पर से नि देखेया।” 25 तेबे यीशुए तिना दो चलेया खे बोलेया, “ओ मूर्खी! और भविष्यबक्तेया रिया सबी गल्ला रे विश्वास करने रे मंदबुध्दियो! 26 क्या ये जरूरी नि था कि मसीह एस दुःखो ते बाद आपणी महिमा रे आओ?” 27 तेबे तिने मूसे ते और सबी भविष्यबक्तेया ते शुरूओ ते और सांरे पवित्र शास्त्रा बीचा ते, आपणे बारे रे लिखी रिया सबी गल्ला रा मतलब तिना खे समजयाई ता।

28 तदुओ कि सेयो तेस गांव रे पऊँछी गे, जेती सेयो जाणे लगी रे थे और यीशुए रे चलणे ते एडा लगे था कि सेयो आगे जाणा चाओए। 29 पर तिने सेयो ये बोली की रोके, “आसा साथे रओ, कऊँकि साँज ऊईगी री।” तेबे सेयो तिना साथे पीतरे रणे खे चली गे। 30 जेबे यीशु तिना साथे रोटी खाणे बैठे, तेबे तिने रोटी तोड़ी की धन्यवाद कितेया और तोड़ी की तिना खे देणे लगेया। 31 तेबे तिना री आखिया खुली गिया और तिने सेयो पछयाणी ले, तेबे यीशु तिना ते लूकी गे। 32 तिने आपू बीचे बोलेया, “जेबे से बाटा रे आसा साथे गल्ला करने लगी रा था और पवित्र शास्त्रो रा मतलब आसा खे समजयाणे लगी रा था, तेबे क्या आसा रे मनो रे उतेजना नि ओ थी?” 33 सेयो तेसी बखते उठी की यरूशलेमो खे वापस ऊईगे, और तिना ग्यारा चलेया खे और तिना रे साथिया खे कटटे देखेया। 34 सेयो बोली थे, “प्रभु सच्ची जिऊँदे ऊईगे रे और शमौन पतरसो खे दिशेया।” 35 तेबे तिने बाटा रिया गल्ला तिना खे बताई तिया और ये बी कि तिने रोटी तोड़दे बखते सेयो कियाँ पछयाणे?

⚬⚬⚬⚬⚬⚬ ⚬⚬ ⚬⚬⚬⚬⚬⚬⚬ ⚬⚬ ⚬⚬⚬⚬⚬⚬
(⚬⚬⚬⚬⚬⚬ 28:16-20; ⚬⚬⚬⚬⚬⚬ 16:14-18; ⚬⚬⚬⚬⚬⚬⚬ 20:19-23; ⚬⚬⚬⚬⚬⚬⚬⚬ 1:6-8)

36 सेयो इना गल्ला करने ई लगी रे थे कि यीशु आपू ई तिना बीचे खडे ऊईगे और तिना खे बोलेया, “तुसा खे शान्ति मिलो।” 37 पर सेयो कवराई गे, डरी गे और समजणे लगे कि केंसी पूतो खे देखणे लगी रे। 38 यीशुए तिना खे बोलेया, “कवराणे कऊँ लगी रे? और तुसा रे मनो रे शक कऊँ ए? 39 मेरे आथा खे और मेरे पैरा खे देखो कि आऊँ सेईए, माखे छुँई की देखो, कऊँकि आत्मा रे आड्ड और मांस नि ऊँदे, जेड़ा माँदे देखणे लगी रे।”

40 ये बोली की तिने आपणे आथ पैर तिना गे बताए। 41 जेबे खुशिया रे मारे तिना खे विश्वास नि ऊआ कि यीशु जिऊँदा ऊईगा रा और हैरान ऊईगे, तेबे यीशुए बोलेया, “क्या एती तुसा गे कुछ रोटी आयी।” 42 तिने तिना खे पुजी रिया मछलिया रा टुकड़ा दितेया। 43 तिने लयी की तिना सामणे खाया। 44 तेबे यीशुए तिना खे बोलेया, “यो मेरिया सेयो गल्ला ए, जो मै तुसा साथे रंदे ऊए, तुसा

खे बोली थिया, कि जरूरी ए कि जितणिया गल्ला मूसे रा बिधान और भविष्यवक्ता और पजनो री कताबा रे मेरे बारे रे लिखी राखिया, सेयो सब पुरिया ओ।”

45 तेवे यीशुए पवित्र शास्त्र समजणे खे तिना खे अक्ल दिती 46 और तिना खे बोलेया, “पवित्र शास्त्रो रे ईयां लिखी राखेया कि मसीहे दुःख उठाणा और तीजे दिने मरे रेया बीचा ते जिऊंदा ऊणा 47 और यरूशलेम नगरो ते लयी की सबी जातिया खे मन फिराणे रा और पापो रिया माफिया रा प्रचार, तेसरे ई नाओं ते कित्तेया जाणा। 48 तुसे इना सबी गल्ला रे गवा ए 49 और देखो, मां आपू पवित्र आत्मा पेजणी जेतेरी प्रतिज्ञा मेरे पिते करी राखी और जदुओ तक स्वर्गो ते सामर्थ नि पाओ, तदुओ तक एस नगरो रेई रओ।”

⋮⋮⋮⋮⋮ ⋮⋮ ⋮⋮⋮⋮⋮⋮⋮ ⋮⋮ ⋮⋮⋮⋮⋮

(⋮⋮⋮⋮⋮ 16:19,20; ⋮⋮⋮⋮⋮⋮⋮⋮⋮ 1:9-11)

50 तेवे यीशु तिना खे बैतनिय्याह नगरो तक बारे लईगे, और आपणे आथ चकी की तिना खे आशीष दिती। 51 और तिना खे आशीष देंदे ऊए सेयो तिना ते लग ऊईगे और स्वर्गो खे चकी ते। 52 तेवे चले तिना गे माथा टेकी की और बडिया खुशिया साथे यरूशलेमो खे वापस ऊईगे। 53 और हर रोज मन्दरो रे आजिर ऊई की परमेशरो री स्तुति करेया करो थे।

यूहन्ना यूहन्ने रा लिखेया रा सुसमाचार भूमिका

यूहन्ना रचित सुसमाचारो रे यीशुए खे परमेशरो रे अनन्त वचनो रे रूपो रे दखाई राखेया, जिने आसा बीचे शरीर तारण करी की डेरा कित्तेया। एते कताबा रे ये साफ गल्ला ए कि ये सुसमाचार इजी री तँई लिखेया राखेया ताकि इजी खे पढ़ने वाले विश्वास करो कि यीशु ई प्रतिज्ञा कित्ते रा उद्धारकर्ता ए मतलब परमेशरो रा पुत्र ए और सेयो यीशुए पाँदे विश्वासो रे जरिए जिन्दगी पाई सकी 20:31।

भूमिका रे यीशुए खे परमेशरो रे अनन्त वचनो रे रूपो रे दखाई राखेया। तिजी ते बाद सुसमाचारो रे पईले पाअगो रे सात अचम्बे रे काम या चिह्नो रा वर्णन ए, तिना ते ये प्रगट ओआ कि यीशु प्रतिज्ञा कित्ते रा उद्धारकर्ता ए मतलब परमेशरो रा पुत्र ए। दूजा पाअग उपदेश ए। तिदे ये समजयाई राखेया कि इना अचम्बे रे कामा रा क्या मतलब ए। एते पाअगो रे ये बी बताई राखेया कि कियौ कई लोके यीशुए पाँदे विश्वास कित्तेया और तेसरे तारीफ करने वाले बणी गे, जबकि कुछ लोके तेसरा बिरोद कित्तेया और विश्वास करने ते ना करी ती। 13-17 पाठो रे यीशुए खे पकड़वाणे री राती रे यीशुए री तेसरे चलेया साथे पक्की सहभागिता, कूरूसो पाँदे चढ़ाणे ते पईलके दिनो रे साँजके बखते चलेया खे तयार करने और तिना खे उत्साहित करने वाले यीशुए रे वचनो रा विस्तारो रे वर्णन ए। आखरी रे पाठा रे यीशुए रे पकड़वाणे, मुकद्दमे, तेसरा कूरूसो पाँदे चढ़ाणे, दवाणे, दुबारा जिऊँदा ऊणा और दुबारा जिऊँदा ऊणे ते बाद चलेया पाँदे प्रगट ऊणे रा वर्णन ए।

यूहन्ना मसीह रे जरिए अनन्त जिन्दगिया रे दानो पाँदे बल देओआ। ये एक एड़ा दान ए जो एबु शुरु ओआ और तिना खे मिलोआ जो यीशुए खे बाट, सच्चाई और जिन्दगिया रे रूपो रे ग्रहण करीए। आत्मिक गल्ला खे दखाणे रिया तँई हर रोज की जिन्दगिया री सादारण चीजा रा चिह्नो रे रूपो रे इस्तेमाल यूहन्ने रा एक खास गुण ए, जियाँ-पाणी, रोटी, जोति, ग्वाला और तेसरी पेडा और दाखा री बेल और तिजी रे फल।



भूमिका 1:1-18


यूहन्ना बपतिस्मा देणे वाला और यीशुए रे शुरुआतो रे चले 1:19-51

यीशुए री जनसेवा 2:1-12:50

यरूशलेमो रे आखरी रे कुछ दिन 13:1-19:42

प्रभूए रा दुबारा जिऊँदा ऊणा और तिना रा दिशणा 20:1-31

निचोड़ : गलीलो रे तेबु दिशणा 21:1-25



1 सृष्टिया ते पईले वचन था, वचन परमेशरो साथे था और वचन परमेशर था।² येई शुरुओ ते परमेशरो साथे था।³ परमेशरे सब कुछ तेसरी जरिए पैदा कित्तेया और जो कुछ पैदा ऊई रा, तिना बीचा ते कोई बी चीज तेसते बिना नि ऊई।⁴ तेसदे जीवन था और से जीवन मांणूआ री जोति थी।⁵ जोति न्हरे रे चमकदी रई; पर न्हरे रा तिजी पाँदे हावी नि ऊई सकेया।

⁶ परमेशरे एक माणू पेजेया, जेसरा नाओं यूहन्ना था।⁷ से तेसा ई जोतिया री गवाई देणे आया, ताकि सब तेसरी बजअ ते विश्वासो रे आओ।⁸ यूहन्ना आपू तो, से जोति नि था, पर तेसा जोतिया री गवाई देणे आयी रा था।

⁹ सच्ची जोति जो हर एक मांणूए खे प्रयासा देओई, से आपणे आपू खे दुनिया रे लोका पाँदे प्रकट करने वाली थी।¹⁰ से दुनिया रे था और दुनिया तेसरे जरिए पैदा ऊई, पर दुनिया रे लोके से

नि पछ्याणा। 11 से आपणे कअरे आपणे लोका बीचे आया पर तेसरे आपणेया से नि मानेया। 12 पर जितणेया से मानेया, तिना खे तिनो परमेशरो री ल्वाद ऊणे रा अक्क दित्तेया। मतलब-जो तेसरे नाओं पदि विश्वास राखो थे। 13 सेयो ना तो खूनो ते, ना शरीरो री इच्छा ते, ना माणूए री इच्छा ते, पर परमेशरो ते पैदा ऊई रे।

14 और वचन माणू रे शरीरो रे आया और कृपा और सच्चाईया ते परिपूर्ण ऊई की आसा बीचे डेरा कित्तेया और आसे तेसरी एड़ी महिमा देखी, जेड़ी पिते रे एकलौते री महिमा। 15 यूहन्ने तेसरे बारे रे गवाई दित्ती और आक्का पाई की बोलेया, “से येईए, जेसरे बारे रे मैं बोलेया कि जो मांते बाद आऊणे लगी रा, से मांते बढी की ए, कऊँकि से मांते पईले था।” 16 कऊँकि तेसरी कृपा री परिपूर्णता बीचा ते आसा सबी खे आशीषा पाँदे आशीष मिली। 17 तेवेई परमेशरे बिधान तो मूसे रे जरिए दित्तेया, पर तिनो यीशु मसीह रे जरिए कृपा और सच्चाई दखाई। 18 परमेशर कदी बी किने नि देखेया, केवल एकलौता पुत्रे, जो सच्ची ई आपू परमेशर ए, और जो पिते री गोदा रे ए, तिनो ई ये प्रगट कित्तेया कि परमेशर केड़ा ए।

?????? ???????? ???? ????? ?? ????
(????? 3:1-12; ????? 1:1-8; ????? 3:1-18)

19 जेवे यूहदी अगुवे यरूशलेम नगरो ते पुरोईत और लेविया खे यूहन्ना ते ये पूछणे खे पेजेया, “तूँ कुण ए?” तो यूहन्ने गवाई दित्ती, 20 “आऊँ मसीह निए।” 21 तेवे तिनो तेसते पूछेया, “तेवे तूँ कुण ए? क्या तूँ एलिय्याह भविष्यवक्ता ए?” तिनो बोलिया, “आऊँ निए।” “तेवे तूँ क्या भविष्यवक्ता ए?” तिनो बोलिया, “ना।” 22 तेवे तिनो तेसते पूछेया, “तेवे तूँ कुण ए? ताकि आसे आपणे पेजणे वालेया खे जवाब देऊँ, तूँ आपणे बारे रे क्या बोलेया?” 23 यूहन्ने तिना लोका खे यशायाह भविष्यवक्ते रे वचना रा इस्तेमाल करी की बोलेया, “आऊँ सुणसाण जगा रे एक आक्का पाणे वाले री आवाज ए, ताकि तुसे प्रभुए री बाट सीदी करो।”

24 सेयो फरीसिये री तरफा ते पेजी राखे थे। 25 तिनो तेसते ये सवाल पूछेया, “जे तूँ ना तो मसीह ए, ना एलिय्याह और ना भविष्यवक्ता ए, तो बपतिस्मा कऊँ देआ?” 26 यूहन्ने तिना सबी खे जवाब दित्तेया, “आऊँ तो पाणिए की बपतिस्मा देऊँआ, पर तुसा बीचे एक माणू खड़ी रा, जेसखे तुसे नि जाणदे। 27 मतलब-मांते बाद आऊणे वाला ए, जेसरे जोड़े रे फिथे बी आऊँ खोलणे जोगा निए।” 28 यो गल्ला यरदन नदिया ते पार बैतनिय्याह गांव रे ऊईया, जेती यूहन्ना लोका खे बपतिस्मा देओ था।

?????? ?? ???????

29 दूजे दिने तिनो यीशुए खे आपू गे आऊँदे ऊए देखी की बोलेया, “देखो, ये परमेशरो रा मिन्दू ए, जो दुनिया रे पाप चकी की लयी जाओआ। 30 ये सेईए, जेसरे बारे रे मैं बोलेया था कि एक मर्द मां पीछे आओआ, जो मांते बी बड़ा ए, कऊँकि से मांते पईले था। 31 आऊँ तो तेसखे पछ्याणुँ नि था कि से मसीह ए, पर आऊँ इजी री खातर पाणिए की बपतिस्मा देंदा ऊआ आया, ताकि से इस्राएलो रे प्रगट ऊई जाओ।” 32 यूहन्ने ये गवाई दित्ती, “जिंयाँ कबूतर उड़दा ऊआ थाले आओआ तिंयाँ ई तिनो पवित्र आत्मा सर्गाँ ते उतरदे ऊए देखेया। और से तेस पाँदे रूकी गा। 33 आऊँ तो तेसखे पछ्याणुँ नि था, पर जिने आऊँ पाणिए साथे बपतिस्मा देणे खे पेजेया, तिनो ई मांगे बोलेया, ‘जेस पाँदे तूँ आत्मा खे उतरदे ऊए और रुकदे ऊए देखेगा, सेई पवित्र आत्मा ते बपतिस्मा देणे वाला ए।’ 34 मैं से देखेया और आऊँ तुसा खे सच-सच बोलूँआ कि येई परमेशरो रा पुत्र ए।”

?????? ?? ??????? ?? ???? ?

35 दूजे दिने फेर यूहन्ना और तेसरे चलेया बीचा ते दो जणे खड़ी रे थे। 36 और तिनो यीशुए खे, जो जाणे लगी रा था, देखी की बोलेया, “देखो, ये तो परमेशरो रा मिन्दू ए।” 37 तेवे सेयो दोनो चले तेसते ये सुणी की यीशुए पीछे चली पड़े। 38 यीशुए तिना खे आऊँदे ऊए देखी की पीछे मुड़ी की बोलेया, “तुसे कसखे लगी रे टोलने?” तिनो तिना खे बोलेया “ओ गुरु! तुसे केयी रओए?”

39 यीशुए बोलेया, “चलोगे तो देखी लओगे।” तेबे तिने आयी की तिना रे रणे री जगा देखी और तेस दिने तिना साथे ई रये और ये दोपईरो ते बाद तकरीबन चार बजे रे करीब था।

40 तिना दूई बीचा ते, जो यूहन्ने री गल्ल सुणी की तिना पीछे आए थे तिना बीचा ते एक शमौन पतरसो रा पाई अन्द्रियास था। 41 तिने पईले आपणे सके पाई शमौनो खे मिली की बोलेया, “आसा खे खरीस्ट, मतलब मसीह, मिली गा।” 42 अन्द्रियास तेसखे यीशुए गे ल्याया, यीशुए तेसखे देखी की बोलेया, “तू यूहन्ने रा पाऊ शमौन ए, तू कैफा नाओं ते जाणेया जाणा,” या पतरस जेतेरा मतलब पात्थर ऊणा।

?????????? ?? ??????? ?? ???????

43 दूजे दिने यीशुए गलील प्रदेशो खे जाणा चाया। जेबे फिलिप्पुस तिना खे मिलेया तो तेसखे बोलेया, “मां पीछे आईजा।” 44 फिलिप्पुस, अन्द्रियास और पतरसो रे नगर बैतसेदा रा रणे वाला था। 45 फिलिप्पुसे नतनएलो ते मिली की बोलेया, “जेसरे बारे रे मूसे बिधानो रे और भविष्यबक्ते बोली राखेया, से आसा खे मिली गा रा, से यूसुफो रा पाऊ यीशु नासरी ए।” 46 नतनएले तेसखे बोलेया, “क्या कोई खरी चीज बी नासरतो ते निकली सकोई?” फिलिप्पुसे तेसखे बोलेया, “चली की देखी लो।” 47 यीशुए नतनएलो खे आपू गे आऊँदे ऊए देखी की तेसरे बारे रे बोलेया, “देखो, ये सच्ची इस्राएली ए, एसरे कोई कपट नि ए।” 48 नतनएले तिना खे बोलेया, “तू माखे कियो जाणेया?” यीशुए तेसखे जवाब दितेया, “इजी ते पईले फिलिप्पुसे तू बुलाया, जेबे तू दाऊगले रे डालो निठे था, तेबे मैं तू देखेया था।” 49 नतनएले तिना खे जवाब दितेया, “ओ गुरू! तू परमेशरो रा पुत्र ए, तू इस्राएलो रा महाराजा ए।” 50 यीशुए तेसखे उतर दितेया, “मैं जो ताखे बोलेया कि मैं तू दाऊगले रे डालो निठे देखेया, क्या तू तेबेई विश्वास करेया? तां इजी ते बी बड़े-बड़े काम देखणे।” 51 फेर तेसखे बोलेया, “आऊँ ताखे सच-सच बोलूँआ कि तां स्वर्ग खुलेया रा और परमेशरो रे स्वर्गदूत माणू रे पुत्रो पाँदे उतरदे और ऊबे जाँदे ऊए देखणे।”

2

?????? ?? ??????? ?? ??????? ???????

1 तीजे दिने गलील प्रदेशो रे काना नगरो रे केसी रा ब्या था और यीशुए री आम्मा बी तेती थी। 2 यीशु और तिना रे चले बी तेती ब्याओ खे बुलाई राखे थे। 3 जेबे अँगूरा रा रस कम ऊईगा, तेबे यीशुए री आम्मे तिना खे बोलेया, “तिना गे अँगूरा रा रस नि रया।” 4 यीशुए तेसा खे बोलेया, “ओ जवाणसे! ताखे मांते क्या काम ए? एबु मेरा आपणे आपू खे प्रकट करने रा बखत नि आयी रा।” 5 पर तिना री आम्मे दासा खे बोलेया, “जो कुछ ये तुसा खे बोलोगा, सेई करना।” 6 तेती यहूदिया री शुद्ध करने री रवाजा रे मुताबिक, पात्थरा रे छे, बड़े कअड़े राखे रे थे, जिना रे दो-दो और तीन-तीन मण आओ था। 7 यीशुए दासा खे बोलेया, “कअड़ेया रे पाणी परी देओ।” तिने परी-परी करी ते। 8 यीशुए तेस दासो खे बोलेया, “एबे इजी बीचा ते थोडा पाणी निकयाली की पाट्टिया (भोज) रे प्रदानो गे लयी जाओ और तिने दासे एडा ई कितेया।” 9 जेबे पाट्टिया रे प्रदाने से पाणी चाखेया, जो अँगूरा रा रस बणीगा था, पर ये नि जाणो था कि केथा ते आया (पर जिने दासे पाणी निकयालेया था, सेयो जाणो थे) तेबे पाट्टिया रे प्रदाने लाड़े खे बुलाई की तेसखे बोलेया, 10 “हर एक मांणू पईले बढिया अँगूरा रा रस देओआ और जेबे लोक पी की थकी जाओए, तेबे आदा देओआ, पर तैं बढिया अँगूरा रा रस एबुए तक राखी राखेया।” 11 यीशुए गलील प्रदेशो रे काना नगरो रे आपणा ये पईला चिह्न दखाई की आपणी महिमा प्रगट किती और तिना रे चलेया तिना पाँदे विश्वास कितेया कि सच्ची येई ई मसीह ए। 12 इजी ते बाद यीशु, तिना री आम्मा, तिना रे पाई और तिना रे चले कफरनहूम नगरो खे गये और तेती कुछ दिन तक रये।

?????????? ?? ??????????? ?? ?????????????

(21:12,13; ??????? 11:15-17; ??????? 19:45,46)

13 यहूदिया रा फसह रा त्योआर नेडे था और यीशु यरूशलेम नगरो खे गये। 14 तेबे तिने मन्दरो रे बलद, पेड, और कबूतरा खे बेचणे वाले और सराफि बैठे रे देखेया। 15 तेबे तिने रस्सिया रा कोडा बणाई की सब पेडा और बलद मन्दरो ते बारे निकयाली ते और सराफि रे पैसे बखेरी ते और चौकिया मूंदिया करी तिया 16 और कबूतरा खे बेचणे वालेया खे बोलेया, “इना खे एथा ते लयी जाओ, मेरे पिते रे कअरो खे बपारो रा कअर नि बणाओ।” 17 तेबे तिना रे चलेया खे याद आया कि पवित्तर शास्त्रो रे लिखी राखेया, “तेरे कअरो री चिन्ता आऊँ पितरे-पितरे ई खाई जाणा” 18 तेबे यहूदिये तिना खे बोलेया, “तूँ जो ये करेया, तो आसा खे क्या चिह्न दखाएया?” 19 यीशुए तिना खे जेवाब दित्तेया, “एस मन्दरो खे टाली देओ और मां ये तीन दिना रे फेर खडा करी देणा।” 20 यहूदिये बोलेया, “एस मन्दरो खे बनाणे खे छयाली साल लगी रे और क्या तां ये तीन दिना रे फेर खडा करी देणा?” 21 पर तिने आपणे शरीरो रे मन्दरो रे बारे रे बोलेया था। 22 तो जेबे सेयो मुडदेया बीचा ते जिऊँदे ऊईगे थे, तेबे तिना रे चलेया खे याद आया कि तिने ये बोलेया था और तिने पवित्तर शास्त्रो पाँदे और जो वचन यीशुए बोलेया था, विश्वास कित्तेया।

~~~~~

23 जेबे सेयो फसह रे त्योआरो रे बखते यरूशलेमो रे थे, तेबे बऊत जणेया, सेयो चिह्न, जो सेयो दखाओ थे, देखी की तिना पाँदे विश्वास कित्तेया। 24 पर यीशुए आपणे आपू खे तिना रे परोसे नि छडेया, कऊँकि सेयो सबी खे जाणो थे 25 और तिना खे जरूरत नि थी कि मांणूए रे बारे रे कोई गवाई देओ, कऊँकि सेयो आपू जाणो थे कि मांणूए रे मनो रे क्या ए?

### 3

~~~~~

1 फरीसिया बीचा ते एक नीकुदेमुस नाओ रा मांणू था, जो यहूदिया रा धार्मिक अगुवा था। 2 तिने राती आयी की यीशुए खे बोलेया, “ओ गुरू! आसे जाणूए कि तूँ परमेशरो री तरफा ते गुरू ऊई की आयी रा, कऊँकि कोई बी इना चमत्कारा खे, जो तूँ दखाएया, जे परमेशर तेस साथे नि ओ, तो दखाई नि सकदा।” 3 यीशुए तेसखे बोलेया, “आऊँ ताखे सच-सच बोलूँआ कि जे कोई नये सिरे ते नि जम्मो, तो परमेशरो रा राज्य जेती परमेशर राज करोआ देखी नि सकदा।” 4 नीकुदेमुसे तिना खे बोलेया, “जेबे मांणू स्याणा उई गा, तेबे कियौँ जम्मी सकोआ? क्या से आपणी आम्मा रे गर्भो रे दूजी बार जाई की जम्मी सकोआ?” 5 यीशुए बोलेया, “आऊँ ताखे सच-सच बोलूँआ कि जदुओ तक कोई मांणू पाणी और आत्मा साथे नि जम्मो, तो से परमेशरो रे राज्य रे नि जाई सकदा। 6 कऊँकि जो शरीरो साथे जम्मी रा, से शरीर ए और जो आत्मा साथे जम्मी रा, से आत्मा ए। 7 हैरान नि ओ कि मैँ ताखे बोलेया, तुसा खे नये सिरे ते जमणा जरूरी ए। 8 अवा जेथो खे चाओ, तेथो खे चलो ई और तूँ तिजी री छेड सुणेया, पर जाणदा नि कि से कथा ते आयी री और केथो खे जाओई? जो कोई आत्मा ते जम्मी रा, से एडा ईए।”

9 नीकुदेमुसे तिना खे बोलेया, “यो गल्ला कियौँ ऊई सकोईया?” 10 ये सुणी की यीशुए तेसखे उतर दित्तेया, “तूँ इस्राएलिया रा गुरू ऊई की बी क्या इना गल्ला खे नि समजदा? 11 आऊँ ताखे सच-सच बोलूँआ कि आसे जो जाणूए, से बोलूँए और जो आसे देखी राखेया, तिजी री गवाई देऊँए, और तुसे म्हारी गवाई नि मानदे। 12 जेबे मैँ तुसा गे तरतिया रिया गल्ला बोलिया और तुसे विश्वास नि कित्तेया, तो जे आऊँ तुसा गे स्वर्गो रिया गल्ला बोलूँ, तो तुसा कियौँ विश्वास करना। 13 कोई स्वर्गो रे नि चढेया, बस से जो स्वर्गो ते उतरेया, मतलब आऊँ मांणू रा पुत्र जो स्वर्गो रे ए। 14 और जेते टंगो रे मूसे जंगलो रे पीतलो रा साप ऊच्चे पंदि चढाया था, तियौँ ई जरूरी ये कि आऊँ मांणू रा पुत्र बी ऊच्चे पंदि चढाया जाओ। 15 ताकि जो कोई मां पंदि विश्वास करो, से अनन्त जीवन पाओ।

16 “कऊँकि परमेशरे दुनिया रे लोका ते एड़ा प्यार कितेया कि तिने आपणा एकलौता पुत्र देईता, ताकि जो कोई तेस पाँदे विश्वास करो, से नाश नि ओ, पर अनन्त जीवन पाओ। 17 परमेशरे आपणा पुत्र दुनिया रे इजी खे नि पेजेया कि से दुनिया पाँदे दण्डो री आज्ञा देओ, पर इजी खे कि दुनिया रे लोक तेसरी बजअ ते उद्धार पाओ। 18 जो मां पाँदे विश्वास करोआ, तेस पाँदे दण्डो री आज्ञा नि ऊँदी, पर जो मां पाँदे विश्वास नि करदा, से दोषी ठईरी चुकेया, कऊँकि तिने परमेशरो रे एकलौते पुत्रो रे नाओं पाँदे विश्वास नि कितेया। 19 और दण्डो री आज्ञा री बजअ ये कि जोति दुनिया रे आयी री और मांणूआ खे न्हेरा जोतिया ते प्यारा लगेया, कऊँकि तिना रे काम बुरे थे। 20 कऊँकि जो कोई बुराई करोआ, से जोतिया ते बैर राखेआ और जोतिया रे नेड़े नि आऊँदा, एड़ा नि ओ कि तेसरे कामो पाँदे दोष लगाया जाओ। 21 पर जो सच्चाईया पाँदे चलोआ, से जोतिया रे नेड़े आओआ, ताकि तेसरे काम सामणे आओ कि सेयो परमेशरो री तरफा ते ऊई रे।”

~~~~~

22 इजी ते बाद यीशु और तिना रे चले यहूदिया प्रदेशो रे आए और यीशु तेती तिना साथे रई की बपतिस्मा देणे लगे। 23 यूहन्ना बी सामरिया प्रदेशो रे शालेम नगरो रे नेड़े, ऐनोन गांव रे बपतिस्मा देओ था, कऊँकि तेती बऊत पाणी था और लोक आयी की बपतिस्मा लओ थे। 24 यूहन्ना तेस बखतो तक जेला रे नि पायी राखेया था। 25 तेती यूहन्ने रे चलेया रा केसी यहूदिये साथे शुद्ध करने री रवाजा रे बारे रे बईस उई। 26 तेबे यूहन्ने रे चलेया आयी की तेसखे बोलेया, “ओ गुरु! जो मांणू यरदनो ते पार तां साथे था और जेसरे बारे रे तैं गवाई दिती थी, देखो, से बपतिस्मा देओआ और लोक तेसगे आओए।” 27 यूहन्ने जवाब दितेया, “जदुओ तक मांणूए खे स्वर्गां ते नि दितेया जाओ, तदुओ तक से कुछ नि पायी सकदा। 28 तुसे तो आपू ई मेरे गवा ए कि मैं बोली राखेया, ‘आऊँ मसीह निए, पर तेसते आगे पेजी राखेया।’ 29 जेसरी लाड़ी ए, सेई लाड़ा ए, पर लाड़े रा दोस्त जो खड़ा ऊई की तेसरी सुणोआ, लाड़े रे बोलो ते बऊत खुश ओआ, एबे मेरी ये खुशी पूरी ऊई री। 30 जरूरी ए कि से बढदा जाओ और आऊँ कम ऊँदा जाऊँ।

31 “जो स्वर्गां ते आओआ, से सबी ते उत्तम ओआ, जो तरतिया ते आओआ, से तरतिया राए और तरतिया री गल्ला करोआ, जो परमेशरो री तरफा ते आओआ, से सबी ते ऊबे ए। 32 जो कुछ तिने देखेया और सुणेया, तेतेरी ई गवाई देओआ और कोई तेसरी गवाई नि मानदा। 33 पर जिने तेसरी गवाई मानी ली, तिने एते गल्ला पाँदे छाप देईती कि परमेशर सच्चा ए। 34 कऊँकि जो परमेशरे पेजी राखेया, से परमेशरो री गल्ला बोलोआ, कऊँकि परमेशर तेसखे आपणा आत्मा नापी-नापी की नि देँदा पर खुले दिलो ते देओआ। 35 पिता पुत्रो साथे प्यार राखेआ और तिने सारी चीजा तेसरे आथो रे देईती रिया। 36 जो परमेशरो रे पुत्रो पाँदे विश्वास राखेआ, अनन्त जीवन तेसरा ईए, पर जो परमेशरो रे पुत्रो री नि मानदा, तेस जीवन नि देखणा, पर परमेशरो रा रोष तेस पाँदे रओआ।”

## 4

~~~~~


1 तेबे, जेबे यीशुए खे पता लगेया कि फरीसिये सुणी राखेया कि यीशु यूहन्ने ते जादा चले बणाओआ और तिना खे बपतिस्मा देओआ। 2 हालाँकि यीशु आपू नि, पर तिना रे चले बपतिस्मा देओ थे। 3 तेबे सेयो यहूदिया प्रदेशो खे छाडी की फेर गलील प्रदेशो खे चली गे 4 और तिना खे सामरिया प्रदेशो रिये ऊई की जाणा पड़ेया। 5 तेबे सेयो सूखार नाओं रे सामरिया प्रदेशो रे एक नगरो तक आए, जो तेसा जमीना रे नेड़े ए, जो याकूबे आपणे पाऊ यूसुफो खे दिती थी 6 और से कूँआं बी जो याकूबे खणेया था, तेथी था। तेबे यीशु बाटा रे थके रे तेस कुँए पाँदे ईयां ई बैठीगे। ये गल्ल दोपईरो रे तकरीबन ऊई।

7 तदुओ की एक सामरी जवाणस पाणी परने आयी। यीशुए तेसा खे बोलेया, “माखे पाणी पलयाई दे।” 8 कऊँकि तिना रे चले नगरो रे रोटी खरीदणे जाई रे थे। 9 तेबे सामरी जवाणसे तिना खे बोलेया, “तूँ यहूदी ऊई की मां सामरिया जवाणसा ते पाणी कऊँ मांगेया?” कऊँकि यहूदी सामरिया साथे

कोई बी मिलना-वर्तना नि राखो थे। ¹⁰ यीशुए जवाब दित्त्या, “जे तूँ परमेशरो रे बरदानो खे जाणदी और ये बी जाणदी कि से कुण ए, जो ताखे बोलोआ, ‘माखे पाणी पलया,’ तो तूँ तेसते मांगदी और से ताखे पवित्तर आत्मा जीवनो रे पाणिए रे रूपो रे देँदा।” ¹¹ जवाणसे तिना खे बोलेया, “ओ प्रभु! तुसा गे तो पाणी परने खे कुछ आया ई नि और कुँआं डूगा ए, तो तेबे से जीवनो रा पाणी तुसा गे केथा ते आया? ¹² क्या तुसे म्हारे पिता याकूबो ते बी बड़े ए, जिने आसा खे ये कुँआं दित्त्या और आपू बी आपणे वाल-बच्चेया साथे और डांगरा साथे तिजी ते पिया।” ¹³ यीशुए तेसा खे जवाब दित्त्या, “जेस केसी बी ये पाणी पीणा, से फेर त्याया ऊणा। ¹⁴ पर जो कोई तेस पाणिए ते पीओगा, जो मां तेसखे देणा, से कदी फेर अनन्तकालो तक त्याया नि ऊणा, बल्कि जो पाणी मां तेसखे देणा, से तेसरे एक सूबल बणी जाणी जो अनन्त जीवनो तक बईदी रणी।” ¹⁵ जवाणसे तिना खे बोलेया, “ओ प्रभु! से पाणी माखे दे ताकि आऊँ त्यायी नि रऊँ और ना आऊँ पाणी परने खे इतणी दूर आऊँ।”

¹⁶ यीशुए तेसा खे बोलेया, “जा और आपणे लाड़े खे एती बुलाई की ली आओ।” ¹⁷ जवाणसे जवाब दित्त्या, “आऊँ बिना लाड़े तेई,” यीशुए तेसा खे बोलेया, “तूँ ठीक लगी री बोलणे कि आऊँ बिना लाड़े तेई। ¹⁸ कऊँकि तूँ पाँज लाड़े करी चुकी री और जेस माणूए साथे तूँ एवुए, से बी तेरा लाड़ा निए, ये तैं सच बोली राखेया।” ¹⁹ जवाणसे तिना खे बोलेया, “ओ प्रभु! माखे लगोआ कि तुसे भविष्यबक्ता ए। ²⁰ आसा रे बाप-दादे एस पाहड़ो पाँदे ई आराधना किती और तुसे बोलोए कि जेती भक्ति करनी चाईयो से जगा यरूशलेम ए।”

²¹ यीशुए बोलेया, “ओ जवाणसे! मेरी गल्ला पाँदे विश्वास कर कि से बखत आऊणा, जेबे ना तुसा एते पाहड़ो पाँदे पिते री भक्ति करनी और ना ई यरूशलेमो रे। ²² तुसे सामरी लोक जेसखे जाणदे नि, तेसरी भक्ति करोए और आसे यहूदी जेसखे जाणूए, तेसरी भक्ति करूँए, कऊँकि उद्धार आसा यहूदिया बीचा ते ए। ²³ पर से बखत आऊणा, बल्कि एवु बीए, जेबे सच्चे भक्ता, पिते री भक्ति आत्मा और सच्चाईया साथे करनी, कऊँकि पिता आपू खे एड़े ई भक्ति करने वालेया खे टोलोआ। ²⁴ परमेशर आत्मा ए, इजी खे जरूरी ए कि तेसरी भक्ति करने वाले आत्मा और सच्चाईया साथे भक्ति करो।” ²⁵ जवाणसे तिना खे बोलेया, “आऊँ जाणूँई कि मसीह जेसखे खरीस्ट बोलोए, आऊणे वाला ए, जेबे से आऊणा, तेबे तेस आसा खे सब गल्ला बताणिया।” ²⁶ यीशुए तेसा खे बोलेया, “आऊँ जो ताखे बोलणे लगी रा, सेई ये।”



²⁷ तदुओ तक तिना रे चले आईगे और हैरान ऊईगे कि सेयो जवाणसा साथे गल्ला करने लगी रे, तेबे बी किने नि बोलेया, “तूँ क्या चाएया?” या “तेसा साथे कऊँ लगी रा गलाणे?” ²⁸ तेबे जवाणस आपणा कअड़ा छाडी की नगरो खे चली गी और लोका खे बोलणे लगी, ²⁹ “आओ, एक माणूए खे देखो, जिने सब कुछ, जो मैं करी राखेया, माखे बताई ता, केथी येई तो मसीह तो निए?” ³⁰ तेबे सेयो नगरो ते निकली की यीशुए खे देखणे खे तिना गे आऊणे लगे। ³¹ तदुओ खे यीशुए रे चले तिना ते बिनती करने लगे, “ओ गुरू! कुछ खाई लो।” ³² पर तिने तिना खे बोलेया, “मांगे खाणे खे एड़ी रोटी ए, जो तुसे नि जाणदे।”

³³ तेबे चले आपू बीचे बोलणे लगे, “जेबे आसे चली गे थे तो क्या कोई गुरूए खे कुछ खाणे खे ल्याई राखेया?” ³⁴ यीशुए तिना खे बोलेया, “मेरी रोटी ये कि आऊँ आपणे पेजणे वाले री इच्छा पाँदे चलूँ और तेसरा काम पूरा करूँ। ³⁵ क्या तुसेई नि बोलदे कि बडाई ऊणे खे एवु चार मीन्ने पड़े रे ए। देखो, आऊँ तुसा खे बोलूँआ कि आपणिया आखिया चकी की डोरूआ खे देखो, कि सेयो बाडणे खे पाक्की चुके रे। ³⁶ बाडणे वाला मजदूरी पाओआ और अनन्त जीवनो खे फल कट्टा करोआ, ताकि बाणे वाला और बाडणे वाला दोनो मिली की खुशी मनाओ। ³⁷ कऊँकि इजी पाँदे ये कहावत ठीक बैठो ई कि बाणे वाला ओर ए और बाडणे वाला ओर ए। ³⁸ मैं तुसे तेस डोरूआ खे बाडणे खे पेजी राखे, जिदे तुसे मईणत नि करी राखी, ओरी मईणत किती और तुसे तिना री मईणता रे फलो रे इस्सेदार ऊए।”

~~~~~

39 तेस नगरो रे बऊत सामरिये तेसा जवाणसा रे कईणे पाँदो यीशुए पाँदो विश्वास कित्तेया, कऊँकि तेसे ये गवाई दिती थी, “तिने सब कुछ जो मैं करी राखेया, माखे बताई ता।” 40 तेबे जेबे सेयो सामरी यीशुए गे आए, तेबे तिना ते बिनती करने लगे कि आसा साथे एथी रओ, तेबे सेयो तेती दो दिन तक रये। 41 तिना रे उपदेश सुणी की ओरी बी कई जणे विश्वास कित्तेया। 42 तेबे तेसे जवाणसे बोलेया, “एबे आसे तुसा रे बोलणे तेई विश्वास नि करदे, कऊँकि आसे आपू सुणी राखेया और जाणूए कि सच्ची, येई दुनिया रा उद्धारकर्ता ए।” 43 तेबे दो दिना ते बाद सेयो तेथा ते निकली की गलीलो खे गये। 44 कऊँकि यीशुए आपू ई बोली राखेया कि भविष्यबक्ता आपणे देशो रे आदर नि पाँदा। 45 जेबे सेयो गलीलो रे आये तेबे गलीली तिना साथे खुश ऊई की मिले, कऊँकि जितणे काम तिने यरूशलेमो रे त्योआरो रे बखते किते थे, तिने सेयो सब देखे थे, कऊँकि सेयो बी त्योआरो खे जाई रे थे।

~~~~~

46 तेबे यीशु फेर गलील प्रदेशो रे काना गाँव रे आए, जती तिने पाणी अँगूरा रा रस बणाई ता था। तेती राजे रा एक कर्मचारी था, जेसरा पाऊ कफरनहूम नगरो रे बमार था। 47 जेबे तिने ये सुणेया कि यीशु यहूदिया ते गलीलो खे आईगा रा, तेबे से तिना गे गया और तिना ते बिनती करने लगेया कि चली की मेरे पाऊए खे ठीक करी दे, कऊँकि से मरने वाला ए। 48 यीशुए तेसखे बोलेया, “जदुओ तक तुसे चिह्न और अचम्वे काम नि देखी लओगे, तदुओ तक कदी बी विश्वास नि करी सकदे।” 49 राजे रे कर्मचारिये तिना खे बोलेया, “ओ प्रभु! मेरे पाऊए रे मरने ते पईले चलो।”

50 यीशुए तेसखे बोलेया, “जा, तेरा पाऊ जिऊँदा ए।” तिने माणूए यीशुए री बोली री गल्ला पाँदो विश्वास कित्तेया और चली गा। 51 से जेबे बाटा रेई था कि तदुओ खे तेसरे दास तेसखे मिली गे और बोलणे लगे, “तेरा पाऊ जिऊँदा और तन्दरूस्त ए।” 52 तिने तेसते पूछेया, “कुण जी कअडिया से ठीक ऊणे लगेया था?” तिने तेसखे बोलेया, “काल तकरीबन दोपईरो रे एक बजे रे करीब तेसरा बुखार उतरी गा था।” 53 तेबे से पिता समजी गा कि ये तेस बखते ई ऊआ, जेस बखते यीशुए तेसखे बोलेया था, “तेरा पाऊ जिऊँदा ए।” और तिने और तेसरे सारे कराने यीशुए पाँदो विश्वास कित्तेया। 54 ये दूजा सामथा रा काम था, जो यीशुए यहूदिया प्रदेशो ते आई कि गलील प्रदेशो रे दखाया।

5

~~~~~

1 इना गल्ला ते बाद यहूदिया रा एक त्योआर ऊआ और यीशु यरूशलेमो खे गये। 2 यरूशलेमो रे पेडा रे फाटको (प्रवेश द्वार) रे नेडे एक कुण्ड ए, जेतेखे इबरानी पाषा रे बैतसैदा बोलोए और तिदे पाँज बरंडे ए। 3 इना रे बऊत लंगडे, बमार, अन्दे और सूके रे अंग वाले पाणिए रे ईलणे री उम्मीदा दे पडे रे रओ थे। 4 कऊँकि ठराए रे बखतो रे परमेशरो रे स्वर्गदूत कुण्डो रे उतरी की पाणिए खे ईलाया करो थे, पाणी ईलदे ई जो कोई पईले उतरो था, से ठीक ऊई जाओ था, चाए तेसरी कोई बी बमारी कऊँ नि ओ। 5 तेती एक माणू था, जो ठती साला ते बमार था। 6 यीशुए तेसखे पडेया रा देखी की और ये जाणी की कि से बऊत दिना ते एडिया ई दशा रे ए, तेसते पूछेया, “क्या तूँ ठीक ऊणा चाएया?” 7 तिने बमारे बोलेया, “ओ प्रभु! मेरी मताद करने खे कोई माणू निए कि जेबे पाणी ईलाया जाओ, तो माखे कुण्डो रे उतारो, पर मेरे पऊँछणे ते पईले ई कोई दूजा मांते पईले ई उतरी जाओआ।” 8 यीशुए तेसखे बोलेया, “उठ और आपणा मांजा चकी की चल-फिर।” 9 से माणू तेबुई ठीक ऊईगा और आपणा मांजा चकी की चलणे-फिरने लगेया। से आरामो रा दिन था।

10 तेबे यहूदी अगुवे तेसखे, जो ठीक ऊई रा था, बोलणे लगे, “आज तो आरामो रा दिन ए, मूसे रा बिधानो रे मुताबिक ताखे मांजा चकणा ठीक निए।” 11 तिने तिना खे जवाब दित्तेया, “जिने आऊँ ठीक कित्तेया, तिने ई माखे बोलेया, ‘आपणा मांजा चकी की चल-फिर।’” 12 तिने तेसते पूछेया, “से कुण माणू ए, जिने ताखे बोलेया, ‘आपणा मांजा चकी की चल-फिर?’” 13 पर जो ठीक ऊईगा था,

से नि जाणो था कि से कुण ए, कऊँकि तेते जगा रे पीड़ ऊणे री बजअ ते यीशु तेथा ते आटी गे थे ।  
 14 इना गल्ला ते बाद से यीशुए खे मन्दरो रे आँगणो रे मिलेया । यीशुए तेसखे बोलेया, “देख, तूँ ठीक ऊईगा रा, दुबारा पाप नि करना, एड़ा नि ओ कि इजी ते जादा मुसीबत तां पाँदि पड़ी जाओ ।”  
 15 तिने माणूए जायी की यहूदी अगुवे गे बताई ता कि जिने आऊँ ठीक करी राखेया से यीशु ए ।  
 16 इजी बजअ ते यहूदी अगुवे यीशुए खे सताणे लगे, कऊँकि सेयो एड़े काम आरामो रे दिने करो थे ।  
 17 तेवे यीशुए तिना खे बोलेया, “मेरा पिता परमेशर एबुए तक काम करोआ और आऊँ बी काम करूँआ ।”  
 18 इजी री बजअ ते यहूदी अगुवे ओर बी जादा तिना खे काणे री कोशिश करने लगे, कऊँकि से ना बस आरामो रे दिनो री बिधि-विदान तोड़ोआ, बल्कि परमेशरो खे आपणा पिता बोली की आपणे आपू खे परमेशरो जेड़ा मानोआ ।

### \*\*\*\*\*

19 तेवे यीशुए तिना खे बोलेया, “आऊँ तुसा खे सच-सच बोलूँआ कि आऊँ आपणे आपू ते कुछ नि करी सकदा, बस से जो पिते खे करदा ऊआ देखूँआ, कऊँकि जो-जो काम से करोआ, आऊँ बी तियाँ ई करोआ ।”  
 20 कऊँकि पिता मांते ते प्यार राखोआ और जो-जो काम से आपू करोआ, तिना सबी खे से माखे दखाओआ और तेस इना ते बी बड़े काम माखे दखाणे, ताकि तुसे हैरान ओ ।  
 21 कऊँकि जियाँ पिता मरे रेया खे उठालोआ और जिऊँदा करोआ, तियाँ ई आऊँ बी जिना खे चाओआ, जिऊँदा करूँआ ।  
 22 पिता केसी रा बी न्याय नि करदा, पर न्याय करने रा सारा काम मांगे गे सम्बाली ता रा ।  
 23 ताकि सब लोक जियाँ पिते रा आदर करोए, तियाँ ई मेरा बी आदर करो, जो मेरा आदर नि करदा, से पिते रा आदर पनि करदा, जिने से पेजी राखेया ।  
 24 आऊँ तुसा खे सच-सच बोलूँआ कि जो मेरा वचन सुणी की मेरे पेजणे वाले रा विश्वास करोआ, अनन्त जीवन तेसरा ईए और तेस पाँदि दण्डो री आज्ञा नि ऊँदी, बल्कि से मौता ते पार ऊई की जीवनों रे जाई चुकेया रा ।

25 “आऊँ तुसा खे सच-सच बोलूँआ कि से बखत आओआ, और एबुए, जिदे मरे रेया लोका, परमेशरो रे पुत्रो री आवाज सुणनी और जिना सुणनी, सेयो सदा खे जिऊँदे ऊई जाणे ।”  
 26 कऊँकि जियाँ पिता आपणे आपू रे जीवन राखोआ, तियाँ ई तिने माखे बी अक्क देई राखेया कि आपणे आपू रे जीवन राखूँ, 27 बल्कि पिते माखे लोका रा न्याय करने रा अक्क बी देई राखेया, कऊँकि आऊँ माणू रा पुत्र ए ।  
 28 इजी ते हैरान नि ओ, कऊँकि से बखत आऊणा, जेवे जितणे बी कब्रा रे ए, मेरी आवाज सुणी की जिऊँदे ऊई जाणे ।  
 29 जिने-जिने खरा करी राखेया सेयो दुबारा जीवन पाणे खे उठणे और जिने बुराई करी राखी, सेयो दण्ड पाणे खे दुबारा उठणे ।

### \*\*\*\*\*

30 “आऊँ आपणे आपू ते कुछ नि करी सकदा, जेड़ा पिते ते सुणूँआ, तेड़ा ई न्याय करूँआ और मेरा न्याय सच्चा ए, कऊँकि आऊँ आपणी इच्छा नि, पर आपणे पेजणे वाले री इच्छा चाऊँआ ।  
 31 जे आऊँ आपू ई आपणी गवाई देऊँ, तो मेरी गवाई सच्ची निए ।  
 32 एक ओर ए जो मेरी गवाई देओआ और आऊँ जाणूआ कि मेरी जो गवाई से देओआ, से सच्ची ए ।  
 33 तुसे यूहन्ना बपतिस्मा देणे वाले गे आपणे लोक पृच्छणे खे पेजे और तिने सच्चाईया री गवाई दिती ।  
 34 पर आऊँ आपणे वारे रे माणूआ री गवाई नि चांदा, तेवे बी आऊँ इना गल्ला इजी खे बोलूँआ, ताकि तुसा खे उद्धार मिलो ।  
 35 यूहन्ना बपतिस्मा देणे वाला बलदा और चमकदे ऊए दिऊए जेड़ा था और तुसा खे कुछ देरा खे तेसरी जोतिया रे मगन ऊणा अच्छा लगेया ।

36 “पर जो मांगे गवाई ए, से यूहन्ना बपतिस्मा देणे वाले री गवाईया ते बड़ी ए । कऊँकि जो काम पिते मांगे पूरा करने खे सम्बाली राखेया, मतलब-येई काम जो आऊँ करूँआ, सेयो मेरे गवा ए कि पिते आऊँ पेजी राखेया ।  
 37 और पिते जिने आऊँ पेजी राखेया, तिने ई मेरी गवाई देई राखी, तुसे ना कदी तेसरी आवाज सुणी राखी और ना कदी तेसरा रूप देखी राखेया ।  
 38 और तेसरे वचनो खे मनो रे नि बठयालदे, कऊँकि जो तिने पेजी राखेया, तुसे तेसरा विश्वास नि करदे ।  
 39 तुसे पवित्र

शास्त्रो रे टोलोए, कऊँकि तुसे समजोए कि तुसा खे अनन्त जीवन तिदे मिलोआ और ये सेईए, जो मेरी गवाई देओआ।

40 “तेबे बी तुसे अनन्त जिन्दगी पाणे खे मांगे नि आऊणा चांदे। 41 आऊँ माणूआ ते आदर नि चांदा। 42 पर आऊँ तुसा खे जाणूआ कि तुसा रे परमेशरो रा प्यार निए। 43 आऊँ आपणे पिता परमेशरो रे नाओं ते आयी रा और तुसे माखे नि मानदे, जे कोई दूजा आपणे ई नाओं ते आओ, तो तुसा से मानी लणा। 44 तुसे जो एकी-दूजे ते आदर चाओए और से आदर जो एक मातर परमेशरो री तरफा ते ए, चांदे नि, कियों विश्वास करी सकोए? 45 ये नि समजो कि मां पिते सामणे तुसा पाँदे दोष लगाणा, तुसा पाँदे तो दोष लगाणे वाला अया, मतलब-मूसा, जेस पाँदे तुसे उम्मीद राखी री ए। 46 कऊँकि जे तुसे मूसे रा विश्वास करदे, तो मेरा बी विश्वास करदे, कऊँकि तिने मेरे बारे रे लिखी राखेया। 47 पर जे तुसे तेसरी लिखी री गल्ला रा विश्वास नि करदे, तो मेरी गल्ला रा कियों करना?”

## 6

ⓂⓂⓂⓂ ⓂⓂⓂⓂ ⓂⓂⓂⓂ ⓂⓂ ⓂⓂⓂⓂⓂⓂ

(ⓂⓂⓂⓂⓂ 14:13-21; ⓂⓂⓂⓂⓂ 6:30-44; ⓂⓂⓂⓂⓂ 9:10-17)

1 इना गल्ला ते बाद यीशु गलीलो रे समुद्रो दे, मतलब-तिबिरियास समुद्रो ते पार गये। 2 तेबे एक बड़ी पारी पीड़ तिना पीछे आईगी, कऊँकि जो सामर्थ रे काम यीशु बमारा पाँदे करो थे, सेयो तिना खे देखो थे। 3 तेबे यीशु पाहूँडो पाँदे चढ़ी की आपणे चलेया साथे तेती बैठीगे। 4 यहूदिया रा फसह रा त्योआर नेडे था।

5 तेबे यीशुए आपणिया आखी चकी की एक बड़ी पीड़ आपू गो आऊँदी ऊई देखी, तेबे फिलिप्पुसो खे बोलेया, “एबे आसे इना खे केथा ते रोटी खरीदी की ल्याऊँ?” 6 पर तिने ये गल्ल तेसखे परखणे खे बोली, कऊँकि सेयो आपू जाणो थे कि मां क्या करना। 7 फिलिप्पुसे तिना खे बोलेया, “दो सौ चाँदिए रे सिक्केया रे मोलो री रोटी तिना खे थोड़ी-थोड़ी करी की बी पूरी नि ऊणी।” 8 तिना रे चलेया बीचा ते शमौन पतरसो रे पाईए अन्दरयासे तिना खे बोलेया, 9 “एती एक पाऊ ए, जेसगे पाँज जौ रिया रोटिया और दो मछलिया ए, पर इतणे लोका खे यो केयी ऊणिया?”

10 यीशुए बोलेया, “लोका खे बठयाली देओ।” तेते जगा रे बऊत काआ था, तेबे लोक, जिना रे मर्दा री संख्या तकरीबन पाँज हूजारा री थी, तेती बैठीगे। 11 तेबे यीशुए सेयो रोटिया लईया और धन्यवाद करी की बैठणे वालेया खे बांडी तिया और तियाँ ई मछलिया बी जितणिया सेयो चाओ थे, तिना खे बांडी तिया। 12 जेबे सेयो खाई की रऊजी गे, तेबे तिने आपणे चलेया खे बोलेया, “बचे रे टुकड़े कटटे करी देओ, कुछ बी सेटणा नि।” 13 तेबे तिने कटटे करी ते और बारा टोकरिया परी तिया, जबकि सेयो पांजा रोटिया रे टुकड़े थे, जो खाणे वालेया ते बाद बची रिया थिया। 14 तेबे जो सामर्थ रे काम यीशुए करी की दखाए, तिना देखी की लोक बोलणे लगे, “से भविष्यबक्ता जो दुनिया रे आऊणे वाला था, पक्का येईए।” 15 यीशु ये जाणी की कि सेयो माखे राजा बनावणे खे पकड़ना चाओए, फेर सेयो पाहूँडो पाँदे कल्ले चली गे।

ⓂⓂⓂⓂ ⓂⓂ ⓂⓂⓂⓂ ⓂⓂⓂⓂ ⓂⓂⓂⓂ

(ⓂⓂⓂⓂⓂ 14:22-33; ⓂⓂⓂⓂⓂ 6:45-52)

16 जेबे साँज ऊई, तेबे तिना रे चले समुद्रो रे कनारे चली गे 17 और किस्तिया रे चढ़ी की समुद्रो ते पार कफरनहूमो खे जाणे लगे। तेस बखते न्हारा ऊईगा था और यीशु एबुए तक तिना गे नि पऊँछी रे थे। 18 तेबे तूफानो री बजअ ते समुद्रो रे लईरा उठणे लगिया। 19 जेबे सेयो किस्तिया रे सैर करदे ऊए तकरीबन पाँज-छः किलोमीटर निकली गे, तेबे तिने यीशु समुद्रो रे चलदे ऊए और किस्तिया रे नेडे आऊँदे ऊए देखे और सेयो डरी गे। 20 पर तिने तिना खे बोलेया, “आऊँ ए, डरो नि।” 21 तेबे सेयो तिना खे किस्तिया रे चढ़ाणे खे त्यार ऊईगे और तेबे से किस्ती फटाफट तेती पऊँछी गी, जेती सेयो जाणा चाओ थे।

२२ २३ २४ २५ २६ २७ २८ २९ ३० ३१ ३२ ३३ ३४ ३५ ३६ ३७ ३८ ३९ ४० ४१ ४२ ४३ ४४ ४५ ४६ ४७ ४८ ४९ ५० ५१ ५२ ५३ ५४ ५५ ५६ ५७ ५८ ५९ ६० ६१ ६२ ६३ ६४ ६५ ६६ ६७ ६८ ६९ ७० ७१ ७२ ७३ ७४ ७५ ७६ ७७ ७८ ७९ ८० ८१ ८२ ८३ ८४ ८५ ८६ ८७ ८८ ८९ ९० ९१ ९२ ९३ ९४ ९५ ९६ ९७ ९८ ९९ १००

२२ दूजे दिने तेसे पीड़े, जो समुद्रो ते पार थी खड़ी री, तिने देखेया कि एती तो एक किस्तिया खे छाडी की ओर कोई किस्ती नि थी और यीशु आपणे चलेया साथे तेसा किस्तिया रे नि चढे, पर बस तिना रेई चले गये। २३ तेवे बी ओर किस्तिया तिबिरियास नगरो ते तेते जगा रे नेडे आईया, जेती तिने यीशुए रे धन्यवाद करने ते बाद रोटी खाई थी। २४ तेवे जेवे पीड़े देखेया कि एती ना तो यीशु ए और ना तिना रे चले, तेवे सेयो बी किस्तिया रे चढी की यीशुए खे टोलदे ऊए, कफरनहूम नगरो रे पऊँछी गे।

२५ २६ २७ २८ २९ ३० ३१ ३२ ३३ ३४ ३५ ३६ ३७ ३८ ३९ ४० ४१ ४२ ४३ ४४ ४५ ४६ ४७ ४८ ४९ ५० ५१ ५२ ५३ ५४ ५५ ५६ ५७ ५८ ५९ ६० ६१ ६२ ६३ ६४ ६५ ६६ ६७ ६८ ६९ ७० ७१ ७२ ७३ ७४ ७५ ७६ ७७ ७८ ७९ ८० ८१ ८२ ८३ ८४ ८५ ८६ ८७ ८८ ८९ ९० ९१ ९२ ९३ ९४ ९५ ९६ ९७ ९८ ९९ १००

२५ समुद्रो ते पार जेवे सेयो यीशुए खे मिले तेवे तिने बोलेया, “ओ गुरु! तुसे एती कदी आये?” २६ यीशुए जवाब दित्तेया, “आऊँ तुसा खे सच-सच बोलूँआ कि तुसे माखे इजी री खातर नि टोलदे कि तुसे मेरे सामर्था रे काम देखो, पर इजी री खातर कि तुसे रोटिया खाई की रज्जी गे। २७ नाशवान रोटिया खे मईणत नि करो, पर तेसा रोटिया खे मईणत करो, जो अनन्त जीवनो देओई, जो मां माणूं रे पुत्रो तुसा खे देणी, कऊँकि पिता परमेशरे माखे इजी खे देणे रा अक्क देई राखेया।” २८ तिने यीशुए खे बोलेया, “परमेशरो रे काम करने खे आसे क्या करूँ?” २९ यीशुए बोलेया, “परमेशरो रा काम ये कि तुसे तेस पाँदे, जो तिने पेजी राखेया, विश्वास करो।” ३० तेवे तिने तिना खे बोलेया, “तेवे तुसे कुण जा चिह्न दखाओ कि आसे तेस देखी की तुसा पाँदे विश्वास करिए, तुसे कुण जा काम दखाओए? ३१ आसा रे बाप-दादे जंगलो रे मन्ना खाया, जिंयाँ पवित्तर शास्त्रो रे लिखी राखेया कि तिने तिना खे खाणे खे स्वर्गो ते रोटी दित्ती।” ३२ यीशुए तिना खे बोलेया, “आऊँ तुसा खे सच-सच बोलूँआ कि मूसे सेयो रोटिया तुसा खे स्वर्गो ते नि दित्तिया, बल्कि मेरा पिता तुसा खे सच्ची रोटिया स्वर्गो ते देओआ। ३३ कऊँकि परमेशरो री रोटी सेईए, जो स्वर्गो ते ऊतरी की दुनिया रे लोका खे जीवन देओई।” ३४ तेवे तिने तिना खे बोलेया, “ओ प्रभु! एसा रोटिया आसा खे सदा देया कर।”

३५ यीशुए तिना खे बोलेया, “जीवनो री रोटी आऊँ ए; जो मांगे आऊणा, से कदी पूखा नि ऊणा और जेस मां पाँदे विश्वास करना, से कदी त्याया नि ऊणा। ३६ पर मै तुसा खे बोलेया था कि तुसे आऊँ देखी बी लया रा, तेवे बी विश्वास नि करदे। ३७ जो कुछ पिता माखे देओआ, से सब मांगे आऊणा। जो कोई मांगे आऊणा से मां कदी नि निकयालना। ३८ कऊँकि आऊँ आपणी इच्छा नि बल्कि आपणे पेजणे वाले री इच्छा पूरी करने खे स्वर्गो ते उतरी रा। ३९ और मेरे पेजणे वाले री इच्छा ये कि, जो कुछ तिने माखे देई राखेया, तिजी बीचा ते आऊँ कुछ नि रचाऊँ, पर तेस आखरी दिना रे फेर जिऊँदा करूँ। ४० कऊँकि मेरे पिते री इच्छा ये कि जो कोई पुत्रो खे देखो और तेस पाँदे विश्वास करो, से अनन्त जीवन पाओ और मां से आखरी दिनो रे फेर जिऊँदा करना।”

४१ तेवे यहूदी तिना पाँदे कुडकुड़ाणे लगे, कऊँकि तिने बोलेया था, “जो रोटी स्वर्गो ते उतरी, से आऊँ ई ये।” ४२ तेवे तिने बोलेया, “क्या ये यूसुफो रा पाऊ यीशु निए, जेसरे माए-बाओ खे आसे जाणूए? तेवे ये कऊँ बोलो आ कि आऊँ स्वर्गो ते उतरी रा?” ४३ यीशुए तिना खे जवाब दित्तेया, “आपू बीचे नि कुडकुड़ाओ। ४४ कोई मांगे नि आयी सकदा, जदुओ तक पिता, जिने आऊँ पेजी राखेया, तेसखे खिंजी ना लओ और आऊँ तेसखे आखरी दिनो रे फेर जिऊँदा नि करी देऊँ। ४५ भविष्यवक्ता रे लेखो रे ये लिखी राखेया, सेयो सब परमेशरो री तरफा ते सखाए रे ऊणे। जिने किने बी पिते ते सुणया और सीखी राखेया, से मांगे आओआ। ४६ किने बी पिता परमेशर नि देखी राखेया, मांते अलावा, जो पिता री तरफा ते पेजी राखेया, बस तिने ई पिता देखी राखेया।

४७ “आऊँ तुसा खे सच-सच बोलूँआ कि जो कोई विश्वास करोआ, अनन्त जीवन तेसरा ईए। ४८ जीवनो री रोटी आऊँ ई ये। ४९ तुसा रे बाप-दादे जंगलो रे मन्ना खाया और मरो गे। ५० ये से रोटी ये, जो स्वर्गो ते उतरोई, ताकि माणूं तिजी बीचा ते खाओ और मरो नि। ५१ जीवनो री रोटी, जो स्वर्गो ते उतरी, से आऊँ ई ये। जे कोई इजी रोटिया ते खाओ, तो सदा जिऊँदा रणा। जो रोटी मां दुनिया रे लोका खे सदा री जिन्दगिया खे देणी, से मेरा शरीर ए।”

52 ये सुणी की यहूदी लोक आपू बीचे लड़ने लगे, “ये माणू कियौं आसा खे आपणा मांस खाणे खे देई सकोआ?” 53 यीशुए तिना खे बोलेया, “आऊँ तुसा खे सच-सच बोलूँआ कि जदुओ तक मां माणू रे पुत्रो रा मांस नि खाओ और मेरा खून नि पियो, तुसा रे अनन्त जीवन निए। 54 जो मेरा मांस खाओआ और मेरा खून पियोआ, अनन्त जीवन तेसरा ईए; और मां आखरी दिनो रे से फेर जिऊँदा करना। 55 कऊँकि मेरा मांस ई तो खाणे री चीज ए और मेरा खून ई तो पीणे री चीज ए। 56 जो मेरा मांस खाओआ और मेरा खून पियोआ, से मांदे पक्का बणेया रा रओआ और आऊँ तेसरे। 57 जिंयाँ जिऊँदे पिता परमेशरे आऊँ पेजी राखेया और आऊँ पिते री बजअ ते जिऊँदा ए, तिंयाँ ई से बी, जो माखे खाओगा, जिऊँदा रणा। 58 आऊँ ई से रोटी ए जो स्वर्गो ते उतरी री। तेसा रोटिया जेड़ी निए, जो बाप-दादेया खाई और मरी गे, जो कोई एसा रोटिया खाओगा, से सदा जिऊँदा रणा।” 59 यो गल्ला यीशुए कफरनहूम नगरो रे प्रार्थना रे कअरो रे, उपदेश देंदे ऊए बोलिया।

~~~~~

60 तेबे तिना रे चलेया बीचा ते कई जणे ये सुणी की बोलेया, “यो गल्ला तो कठोर ए, इना कुण सुणी सकोआ?” 61 यीशु आपणे मनो रे ये जाणी की कि मेरे चले आपू बीचे एते गल्ला पाँदे कुडकुड़ाओए, तिना ते पूछेया, “क्या तुसा खे इना गल्ला ते ठोकर लगोई? 62 और जे तुसे मां माणू रे पुत्रो खे, जेती आऊँ पईले था, तेती ऊबे स्वर्गो खे जादे ऊए देखोगे, तो क्या ऊणा? 63 परमेशरो रा आत्मा ईए जो जीवन देणे वाला ए, पर शरीर ये नि देई सकदा, जो मैं तुसा खे बोली राखिया, सेयो आत्मिक बी ए और जीवन बी ए। 64 पर तुसा बीचा ते कई जणे तो एड़े ए, जो विश्वास नि करदे।” कऊँकि यीशु तो पईले तेई जाणे था कि जो विश्वास नि करदे, सेयो कूण? और केस आऊँ पकड़वाणा? 65 और तिने बोलेया, “तेबेई तो मैं तुसा खे बोलेया था कि जदुओ तक केसी खे पिते री तरफा ते ये बरदान नि दित्तेया जाओ, तदुओ तक से मांगे नि आयी सकदा।”

~~~~~

66 ये सुणी की तिना रे चलेया बीचा ते कई जणे उल्टे फिरी गे और तिजी ते बाद तिना साथे नि चले। 67 तेबे यीशुए तिना बारा चलेया खे बोलेया, “क्या तुसे बी जाणा चाओए?” 68 शमौन पतरसे तिना खे जवाब दित्तेया, “ओ परभु! आसे केसगे जाऊँ? अनन्त जीवनो री गल्ला तो तुसा गे ई ये 69 और आसे विश्वास कित्तेया और जाणी गे रे कि परमेशरो रा पवित्र जन तूँ ई ये।” 70 यीशुए तिना खे बोलेया, “क्या मैं तुसे बारा जणे नि चूणी राखे? तेबे बी तुसा बीचा ते एक माणू शैतान ए।” 71 ये तिने शमौन इस्करियोतियो रे पाऊ यहूदा रे बारे रे बोलेया था, कऊँकि येई तिना बारा चलेया बीचा ते था, जो यीशुए खे पकड़वाणे वाला था।

## 7

~~~~~

1 इना गल्ला ते बाद यीशु गलील प्रदेशो रे कुमदे-फरदे रये, कऊँकि यहूदी अगुवे तिना खे काणे री कोशिश करने लगी रे थे, तेबेई तो सेयो यहूदिया प्रदेशो रे कूमणा नि चाओ थे। 2 यहूदिया रा चूंगाडिया रा त्योआर नेडे था। 3 यीशुए रे पाईए तिना खे बोलेया, “एथा ते यहूदिया प्रदेशो खे चली जा, ताकि जो चमत्कारा रे काम तूँ करेया, तिना कामा तेरे और चले तेती बी देखो। 4 कऊँकि एडा कोई नि ऊणा, जो मशुर ऊणा चाओ और लुकी की काम करो, जे तूँ इना काम करोआ, तो आपू खे दुनिया रे सामणे ल्याओ।” 5 कऊँकि तिना रे पाई बी तिना पाँदे विश्वास नि करो थे। 6 तेबे यीशुए तिना खे बोलेया, “मेरा सई बखत एवु नि आयी रा, पर तुसा रिया तंई सारा बखत ए। 7 दुनिया रे लोक तुसा ते बैर नि करी सकदे, पर से मांते बैर करोए, कऊँकि आऊँ तेसा रे बिरोदो रे येई गवाई देऊँआ कि तेसा रे काम बुरे ए। 8 तुसे त्योआरो रे जाओ, आऊँ एवु एस त्योआरो खे नि जाई सकदा, कऊँकि एवुए तक मेरा सई बखत पूरा नि ऊई रा।” 9 यीशु तिना साथे इना गल्ला करी की गलील प्रदेशो रेई रेई गे।

XXXXXXXXXX XX XXXXXXXX XX XXXXX

10 पर जबे तिना रे पाई त्योआरो खे चली गे, तेबे सेयो आपू बी सामणे नि, पर चोरिए जे चली गे। 11 तेबे यहूदी अगुवे त्योआरो रे तिना खे ये बोली की टोलने लगे कि, “से केयी ए?” 12 और लोका बीचे चोरिए-चोरिए तिना रे बारे रे मुखती गल्ला ऊईया, बऊत जणे बोलो थे, “से पला माणू ए और कई जणे बोलो थे कि नई, से तो लोका खे भरमाओआ।” 13 तेबे बी यहूदिया रे डरो रे मारे कोई बी माणू तिना रे बारे रे खुली की नि बोलो था।

XXXXXXXXXX XX XXXXXX XX XXXXXX

14 जेबे त्योआरो रे आदे दिन बीती गे, तेबे यीशु मन्दरो रे आँगणो रे जाई की उपदेश देणे लगे। 15 तेबे यहूदिये हैरान ऊई की बोलेया, “एसखे बिना पढ़े बिद्या केथा ते आईगी?” 16 यीशुए तिना खे बोलेया, “मेरा उपदेश मेरा नि, बल्कि मेरे पेजणे वाले राए। 17 जे कोई परमेशरो री इच्छा पाँदे चलणा चाओ, तो तेसखे एस उपदेशो रे बारे रे पता लगी जाणा कि ये परमेशरो रिया तरफा तेया या आऊँ आपू ते बोलूँआ। 18 जो आपू ते कुछ बोलोआ, से आपणी तारीफ चाओआ, पर जो आपणे पेजणे वाले री तारीफ चाओआ, सेई परोसे रे जोगा ए और से पापी निए। 19 क्या मूसे तुसा खे बिधान नि देई राखेया? तेबे बी तुसा बीचा ते कोई बी बिधानो पाँदि नि चलदा। तुसे माखे काणा कऊँ चाओए?”

20 लोके जवाब दितेया, “ताँदे दुष्टात्मा ए, ताखे कुण काणा चाओआ।” 21 यीशुए तिना खे जवाब दितेया, “मैं आरामो रे दिने एक चमत्कार कितेया और तुसे सब हैरानी करोए। 22 तुसे बोलोए कि मूसे तुसा खे खतने री आज्ञा देई राखी। इजी री बजअ ते तुसे आरामो रे दिने माणूआ रा खतना करोए। ये नियम मूसे री तरफा ते निए, पर तुसा रे बाप-दादिया रे बखतो ते चले आयी रे। 23 तेबेई तो आरामो रे दिने माणूए रा खतना करेया जाओआ, ताकि मूसे रे बिधानो री आज्ञा टली नि जाओ, तो तुसे मां पाँदे रोष कऊँ करोए कि मैं आरामो रे दिने एक माणू अच्छी रीतिया ते ठीक कितेया। 24 मूँ देखी की न्याय नि करो, पर ठीक-ठीक न्याय करो।”

XXXXX XXXXX X XXXXX X?

25 तेबे कई यहूशलेमी लोक बोलणे लगे, “क्या ये सेई निए, जेसखे काणे री कोशिश ऊणे लगी री? 26 पर देखो, ये तो खुल्लमखुल्ला गल्ला करोआ और कोई एसखे कुछ नि बोलदा, केथी एड़ा तो निए कि अधिकारिए सच-सच जाणी ला रा कि येई मसीह ए? 27 एसखे तो आसे जाणूए कि ये केथो राए; पर मसीह जेबे आऊणा, तेबे केसी नि जाणना कि से केथो राए?” 28 तेबे यीशुए मन्दरो रे आँगणो रे उपदेश देदे ऊए जोरे की बोलेया, “तुसे माखे जाणोए और ये बी जाणोए कि आऊँ केथो राए, आऊँ आपू ते नि आयी रा, पर माखे पेजणे वाला सच्चा ए, तेसखे तुसे नि जाणदे। 29 पर आऊँ तेसखे जाणूआ, कऊँकि आऊँ तेसरी तरफा ते और तिने आऊँ पेजी राखेया।” 30 तेबे तिने सेयो पकड़ना चाए, पर तेबे बी किने बी तिना पाँदे आथ नि पाया, कऊँकि तिना रा सई बखत एबुए तक नि आयी रा था। 31 तेबे बी पीड़ा बीचा ते कई जणेया तिना पाँदे विश्वास कितेया और बोलणे लगे, “मसीह जेबे आऊणा, तो क्या एसते जादा सामर्था रे काम दखाणे, जो इने दखाए?”

XXXXXXXXXX XX XXXXXXXX XX XXXXXXX

32 फरीसिये, लोका ते तिना रे बारे रे यो गल्ला चोरिए-चोरिए करदे ऊए सुणिया और बड़े पुरोईत और फरीसिये तिना खे पकड़ने खे मन्दरो रे पडरदार पेजे। 33 तेबे यीशुए बोलेया, “आऊँ थोड़ी देर तक ओर तुसा साथे ए, तेबे आपणे पेजणे वाले गे चली जाणा। 34 तुसा आऊँ टोलना, पर मिलणा नि और जेती आऊँ ए, तेती तुसे आयी नि सकदे।” 35 तेबे यहूदिये अगुवे आपू बीचे बोलेया, “ये केयी जाणा, कि आसा खे नि मिलणा? क्या ये तिना बीचे जाणा, जो यूनानो रे ओरे-पारे ऊई की रओए और यूनानिया खे बी उपदेश देओगा? 36 ये क्या गल्ल ए, जो इने बोली कि, तुसा आऊँ टोलना, पर मिलणा नि और जेती आऊँ ए, तेती तुसे आयी नि सकदे?”

XXXXXXXXXXXXXX XX XXXXXXX XXXXX XXXXXXX

37 तेबे त्योआरो रे आखरी दिने, जो खास दिन था, यीशु खड़े ऊईगे और आक्का पाई की बोलेया, “जेसखे त्याया ए, तो से मांगे आओ और पियो। 38 जो मां पाँदे विश्वास करोगा, जेड़ा पवित्र शास्त्रो रे लिखी राखेया, तेसरे दिलो ते जिन्दगिया रे पाणिण् रिया नदिया बईदिया निकलनिया।” 39 तिने ये वचन पवित्र आत्मा रे बारे रे बोलेया, जो तिना पाँदे विश्वास करने वालेया खे मिलणे वाली थी। कऊँकि पवित्र आत्मा एवुए तक नि उतरी रा था, कऊँकि यीशु एवुए तक आपणी महिमा रे नि पऊँछेया था। 40 तेबे पीड़ा बीचा ते किने-किने ये गल्ला सुणी की बोलेया, “सच्ची येई से भविष्यवक्ता ए, जेसरे आऊणे री आसे उम्मीद लगाई राखी।” 41 कईए बोलेया, “ये मसीह ए।” पर कईए बोलेया कऊँ, “क्या मसीह गलील प्रदेशो ते आऊणा? 42 क्या पवित्र शास्त्रो रे नि लिखी राखेया कि मसीह दाऊदो रे कुलो रे और बैतलहमो रे गांव ते आऊणा, जेती दाऊद रओ था?” 43 तेबे तिना री बजअ ते लोका बीचे फूट पड़ी गी। 44 तिना बीचा ते कई जणे यीशुए खे पकड़ना चाओ थे, पर किने बी तिना पाँदे आथ नि पाया।

~~~~~

45 तेबे मन्दरो रे पईरेदार, बड़े पुरोईत और फरीसिया गे वापस आए, तेबे तिने तिना खे बोलेया, “तुसे तेसखे कऊँ नि ल्याए?” 46 मन्दरो रे पईरेदारे बोलेया, “किने बी मांपूए कदी बी एड़िया गल्ला नि बोलिया।” 47 फरीसिये पईरेदारा खे बोलेया, “क्या तुसे बी भरमाई गे दे? 48 क्या अधिकारी और फरीसिया बीचा ते किने बी तेस पाँदे विश्वास करी राखेया? 49 पर यो लोक जो मूसे रे बिधानो खे नि जाणदे, परमेशरो री तरफा ते सुरापित ए।” 50 नीकुदेमुसे जो पईले यीशुए गे राती आया था और तिना बीचा ते एक था, तिना खे बोलेया, 51 “क्या आसा रा बिधान केसी मांपूए खे, जद्दओ तक तेसरी सुणी की जाणी नि लओ कि से क्या करोए; दोषी मानोआ?” 52 तिने तेसखे जवाब दित्थेया, “ओ नीकुदेमुस, क्या तू बी गलील प्रदेशो राए? पवित्र शास्त्रो रे टोल और देख कि गलील प्रदेशो ते कोई बी भविष्यवक्ता आई नि सकदा।” 53 तेबे सब आपणे-आपणे कअरो खे चली गे।

## 8

~~~~~

1 यीशु जेतूनो रे पाहूडो पाँदे चली गे। 2 आगले दिने प्यागा फेर से मन्दरो रे आईगे और बऊत लोक तिना गे आईगे और यीशु मन्दरो रे आँगणो रे बैठी की तिना खे उपदेश देणे लगे। 3 तेबे शास्त्री और फरीसी एक जवाणसा खे ल्याए, जो व्याभिचार करदे ऊए पकड़ी थी और से बीचे खड़ी करी ती 4 और यीशुए खे बोलेया, “ओ गुरु! ये जवाणस व्याभिचार करदे ऊए पकड़ी राखी। 5 बिधानो रे मूसे आसा खे आज्ञा देई राखी कि एड़िया जवाणसा खे पथराव करना चाईयो। तो तुसे एसा जवाणसा रे बारे रे क्या बोलोए?” 6 तिने तिना खे परखणे खे ये गल्ल बोली, ताकि तिना रे दोष लगाणे खे कोई गल्ल पकड़ो, पर यीशु चुकी की गूठिये की जमीना पाँदे लिखणे लगे। 7 जेबे सेयो तिना ते पुछ्दे ई रये, तेबे तिने सीदे ऊई की तिना खे बोलेया, “तुसा बीचा ते जो निष्पाप ए सेई एसा पाँदे पईले पात्थर बाओ।” 8 और तेबे फेर चुकी की जमीना पाँदे गुठिया साथे लिखणे लगे। 9 पर सेयो ये सुणी की बड़ेया ते लयी की छोटैया तक, एक-एक करी की निकली गे और यीशु कल्ले रई गे और जवाणस तेथी बीचे खड़ी री रईगी। 10 यीशुए सीदे ऊई की तेसा खे बोलेया, “ओ जवाणसे! सेयो केयी गे? क्या किने बी तां पाँदे दण्डो री आज्ञा नि दित्ती?” 11 तेसे बोलेया, “ओ प्रभु! किने पनि।” यीशुए बोलेया, “आऊँ बी तां पाँदे दण्डो री आज्ञा नि देंदा, जा और फेर पाप नि करना।”

~~~~~

12 तेबे यीशुए फेर लोका खे बोलेया, “दुनिया री जोति आऊँ ई ये, जो मां पीछे आऊणा, से न्हरे रे नि चलणा, बल्कि तेस जोति पाणी जो जीवन देओई।” 13 फरीसिये तिना खे बोलेया, “तू आपणी गवाई आपू देओआ, तेरी गवाई ठीक निए।” 14 यीशुए तिना खे बोलेया, “बेशक आऊँ आपणी गवाई आपू ई देऊँआ, तेबे बी मेरी गवाई ठीक ए, कऊँकि आऊँ जाणूआ कि आऊँ केथा ते आयी रा और केथो खे जाऊँआ? पर तुसे नि जाणदे कि आऊँ केथा ते आयी रा और केथो खे जाऊँआ?

15 तुसे मूँ देखी की न्याय करोए, आऊँ केसी रा न्याय नि करदा 16 और जे आऊँ न्याय करूँ बी, तो मेरा न्याय सच्चा ए, कऊँकि आऊँ कल्ला नि ए, पर पिता जिने आऊँ पेजी राखेया मां साथे ए। 17 तुसा रा बिधानो रे बी लिखी राखेया कि दो जणेया री गवाई मिली की ठीक ओई, 18 एक तो आऊँ आपणी गवाई देऊँआ और दूजा पिता मेरी गवाई देओआ, जिने आऊँ पेजी राखेया।” 19 तिने तिना खे बोलेया, “तेरा पिता केयी ए?” यीशुए बोलेया, “ना तुसे माखे जाणदे और ना मेरे पिते खे, जे तुसे माखे जाणदे तो मेरे पिते खे बी जाणदे।” 20 यो गल्ला तिने मन्दरो रे आँगणो रे उपदेश देदे ऊए पण्डार कअरो रे बोलिया और किने बी सेयो पकड़े नि, कऊँकि एबुए तक तिना रा सई बखत नि आयी रा था।

~~~~~

21 यीशुए फेर तिना खे बोलेया, “आऊँ जाऊँआ और तुसा आऊँ टोलना और आपणे पापो रे मरने। जेती आऊँ जाऊँआ, तेती तुसे नि आयी सकदे।” 22 तेवे यहूदिये अगुवे बोलेया, “क्या ये आपणे आपू खे कायी देओगा, जो बोलोआ, ‘जेती आऊँ जाऊँआ तेती तुसे नि आयी सकदे?’” 23 यीशुए तिना खे बोलेया, “तुसे ऊँदले ए और आऊँ स्वर्गो राए, तुसे दुनिया रे ए और आऊँ दुनिया रा नि ए।” 24 तेवेई तो मैं तुसा खे बोलेया कि तुसे आपणे पापो ते मरने, कऊँकि जे तुसे विश्वास नि करोगे कि आऊँ सेईए, तो आपणे पापो रे मरने।” 25 यहूदी अगुवे तिना खे बोलेया, “तूँ कूणे?” यीशुए तिना खे बोलेया, “आऊँ सेईए, जो शुरूओ ते तुसा खे बोलदा ऊआ आयी रा, 26 तुसा रे बारे रे मां बऊत कुछ बोलणा और न्याय करना ए, पर मेरा पेजणे वाला सच्चा ए और जो मैं तेसते सुणी राखेया, सेई दुनिया रे लोका खे बोलूँआ।” 27 सेयो एबुए तक ये नि समजे कि यीशु तिना गो आपणे पिता परमेशरो रे बारे रे बोलणे लगी रा। 28 तेवे यीशुए बोलेया, “जेवे तुसा आऊँ माणू रा पुत्र ऊच्चे पदि चढाणा, तेवे जाणना कि आऊँ सेईए और आपणे आपू ते कुछ नि करदा, बल्कि जिंयाँ पिता परमेशरे माखे सखयाली राखेया, तियाँ ई इना गल्ला खे बोलूँआ।” 29 माखे पेजणे वाला मां साथे ए, तिने आऊँ कल्ला नि छाडी राखेया, कऊँकि आऊँ सदा सेई काम करूँआ, जेते साथे से खुश ओआ।” 30 सेयो इना गल्ला बोलणे ई लगी रे थे कि बऊत जणेया तिना पदि विश्वास कित्तेया।

~~~~~

31 तेवे यीशुए तिना यहूदिया खे, जिने तिना पदि विश्वास कित्तेया था, बोलेया, “जे तुसे मेरे वचनो रे बणे रे रओगे, तो सच्ची मेरे चले ठईरने। 32 तुसा सच जाणना और सच्चो तुसे आजाद करने।” 33 तिने यीशुए खे बोलेया, “आसे तो अब्राहमो रे कुलो ते ए और कदी केसी रे दास नि ऊए। तेवे तुसे कऊँ बोलोए कि तुसे आजाद ऊई जाणे?”

34 यीशुए तिना खे जवाब दित्तेया, “आऊँ तुसा खे सच-सच बोलूँआ कि जो कोई पाप करोआ, से पापो रा दास ए। 35 दास सदा कअरे नि रंदा, पाऊ सदा कअरे रओआ। 36 तेवे जे पुत्र तुसा खे आजाद करोगा, तो सच्ची तुसे आजाद ऊई जाणे। 37 आऊँ जाणूआ कि तुसे अब्राहमो रे कुलो ते ए, तेवे बी मेरा वचन तुसा रे दिलो रे नि बसदा, तेवेई तो तुसे माखे काणा चाओए। 38 आऊँ सेई बोलूँआ, जो मैं पिते गे देखी राखेया और तुसे सेई करदे रओए, जो तुसे आपणे पिते ते सुणी राखेया।”

39 तिने बोलेया, “आसा रा पिता तो अब्राहम ए।” यीशुए तिना खे बोलेया, “जे तुसे अब्राहमो री ल्वाद ऊँदे तो अब्राहमो जेडे काम करदे। 40 पर एवे तुसे मां जेडे मांणूए खे काणा चाओए, जिने तुसा गो से सच्चा वचन बताया, जो परमेशरो ते सुणेया, ये तो अब्राहमे नि कित्तेया था। 41 तुसे आपणे पिते जेडा काम करोए।” तिने यीशुए खे बोलेया, “आसे व्याभिचारो ते नि जम्मी रे, आसा रा एक ई पिता ए, मतलब-परमेशर।” 42 यीशुए तिना खे बोलेया, “जे परमेशर तुसा रा पिता ऊँदा, तो तुसे मां साथे प्यार राखदे, कऊँकि आऊँ परमेशरो री तरफा ते आयी रा, आऊँ आपू ते नि आयी रा, बल्कि तिने ई आऊँ पेजी राखेया। 43 तुसे मेरी गल्ल कऊँ नि समजदे? क्या तेवे कि तुसे मेरा वचन नि सुणी सकदे? 44 तुसा रा पिता शैतान ए और तुसे आपणे पिते री इच्छा पूरी करना चाओए। से तो शुरूओ तेई अत्यारा ए और सच्चो पदि खड़ा नि रंदा, कऊँकि सच तेसरे आया ई नि, जेवे से

चूट बोलोआ, तेबे से आपणे ई सबाओ ते बोलोआ, कऊँकि से चूटा ए, बल्कि चूटो रा पिता ए।  
 45 पर आऊँ जो सच बोलूँआ, तेबेई तो तुसे मेरा विश्वास नि करदे। 46 तुसा बीचा ते कुण माखे पापी  
 ठराओआ? जे आऊँ सच बोलूँआ, तो तुसे मेरा विश्वास कऊँ नि करदे? 47 जो कोई परमेशरो राए,  
 से परमेशरो री गल्ला सुणोआ। ये गल्ला तुसे तेबे नि सुणदे, कऊँकि तुसे परमेशरो रे निए।”

~~~~~

48 ये सुणी की यहूदिये तिना खे बोलेया, “क्या आसे ठीक नि बोलदे कि तूँ सामरी ए और तांदे
 दुष्टात्मा ए?” 49 यीशुए जवाब दित्तेया, “मांदे दुष्टात्मा निए, पर आऊँ आपणे पिते रा आदर
 करूँआ और तुसे मेरा आदर नि करदे। 50 पर आऊँ आपणा आदर नि चांदा, पर आ, एक तो आए,
 जो मेरा आदर करवाणा चाओआ और से इजी रा न्याय करोआ। 51 आऊँ तुसा खे सच-सच बोलूँआ
 कि जे कोई माणू मेरे वचनो पाँदे चलोगा, तो तेसखे अनन्तकालो तक मौत नि आऊणी।” 52 यहूदिये
 यीशुए खे बोलेया, “एबे तो आसे जाणी ला रा कि तांदे दुष्टात्मा ए, अब्राहम तो मरी गा रा
 और भविष्यवक्ता बी मरी गे रे और तूँ बोलेया कि ‘जो कोई मेरे वचनो पाँदे चलोगा, तो तेसखे
 अनन्तकालो तक मौत नि आऊणी।’ 53 आसा रा पिता अब्राहम तो मरी गा रा, क्या तूँ तेसते बड़ा
 ए? भविष्यवक्ता बी मरी गे रे, तूँ आपणे आपू खे क्या समजेया?”

54 यीशुए बोलेया, “जे आऊँ आपणी महिमा आपू ई करने लगी जाऊँ, तो मेरी महिमा कुछ निए,
 पर मेरी महिमा करने वाला मेरा पिता ए, जेसखे तुसे बोलोए कि आसा रा परमेशर ए। 55 तुसे तो से
 नि जाणेया, पर आऊँ तेसखे जाणूँआ, और जे बोलूँ कि आऊँ तेसखे नि जाणदा, तो आऊँ तुसा जेड़ा
 चूटा ठईरूँगा, पर आऊँ तेसखे जाणूँआ और तेसरे वचनो पाँदे चलूँआ। 56 तुसा रा पिता अब्राहम
 मेरा दिन देखणे री इच्छा रे बऊत मग्न था और तिने देखेया और खुश ऊआ।” 57 यहूदिये तिना खे
 बोलेया, “एबुए तक तूँ पंजा साला रा नि ऊआ, तेबे बी तैं अब्राहम देखी राखेया?” 58 यीशुए तिना
 खे बोलेया, “आऊँ तुसा खे सच-सच बोलूँआ कि अब्राहमो रे पैदा ऊणे ते पईले, आऊँ ए।” 59 तेबे
 तिने यीशुए खे बाण खे पात्थर चके, पर यीशु लुकी की मन्दरो ते निकली गे।

9

~~~~~

1 यीशु और तिना रे चलेया तीसिए जाँदे ऊए एक एड़ा माणू देखेया, जो जन्मो तेई अन्दा था।  
 2 तेबे तिना रे चलेया तिना ते पृच्छेया, “ओ गुरू! किने पाप कित्तेया था, इने माणूए, जो अन्दा  
 जम्मेया या एसरे माए-बाओ?” 3 यीशुए जवाब दित्तेया, “ना तो इने पाप करी राखेया और ना एसरे  
 माए-बाओ कि ये अन्दा जम्मेया, पर ये तेबे ऊआ, ताकि परमेशरो रे सामर्था रे काम एस पाँदे प्रगट  
 ओ। 4 जिने आऊँ पेजी राखेया, आसा खे जरूरी ये कि आसे तेसरे काम दिनो-दिने ई नपटयाणा जरूरी  
 ए, कऊँकि से रात आऊणे वाली ए, जिदे कोई काम नि करी सकदा। 5 जदुओ तक आऊँ दुनिया रे ए,  
 तदुओ तक, दुनिया री जोति ए।” 6 ये बोली की तिने जमीना पाँदे थूकेया और तेस थूको साथे माट्टी  
 सीन्नी किती और से माट्टी तेस अन्दे रिया आखी रे मली की 7 तेसखे बोलेया, “जा, और शीलोहो  
 रे कुण्डो रे आपणी आखी तोई लो” (जेतेरा मतलब पेजे राए) तेबे तिने जायी की आखी तोईया और  
 देखदा ऊआ आया। 8 तेबे तेस माणूए रे पड़ोसिये और जिने से पईले पीख मांगदा ऊआ देखेया था,  
 एकी दूजे ते बोलणे लगे, “क्या ये सेई निए, जो बैटेया रा पीख माँगो था?” 9 कईए बोलेया, “ये  
 सेईए,” ओरी बोलेया, “ना, ये तो तेसरा हमशकल ए।” तिने बोलेया, “आऊँ सेईए।” 10 तेबे सेयो  
 तेसते पृच्छेणे लगे, “तेरिया आखी कियौँ ठीक ऊईगिया?” 11 तेबे तिने बोलेया, “यीशु नाओं रे एक  
 माणूए माट्टी सेड़ी और मेरी आखी रे मली और माखे बोलेया, ‘जा और शीलोहो रे कुण्डो रे आपणी  
 आखी तोई लो।’ तेबे आऊँ कुण्डो रे गया और आखी तोई की देखणे लगी गा।” 12 तिने तेसते पृच्छेया,  
 “से माणू केयी ए?” तिने बोलेया, “आऊँ नि जाणदा।”

~~~~~

13 तेबे लोक तेसखे, जो पईले अन्दा था, फरीसिये गे लयी गे। 14 जेस दिने यीशुए माट्टी से डी की तेसरी आखी ठीक कित्तिया थिया, से आरामो रा दिन था। 15 तेबे फरीसिये बी तेसते पूछेया, “तेरिया आखी कियाँ ठीक ऊईगिया?” तिने बोलेया, “तिने मेरी आखी रे माट्टी लगाई, तेबे मैं तोईया और एबे देखणे लगेया।” 16 तेबे कई फरीसी बोलणे लगे, “थे माणू परमेशरो री तरफा ते निए, कऊँकि से आरामो रा दिन नि मानदा।” ओरी बोलेया, “पापी माणू कियाँ एडे चिह्न दखाई सकोआ?” तेबे तिना बीचे फूट पड़ी गी। 17 तिने तेस अन्दे खे फेर बोलेया, “जिने तेरी आखी कित्तिया ठीक कि तू तेसरे बारे रे क्या बोलेया?” तिने बोलेया, “से भविष्यवक्ता ए।”

18 पर यहूदिया खे विश्वास नि ऊआ कि ये अन्दा था और एबे देखोआ, जदुओ तक तिने तेसरे माए-बाओ बुलाई की 19 सेयो नि पूछी ले, “क्या ये तुसा रा पाऊ ए, जेसखे तुसे बोलोए कि अन्दा जम्मी रा? तेबे एबे कियाँ देखोआ?” 20 तेसरे माए-बाओ बोलेया, “आसे ये तो जाणूए कि ये आसा रा पाऊ ए और जन्मो ते अन्दा था। 21 पर ये नि जाणदे कि कियाँ देखणे लगी गा और ना ई ये जाणदे कि किने एसरिया आखी ठीक कित्तिया। से छोटो जा बच्चा निए, तेसते ई पूछी लो, तेस आपणे बारे रे आपू ई बताई देणा।” 22 यो गल्ला तिने तेबे बोलिया कऊँकि, सेयो यहूदी अगुओ ते डरो थे, कऊँकि यहूदी अगुवे एक मत ऊई चुके थे कि जे कोई ये विश्वास करोगा कि से मसीह ए, तो से प्रार्थना रे कअरो ते निकयाली देणा। 23 इजी री बजअ ते तेसरे माए-बाओ बोलेया, “से छोटो जा बच्चा निए, एसते ई पूछी लो।”

24 तेबे यहूदी अगुवे तेस माणूए ते, जो अन्दा था, दूजी बार बुलाई की तेसखे बोलेया, “परमेशरो खे गवा मानी की सच बोल, आसे तो जाणूए कि से माणू पापी ए।” 25 तिने बोलेया, “आऊँ नि जाणदा कि से पापी ए कि नई, आऊँ एक गल्ल जाणूआ कि आऊँ पईले अन्दा था और एबे देखी सकूआ।” 26 तिने तेसखे फेर बोलेया, “तिने तां साथे क्या कित्तिया और तेरी आखी कियाँ ठीक कित्तिया?” 27 तिने तिना खे बोलेया, “आऊँ तो तुसा खे बोली चुकेया रा और तुसेई नि सुणेया, एबे दूजी बार कऊँ सुणना चाओए? क्या तुसे बी तेसरे चले बणना चाओए?” 28 तेबे सेयो तेसखे खरा-बुरा बोलणे लगे, “तू ई तेसरा चेला ए, आसे तो मूसे रे चले ए। 29 आसे जाणूए कि परमेशरे मूसे साथे गल्ला कित्तिया, पर एस माणूए खे नि जाणदे कि केथो राए?” 30 तिने तिना खे बोलेया, “थे तो हैरानिया री गल्ल ए कि तुसे नि जाणदे कि से केथो राए, तेबे बी तिने मेरिया आखी ठीक कित्तिया। 31 आसे जाणूए कि परमेशर पापिया री नि सुणदा, पर जे कोई परमेशरो रा भक्त ओ और तेसरी इच्छा पाँदे चलोआ, तो से तेसरी सुणोआ। 32 दुनिया री शुरूआता ते ये कदी बी सुणने बीचे नि आया कि किने बी जन्मो रे अन्दे रिया आखी ठीक कित्तिया ओ। 33 जे ये माणू परमेशरो री तरफा ते नि ऊँदा, तो कुछ पनि करी सको था।” 34 तिने तेसखे जवाब दित्तेया, “तू तो बिल्कुल पापो ते जम्मी रा, तू आसा खे क्या सिखाएया?” और तिने से बारे निकयाली ता।

~~~~~

35 जेबे यीशुए सुणेया कि तिने से बारे निकयाली ता, तेबे सेयो तेसखे मिले और बोलेया, “क्या तू माणू रे पुत्रो पाँदे विश्वास करेया?” 36 तिने जवाब दित्तेया, “ओ परभु! से कुणे कि आऊँ तेस पाँदे विश्वास कऊँ?” 37 यीशुए तेसखे बोलेया, “तैं से देखी बी राखेया और जो तां साथे जपणे लगी रा से येईए।” 38 तिने बोलेया, “ओ परभु! आऊँ विश्वास कऊँआ।” और तिने तिना गे माथा टेकेया। 39 तेबे यीशुए बोलेया, “आऊँ एसा दुनिया पाँदे न्याय करने आयी रा ताकि जो देखदे नि, सेयो देखो और जो देखोए, सेयो अन्दे ऊई जाओ।” 40 जो फरीसी तिना साथे थे तिने यो गल्ला सुणी की तिना खे बोलेया, “क्या आसे बी अन्दे ए?” 41 यीशुए तिना खे बोलेया, “जे तुसे अन्दे ऊँदे तो पापी नि ऊँदे, पर एबे बोलोए कि आसे देखूँ, तेबेई तो तुसा रा पाप बणेया रा रओआ।”

1 यीशुए फेर बोलेया, “आऊँ तुसा खे सच-सच बोलूँआ कि जो कोई गवाईणी रे द्वारो ते नि जांदा, पर ओरी किसीये चढ़ी जाओआ, से चोर और डाकू ए।<sup>2</sup> पर जो-जो द्वारो रिये आओआ, से पेडा खे चराणे वाला ए।<sup>3</sup> तेसखे द्वारपाल द्वार खोली देओआ और पेडा तेसरा ग्लाणा पछ्याणोईया और से आपणी पेडा खे नाओं लयी-लयी की बुलाओआ और बारे लयी जाओआ।<sup>4</sup> जेबे से आपणी सारी पेडा खे बारे निकाली चुकोआ, तेबे से तिना रे आगे-आगे चलोआ और पेडा तेस पीछे-पीछे चलणे लगोईया, कऊँकि सेयो तेसरा ग्लाणा पछ्याणोईया।<sup>5</sup> पर सेयो ओरी पीछे नि जांदिया, बल्कि तेसगे ते नठी जाओईया, कऊँकि सेयो ओरी री आवाज नि पछ्याणदिया।”<sup>6</sup> यीशुए तिना खे ये उदारण बोलेया, पर सेयो नि समजे कि यो कुण जी गल्ला ए, जो ये आसा खे बोलणे लगी रा।

### ?????? ???? ?

7 तेबे यीशुए तिना खे फेर बोलेया, “आऊँ तुसा खे सच-सच बोलूँआ कि पेडा रा पीतरे आऊणे रा द्वार आऊँ ए।<sup>8</sup> जितणे मांते पईले आए, सेयो सब चोर और डाकू ए, पर मेरी पेडे तिना री नि सुणी।<sup>9</sup> द्वार आऊँ ए, जे कोई मेरे जरिए पीतरे जाओगा, तो उद्धार पाओगा, और पीतरे-बारे आया-जाया करना और तेसखे चारा मिलणा।<sup>10</sup> चोर कोई ओर काम करने नि, पर बस चोरी करने, काणे और सत्यानाश करने आओआ, आऊँ तेबे आया कि सेयो जीवन पाओ और बऊत जादा पाओ।<sup>11</sup> अच्छा चराणे वाला आऊँ ए, अच्छा चराणे वाला आपणी पेडा खे आपणा प्राण तक देई देओआ।<sup>12</sup> मजदूर, जो ना तो चराणे वाला ए और ना पेडा रा मालक ए, जेबे भेड़िया आओआ, तो पेडा खे छाडी की नठी जाओआ और भेड़िया तिना पेडा पँदे अमला करोआ और पेडा खे ओरे-पारे करी देओआ।<sup>13</sup> से तेबे नठी जाओआ, कऊँकि से एक मजदूर ए और तेसखे पेडा री चिन्ता नि ए।

14 “अच्छा चराणे आऊँ ए, आऊँ आपणी पेडा खे जाणूँआ और मेरी पेडा माखे जाणोईया।<sup>15</sup> जिंयाँ पिता माखे जाणोआ और आऊँ तेसखे जाणूँआ और आऊँ पेडा खे आपणे प्राण देऊँआ।<sup>16</sup> मेरिया ओर बी पेडा ए, जो एथो री गवाईणी रिया निया, माखे सेयो बी ल्याऊणिया जरूरी ए, तिना मेरा ग्लाणा सुणना, तेबे एक ई चूण्ड और एक ई चराणे वाला ऊणा।<sup>17</sup> पिता तेबे मांते प्यार राखोआ, कऊँकि आऊँ आपणे प्राण देई देऊँआ, ताकि तेस फेर लयी लूँ।<sup>18</sup> कोई बी मांते मेरा प्राण लई नि सकदा, बल्कि आऊँ तेसखे आपू ई देई देऊँआ। माखे देणे रा अक्क ए और तिजी खे फेर लणे रा अक्क बी ए, ये आज्ञा मेरे पिते ते माखे मिली री।”

19 इना गल्ला री बजअ ते यहूदिया बीचे फेर फूट पड़ी गी।<sup>20</sup> तिना बीचा ते बऊत जणे बोलणे लगे, “एसरे दुष्टात्मा ए और ये पागल ए, एसरी कऊँ सुणोए?”<sup>21</sup> ओरी बोलेया, “इना गल्ला एडा माणू नि बोली सकदा, जेसरे दुष्टात्मा ओ, क्या दुष्टात्मा अन्दे रिया आखी खोली सकोई?”

### ?????? ?? ???????

22 यहूशलेमो रे समपणो रा त्योआर था और ठणडी रा बखत था।<sup>23</sup> यीशु मन्दरो रे आँगणो रे सुलेमानो रे बरंडे (बरामदा) रे कूमणे-फिरने लगी रे थे।<sup>24</sup> तेबे यहूदिये सेयो केरी ते और तिना ते पूछेया, “तां आसा रा मन कदुओ तक दुबिदा रे राखणा? जे तूँ मसीह ए, तो आसा गे साफ-साफ बोली दे।”<sup>25</sup> यीशुए तिना खे बोलेया, “मैं तो तुसा खे बोलेया पर तुसे मेरा विश्वास नि कित्तेया, जो काम आऊँ पिते रे नाओं ते करूँआ, सेयो ई मेरे गवा ए।<sup>26</sup> पर तुसे मेरा विश्वास तेबे नि करदे, कऊँकि तुसे मेरी पेडा बीचा ते नि ए।<sup>27</sup> मेरी पेडा मेरा ग्लाणा पछ्याणोईया और आऊँ तिना खे जाणूँआ, और सेयो मां पीछे-पीछे चलोईया।<sup>28</sup> आऊँ तिना खे अनन्त जीवन देऊँआ और सेयो कदी नाश नि ऊणिया, और तिना खे कोई मांते छुड़ाई की लई नि सकदा।<sup>29</sup> मेरे पिता, जिने माखे सेयो देई राखिया, सबी ते बड़ा ए और कोई तिना खे पिते रे आथो ते छुड़ाई की लई नि सकदा।<sup>30</sup> आऊँ और पिता एक ए।”

31 यहूदिये फेर तिना खे पत्थराव करने खे पात्थर चके।<sup>32</sup> तेबे यीशुए तिना खे बोलेया, “मैं तो तुसा खे आपणे पिते री तरफा ते बऊत खरे काम दखाई राखे, तिना बीचा ते तुसे कुण जे कामो री बजअ ते मां पँदे पत्थराव करोए?”<sup>33</sup> यहूदिये तिना खे जवाब दित्तेया, “खरे कामा खे आसे तां पँदे

पत्थराव नि लगी रे करने, बल्कि परमेशरो री निन्दा री बजअ ते और इजी री बजअ ते कि तूँ माणू ऊई की आपू खे परमेशर बोलोआ।” 34 यीशुए तिना खे बोलेया, “क्या तुसा रे पवित्र शास्त्रो रे नि लिखी राखेया, मैं बोली राखेया, तूँ ईश्वर ए?” 35 तुसे जाणोए कि पवित्र शास्त्रो री गल्ल बदली नि सकदी। जिना गे परमेशरो रा वचन पऊँछी रा, तिने तिजी खे ईश्वर बोलेया, 36 तेवे जो पिते पवित्र ठईराई की दुनिया पाँदे पेजी राखेया, तुसे तेसखे बोलोए कि तूँ निन्दा करोआ, कऊँकि मैं बोली राखेया कि आऊँ परमेशरो रा पुत्र ए। 37 जे आऊँ पिते रे काम नि करदा, तो मेरा विश्वास नि करो। 38 पर जे आऊँ करूँआ, तेवे चाए मेरा विश्वास नि करो, पर तिना कामो रा विश्वास तो करो। ताकि तुसे जाणो और समजो कि पिता माँदे और आऊँ पिते रे ए।” 39 तेवे तिने फेर तिना खे पकड़ने री कोशिश किती, पर सेयो तिना रे आथो ते निकली गे।

40 तेवे यीशु यरदनो ते पार तेसा जगा रे गये, जेती यूहन्ना पईले बपतिस्मा देया करो था और तेथी रये। 41 तेवे बऊत जणे तिना गे आयी की बोलणे लगे, “यूहन्ने तो कोई चमत्कार नि दखाए, पर जो कुछ यूहन्ने इना रे बारे रे बोलेया था, से सब सच था।” 42 और तेती बऊत जणेया यीशुए पाँदे विश्वास कित्तेया।

## 11

### PPPP PP PP

1 मरियम और तेसा री बईणे मार्था रे गांव बैतनिय्याहो रे लाजर नाओं रा एक माणू बमार था। 2 ये सेई मरियम थी, जेसे यीशुए रे पैरा पाँदे इत्र मली की आपणे बालो साथे टूसे थे। एसा रा ई पाई लाजर बमार था। 3 तेवे तेसा री बईणे तिना खे संदेशा पेजेया, “ओ प्रभु! देख, जेस साथे तुसे प्यार राखोए, से बमार ऊई रा।” 4 ये सुणी की यीशुए बोलेया, “थे बमारी मरने जोगी निए, बल्कि परमेशरो री महिमा खे ए, ताकि तेसरी बजअ ते परमेशरो रे पुत्रो री महिमा ओ।”

5 यीशु मार्था और तेसा री बईण और तिना रे पाई लाजरो खे प्यार करो थे। 6 तो जेबे तिने सुणेया कि से बमार ए, तेबे जेती सेयो थे, तेती दो दिन ओर रूकी गे। 7 तेबे दो दिनो ते बाद तिने आपणे चलेया खे बोलेया, “आओ, आसे फेर यहूदिया प्रदेशो खे चलूँए।” 8 चलेया तिना खे बोलेया, “ओ गुरू! एबु तो यहूदी अगुवे तुसा पाँदे पत्थराव करना चाओ थे और क्या तुसे फेर बी तेथी जाणा चाओए।” 9 यीशुए बोलेया, “क्या दिनो रे बारा कंटे नि ऊँदे? जे कोई दिने चलो तो कोई टोकर नि खांदा कऊँकि से एसा दुनिया रा प्रयासा देखोआ। 10 पर जे कोई राथियो खे चलोआ, तो से टोकर खाओआ, कऊँकि तेसरे प्रयासा निए।” 11 तिने यो गल्ला बोलिया और इजी ते बाद तिना खे बोलणे लगे, “आसा रा दोस्त लाजर सयी गा रा, पर आऊँ तेसखे जगाणे चली रा।”

12 तेबे चलेया तिना खे बोलेया, “ओ प्रभु! जे से सयी रा तो से बची जाणा।” 13 यीशुए तो तेसरी मौता रे बारे रे बोलेया था, पर सेयो समजे कि तिने तेसरी नीजा ते सऊणे रे बारे रे बोलेया। 14 तेबे यीशुए तिना खे साफ बोली ता, “लाजर मरी गा रा 15 और आऊँ तुसा री बजअ ते खुश ए कि आऊँ तेती नि था, ताकि तुसे विश्वास करो, पर एबे आओ आसे तेसगे चलूँए।” 16 तेबे थोमे, जेसखे दिदुमुस बोलो थे, तिने आपणे साथले चलेया खे बोलेया, “आओ, आसे बी तेस साथे मरने खे चलूँए।”

### PPPP PPPPPPP PPPPPPP PP PP PPPPPPP

17 तेबे यीशुए खे बैतनिय्याह गांव रे आयी की पता चलेया कि लाजरो खे कबरा रे राखे रे चार दिन ऊईगे रे। 18 बैतनिय्याह, यरूशलेमो ते नेडे कोई तीन किलोमीटर था। 19 बऊत सारे यहूदी मरियम और मार्था रे गे तिना रे पाईए रे बुलावे खे आयी रे थे। 20 जेबे मार्थे यीशुए रे आऊणे रा समाचार सुणेया, तेबे से तिना खे मिलणे गयी, पर मरियम कअरे ई बैठी री रई। 21 मार्थे यीशुए खे बोलेया, “ओ प्रभु! जे तुसे एती ऊँदे, तो मेरा पाई कदी नि मरदा 22 और एबे बी आऊँ जाणूँई कि जो कुछ तुसा परमेशरो ते मांगणा, से तुसा खे मिलणा।” 23 यीशुए तेसा खे बोलेया, “तेरा पाई जिऊँदा ऊई जाणा।” 24 मार्थे तिना खे बोलेया, “आऊँ जाणूँई कि आखरी दिना रे दुबारा जिऊँदा ऊणा रे बखते से

फेर जी उठणा।” 25 यीशुए तेसा खे बोलेया, “दुबारा जिऊंदा ऊणा और जीवन आऊँ ईए, जे कोई मां पाँदे विश्वास करोआ, से जे मरी बी जाओ, तेबे बी जिऊणा। 26 और जो कोई जिओआ और मां पाँदे विश्वास करोआ, से अनन्तकालो तक नि मरना। क्या तूँ एसा गल्ला पाँदे विश्वास करेई?” 27 तेसे तिना खे बोलेया, “आ, ओ प्रभु, आऊँ विश्वास करी चुकी री कि परमेशरो रा पुत्र मसीह, जो दुनिया रे आऊणे वाला था, सेयो तुसेई ये।”

???? ???? ?

28 ये बोली की से चली गी और आपणी बईण मरियमा खे चोरिए जे बुलाई की बोलेया, “गुरू एधी ई ये और ताखे बुलाणे लगी रा।” 29 ये सुणदे ई से फटाफट उठी की तिना गे आयी। 30 यीशु एबुए तक गांव रे नि पऊँछी रे थे, बल्कि तेथी थे, जेती मार्था तिना खे मिली थी। 31 तेबे जो यहूदी तेसा साथे कअरे थे और तेसा खे शान्ति देणे लगी रे थे। ये देखी की कि मरियम फटाफट उठी की बारे चली गी री, सेयो समजे कि से कबरा पाँदे रोणे जाई री, तेसा पीछे चली गे। 32 जेबे मरियम तेती पऊँछी, जेती यीशु थे, तो तिना खे देखी की तिना रे पैरा पाँदे पड़ी की और बोलणे लगी, “ओ प्रभु! जे तुसे एती उँदे, तो मेरा पाई कदी नि मरदा।” 33 जेबे यीशुए तेसा खे और तिना यहूदिया खे, जो तेसा साथे आए थे, रोँदे ऊए देखेया, तो आत्मा रे बऊत उदास और बेचैन ऊईगा 34 और तिने बोलेया, “तुसे तेसरा शरीर केयी दवाई राखेया?” तिने तिना खे बोलेया, “ओ प्रभु! चली की देखी लो।” 35 यीशुए री आखी रे पाणी आईगा। 36 तेबे यहूदिये बोलेया, “देखो, ये तेसखे कितणा प्यार करो था।” 37 पर तिना बीचा ते बऊत जणेया बोलेया, “क्या ये, जिने अन्दे री आखी ठीक कित्तिया, ये पनि करी सकेया कि तेसखे मरने ते बचाई देओ?”

????? ? ???? ???? ?

38 यीशु मनो रे उदास ऊई की कबरा पाँदे आए, से एक गुफा थी और एक पात्थर तेते पाँदे राखी राखेया था। 39 यीशुए बोलेया, “पात्थरो खे टाओ।” तेस मरे री बईण मार्था तिना खे बोलणे लगी, “ओ प्रभु! तेसते तो एबे बास आओए, कऊँकि तेसखे मरे रे चार दिन ऊईगे रे।” 40 यीशुए तेसा खे बोलेया, “क्या मैं ताखे नि बोली राखेया था कि जे तूँ विश्वास करेगी, तो परमेशरो री महिमा खे देखेगी।” 41 तेबे तिने से पात्थर टाया, तेबे यीशुए आखी चकी की बोलेया, “ओ पिता आऊँ तेरा धन्यवाद करूँआ कि तैं मेरी प्रार्थना सुणी ली री 42 और आऊँ जाणूँ था कि तूँ मेरी सदा सुणेया, पर जो पीड़ नेडे-तेडे खड़ी री, तिना री बजअ ते मैं बोलेया, ताकि सेयो विश्वास करो कि तैं आऊँ पेजी राखेया।” 43 ये बोली की तिने जोरे की बोलेया, “ओ लाजर, कबरा ते बारे निकली की आईजा।” 44 जो मरी गा था, से कफनो ते आथ पैर बानेया रा निकली गा और तेसरा मूँ टाल्ले की लपेटे रा था, यीशुए बोलेया, “एसखे खोली की जाणे देओ।”

????? ? ???? ???? ???? ? (??-???)

(????? 26:1-5; ?????? 14:1,2; ?????? 22:1,2)

45 तेबे जो यहूदी मरियमा गे आयी रे थे और जेबे तिना रा ये काम देखेया, तेबे तिना बीचा ते कई जणेया तिना पाँदे विश्वास कित्तेया। 46 पर तिना बीचा ते कई जणे फरीसिया गे जाई की यीशुए रे कामो रा समाचार दित्तेया। 47 तेबे बडे पुरोईत और फरीसिये बऊत बड़ी सभा रे लोका खे कटुठे करी की बोलेया, “आसे क्या करूँए? ये माणू तो बऊत चमत्कार दखाओआ। 48 जे आसे तेसखे ईयां ई छ्छाडी देऊँगे तो, सबी तेस पाँदे विश्वास करने लगी जाणा और रोमिया एती आयी की आसा री जगा और जाति दूँई पाँदे अक्क करी लणा।” 49 सभा रे सदस्या बीचा ते कैफा नाओं रे एक माणूए, जो तेस बखतो रा प्रदान पुरोईत था, तिना खे बोलेया, “तुसे कुछ नि जाणदे 50 और ना ई ये सोचदे कि तुसा खे ये खरा ए कि आसा रे लोका री खातर एक माणू मरो और सारी जातिया नाश नि ओ।” 51 ये गल्ल तिने आपणी तरफा ते नि बोली, बल्कि तेस बखतो रा प्रदान पुरोईत ऊणे री बजअ ते भविष्यवाणी किती कि यीशु इस्राएलो रे लोका रिया तई मरना 52 और ना बस तेसा जातिया खे,

बल्कि इजी खे बी कि परमेशरो री बिखरी री ल्वादा खे एक करी देओ। <sup>53</sup>तेबे तेसी दिनो ते यहूदी अगुवे यीशुए खे मारने री तरकीब टोलने लगे।

<sup>54</sup>तेबेई तो यीशु तेस बखतो ते यहूदिया परदेशो रे खुल्लेआम नि कूमी सके, पर तेथा ते सुणसाण जगा रे नेडो रे एपरैम नाओं रे देशो रे, एक नगरो खे चली गे और आपणे चलेया साथे तेथी रणे लगे। <sup>55</sup>तेबे यहूदिया रा फसह रा त्योआर नेडे था और बऊत सारे लोक फसह ते पईले ई गांव ते यरूशलेमो खे गये कि आपणे आपू खे शुद्ध करिए। <sup>56</sup>तेबे सेयो यीशुए खे टोलने लगे और मन्दरो रे खडे ऊई की आपू बीचे बोलणे लगे, “तुसे क्या सोचोए? क्या से त्योआरो रे नि आऊणा?” <sup>57</sup>बडे पुरोईत और फरीसिये ये आज्ञा देई राखी थी कि जे केसी खे ये पता ओ कि यीशु केईये, तो बताओ ताकि तेसखे पकड़ी सकूँ।

## 12

\*\*\*\*\*

<sup>1</sup>तेबे यीशु फसह रे त्योआरो ते छे दिन पईले बैतनिय्याह गांव रे आए, जेती लाजर था; जो यीशुए मरे रेया बीचा ते जिऊंदा कित्तेया था। <sup>2</sup>तेती तिने तिना खे पाट्टी त्यार कित्ती और मारथा सेवा करने लगी री थी और लाजर तिना बीचा ते एक था, जो यीशुए साथे पाट्टी खाणे बैठे। <sup>3</sup>तेबे मरियम जटामासिया रा आदा सेर बऊत मईगा इत्र लयी की यीशुए रे पैरा पाँदे मलेया और आपणे वालो की तिना रे पैर दूसे और इत्रो री खूशबुओ साथे सारा कर खुशबूदार ऊईगा। <sup>4</sup>पर तिना रे चलेया बीचा ते यहूदा इस्करियोती नाओं रा एक चेला, जो तिना खे पकड़वाणे वाला था, बोलणे लगेया, <sup>5</sup>“ये इत्र तीन सौ चाँदिए रे सिक्केया रे बेची की कंगाला खे कऊँ नि बांडी ता।” <sup>6</sup>तिने ये गल्ल इजी री खातर नि बोली कि तेसखे कंगाला री चिन्ता थी, पर तेबे कऊँकि से चोर था और तेसगे तिना री पैसेया री थैली रओ थी और तिदे जो कुछ पाओ थे, से निकयाली देओ था। <sup>7</sup>यीशुए बोलेया, “एसा खे कल्लनी छाडी देओ। एसे मेरे दबाणे री त्यारिया खे एडा करी राखेया। <sup>8</sup>कऊँकि कंगाल तो तुसा साथे सदा रओए, पर आऊँ तुसा साथे सदा नि रणा।”

\*\*\*\*\* (202-202)

<sup>9</sup>जेबे यहूदिया री बड़ी पीड़ जाणी गी कि से एथी ए, तो सेयो सिर्फ यीशुए री ई बजअ ते नि, बल्कि लाजरो खे मिलणे खे बी आए थे, जो तिने मरे रेया बीचा ते जिऊंदा कित्तेया था। <sup>10</sup>तेबे बडे पुरोईत लाजरो खे बी काणे री तरकीब बणाई। <sup>11</sup>कऊँकि लाजरो री बजअ ते बऊत सारे यहूदिये तिना खे छाडी की यीशुए पाँदे विश्वास कित्तेया।

\*\*\*\*\*

([2022 21:1-11](#); [2022 11:1-11](#); [2022 19:28-40](#))

<sup>12</sup>दूजे दिने बऊत सारे लोके त्योआरो खे आये, जेबे लोके सुणेया यीशु यरूशलेमो खे आऊणे लगी रे। <sup>13</sup>तेबे तिने खजूरो रिया डालिया लईया और तिना खे मिलणे खे चली पडे और जोरे-जोरे साथे बोलणे लगे, “होशन्ना! धन्य इसराएलो रा राजा, जो प्रभुए रे नाओं ते आयी रा।” <sup>14</sup>जेबे यीशुए खे गहूदे रा एक बच्चा मिलेया, तो सेयो तेस पाँदे बैठीगे और से यरूशलेम नगरो खे आये। ये तियाँ ई ऊआ जेडा पवित्र शास्तुरे रे लिखी राखेया,

<sup>15</sup>“ओ यरूशलेमो रे लोको! डरो नि,  
देख, तेरा राजा गहूदे रे बच्चे पाँदे बैठी की आऊणे लगी रा।”

<sup>16</sup>यीशुए रे चले यो गल्ला पईले नि समजे थे, पर जेबे यीशुए री महिमा सामणे आयी, तेबे तिना खे याद आया कि यो गल्ला तिना रे बारे रे लिखी राखी थिया; और लोके तिना साथे एडा बर्ताव कित्तेया। <sup>17</sup>तेबे पीड़ा रे तिने लोके, जो तेस बखते तिना साथे थे, ये गवाई दिती कि तिने लाजर कबरा ते बुलाई की मरे रेया बीचा ते जिऊंदा कित्तेया था। <sup>18</sup>एतेरी बजअ ते लोक तिना खे मिलणे आए थे, कऊँकि तिने सुणेया था कि तिने ये सामरथा रा काम दखाया। <sup>19</sup>तेबे फरीसिये आपू बीचे



बोलेया, “सोचो, तुसा ते तो कुछ पनि ऊणे लगी रा, देखो, दुनिया रे सारे लोक एस पीछे ई चली पड़ी रे।”

XXXXXXXX XX XXXX XX XXXXX

20 जो लोक फसह रे त्योआरो खे भक्ति करने आए थे, तिना बीचा ते कुछ यूनानी थे। 21 तिने गलील प्रदेशो रे बैतसैदा नगरो रे रणे वाले फिलिप्पुसो गे आयी की बिनती किती कि, “श्रीमान् जी! आसे यीशुए साथे मिलणा चाऊँए।” 22 फिलिप्पुसे आयी की अन्दिरयासो खे बोलेया, तेवे तिने दूई यीशुए खे बोलेया। 23 तेवे यीशुए तिना खे बोलेया, “से बखत आईगा रा कि माणू रे पुत्रो री महिमा ओ। 24 आऊँ तुसा खे सच-सच बोलूँआ कि जदुओ तक कणका रा दाँणा जमीना रे पड़ी की मरी नि जाओ, से कल्ला रओआ, पर जेवे मरी जाओआ, तेवे बऊत फल ल्याओआ। 25 जो आपणे प्राणो खे प्यारा मानोआ, से तेसखे खोई देओआ, और जेसखे एसा दुनिया रे आपणा प्राण प्यारा निए, तेस अनन्त जीवोनो तक से बचाणा। 26 जे कोई मेरी सेवा करो, तो मां पीछे आयी जाओ और जेती आऊँ ऊणा, मेरा सेवक बी तेथी रणा और जो मेरी सेवा करोआ, मेरा पिता तेसरा आदर करोआ।

XXXXXXXX XX XXXX XX XXXXX

27 “एव मेरा जिऊ बेचन ऊणे लगी रा। तो एवे आऊँ क्या बोलूँ? ‘ओ पिता, माखे एसा कअडिया ते बचा!’ पर आऊँ इजी बजअ ते एसा कअडिया गे पऊँछी रा। 28 ओ पिता, आपणे नाओ री महिमा कर।” तेवे स्वर्गो ते ये आवाज आई कि, “मैं एसरी महिमा करी राखी और फेर बी करनी।” 29 तेवे जो लोक खड़ी की सुणने लगी रे थे तिने बोलेया, “बादल गरजेया” ओरी बोलेया, “कोई स्वर्गदूत तथा ते बोलेया।” 30 तेवे यीशुए बोलेया, “ये शब्द माखे नि पर तुसा रे फाईदे खे आयी रा। 31 एवे एसा दुनिया रा न्याय ओआ। एवे एस दुनिया रा सरदार निकयाली देणा 32 और आऊँ जे तरतिया पाँदा ते ऊच्चे रे चढाया जाऊँगा, तो सबी खे आपू गे खीजूँगा।” 33 ये बोली की तिने ये सामणे ल्याई ता कि से केड़ी मौता साथे मरना। 34 तेवे लोके तिना खे बोलेया, “आसे पवित्तर शास्तरो री ये गल्ला सुणी राखी कि मसीह सदा जिऊँदा रणा, तेवे तुसे कऊँ बोलोए कि माणू रे पुत्रो खे ऊच्चे रे चढाणा जरूरी ए? ये माणू रा पुत्र कूणे?” 35 यीशुए तिना खे बोलेया, “जोति एवे थोड़ी जी देरा खे तुसा बीचे ए? जदुओ तक जोति तुसा साथे ए, तदुओ तक चलदे रओ। एडा नि ओ कि न्हारा तुसा खे आयी की केरी देओ, जो न्हरे रे चलोआ, से नि जाणदा कि केयी जाणे लगी रा। 36 जदुओ तक जोति तुसा साथे ए, जोतिया पाँदे विश्वास करो, ताकि तुसे जोतिया री ल्वाद बणो।” इना गल्ला बोली की यीशु चली गे और तिना ते लूके रे रये।

XXXXXXXX XX XXXXXXXX XX XXXXX XX XXX

37 तिने तिना सामणे इतणे चमत्कार दिखाए, पर तेवे बी तिने तिना पाँदे विश्वास नि कित्तेया। 38 ताकि यशयाह भविष्यबक्ते रा वचन पूरा ओ, जो तिने बोलेया था, “ओ प्रभु! किने आसा रे सुसमाचारो पाँदे विश्वास करी राखेया? और परमेशरो रा बाहुबल केसगे प्रगट ऊई रा?”

39 एतेरी बजअ ते सेयो विश्वास नि करी सके, कऊँकि यशयाहे फेर बी बोलेया,

40 “तिने तिना री आखी अंदिया और मन काटा करी राखेया, केथी एडा नि ओ कि सेयो आखी ते देखो और मनो ते समजो और फिरो और आऊँ तिना खे ठीक करूँ।”

41 यशयाहे यो गल्ला तेवे बोलिया, कऊँकि तिने यीशुए री आऊणे वाली महिमा देखी और तिने तेसरे बारे रे गल्ला कित्तिया। 42 तेवे बी अधिकारिया बीचा ते कई जणे तिना पाँदे विश्वास कित्तेया। पर फरीसिये री डरो री बजअ ते सामणे नि आऊणा चाओ थे, एडा नि ओ कि प्रार्थना रे कअरो ते निकयाले जाओ। 43 कऊँकि माणूआ ते तारीफ, तिना खे परमेशरो री तारीफा ते जादा प्यारी लगो थी।

XXXXXXXX XX XXXX XX XXXXX

44 यीशुए ज़ोरे की बोलेया, “जो मां पाँदि विश्वास करोआ, से मां पाँदि नि, बल्कि मेरे पेजणे वाले परमेशरो पाँदि विश्वास करोआ। 45 और जो माखे देखोआ, से मेरे पेजणे वाले खे देखोआ। 46 आऊँ दुनिया रे जोति ऊई की आयी रा, ताकि जो कोई मां पाँदि विश्वास करो, से न्हरे रे नि रओ। 47 जो कोई मेरिया गल्ला सुणी की नि मानो, आऊँ तेसखे दोषी नि ठईरांदा, कऊँकि आऊँ दुनिया रे लोका खे दोषी ठईराणे खे नि, बल्कि दुनिया रे लोका खे बचाणे आयी रा। 48 जो माखे तुच्छ जाणूआ और मेरी गल्ला नि मानदा, तेसखे दोषी ठईराणे वाला एक ईए, मतलब-जो वचन मैं बोली राखेया, तेस ई आखरी दिनो रे से दोषी ठईराणा। 49 कऊँकि मैं आपणी तरफा ते गल्ला नि करी राखिया, पर पिते, जिने आऊँ पेजी राखेया, तिने ई माखे आज्ञा देई राखी कि क्या-क्या बोलूँ? और कियाँ बोलूँ? 50 और आऊँ जाणूआ कि तेसरी आज्ञा अनन्त जीवन ए, तेबेई तो जो आऊँ बोलूँआ, जेड़ा पिते मांगे बोली राखेया, तेड़ा ई बोलूँआ।”

## 13

ⓂⓂⓂⓂ ⓂⓂ ⓂⓂⓂⓂⓂⓂ ⓂⓂ ⓂⓂⓂ ⓂⓂⓂⓂ

1 फसह रे त्योआरो ते पईले जेबे यीशुए जाणी ला कि मेरी से कअड़ी आईगी री कि दुनिया खे छाडी की पिते गे जाऊँ। तेबे आपणे लोका खे जो दुनिया रे थे, जेड़ा प्यार राखो था, अंतो तक तेड़ा ई प्यार राखेया। 2 रात की रोटिया रे बखते जेबे शैतान, यहूदा इस्करियोतियो रे मनो रे ये गल्ल पाई चुकेया था कि यीशुए खे पकड़वाओ, 3 यीशुए, ये जाणी की कि पिते सारा अक्क मेरे आथो रे देईता रा और आऊँ परमेशरो गे ते आयी रा और परमेशरो गे ई जाणा, 4 रोटिया गे ते उटी की आपणे टाल्ले खोली ते और पड़तणी लयी की आपणा लक बानेया। 5 तेबे पांडे रे पाणी लयी की आपणे चलेया रे पैर तोये और जो पड़तणी आपणे लको रे थी बानी री, तिजी साथे साफ करने लगे। 6 जेबे सेयो शमौन पतरसो गे आए, तेबे तिने तिना खे बोलेया, “ओ प्रभु! क्या तुसे मेरे पैर तोणे लगी रे?” 7 यीशुए बोलेया, “जो आऊँ कहुँआ, से तूँ एवु नि जाणदा, पर इजी ते बाद समजणा।” 8 पतरसे तिना खे बोलेया, “तुसे मेरे पैर कदी नि तोई सकदे!” ये सुणी की यीशुए तेसखे बोलेया, “जे तूँ माखे आपणे पैर नि तोणे देगा, तो मां साथे तेरा कुछ बी साजा निया।” 9 शमौन पतरसे तिना खे बोलेया, “ओ प्रभु! तेबे मेरे पैर नि बल्कि मेरे आथ और सिर बी तोई दे।” 10 यीशुए तेसखे बोलेया, “जो नायी चुकेया रा, तेसरे पैर तोणे ते अलावा कुछ ओर तोणे ते मतलब निए, बल्कि से बिल्कुल शुद्ध ए और तूँ बी शुद्ध ए, पर सब के सब निए।” 11 सेयो आपणे पकड़वाणे वाले खे जाणो थे, तेबेई तो तिने बोलेया, “तुसे सब के सब शुद्ध निए।”

12 जेबे यीशु तिना रे पैर तोई चुके और फेर आपणे टाले पईनी की बैठीगे, तेबे तिने चलेया खे पृछेया, “क्या तुसे समजे कि मैं तुसा साथे क्या कित्तेया? 13 तुसे माखे गुरू और प्रभु बोलोए और ठीक ई बोलोए, कऊँकि आऊँ तुसा रा गुरू और प्रभु ए। 14 जे मैं प्रभु और गुरू ऊई की तुसा रे पैर तोये, तो तुसा बी नमर ऊई की एकी दूजे रे पैर तोणे चाईयो। 15 कऊँकि मैं तुसा गे नमूना दखाई ता कि जियाँ मैं तुसा साथे करी राखेया, तुसे बी तियाँ ई करेया करो।

16 “आऊँ तुसा खे सच-सच बोलूँआ, दास आपणे मालको ते बड़ा नि ऊँदा, और ना पेजेया रा आपणे पेजणे वाले ते। 17 तुसे तो इना गल्ला खे जाणोए और जे इना पाँदि चलो, तो धन्य ए। 18 आऊँ तुसा सबी रे बारे रे नि बोलदा, जो मैं चूणी लये रे, तिना खे आऊँ जाणूआ, पर ये इजी खे ए, ताकि पवित्तर शास्त्रो रा ये वचन पूरा ओ कि, जिने मेरा दोस्त ऊई की मां साथे रोटी खाई सेई मेरे खलाफ ऊईगा। 19 एबे आऊँ तिजी रे ऊणे ते पईले तुसा खे जताई देऊँआ कि जेबे ये ऊई जाओ, तो तुसे विश्वास करो कि आऊँ सेईए। 20 आऊँ तुसा खे सच-सच बोलूँआ कि जो मेरे पेजे रे खे मानोआ, से माखे मानोआ और जो माखे मानोआ, से मेरे पेजणे वाले खे मानोआ।”

ⓂⓂⓂⓂ ⓂⓂ ⓂⓂⓂⓂⓂⓂ ⓂⓂ ⓂⓂⓂⓂ

(ⓂⓂⓂⓂⓂ 26:20-25; ⓂⓂⓂⓂⓂ 14:17-21; ⓂⓂⓂⓂⓂ 22:21-23)

21 ये बोली की यीशु आत्मा रे बेचैन ऊईगे और तिने आपणे चलेया ते बोलेया, “आऊँ तुसा खे सच-सच बोलूँआ कि तुसा बीचा ते एकी जणे आऊँ पकड़वाणा।” 22 चले ये शक करी की कि यो केसरे बारे रे बोलणे लगी रे, एकी दूजे खे देखणे लगे। 23 तिना रे चलेया बीचा ते एक जेस साथे यीशु प्यार राखो थे, यीशु ए री छ्हातिया री तरफा खे चूकी की तिना री बगला रे बैठी रा था। 24 तेबे शमौन पतरसे तेसरी तरफा खे साअरा करी की बोलेया, “बता तो, यो केसरे बारे रे बोलणे लगी रे?”

25 तेबे तिने तियाँ ई यीशु ए री छ्हातिया री तरफा खे चूकी की पूछेया, “ओ प्रभु! से कूणे?” 26 यीशु ए बोलेया, “जेसखे मां ये रोटिया रा टुकड़ा डबोई की देणा, सेईए।” तेबे तिने टुकड़ा शमौनो रे पाऊ, यहूदा इस्करियोतियो खे दित्तेया। 27 रोटिया रा टुकड़ा खांदे ई शैतान तेसरे समाई गा, तेबे यीशु ए बोलेया, “जो तूँ करने लगी रा, से फटाफट कर।” 28 पर ओरी चलेया ये नि जाणेया कि तिने ये गल्ल कऊँ बोली। 29 यहूदे गे पैसेया री थैली रओ थी, तेबे किने-किने समजेया कि यीशु ए इजी रे बारे रे बोलेया कि जो कुछ आसा खे त्योआरो रे दिनो खे चाईयो, से खरीद या कंगाला खे कुछ देई दे। 30 तेबे यहूदा रोटिया रा टुकड़ा खाणे ते बाद फटाफट बारे चली गा और से राथियो रा बखत था।

☞☞☞ ☞☞☞☞

31 जेबे से बारे चली गा, तेबे यीशु ए बोलेया, “एबे मां माणू रे पुत्रो री महिमा ऊई और परमेशरो री महिमा तेसरे ऊई री। 32 तो परमेशरे बी आपू रे पुत्रो री महिमा करनी, बल्कि फटाफट करनी। 33 ओ बालको! आऊँ तुसा साथे थोड़ी देर ओर ए, तेबे तुसा आऊँ टोलना और जेड़ा मैं यहूदी अगुवा खे बोलेया, ‘जेती आऊँ जाऊँआ, तेती तुसे नि आयी सकदे; तेड़ा ई एबे आऊँ तुसा खे बी बोलूँआ।’ 34 आऊँ तुसा खे एक नयी आज्ञा देऊँआ कि एकी-दूजे साथे प्यार राखो, जेड़ा मैं तुसा साथे प्यार राखी राखेया। तेड़ा ई तुसे बी एकी-दूजे साथे प्यार राखो। 35 जे तुसे आपू बीचे प्यार राखोगे तो इजी तेई सबी जाणी लणा कि तुसे मेरे चले ए।”

☞☞☞☞ ☞☞ ☞☞☞☞☞☞ ☞☞ ☞☞☞☞

(☞☞☞☞ 26:31-35; ☞☞☞☞ 14:27-31; ☞☞☞☞ 22:31-34)

36 शमौन पतरसे तिना खे बोलेया, “ओ प्रभु! तुसे केयी चली रे?” यीशु ए बोलेया, “जेती आऊँ एबु चली रा, तेती तूँ एबु मां पीछे नि आयी सकदा, पर इजी ते बाद मां पीछे आऊणा।” 37 पतरसे तिना खे बोलेया, “ओ प्रभु! एबु आऊँ तुसा पीछे कऊँ नि आयी सकदा? आऊँ तो तुसा खे आपणे प्राण देणे खे बी त्यार ए।” 38 यीशु ए बोलेया, “क्या तां माखे आपणे प्राण देणे? आऊँ ताखे सच-सच बोलूँआ कि मुर्गे बांग नि देणी, जद्दुओ तक तां मेरा तीन बार ना नि करना।”

## 14

☞☞☞☞☞☞ ☞☞ ☞☞☞☞☞☞ ☞☞ ☞☞

1 यीशु ए आपणे चलेया खे बोलेया, “तुसा रा मन बेचैन नि ओ, तुसे परमेशरो पाँदे विश्वास राखोए, मां पाँदे बी राखो। 2 मेरे पिते रे कअरो रे बऊत जगा ए रणे खे, जे ऊँदी नि तो मां तुसा खे बोली देणा था, कऊँकि आऊँ तुसा खे जगा त्यार करने जाऊँआ 3 और तेती जाई की तुसा खे जगा त्यार करने ते बाद मां तुसे आयी की आपू साथे लयी जाणे खे फेर आऊणा, ताकि जेती आऊँ रऊँ, तुसे बी मां साथे तेथी रओ। 4 और जेती आऊँ जाऊँआ, तुसे तेथो री बाट जाणोए।” 5 थोमे तिना खे बोलेया, “ओ प्रभु! आसे नि जाणदे कि तुसे केयी जाओए? तो बाट कियाँ जाणी सकूए?” 6 यीशु ए तेसखे बोलेया, “बाट, सच्चाई और जीवन आऊँ ईए; मांते बिना कोई बी पिते गे नि पऊँछी सकदा। 7 जे तुसे आऊँ जाणी राखेया, तो मेरा पिता बी जाणी राखेया और एबे तेसखे जाणो बी ए और से देखी बी राखेया।”

8 फिलिप्पुसे तिना खे बोलेया, “ओ प्रभु! पिते खे आसा गे बताई देओ, येई आसा खे बऊत ए।” 9 यीशु ए तेसखे बोलेया, “ओ फिलिप्पुस! आऊँ इतणे दिना ते तुसा साथे ए और क्या तूँ माखे नि जाणदा? जिने आऊँ देखी राखेया, तिने पिता देखी राखेया, तेबे तूँ कऊँ बोलेया कि पिते खे आसा

गे दखाई देओ? 10 क्या तूँ विश्वास नि करदा कि आऊँ पिते रे ए और पिता मांदि ए? यो गल्ला जो आऊँ तुसा खे बोलूँआ, आपणी तरफा ते नि बोलदा, पर पिता मांदि रई की आपणे काम करोआ। 11 मेरा विश्वास करो कि आऊँ पिते रे ए और पिता मांदि ए, नई तो तिना चमत्कारा री बजअ ते जो मैं करी राखे मेरा विश्वास करो। 12 आऊँ तुसा खे सच-सच बोलूँआ कि जो मां पाँदि विश्वास राखोआ, यो काम, जो आऊँ करूँआ, तेस वी करने, बल्कि इना ते वी बड़े काम करने, कऊँकि आऊँ पिते गे चली रा। 13 और जो कुछ तुसे मेरे नाओं ते मांगोगे, सेई मां करना ताकि पाऊए री बजअ ते पिते री महिमा ओ। 14 जे तुसे मांते, मेरे नाओं ते कुछ वी मांगोगे, तो मां से करना।

\*\*\*\*\*

15 “जे तुसे मांते प्यार राखोए, तो मेरी आज्ञा खे मानोगे। 16 आऊँ पिते ते प्रार्थना करूँगा और तेस तुसा खे एक ओर मददगार पेजणा, ताकि से तुसा साथे सदा रओ। 17 से पवित्र आत्मा ए जो परमेशरो रे बारे रे पूरी सच्चाई बताओआ। जेसखे दुनिया मानी नि सकदी, कऊँकि से ना तेसखे देखोआ और ना तेसखे जाणोआ, तुसे तेसखे जाणोए, कऊँकि से तुसा साथे रओआ और से तुसा रे ऊणा।

18 “मां तुसे अनाथ नि छाडणे, आऊँ तुसा गे वापस आऊँआ। 19 और थोड़ी जी देर रईगी री कि दुनिया आऊँ नि देखणा, पर तुसा आऊँ देखणा, कऊँकि आऊँ जिऊँदा ए, तुसे वी जिऊँदे रणे। 20 जेबे आऊँ जिऊँदा ऊई की वापस आऊणा, तेस दिने तुसा जाणना कि आऊँ आपणे पिते रे ए और तुसे मांदि ए और आऊँ तुसा रे ए। 21 जेसगे मेरी आज्ञा ओ और से तिना खे मानोआ, सेई मां साथे प्यार राखोआ, तेसते मेरे पिते प्यार राखणा और मां वी तेसते प्यार राखणा और आपणे आपू खे तेसदे प्रगट करूँगा।” 22 तिने यहूदे, जो इस्करियोती नि था, तिने बोलेया, “ओ प्रभु! क्या ऊआ कि तुसे आपू खे आसा पाँदि प्रगट करना चाओए और दुनिया रे लोका पाँदि नि?” 23 यीशुए तेसखे बोलेया, “जे कोई मांते प्यार राखोआ, तो तेस मेरे उपदेश मानणे और मेरे पिते तेसते प्यार राखणा और आसे तेसगे आऊणे और तेस साथे रणे।

24 “जो मांते प्यार नि करदा, से मेरे उपदेश नि मानदा और जो उपदेश तुसे सुणोए, से मेरा नि बल्कि पिते राए, जिने आऊँ पेजेया। 25 यो गल्ला मैं तुसा साथे रंदि ऊए तुसा खे बोलिया। 26 पर मददगार, मतलब-पवित्र आत्मा, जो पिते मेरे नाओं ते पेजणा, तेस तुसा खे सारिया गल्ला सिखयाणियां और जो कुछ मैं तुसा खे बोली राखेया, तेस तुसा खे सब कुछ याद दलयाणा।

27 “आऊँ तुसा खे शान्ति देऊँआ, आपणी शान्ति तुसा खे देऊँआ, जिंयाँ दुनिया देओई, आऊँ तुसा खे नि देंदा, तुसा रा मन नि कबराओ और ना डरो। 28 तुसे सुणेया कि मैं तुसा खे बोलेया, आऊँ जाऊँआ और तुसा गे फेर आऊँआ, जे तुसे मांते प्यार राखे, तो एसा गल्ला ते खुश ऊँदे कि आऊँ पिते गे चली रा, कऊँकि पिता मांते बड़ा ए। 29 मैं एबे तिना सारी घटना ऊणे ते पईले तुसा खे बोली ताकि जेबे से ऊई जाओ, तो तुसे मां पाँदि विश्वास करो। 30 मांगे एबे तुसा साथे गल्ला करने खे ओर जादा बखत निए, कऊँकि एसा दुनिया रा सरदार आऊणे वाला ए। मां पाँदि तेसरा कोई अक्क निए। 31 पर ये तेबे ऊआ, ताकि दुनिया जाणो कि आऊँ पिते ते प्यार करूँआ और जिंयाँ पिते माखे आज्ञा दिती, आऊँ तिंयाँ ई करूँआ। उठो, एथा ते चलूँए।”

## 15

\*\*\*\*\*

1 “सच्ची अंगूरा री बेल आऊँ ई ये और मेरा पिता जिम्मीदार ए। 2 जो डाली मांदि ए और फलदी नि, से तेसा खे बाडी देओआ और जो फलोई, से तेसा री कांट छांट करोआ, ताकि ओर वी जादा फलो। 3 तुसे तो तेस उपदेशो री बजअ ते, जो मैं तुसा खे बोली राखेया, शुद्ध ए। 4 तुसे मांदि बणे रे रओ और आऊँ तुसा रे। जिंयाँ डाली जे अंगूरा री बेल रे बणी री नि रओ, तो आपणे आपू ते नि फली सकदी, तिंयाँ ई तुसे वी जे मांदि बणे रे नि रओगे, तो फली नि सकदे। 5 आऊँ अंगूरा री बेल ए, तुसे डालिया ए, जो मांदि बणेया रा रओआ और आऊँ तेसरे, तिदे बऊत फल लगेओ, कऊँकि मांते लग रई की तुसे कुछ पनि करी सकदे। 6 जे कोई मांदि बणेया रा नि रओ, तो से तेसा बेकार और

सूकी डालिया जेड़ा सेटेया जाओआ और लोक तिजी खे कटटे करी की आगी रे सेटी देओए और सेयो फूखी जाओईया।<sup>7</sup> जे तुसे मांदे बणे रे रओ और मेरे उपदेश तुसा रे बणे रे रओ, तो जो चाओ, से माँगो और से तुसा खे ऊई जाणा।<sup>8</sup> मेरे पिते री महिमा इजी साथे ई ओई कि तुसे बऊत सारा फल ल्याओ। तेवेई तुसे मेरे चले ऊणे।

<sup>9</sup> “जेड़ा पिते मां साथे प्यार राखेया, तेड़ा ई मैं तुसा साथे प्यार राखेया। मेरे प्यारो रे बणे रओ।<sup>10</sup> जे तुसे मेरी आज्ञा खे मानोगे, तो मेरे प्यारो रे बणे रे रणे, जिंयाँ मैं आपणे पिते री आज्ञा मानी राखिया और तेसरे प्यारो रे बणेया रा रऊँआ।<sup>11</sup> मैं तुसा खे यो गल्ला तेबे बोलिया ताकि मेरी खुशी तुसा रे बणी री रओ और तुसा री खुशी पूरी ऊई जाओ।<sup>12</sup> मेरी आज्ञा ये कि जेड़ा मैं तुसा साथे प्यार राखेया, तेड़ा ई प्यार तुसे बी एकी-दूजे साथे राखो।<sup>13</sup> इजी ते बड़ा प्यार केसी रा निए कि कोई आपणे दोस्ता खे आपणा प्राण देओ।<sup>14</sup> जो कुछ आज्ञा आऊँ तुसा खे देऊँआ, जे तुसे मानो, तो तुसे मेरे दोस्त ए।<sup>15</sup> आजो ते आऊँ तुसा खे दास नि बोलूँगा, कऊँकि दास नि जाणदा कि मालक क्या करोआ, पर मैं तुसा खे दोस्त बोलेया, कऊँकि मैं जो गल्ला आपणे पिते ते सुणिया, सेयो सब तुसा खे बताई तिया।<sup>16</sup> तुसे आऊँ नि चुणेया, पर मैं तुसे चुणी राखे और तुसे ठराए, ताकि तुसे जाई की फल ल्याओ और तुसा रा फल बणेया रा रओ कि जो कुछ तुसे मेरे नाओं ते पिते ते माँगो, से तुसा खे देओ।<sup>17</sup> इना गल्ला री आज्ञा आऊँ तुसा खे तेवे देऊँआ, ताकि तुसे एकी-दूजे साथे प्यार राखो।



<sup>18</sup> “जे दुनिया रे लोक तुसा ते बैर राखोए, तो तुसे जाणोए कि तिने तुसा ते पईले मांते बी बैर राखेया।<sup>19</sup> जे तुसे दुनिया रे ऊँदे, तो दुनिया रे लोक तुसा साथे आपणेया जेड़ा प्यार राखदे, कऊँकि तुसे दुनिया रे निए, बल्कि मैं तुसे चुणी ले रे, तेवेई तो दुनिया तुसा ते बैर राखोई।<sup>20</sup> याद राखो कि मैं तुसा खे क्या बोलेया था कि दास आपणे मालको ते बड़ा नि ऊँदा, जे तिने आऊँ सताया, तो तुसे बी सताणे, जे तिने मेरा उपदेश मानी ला, तो तुसा रा बी मानी लणा।<sup>21</sup> मां पँदे विश्वास करने री बजअ ते तिना तुसा साथे बुरा बर्ताव करना, कऊँकि सेयो मेरे पेजणे वाले परमेशरो खे नि जाणदे।<sup>22</sup> जे आऊँ नि आऊँदा और तिना साथे गल्ला नि करदा, तो सेयो पापी नि ठईरदे, पर एवे तिना खे तिना रे पापो खे कोई बाह्ना निए।<sup>23</sup> जो मांते बैर राखोआ, से मेरे पिते ते बी बैर राखोआ।

<sup>24</sup> “जे आऊँ तिना बीचे सेयो चमत्कारा रे काम नि करदा, जो ओरी किने नि कित्ते, तो सेयो पापी नि ठईरदे, पर एवे तो तिने आऊँ तिना चमत्कारा रे काम करदे ऊए देखी ला रा और तिने मांते और मेरे पिता दूँई ते बैर कित्तेया।<sup>25</sup> और ये तेवे ऊआ, ताकि से वचन पूरा ओ, जो तिना रे पवित्तर शास्तरो रे लिखी राखेया, ‘तिने मांते बेकार बैर कित्तेया।’<sup>26</sup> पर जेबे से मददगार आऊणा, जो मां तुसा गे पेजणा, मतलब-सच्चो रा आत्मा, जो पिते री तरफा ते निकली रा, तो तेस मेरी गवाई देणी<sup>27</sup> और तुसे बी गवा ए, कऊँकि तुसे शुरूओ तेई मां साथे रई रे।”

## 16

<sup>1</sup> <sup>28</sup> “यो गल्ला मैं तुसा खे तेबे बोलिया, ताकि तुसे केसी रे बी बईकावे रे नि आओ।<sup>2</sup> तिना तुसे प्रार्थना रे कअरो ते निकाली देणे, बल्कि से बखत आऊणा कि जेस केसी तुसे काणे, तेस समजणा कि आसे परमेशरो री सेवा करने लगी रे।<sup>3</sup> तिना एड़ा तेबे करना, कऊँकि तिने ना पिता जाणेया और ना माखे जाणोए।<sup>4</sup> पर यो गल्ला मैं तुसा खे तेबे बोलिया, ताकि जेबे तिना रा बखत आओ, तेबे तुसा खे याद आयी जाओ कि मैं तुसा खे पईले ई बोली ता था और जदुओ ते तुसे मेरे चले बणे मैं तुसा खे यो गल्ला तेबे नि बोलिया, कऊँकि आऊँ तुसा साथे था।



<sup>5</sup> “एवे आऊँ आपणे पेजणे वाले गे चली रा और तुसा बीचा ते कोई मांते नि पुछदा, तूँ केयी चली रा?’<sup>6</sup> पर मैं यो जो गल्ला तुसा खे बोली राखिया, तेवेई तो तुसा रा मन दुःखी ऊईगा रा।<sup>7</sup> तेबे बी आऊँ तुसा खे सच बोलूँआ कि मेरा जाणा तुसा री तई अच्छा ए, कऊँकि जे आऊँ नि जाऊँगा, तो

से मददगार तुसा गे नि आऊणा, पर जे आऊँ जाऊँगा, तो तेस तुसा गे पेजी देऊँगा।<sup>8</sup> तेस आयी की दुनिया खे पाप, परमेशरो री धार्मिकता और न्याय रे बारे रे दोषी ठराणा।

<sup>9</sup> “पापो रे बारे रे तेबे, कऊँक सेयो माँ पाँदे विश्वास नि करदे<sup>10</sup> और धार्मिकता रे बारे रे तेबे, कऊँक आऊँ पिते गे जाऊँआ और तुसा आऊँ फेर नि देखणा।<sup>11</sup> न्याय रे बारे रे तेबे, कऊँक दुनिया रा सरदार मतलब शैतान दोषी ठईरई ता रा।<sup>12</sup> माखे तुसा ते ओर बी गल्ला बोलणिया ए, पर एबु तुसे तिना खे सईन नि करी सकदे।<sup>13</sup> पर जेबे से, मतलब-सच्चो रा आत्मा आऊणा, तेबे तुसा खे सब सच्चो री बाट बताणी, कऊँक तेस आपणी तरफा ते नि बोलणा, पर जो कुछ तेस परमेशरो ते सुणना, सेई बोलणा और आऊणे वाली गल्ला तुसा गे बताणिया।<sup>14</sup> तेस मेरी महिमा करनी, कऊँक तेस मेरिया गल्ला बीचा ते लयी की तुसा खे बताणिया।<sup>15</sup> जो कुछ पिते राए, से सब मेरा ए, तेबेई तो मैँ बोलेया कि तेस मेरी गल्ला बीचा ते लयी कि तुसा खे बताणिया।

### 22:2 [REDACTED] [REDACTED] [REDACTED]

<sup>16</sup> “थोड़ी देरा तक तुसा आऊँ नि देखणा और तेबे थोड़ी देरा बाद आऊँ देखणा।”<sup>17</sup> तेबे तिना रे बऊत चलेया आपू बीचे बोलेया, “ये क्या ए, जो ये आसा खे बोलणे लगी रे, थोड़ी देर तुसा आऊँ नि देखणा और तेबे थोड़ी देर बाद आऊँ देखणा?” और ये इजी खे कऊँक आऊँ पिते गे जाऊँआ।”<sup>18</sup> तेबे तिने बोलेया, “ये थोड़ी देर, जो ये बोलणे लगी रे, क्या गल्ल ए? आसे नि जाणदे कि क्या लगी रे बोलणे?”

<sup>19</sup> यीशुए ये जाणी की कि यो मांते इजी रा मतलब पूछणा चाओए, तिना खे बोलेया, “क्या तुसे आपू बीचे मेरी इना गल्ला रे बारे रे पूछ-ताछ करोए कि थोड़ी देर बाद तुसा आऊँ नि देखणा और थोड़ी देर बाद आऊँ देखणा?”<sup>20</sup> आऊँ तुसा खे सच-सच बोलूँआ कि मेरे मरने ते बाद तुसे रोणे और दुःख करना, पर दुनिया रे लोका खुश ऊणा, तुसा खे दुःख ऊणा, पर जेबे आऊँ जिऊँदा ऊई की वापस आऊणा तो तुसा रा दुःख, खुशिया रे बदली जाणा।<sup>21</sup> जेबे जवाणस बच्चा पैदा करने लगोई, तो तेसा खे पीड ओई, कऊँक तेसा रे दुःखो री कअड़ी आयी पऊँछोई, पर जेबे से बालक जम्मी चुकोई, तो तेबे एसा खुशिया साथे कि दुनिया रे एक माणू पैदा ऊआ, तेस दुःखो खे फेर याद नि करदी।<sup>22</sup> तियाँ ई तुसा खे बी एबुए तक दुःख ए, पर आऊँ तुसा खे फेर मिलणा और तुसा रे मनो रे खुशी ऊणी और तुसा री खुशी कसी पनि छिनणी।<sup>23</sup> तेस दिने तुसा मांते कुछ नि पूछणा, आऊँ तुसा खे सच-सच बोलूँआ कि जे पिते ते कुछ मांगोगे, तो तेस मेरे नाओं ते तुसा खे देणा।<sup>24</sup> एबुए तक तुसे मेरे नाओं ते पिता ते कुछ नि मांगोया, परमेशरो ते माँगो तो तुसा खे मिलणा, ताकि तुसा री खुशी पूरी ऊई जाओ।

### [REDACTED] [REDACTED] [REDACTED]

<sup>25</sup> “मैँ तुसा खे यो गल्ला उदारणा रे बोलिया, पर से बखत आऊणा जेबे माँ तुसा खे फेर उदारणा रे नि बोलणा, बल्कि खुली की पिते रे बारे रे तुसा गे बताणा।<sup>26</sup> तेस दिने तुसा आपू मेरे नाओं ते पिते ते मांगणा, और आऊँ तुसा खे ये नि बोलदा कि आऊँ तुसा रिया तंई पिते ते प्रार्थना करूँगा।<sup>27</sup> कऊँक पिता परमेशर तो आपू बी तुसा ते प्यार राखोआ, कऊँक तुसे माँ साथे प्यार राखी राखेया और ये बी विश्वास किन्तेया कि आऊँ पिते री तरफा ते आयी रा।<sup>28</sup> आऊँ पिते ते निकली की दुनिया रे आयी रा, फेर दुनिया खे छाडी की पिते गे जाऊँआ।”

<sup>29</sup> तिना रे चलेया बोलेया, “देखो, एबे तो तुसे खुली की बोलणे लगी रे और कोई बुजाणी नि बोलदे।<sup>30</sup> एबे आसा खे पता लगी गा कि तुसे सब कुछ जाणोए और तुसा खे कोई मतलब निए कि कोई तुसा ते कुछ पूछो, इजी पाँदे आसे विश्वास करूँए कि तुसे परमेशरो री तरफा ते आयी रे।”<sup>31</sup> ये सुणी की यीशुए तिना खे बोलेया, “क्या एबे तुसे विश्वास करोए<sup>32</sup> देखो, से कअड़ी आऊणी, बल्कि आईगी री कि तुसा ओरे-पोरे ऊई की आपणी-आपणी बाटा रिये जाणा और आऊँ कल्ला छाडी देणा, तेबे बी आऊँ कल्ला नि रणा, कऊँक पिता माँ साथे ए।<sup>33</sup> मैँ तुसा खे यो गल्ला तेबे बोलिया, ताकि तुसा खे मांदे शान्ति मिलो, दुनिया रे तुसा खे क्लेश ओआ, पर इम्मतर राखो, मैँ एसा दुनिया रा सरदार शैतान जीती ला रा।”

## 17

१७:१०-१७:१५ : १७:१६-१७:१८

1 यीशु आपणे चलेल्या खे यो सब गल्ला बोलणे ते बाद आपणिया आखी सर्गों री तरफा खे चकिया और बोलेया, “ओ पिता! से बखत आईगा रा, आपणे पुत्रो री महिमा कर, ताकि पुत्र बी तेरी महिमा करो। 2 कऊँकि तैं तेसखे सबी प्राणिया पाँदे अक्क दित्तेया कि जो तैं तेसखे देई राखे, तिना सबी खे से अनन्त जीवन देओ 3 और अनन्त जीवन ये कि सेयो ताखे महान् सच्चे परमेशरो खे और यीशु मसीह खे, जो तैं पेजी राखेया, जाणो। 4 जो काम तैं माखे करने खे दित्तेया था, से काम पूरा करी की मैं तरतिया पाँदे तेरी महिमा किती। 5 एबे ओ पिता! तूँ आपू साथे मेरी महिमा, तेसा महिमा साथे कर, जो दुनिया री सृष्टिया ते पईले, मेरी तां साथे थी।

१७:१९-१७:२५ : १७:२६-१७:२८

6 “मैं तेरा नाओं तिना माणूआ गे प्रगट कित्तेया, जो तैं माखे दुनिया बीचा ते दित्ते, सेयो तेरे थे और तैं सेयो माखे दित्ते और तिने तेरे वचन मानी ले रे। 7 एबे तिना खे पता लगी गा रा कि जो कुछ तैं माखे देई राखेया, से सब तेरी तरफा ते ए। 8 कऊँकि जो उपदेश तैं माखे दित्ते, मैं सेयो तिना गे पऊँछ्छाए और तिने सेयो माने और सच-सच जाणी ला रा कि आऊँ तेरी तरफा ते आयी रा और विश्वास करी ला रा कि तैं ई आऊँ पेजी राखेया। 9 आऊँ तिना खे बिनती कऱूँआ, जो तैं माखे देई राखे, कऊँकि सेयो तेरे ए। दुनिया रे लोका खे आऊँ बिनती नि करदा। 10 और जो कुछ मेरा ए से सब कुछ तेरा ए, और जो तेरा ए से मेरा ए और इना ते मेरी महिमा प्रगट ऊई री।

11 “आऊँ एबे दुनिया रे नि रणा, पर मेरे चले एसा दुनिया रे रणे और आऊँ तांगे आऊणे लगी रा, ओ पवित्र पिता! आपणी तेसा सामर्था ते जो तैं माखे देई राखी, तिना री रक्षा कर ताकि सेयो आसा जेडे, एक ओ। 12 जेबे आऊँ तिना साथे था, तेबे मैं तेरे तेस नाओं ते, जो तैं माखे देई राखेया, तिना री रक्षा किती, मैं तिना री चौकसी किती और विनाशो रे पाऊए खे छाडी की तिना बीचा ते कोई बी नाश नि ऊआ, ताकि पवित्र शास्तरो री गल्ल पूरी ओ। 13 पर एबे आऊँ तांगे आऊँआ और इना गल्ला खे दुनिया रे रंदे ऊए बोलूँआ कि सेयो मेरी खुशी आपू रे पूरी करो। 14 मैं तेरा वचन तिना गे पऊँछ्छाई ता रा और दुनिया रे लोके तिना ते बैर कित्तेया, कऊँकि जियाँ आऊँ दुनिया रा नि ए, तियाँ ई सेयो बी दुनिया रे नि ए।

15 “आऊँ ये प्रार्थना नि करदा कि तूँ तिना खे दुनिया तेई चकी लो, पर ये कि तूँ तिना खे तेस दुष्टो ते बचाई कि राख। 16 जियाँ आऊँ दुनिया रा नि ए, तियाँ ई सेयो बी दुनिया रे नि ए। 17 सच्चो रे जरिए तिना खे पवित्र कर, तेरा वचन सच्चा ए। 18 जियाँ तैं आऊँ दुनिया रे पेजेया, तियाँ ई मैं बी सेयो दुनिया रे पेजे। 19 तिना रे फाईदे री खातर आऊँ आपणे आपू खे पवित्र कऱूँआ, ताकि सेयो बी सच्चो रे जरिए पवित्र करे जाओ।

१७:२९-१७:३५ : १७:३६-१७:३८

20 “आऊँ सिर्फ इना चलेया खेई बिनती नि करदा, पर तिना खे बी, जेस इना रे वचनो रे जरिए मां पाँदे विश्वास करना। 21 ताकि सेयो सब एक ओ, जियाँ तूँ ओ पिता मांदे ए और आऊँ तांदे ए, तियाँ ई सेयो बी आसा रे ओ, ताकि दुनिया रे लोक विश्वास करो कि तैं ई आऊँ पेजी राखेया। 22 से महिमा, जो तैं माखे देई राखी, मैं तिना खे दित्ती, ताकि सेयो तियाँ ई एक ओ, जियाँ आसे एक ए। 23 आऊँ तिना रे और तूँ मांदे, ताकि सेयो सिद्ध ऊई की एक ऊई जाओ और दुनिया जाणो कि तैं ई आऊँ पेजी राखेया और जेड़ा तैं मां साथे प्यार राखेया, तेड़ा ई तिना साथे प्यार राखेया। 24 ओ पिता! आऊँ चाऊँआ कि जो तैं माखे देई राखे, जेती आऊँ ए, तेती सेयो बी मां साथे ओ, ताकि सेयो मेरी तेसा महिमा खे देखो, जो तैं माखे देई राखी, कऊँकि तैं दुनिया री सृष्टिया ते पईले, मां साथे प्यार राखेया। 25 ओ धार्मिक पिता! दुनि ए आऊँ नि जाणेया, पर मैं तूँ जाणेया और इने चलेया बी जाणेया कि तैं ई आऊँ पेजी राखेया। 26 मैं तेरा नाओं तिना गे बताया और बतांदा रऊँगा कि जो प्यार ताखे मांते था, से तिना रे रओ और आऊँ तिना रे रऊँ।”

## 18

ⓂⓂⓂⓂⓂ ⓂⓂ ⓂⓂⓂⓂⓂⓂⓂⓂ

(ⓂⓂⓂⓂⓂ 26:47-56; ⓂⓂⓂⓂⓂ 14:43-50; ⓂⓂⓂⓂⓂ 22:47-53)

1 यीशु इना गल्ला बोली की आपणे चलेया साथे किद्रोगो रे नाले ते पार गये, तेती एक बगीचा था, जिदे सेयो और तिना रे चले गये। 2 तेसरा पकड़वाणे वाला यहूदा बी से जगा जाणो था, कऊँकि यीशु आपणे चलेया साथे तेती जाया करो था 3 तेवे यहूदा सिपाईया री एक पलटण, बड़े पुरोईत और फरीसिया री तरफा ते मन्दरो रे पईरदारा खे लयी की दिऊए, मशाला और अधियार लयी की तेती आया। 4 तेवे यीशुए तिना सबी गल्ला खे जो तिना पाँदे आऊणे वालिया थिया, जाणी की निकले और तिना खे बोलणे लगे, “केसखे टोलने लगी रे?” 5 तिने तिना खे जवाब दित्तेया, “यीशु नासरिये खे।” यीशुए तिना खे बोलेया, “आऊँ ई ये” और तिना खे पकड़वाणे वाला यहूदा बी तिना साथे खड़ी रा था। 6 यीशुए रे ये बोलदे ई, “आऊँ ईए,” सेयो पीछे आटी की जमीना पाँदे रूड़ी गे।

7 तेवे तिने फेर तिना ते पूछेया, “तुसे केसखे टोलोए?” तिने बोलेया, “यीशु नासरिये खे।” 8 यीशुए बोलेया, “आऊँ तो तुसा खे बोली चुकेया कि आऊँ ईए, जे माखे टोलने लगी रे तो इना लोका खे जाणे देओ।” 9 ये तेवे ऊआ ताकि से वचन पूरा ओ, जो तिने बोलेया था, “जो तैं माखे देई राखे, तिना बीचा ते मै एक पनि खोया।” 10 शमौन पतरसे जो तलवार तेसगे थी, खिंजी और प्रदान पुरोईतो रे दासो पाँदे चलाई की तेसरा दाँणा कान ई उड़ाईता, तेस दासो रा नाओं मलखुस था। 11 तेवे यीशुए पतरसो खे बोलेया, “आपणी तलवार म्यानो रे राखी दे, जो कटोरा मेरे पिते देई राखेया, क्या आऊँ तेस नि पीऊँ?”

ⓂⓂⓂⓂⓂ ⓂⓂ ⓂⓂⓂⓂⓂⓂⓂⓂ

12 तेवे सिपाईए, सूबदार और यहूदिया रे मन्दरो रे पईरदारो यीशु पकड़ी की बानी ते। 13 और पईले तिना खे हन्ने गे लयी गे, कऊँकि से तेस सालो रे प्रदान पुरोईत कैफे रा सऊरा था। 14 ये सेई कैफा था, जिने यहूदिया खे सला दित्ती थी कि आसा रे लोका री खातर एक मांणूए रा मरना ठीक ए।

ⓂⓂⓂⓂⓂ ⓂⓂ ⓂⓂⓂⓂⓂⓂⓂⓂ

(ⓂⓂⓂⓂⓂ 26:69,70; ⓂⓂⓂⓂⓂ 14:66-68; ⓂⓂⓂⓂⓂ 22:55-57)

15 शमौन पतरस और एक ओर चेला बी यीशुए पीछे-पीछे चली पड़े। ये चेला प्रदान पुरोईतो रा जाणने वाला था और यीशुए साथे प्रदान पुरोईतो रे आँगणो रे गया। 16 पर पतरस द्वारो गे खड़े रा रया, तेवे से दूजा चेला, जो प्रदान पुरोईतो री जाण-पछेयाणा रा था, बारे निकलेया और द्वारपालिना खे बोली की पतरसो खे पीतरे ली आया। 17 तेसे दासिये, जो द्वारपालिनी थी, पतरसो खे बोलेया, “क्या तूँ बी एस मांणूए रे चलेया बीचा ते ए?” तिने बोलेया, “आऊँ निए।” 18 दास और मन्दरो रा पईरदार ठण्डी रे मारे आग वाली की खड़ी की सेखणे लगी रे थे और पतरस बी तिना साथे खड़ी की आग सेखणे लगी रा था।

ⓂⓂⓂⓂⓂ ⓂⓂⓂⓂⓂⓂⓂⓂ ⓂⓂ ⓂⓂⓂⓂⓂⓂⓂⓂⓂ ⓂⓂ ⓂⓂⓂⓂⓂⓂⓂⓂⓂ

(ⓂⓂⓂⓂⓂ 26:59-66; ⓂⓂⓂⓂⓂ 14:55-64; ⓂⓂⓂⓂⓂ 22:66-71)

19 तेवे प्रदान पुरोईते यीशुए ते तिना रे चले और तिना रे उपदेशो रे बारे रे पूछेया। 20 यीशुए जवाब दित्तेया, “मैं दुनिया रे खुली की गल्ला कित्तिया, मैं प्रार्थना रे कअरो रे और मन्दरो रे, जेती सब यहूदी कट्टे ओया करो थे, सदा उपदेश दित्तेया और चोरिए कुछ नि बोलेया। 21 तूँ मांते कऊँ पूछेया? सुणने वालेया ते पूछ कि मैं तिना खे क्या बोलेया? देख, सेयो जाणोए कि मैं क्या-क्या बोलेया?” 22 जेवे तिने ये बोलेया, तेवे मन्दरो रे पईरदारा बीचा ते एक ई जणे, जो नड़े था खड़े रा, यीशुए खे थप्पड़ बाई की बोलेया, “क्या तूँ प्रदान पुरोईतो खे ईयां जवाब देआ।” 23 यीशुए तेसखे बोलेया, “जे मैं बुरा बोलेया, तो तेसा बुराईया पाँदे गवाई दे, पर जे खरा बोली राखेया, तो माखे कऊँ बाणे लगी रा?” 24 हन्ने यीशु बानेया रा कैफे प्रदान पुरोईतो गे पेजी ता।

ⓂⓂⓂⓂⓂ ⓂⓂ ⓂⓂⓂⓂⓂⓂⓂⓂ ⓂⓂ ⓂⓂⓂⓂⓂ

(ⓂⓂⓂⓂⓂ 26:71-75; ⓂⓂⓂⓂⓂ 14:69-72; ⓂⓂⓂⓂⓂ 22:58-62)



25 शमौन पतरस खड़े रा आग सेखणे लगी रा था। तेबे तिने तेसखे बोलेया, “क्या तूँ बी एसरे चेलेया बीचा ते ए?” तिने बोलेया, “आऊँ नि ए।” 26 प्रदान पुरोईते रे दासो बीचा ते एकी जणे जो तेसरे टब्वरो बीचा ते था, जेसरा कान पतरसे बाडीता था, बोलेया, “क्या मैं तूँ यीशुए साथे बगीचे रे नि देखेया था?” 27 पतरसे फेर ना करी ती और तेबुई मुर्गे बांग दित्ती।

~~~~~

(~~~~~ 27:1,2,11-14; ~~~~~ 15:1-5; ~~~~~ 23:1-5)

28 तेबे सेयो यीशुए खे कैफे गे ते राज्यपालो रे मुख्यालय रे लयी गे और प्यागा रा बखत था, पर सेयो आपू पीतरे नि गये, ताकि अशुद्ध ना ओ, पर फसह रे त्योआरो री रोटी खाई सको। 29 तेबे पिलातुस तिना गे बारे निकलेया और बोलेया, “तुसे एस मांणूए पाँदे किजी गल्ला रा दोष लगाओए?” 30 तिने जवाब दित्तेया, “ये मांणू अपराधी ए, तेबेई तो आसे एसखे तांगे लई की आई रे।” 31 पिलातुसे तिना खे बोलेया, “तुसेई एसखे लयी जाई की आपणे बिधानो रे मुताबिक न्याय करो।” यहूदिये अगुवे तेसखे बोलेया, “आसा खे अक्क नि ए कि केसी रा प्राण लऊँ।” 32 ये तेबे ऊआ ताकि यीशुए री से गल्ल पूरी ओ, जो तिने ये साअरा करदे ऊए बोली थी कि तेसरा मरना केड़ा ऊणा।

33 तेबे पिलातुस फेर राज्यपालो रे मुख्यालय रे पीतरे गया और यीशुए खे बुलाई की तिना ते पूछेया, “क्या तूँ यहूदिये रा राजा ए?” 34 यीशुए बोलेया, “क्या तूँ ये गल्ल आपणी तरफा ते बोलणे लगी रा या ओरी मेरे बारे रे तांगे बोली?” 35 पिलातुसे बोलेया, “तुसे क्या सोचोए आऊँ यहूदी ए? तेरी जातिया वाले और बड़े पुरोईते ई तूँ मेरे आधो रे देई राखेया। तँ एड़ा क्या करी राखेया?” 36 यीशुए जवाब दित्तेया, “मेरा राज्य एसा दुनिया रा नि ए, जे मेरा राज्य एसा दुनिया रा ऊँदा, तो मेरे सेवक लड़दे और माखे यहूदी अगुवो रे आधो रे नि देंदे, पर एबे मेरा राज्य एधो रा नि ए।” 37 पिलातुसे तिना खे बोलेया, “तो क्या तूँ राजा ए?” यीशुए बोलेया, “तूँ आपू बोलेया कि आऊँ राजा ए मैं तेबेई तो जन्म लया और तेबेई तो दुनिया रे आयी रा कि सच्चो री गवाई देऊँ, जो कोई सच्चाईया ते प्यार राखोआ, से मेरा शब्द सुणोआ।” 38 पिलातुसे बोलेया, “तो सच क्या ए?”

~~~~~

(~~~~~ 27:15-31; ~~~~~ 15:6-20; ~~~~~ 23:13-25)

ये बोली की से फेर यहूदी अगुवे गे चली गा और तिना खे बोलेया, “आऊँ तो तेसदे कोई दोष नि पाँदा।” 39 पर तुसा री ये रवाज ए कि आऊँ फसह रे त्योआरो रे तुसा खे एक मांणू छाडी देऊँ, तेबे क्या तुसे चाओए कि आऊँ तुसा खे यहूदिया रा राजा छाडी देऊँ? 40 तेबे तिने चींगी की बोलेया, “एसखे नि पर आसा खे बरअब्वे खे छाडी दे।” जो हुइदंग और अत्या री बजअ ते जेला रे पाया था।

## 19

~~~~~

1 तेबे पिलातुसे यीशुए खे कोड़े लगवाए। 2 सिपाईए कांडेया रा मुकट बूणी की तिना रे सिरा पाँदे राखी ता और तिना खे बैगणी टाले पईनाए। 3 और तिना गे आयी-आयी की बोलणे लगे, “ओ यहूदिया रे राजा प्राणाम!” और तिना खे थप्पड़ बाए। 4 तेबे पिलातुसे फेर बारे निकली की लोका खे बोलेया, “देखो, आऊँ तेसखे तुसा गे फेर बारे ल्याऊँआ, ताकि तुसे जाणो कि आऊँ तेसदे कोई दोष नि पाँदा।” 5 तेबे यीशु कांडेया रा मुकट और बैगणी टाले पणयाई की बारे निकयाले और पिलातुसे बोलेया, “देखो, ये मांणू।” 6 तेबे बड़े पुरोईते और मन्दरो रे पईरदारो ए सेयो देखे और जोरे की बोलेया, “एसखे कूरूसो पाँदे चढाओ, कूरूसो पाँदे।” पिलातुसे तिना खे बोलेया, “तुसेई एसखे लयी की कूरूसो पाँदे चढाओ, कऊँकि आऊँ एसदे कोई दोष नि पाँदा।”

7 यहूदिये अगुवे तेसखे बोलेया, “आसा रा बी बिधान ए और म्हारे बिधानो रे मुताबिक, ये कूरूसो पाँदे चढाणे जोगा ए कऊँकि तिने आपू खे परमेशरो रा पुत्र बताया।” 8 जेबे पिलातुसे ये गल्ल सुणी,

तेबे ओर बी डरीगा।⁹ तेबे फेर राज्यपालो रे मुख्यालय रे पीतरे गया और यीशुए खे बोलेया, “तूँ केथो राए?” पर यीशुए तेसखे कोई बी जवाब नि दित्तेया।¹⁰ पिलातुसे तिना खे बोलेया, “मांगे कऊँ नि बोलदा? क्या तूँ नि जाणदा कि ताखे छाडणे रा अक्क मांगे ए और ताखे कुरूसो पाँदे चढाणे रा बी?”¹¹ यीशुए बोलेया, “ताखे परमेशरो री तरफा ते ए अक्क देई राखेया, तेबेई तेरा मां पाँदे अक्क ए, जिने आऊँ तेरे आथो रे पकड़वाया, तेसरा पाप जादा ए।”

¹² तेबे पिलातुसे सेयो छाडणा चाए, पर यहूदिये चींगी-चींगी की बोलेया, “जे तूँ एसखे छाडी देगा, तो तेरी भक्ति कैसरो री तरफा खे निए, जो कोई आपणे आपू खे राजा बणाओआ, से कैसरो रा सामणा करोआ।”¹³ इना गल्ला सुणी की पिलातुस यीशुए खे बारे ल्याया और तेती एक चबूतरा था, जेतेखे इब्रानिया रे गब्वता बोलोए, और न्याय आसणो रे बैठेया।¹⁴ ये फसह रे त्योआरो री त्यारिया रा दिन था और दोपईरो रे तकरीबन था, तेबे तिने यहूदिये खे बोलेया, “देखो, येईए तुसा रा राजा।”¹⁵ पर सेयो चींगे और बोलेया, “लयी जा, लयी जा, एसखे कुरूसो पाँदे चढाओ।” पिलातुसे तिना खे बोलेया, “क्या आऊँ तुसा रे राजे खे कुरूसो पाँदे चढाऊँ?” बड़े पुरोईते जवाब दित्तेया, “कैसरो खे छाडी की आसा रा कोई राजा निए।”¹⁶ तेबे पिलातुसे यीशु कुरूसो पाँदे चढाणे खे तिना रे आथो रे देईते, ताकि तिना खे कुरूसो पाँदे चढाई देओ।

ⓂⓂⓂⓂ ⓂⓂⓂⓂ ⓂⓂⓂⓂ

(ⓂⓂⓂⓂ 27:32-44; ⓂⓂⓂⓂ 15:21-32; ⓂⓂⓂⓂ 23:26-43)

¹⁷ तेबे सेयो यीशुए खे लयी गे। और सेयो आपणा कूरुस चकी की तेसा जगा तक गये, जेतेखे खोपड़िया री जगा बोलो थे और इब्रानिया रे गुलगुता।¹⁸ तेती तिने सेयो और तिना साथे दो ओर मांणू कुरूसो पाँदे चढाए, एकी खे ओरे और दूजे खे पारे और बीचे यीशु।¹⁹ तेबे पिलातुसे एक दोष पत्र लिखी की कुरूसो पाँदे लगाईता और तिदे लिखी राखेया था, “यीशु नासरी यहूदिया रा राजा।”²⁰ ये दोष पत्र बऊत यहूदिये पढ़ेया, कऊँकि से जगा, जेती यीशु कुरूसो पाँदे चढाए थे से जगा यरूशलम नगरो ते नेडे ई थी और पत्र, इब्रानी, लतीनी और यूनानिया रे लिखेया रा था।²¹ तेबे यहूदिया रे बड़े पुरोईते पिलातुसो खे बोलेया, “यहूदिया रा राजा नि लिख,” पर ये लिख कि तिने बोलेया, “आऊँ यहूदिया रा राजा ए।”²² पिलातुसे बोलेया, “मैं जो लिखी ता, से लिखी ता।”

²³ जेबे सिपाई यीशुए खे कुरूसो रे चढाई चुके, तेबे तिना रे टाले लयी की चार इस्से कित्ते, हर सिपाईए खे एक इस्सा, तेबे तिने कुरता बी लया पर कुरता बिना सलाईया ते ऊबो ते लयी की ऊँदो तक बुणेया रा था।²⁴ तेबे तिने आपू बीचे बोलेया, “आसे एसखे फाइन राणी देऊँए, पर एते पाँदे पर्ची पाऊँए कि ये केसरा ऊणा। ये तेबे ऊआ कि पवित्र शास्तरो री गल्ल पूरी ओ कि “तिने आपू बीचे मेरे टाले बांडी ते

और मेरे टालेया पाँदे पर्ची पायी,”

²⁵ तो सिपाईए एडा ई कितेया। यीशुए रे कुरूसो गे तिना री आम्मा और तेसा री बईण, क्लोपासो री लाडी मरियम और मरियम मगदलिनी खड़ी रिया थिया।²⁶ जेबे यीशुए आपणी आम्मा और तेस चेले खे जेसते से प्यार राखो था, नेडे खडे रा देखेया तो आपणी आम्मा खे बोलेया, “ओ जवाणसे, देख, ये तेरा पाऊँए।”²⁷ तेबे तिने चेले खे बोलेया, “ये तेरी आम्मा ए।” तेबे तेसी बखते से चेला तेसा खे आपणे कअरे लयी गा।

ⓂⓂⓂⓂ ⓂⓂ ⓂⓂⓂ

(ⓂⓂⓂⓂ 27:45-56; ⓂⓂⓂⓂ 15:33-41; ⓂⓂⓂⓂ 23:44-49)

²⁸ इजी ते बाद यीशुए ये जाणी की कि एबे सब कुछ ऊईगा, ताकि पवित्र शास्तरो री गल्ल पूरी ओ, तिने बोलेया, “आऊँ त्याया ए।”²⁹ तेती एक सिरके रा पांडा परी की था राखेया रा, तेबे तिने स्पंजो रा टाला सिरके रे सेडेया और डण्डे पाँदे राखी की तिना रे मुँओ रे लगाया।³⁰ जेबे यीशुए से सिरका चाखेया, तेबे बोलेया, “पूरा ऊआ” और सिर चुकाई की प्राण छाडी ते।

ⓂⓂⓂⓂ ⓂⓂ ⓂⓂⓂ

31 तेबे से त्यारिया रा दिन था, यहूदिये पिलातुसो ते बिनती किती कि तिना री खुटिया तोड़ी देओ और तिना खे ऊतारी देओ, ताकि आरामो रे दिने सेयो कुरूसो रे नि रओ, कऊँकि ये आरामो रा दिन बड़ा दिन था। 32 तेबे सिपाईए आयी की पईले रिया खुटिया तोड़िया, तेबे दजे रिया, जो तिना साथे कुरूसो रे चढ़ाई राखे थे। 33 पर जेबे यीशुए गे आयी की देखेया कि ये मरी चुकेया रा, तो तिना री खुटिया नि तोड़िया। 34 पर सिपाईया बीचा ते एकी जणे एक बड़छा बखिया रे कुसाया और तेते बीचा ते तेबुई खून और पाणी निकलेया। 35 जिने ये देखेया, तिने ई ये गवाई दित्ती और तेसरी गवाई सच्ची ए और से जाणोआ कि सच बोलणे लगी रा, ताकि तुसे बी विश्वास करो। 36 यो गल्ला तेबे ऊईया, ताकि पवित्तर शास्त्रो रा से वचन पूरा ओ, “तेसरी कोई बी आइडी तोड़ी नि जाणी।” 37 फेर एक ओरी जगार रे ये लिखी राखेया, “जिने से ऊजी राखेया, तिना पाँदे नजर करनी।”

~~~~~

(~~~~~ 27:57-61; ~~~~~ 15:42-47; ~~~~~ 23:50-56)

38 इना गल्ला ते बाद अरिमतियाह गांव रा यूसुफे, जो यीशुए रा चेला था, पर यहूदी अगुओ रे डरो रे मारे से एसा गल्ला खे छिपाए रे राखो था, तिने पिलातुसो ते बिनती किती कि आऊँ यीशुए री लोथ लयी जाऊँ; और पिलातुसे तेसरी बिनती सुणी और से आयी की तिना री लोथ लयी गा। 39 नीकुदेमुस बी, जो पईले यीशुए गे राथियो खे गया था, पंजा सेरो रे तकरीबन मिलेया रा गन्धरस और एलवा ल्याया। 40 तेबे तिने यीशुए री लोथ लयी और यहूदिया रे दबाणे री रवाजा रे मुताबिक सेयो खुशबदार चीजा साथे कफनो रे लपेटेया। 41 तेसा जगार रे जेती यीशु कुरूसो पाँदे चढ़ाए थे, एक बगीचा था और तेस वागीचे रे एक नयी कवर थी, जेती कदी कोई नि राखेया था। 42 तेबे यहूदिया री त्यारिया रे दिनो री बजअ ते, तिने यीशुए री लोथ तिदे ई राखी, कऊँकि से कवर नेड़े थी।

## 20

~~~~~

(~~~~~ 28:1-8; ~~~~~ 16:1-8; ~~~~~ 24:1-2)

1 अफते रे पईले दिने मरियम मगदलनी कुछ ओर जवाणसा साथे प्यागा ई न्हरे-न्हरे कवरा पाँदे आयी और तिने पात्थर कवरा पाँदा ते आटेया रा देखेया। 2 तेबे सेयो दौड़ी की शमौन पतरस और बाकि चलेया गे गईया, जिना खे यीशु प्यार करो थे, और बोलेया, “सेयो प्रभुए रे शरीरो खे कवरा ते निकाली की लयी गे रे और आसे नि जाणदिया कि तिना खे केयी लयी गे रे।” 3 तेबे पतरस और दूजा चेला निकली की कवरा गे गये। 4 और दोनो साथे-साथे दौड़ने लगी रे थे, पर दूजा चेला पतरसो ते आगे दौड़ी की कवरा पाँदे पईले पऊँछेया। 5 तिने नपी की टाले ई पड़े रे देखे, पर से पीतरे नि गया। 6 तेबे शमौन पतरस तेसते पीछे-पीछे पऊँछेया और कवरा रे पीतरे गया और टाले पड़े रे देखे। 7 और से टाल्ला जो तिना रे सिरों रे था बानेया रा, से टालेया साथे नि था, पर एक लग जगार रे था लपेटेया रा। 8 तेबे दूजा चेला बी, जो कवरा पाँदे पईले पऊँछेया था, पीतरे गया और देखी की विश्वास कितेया कि यीशु मेरेया रे बीचा ते जिऊँदा ऊईगा रा। 9 सेयो एबुए तक पवित्तर शास्त्रो री गल्ल नि समजे थे कि से मेरेया रे बीचा ते जिऊँदा ऊगा था। 10 तेबे सेयो चले आपणे कअरो खे वापस ऊईगे।

~~~~~

(~~~~~ 28:9-10; ~~~~~ 16:9-11)

11 पर मरियम रोंदी ऊई कवरा गे ई बारे खड़ी री रई और रोंदे-रोंदे कवरा खे चूकी की देखदी रई। 12 तेबे तेसे दो स्वर्गदूत सफेद टाले पईने रे, एक सरयाणे रे और दूजा पाईदिया रे बैठे रे देखे, जेती यीशुए री लोथ थी पड़ी री। 13 तिने तेसा खे बोलेया, “ओ जवाणसे तूँ कऊँ लगी री रोणे?” तेसे तिना खे बोलेया, “सेयो मेरे प्रभुए रे शरीरो खे चकी की लयी गे रे और आऊँ नि जाणदी कि सेयो केयी लयी गे रे।” 14 ये बोली कि से पीछे मुड़ी और यीशु खड़े रे देखे और पछयाणे नि कि यीशु ए। 15 यीशुए तेसा खे बोलेया, “ओ जवाणसे तूँ कऊँ लगी री रोणे? केसखे टोलई?” तेसे माली

समझी की तिना खे बोलेया, “ओ महाराज! जे तुसे तिना रा शरीर चकी की लयी गे रे तो मांगे बताई दे कि केयी राखी राखे और आऊँ तिना खे लयी जाऊँगी।” 16 यीशुए तेसा खे बोलेया, “मरियम!” तेसे पीछे मुड़ी की तिना खे इब्रानी पाषा रे बोलेया, “रब्बुनी!” मतलब-ओ गुरु! 17 यीशुए तेसा खे बोलेया, “माखे नि छुँ, कऊँकि आऊँ एबुए तक ऊबे पिते गे नि जाई रा, पर मेरे पाईया गे जाई की तिना खे बोली दे कि आऊँ आपणे पिते गे और तुसा रे परमेशरो गे ऊबे जाऊँआ।” 18 मरियम मगदलिनिये जाई की चेलैया गे बताया, “मैं परभु देखे, तिने मां साथे गल्ला कित्तिया।”

**28:16-20; 16:14-18; 24:36-49**

(28:16-20; 16:14-18; 24:36-49)

19 तेसी दिने, जो अफते रा पईला दिन था, साँजके बखते, जेबे तेथो रे द्वार, जेती चले थे, यहूदी अगुओ रे डरो रे मारे बंद थे, तेबे यीशु आए और बीचे खड़े ऊई की तिना खे बोलेया, “तुसा खे शान्ति मिलो।” 20 और ये बोली की तिने आपणे आथ और आपणी पसली तिना खे दखाए, तेबे चले यीशुए खे देखी की खुश ऊए। 21 यीशुए तिना खे फेर बोलेया, “तुसा खे शान्ति मिलो; जिंयाँ पिते आऊँ पेजी राखेया, तियाँ ई आऊँ बी तुसा खे दुनिया रे पेजुँआ।” 22 ये बोली की तिने तिना पाँदे फूकर दिती और बोलेया, “पवित्तर आत्मा लओ। 23 जिना रे पाप तुसे माफ करो, तिना खे माफ ऊईगे और जिना रे पाप तुसे माफ नि करोगे, तिना रे पाप माफ नि ऊणे।”

**24:36-49**

24 पर बारा चेलैया बीचा ते एक, मतलब-थोमा, जेसखे दिदुमुस बी बोलोए, जेबे यीशु आए, तो से तिना साथे नि था। 25 जेबे ओर चले तेसखे बोलणे लगे, “आसे यीशु देखे,” तेबे तिने तिना खे बोलेया, “जदुओ तक आऊँ तिना रे आथो रे परेगा रे छेद नि देखी लऊँ और परेगा रे छेदो रे आपणी गूठी और तिना री पसलिया रे आपणा आथ नि पाई लऊँ, तदुओ तक आऊँ विश्वास नि करदा कि से मरेया रे बीचा ते जिऊँदा ऊईगा रा।”

26 एक अफते ते बाद फेर तिना रे चले पीतरे थे और थोमा तिना साथे था और द्वार बंद थे, तेबे यीशुए आयी की और बीचे खड़ी की बोलेया, “तुसा खे शान्ति मिलो।” 27 तेबे तिने थोमे खे बोलेया, “आपणी गूठी ओरे ल्याई की मेरी पसलिया रे पा और अविश्वासी नि, पर विश्वासी बण।” 28 ये सुणी की थोमे बोलेया, “ओ मेरे परभु! ओ मेरे परमेशर!” 29 यीशुए तेसखे बोलेया, “तैं तो माखे देखी की विश्वास करी राखेया, पर धन्य सेयो, जिने बिना देखे विश्वास कित्तेया।”

**21:7**

30 यीशुए ओर बी बऊत चमत्कार चेलैया सामणे दखाए, जो एसा कताबा रे लिखी नि राखे। 31 पर यो तेबे लिखे, ताकि तुसे विश्वास करो कि यीशु ई परमेशरो रा पुत्र मसीह ए, और विश्वास करी की तिना रे नाओं ते अनन्त जीवन पाओ।

## 21

**21:7**

1 इना गल्ला ते बाद यीशु तिविरियास समुद्रो रे कनारे आपणे चेलैया सामणे आए और ईयाँ सामणे आए, 2 शमौन पतरस और थोमा, जेसखे दिदुमुस बी बोलोए और गलीलो रे काना नगरो रा नतनएल और जब्दिए रे पाऊ और यीशुए रे चेलैया बीचा ते दो ओर जणे कट्टे थे। 3 शमौन पतरसे तिना खे बोलेया, “आऊँ मछलिया पकड़ने जाऊँआ।” तिने बोलेया, “आसे बी तां साथे चलूए।” तेबे सेयो निकली की किस्तिया रे चढ़े, पर तेसा राती कुछ नि पकड़ेया।


4 आगले दिने प्याग ऊँदे ई यीशु कनारे पाँदे थे खड़े रे, पर चेलैया नि पछयाणे कि यीशु ए। 5 तेबे यीशुए तिना खे बोलेया, “ओ बालको! क्या तुसा गे कुछ खाणे खे आए?” तिने बोलेया, “ना।” 6 तिने तिना खे बोलेया, “किस्तिया रे दाँणी तरफा खे जाल पाओ, तो मिलणा।” तेबे तिने जाल पाया और एबे बऊत मछलिया ऊणे री बजअ ते जाल खिंजी नि सके। 7 तेबे तिने चले जेस साथे यीशु प्यार राखो थे, पतरसो खे बोलेया, “थे तो परभु ए।” शमौन पतरसे ये सुणी की कि यीशु ए,

लको रे टाला बानी ला, कऊँकि से नांगा था और समुद्रो रे छवाल खाई ती। कऊँकि से यीशु खे मिलणे खे बडा उताऊला था <sup>8</sup> पर ओर चले डोंगिया पाँदे मछलिया रा फरेया रा जाल खीजदे ऊए आए, कऊँकि सेयो कनारे ते बऊत दूर नि थे, पर दो सौ की आथ दूर थे।

<sup>9</sup> जेबे सेयो कनारे पाँदे पऊँछे, तेबे तिने सुलगे रे फेऊओ पाँदे मछली देखी और रोटी देखी। <sup>10</sup> यीशुए तिना खे बोलेया, “जो मछलिया तुसे एबु पकड़ी राखिया, तिना बीचा ते कुछ ल्याओ।” <sup>11</sup> शमौन पतरसे डोंगिया पाँदे चढ़ी की एक सौ तिरपन बड़िया मछलिया रा परेया रा जाल कनारे पाँदे खीजिया और इतणिया मछलिया ऊँदे ऊए बी जाल नि फटेया। <sup>12</sup> यीशुए तिना खे बोलेया, “आओ रोटी खाओ।” पर चलेया बीचा ते केसी खे बी याओ नि ऊआ कि तिना ते पूछो, “तू कूणे?” कऊँकि सेयो जाणो थे कि यो यीशु ए। <sup>13</sup> यीशुए आगे बढ़ी की रोटी लयी की तिना खे दिती और तियाँ ई मछली बी। <sup>14</sup> ये तीजी बार था कि यीशुए मरने ते बाद चलेया खे दर्शन दिते।



<sup>15</sup> रोटी खाणे ते बाद यीशुए शमौन पतरसो खे बोलेया, “ओ शमौन, यूहन्ने रे पाऊ! क्या तू इना ते जादा माखे प्यार करेया?” तिने बोलेया, “आ प्रभु, तुसे तो जाणोए कि आऊँ तुसा खे प्यार करूँआ।” तिने तेसखे बोलेया, “मेरे मिन्टूआ खे चरा।” <sup>16</sup> तिने फेर दूजी बार तेसखे बोलेया, “ओ शमौन, यूहन्ने रा पाऊ! क्या तू माखे प्यार करेया?” तिने बोलेया, “आ प्रभु, तुसे तो जाणोए कि आऊँ तुसा खे प्यार करूँआ।” तिने तेसखे बोलेया, “मेरी पेडा री रखवाली कर।” <sup>17</sup> तिने तीजी बार तेसखे बोलेया, “ओ शमौन, यूहन्ने रा पाऊ! क्या तू माखे प्यार करेया?” पतरस उदास ऊईगा कि तिने तीजी बार मांते येई गल्ल पूछी ली। तेबे तिने बोलेया, “ओ प्रभु! तुसे तो सब कुछ जाणोए कि आऊँ तुसा खे प्यार करूँआ।” यीशुए तेसखे बोलेया, “मेरी पेडा खे चरा।” <sup>18</sup> आऊँ ताखे सच-सच बोलूँआ कि जेबे तू जवान था, तेबे आपणा लक बानी की जेती चाओ था, तेती कूमो-फिरो था, पर जेबे तू स्थाणा ऊणा, तेबे दूजे आपणे आथ लांबे करने और तेरा लक बानी की जेती से चाओगा, तू लयी जाणा।” <sup>19</sup> तिने इना गल्ला ते जताई ता कि पतरसे केड़िया मौता साथे परमेशरो री महिमा करनी। तेबे तिने तेसखे बोलेया, “मां पीछे आईजा।”



<sup>20</sup> पतरसे मुड़ी की से चेला देखेया, जेस साथे यीशु प्यार राखो थे, और जिने रोटी खांदे ऊए तिना री छातिया री तरफा खे चूकी की पूछेया था, “ओ प्रभु! तुसा खे पकड़वाणे वाला कूणे?” <sup>21</sup> तेसखे देखी की पतरसे यीशुए खे बोलेया, “ओ प्रभु! एसरा क्या आल ऊणा?” <sup>22</sup> यीशुए तेसखे बोलेया, “जे आऊँ चाऊँ कि ये मेरे वापस आऊणे तक रूकेया रा रओ, तो ताखे क्या ए? तू मां पीछे आईजा।” <sup>23</sup> तेबेई तो पाईया बीचे ये गल्ल फैली गी कि से चेला नि मरना, पर यीशुए ये नि बोलेया कि ये नि मरना, पर ये कि “जे आऊँ चाऊँ कि ये मेरे वापस आऊणे तक रूकेया रा रओ, तो ताखे क्या ए?”



<sup>24</sup> ये सई चेला ए जो इना गल्ला री गवाई देओआ और जिने यो गल्ला लिखी राखिया और आसे जाणूँए कि तेसरी गवाई सच्ची ए। <sup>25</sup> ओर बी बऊत सारे काम ए, जो यीशुए किते, जे सेयो एक-एक करी की लिखे जादे, तो आऊँ समजूँआ कि जो कतावा बी लिखिया जांदिया और सेयो दुनिया रे बी नि औडणिया थिया।

## प्रेरितों के काम पवित्र आत्मे प्रेरिता के जरिए सारी दुनिया के सुसमाचार पऊँछाया भूमिका

प्रेरितों के कामों का वर्णन लूका रचित सुसमाचारों में आगला वर्णन है। इजीरा खास मकसद से बताता है कि यीशुए से शुरूआत के मानने वाले पवित्र आत्मा की अगुवाईया से, यीशुए के बारे में सुसमाचारों से यरूशलेम, यहूदिया, सामरिया और तरतिया के छोड़कर तक कियौं पऊँछाया 1:8। ये मसीही आन्दोलनों का खुलासा है जो यहूदी लोका बीच शुरू हुआ और बढ़ी की सारे देशों के लोका का विश्वास बणीगा। लेखक इजी गल्ला का भी तयान राखोआ कि तेससे पढ़ने वालेया से ये निश्चा ऊई जाओ कि मसीही लोक रोमी साम्राज्य रिया तई एक विद्रोही राजनैतिक शक्ति नि थी और मसीही विश्वास यहूदी धर्मों की पूर्ति था।

प्रेरितों के कामों की कताबा से तीन पाअगों के बांडी सकोए, जो लगातार बढ़ते क्षेत्रों से दखाओआ, जिंदे यीशु मसीह के सुसमाचारों का प्रचार करना और कलीसिया बनाणा : (1) यीशुए के स्वर्गों के जाणे के बाद यरूशलेमों के मसीही आन्दोलनों की शुरूआत; (2) पलस्तीनों के ओरी पाअगा के इजीरा का प्रसार और (3) भूमध्य सागरो के देशों के रोम तक इजीरा का प्रसार।

प्रेरितों के कामों की एक खास खासियत है पवित्र आत्मा का काम करना। से पिन्तेकुसो के दिने यरूशलेमों के कट्टे ऊए के विश्वासिया पई बड़ी सामर्था साथे उतरोआ और एते कताबा के लिखी की घटना के बखते मण्डलिया और अगुवे का मार्गदर्शन करोआ और तिना से सामर्थ देओआ। प्रेरितों के कामों के दिने के कई उपदेशों के शुरूआतों के मसीही संदेशों का सार प्रस्तुत करी राखेया और इंदे लिखी की घटना विश्वासिया की जिन्दगिया के और मण्डलिया की सहभागिता के एते संदेशों की सामर्था से प्रगट करोई।



गवाईया की खातर तयारी 1:1-26

क-यीशुए की आखरी आज्ञा और प्रतिज्ञा 1:1-14

ख-यहूदा का वारिस 1:15-26

यरूशलेमों के गवाई 2:1-8:3

यहूदिया और सामरिया के गवाई 8:4-12:25

पौलुसों का सेवाकार्य 13:1-28:31

क-पईली प्रचारों का सफर 13:1-14:28

ख-यरूशलेमों के सम्मेलन 15:1-35

ग-दूजी प्रचारों का सफर 15:36-18:22

घ-तीजे प्रचारों का सफर 18:23-21:16

च-यरूशलेम, कैसरिया और रोमों के बंदी पौलुस 21:17-28:21



1 ओ श्रीमान, थियुफिलुस! मैं पईली कताब तिना सबी गल्ला के बारे में लिखी, जो प्रभु यीशु शुरूआत के करदा और सिखांदा रया।<sup>2</sup> जदुओ तक से परमेशरो के जरिए स्वर्गों के नि चकेया गया, तदुओ तक तेसरे स्वर्गों के चकणे के पईले, तिने आपणे चुणे के प्रेरिता से पवित्र आत्मा के जरिए आज्ञा देंदा रया।<sup>3</sup> और यीशुए दुःखों के और मौता के बाद, बऊत ई पक्के सबूता साथे आपणे आपू से प्रेरिता के जिऊंदा दखाया और चाली दिनों तक सेयो तिना से दिशंदे रये और परमेशरो के राज्य रिया गल्ला करदे रये।<sup>4</sup> तबे तिने चलेया से मिली की आज्ञा दिती, “यरूशलेमों से नि छाडो, पर

पिते रे तेस वादे रा पूरे ऊणे रा इन्तजार करदे रओ, जेतेरे बारे रे तुसे मांते सुणी चुके रे।<sup>5</sup> कऊँकि यहून्ने तो पाणिण् साथे बपतिस्मा देई राखेया, पर थोड़े दिन बाद तुसा पवित्त्र आत्मा रा बपतिस्मा पाणा।”

?????? ?? ?????????? ?? ?????

6 तेबे तिने कट्टे ऊई की तिना ते पूछेया, “ओ प्रभु! क्या तुसा एसी बखते ई इस्राएलो खे राज्य फेरी देणा?”<sup>7</sup> तिने तिना खे बोलेया, “तेस बखतो खे और तेसा कअडिया खे जाणना, जो पिते आपणे ई अक्को रे राखी राखे, तुसा रा काम निण्।<sup>8</sup> पर जेबे पवित्त्र आत्मा तुसा पाँदे आऊणा, तेबे तुसा सामर्थ पाणी और यरूशलेम नगरो रे, सारे यहूदिया और सामरिया प्रदेशो रे और तरतिया रे कनारे तक तुसे मेरे गवा ऊणे।”<sup>9</sup> ये बोलदे ऊए सेयो, तिना रे देखदे-देखदे परमेशरो रे जरिए स्वर्गो खे चकी ते और बादलो री बजअ ते सेयो तिना खे जादा देरा तक देखी नि सके।<sup>10</sup> जेबे तिना खे जाँदे ऊए सेयो सर्गो खे ताकण लगी रे थे, तेबे दो माणू सफेद टाले पईने रे अचाणक तिना बीच आयी की खड़े ऊईगे<sup>11</sup> और तिना खे बोलेया, “ओ गलीली मर्दो! तुसे खड़े ऊई की सर्गो खे कऊँ लगी रे देखणे? येई यीशु जो तुसा गे ते स्वर्गो खे चकी ला रा, जिंयाँ तुसे से स्वर्गो खे जाँदा ऊआ देखी राखेया, तियाँ ई से फेर आऊणा।”

???????? ?? ??????? ?? ??? (????) ?????

12 तेबे चेले जैतून नाओ रे पाहडो ते, जो यरूशलेम नगरो रे नेडे तकरीबन एक किलोमीटरो री दुरिया रे ए, यरूशलेमो खे वापस ऊए।<sup>13</sup> जेबे सेयो नगरो रे पऊँछे, तेबे सेयो तेसा बाऊड़ी दे गये, जेती पतरस, यहून्ना, याकूब, अन्दरयास, फिलिप्पुस, थोमा, बरतुल्मै, मत्ती, हलफईसो रा पाऊ याकूब, शमौन जेलोतेस और याकूबो रा पाऊ यहूदा रओ थे।<sup>14</sup> यो सब कईया जवाणसा साथे और प्रभु यीशुए री आम्मा मरियम और तिना रे पाईया साथे एक चित्त ऊई की प्रार्थना रे लगे रये।<sup>15</sup> तिना दिना रेई पतरस पाईया बीच, जो एक सौ बीईया रे तकरीबन विश्वासी थे, खड़ा ऊई की बोलणे लगेया,<sup>16</sup> “ओ पाईयो जरूरी था कि पवित्त्र शास्त्रो रा से लेख पूरा ओ, जो पवित्त्र आत्मे दाऊदो रे मुँओ ते यहूदा रे बारे दे, जो प्रभु यीशुए खे पकड़ने वालेया रा अगुवा था, पईले तेई बोलेया था।<sup>17</sup> यहूदा तो आसा बीच गिणेया गया और तेसा सेवकाईया रे शामिल ऊआ।”

18 तिने पापो री कमाईया ते एक डोरू खरीदेया और सियो रे पारे रूडेया और तेसरा पेट फटीगा और तेसरी सारिया आंजा निकली गिया,<sup>19</sup> और एसा गल्ला खे यरूशलेमो रे रणे वाले जाणी गे, एथो तक कि तेस डोरूआ रा नाओ तिना री पाषा रे हकलदमा, मतलब-खूनो रा डोरू पड़ी गा।

20 पतरसे बोलेया, “कऊँकि भजनसंहिता रे लिखी राखेया,

“तेसरा कअर उजड़ी जाओ  
और तिदे कोई ना बसो;”

‘और तेसरी अध्यक्षो री जगा कोई ओर लयी लो।’

21 “तेबेई ये जरूरी ए कि एक एड़ा माणू चुणेया जाओ जो प्रभु यीशुए रे किते रे सारे कामो रे गवा ओ। प्रभु यीशुए खे यहून्ने रे जरिए बपतिस्मा देणे ते लयी की तिना रे स्वर्गो रे चकणे तक ये आदमी आसा साथे प्रभु यीशुए रे मरे रेया बीच ते जिऊँदा ऊणे रा गवा बणो।<sup>22</sup> खरा ए कि तिना बीच ते एक माणू आसा साथे, यीशुए रे जिऊँदे ऊणे रा गवा ऊई जाओ।”

23 तेबे तिने दो जणे खड़े किते, एक यूसुफ, जेसखे बरसब्यास बी बोलोए, जेसरा छोटो नाओ युस्तुस ए और दूजा मत्तियाह।<sup>24</sup> तेबे ये बोली की प्रार्थना किती, “ओ प्रभु! तुसे जो सबी रे मनो खे जाणोए, ये बताओ कि तुसे इना दूई बीच ते कुण चुणी राखेया,<sup>25</sup> ताकि से एसा सेवा री और प्रेरिताईया री जगा लई लओ, जेसखे यहूदा छाडी की आपणी जगा खे गया।”<sup>26</sup> तेबे तिने तिना रे बारे रे चिट्ठिया पाईया और पत्ती मत्तियाहो रे नाओ पाँदे निकली, तेबे से तिना ग्यारा प्रेरिता साथे गिणेया गया।

## 2

~~~~~

1 जेबे यहूदिया रा पिन्तुकुसो रा त्योआरो रा दिन आया, तेबे सेयो सब एकी जगा रे कट्टे थे। 2 तदुओ की एकदम सर्गों ते बड़े तूफानो री जी छेड़ ऊई और तिजी ते सारा कअर, जेती सेयो थे बैठे रे, गूँजी गा। 3 तिना खे आगी रिया लुपिया जेड़िया जीबा निकलदिया ऊईया दिशिया और तिना बीचे सबी पाँदे आयी की ठईरी गिया। 4 तेबे सेयो सब पवित्तर आत्मा ते परी गो और जियँ पवित्तर आत्मे तिना खे बोलणे री सामर्थ दित्ती, सेयो लग-लग पाषा रे बोलणे लगे।

5 तिना दिना रे बऊत भक्त यहूदी जो परमेशरो ते डरो थे, दुनिया रे हर देशो ते त्योआर मनाणे आये थे और यरूशलेम नगरो रे रणे लगी रे थे। 6 जेबे से छेड़ ऊई, तेबे पीड़ कट्टी ऊईगी और लोक कबराई गो, कऊँकि हर एकी खे येई सुणो था कि ये मेरी ई पाषा रे बोलणे लगी रे। 7 सेयो सब हैरान ऊई की बोलणे लगे, “देखो, ये जो बोलणे लगी रे, क्या सब गलीली निए? 8 तो तेबे ये क्या ऊणे लगी रा, तेबे आसे सब आपणी-आपणी जन्म-भूमिया री पाषा कऊँ सुणने लगी रे? 9 आसा बीचा ते जो पारथी, मेदी और एलामी लोक, मेसोपोटामिया, यहूदिया, कम्पदकिया, पुन्तुस, आसिया, 10 फुगिया, पंफूलिया, मिस्र और लिबिया वासी जो कुरेनो रे नेड़े-तेड़े ए, इना सबी देशो रे रणे वाले और रोमो रे रणे वाले यहूदी और यहूदी तर्म तारण करने वाले, 11 मतलब क्या यहूदी और क्या यहूदी तर्म तारण करने वाले, कुरेती और अरबी बी ए, पर आपणी-आपणी पाषा रे तिना ते परमेशरो रे बड़े-बड़े कामो रे बारे रे चर्चा सुणने लगी रे।” 12 तेबे सेयो सब हैरान ऊईगे और कबराई की एकी-दूजे खे बोलणे लगे, “ये क्या ऊणे लगी रा?” 13 पर ओरी मजाक करी की बोलेया, “सेयो तो नये शराबो रे नशे रे चूर ए।”

~~~~~

14 तेबे पतरस तिना ग्यारा चेलेया साथे खड़ा ऊआ और जोरे की बोलणे लगेया, “ओ यहूदिया! और ओ यरूशलेमो रे सब रणे वालो! ये जाणी लो और कान लगाई की मेरी गल्ला सुणो। 15 जेड़ा तुसे समजणे लगी रे, यो लोक नशे रे निए, कऊँकि एबु तो प्यागा रे नौ ई बजी रे। 16 पर ये से गल्ल ए, जो परमेशरे योएल भविष्यबक्ते रे जरिए बोली थी,

17 “परमेशर बोलोआ कि आखरी रे दिना रे एड़ा ऊणा,

कि मां आपणा आत्मा सबी मांणूआ पाँदे लटणा और तुसा रे माटे-बेटिया भविष्यवाणी करनी और तुसा रे जवाना दर्शन देखणे और तुसा रे बुजुर्गा सुपने देखणे।

18 बल्कि मां आपणे दास और दासिया पाँदे तिना दिना रे आपणी आत्मा बीचा ते लटणा और तिना भविष्यवाणी करनी

19 और मां ऊबे सर्गों रे अचम्बे रे काम और ऊँदे तरतिया रे चिह्न,

मतलब-खून, आग और तुएँ रे बादल दखाणे।

20 प्रभुए रा न्याय रा दिन आऊणे ते पईले सूरज काला

और चाँद खूनो जेड़ा लाल ऊई जाणा।

21 और जेस केसी प्रभुए रा नाओं लणा,

तेसरा ई उद्धार ऊणा।”

22 “ओ इस्राएलियो! इना गल्ला खे सुणो, यीशु नासरी एक मांणू था। जेसरा परमेशरो री तरफा ते ऊणे रा सबूत, तिना सामर्था रे कामो, अचम्बे रे कामो ते और चमत्कारा ते परगट ए। जो परमेशरे तुसा बीचे, तेसरे जरिए दखाए, जेसखे तुसे आपू बी जाणोए। 23 तेस ई यीशुए खे, जो परमेशरो री ठराई री योजना और पईलके ज्ञानो रे मुताबिक पकड़वाया। तेबे तुसे से पापिया रे आथो कूरुसो पाँदे चढ़ाई की मरवाईता। 24 पर सई परमेशरे मौता रे बंदनो ते छुड़ाई की जिऊँदा कितेया, कऊँकि ये ऊणा नि था कि से तेसरे वशो रे रंदा। 25 कऊँकि दाऊद यीशु मसीह रे बारे रे बोलोआ, “आऊँ सदा प्रभुए खे आपणे सामणे देखदा रया,



कऊँकि से मेरी दाँणी तरफा खे ए, ताकि आऊँ कवराई नि जाऊँ ।

26 इजी री बजअ ते मेरा मन खुश ऊआ और मेरी जीब मगन ऊई,

बल्कि मेरा शरीर बी उम्मीदा रे बसे रा रणा ।

27 कऊँकि तां मेरा प्राण नरको रे नि छाडणा

और तां आपणा पवित्तर जन सड़ने नि देणा ।

28 तें माखे जीवनी री वाट बताई राखी,

तां आपणे दर्शनो रे जरिए आऊँ खुशिये की परी देणा ।

29 “ओ पाईयो! आऊँ तेस कुलपति दाऊदो रे बारे रे तुसा खे इम्मता साथे बोली सकूँआ कि से तो मरी गा और दबाई बी दितेया और तेसरी कब्र आजो तक आसा गे मौजुद ए । 30 से भविष्यबक्ता था और ये जाणो था कि परमेशरे मांते कसम खाई की वादा करी राखेया कि मां तेरे वंशो बीचा ते एक जणा तेरे सिंहासनो पाँद बठयालना । 31 तिने ऊणे वाली गल्ला खे पईले तेई देखी की मसीह रे जिऊँदे ऊणे रे बारे रे भविष्यवाणी कित्ती, कि ना तो तेरा प्राण नरको रे छाडेया और ना ई तेसरा शरीर सड़ेया । 32 येई यीशु परमेशरे जिऊँदा कित्तेया, जेसरे आसे सब गवा ए । 33 तियाँ ई परमेशरो रे दाँणे आथो ते सबी ते उचा पद पाई की और पिते ते से पवित्तर आत्मा पाई की जो वादा कित्तेया था, तिने ये लटेया, जो आज तुसे देखोए और सुणोए । 34 कऊँकि दाऊद तो स्वर्गो रे नि चढ़ना, पर से आपू बोलोआ,

“ प्रभुए परमेशरे मेरे प्रभुए खे बोलेया;

35 मेरे दाँणे बैठ, जदुओ तक आऊँ तेरे बैरिया खे तेरे पैरा निठे नि करी देऊँ ।”

36 “तो एबे इस्राएलो रा सारा कराना, पक्का जाणी लओ कि परमेशरे तेसी यीशुए खे, जो तुसे कुरूसो पाँद चढ़ाया, प्रभु बी और मसीह बी ठराया ।” 37 तेवे सुणने वाले लोका खे विश्वास ऊईगा कि आसे गलत काम करी राखेया और सेयो पतरसो खे और बाकि प्रेरिता खे पूछणे लगे, “ओ पाईयो! आसे क्या करिए?” 38 पतरसे तिना खे बोलेया, “पापो ते मन फिराओ, और तुसा बीचा ते हर एक आपणे-आपणे पापो री माफिया खे यीशु मसीह रे नाओं ते बपतिस्मा लओ, तो तुसा खे पवित्तर आत्मा रा दान मिलणा । 39 ये वादा तुसे और तुसा री ल्वादे और तिना सबी दूरो-दूरो रे लोका खे बीए, जो प्रभुए म्हारे परमेशरे आपू गे बुलाणे ।” 40 पतरसे बऊत ओर गल्ला री गवाई देई-देई की बी समजयाया, “आपणे आपू खे एसा टेडिया जातिया ते बचाओ ।” 41 तो जिने लोके पतरसो रा वचन सुणी की मानेया, तिने बपतिस्मा लया और तेसी दिने तीन हजार माणूआ रे तकरीबन विश्वासिया साथे मिली गे ।

### प्रेरितों के काम 3:3

42 तेवे ये सब विश्वासी प्रेरिता ते शिक्षा पाणे और संगति राखणे रे और रोटी तोड़ने रे और प्रार्थना करने रे लगे रे रये

43 और यरूशलेमो रे सबी लोका खे डर ऊईगा और बऊत अचम्बे रे काम और चिह्न प्रेरित करो थे । 44 और सेयो सब विश्वास करने वाले कट्टे रओ थे और तिना री सब चीजा साजिया थिया ।

45 और सेयो आपणी-आपणी सम्पति और सामान बेची-बेची की जेड़ी जेसरी जरूरत ओ थी, बांडी देओ थे । 46 और सेयो हर रोज एक मन ऊई की मन्दरो रे कट्टे ओ थे और कअरे-कअरे रोटी तोड़ी की खुश और मन लगाई की रोटी खाया करो थे 47 और परमेशरो री स्तुति करो थे और सब लोक तिना ते खुश थे और जो उद्धार पाओ थे तिना खे प्रभु हर रोज तिना बीचे मिलेई देओ था ।

## 3

### प्रेरितों के काम 3:3

1 पतरस और यूहन्ना तकरीबन दोपईरो रे तीन बजे प्रार्थना रे बखते मन्दरो रे जाणे लगी रे थे । 2 तेवे लोक एक लंगड़े खे ल्याए, जो जन्मो तेई लंगड़ा था । तेसखे सेयो हर रोज मन्दरो रे तेस द्वारो पाँद, जेतखे सुन्दर बोलोए, बठयाली देओ थे, ताकि से मन्दरो रे जाणे बालेया ते पीख माँगो । 3 जेबे

तिने पतरस और यूहन्ना मन्दरो रे जांदि ऊए देखे, तो तिना ते पीख मांगी। <sup>4</sup> पतरसे यूहन्ने साथे तेसरी तरफा खे बड़े ई त्यानो साथे देखी की बोलेया, “आसा कनारो खे देख।” <sup>5</sup> तेवे पीख मांगणे वाला जन्मो रा लंगड़ा तिना ते कुछ पाणे री उम्मीदा ते तिना खे ताकणे लगेया।

<sup>6</sup> तेवे पतरसे बोलेया, “सुईना और चाँदी मांगे आए नि, पर जो मांगे आए, से ताखे देऊँआ, यीशु मसीह नासरियो रे नाओं ते उठ और चल-फिर।” <sup>7</sup> तेवे पतरसे तेसरा दाँणा आथ पकड़ी की से खड़ा कित्तेया और तेवुई तेसरे पैरा और खुटिया रे जान आईगी। <sup>8</sup> से उटकी की खड़ा ऊईगा और चलणे-फिरने लगेया और चलदा उछलदा और परमेशरो री स्तुति करदा ऊआ तिना साथे मन्दरो रे आँगणो रे गया। <sup>9</sup> सबी लोके से उटकदे और परमेशरो री स्तुति करदा ऊआ देखी की <sup>10</sup> से पछयाणी ला कि ये तो सेई लंगड़ा ए, जो मन्दरो रे सुन्दर फाटको पंदि बैठी की पीख माँगो था और तेस कामो ते जो तेस साथे ऊआ था, सेयो बऊत हैरान ऊईगे।

~~~~~

¹¹ जेबे से पतरस और यूहन्ने खे पकड़े रे था, तो सब लोक बऊत हैरान ऊई की जेतेखे सुलेमानो रा बरंडा (बरामदा) बोलोए, तिना गे दौड़े ऊए आए। ¹² ये देखी की पतरसे लोका खे बोलेया, “ओ इस्राएलियो! तुसे एस माणूए खे देखी की अचम्बा कऊँ करोए? और आसा री तरफा खे ईयां कऊँ लगी रे देखणे कि मानो आसे ई आपणी सामर्थ या भक्तिया ते ये चलणे-फिरने जोगा करी राखेया? ¹³ अबराहम, इसहाक और याकूबो रे परमेशर, आसा रे बाप-दादेया रे परमेशर आपणे सेवक यीशुए री महिमा किती, जो तुसे मारने खे यहूदी अगुवे रे आधो रे पकड़वाया। जेबे पिलातुसे तेसखे छाडणे रा बिचार बणाया, तेबे तुसे तेसरे सामणे तेसरी बेज्जती किती। ¹⁴ तुसे यीशुए खे मानणे ते ना किती जो पवित्तर और तर्मी था और बिनती किती कि एक खुनिए खे तुसा खे छाडेया जाओ ¹⁵ और तुसे अनन्त जीवनों खे बनावे वाला मरवाईता, जो परमेशरे मरे रेया बीचा ते जिऊँदा कित्तेया और एसा गल्ला रे आसे गवा ए। ¹⁶ और यीशुए मसीह रेई नाओं ते, तेस विश्वासो रे जरिए, जो तेसरे नाओं पाँदे ए, एस माणूए खे जेसखे तुसे देखणे लगी रे और जाणो बी ए कि सामर्थ देई राखी, तिने विश्वासे ई, जो तेसरे जरिए ए, से तुसा सबी सामणे, पला-चंगा करी ता।

¹⁷ “एबे ओ पाईयो! आऊँ जाणूँआ कि तुसे और तुसा रे अगुवे यीशु अणजाणे रे काई ते। कऊँकि तुसे नि जाणो थे कि सेई मसीह था। ¹⁸ पर जो गल्ला परमेशरे सबी भविष्यबक्तेया रे मुँओ ते पईले ई बुलाईया थिया कि तेसरे मसीह दुःख सईन करना और मरना, से तिने तियाँ ई पूरा कित्तेया। ¹⁹ इजी री खातर मन फिराओ और वापस आओ, कि तुसा रे पाप माफ ऊई जाओ, ताकि प्रभुए रे सामणे शान्तिया रे दिन आओ। ²⁰ और से यीशुए खे पेजो, जो तुसा खे पईले तेई मसीह चुणी राखेया। ²¹ जरूरी ये कि से स्वर्गो रे तेस बखतो तक रओ, जदुओ तक कि से सबी गल्ला खे सुदारी नि लओ, जेतेरे बारे रे परमेशरे आपणे पवित्तर भविष्यबक्तेया रे मुँओ ते बोली राखेया। ²² जेडा कि मूसे बोली राखेया, प्रभु परमेशरे तुसा रे पाईया बीचा ते, तुसा खे मां जेड़ा एक भविष्यबक्ता पेजणा, जो कुछ से तुसा खे बोलो, से करना। ²³ पर हर माणू जो तेस भविष्यबक्ते री नि सुणोगा, से लोका बीचा ते नाश ऊणा।

²⁴ “और शमुएलो ते लयी की तेसरे बाद वालेया तक, जितणे भविष्यबक्ते गल्ल बोली, तिने सबी इना दिना रा संदेश देई राखेया। ²⁵ तुसे सब तिना भविष्यबक्तेया री ल्वाद और तेस वादे रे इस्सेदार ए, जो परमेशरे तुसा रे बाप-दादेया साथे बानी, जेबे तिने अब्राहमो खे बोलेया कि तेरे कुलो रे जरिए तरतिया रे सारे करानेया आशीष पाणी, ²⁶ परमेशरे आपणे सेवको खे मरे रेया बीचा ते जिऊँदा करी की सबी ते पईले तुसा गे पेजेया, ताकि तुसा बीचा ते हर एकी खे तेसरी बुराईया ते फेरी की आशीष देओ।”

4

~~~~~

<sup>1</sup> जेबे सेयो लोका खे ये बोलणे लगी रे थे, तेवे पुरोईत, मन्दरो रे सरदार और सद्की तिना पाँदो खे आईगे। <sup>2</sup> कऊँकि तिना खे बऊत रोष आईगा कि सेयो लोका खे सिखाओ थे और प्रभु यीशुए रा

उदारण देई-देई की मरे रेया रा जिऊँदे उठणे रा प्रचार करो थे।<sup>3</sup> तेवे तिने सेयो पकड़ी की प्यागा तक जेला रे राखे, कऊँकि साँज ऊईगी थी।<sup>4</sup> पर जिने-जिने वचन सुणेया, तिना बीचा ते बऊत जणेया यीशुए पाँदे विश्वास कित्तेया और तिना री गिणती पाँज हजार मर्दों रे तकरीबन ऊईगी।

<sup>5</sup> दूजे दिने एडा ऊआ कि यहूदिया रे अगुवे, बुजुर्ग और शास्त्री,<sup>6</sup> प्रदान पुरोईत हन्ना, कैफा, यहून्ना, सिकन्दर और जितणे प्रदान पुरोईतो रे कराने रे थे, सब यहूशलेमो रे कटटे ऊईगे।<sup>7</sup> सेयो तिना खे बीचे खडे करी की पूछणे लगे, “तुसे ये काम कुण जी सामर्था ते और केसरे नाओं ते कित्तेया?”<sup>8</sup> तेवे पतरसे पवित्तर आत्मा ते परी की बुजुर्गा खे बोलेया,<sup>9</sup> “ओ लोकारे रे सरदारो और बुजुर्गो! आसे एस कमजोर माणूए साथे जो पलाई करी राखी, जे आज तिजी रे बारे रे पूछ-ताछ ओई कि से कियौं ठीक ऊआ,<sup>10</sup> तो तुसे सब और सारे इस्राएली लोक जाणी लओ कि यीशु मसीह नासरियो रे नाओं ते, जो तुसे कूरुसो पाँदे चढाईता और परमेशरे से मरे रेया बीचा ते जिऊँदा कित्तेया, आज तिना रे नाओं रे जरिए ये माणू तुसा सामणे पला-चंगा खड़ा ए।<sup>11</sup> यीशु मसीह ई सेई पात्थर ए, जो तुसे राजमिस्त्रिए टुकराईता और ये कूणे रे सिरे रा पात्थर ऊईगा।<sup>12</sup> यीशुए ते बगैर केसी दूजे रे जरिए उद्धार निए, कऊँकि स्वर्गो रे निठे और माणूआ बीचे और कोई नाओं नि देई राखेया, जेसरे जरिए आसे उद्धार पाई सकूँ।”

<sup>13</sup> जेवे तिने पतरस और यहून्ने री इम्मत्त देखी और ये जाणी ला कि यो तो अनपढ़ और सादारण माणू ए तो हैरान ऊईगे, तेवे सेयो पछयाणे कि यो तो प्रभु यीशुए साथे रओ थे।<sup>14</sup> तेवे तेस माणूए खे जो ठीक ऊईगा था, पतरस और यहून्ने साथे खड़ा देखी की यहूदी अगुवे तिना रे खलाफ कुछ नि बोली सके।<sup>15</sup> पर तिना खे सभा ते बारे पेजी की आपू बीचे बिचार करने लगे,<sup>16</sup> “आसे इना माणूआ साथे क्या करिए? कऊँकि यहूशलेमो रे सब रणे वालेया खे पता ए कि इने एक खास चमत्कार दखाई राखेया और आसे तिजी ते मुकरी नि सकदे।<sup>17</sup> पर इजी री खातर कि लोका बीचे ये गल्ल और जादा नि फैली जाओ, आसे तिना खे तमकी देऊँ कि सेयो एस नाओं ते फेर कदी केसी माणूए साथे गल्ला नि करो।”<sup>18</sup> तेवे तिने सेयो बुलाए और तिना खे चेतावणी देई की बोलेया, “यीशुए रे नाओं ते कुछ नि बोलणा और ना सखयाणा।”

<sup>19</sup> पर पतरस और यहून्ने तिना खे जवाब दित्तेया, “तुसेई न्याय करो कि क्या ये परमेशरो रे नेडे खरा ए कि आसे परमेशरो री गल्ला ते बढ़ी की तुसा री गल्ल मानूँ? <sup>20</sup> कऊँकि ये तो आसा ते ऊई नि सकदा, जो आसे देखी राखेया और सुणी राखेया, से नि बोलूँ।”<sup>21</sup> तेवे तिने सेयो ओर बी तमकाए और छाडी ते, कऊँकि लोका री बजअ ते तिना खे कोई बी सजा देणे रा बाना नि मिलेया, कऊँकि जो घटना ऊई थी, तिजी री बजअ ते सब लोक परमेशरो री तारीफ करो थे।<sup>22</sup> कऊँकि से माणू, जो चमत्कारी रूपो ते ठीक ऊईगा था, चाली साला ते जादा उमरा रा था।<sup>23</sup> सेयो छूटी की आपणे साथिया गे गये और जो कुछ बडे पुरोईते और बुजुर्गे तिना साथे कित्तेया था, सब कुछ तिना गे बताया।

### ?????????? ?? ???????????

<sup>24</sup> ये सुणी की तिने एक चित्त ऊई की जोरे की परमेशरो खे बोलेया, “ओ स्वामी! तूँ सेईए जिने स्वर्ग, तरती, समुद्र और जो कुछ तिना रे बणाई राखेया,<sup>25</sup> तै पवित्तर आत्मा रे जरिए आपणे सेवक, आसा रे पिता, दाऊदो रे मुओ ते बोलेया,  
“दूजिये जातिये आल्ला कऊँ पाया?

और देशो रे लोके बेकारो री गल्ला कऊँ सोचिया?

<sup>26</sup> प्रभु और मसीह रे अभिषेक कित्ते रे विरोदो रे तरतिया रे राजा खडे ऊए और हाकिम एकी साथे कटटे ऊईगे।

<sup>27</sup> “कऊँकि सच्ची तेरे सेवक यीशुए रे विरोदो रे, जेसरा तै अभिषेक कित्तेया, हेरोदेस और पुन्तियुस पिलातुस बी दूजी जातिया साथे और इस्राएलिया साथे एस नगरो रे कटटे ऊए।<sup>28</sup> कि जो कुछ पईले ते तेरी सामर्थ और समजा ते ठईरेया था, से ई ओ।<sup>29</sup> एबे, ओ प्रभु, तिना री तमकिया खे सुण, और आपणे दासा खे ये बरदान दे कि तेरा वचन बड़ी ई इम्मत्ता साथे सुणाऊँ।<sup>30</sup> ठीक करने खे

तू आपणा आथ बढ़ा कि चिह्न और अचम्बे के काम तेरे पवित्तर सेवक यीशुए रे नाओं ते करे जाओ ।”  
 31 जेबे सेयो प्रार्थना करी चुके, तेबे से जगा, जेती सेयो खड़ी रे थे, से जगा इल्ली गी और सेयो सब पवित्तर आत्मा ते परी गे और परमेशरो रा वचन इम्मता साथे सुणादे रये ।

XXXXXXXXXX XX XXXXX XXXXXXXX

32 विश्वास करने वालेया री मण्डली एक चित्त और एक मनो री थी, एथो तक कोई बी आपणी जायदाता खे आपणी नि बोलो था, बल्कि सब कुछ साजा था । 33 प्रेरित बड़ी सामर्था साथे प्रभु यीशुए रे जिऊँदे ऊणे री गवाई देँदे रये और तिना सबी पाँदे बड़ी कृपा थी । 34 तिना बीचे कोई बी गरीब नि था, कऊँकि जिना गे जमीन या कअर थे, सेयो तिना खे बेची-बेची की बिकी री चीजा रा दाम ल्याओ थे और से प्रेरिता रे पैरा गे राखी देओ थे । 35 और जेड़ी, जेसखे जरूरत ओ थी, तिजी रे मुताबिक हर एकी विश्वासिये खे प्रेरित बांडी देओ थे । 36 यूसुफ नाओं रा साईपरस टापूए रा एक लेवी था, जेसरा नाओं प्रेरिते बरनबास, मतलब-इम्मत देणे वाला माणू राखी राखेया था । 37 तेसरी कुछ जमीन थी, जो तिने बेची ती और दामो रे पैसे ल्याई की प्रेरिता खे देई ते कि सेयो तिजी खे जरूरतमंद लोका बीचे बांडी देओ ।

## 5

XXXXXXXXXX XX XXXXX

1 हनन्याह नाओं रे एक माणूए आपणी लाड़ी सफीरा साथे मिली की आपणी जमीना रा एक पाअग बेची ता 2 और तिजी रे दामो बीचा ते कुछ आपू खे राखी ता और ये गल्ल तेसरी लाड़ी बी जाणो थी और तिजी रा एक इस्सा ल्याई की प्रेरिता खे देईता । 3 तेबे पतरसे बोलेया, “ओ हनन्याह! शैताने तेरे मनो रे ये गल्ल कियौँ पाई कि तूँ पवित्तर आत्मा ते चूट बोले और जमीना रे दामो बीचा ते कुछ आपू खे राखी दे? 4 जदुओ तक से तांगे रई, क्या तेरी नि थी? और जेबे बिकी गी तो क्या तेरे वशो रे नि थी? तेरे मनो रे एस बुरे कामो रा बिचार कियौँ आया? तँ माणूआ ते नि, पर परमेशरो ते चूट बोलेया ।” 5 इना गल्ला सुणी की हनन्याह जमीना पाँदे रूडी गा और मरी गा और सबी सुणने वालेया खे डर लगी गा । 6 तेबे जवाने आयी की तेसरी अर्थी बणाई और बारे लयी जाई की से दबाई ता ।

7 तकरीबन तीन कंटे ते बाद तेसरी लाड़ी पीतरे आयी और जो कुछ ऊआ था, तिजी रे बारे रे तेसा खे पता नि था । 8 तेबे पतरसे तेसा खे बोलेया, “मांगे बता क्या तुसे से जमीन इतणे रेई बेची?” तेसे बोलेया, “आ, इतणे रेई ।” 9 पतरसे तेसा खे बोलेया, “ये क्या गल्ल ऊई कि तुसे दूँई प्रभुए रे पवित्तर आत्मा री परीक्षा खे एड़ा कित्तेया? देख, तेरे लाड़े खे दबाणे वाले द्वारा पाँदे ई खड़ी रे और तूँ बी बारे लयी जाणी ।” 10 तेबे से फटाफट तेसरे पैरा पाँदे पड़ी गी और मरी गी और जवाने पीतरे आयी की से मरी री देखी और से बी बारे लयी जाई की तेसा रे लाड़े साथे दबाई ती । 11 तेबे यरूशलमो री सारी मण्डली और इना गल्ला खे सब सुणने वाले बऊत ई जादा डरी गे ।

XXXXXXXXXX XX XXXXX XXXXXXXX XX XXXXXXXX XX XXXXX

12 प्रेरिता रे जरिए बऊत चिह्न और अचम्बे के काम लोका बीचे दखाए जाओ थे और मसीह रे सब विश्वासी एक मन ऊई की सुलेमानो रे बरंडे रे कटटे ओया करो थे । 13 पर ओरी बीचा ते जिने यीशुए पाँदे एवुए तक विश्वास नि करी राखेया था केसी खे बी ये इम्मत नि ओ थी कि तिना बीचे जायी की मिली जाईए, पर तेबे बी लोक तिना री तारीफ करो थे । 14 विश्वास करने वाले बऊत सारे मर्द और जवाणसा प्रभुए री मण्डलिया रे ओर बी जादा आयी की मिलणे लगे । 15 एथो तक कि लोक बमारा खे सड़का रे ल्याई-ल्याई की माँजे पाँदे लटयाई देओ थे कि जेबे पतरस आओ, तेबे तेसरा टवांवा ई तिना बीचा ते केसी पाँदे पड़ी जाओ । 16 यरूशलमो रे नेडे-तेडे रे नगरो ते बी बऊत लोक बमारा खे और दुष्टात्मा रे सताए रे, तिना गे ल्याई-ल्याई की कटटे ओ थे और सेयो सबी खे ठीक करो थे ।

XXXXXXXXXX XX XXXXXXXX

17 तेबे प्रदान पुरोईत और तेसरे सब साथी, जो सद्किया रे टोलिया रे थे, चलेया रे खलाफ जलना ते परी गे 18 और तिने प्रेरित पकड़ी की जेला रे बंद करी ते। 19 पर राथियो खे प्रभू ए रे एक स्वर्गदूते जेला रे द्वार खोली की तिना खे बारे निकयाली की बोलेया, 20 “जाओ और मन्दरो रे खड़े ऊई की एस अनन्त जीवनो रा पूरा संदेश लोका खे सुणाओ।” 21 जेड़ा तिना खे बताई राखेया था प्याग ऊँदे ई सेयो मन्दरो रे जाई की उपदेश देणे लगे। तेबे प्रदान पुरोईत और तेसरे साथिये आयी की महासभा और इस्राएलिया रे सारे बुजुर्ग कट्टे कित्ते और जेला रे सन्देशा पेजेया कि तिना खे ल्याओ।

22 पर मन्दरो रे पईरदारो तेती पऊँछी की चले जेला री नि पाये और वापस ऊई की सन्देशा दित्तेया 23 कि आसे जेला खे बड़ी चौकसिया साथे बंद कित्तेया रा और पईरदारो खे बारे द्वारो पाँदे खड़े रा देखेया, पर जेबे खोलेया, तेबे पीतरे कोई नि मिलेया। 24 जेबे मन्दरो रे पईरदारो रे प्रदान और बड़े पुरोईते ये गल्ल सुणी, तो तेबे तिना रे बारे रे पारी चिन्ता रे पड़ी गे कि एबे क्या ऊणा? 25 तद्दुओ कि किने आयी की तिना गे बताया, “देखो, जो तुसे जेला रे बंद करी राखे थे, सेयो माणू तो मन्दरो रे खड़े ऊई की लोका खे उपदेश देणे लगी रे।” 26 जेब तिने सुणेया तेबे मन्दरो रे पईरदारो रे प्रदान आपणे पईरदारो साथे तेती जाई की चलेया खे महासभा रे सामणे ली आया, पर जबरदस्ती नि, कऊँकि सेयो लोका ते डरो थे कि केथी आसा पाँदे पात्थर नि बाओ।

27 तिने सेयो फेर ल्याई की महासभा सामणे खड़े करी ते, तेबे प्रदान पुरोईते तिना ते पूछेया, 28 “क्या आसे तुसे सावधान नि कित्ते थे कि तुसे एस नाओं ते उपदेश नि देणा? तेबे बी देखो, तुसे सारा यरूशलेम आपणे उपदेशो ते परी ता रा और तेस माणू ए री अत्या रा दोष आसा रे गले पाँदे ल्याऊणा चाओए।” 29 तेबे पतरसे और ओरी प्रेरिते जवाब दित्तेया, “माणू ए री आज्ञा ते बढी की परमेशरो री आज्ञा खे मानणा ई म्हारा फर्ज ए।” 30 आसा रे बाप-दादेया रे परमेशरे प्रभु यीशु मरे रेया बीचा ते जिऊँदा कित्तेया, जो तुसे करूसो पाँदे चढाई की मरवाईता था। 31 सेई परमेशरे प्रभु और उद्धारक ठईराई की आपणे दाँणे आथो ते ऊच्चा करी ता, ताकि से इस्राएलिया खे मन फिराओ री शक्ति और पापो ते माफी देओ। 32 और आसे इना गल्ला रे गवा ए और पवित्तर आत्मा रे बी, जो परमेशरे तिना खे दित्ती, जो तेसरी आज्ञा मानोए।”

33 ये सुणी की महासभा रे सदस्य जलने लगे और तिने चले काणा चाए। 34 पर गमलिलएल नाओं रे एक फरीसिये, जो धर्मशास्त्री और सबी लोका बीचे जाणा-मानेया रा था, कचैरिया रे खड़े ऊई की प्रेरिता खे थोड़ी देरा खे बारे जाणे री आज्ञा दित्ती। 35 तेबे तिने महासभा रे सदस्या खे बोलेया, “ओ इस्राएलियो! जो कुछ इना माणूआ साथे करना चाओए, सोची समजी की करना। 36 कऊँकि इना दिना ते पईले थियुदास ये बोलदा रओ था कि आऊँ बी कुछ आए; और कोई चार सौ माणू तेस साथे ऊईगे, पर से कायी ता और जितणे लोक तेसखे मानो थे, सब ओरे-पोरे ऊईगे और खत्म ऊईगे। 37 तिजी ते बाद नाओं लिखाईया रे दिनो रे यहूदा गलीली उठेया और तिने कुछ लोक आपणी तरफा खे करी ते, तेसरा बी नाश उई गा और जितणे लोक तेसखे मानो थे, सब ओरे-पोरे ऊईगे।

38 “इजी री खातर आऊँ तुसा खे बोल्ँआ कि इना माणूआ ते दूर ई रओ और इना ते कोई मतलब नि राखो, कऊँकि जे ये तर्म या काम माणूआ री तरफा ते ओ, तो तेबे तो नाश ऊई जाणे, 39 पर जे परमेशरो री तरफा ते, तो तुसे इना खे कदी बी खत्म नि करी सकदे, केथी एड़ा ना ओ कि तुसे परमेशरो साथे बी लड़ने वाले ठईरो।” 40 तेबे तिने तेसरी गल्ल मानी ली और प्रेरित बुलाए और कूटे और ये आज्ञा देई की छाडी ते कि यीशु ए रे नाओं ते फेर कदी गल्ला नि करनिया। 41 चले एसा गल्ला ते खुश ऊई की महासभा रे सामणे ते चली गे कि आसे तेसरे नाओं री खातर नरादर ऊणे जोगे तो ऊए। 42 तेबे चले हर रोज मन्दरो रे और कअरे-कअरे उपदेश करने और एसा गल्ला रा सुसमाचार सुनाणे ते नि रूके कि यीशु ई मसीह ए।

1 तिना दिना रे जेबे चले बऊत ऊणे लगे, तेबे यूनानी पाषा बोलणे वाले यहूदी चले इब्रानी पाषा बोलणे वाले यहूदी चलेया पाँदे कुड़कुड़ाणे लगे, “हर दिनो री चीजा देणे रे आसा री विदुआ री खबर-सम्बाल नि लंदे।” 2 तेबे तिने बारा चलेया विश्वासिया री सारी मण्डली आपू गे कट्टी बुलाई की बोलेया, “ये ठीक निए कि आसे परमेशरो रे वचनो रा प्रचार करना और शिक्षा देणा छाडी की खुलाणे-पलयाणे री सेवा रे लगे रईये। 3 इजी री खातर ओ पाईयो! आपू बीचा ते सात जाणे-माणे मर्दा खे, जो पवित्तर आत्मा ते परे रे और सुलजे रे ओ, चुणी लो, ताकि आसे तिना खे ये काम देई देईए। 4 पर आसा तो प्रार्थना, वचनो रा प्रचार और उपदेश देणे री सेवा रे लगे रे रणा।” 5 ये गल्ल सारी मण्डलिया खे ठीक लगी और तिने स्तिफुनुस नाओं रा एक माणू जो विश्वासो रे और पवित्तर आत्मा ते परे रा था और फिलिप्पुस, नीकानोर, तीमौन, परमिनास, अन्ताकिया वाला नीकुलाऊस, जो यहूदी मतो रे आईगा था, चुणी ले। 6 तेबे यो प्रेरिता सामणे खडे कित्ते। और इना चूणे रे माणूआ खे प्रार्थना किती और तिना पाँदे आथ राखी की तिना खे सेवा करने रा अक्क दित्तेया। 7 तेबे परमेशरो रा वचन फैलदा गया और यरूशलेमो रे चलेया री गिणती बड़दी गयी और यहूदी पुरोईता रा एक बड़ा समाज यीशु मसीह पाँदे विश्वास करी की एस मतो खे मानण वाला ऊईगा।

### ?????????? ?? ?????? (??????????)

8 स्तिफुनुस कृपा और सामर्था ते परिपूर्ण ऊई की लोका खे बड़े-बड़े चिह्न और अचम्बे रे काम दखाया करो था। 9 पर कुछ लोके स्तिफुनुसो रा बरोद कित्तेया। बरोद करने वाले तेस प्रार्थना रे कअरो रे सदस्य थे जो गुलामिया ते आजाद ऊई रे थे, और कुरेनी, सिकन्दरिया, किलिकिया और आसिया रे लोका बीचा ते कई एक उठी की स्तिफुनुसो साथे बईस करने लगे। 10 पर तेस ज्ञानो ते और पवित्तर आत्मा रा, जेते री मतादा ते से गल्ला करो था, सेयो सामणा नि करी सके। 11 तेबे तिने कई लोक स्तिफुनुसो रे बारे रे चूट बोलणे खे उकसाए जो बोलणे लगे, “आसे ये मूसे और परमेशरो रे खलाफ निन्दा री गल्ला करदे ऊए सुणी राखेया।” 12 तेबे लोक, बुजुर्ग और शास्त्रिया खे पड़काई की तेस पाँदो खे आईगे और तेसखे पकड़ी की महासभा रे लयी गे। 13 और चूटे गवा खडे करी ते और स्तिफुनुसो पाँदे आरोप लगाई की बोलेया, “ये माणू एसा पवित्तर जगा रे बारे रे और मूसे रा विधानो रे खलाफ बोलणा नि छाडदा। 14 कऊँकि आसे ये, ये बोलदे ऊए सुणी राखेया कि एसी यीशु नासरिये ये मन्दर टाली देणा और सेयो रवाजा बदली देणियां जो मूसे आसा गे सम्बाली राखिया।” 15 तेबे सबी लोक जो सभा रे बैठी रे थे, तेसखे ताकणे लगे तो तिने तेसरा मूँ स्वर्गदूतो जेडा देखेया।

## 7

### ?????????? ?? ???? ?

1 तेबे परदान पुरोईत पूछेया, “क्या ये आरोप सच ए?” 2 स्तिफुनुसे उतर दित्तेया, “ओ पाईयो और पिताओं सुणो! आसा रा पिता अब्राहम हारान नगरो रे बसणे ते पईले, जेबे मेसोपोटामिया प्रदेशो रे था, तेबे सामर्थी परमेशरे तेसखे दर्शन दित्तेया 3 और तिने बोलेया, ‘तूँ आपणे देशो ते निकली की और आपणे परिवारो ते निकली की तेस देशो रे चली जा, जो मां ताखे दखाणा।’ 4 तेबे से कसदियो रे देशो ते निकली की हारान नगरो रे जाई की बसी गा। तेसरे पिते रे मरने ते बाद परमेशरे से तथा ते एस देशो रे ल्याई की बसाया, जेती एबे तुसे रओए। 5 तेस बखते परमेशरे तेसखे कुछ बी जायदात, बल्कि पैर राखणे तक बी जगा नि दिती, बल्कि परमेशरे वादा कित्तेया कि मां ये देश ताखे और तांते बाद तेरे वंशो खे देई देणा। हालाँकि तेस बखते तेसरा कोई बी पाऊ नि था। 6 परमेशरे एडा बोलेया, ‘तेरी ल्वादा रे लोक पराये देशो रे परदेशी ऊणे और तिना सेयो दास बनाणे और चार सौ साला तक तिना खे दुःख देणा।’ 7 तेबे परमेशरे बोलेया, ‘जेसा जातिया रे सेयो दास ऊणे, तेसा खे मां सजा देणी और तिजी ते बाद तिना तेस देशो ते निकली की एस देशो रे आयी की मेरी सेवा करनी।’ 8 परमेशरे अब्राहमो साथे खतने री वाचा किती। जेबे अब्राहमो रे पाऊ इसहाको रा जन्म ऊआ तो आठुए दिने तेसरा खतना कित्तेया। इसहाको ते याकूब और याकूबो ते बारा कुलपति जम्मे।

9 “कुलपतिये यूसुफो साथे दुश्मणी राखी की से मिस्र देशो खे जाणे वालेया रे आथे बेची ता, पर परमेशर तेस साथे था 10 और परमेशर यूसुफो खे सारे क्लेशो ते छुड़ाई की मिस्रो रे राजा फिरौनो री नजरा रे कृपा और बुद्धि दित्ती । फिरौन राजे यूसुफो खे मिस्र देशो और आपणे सारे कअरो पाँदे हाकिम बनाया । 11 जेबे यूसुफ राज्यपाल था तेबे सारे मिस्र और कनानो देशो रे अकाल पड़ी गा, जेतेरी बजअ ते पारी क्लेश ऊईगा और आसा रे बाप-दादेया खे अन्न नि मिलो था । 12 पर याकूबे ये सुणी की कि मिस्र देशो रे अन्न आए, आसा रे बाप-दादेया खे पईली बार तेथा ते अन्न खरीदणे खे पेजेया । 13 दूजी बार यूसुफ आपणे पाईया सामणे आया और यूसुफो री जाति फिरौनो खे पता लगी गी । 14 तेबे यूसुफे आपणे पिते याकूबो खे संदेशा पेजेया और आपणे सारे टब्बरो रे, जो पचयात्तर माणू थे, मिस्र देशो खे बुलाए । 15 तेबे याकूब मिस्रो रे आया और तेती से और आसा रे बाप-दादे मरी गे । 16 तिना री लोथा शाकेमो रे पऊँछाई की तेसा कब्रा रे राखिया, जो अब्राहमे चाँदी देई की शाकेमो रे हमोरो री ल्वादा ते खरीदी थी ।

17 “पर जेबे तेसा कसमा रा पूरा ऊणे रा बखत नेडे आया, तेबे जो वादा परमेशर अब्राहमो साथे कित्तेया था, तेबे मिस्रो रे सेयो लोक बड़ी गे और बऊत ऊईगे । 18 तेबे मिस्रो रे दूजा राजा ऊआ, जो यूसुफो खे नि जाणो था । 19 तिने आसा री जातिया साथे चलाकी करी की आसा रे बाप-दादेया साथे गलत बर्ताव कित्तेया, एथो तक की तिना खे आपणे नये जम्मे रे बालक सेटणे पड़े, ताकि सेयो जिऊँदे नि रओ । 20 तेस बखते मूसे रा जन्म ऊआ । से परमेशरो री नजरा रे बऊत ई सुन्दर था और से तीन मीन्ने तक आपणे पिते रे कअरे लकोई की पालेया । 21 जेबे तेसखे लकोई की राखणा मुश्किल ऊईगा तेबे तिने से टोकरिया दे पाई की नदिया रे हड़ाईता, तेबे फिरौनो री बेटिये से चकी ला और आपणा पाऊ समजी की पालेया । 22 मूसे खे मिस्रिया री सारी विधा पढाई और से वचन और कामो रे सामर्थी था ।

23 “जेबे मूसा चालिया साला रा ऊआ तेबे तेसरे मनो रे आया कि आऊँ आपणे इस्राएली पाईया खे मिलूँ । 24 तेती तिने एक इस्राएली माणूए पाँदे अन्याय ऊँदे ऊए देखेया और से बचाया और मिस्रिए खे काई की जो सताई राखे थे, बदला लया । 25 तिने सोचेया कि मेरे पाईया समजणा कि परमेशर मेरे आथो साथे तिना खे गुलामिया ते आजाद करना, पर सेयो नि समजे । 26 दूजे दिने जेबे सेयो आपू बीचे लड़ने लगी रे थे, तेबे से तेती आईगा और ये बोली की तिना खे मलाप करने खे बोलेया कि ओ मर्दा! तुसे तो पाई-पाई ए, एकी-दूजे पाँदे अन्याय कऊँ करोए? 27 पर जो आपणे पड़ोसिया पाँदे अन्याय करने लगी रा था तिने से ये बोली की कनारे टाई ता, तूँ किने आसा पाँदे हाकिम और न्यायी बनाई राखेया? 28 क्या जिंयाँ तैं काल मिस्री काया, माखे बी काणा चाएया?’ 29 ये गल्ल सुणी की मूसा नटी गा और मिद्यान देशो रे जाई की परदेशी ऊई की रणे लगेया और तेती तेसरे दो पाऊ ऊए ।

30 “जेबे पूरे चाली साल मिद्यान देशो रे बीती गे, तेबे एक स्वर्गदूते सीनै पाहूँडो रे जंगलो रे तेसखे फुखदे ऊए जाडो री लूपिया रे दर्शन दित्ते । 31 मूसा ये दर्शन देखी की हैरान ऊईगा और जेबे देखणे खे ओर नेडे गया, तेबे प्रभुए री आवाज ऊई, 32 ‘आऊँ तेरे बाप-दादे, अब्राहम, इसहाक और याकूबो रा परमेशर ए । तेबे मूसे खे डरो रे मारे थुरनी छूटी गी, एथो तक कि तेसखे देखणे री इम्मत नि रई । 33 तेबे प्रभुए तेसखे बोलेया, ‘आपणे पैरो ते जोडे खोली दे, कऊँकि जेते जगा रे तूँ खड़ी रा, से पवित्तर जगा ए । 34 में सच्ची आपणे लोका री जो मिस्र देशो रे बुरी दशा देखी राखी और तिना रा कणना और तिना रा रोणा सुणी राखेया, तेबेई तो आऊँ तिना खे छुड़ाणे खे उतरी रा, एबे आओ और मां तूँ मिस्र देशो रे पेजणा ।’

35 “ये सेई मूसा ए जो इस्राएलिए ये बोली की नकारिता था कि तूँ किने आसा पाँदे हाकिम और न्यायी ठईराई राखेया? सेई परमेशर हाकिम और छुड़ाणे वाला बनाया । तेस स्वर्गदूतो रे जरिए, जिने तेसखे जाडो रे दर्शन दित्तेया था, पेजेया । 36 येई माणू मिस्र देश और लाल समुद्र और जंगलो रे चालिया साला तक अचम्बे रे काम और चिह्न दखाई-दखाई की तिना खे निकयाली की ली आया ।

37 ये सेई मूसा ए, जिने इस्राएली लोका खे बोलेया, 'परमेशरे तुसा रे पाईया बीचा ते तुसा रिया तई मां जेड़ा एक भविष्यवक्ता चकणा।' 38 ये सेई मूसा ए जिने जंगलो रे मण्डलिया रे बीचे, तेस स्वर्गदूतो साथे सौने पाहुडो पाँदे तेस साथे गल्ला कित्तिया और आसा रे बाप-दादेया साथे था, तेसखे ई जिऊँदे वचन मिले ताकि आसा तक पऊँछ्याओ। 39 पर आसा रे बाप-दादेया मूसा री गल्ल मानणी नि चायी। तिने से टुकराईता और सेयो मिस्र देशो खे वापस जाणा चाओ थे।

40 "और लोके मूसा रे पाई हारूणो खे बोलेया, 'आसा खे एड़ा देवता बणा, जो आसा ते आगे-आगे रओ और आसा खे वापस मिस्र देशो खे लयी चलो, कऊँकि ये मूसा जो आसा खे मिस्र देशो ते निकयाली की ल्याया, आसे नि जाणदे कि एसखे क्या ऊआ?' 41 तिना दिना रे तिने एक बाछु बणाई की तेसरी मूर्तिया ते आगे बलि चढ़ाई और आपणे आथो रे कामो रे मग्न ऊणे लगे। 42 तेबे परमेशरे तिना ते आपणा मूँ मोड़ी ला और सेयो छाडी ते, ताकि सर्गो रिया चीजा खे पूजो, जेड़ा भविष्यवक्तेया री कताबा रे परमेशरे बोली राखेया,

"ओ इस्राएलो रे लोको! क्या तुसे सुनसाण जगा रे चाली साल रई की पशु बलि और अन्नबलि माखे ई चढ़ादे नि रये?"

43 और तुसे मोलेक देवता री बेदी बणाई और रिफान देवता रे तारे खे लयी की फिरदे रओ थे, मतलब-तिना मूर्तिया खे जो तुसे माथा टेकणे खे बणाए थे, तो मां तुसे बेबीलोनो ते पोरे लयी जाई की बसाई देणे।

44 "साक्षिया रा तम्बू सुनसाण जगा रे आसा रे बाप-दादेया बीचे था, जेड़ा परमेशरे ठईराया, जिने मूसे खे बोलेया, 'जेड़ा तै आयी की देखी राखेया, तिजी रेई मुताबिक इजी खे बणा।' 45 तेसी तम्बूओ खे आसा रे बाप-दादे पुराणे जमाने ते पाई की यहोशूओ साथे एती ल्याए, जेस बखते तिने अन्य जातिया रा अक्क पाया, जो परमेशरे आसा रे बाप-दादेया रे सामणे ते निकयाली ता और से तम्बू राजा दाऊदो रे बखतो तक रया। 46 दाऊदो पाँदे परमेशरे कृपा किती, तेबे तिने बिनती किती कि मां याकूबो रे परमेशरो खे मन्दर बनाणा। 47 पर तेसरे पाऊ सुलेमाने परमेशरो खे मन्दर बणाया। 48 पर परमप्रदान आथो रे बणाए रे मन्दरो रे नि रंदा, जेड़ा कि भविष्यवक्ते री कताबा रे परमेशरे बोलेया,

49 "परमेशर बोलोआ कि स्वर्ग मेरा सिंहासन और तरती मेरे पैरो री चौकी ए, माखे तुसा केड़ा मन्दर बनाणा?"

मेरे आराम करने री कुण जी जगा ऊणी?

50 क्या यो सब चीजा मेरे आथो की निए बणाई रिया?

51 "ओ टीठ और परमेशरो री गल्ल ना मानणे और ना सुणने वाले लोको! तुसे सदा पवित्तर आत्मा रा बरोद करोए। जेड़ा तुसा रे बाप-दादे करो थे, तेड़ा ई तुसे बी करोए। 52 भविष्यवक्तेया बीचा ते कुण नि तुसा रे बाप-दादेया नि सताए और तिने से तर्मी, जेसरे आऊणे रे बारे रे पुराणे बखतो ते सन्देश देणे वाला ई काई ता और एबे तुसे बी तेसरे पकड़वाणे वाले और काणे वाले ऊए। 53 तुसा खे स्वर्गदूता रे जरिए बणाया रा बिधान तो मिलेया, पर तुसे से बिधान मानेया नि।"

██████████ ██████████ ██████████

54 इना गल्ला खे सुणी की यहूदी अगुवेया खे इतणा गुस्सा आईगा और स्तिफनुसो पाँदे आपणे दाँद किरडने लगे। 55 पर तिने पवित्तर आत्मा ते परिपूर्ण ऊई की स्वर्गो खे देखेया और परमेशरो री महिमा किती और प्रभु यीशूए खे परमेशरो रे दाँणे कनारे खड़ा देखी की बोलेया, 56 "देखो, आऊँ स्वर्गो खे खुले रा और माणू रे पुत्रो खे परमेशरो रे दाणे कनारे खड़े रा देखूँआ।" 57 तेबे तिने जोरे की चींगी की आपणे कान बंद करी ते और एक चित्त ऊई की तेस पाँदे झपटे। 58 तेबे तेसखे यरूशलेम नगरो ते बारे लयी जाई की पाल्थर बाणे लगे और तिना री अत्या करी ती। जो गवा थे तिने आपणे टाले शाऊल नाओं रे एक जवानो रे पैरो पाँदे खोली की रखवाली करने खे राखी ते। 59 सेयो स्तिफनुसो खे पाल्थर बाँदे रये और से ये बोली की प्रार्थना करदा रया, "ओ प्रभु यीशु



मेरी आत्मा खे ग्रहण कर ।”<sup>60</sup> तेबे तिने कुटणे टेकी की जोरे की बोलेया, “ओ पूरभु! एस पापो रा दोष तिना पाँदे नि लगा ।” ये बोली की से मरी गा । शाऊल बी तेसरी मौता रे शामिल था ।

## 8

~~~~~

1 शाऊल स्तिफनुसो री मौता रे पूरी तरह ते शामिल था ।

तेसी दिने यरूशलेम नगरो री मण्डलिया पाँदे बऊत उपदरव ऊणे लगेया और पुरेरिता खे छाडी की सब विश्वासी यहूदिया और सामरिया रे प्रदेशो रे ओरे-पोरे ऊईगे ।² तेबे कुछ भगत लोके स्तिफनुस कबरा रे राखेया और तेसखे बऊत दुःख कित्तेया ।³ शाऊल मण्डलिया खे ऊजाइने लगी रा था और कअरे-कअरे कूसी की मर्द और जवाणसा विश्वासिया खे कसिटी-कसिटी की जेला रे पाओ था ।

~~~~~

4 जो विश्वासी ओरे-पोरे ऊईगे थे, सेयो सुसमाचार सुणादे ऊए, कुमदे-फिरदे रये ।<sup>5</sup> फिलिप्पुस सामरिया प्रदेशो रे एक नगरो रे जाई की मसीह रा प्रचार करने लगेया<sup>6</sup> और जो गल्ला फिलिप्पुसे बोलिया सेयो लोके सुणी की और जो चमत्कार से दखाओ था तिना खे देखी की एक मन ऊई की त्यान लगाया ।<sup>7</sup> कऊँकि फिलिप्पुसो री आज्ञा ते बऊत जणेया ते दुष्टात्मा जोरे-जोरे साथे चींगी की निकली गिया और बऊत सारे अदरंगो रे रोगी और लंगडे बी ठीक कित्ते ।<sup>8</sup> तेबे तेस नगरो रे बऊत शान्ति ऊईगी ।

~~~~~

9 इजी ते पईले तेती शमौन नाओं रा एक माणू रओ था, जो जादू-टौणा करी की सामरिया जातिया रे लोका खे हैरान करो था और आपणे आपू खे कोई बड़ा माणू बताओ था ।¹⁰ और सब छोटिया ते लयी की बडेया तक तेसखे मानो थे और बोलो थे, “ये माणू परमेशरो री से सामर्थ ए, जेतेखे महान् बोलोए ।”¹¹ तिने बऊत दिनो ते सेयो आपणे जादूओ रे कामो साथे हैरान करी राखे थे । तेबेई तो सेयो तेसखे बऊत मानो थे ।¹² पर जेबे तिने फिलिप्पुसो पाँदे विश्वास कित्तेया, जो परमेशरो रे राज्य रा और प्रभु यीशु मसीह रे नाओं रा सुसमाचार सुणाओ था, तेबे लोक, क्या मर्द क्या जवाणसा, सब बपतिस्मा लणे लगे ।¹³ तेबे शमौने आपू बी विश्वास कित्तेया और बपतिस्मा लई की फिलिप्पुसो साथे रणे लगेया, से चिह्न और बडे-बडे सामर्था रे काम देखी की हैरान ओ था ।

~~~~~

14 जेबे पुररिते, जो यरूशलेम नगरो रे रओ थे, सुणेया कि सामरिया रे लोके परमेशरो रा वचन मानी ला रा, तेबे पतरस और यूहन्ना तिना गे पेजे ।<sup>15</sup> तेबे तिने जाई की तिना खे प्रार्थना किच्ची, ताकि पवित् आत्मा खे पाओ ।<sup>16</sup> कऊँकि से एबुए तक केसी पाँदे नि उतरेया था, तिने तो बस प्रभु यीशुए रे नाओं ते बपतिस्मा लयी राखेया था ।<sup>17</sup> तेबे पतरसे और यूहन्ने तिना पाँदे आथ राखे और पवित् आत्मा तिना पाँदे आया ।<sup>18</sup> जेबे शमौने देखेया कि पुरेरिता रे आथ राखणे ते पवित् आत्मा दित्तेया जाओआ, तेबे तिने तिना गे पैसे ल्याई की तिना खे बोलेया, <sup>19</sup> “ये सामर्थ माखे बी देयो ताकि जेस केसी पाँदे आथ राखूँ, तेसखे पवित् आत्मा मिलो ।”

20 पतरसे तेसखे बोलेया, “तेरे पैसे तां साथे ई नाश ओ, कऊँकि तैं परमेशरो रा दान पैसेया साथे खरीदणे रे बारे रे सोचेया ।<sup>21</sup> एते सेवा रे तेरा मेरा कोई लेणा-देणा निए कऊँकि तेरा मन परमेशरो सामणे सच्चा निए ।<sup>22</sup> इजी री खातर आपणी एसा बुराईया ते मन फिराई की प्रभुए ते प्रार्थना कर, ऊई सकोआ कि तेरे मनो रा बिचार माफ ऊई जाओ ।<sup>23</sup> कऊँकि आऊँ देखणे लगी रा कि ताखे इतणी जलन ओई और पापो रे बन्दनो रे पड़े राए ।”<sup>24</sup> शमौने जवाब दित्तेया, “तुसे मेरिया तँई प्रभुए ते प्रार्थना करो कि जो गल्ला तुसे बोलिया, तिना बीचा ते कोई बी मां पाँदे नि पड़ो ।”<sup>25</sup> तेबे सेयो गवाई देई की और प्रभु यीशुए रा वचन सुणाई की यरूशलेमो खे वापस ऊईगे और तिने सामरिया रे बऊत सारे गांव रे सुसमाचार सुणाया ।

?????????? ?? ??? ???????

26 तेबे प्रभुए रे एक स्वर्गदूते फिलिप्पुसो खे बोलेया, “उठी की दक्खणा री तरफा खे, तेसा बाटा रे जा, जो यरूशलेमो ते गाजा नगरो खे जाओई। ये रेगिस्तान बाट ए।” 27 फिलिप्पुस उठी की चली गा। बाटा रे तेसरी मुलाकात एक खोजे ते ऊई, जो कूश देशो री राणी कन्दके रा मन्त्री और खजान्ची था। से भक्ति करी की यरूशलेमो ते वापस आऊणे लगी रा था। 28 से आपणे रथो रे था बैटेया रा और यशायाह भविष्यबक्ते री कताब पढ़दा ऊआ आपणे देशो खे जाणे लगी रा था। 29 तेबे पवित्तर आत्मे फिलिप्पुसो खे बोलेया, “नेडे जाई की एस रथो साथे ऊई जा।” 30 फिलिप्पुसे तेसरी तरफा खे दौड़ी की से यशायाह भविष्यबक्ते री कताब पढ़दे ऊए सुणेया और पूछेया, “जो तू पढ़ने लगी रा क्या समजणे बी लगी रा?” 31 तिने बोलेया, “जदुओ तक माखे कोई समजयाओ गा नि, तदुओ तक माखे कियोँ समज आऊणा?” तेबे तिने फिलिप्पुसो ते बिनती किती कि रथो पाँदे चढ़ी की मां साथे बैठी जा। 32 पवित्तर शास्त्रो रा जो पाठ से पढ़ने लगी रा था, से ये था “से पेडा जेड़ा काणे खे पऊँछ्या।

और जियोँ मिन्दू आपणे ऊन कापणे वालेया सामणे चुप रओआ, तियोँ ई तिने बी आपणा मूँ नि खोलेया।

33 तेसरी दीनता रे तेसरा न्याय नि ऊआ और तेसरे बखतो रे लोका रे बारे रे केस बताणा, कऊँकि तरतिया ते तेसरी जिन्दगी लयी ली।”

34 तेबे खोजे फिलिप्पुसो ते पूछेया, “आऊँ तांते बिनती करूँआ कि भविष्यबक्ता ये किजी रे बारे रे बोलणे लगी रा आपणे या केसी दूजे रे बारे रे?” 35 तेबे फिलिप्पुसे बोलणा शुरू कितेया और एते ई शास्त्रो ते शुरू करी की तेसखे प्रभु यीशुए रा सुसमाचार सुणाया। 36 बाटा रे चलदे ऊए सेयो पाणिए रे कनारे पऊँछे, तेबे खोजे बोलेया, “देख, एती पाणी ए, एबे माखे बपतिस्मा लणे ते कुण रोकी सकोआ?” 37 फिलिप्पुसे बोलेया, “जे तू सारे मनो ते विश्वास करेया, तो लई सकोआ।” तिने बोलेया, “आऊँ विश्वास करूँआ कि यीशु मसीह परमेशरो रा पुत्तर ए।” 38 तेबे तिने रथ खड़ा करने री आज्ञा दिती और खोजा और फिलिप्पुस दोनो जणे पाणिए बीचे गये और फिलिप्पुसे तेसखे बपतिस्मा दितेया। 39 जेबे सेयो पाणिए ते निकली की पाँदे आए, तेबे प्रभुए रा पवित्तर आत्मा फिलिप्पुसो खे चकी की लयी गा। और खोजे से फेर नि देखेया और से खुश ऊईगा कि परमेशरे आऊँ बचाईता और आपणे देशो खे चली गा। 40 तेबे फिलिप्पुस अशदोद नगरो रे आयी की निकलेया और जदुओ तक कैसरिया नगरो रे नि पऊँछेया, तदुओ तक नगरो-नगरो रे सुसमाचार सुणांदा रया।

## 9

?????? ?? ??? ???????

(?????????? 22:6-16; 26:12-18)

1 शाऊल जो एबुए तक प्रभु यीशुए रे चेलेया खे तमकाणे और काणे री ताका रे था, प्रदान पुरोईतो गे गया। 2 और तेसते दमिश्क नगरो रे नाओ रे प्रार्थना रे कअरो रे नाओ पाँदे इजी खे चिट्ठिया मांगिया कि क्या मर्द क्या जवाणसा, जिना खे से एस पंथो रे पाओगा, तिना खे बानी की यरूशलेमो रे ली आऊँ। 3 जेबे शाऊल और तेसरे लोक चलदे-चलदे दमिश्क नगरो रे नेडे पऊँछे, तेबे एकदम सर्गो ते तेसरे चऊँ कनारे ते जोति चमकी 4 और से जमीना पाँदे रूड़ी गा और तिने प्रभुए री ये आवाज सुणी, “ओ शाऊल! ओ शाऊल! तू माखे कऊँ सताणे लगी रा?” 5 तिने पूछेया “ओ प्रभु! तू कुण ए?” तिने बोलेया, “आऊँ यीशु ए। जेसखे तू सताएया। 6 पर एबे उठी की नगरो खे जा और जो कुछ करना, से ताखे बताई देणा।” 7 जो माणू तेस साथे थे, सेयो चुपचाप रये, कऊँकि तिना खे आवाज तो सुणने लगी री थी, पर कोई दिशो नि था। 8 तेबे शाऊल जमीना पाँदा ते उठेया, पर जेबे तिने आखी खोलिया तेबे तेसखे कुछ नि दिशेया। तेबे सेयो तेसरा आथ पकड़ी की तेसखे दमिश्क नगरो खे लयी गे। 9 से तीन दिन तक नि देखी सकेया और ना ई तिने खाया-पिया।

10 दमिश्क नगरो रे हनन्याह नाओ रा एक चेला था, तेसखे प्रभु यीशुए दर्शनों रे बोलेया, “ओ हनन्याह!” तिने बोलेया, “हां प्रभु!” 11 तेबे प्रभु यीशुए तेसखे बोलेया, “उठी की तेसा गलिया

रे जा, जेतखे सीदी बोलोए और यहूदा रे कअरे शाऊल नाओं रे एक तरसुसो रे रणे वाले खे पछ्ही लो; कऊँकि देख, से प्रार्थना लगी रा करने। 12 तिने दर्शणो रे देखेया कि हनन्याह नाओं रे एक मांणूए पीतरे आई की तेस पाँदे आथ राखे ताकि फेर देखणे लगे। 13 हनन्याह बोलेया, “ओ प्रभु! मैं एस मांणूए रे बारे रे बऊत जणेया ते सुणी राखेया कि इने यरूशलेमो रे तरे पवित्तर लोका साथे बडिया-बडिया बुराईया करी राखिया। 14 और एती बी एसखे बडे पुरोईतो री तरफा ते अक्क मिली रा कि जो लोक तां पाँदे विश्वास करोए, तिना सबी खे बानी की यरूशलेमो खे लयी जाओ।”

15 पर प्रभुए तेसखे बोलेया, “तूँ चली जा, कऊँकि से तो दूजी जातिया और राजा और इस्राएली लोका सामणे मेरा नाओं रा प्रचार करने खे मेरा चुणे रा जणा ए। 16 और मां तेसखे बताणा कि मेरे नाओं खे तेसखे केडा-केडा दुःख उठाणा पडना।” 17 तेबे हनन्याह उठेया और तेस कअरो रे गया जेती शाऊल था और तेस पाँदे आपणा आथ राखेया और बोलेया, “ओ शाऊल पाई! प्रभु, मतलब-यीशु जो तेसा बाटा रे, जिसिये तूँ आया और ताखे दिशेया था, तिने ई आऊँ पेजी राखेया, ताकि तूँ फेर देखणे लगे और पवित्तर आत्मा ते परिपूर्ण ऊई जाओ।” 18 तेबे तेसरी आखी ते छिलके जे निकले और से देखणे लगेया और तिने उठी की बपतिस्मा लया, 19 तेबे रोटी खाई की तागत पाई। से कई दिन तक तिना चलेया साथे रया, जो दमिश्क नगरो रे थे।

### \*\*\*\*\*

20 तेबे से फटाफट दमिश्क नगरो रे प्रार्थना रे कअरो रे प्रभु यीशुए रा प्रचार करने लगेया, “यीशु ई परमेशरो रा पुत्र ए।” 21 तेबे सब सुणने वाले हैरान ऊई की बोलणे लगे, “क्या ये सेई मांणू निए, जो यरूशलेमो रे तिना खे जो यीशुए रे विश्वासी थे, नाश करी देओ था और एती बी इजी खे आया था कि तिना खे बानी कि बडे पुरोईतो गे लयी जाओ।” 22 पर शाऊल ओर बी सामर्थी ऊँदा गया और एसा गल्ला रा सबूत देई-देई की कि मसीह येईए, दमिश्क नगरो रे रणे वाला यहूदिया रा मूँ बंद करदा रया।

23 जेबे बऊत दिन बीती गे, तेबे यहूदिये मिली की तेसखे काणे री तरकीब निकयाली। 24 पर तिना री तरकीब शाऊलो खे पता लगी गी। सेयो तो तेसखे काणे री ताका रे रात-दिन फाटुको रिये लगे रे रओ थे, 25 पर राथियो खे चलेया शाऊल टोकरिया रे बठयालेया और शहरपनाहो पाँदा ते लटकाई की उतारी ता।

### \*\*\*\*\*

26 यरूशलेमो रे जाई की तिने चलेया साथे मिलणे रा उपाय कित्तेया, पर सब तेसते डरो थे, कऊँकि तिना खे विश्वास नि ओ था कि से बी चेला ए। 27 पर बरनबासे से आपू साथे प्रेरिता गे लयी जाई की तिना खे बोलेया कि इने कियोँ प्रभु यीशु दमिश्क नगरो री बाटा रे देखेया और इने तेस साथे गल्ला कित्तिया और तेबे इने दमिश्को रे बड़ी ई इम्मत साथे प्रभु यीशुए रा प्रचार कित्तेया। 28 चलेया बरनबासो री गल्ला पाँदे विश्वास कित्तेया और शाऊल तिना साथे यरूशलेमो रे आऊँदा-जाँदा रया और निडर ऊई की प्रभु यीशुए रे नाओं रा प्रचार करो था। 29 से यूनानी पाषा बोलणे वाले यहूदिया साथे गल्ल-बात और बईस करो था। तेबे सेयो तेसखे काणे री कौशिश करने लगे। 30 ये जाणी की पाई तेसखे कैसरिया नगरो रे ली आए और तरसुस नगरो खे पेजी ता। 31 तेबे सारे यहूदिया, गलील और सामरिया प्रदेशो री मण्डलिया खे चैन मिलेया और मण्डली विश्वासो रे बड़दी गई। से प्रभुए रे डरो रे और पवित्तर आत्मा री शान्तिया रे चलदी और गिणतिया रे बड़दी गई।

### \*\*\*\*\*

32 तेबे एडा ऊआ कि पतरस सबी प्रदेशा रे कुमदा-फिरदा ऊआ तिना पवित्तर लोका गे बी पऊँछेया, जो लुदा नगरो रे रओ थे। 33 तेती तेसखे ऐनियास नाओं रा मांणू मिलेया, जेसखे अदरंग था और से आठ साला ते माँजे पाँदे पडिया रा रओ था। 34 पतरसे तेसखे बोलेया, “ओ ऐनियास! प्रभु यीशु मसीह ताखे ठीक करोआ, उठ, आपणा बछ्ऊणा बछ्छा। तेबे से फटाफट खडा ऊईगा।”

35 तेबे लुद्दा और शारोण नगरो रे बऊत सारे रणे वाले, तेसखे देखी की प्रभु यीशुए पाँदे विश्वास कितेया ।

36 याफा नगरो रे तबीता, मतलब-दोरकास प्रभु यीशुए पाँदे विश्वास करने वाली चेली रओ थी । से बऊत खरे काम और दान करदी रओ थी । 37 तिना दिना रे जेबे पतरस लुद्दा नगरो रे था से बमार ऊई की मरी गी और तिने से नुलाई की बाऊड़ी रे राखी ती । 38 लुद्दा याफा रे नेडे था, चेलेया ये सुणी की कि पतरस तेती ये, दो माणू पेजी की तेसते बिनती किती कि, “आऊणे रे देर नि कर ।” 39 तेबे पतरस तिना साथे आईगा और जेबे पऊँछी गा, तेबे सेयो तेसखे तेस बाऊड़ी रे लयी गो और तेती सब बिदुआ रोदिया उईया तेसगे खडिया ऊई गिया और जो टाले और कुरते दोरकासे तिना साथे रंदे ऊए बणाए थे, दखाणे लगिया । 40 तेबे पतरसे सब जणियां बारे करी तिया और कुटणे टेकी की प्रार्थना किती और लोथा रे कनारे देखी की बोलेया, “ओ तबीता! उठ ।” तेबे तेसे आपणी आखिया खोली तिया और पतरसो खे देखी की उठी की बैठी गी । 41 तिने आथो रा सआरा लगाई की से ठवाली और पवित्तर लोका खे और बिदुआ खे बुलाई की से जिऊँदी-जागदी दखाई ती । 42 ये गल्ल सारे याफा नगरो रे फैली गी और बऊत जणेया प्रभु यीशुए पाँदे विश्वास कितेया । 43 पतरस याफा नगरो रे शमौन नाओं रे केसी चामड़े रा काम करने वाले माणूए रे कअरे बऊत दिनो तक रया ।

## 10

?????????? ?? ????? ?? ?????

1 कैसरिया नगरो रे कुरनेलियुस नाओं रा एक माणू था, जो इतालियानी नाओं री पलटणा रा सूबेदार था । 2 से विश्वासी था और आपणे सारे कराने समेत परमेशरो ते डरो था और से यहूदिया रे लोका खे बऊत दान देओ था और हर रोज परमेशरो ते प्रार्थना करो था । 3 तिने दिनो रे तीजे पईरो रे नेडे दर्शनो रे साफ देखेया कि परमेशरो रा एक स्वगंदूत तेसगे पीतरे आयी की बोलोआ, “ओ कुरनेलियुस!” 4 कुरनेलियुसे से त्यानो साथे देखेया और डरी की बोलेया, “ओ प्रभु! क्या ए?” तिने तेसखे बोलेया, “तेरी प्रार्थना और तेरे दान याद करने खे परमेशरो रे सामणे पऊँछी रे 5 और एबे याफा नगरो रे कोई माणूआ खे पेजी की शमौनो खे, जेसखे पतरस बोलोए, बुलाई लो । 6 शमौन चामड़े रा काम करने वाले रे कअरे पराऊणा ए, जेसरा कअर समुद्रो रे कनारे ए ।” 7 जेबे से स्वगंदूत जिने तेस साथे गल्ला कितिया थिया, चली गा, तेबे तिने दो दास और जो तेस साथे रओ थे, तिना बीचा ते एक विश्वासी सिपाई बुलाया । 8 तिना खे सारिया गल्ला बताई की सेयो याफा नगरो खे पतरसो खे बुलाणे पेजे ।

?????? ?? ???? ?

9 दूजे दिने जेबे सेयो चलदे ऊए नगरो रे पऊँछे, तेबे त्याडिया जे पतरस छुतो पाँदे प्रार्थना करने खे चढ़ेया । 10 तेबे तेसखे पूख लगी और से कुछ खाणा चाओ था; पर जेबे सेयो रोटी बनावणे री तयारी करने लगी रे थे, तदुओ की से बेओश ऊईगा । 11 तेबे तिने देखेया कि सर्ग खुली गा और एक बड़ी चादर, पांडे जेड़ी चऊ कूणे ते लटकी री, तरतिया री तरफा खे उतरने लगी री । 12 जिदे तरतिया रे सब प्रकारा रे चऊ पैरा वाले जानवर और रेंगणे वाले जन्तु और सर्गो रे पँछी थे । 13 तेबे तेसखे एक शब्द सुणेया, “ओ पतरस उठ और काई की खा ।” 14 पर पतरसे बोलेया, “ना प्रभु, कदी पनि, कऊँकि मैं कदी बी अपवित्तर या अशुद्ध चीज नि खाई ।” 15 तेबे दूजी बार तेसखे शब्द सुणेया, “जो कुछ परमेशरे शुद्ध ठराई राखेया, तेसखे अशुद्ध नि बोल ।” 16 तीन बार एड़ा ई ऊआ । तेबे फटाफट से पांडा सर्गो खे चकी ता ।

17 जेबे पतरस आपणे मनो रे दुबिदा रे था कि ये दर्शन जो मैं देखेया क्या ऊई सकोआ? तेबे देखो, सेयो माणू जो कुरनेलियुसे पेजे थे, शमौनो रे कअरो रा पता लगाई की द्वारो पाँदे आयी की खडे ऊईगे 18 और आक्का पाई की पूछणे लगे, “क्या शमौन, जेसखे पतरस बोलोए, एथी पराऊणा ए?” 19 पतरस तो तेस दर्शनो रे बारे रे सोचणे ई लगी रा था कि पवित्तर आत्मे तेसखे बोलेया, “देख तीन माणू ताखे टोलने लगी रे । 20 तो उठ और थाले जा और फटाफट तिना साथे चली जा, कऊँकि मैं

ई सेयो पेजी राखे।” 21 तेबे पतरसे उतरी की तिना माणूआ खे बोलेया, “देखो, जेसखे तुसे टोलने लगी रे, से आऊँ ईए। तुसा रे आऊणे री क्या बजअ ए?” 22 तिने बोलेया, “कुरनेलियुस सूबेदार, जो तर्मी और परमेशरो ते डरने वाला ए और सारी यहूदी जातिया रे जाणेया-माणेया माणू ए, तिने एक पवित्तर स्वर्गदूतो ते चेतावणी पाई कि ताखे आपणे कअरे बुलाई की तांते वचन सुणो।” 23 तेबे तिने सेयो पीतरे बुलाई की तिना री पराऊणचारी किती और दूजे दिने से तिना साथे गया और याफा नगरो रे कुछ विश्वासी पाईया बीचा ते कई जणे तेस साथे चली पड़े।

?????????? ?? ???? ???? ?

24 दूजे दिने सेयो केसरिया नगरो रे पऊँछे और कुरनेलियुस आपणे टब्वरो वालेया साथे और खास दोस्ता साथे कट्टे ऊई की तिना खे न्यालने लगी रा था। 25 जेबे पतरस पीतरे आऊणे लगी रा था, तेबे कुरनेलियुस तेसखे मिलेया और तेसरे पैरा पाँदे पड़ी की माथा टेकेया। 26 पर पतरसे तेसखे उटाली की बोलेया, “खड़ा ओ, आऊँ बी तो माणू ए।” 27 तेबे से तेस साथे बातचीत करदा ऊआ पीतरो खे गया। तेबे तिने बऊत सारे लोक कट्टे देखी की 28 पतरसे तिना खे बोलेया, “तुसे जाणेए कि दुजिया जातिया साथे संगति करना या तेसरे कअरे जाणा, यहूदी नियमा रे खलाफ ए, पर परमेशरे माखे बताई राखेया कि केसी बी माणूए खे अशुद्ध या अपवित्तर नि बोलो। 29 तेबेई तो जेबे आऊँ बुलाया, तेबे बिना कुछ बोले चली की आया। एबे आऊँ पुछूँआ कि आऊँ किजी खे बुलाई राखेया?”

30 कुरनेलियुसे बोलेया, “एसा कअड़िया चार दिन पूरे ऊईगे, आऊँ आपणे कअरे तीजे पईरो रे प्रार्थना करने लगी रा था, तेबे देखो, एक माणू चमकीले टाले पईनी की मां सामणे आयी की खड़ा ऊईगा 31 और बोलणे लगेया कि, ओ कुरनेलियुस! तेरी प्रार्थना सुणी ली री और तेरे दान परमेशरो रे सामणे याद करी राखे। 32 इजी री खातर केसी खे याफा नगरो रे पेजी की शमौनो खे, जेसखे पतरस बोलोए, तेसखे बुला। से समुद्रो रे कनारे शमौन चामडे रा काम करने वाले रे कअरे पराऊणा ए। तेस आई की तुसा खे परमेशरो रा संदेश सुनाणा। 33 तेबे मै फटाफट तांगे लोक पेजे और तै खरा कित्तेया जो आईगा। एबे आसे सब परमेशरो सामणे ए, ताकि जो कुछ परमेशरे तांगे बोली राखेया, से सुणिंए।”

?????? ?? ???? ?

34 तेबे पतरसे बोलेया, “एबे माखे निश्चा ऊआ कि परमेशर केसी रा पक्षपात नि करदा। 35 बल्कि हर जातिया दे, जो परमेशरो ते डरोआ और तर्मी रे काम करोआ, से तेसखे अच्छा लगेआ। 36 जो वचन तिने इस्राएलिया गे पेजेया, जेबे तिने प्रभु यीशु मसीह रे जरिए (जो सबी रा प्रभु ए) शान्तिया रा सुसमाचार सुणाया। 37 से वचन तुसे जाणेए, जो यहूदने रे बपतिस्मे रे प्रचारो ते बाद गलील प्रदेशो ते शुरू उई की यहूदिया प्रदेशो रे बऊत सारी जगा रे फैली गा। 38 परमेशरे कियाँ प्रभु यीशु नासरी पवित्तर आत्मा और सामथां ते अभिषेक कित्ते। से पलाई करो था और बऊत सारे लोक जो शेतानो रे सताए रे ओ थे, अच्छा करदा फिरेया, कऊँकि परमेशर तेस साथे था।

39 “आसे तिना सबी कामो रे गवा ए, जो तिने यहूदिया प्रदेशो रे और यरूशलेमो रे बी कित्ते और यहूदी अगुवे से यरूशलेमो रे कूरूसो पाँदे लटकाई की काई ता। 40 पर से परमेशरे तीजे दिने जिऊँदा कित्तेया और प्रगट बी करी ता। 41 सबी लोका खे नि, बल्कि तिना गवाओ पाँदे, जो परमेशरे पइले ई चुणी ले थे, मतलब-आसा पाँदे, जिने तेसरे मरने और जिऊँदे ऊणे ते बाद तेस साथे खाया-पिया। 42 तिने आसा खे आज्ञा दिती कि सबी लोका बीचे प्रचार करो और गवाई देओ कि ये सेई, जो परमेशरे जिऊँदेया रा और मरे रेया रा न्यायी ठराई राखेया। 43 तेसरी सब भविष्यवक्ता गवाई देओए, ताकि जो कोई तेस पाँदे विश्वास करो, तेसखे तेसरे नाओ ते पापो ते माफी मिलणी।”

???????? ???? ???? ???? ???? ???? ?

44 पतरस इना गल्ला खे बोलणे ई लगी रा था कि वचनो रे सबी सुणने वालेया पाँदे पवित्तर आत्मा उतरी गा 45 और जितणे खतना करे रे यहूदी विश्वासी पतरसो साथे आए थे, सेयो सब हैरान ऊईगे

कि दुजिया जातिया पाँदे बी पवित्तर आत्मा रा दान लटी राखेया।<sup>46</sup> कऊँकि तिने सेयो लग-लग पाषा बोलदे ऊए और परमेशरो री तारीफ करदे ऊए सुणे।<sup>47</sup> तेबे पतरसे बोलेया, “क्या कोई पाणिण्खे रोकी सकोआ कि यो बपतिस्मा नि पाओ, जिने आसा जेड़ा परमेशरो री तरफा ते पवित्तर आत्मा पाई राखेया?”<sup>48</sup> और पतरसे आज्ञा दित्ती कि तिना खे प्रभु यीशु मसीह रे नाओं ते बपतिस्मा देओ, तेबे तिने तेसते विनती कित्ती कि तुसे कुछ दिन ओर आसा साथे रओ। तेबे से तिना साथे कुछ दिन ओर रईगा।

## 11

XXXXXXXXXX XX XXXXXXXX

1 तेबे प्रेरिते ओर विश्वासी पाईए जो यहूदिया प्रदेशो रे थे, सुणेया कि दूजिये जातिये बी परमेशरो रा वचन मानी ला रा।<sup>2</sup> जेबे पतरस यरूशलेमो रे आया, तेबे खतना करे रे यहूदी विश्वासी तेस साथे बईस करने लगे<sup>3</sup> और बोलेया, “तैं विना खतना कराए दूजी जातिया रे कअरे जाई की तिना साथे खाणा बी खाई ला।”<sup>4</sup> तेबे पतरसे तिना खे शुरूओ ते एक-एक करी की सुणाया,<sup>5</sup> “आऊँ याफा नगरो रे प्रार्थना करने लगी रा था और बेओश ऊई की एक दर्शन देखेया, कि एक बड़ी चादर, एक पांडे जेड़ी, चऊँ कूणे ते लटकी री सर्गों ते ऊतरी की मांगे आयी।<sup>6</sup> जेबे मैं तिजी पाँदे त्यान कित्तेया, तेबे तिदे तरतिया रे चऊँ पैरा वाले जानवर और बणो रे पशु, लूरने वाले जन्तु और सर्गों रे पंछी देखे<sup>7</sup> और ये शब्द बी सुणेया, ‘ओ पतरस उठ, मार और खा।’

8 “मैं बोलेया, ‘ना प्रभु! ना, कऊँकि कोई बी अपवित्तर या अशुद्ध चीज मैं कदी नि खाई।’<sup>9</sup> तेबे एतेरे जवाबो रे दूजी बार सर्गों ते शब्द ऊआ, ‘जो कुछ परमेशरे शुद्ध ठराई राखेया, तेसखे अशुद्ध नि बोल।’<sup>10</sup> तीन बार एड़ा ई ऊआ, तेबे सब कुछ सर्गों खे खिंजी ता।<sup>11</sup> और देखो, तेबुई तीन माणू, जो कैसरिया नगरो ते मांगे पेजी राखे थे, तेस कअरो रे, जेती आसे थे, आयी की खडे ऊईगे।<sup>12</sup> तेबे पवित्तर आत्मे माखे तिना साथे चुप-चाप जाणे खे बोलेया और यो छे पाई बी मां साथे आईगे और आसे तेस माणूए रे कअरे गये।<sup>13</sup> तिने आसा गे बताया कि मैं एक स्वर्गदूत आपणे कअरे खडे रा देखेया, जिने माखे बोलेया कि याफा रे माणूआ खे पेजी की शमोनो खे, जेसखे पतरस बी बोलोए, बुला।<sup>14</sup> तेस तांगे एडिया गल्ला बोलणिया, जेते साथे तां और तेरे कराने उद्धार पाणा।

15 “जेबे आऊँ तिना साथे गल्ला लगी रा था करने, तेबे पवित्तर आत्मा तिना पाँदे तियाँ ई आया, जियाँ शुरूओ रे पेन्तिकुस्तो रे दिने आसा पाँदे उतरेया था।<sup>16</sup> तेबे माखे प्रभुए रा से वचन याद आया, जो तिने बोलेया था, ‘यूहन्ने तो पाणिण्खे साथे बपतिस्मा दित्तेया, पर तुसा पवित्तर आत्मा रा बपतिस्मा पाणा।’<sup>17</sup> तो जेबे परमेशरे बी तिना खे सेई दान दित्तेया, जो आसा खे प्रभु यीशु मसीह पाँदे विश्वास करने ते मिलेया था, तो आऊँ कुण था, जो परमेशरो खे रोकी सकूँआ?”<sup>18</sup> ये सुणी की यहूदी विश्वासी चुप रये और परमेशरो री तारीफ करी की बोलणे लगे, “तेबे तो परमेशरे दुजिया जातिया खे बी अनन्त जीवनो खे बुरे कामा ते मन फिराणे रा मौका देई राखेया।”

XXXXXXXXXX XX XXXXXXXX

19 तेबे जो लोक तेस क्लेशो रे मारे जो स्तिफुनुसो री बजअ ते पड़ेया था, ओरे-पोरे ऊईगे थे, तेबे सेयो कूमदे-फिरदे फीनीके प्रदेश, साईप्रस टापू और अन्ताकिया नगरो रे पऊँछे, पर सेयो यहूदिया ते अलावा केली ओरी खे परमेशरो रा वचन नि सुणाओ थे।<sup>20</sup> पर तिना बीचा ते कुछ विश्वासी साईप्रसवासी और कुरेनी थे, जो अन्ताकिया नगरो रे आयी की यूनानिया खे बी प्रभु यीशु मसीह रे सुसमाचारो रिया गल्ला सुणाओ थे।<sup>21</sup> प्रभुए री सामर्थ तिना साथे थी और बऊत सारे दूजिया जातिया रे लोक तिना रे संदेशो पाँदे विश्वास करी की प्रभुए री तरफा खे फिरी गे।<sup>22</sup> जेबे तिना रे बारे रे यरूशलेमो री मण्डलिया रे सुणने खे मिलेया, तेबे तिने बरनबास अन्ताकिया नगरो खे पेजेया।<sup>23</sup> से तेती पऊँछी की और परमेशरो री कृपा देखी की खुश ऊआ और तिने सबी खे उपदेश दित्तेया कि तन-मन लगाई की प्रभुए साथे चीपटे रे रओ।<sup>24</sup> बरनबास एक खरा माणू था

और पवित्तर आत्मा और विश्वासो रे परिपूर्ण था और बऊत सारे लोक प्रभुए रे मिली गे। 25 तेबे बरनबास शाऊलो खे टोलने तरसुसो खे चली गा।

26 और जेबे सेयो तेसखे मिले, तो तेसखे अन्ताकिया नगरो रे ली आया। तेबे एड़ा ऊआ कि बरनबास और शाऊल एक साल तक मण्डलिया साथे मिलदे और बऊत सारे लोका खे यीशुए रा उपदेश देंदे रये और चेलैया खे सबी ते पईले अन्ताकिया नगरो रे मसीह बोलेया। 27 तिना दिना रेई कुछ विश्वासी जो भविष्यबक्ता थे, यरूशलेमो ते अन्ताकिया नगरो खे आए। 28 तिना बीचा ते अगबुस नाओं रे एक भविष्यबक्ते खड़े ऊई की पवित्तर आत्मा री प्रेरणा ते ये बताया कि सारी दुनिया रे बऊत बड़ा अकाल पड़ना और से अकाल क्लौदियुस महाराजे रे बखतो रे पड़ना। 29 चेलैया न्याय कित्तेया कि हर एक आपणिया-आपणिया आऊँदणियां रे मुताबिक, यहूदिया प्रदेशो रे रणे वाले विश्वासी पाईया री मतादा खे कुछ पेजो। 30 तिने एड़ा ई कित्तेया और बरनबास और शाऊलो गे बुजुर्ग लोका खे कुछ पैसे पेजी ते।

## 12

????? ? ? ? ? ? ? ? ? ? ? ? ? ? ? ? ? ?

1 तेस बखते हेरोदेस राजा मण्डलिया रे कई लोक दुःख देणे खे पकड़े। 2 तिने यूहन्ने रा पाई याकूब तलवारे की मरवाया। 3 जेबे तिने देखेया कि यहूदी लोक इजी ते खुश ओए, तेबे तिने पतरस बी पकड़ी ता। सेयो अखमीरी रोटिया रे त्योआरो रे दिन थे। 4 हेरोदेसे पतरस पकड़ी की जेला रे पायी ता और रखवालिया खे चार-चार सिपाईया खे चार पईरे रे राखेया। एड़ी इच्छा ते ताकि तेसखे फसह रे त्योआरो ते बाद लोका सामणे ल्याईए। 5 पतरस जेला रे कई दिना ते बंद था, पर मण्डली तेसरी खातर दिऊआ बाली की परमेशरो ते प्रार्थना लगी री थी करने।

6 जेबे हेरोदेस तेसखे लोका सामणे मुकद्दमा चलाणे खे ल्याऊणे वाला था, तो तेसा ई राती पतरस दो जंजीरा साथे बाने रा, दो सिपाईया रे बीचे सऊणे लगी रा था और पईरेदार द्वारो पंदि जेला री रखवाली लगी रे थे करने। 7 अचाणक प्रभुए रा एक स्वर्गदूत आयी की पतरसो रे नेडे खड़ा ऊईगा और तेती कोठरिया रे जोति चमकणे लगी और तिने पतरसो री पसलिया रे आथ बाई की से जगाया और बोलेया, "उठ, फटाफट कर।" तेसरे आथो ते जंजीरा खुली की छुटी गया। 8 तेबे स्वर्गदूते तेसखे बोलेया, "लक बान और आपणे बूट पईनी लो।" तिने तेड़ा ई कित्तेया। तेबे स्वर्गदूते तेसखे बोलेया, "आपणे टाले पईनी की मां पीछे आईजा।"

9 से निकली की तेस पीछे आईगा, पर ये नि जाणो था कि जो स्वर्गदूत करने लगी रा, से सच्ची ये, बल्कि ये समजणे लगी रा था कि आऊँ सुपना लगी रा देखणे। 10 तेबे सेयो पईले और दूजे पईरे ते निकली की तेस लोए रे फाटको गे पऊँछे, जो नगरो री तरफा खे था। से तिना खे आपू तेई खुली गा और सेयो निकली की एकी गलिया रिये गये, तदुओ की स्वर्गदूत तेसखे छुड़ा की चली गा। 11 तेबे पतरसे ओशा रे आयी की बोलेया, "एबे आऊँ सच जाणी गा रा कि प्रभुए आपणा स्वर्गदूत पेजी की आऊँ हेरोदेसो रे आथो ते छुड़ाई ता और यहूदी अगुवारी री सारी उम्मीद तोड़ी ती।" 12 ये जाणी की परमेशरे से छुड़ाई ता रा पतरस तेस यूहन्ने री आम्मा मरियमा रे कअरे आया, जेसखे मरकुस बी बोलोए। तेती बऊत सारे विश्वासी कट्टे ऊई की प्रार्थना करने लगी रे थे। 13 जेबे तिने फाटको री दवारी खटखटाई तेबे रुदे नाओं री एक दासी देखणे आयी। 14 पतरसो री आवाज पछ्याणी की तेसे खुशिया रे मारे फाटक नि खोलेया, पर पीतरे दौड़ी की गयी और बताया, "पतरस द्वारो पंदि खड़ी रा।"

15 तिने तेसा खे बोलेया, "तूँ पागल ए?" पर से पक्का ऊई की बोलणे लगी कि से पतरस ईए। तेबे तिने बोलेया, "तेसरा स्वर्गदूत ऊणा।" 16 पर पतरस दरवाजा खटखटांदा ई रया। तेबे तिने द्वारी खोली और तेसखे देखी की हैरान ऊईगे। 17 तेबे तिने तिना खे आथो साथे सारा कित्तेया कि चुप रओ और तिना खे बताया कि प्रभु माखे किर्यां जेला ते निकयाली की ल्याया और बोलेया, "याकूब और पाईया खे ये गल्ल बताई देणी।" तेबे से निकली की दूजी जगा खे चली गा। 18 प्यागा-प्यागा





13 पौलुस और तेसरे साथी पाफुस नगरो ते जाहूज खोली की पंफूलिया पुरदेशो रे पिरगा नगरो रे आए। तेवे यूहन्ना मरकुस तिना खे छाडी की यरूशलेमो खे वापस ऊईगा। 14 तेवे सेयो पिरगा नगरो ते आगे पऊँछी की पिसिदिया पुरदेशो रे अन्ताकिया नगरो रे पऊँछे और आरामो रे दिने पुरार्थना रे कअरो रे जाई की बैठेगे। 15 मूसे रा बिधान और भविष्यबक्तेया री कताब पढ़ने ते बाद, पुरार्थना रे कअरो रे सरदारो तिना खे सन्देशा पेजेया, “ओ पाईयो! जे लोका री बढोतरिया री खातर तुसा रे मनो रे कुछ गल्ल आए तो बोलो।” 16 तेवे पौलुसे खडे ऊई की आथो साथे साअरा करी की बोलेया, “ओ इस्राएलियो! और परमेशरो ते डरने वालेयो, सुणो। 17 इना इस्राएलिया रे लोका रे परमेशरो आसा रे बाप-दादे चुणी ले और जेवे सेयो मिस्र देशो रे परदेशी ऊई की रओ थे, तेवे तिना री तरक्की किती और बऊत बडी सामर्था साथे निकयाली की ली आया। 18 एथो तक सेयो परमेशरो री आज्ञा खे तोडदे रये तेवे बी परमेशर तिना खे कोई चाली साल तक सुनसाण जगा रे तिना खे सईन करदा रया।

19 “तिने कनान देशो रे सात जातिया रा नाश करी की तिना री जमीन आपणे लोका रे कब्जे रे करी ती। 20 एते सारे कामो रे तकरीबन कोई साड चार सौ साल लगे। इजी ते बाद परमेशरे तिना खे शमुएल भविष्यबक्ता रे आऊणे तक तिना रे न्यायी ठराए। 21 जेवे शमुएल एबु बी तिना रा अगुवा था तेवे इस्राएली लोके आपू खे एक राजा मांगेया। तेवे परमेशरे चाली साला खे बिन्यामीनो रे गोत्रा बीचा ते एक मांणूए खे, मतलब-कीशो रा पाऊ शाऊल, तिना रा राजा बनाया। 22 तेवे परमेशरे शाऊलो खे राजे रे पदो ते टाई की तेसरी जगा पँदि दाऊदो खे इस्राएलिया रा राजा बनाया। जेसरे बारे रे तिने गवाई दिती कि माखे यिशे रा पाऊ दाऊद, मेरे मनो रे मुताबिक मिली गा रा, तेस ई मेरी सारी इच्छा पूरी करनी।

23 “इजी रेई वंशो बीचा ते परमेशरे आपणे वादे रे मुताबिक, इस्राएलो गे एक उद्धारकर्ता, मतलब-प्रभु यीशुए खे पेजेया। 24 जेसरे आऊणे ते पईले यूहन्ने सबी इस्राएलिया खे मन फिराणे रे बपतिस्मे रा प्रचार कित्तेया। 25 जेवे यूहन्ना आपणी सेवा पूरी करने वाला था, तेवे तिने बोलेया कि तुसे माखे क्या बोलोए? आऊँ मसीह निए, पर देखो, जो मांते बाद एक आऊणे वाला ए, से मांते इतणा महान ए, आऊँ तेसरे पैरो रे जोडे रे फिथे खोलणे जोगा बी निए।

26 “ओ पाईयो! तुसे जो अब्राहमो री ल्वाद ए और तुसे जो परमेशरो ते डरोए, तुसा गे एतेरे उद्धारो रा वचन पेजे राए। 27 यरूशलेमो रे रणे वाले और तिना रे अधिकारिए, ना यीशु पछयाणा और ना भविष्यबक्ते रिया गल्ला समजिया, जो हर आरामो रे दिने पडी जाओई। तेवेई से दोषी ठराई की सेयो गल्ला पुरिया कित्तिया। 28 तिने काणे जोगा तेसरे कोई दोष नि देखेया, तेवे बी पिलातुसे बिनती किती कि से काया जाओ। 29 जेवे तिने तेसरे बारे रे पवित्तर शास्तरो रे लिखी रिया सारिया गल्ला पुरिया कित्तिया। तिने से कुरूसो पँदि लटकाई की काई ता और तेवे कुरूसो पँदि ते उतारी की कबरा रे राखेया। 30 पर परमेशरे से मरे रेया बीचा ते जिऊँदा कित्तेया। 31 और से तिना खे जो तेस साथे गलील पुरदेशो ते यरूशलेमो खे आए थे, बऊत दिनो तक आपणे चलेया खे दिशदा रया। लोका सामणे एवे सेयो ई तेसरे गवा ए।

32 “आसे बी तुसा खे तेस वादे रे बारे दे, जो परमेशरे बाप-दादेया साथे कित्तेया था, ये सुसमाचार सुणाऊँए। 33 कि परमेशरे यीशुए खे मरे रेया बीचा ते जिऊँदा करी की सेई वादा आसा री ल्वाद खे पूरा कित्तेया, जेड़ा भजनसंहिता रे दूजे पजनो रे परमेशरे मसीह रे बारे बोली राखेया कि

“तूँ मेरा पुत्र ए,

आज मैं ई तूँ पैदा करी राखेया।

34 “और तेसरे ईयां मरे रेया बीचा ते जिऊँदे ऊणे रे बारे रे बी कि से कदी नि सडो, परमेशरे ये बोली राखेया मां दाऊदो पाँदलिया पवित्तर और अटल कृपा तुसा पँदि करनिया। 35 तेवेई तो दाऊदे एकी ओरी पजनो रे बी बोली राखेया कि

“तां आपणा पवित्तर जन सडने नि देणा।

36 “कऊँकि दाऊद तो परमेशरो री इच्छा रे मुताबिक आपणे बखतो री सेवा पूरी करी की मरी गा और आपणे बाप-दादेया साथे जाई की मिली गा और सड़ी बी गया। इजी रे जरिए आसे जाणूँ कि दाऊदे ये गल्ला आपणे बारे रे नि बोली राखिया। 37 पर ये गल्ला यीशुए रे बारे रे बोली राखिया थिया जो परमेशरे मरे रेया बीचा ते जिऊँदा करी राखेया, से सड़ेया नि।

38 “इजी री खातर, ओ पाईयो! तुसे जाणी लो कि एसरी ई बजअ ते पापो री माफिया रा सुसमाचार तुसा खे दितेया जाओआ 39 और जिना गल्ला साथे तुसे मूसे रिया विधानो रे जरिए निर्दोष नि ठईरी सको थे, तिना सबी ते हर एक विश्वास करने वाला, यीशुए री बजअ ते निर्दोष ठईरोआ। 40 तेबेई तो चौकस रओ, एड़ा नि ओ कि जो भविष्यबक्ता री कतावा रे लिखी राखेया, 41 तुसा पाँदे बी आओ कि,

“ओ निन्दा करने वाले देखो और हैरान ओ और खत्म ऊई जाओ,  
कऊँकि आऊँ तुसा रे दिनो रे एक काम करूँआ,  
एड़ा काम कि जे कोई तुसा ते तिजी रे बारे रे पूछो,  
तो तुसा कदी विश्वास नि करना।”

42 पौलुस और बरनबासो रे प्रार्थना रे कअरो ते बारे निकलदे बखते लोक तिना ते बिनती करने लगे कि आगले आरामो रे दिने तुसे आसा खे फेर इना गल्ला खे सुणाओ। 43 जेबे प्रार्थना रे कअरो रे लोक उठी गे, तेबे यहूदी और तिना रे मतो रे आए रे भक्ता बीचा ते बऊत पौलुस और बरनबासो पीछे आईगे और तिने तिना साथे गल्ला करी की सेयो समजयाए कि परमेशरो री कृपा रे बणे रे रओ।

~~~~~

44 आगले आरामो रे दिने नगरो रे तकरीबन सारे लोक परमेशरो रा वचन सुणने खे कट्टे ऊईगे। 45 पर यहूदी अगुवे पीड़ा खे देखी की जलना साथे परी गे और निन्दा करदे ऊए पौलुसो री गल्ला रे बिरोदो रे बोलणे लगे।

46 तेबे पौलुस और बरनबासे निडर ऊई की बोलेया, “जरूरी था कि पईले तुसा खे परमेशरो रा वचन सुणाया जांदा। पर जबकि तुसे लोके से नकारिता और आपू खे अनन्त जीवनी जोगा बणाओए, तो देखो, आसे दुजिया जातिया खे परमेशरो रा वचन सुनाणे खे जाऊँए। 47 कऊँकि प्रभुए आसा खे ये आज्ञा देई राखी कि

“मै तूँ दुजिया जातिया खे जोति ठराई राखेया;

ताकि तुसा रे जरिए सारी तरतिया पाँदे उद्धार ल्याया जाओ।”

48 ये सुणी की दूजी जाति खुश ऊई और परमेशरो रे वचनो री तारीफ करने लगे और जितणे अनन्त जीवनी खे बणाई राखे थे, तिने विश्वास कितेया। 49 तेबे प्रभुए रा वचन तेस सारे देशो रे फैलणे लगेया।

50 पर यहूदिया रे अगुवे भक्त और तर्मी जवाणसा और नगरो रे खास लोक उकसाए और पौलुस और बरनबासो पाँदे उपदरव करवाई की सेयो आपणे इलाके ते निकयाली ते। 51 तेबे पौलुस और बरनबास तिना सामणे आपणे पैरा री तूड़ चाडी की इकुनियुम नगरो खे चली गे 52 और अन्ताकिया नगरो रे चले खुशिया साथे और पवित्तर आत्मा ते परिपूर्ण ऊँदे गये।

14

~~~~~

1 इकुनियुम नगरो रे एड़ा ऊआ कि पौलुस और बरनबास यहूदिया रे प्रार्थना रे कअरो रे साथे गये और एड़िया गल्ला कितिया कि यहूदी और यूनानिया बीचा ते कई जणे विश्वास कितेया। 2 पर ना मानणे वाले यहूदिये दुजिया जातिया रे मन विश्वासी पाईया रे खलाफ उकसाए और फूट पैदा करी ती। 3 पौलुस और बरनबास बऊत दिनो तक तेती रये और प्रभुए पाँदे विश्वास करी की इम्मता साथे गल्ला करो थे और से तिना रे आथो साथे चिह्न और अचम्बे रे काम करवाओ था और आपणी

कृपा रे वचनो पाँदे गवाई देओ था। 4 पर इलाके रे लोका बीचे फूट पड़ी गी थी और तेबे कुछ लोक यहूदिया रे कनारे और कुछ प्रेरिता री तरफा खे ऊईगे थे। 5 जेबे दूजी जाति और यहूदी तिना रा मजाक करने और तिना खे पत्थराव करने खे आपणे अधिकारिया समेत तिना पाँदे दौड़े, 6 तेबे तिना खे एसा गल्ला रा पता लगी गा और सेयो लूकाउनिया परदेशो रे लुस्तुरा और दिखे रे नगरो रे और ओरे-पोरे रे परदेशो रे नटीगे 7 और तेती जाई की सुसमाचार सुनाणे लगे।

XXXXXXXXXX XX XXXXX XX

8 लुस्तुरा नगरो रे एक माणू था बैठे रा, जो पैरा ते कमजोर था। से जन्मो तेई लंगड़ा था और कदी पनि चली रा था। 9 से पौलुसो खे गल्ला करदे ऊए सुणेने लगी रा था और तिने एक टक लगाई की देखेया कि एसखे ठीक ऊणे रा विश्वास ए 10 और जोरे की बोलेया, “आपणे पैरा रे पोरे सीदा खड़ा ऊई जा।” तेबे से उटकी की चलणे-फिरने लगेया। 11 लोक पौलुसो पाँदे विश्वास करी की लूकाउनिया पाषा रे जोरे की बोलेया, “देवता आसा गे उतरी की आईगे रे।” 12 तेबे तिने बरनबासो खे यूनानी देवते रा नाओ पाँदे ज्यूस और पौलुसो खे हिरमेस बोलेया, कऊँकि ये संदेश करने रे खास था। 13 ज्यूस तेस मन्दरो रा पुजारी था, जो तेसरे नगरो ते सामणे था। बेल और फूला रे आर फाटका पाँदे लगाई की लोका साथे बलिदान करना चाओ था।

14 पर बरनबास और पौलुस प्रेरिते जेबे सुणेया, तो तेबे तिने आपणे टाले फाड़े और पीड़ा रे लमखणे लगे और आक्का पाई की बोलणे लगे, 15 “ओ लोको! तुसे क्या लगी रे करने? आसे बी तो तुसा जेडे दुःख-सुख पोगणे वाले माणू ए और तुसा खे सुसमाचार सुणाऊँए कि तुसे इना बेकारा रिया चीजा ते लग ऊई की जिऊँदे परमेशरो री तरफा खे फिरो, जिने स्वर्ग, तरती, समुद्र और जो कुछ तिना रे आए, से बणाया। 16 तिने बीते रे बखतो रे सब जातिया आपणी-आपणी बाटा रे चलणे दित्तिया। 17 तेबे बी तिने आपणे आपू खे बिना गवाओ ते नि छाडेया, पर से पला करदा रया और सर्गो ते बर्खा और फलदार ऋतु देई की तुसा रे मनो खे रोटी और खुशिया ते परदा रया।” 18 ये बोली की बी तिने लोक बडिया मुश्किला ते रोके कि तिना खे बलिदान नि करो।

19 पर कुछ यहूदिये अन्ताकिया और इकुनियुम नगरो ते आयी की लोक आपणी तरफा खे करी ते और पौलुसो खे पात्थर बाए और तेसखे मरे रा समज्जी की नगरो ते बारे कसिटी की लयी गे। 20 पर जेबे चले आईकि तेसरे चऊँ कनारे खडे ऊईगे, तेबे से उठी की नगरो खे चली गा और दूजे दिने बरनबासो साथे दिखे खे चली गा।

XXXXXXXXXX XX XXXXXXXXXXXXX XX XXXXX

21 तेबे पौलुस और बरनबास तेस नगरो रे लोका खे सुसमाचार सुणाई की और बऊत सारे चले बणाई की लुस्तुरा और इकुनियुमो रे ऊँदे ऊए अन्ताकिया नगरो खे वापस ऊईगे 22 और सेयो हर नगरो रे चलेया रे मनो खे स्थिर (पक्का) करदे रये और ये उपदेश देँदे रओ थे कि विश्वासो रे बणे रे रओ और ये बोलदे रओ थे, “आसा खे बडे क्लेश उठाई की परमेशरो रे राज्य रे जाणा पड़ना” 23 और तिने हर एक मण्डलिया रे तिना खे बुजुर्ग ठईराए और बअरतो साथे प्रार्थना करी की सेयो प्रभुए रे आथो रे सम्बाली ते, जेस पाँदे तिने विश्वास कित्तेया था।

24 तेबे सेयो पिसिदिया परदेशो रे ऊँदे ऊए पंफूलिया परदेशो रे पऊँछे। 25 तेबे पंफूलिया परदेशो रे पिरगा नगरो रे वचन सुणाई की अत्तलिया नगरो रे आए 26 और तथा ते सेयो जाहूजो रे अन्ताकिया नगरो रे आए, जेथा ते तिना खे परमेशरो री कृपा रे सम्बाली की तेस कामो खे पेजेया था जेतखे सेयो एबे पूरा करी की वापस आईगे। 27 तेती पऊँछी की तिने मण्डली कट्टी किती और तिना खे बताया कि परमेशरे आसा साथे रई की कितणे बडे-बडे काम कित्ते और दुजिया जातिया खे विश्वासो रा दरवाजा खोली ता। 28 पौलुस और बरनबास चलेया साथे बऊत दिन तक रये।

1 तेबे कुछ यहूदी विश्वासी यहूदिया प्रदेशो ते अन्ताकिया नगरो रे आयी की विश्वासी पाईया खे सखयाणे लगे, “जे मूसे री रवाजा रे मुताबिक तुसा रा खतना नि ओ तो तुसे उद्धार नि पाई सकदे।” 2 जेबे पौलुस और बरनबासो रा तिना साथे बऊत चगड़ा और बईस ऊई तो कलीसिये ये फैसला लया कि पौलुस और बरनबासो खे कुछ ओर माणूआ साथे एसा गल्ला रे बारे रे सोचणे खे यरूशलेम नगरो रे प्रेरिता और बुजुर्गो गे पेजो। 3 तेबे मण्डल्लिए सेयो थोड़ी जी दूर तक पऊँछाए और सेयो फीनीके और सामरिया प्रदेशो ते ऊँदे ऊए दुजिया जातिया रे मन फिराणे रा समाचार सुणांदे गये और सब विश्वासी पाई खुश किते। 4 जेबे सेयो यरूशलेमो रे पऊँछे, तेबे मण्डली, प्रेरित और बुजुर्ग तिना साथे खुश ऊई की मिले और पौलुस और बरनबासे बताया कि परमेशरे आसा साथे रंदे ऊए केड़े-केड़े काम किते थे। 5 पर फरीसिया रे पंथो बीचा ते जिने विश्वास कितेया था, तिना बीचा ते कई जणे उठी की बोलेया, “दूजी जातिया खे खतना कराणा और मूसे रे बिधानो खे मानणे री आज्ञा देणी चाईयो।”

6 तेबे प्रेरित और बुजुर्ग एसा गल्ला रे बारे रे विचार करने खे कटटे ऊए। 7 तेबे पतरसे बऊत बईस ऊणे ते बाद खंडे ऊई की तिना खे बोलेया, “ओ पाईयो! तुसे जाणोए कि बऊत दिन ऊईगे कि परमेशरे तुसा बीचा ते आऊँ चुणी ला रा, ताकि दूजी जाति मेरे मुओ ते सुसमाचारो रा वचन सुणी की विश्वास करो। 8 मनो खे परखणे वाले परमेशरे तिना खे बी आसा जेड़ा पवित्र आत्मा देई की तिना री गवाई दित्ती 9 और विश्वासो रे जरिए तिना रे मन शुद्ध करी की आसा रे और तिना रे कोई फर्क नि राखेया। 10 तो एबे तुसे कऊँ परमेशरो री परीक्षा करोए की चलेया री क्याड़िया (गरदन) पाँदे एड़ा जूँगड़ा राखो, जेतखे ना म्हारे बापदादे चकी सको थे और ना आसे चकी सकदे? 11 पर आ, आसा रा ये तो निश्चा ए कि जिंयाँ तिना प्रभु यीशुए री कृपा ते उद्धार पाणा, तियाँ ई आसा बी पाणा।”

12 तेबे सारी सभा चुप-चाप ऊई की बरनबास और पौलुसो री सुणने लगी कि परमेशरे तिना रे जरिए दुजिया जातिया बीचे केड़े-केड़े चिह्न और अचम्बे रे काम दखाए। 13 जेबे बरनबासे और पौलुसे आपणा पाषण देणा बन्द कितेया, तेबे याकूब बोलणे लगेया, “ओ पाईयो, मेरी सुणो। 14 शमीन पतरसे बताया कि परमेशरे पईले-पईले दुजिया जातिया पाँदे कड़ी कृपा दृष्टि किती कि तिना बीचा ते आपणे नाओं खे एक प्रजा बणाई लो। 15 इजी साथे भविष्यवक्ते रिया गल्ला बी मिलोईया, जेड़ा लिखी राखेया,

16 “इजी ते बाद मां फेर आयी की दाऊदो रा टले रा डेरा चकणा और तिजी रे खंडहर फेर बनाणे और से खड़ा करना।

17 ताकि बाकि माणू, मतलब-सब दुजिया जातिया, जो मेरे नाओं ते जाणे जाओए, प्रभुए खे टोलो।

18 ये सेई प्रभु बोलोआ, जो दुनिया री सृष्टिया ते इना गल्ला रा समाचार देंदा आयी रा।

19 “तेबे मेरा विचार ये कि दुजिया जातिया बीचा ते जो लोक परमेशरो री तरफा खे फिरोए, आसे तिना खे दुःख नि देईए। 20 पर तिना खे लिखी की पेजिये कि सेयो मूर्तिया री अशुद्धात्मा, व्याभिचार और गला कोटे रे मासो ते और खूनो ते दूर रओ। 21 कऊँकि पुराणे बखतो ते नगरो-नगरो रे मूसा रे बिधानो रा प्रचार करने वाले चलदे आयी रे और से हर आरामो रे दिने प्रार्थना रे कअरो रे पढी जाओई।”

~~~~~

22 तेबे यरूशलेमो री सारी मण्डल्लिया समेत प्रेरिता और बुजुर्गो खे अच्छा लगेया कि आपू बीचा ते कई माणूआ खे चुणो, मतलब-यहूदा, जेसखे बरसब्वास बी बोलोए, सीलास जो विश्वासी पाईया रा मुखिया था, तिना खे पौलुस और बरनबासो साथे अन्ताकिया री कलीसिया खे पेजो। 23 तिने तिना रे आथो रे ये लिखी की पेजेया, “अन्ताकिया नगर, सीरिया और किलिकिया प्रदेशो रे रणे वाले सब विश्वासी पाईया खे जो दुजिया जातिया बीचा ते ए, प्रेरित और बुजुर्ग पाईया री

नमस्ते। ²⁴ आसे सुणी राखेया कि आसा बीचा ते कई जणेया तेती जाई की तुसे आपणी गल्ला ते कबराईते और तुसा रे मन पल्टी ते रे, पर आसे तिना खे आज्ञा नि दिती थी। ²⁵ इजी री खातर आसे एक चित्त ऊई की ठीक समजेया कि चुणे रे मांणूआ खे आपणे प्यारे बरनबास और पौलुसो साथे तुसा गे पेजिये। ²⁶ ये तो एड़े मांणू ए, जिने आपणे प्राण आसा रे प्रभु यीशु मसीह री खातर मुसीबता रे पाई राखे ²⁷ और आसे यहूदा और सीलास पेजी राखे, जिना आपणे मुओ ते बी यो गल्ला बोली देणियां। ²⁸ पवित्तर आत्मा और आसा खे ठीक लगेया कि इना जरूरी गल्ला खे छाडी की तुसा पाँदे ओर बोज नि पाऊँ ²⁹ कि तुसे मूर्तिया रे सामणे बलि कित्ते रे और खूनो ते, गला कोटे रे मासो ते और व्याभिचारो ते दूर रओ, तो तुसा रा पला ऊणा और शुभ।”

³⁰ तेबे, सेयो विदा ऊई की अन्ताकिया नगर रे पऊँछे और सभा कट्टी करी की से पत्नी तिना खे देईती। ³¹ सेयो पत्नी पट्टी की तेस उपदेशो री गल्ला ते बऊत ई जादा खुश ऊईगे। ³² तेबे यहूदा और सीलासे, जो आपू बी भविष्यबक्ता थे, बऊत गल्ला साथे विश्वासी पाईया खे उपदेश देई की मजबूत कित्ते। ³³ यहूदा और सीलास कुछ दिन रई कि विश्वासी पाईया ते शान्तिया साथे विदा ऊए कि आपणे पेजेणे वालेया गे यरूशलेमो खे जाओ। ³⁴ पर सीलासे अन्ताकिया रेई रणे रा निश्चा कित्तेया और यहूदा कल्ला ई यरूशलेमो खे चली गा। ³⁵ पौलुस और बरनबास अन्ताकिया रेई रई गे और बऊत ओर लोका साथे प्रभु यीशुए रा वचन और सुसमाचार सुणादे रये।

~~~~~

<sup>36</sup> कुछ दिनो ते बाद पौलुसे बरनबासो खे बोलेया, “जेती-जेती नगरो रे आसे प्रभुए रा सुसमाचार सुणाया था, आओ, फेर चली की आपणे विश्वासी पाईया खे देखूँ कि केडे ए।” <sup>37</sup> तेबे बरनबासे यहूदो खे, जेसखे मरकुस बी बोलोए, साथे लणे रा बिचार कित्तेया। <sup>38</sup> पर पौलुसे तेसखे, जो पंफूलिया प्रदेशो रे लग ऊईगा था और कामो खे तिना साथे नि गया, तेसखे साथे निणा अच्छा नि समजेया। <sup>39</sup> तेबे एड़ी बईस ऊई कि पौलुस और बरनबास एकी-दूजे ते लग ऊईगे और बरनबास मरकुसो खे लयी की जाहूजो रे साईपरस टापूए खे चली गा। <sup>40</sup> पर पौलुसे सीलास चुणेया और विश्वासी पाईया खे परमेशरो री कृपा रे देई की तेथा ते चली गा। <sup>41</sup> से मण्डलिया खे मजबूत करदा ऊआ, सीरिया और किलिकिया प्रदेशो रिये ऊँदे ऊए गया।

## 16

~~~~~

¹ तेबे से दिरबे और लुस्तुरा नगरो रे बी गया, और देखो, तेती तीमुथियुस नाओं रा एक चेला था, जो केसी विश्वासी यहूदियेया रा पाऊ था, पर तेसरा पिता यूनान देशो रा रणे वाला था। ² से लुस्तुरा और इकुनियुम नगरो रे विश्वासी पाईया बीचे जाणेया-मानेया रा था। ³ पौलुसो री इच्छा थी की ये बी मां साथे चलो और जो यहूदी लोक तिना जगा रे थे तिना री बजअ ते तेसरा खतना कित्तेया, कऊँकि सेयो सब जाणो थे कि एसरा पिता यूनान देशो रा रणे वाला था। ⁴ तेबे पौलुस और तिना रे साथी नगरो-नगरो रे जाँदे ऊए तिना बिधिया खे, जो यरूशलेमो रे प्रेरिते और बुजुगं ठराई राखी थी, मानणे खे तिना खे पऊँछाँदे जाओ थे। ⁵ ईयां मण्डली विश्वासो रे मजबूत ऊँदी रई और गिणतिया रे हर रोज बड़दी गयी।

~~~~~

<sup>6</sup> तेबे सेयो फूगिया और गलातिया रे प्रदेशो रिये ऊँदे ऊए गये और पवित्तर आत्मे तिना खे आसिया प्रदेशो रे वचन सुनाणे खे ना कित्ती। <sup>7</sup> तेबे तिने मूसिया प्रदेशो रे नेडे पऊँछी की वितूनिया नगरो खे जाणा चाया, पर प्रभु यीशुए रे पवित्तर आत्मे सेयो जाणे नि दित्ते। <sup>8</sup> तेबे सेयो मूसिया प्रदेशो रे ऊई की तरोआसो नगरो खे आए। <sup>9</sup> तेबे पौलुसे राधियो खे दर्शन देखेया कि एक मकदुनी मर्द खडे रा, तेसते बिनती करी की बोलोआ, “पार उतरी की मकदुनिया खे आओ और आसा री

मताद कर ।" 10 तेसरा ये दर्शन देखदे ई तिने फटाफट मकिदुनिया प्रदेशो खे जाणा चाया, ये समजी की कि परमेशरे सेयो सुसमाचार सुनाणे खे तेती बुलाई राखे ।

XXXXXXXXXX XX : XXXXXX XX XXX XXXXXXX

11 तेबे त्रोगासो नगरो ते जाहज खोली की आसे सीदे सुमात्त्रके टापूए खे और दूजे दिने नियापुलिस नगरो खे आए । 12 तेथा ते आसे फिलिप्पिया रे पऊँछे, जो मकिदुनिया प्रान्तो रा खास नगर और रोमिया री बस्ती थी और आसे तेस नगरो रे कई दिन तक रये । 13 आरामो रे दिने आसे नगरो रे फाटको ते बारे नदिया रे कनारे ये समजी की गये कि तेती प्रार्थना करने खे जगा ऊणी और बैठी की तिना जवाणसा साथे, जो कट्टिया ऊईया थिया, गल्ला करने लगे । 14 लुदिया नाओं री थुआतीरा नगरो री, बैगणी टाले बेचणे वाली परमेशरो री एक भक्त जवाणस सुणने लगी री थी और प्रभुए तेसा रा मन खोलेया, ताकि से पौलुसो री गल्ला खे त्यान करी की सुणो । 15 जेबे तेसे आपणे कराने समेत बपतिस्मा लया, तेबे तेसे बिनती किती, "जे तुसे माखे प्रभुए री विश्वासणी समजोए तो चली की मेरे कअरे रओ ।"

XXXXXXXX XX XXXXXXX XXXX XX

16 जेबे सेयो प्रार्थना करने री जगा रे जाणे लगी रे थे, तेबे आसा खे एक दासी मिली, जेसा रे आऊणे वाले बखतो रे बारे रे बताणे वाली दुष्टात्मा थी और जो एड़ा करने ते से आपणे स्वामिया खे बऊत कुच्छ कमाई की ली आओ थी । 17 से पौलुस और आसा पीछे आयी की चींगणे लगी कि, "यो मांण परमप्रदान परमेशरो रे दास ए, जो आसा खे उद्धारो री कथा सुणाओए ।" 18 से बऊत दिन तक एड़ा ई करदी रई । पर पौलुस दुःखी ऊईगा और मूँ फेरी की तेसा दुष्टात्मा खे बोलेया, "आऊँ ताखे प्रभु यीशु मसीह रे नाओं ते आज्ञा देऊँआ कि एसा बीचा ते निकली जा और से तेसी बखते ई निकली गी ।"

19 जेबे तेसा रे स्वामिए देखेया कि आसा री कमाईया री उम्मीद चली गी, तेबे सेयो पौलुस और सीलासो के पकड़ी की चौको रे प्रदाना गे खिंजी की लयी गे 20 और तिना खे यहूदिया रे हाकिमा गे लयी जाई की बोलेया, "यो लोक जो यहूदी ए, आसा रे नगरो रे बऊत जादा शोर-शराबा लगी रे करने । 21 और एड़िया रवाजा बताणे लगी रे जिना खे ग्रहण करना या मानणा आसा रोमिया खे ठीक निए ।" 22 तेबे पीड़ा रे लोक पौलुस और सीलासो रे बिरोदो रे कट्टे ऊई की चढी गे और हाकिमे तिना रे टाले फाड़ी की खोली ते और तिना खे डण्डे बाणे री आज्ञा दिती । 23 तेबे तिना खे बऊत डण्डे बाई की सेयो जेला रे पाई ते और जेलरो खे आज्ञा दिती कि इना री चौकसी राखणी । 24 तिने एड़ी आज्ञा पाई की सेयो पीतरो री कोठरिया रे राखे और तिना रे पैर काठो रे ठोकी ते ।

XXXXXXXX XX XXXXXXX XX XXXX XX XXXXXXX

25 तकरीबन आदी राथियो तक पौलुस और सीलास प्रार्थना करदे ऊए परमेशरो रे पजन लगी रे थे गाणे और बन्दुए तिना खे सुणने लगी रे थे । 26 तदुओ की एकदम बऊत बड़ा इल्लण ऊआ, एथो तक कि जेला री निऊँआ तक इल्ली गिया और फटाफट सब द्वार खुली गे और सबी रे बन्दन खुली गे । 27 तेबे जेलर जागी गा और जेला रे द्वार खुले देखी की समजेया कि बन्दुए नठीगे रे, तेबे तिने तलवार खिंजी की आपू खेई बाणी चायी । 28 पर तदुओ कि पौलुसे जोरे की बोलेया, "आपणे आपू खे कुच्छ बी नुकशान नि पऊँचा, कऊँकि आसे सब एथी ए ।" 29 तेबे जेलरे दिऊआ मंगवाई की पीतरो खे लमखणे लगेया और थरथरांदा ऊआ पौलुस और सीलासो रे आगे रूड़ेया । 30 तेबे तिने तिना खे बारे ल्याई की बोलेया, "ओ सज्जनो! उद्धार पाणे खे आऊँ क्या करूँ?"

31 तिने बोलेया, "प्रभु यीशुए पाँदे विश्वास कर, तेबे ताखे और तेरे कराने खे उद्धार मिलणा ।" 32 तेबे पौलुस और सिलास तेसखे और तेसरे सारे कअरो रे लोका खे प्रभुए रा वचन सुणाया । 33 तेबे राथियो खे तेसी कअड़िया रे जेलरे पौलुस और सिलास निए और तिना रे जख्म तोए और तिने आपणे लोका समेत फटाफट बपतिस्मा लया । 34 तेबे तिने सेयो आपणे कअरे निए और तिना खे रोटी खुलाई और सारा कराना परमेशरो पाँदे विश्वास करी की खुश ऊआ ।

35 जेबे दिन ऊआ, तेबे हाकिमे सिपाईया गे सन्देशा पेजेया, “तिना माणूआ खे छाडी देओ।” 36 जेलरे यो गल्ला पौलुसो गे बोलिया, “हाकिमे तुसा खे छाडणे खे बोली ता रा, तो एबे निकली की बेफिकर ऊई की चली जाओ।” 37 पर पौलुसे तेसखे बोलेया, “तिने आसे, हालाँकि रोमी माणू ए, दोषो ते बिना, लोका सामणे कुटे और जेला रे पाईते। एबे क्या चोरिए-चोरिए निकयाली देओए? एडा नि ऊणा, पर सेयो आपू आयी की आसा खे बारे निकयाली की लयी जाओ।”

38 सिपाईए ये गल्ल हाकिमा खे बोली ती और सेयो ये सुणी की सेयो कि रोमी ए, डरी गे। 39 तेबे तिने आयी की तिना ते माफी मांगी और बारे लयी जाई की बिनती किती कि नगरो ते बारे चली जाओ। 40 तेबे सेयो जेला ते निकली की लुदिया रे कअरे गये और विश्वासी पाईया साथे मिली की तिना खे बोलेया तुसा खे शान्ति मिलो और चली गे।

## 17

~~~~~

1 तेबे पौलुस और सीलास अम्फिपुलिस और अपुल्लोनिया नगरो रिये ऊई की थिस्सलुनीके नगरो खे आए, जेती यहूदिया रा एक प्रार्थना रा कअर था। 2 तेबे पौलुस आपणी रवाजा रे मुताबिक तिना गे गया और तिना रे आरामो रे दिने पवित्र शास्त्रो बीचा ते तिना साथे बईस किती 3 और से तिना रा मतलब तिना रा उदारण देई-देई की समजयाओ था कि मसीह रा दुःख उठाणा और मरे रेया बीचा ते जिऊंदा ऊणा जरूरी था, “येई यीशु, जेसरी आऊं तुसा खे कथा सुणाऊंआ, मसीह ए।” 4 तिना बीचा ते कुछ यहूदिये और कई यूनानी भक्ते और बऊत सारी तर्मा जवाणसे मानी ला और पौलुस और सीलासो साथे, मिली गे। 5 पर यहूदिया खे जलन ऊईगी और तिने बजारू माणूआ बीचा ते कई दुष्ट माणू आपू साथे मलाई ते और पीड़ (भीड़) लगाई की नगरो रे शोर-शरावा करने लगे और यासोनो रे कअरो रे चढ़ाई करी की पौलुस और सीलास लोका सामणे ल्याऊणा चाए।

6 तेबे तिना रे तेती ना मिलणे ते बाद सेयो जोरे-जोरे साथे ये बोली की यासोन और कई ओर विश्वासी पाईया खे नगरो रे हाकिमो सामणे खिंजी की ली आए, “यो लोक, जिने दुनिया बी उल्ट-पुल्ट करी ती री, एती बी आईगे रे 7 और यासोने यो आपणे कअरे राखी राखे और यो सब के सब बोलोए कि यीशु राजा ए और महाराजा कैसरो री आज्ञा रा बिरोद करोए।” 8 तिने लोका खे और नगरो रे हाकिमो खे ये सुणाई की सेयो डराई ते। 9 तेबे तिने यासोन और बाकि लोका ते जमानत लयी की सेयो छाडी ते।

~~~~~

10 विश्वासी पाईए रातो-रात पौलुस और सीलास बिरिया नगरो खे पेजी ते और सेयो तेती पऊँछी की यहूदिया रे प्रार्थना रे कअरो रे गये। 11 यो लोक तो थिस्सलुनीके नगरो रे यहूदिया ते ठीक थे और तिने बड़ी लालसा साथे वचन ग्रहण किन्तेया और हर रोज पवित्र शास्त्रो रे टोलदे रये कि यो गल्ला सच्चिया कि नई। 12 तेबे तिना बीचा ते कई जणे और यूनानी दमदार जवाणसा बीचा ते और मर्दा बीचा ते बी कई जणे विश्वास किन्तेया। 13 पर जेबे थिस्सलुनीके रे यहूदी जाणी गे कि पौलुस बिरिया नगरो रे बी परमेशरो रा सुसमाचार सुनाणे लगी रा, तेबे सेयो तेती बी आईगे और लोका खे उकसाणे लगे और आल्ला-गोल्ला करने लगे। 14 तेबे विश्वासी पाईए पौलुस फटाफट बिदा किन्तेया कि समुद्रो रे कनारे चली जा, पर सीलास और तीमुथियुस बिरिया रेई रईगे। 15 पौलुसो खे पऊँछाणे वाले तेसखे एथेंस नगरो तक लयी गे और सीलास और तीमुथियुसो खे ये आज्ञा लयी की बिदा ऊआ कि मांगे फटाफट आयी जाओ।

~~~~~

16 जेबे पौलुस एथेंस नगरो रे सीलास और तीमुथियुसो खे न्यालने लगी रा था, तेबे नगरो खे मूर्तिया साथे परे रा देखी की तेसरा जिऊ बऊत दुःखी ऊईगा। 17 तेबे से प्रार्थना रे कअरो रे यहूदिया खे और भक्ता खे और चौको रे जो बी लोक मिलो थे, तिना साथे हर रोज बईस करो था। 18 तेबे इपिकूरी और स्तोईकी ज्ञानिया बीचा ते कई जणे तेस साथे बईस करने लगे और बऊत जणेया

बोलेया, “ये बकवासी क्या बोलणा चाओआ?” पर ओरी बोलेया, “ये ओरी देवतेया रा प्रचार करने वाला लगोआ, कऊँकि ये यीशुए रा और दुबारा जिऊँदा ऊणे रा सुसमाचार सुणाओआ।”¹⁹ तेबे सेयो तेसखे आपू साथे अरियुपगुस नाओं रे प्रार्थना रे कअरो रे लयी गे और पूछेया, “क्या आसे जाणी सकूँए कि ये जो नौखी गल्ला, जो तूँ सुणाएया, क्या ए?”²⁰ कऊँकि तूँ आसा खे नऊखिया ई गल्ला सुणाएया, इजी री खातर आसे जाणना चाऊँए कि इना रा मतलब क्या ए?”²¹ (कऊँकि बऊत सारे एथेंस रे लोक और परदेशी जो तेती रओ थे, नईया-नईया गल्ला बोलणे और सुणने ते अलावा ओर कोई बी कामो रे आपणा बखत नि बिताओ थे।)

XXXXXXXXXXXXXXXXXXXX

²² तेबे पौलुसे अरियुपगुस प्रार्थना रे कअरो रे खडे ऊई की बोलेया, “ओ एथेंस नगरो रे लोको! आऊँ देखूँआ कि तुसे हर गल्ला रे देवतेया खे बड़ा मानणे वाले ए।²³ कऊँकि जेबे आऊँ कूमदे-फिरदे ऊए तुसा री पूजणे रिया चीजा खे देखणे लगी रा था, तेबे एक एड़ी बेदी बी देखी, जेतेरे लिखी राखेया रा था, अणजाणे ईश्वरो खे। तो जेसखे तुसे बिना जाणे पूजोए, आऊँ तुसा खे तेसरा समाचार सुणाऊँआ।

²⁴ “जिने परमेशरे तरती और तिजी री हर चीज बणाई, से स्वर्ग और तरतिया रा स्वामी ऊई की आथो रे बणाए रे मन्दरो रे नि रंदा²⁵ और ना ई किजी बी चीजा ते मतलब राखी की माणूआ रे आथो री सेवा लओआ, कऊँकि से आपू ई सबी खे जीवन, श्वास और सब कुछ देओआ।²⁶ तिने एक ई मूलो ते माणूआ री सब जातिया, सारी तरतिया रे रणे खे बणाई राखिया और तिना रे बणाए रे बखत और रणे री सीमा इजी री खातर बानी राखिया।²⁷ परमेशरे एड़ा तेबे किचेया ताकि लोक तेसखे टोलो, उम्मीद राखो कि तेसखे टटोली की पायी सकोए, तेबे बी से आसा बीचा ते केसी ते बी दूर निए।²⁸ कऊँकि आसे तेसदे ई जिऊँदे, चलदे-फिरदे और खडे रऊँए, जेड़ा तुसा रे कितणे कविये बी बोली राखेया कि, आसे तो तेसरे ई वंश ए।²⁹ तेबे परमेशरो रा वंश ऊई की आसा खे ये समजणा ठीक निए कि ईश्वर, सुईना, रूपा या पात्थरो जेड़ा ए, जो माणूआ री कारीगरिया ते और सोच-विचारा ते गढ़ी राखे।

³⁰ “तेबेई परमेशरे लोका री अज्ञानता रे बखतो खे त्यान नि दिचेया, पर एबे हर जगा रे सबी माणूआ खे मन फिराणे री आज्ञा देओआ।³¹ कऊँकि तिने एक दिन बणाई राखेया, जिदे तेस, तेस माणूए रे जरिए तमों साथे एसा दुनिया रा न्याय करना, जो तिने बणाई राखी और तेसखे मरे रेया बीचा ते जिऊँदा करी की ये गल्ल सबी पाँदे परमाणित करी ती री।”³² मरे रेया दुबारा जिऊँदा ऊणे री गल्ल सुणी की बऊत जणे तेसरा मजाक करने लगे और बऊत जणे बोलणे लगे, “ये गल्ल आसे तांते फेर कदी सुणुगे।”³³ तेबे पौलुस तिना बीचा ते निकली गा।³⁴ पर कई सारे माणू तेस साथे मिली गे और तिने परभू यीशुए पाँदे विश्वास किचेया, जिना बीचा ते दियुनुसियुस अरियुपगुस था और दमरिस नाओं री एक जवाणस थी और तिना साथे ओर बी बऊत माणू थे।

18

XXXXXXXXXXXXXXXXXXXX

¹ इजी ते बाद पौलुस एथेंस नगरो खे छाडी की कुरिन्थुस नगरो खे आया।² तेबे तेती तेसखे अक्विला नाओं रा यहूदी मिलेया, जेसरा जन्म पुन्तुस प्रदेशो रे ऊआ था। से आपणी लाडी प्रिस्किल्ला समेत इटलिया प्रदेशो ते कुछ बखत पईले ई आयी रा था, कऊँकि महाराजा क्लौदियुसे सबी यहूदिया खे रोमो ते निकलने री आज्ञा दिती थी। पौलुस तिना खे मिलणे तिना रे कअरे गया।³ पौलुस और अक्विला रा एक ई काम था, इजी री खातर से तिना साथे रया और सेयो काम करने लगे और तिना रा तम्बू बानणे रा काम था।⁴ पौलुस हर आरामो रे दिने प्रार्थना रे कअरो रे बईस करी की यहूदी और यूनानिया खे बी यीशु मसीह पाँदे विश्वास करने खे समजयाओ था।

5 जेबे सीलास और तीमुथियुस मकिदुनिया प्रदेशो ते आए, तेबे पौलुस वचन सुनाणे री धुना रे लगी की यहूदिया खे गवाई देओ था कि प्रभु यीशु ई मसीह ए। 6 पर जेबे यहूदी विरोद और निन्दा करने लगे, तेबे तिने आपणे टाले चाड़ी की मतलब इना गल्ला दे मेरा तुसा साथे कोई लेणा-देणा नि ए तिना खे बोलेया, “तुसा रा खून तुसा री क्याड़िया पाँदे रओ; आऊँ निर्दोष ए, आजो ते मां दूजिया जातिया गे जाणा और तिना खे परमेशरो रा वचन सुनाणा।” 7 तेथा ते चली की से तीतुस युस्तुस नाओं रे परमेशरो रे एक भगतो रे कअरे दूजिया जातिया खे उपदेश देणे आया, जेसरा कअर प्रार्थना रे कअरो रे नेड़े था। 8 तेबे प्रार्थना रे कअरो रे सरदार किरसपुसे आपणे सारे कराने समेत प्रभुए पाँदे विश्वास कितेया और बऊत सारे कुरिन्थियों रे रणे वाले सुणी की विश्वासो रे आए और बपतिस्मा लया। 9 तेबे प्रभुए राथियो खे दर्शनो रे पौलुसो खे बोलेया, “डर नि, बल्कि बोलदा जा और चुप नि रओ। 10 कऊँकि आऊँ तां साथे ए और केसी बी तां पाँदे चढ़ाई करी की तेरा नुकशाण नि करना, कऊँकि एस नगरो रे मेरे बऊत सारे लोक ए।”

11 तेबे पौलुस तिना बीचे परमेशरो रा वचन सिखांदा ऊआ डेढी साल तक रया। 12 जेबे गल्लियो अखाया प्रदेशो रा हाकिम था, तेबे यहूदी लोक एक ऊई की पौलुसो पाँदे चढ़ी गे और तेसखे न्याय आसणो सामणे ल्याई की बोलणे लगे, 13 “ये लोका खे समजयाओआ कि परमेशरो री भक्ति ईयां करनी ओ, जो विधानो ते उल्टी ए।” 14 जेबे पौलुस बोलणे ई वाला था, तेबे गल्लिये यहूदिया खे बोलेया, “ओ यहूदिया! जे ये कोई अन्याय या दुष्टता री गल्ल ऊँदी तो ठीक था कि आऊँ तुसा री सुणदा। 15 पर जे ये बईस शब्द, नाओं और तुसा रा विधानो रे बारे रे ए, तो तुसेई जाणो, कऊँकि आऊँ इना गल्ला रा न्यायी नि बणना चांदा।” 16 तेबे गल्लियो सेयो न्याय आसणो रे सामणे ते निकलवाई ते। 17 तेबे बऊत सारे लोके प्रार्थना रे कअरो रा सरदार सोस्थिनेस पकड़या और न्याय आसणो सामणे कुटेया, पर गल्लिये इना गल्ला री कोई परवा नि किती।

~~~~~

18 तेबे पौलुस बऊत दिन तक कुरिन्थ नगरो रे रया। तेबे तिने विश्वासी पाईया ते बिदा लयी की किखरया रे जाई की इजी री खातर बाल कटवाए, कऊँकि तिने मान्नत किती थी। तेबे से जाहूजो रे सीरिया खे चली गा और तेस साथे प्रिस्किल्ला और अक्विला थे। 19 तेबे तिने इफिसुस नगरो रे पऊँछी की प्रिस्किल्ला और अक्विला तेती छाड़ी ते और आपू प्रार्थना रे कअरो रे जाई की यहूदिया साथे बईस करने लगेया। 20 तेबे लोके तेसते बिनती किती, “आसा साथे कुछ ओर दिन तक रओ।” पर से मानेया नि। 21 पर ये बोली की तिना ते बिदा ऊआ, “जे परमेशर चाओगा तो आऊँ तुसा गे फेर आऊँगा।” तेबे से इफिसुसो ते जाहूज खोली की चली गा 22 और कैसरिया नगरो रे उतरी की यरूशलेमो खे गया और मण्डलिया खे नमस्ते करी की अन्ताकिया नगरो खे आया।

~~~~~

23 तेबे से कुछ दिन तेती रई की अन्ताकिया नगरो ते चली गा और एक तरफा ते गलातिया रे और फूगिया रे प्रदेशो रे सबी चलेया खे मजबूत करदा ऊआ फिरेया।

~~~~~

24 अपुल्लोस नाओं रा एक यहूदी, जेसरा जन्म सिकन्दरिया नगरो रे ऊआ था, जो विद्वान माणू था और पवित्र शास्तरो खे अच्छी तरअ ते जाणो था, इफिसुसो नगरो रे आया। 25 तिने प्रभुए री बाटा री शिक्षा पाई राखी थी और मन लगाई की प्रभु यीशुए रे बारे रे ठीक-ठीक सुणाओ था और सीखाओ था, पर से बस यूहन्ने रे बपतिस्मे री गल्ल जाणो था। 26 अपुल्लोस प्रार्थना रे कअरो रे निडर ऊई की बोलणे लगेया। पर प्रिस्किल्ला और अक्विला तेसरी गल्ल सुणी की तेसखे आपणे कअरे लयी गे और तिने परमेशरो री बाट तेसखे ओर बी ठीक-ठीक बताई। 27 जेबे तिने निश्च कितेया कि पार ऊतरी की अखाया प्रदेशो खे जाऊँ, तेबे विश्वासी पाईया तेसखे तसल्ली देई की चलेया खे लिखेया कि सेयो तेसखे अच्छी तरअ ते मिलेओ और तिने तेती पऊँछी की तेसरी बऊत

मताद किती, जिने कृपा री बजअ ते विश्वास कित्तेया था। 28 कऊँकि से पवित्र शास्त्रो ते सबूत देई-देई की कि यीशु ई मसीह ए, बड़ी ई प्रबलता साथे यहूदिया खे सबी सामणे निरुत्तर करदा रया।

19

XXXXXXXXXX

1 जेबे अपुल्लोस कुरिन्थुस नगरो रे था, तेबे पौलुस दूर-दराजो रे प्रदेशो ते ऊई की इफिसुस नगरो रे आया, तेती कुछ् चलेया ते मिले 2 तिने बोलेया, “क्या तुसे विश्वास करदे बखते पवित्र आत्मा पाया?” तिने बोलेया, “आसे तो पवित्र आत्मा रे बारे रे नि ए सुणेया रा।” 3 पौलुसे तिना खे बोलेया, “तेबे तुसे केसरा बपतिस्मा लयी राखेया?” तिने बोलेया, “यूहन्ने रा बपतिस्मा।” 4 पौलुसे बोलेया, “यूहन्ने ये बोली की मन फिराणे रा बपतिस्मा दित्तेया कि जो मांते बाद आऊणे वाला ए तेस पाँदे, मतलब-प्रभु यीशुए पाँदे विश्वास करना।” 5 ये सुणी की तिने प्रभु यीशुए रे नाओं ते बपतिस्मा लया। 6 और जेबे पौलुसे तिना पाँदे आथ राखेया, तो तेबे तिना पाँदे पवित्र आत्मा उत्तरेया और सेयो लग-लग पाषा बोलणे लगे और भविष्यवाणी करने लगे। 7 यो सब तकरीबन वारा मद थें।

8 तेबे पौलुस प्रार्थना रे कअरो रे जाई की तीन मीन्ने तक निडर ऊई की बोलदा रया और परमेशरो रे राज्य रे बारे रे बईस करदा और समजयांदा रया 9 पर जेबे बऊत जणेया कठोर ऊई की विश्वास करने ते न किती, बल्कि लोका सामणे एसा बाटा खे बुरा बोलणे लगे, तेबे तिने तिना खे छाडी की चले लग करी ते और हर रोज तुरन्तुसो री पाठशाला रे उपदेश करो था। 10 दो साला तक येई ऊँदा रया, एथो तक कि आसिया प्रदेशो रे रणे वाले क्या यहूदी, क्या यूनानी सबी प्रभुए रा वचन सुणी ला।

11 परमेशर पौलुसो रे जरिए सामर्था रे नऊखे काम दखाओ था। 12 एथो तक कि रूमाल और टाल्ले तेसरे शरीरो साथे छुवाँई की बमारा पाँदे राखो थे और सेयो ठीक ऊई जाओ थे और दुष्टात्मा तिना ते निकली जाओ थी। 13 पर कुछ् यहूदी लोक जो सँवावा करदे फिरदे रओ थे, ये बोलणे लगे, “जेसदे दुष्टात्मा ओ, तिना पाँदे प्रभु यीशुए रा नाओं, ये बोली की फूक बाओ थे कि जेस यीशुए रा प्रचार पौलुस करोआ आऊँ ताखे तेसरी कसम देऊँआ।” 14 तेबे सिक्का नाओं रे एक यहूदी बडे पुरोईतो रे सात पाऊ थे, जो एडा ई करो थे। 15 पर दुष्टात्मे बोलेया, “यीशुए खे तो आऊँ जाणूँई और पौलुसो खे बी पछ्याणूँई, पर तूँ कूणे?” 16 तेबे तिने माणूए जेसदे दुष्टात्मा थी, तिना पाँदे लमखी की और तिना खे बसो रे ल्याई की तिना पाँदे एडा उपदरव कित्तेया कि सेयो नांगे और काईल ऊई की तेस कअरो ते नठीगे। 17 ये गल्ल इफिसुसो रे रणे वाले यहूदी और यूनानी, सबी खे पता लगी गी और सेयो सब डरी गे और प्रभु यीशुए रे नाओं री तारीफ ऊई। 18 जिने विश्वास कित्तेया था तिना बीचा ते कई जणेया आयी की आपणे-आपणे काम मानी ले और सामणे ल्याए। 19 और जादू करने वालेया बीचा ते कई जणेया आपणी-आपणी पोथिया कट्टिया करी की सबी सामणे फूकी तिया और जेबे तिना रा दाम जोड़ेया, तो सेयो पंजा हजार चाँदिए रे सिक्के रे बराबर निकलिया। 20 इयां प्रभुए रा वचन जोरो-शोरो साथे फैलदा गया और प्रबल ऊँदा गया।

21 जेबे यो गल्ला ऊई चुकिया तेबे पौलुसे आत्मा रे ठाणी ला कि मकिदुनिया और अखाया प्रदेशो ते ऊई की यरूशलेमो खे जाऊँ और बोलेया, “तेती जाई की माखे रोम नगरो खे देखणा बी जरूरी ए।” 22 तेबे आपणी सेवा करने वालेया बीचा ते तीमुथियुस और इरास्तुसो खे मकिदुनिया प्रदेशो रे पेजी की आपू कुछ् दिन तक आसिया प्रदेशो रे इफिसुस नगरो रेई रई ग।

XXXXXXXXXX

23 तेस बखते एस पंथो रे बारे रे बऊत आल्ला-गोल्ला ऊआ। 24 कऊँकि देमेत्रियुस नाओं रा एक सन्यार अरतिमिसो री देविया रे मन्दरो री चाँदिए री मूर्तिया बणवाई की कारीगरा खे बऊत काम दलाओ था। 25 देमेत्रियुसे तिना खे और एडी चीजा रे कारीगरा खे कट्टे करी की बोलेया, “ओ पाईयो! तुसे जाणोए कि एस काम करी की आसा खे कितणा पैसा मिलोआ। 26 तुसे देखोए

और सुणो वी ए कि सिर्फ इफिसस नगरो रेई नि बल्कि सारे आसिया परदेशो रे ये बोली-बोली की इने पौलुसे बऊत लोका खे समजयाया और परमाई वी राखे, कि जो आथे की बणाई राखे, से ईश्वर नि ए। 27 और एबे सिर्फ एसा गल्ला रा ई डर नि ए कि आसा रे एस कामो री प्रतिष्ठा जांदी रणी, बल्कि ये वी कि महान् देवी अरतिमिसा रा मन्दर तुच्छ समजेया जाणा और जेसखे सारा आसिया परदेश और दुनिया पूजो ई, तिजी री खासियत वी जांदी रणी। 1”

28 तिना खे ये सुणी की रोष आईगा और सेयो चींगी-चींगी की बोलणे लगे, “इफिसियों री अरतिमिस महान् ए।” 29 तेबे सारे नगरो रे बड़ा आल्ला पड़ी गा और लोके गयुस और अरिस्तर्खुस मकिदुनिया परदेशो खे जो पौलुसो साथे यात्री थे, पकड़ी ते और एक चित्त ऊई की रंगशाला खे दौड़ी गे। 30 जेबे पौलुसे लोका गे पीतरे जाणा चाया तेबे चलेया से जाणे नि दित्तेया। 31 आसिया रे कुछ हाकिमा बीचा ते वी तेसरे कई दोस्ते, तेसखे सन्देशा पेजेया और विनती किती कि रंगशाला रे जाई की आपणी जिन्दगी मुसीबता रे नि पाणी। 32 तेबे कोई कुछ बोलणे लगे और कोई कुछ, कऊँकि सभा रे बऊत गडबड़ी ऊणे लगी री थी और बऊत जणे लोक ये पनि जाणो थे कि आसे किती खे कट्टे ऊई रे। 33 तेबे तिने सिकन्दरो खे, जो यहूदिये खड़ा कित्तेया था, पीड़ा (भीड़) बीचा ते आगे कित्तेया। सिकन्दर आथो साथे सारा (ईशारा) करी की लोका सामणे कुछ बोलणा चाओ था।

34 पर जेबे तिना खे पता लगेया कि ये यहूदी ए, तो सब के सब एक शब्दो ते कोई दो कंटे तक चींगदे रये कि इफिसियों री अरतिमिस महान् ए। 35 तेबे नगरो रे मन्त्रिये लोका खे शान्त करी की बोलेया, “ओ इफिसियों रे लोको! कुण नि जाणदा कि इफिसियों रा नगर बड़ी देवी अरतिमिसो रे मन्दर और ज्यूस मतलब सर्गो री तरफा ते सेटिया री मूरता रा रखवाला ए। 36 तो तेबे इना गल्ला रा कोई जवाब नि ऊई सकदा, तो तुसा खे ठीक ए कि चुप रओ और बिना सोचे-समजे कुछ नि करो। 37 कऊँकि तुसे इना मांणूआ खे, जो ल्याई राखे, ना मन्दरो खे लूटणे वाले ए और ना ई आसा री देविया रे निन्दक ए। 38 जे देमेतिरयुस और तेसरे साथी कारीगरा खे केसी ते कोई बईस ओ तो कचैरी खुली ए और न्याय करने खे हाकिम वी ए, सेयो एकी दूजे पाँदे दोष लगाओ। 39 पर तुसे जे केसी ओरी गल्ला रे बारे रे पूछणा चाओए, तो सभा सामणे न्याय करेया जाणा। 40 माखे डर ए कि जेबे राज्यपालो एस अंगामे रे बारे रे सुणना तो तेस बोलणा कि आसे रोमी सरकारा रे खलाफ बिदरोह करने री कोशिश लगी रे करने। कऊँकि एस अंगामे रा कोई कारण नि ए, तो आसे एसा पीड़ा रे कट्टे ऊणे रा कोई जवाब नि देई सकदे।” 41 तेबे तिने ये बोली की तिने सभा बिदा किती।

20

?????????, ????? ???? ??????? ???? ?????

1 जेबे आल्ला-गोल्ला बंद ऊईगा, तेबे पौलुसे चले बुलाई की तिना री इम्मत बढ़ाई और तिना ते बिदा ऊई की मकिदुनिया परदेशो खे चली गा। 2 तेबे से तेस सारे देशो ते ऊई की और तिना खे बऊत इम्मत देई की युनान परदेशो खे आया। 3 जेबे तीन मीन्ने युनानो रे रई की जाहजो रे सीरिया परदेशो खे जाणे वाला था, तेबे तिने सुणेया कि कुछ यहूदी अगुवे बाटा रे तेसखे काणे री ताका रे लगी रे, तेबे तिने आपणे मनो रे ठाणी ला कि मकिदुनिया परदेशो ते ऊई की सीरिया परदेशो खे जाऊँ। 4 एसा यात्रा रे बिरिया रे पुरुँसो रा पाऊ सोपतरुस और थिस्सलुनीकियों नगरो बीचा ते अरिस्तर्खुसो रा सिकुन्दुस और दिरबे नगरो रा गयुस और लुस्त्रा नगरो ते तीमुथियुस, आसिया परदेशो रा तुखिकुस और तुरुफिमस आसा साथे थे। 5 सेयो आसा रे साथी यात्री आसा ते आगे चली गे और तरोआस नगरो रे पऊँछी की आसा खे न्यालदे रये। 6 तेबे आसे अखमीरी रोटिया रे त्योआरो ते बाद फिलिप्पिया नगरो ते जाहजो रे चढ़ी की पाँज दिना रे तरोआसो रे तिना गे पऊँछे और साता दिना तक तेथी रये।

???????? ???? ?????????? ???? ??????? ???? ?

7 अफते रे पईले दिने जेबे आसे रोटी तोड़ने खे कट्टे ऊए, तेबे पौलुसे, जो दूजे दिने जाणे वाला था, तिना साथे गल्ला करने लगेया और आदी राती तक गल्ला ई करदा रया। 8 जेसा बाऊड़ी रे

आसे कट्टे थे, तिदे बऊत सारे दिऊए थे बले रे 9 और यूतुसुस नाओं रा एक जवान द्वारिया रे बैठी की गईरी नीजा रे चुलारे खाणे लगी रा था और जेबे पौलुस गल्ला लगी रा था करने तेबे से नीजा रे चुलारे रे तीजिया बाऊडी ते रूडी गा और जेबे कुछ लोक तेसखे चकणे थाले आये तेबे से मरी चुकेया था। 10 पर पौलुस उतरी की थाले गया और तेस साथे चिपटी गा और गले लगाई की बोलेया, “कवराओ नि, कऊँकि एसरा प्राण एसदे ईए।” 11 तेबे फेर ऊबे जाई की रोटी तोडी और खाई की इतणी देरा तक तिना साथे गल्ला करदा रया कि प्याग ऊईगी और तेबे से चली गा। 12 तेबे सेयो तेस जवानो खे जिऊँदा ली आए और तिना खे बऊत शान्ति ऊई।

XXXXXXXXXXXXXXXXXXXX

13 आसे पईले तेई जाहूजो रे चढी की अस्सुस नगरो खे ये सोची की आगे गये कि तेथा ते आसे पौलुसो खे चढाई लऊँए, कऊँकि तिने ये बोली राखेया था कि मां आपू ई पैदल जाणा। 14 जेबे से अस्सुस नगरो रे आसा खे मिलेया, तेबे आसे तेसखे जाहूजो रे चढाई की मितुलेन नगरो खे ली आए। 15 तेथा ते जाहूज खोली की आसे दूजे दिने खियुस नगरो रे ऊँदे ऊए सामुस नगरो रे पऊँछी गे। तेबे दूजे दिने मिलेतुस नगरो खे आए। 16 पौलुसे ठाणी ला की से इफिसुस नगरो खे छाडी की आगे बढी जाओ, ताकि तेसखे आसिया प्रदेशो रे रणा नि पड़ो। कऊँकि से जल्दीया रे था कि ऊई सको तो तेसरा पिन्तेकुस त्योआरो रा दिन यरूशलेमो रे बीतो।

XXXXXXXXXXXXXXXXXXXX

17 जेबे आसे मिलेतुस नगरो रे पऊँछे तो पौलुसे इफिसुस नगरो खे सन्देशा पेजेया और मण्डलिया रे बुजुर्ग बुलाए। 18 जेबे सेयो तेसगे आए, तेबे तिना खे बोलेया, “तुसे जाणोए कि पईले ई दिनो ते जेबे आऊँ आसिया नगरो रे पऊँछेया, तो आऊँ हर बखत आजो तक तुसा साथे कियाँ रया? 19 मतलब-बडी दीनता ते, आसू निकयाली-निकयाली की और तिना परीक्षा ते, जो यहूदिया रे षडयन्त्रा री बजअ ते मां पाँदे पडी, तेबे बी आऊँ प्रभुए री सेवा करदा रया। 20 और जो-जो गल्ला तुसा रे फाईदे री थिया, तिना खे बताणे, लोका रे सामणे ल्याऊणे और कअरे-कअरे सखयाणे ते कदी बी पीछे नि अटेया। 21 बल्कि यहूदी और यूनानिया सामणे गवाई देंदा रया कि परमेशरो री तरफा खे मन फिराणा और आसा रे प्रभु यीशुए पाँदे विश्वास करना चाईयो।

22 “और एबे देखो, आऊँ पवित्र आत्मा रा बानेया रा यरूशलेमो खे जाऊँआ और आऊँ ये नि जाणदा कि मां पाँदे तेती क्या-क्या बितणी। 23 बस येई कि पवित्र आत्मा हर नगरो रे गवाई देई-देई की माखे बोलोआ कि बन्दन और क्लेश ताखे त्यार ए। 24 पर आऊँ आपणे प्राणो खे कुछ नि समजदा कि तेसखे प्यारे जाणूँ, बल्कि ये कि आऊँ आपणी दौडा खे और आपणी सेवकाईया खे पूरा करूँ, जो मैं परमेशरो री कृपा रे सुसमाचरो पाँदे गवाई देणे खे प्रभु यीशु मसीहे ते पाई राखी

25 “और एबे देखो, आऊँ जाणूँआ कि तुसा सबी जणेया, जिना खे आऊँ परमेशरो रे राज्य रा सुसमाचार सुणांदा रया, मेरा मूँ फेर नि देखणा। 26 इजी री खातर आऊँ आजके दिनो रे तुसा खे गवाई देई की बोलूँआ कि जे तुसा बीचा ते कोई बी यीशुए पाँदे विश्वास करने ते बगैर मरी जाओआ तो आऊँ सबी रे खूनो ते निर्दोष ए। 27 कऊँकि आऊँ परमेशरो री सारी इच्छा खे तुसा खे पूरी रीतिया ते मनाणे ते पीछे नि अटेया।

28 “इजी री खातर आपणी और पूरे चूण्डो री चौकसी करो, जेते साथे पवित्र आत्मे तुसे अध्यक्ष बणाई राखे कि तुसे परमेशरो री मण्डलिया री रखवाली करो, जो तिने आपणे खून बाहुई की खरीदी राखी। 29 आऊँ जाणूँआ कि मांते जाणे ते बाद तुसा बीचे चूटे उपदेशक आऊणे और विश्वासिया खे बऊत नुकशाण पऊँछाणा। 30 तुसा बीचा ते बी एडे-एडे मांणू खडे ऊणे, जिना चलेया खे आपू पीछे खिंजणे खे टेडिया-मेडिया गल्ला बोलणिया। 31 इजी री खातर जागदे रओ, और याद राखो कि मैं तीन साल तक रात-दिन आसू निकयाली-निकयाली की हर एकी खे चेतावणी देणा नि छाडिया। 32 एबे आऊँ तुसा खे परमेशरो गे और तेसरी कृपा रे वचनो गे सम्बाली देऊँआ, जो तुसा री तरक्की करी सकोआ और सबी पवित्र कित्ते रे लोका खे साजी करी की जायदात देई सकोआ।

33 “मैं केसी रे बी चाँदी-सूईने और टालेया रा लालच नि कित्तेया । 34 तुसे आपू जाणोए कि इने आधे मेरे और मेरे साथिया री जरूरता पूरी करी राखिया । 35 मैं तुसा खे सब कुछ करी की दखाया कि कियौ मईणत करी की कमजोर सम्बालने और प्रभु यीशु मसीहे रिया गल्ला याद राखणिया जरूरी ए कि तिने आपू ई बोली राखेया कि लणे ते देणा अच्छ्छा ए ।”

36 ये बोली की तिने कुटणे टेके और तिना सबी साथे प्रार्थना कित्ती । 37 तेबे सेयो बऊत रोए और पौलुसो रे गलो रे चिपकी की तेसखे चूमणे लगे । 38 सेयो खास करी की इना गल्ला रा दुःख करो थे, जो तिने बोलिया थिया कि तुसा मेरा मूँ फेर नि देखणा और तेबे तिने से जाहूजो तक पऊँछाया ।

21

प्रेरितों के काम 21:1-14

1 जेबे आसे तिना ते विदा ऊई की जाहूज खोलेया, तेबे सिदी बाटा ते कोस टापूए खे आए और दूजे दिने रूदुस टापूए दे और तथा ते पतरा टापूए दे । 2 तेबे एक जाहूज फीनीके नगरो खे जांदा ऊआ मिलेया और तेस पंदि चढ़ी की यात्रा शुरू कित्ती । 3 जेबे आसा खे साईप्रस टापू खूँजे कनारे दिशेया, आसे तिजी खे छाडी की सीरिया प्रदेशो खे चली की सूरो रे उतरे, कऊँकि तेती जाहूजो रा बोजा उतारना था । 4 तेबे तेती चलेया खे पाई की सात दिन तक रये, तिने पवित्र आत्मा रे सिखाए रे पौलुसो खे बोलेया, “यरूशलेमो नगरो रे पैर नि राखणा ।” 5 सात दिना बाद जेबे तथा ते आसा रे जाणे रा बखत आया, तेबे आसे तथा ते चली पड़े और सबी जवाणसे बालका समेत आसे नगरो ते बारे पऊँछाए, तेबे आसे कनारे पंदि पऊँछी की कुटणे टेकी की प्रार्थना कित्ती । 6 तेबे एकी-दूजे ते विदा ऊए, आसे तो जाहूजो रे चढ़े और सेयो आपणे-आपणे कअरो खे वापस ऊईगे ।

7 जेबे आसे सूर नगरो ते जलयात्रा पूरी करी की पतुलिमयिस नगरो रे पऊँछे, तेबे आसे विश्वासी पाईया खे नमस्ते करी की तिना साथे एक दिन रये । 8 दूजे दिने आसे तथा ते चली की कैसरिया नगरो खे आए और फिलिप्पुस सुसमाचार प्रचारको रे कअरे, जो साता बीचा ते एक था, जेसखे यरूशलेमो रे चलेया बिदुआ री देखपाल करने खे चुणी राखेया था, जाई की तेसरे कअरे रये । 9 तेसरी चार कुआँरी बेटिया थिया, जो भविष्यवाणी करो थिया ।

10 जेबे आसे तेती बऊत दिन तक रई चुके, तेबे अगवुस नाओं रा एक भविष्यवक्ता यहूदिया प्रदेशो ते आया । 11 तिने आसा गे आयी की पौलुसो रा पटका लया और आपणे आध पैर बानी की बोलेया, “पवित्र आत्मा ये बोलोआ कि जेस माणूए रा ये पटका ए, से यरूशलेमो रे यहूदिया ईयां बानणा और दुजिया जातिया रे आधो रे देई देणा ।” 12 जेबे आसे यो गल्ला सुणिया, तो आसे और तेधो रे लोके पौलुसो ते बिनती कित्ती कि यरूशलेमो खे नि जाणा । 13 पर पौलुसे बोलेया, “तुसे क्या लगी रे करने कि रोयी-रोयी की मेरा मन लगी रे दुःखी करने? आऊँ तो प्रभु यीशुए रे नाओं ते यरूशलेमो रे बाने जाणे खेई नि, बल्कि मरने खे बी त्यार ए ।” 14 जेबे से तिना ते नि मानेया, तो आसे ये बोली की चुप ऊईगे, “प्रभुए री इच्छा पूरी ओ ।”

15 कुछ दिना ते बाद आसे पक्का इरादा करी की यरूशलेमो खे चली गे । 16 कैसरिया नगरो रे बी कई चले आसा साथे चली पड़े और मनासोन नाओं रे साईप्रसो रे रणे वाले रे एक पुराणे चले रे कअरे साथे ली आए, ताकि आसे तेसरे कअरे रऊँ ।

प्रेरितों के काम 21:15-17

17 जेबे आसे यरूशलेमो रे पऊँछे, तेबे विश्वासी पाई आसा साथे बड़े खुश ऊई की मिले । 18 दूजे दिने पौलुस आसा खे लयी की याकूबो गे गया, जेती सब बुजुर्ग कट्टे थे । 19 तेबे तिने तिना खे नमस्ते करी की जो-जो काम परमेशेर तेसरी सेवकाईया रे जरिए दुजिया जातिया बीचे कित्ते थे, एक-एक करी की सब बताए । 20 तिने ये सुणी की परमेशरो री महिमा कित्ती, तेबे तिने बोलेया, “ओ पाई! तूँ देखणे लगी रा कि यहूदिया बीचा ते कई हूजार माणूए विश्वास कित्तेया और सब बिधानो री धुन लगाई राखोए 21 तिना यहूदी विश्वासिया खे तेरे बारे रे बताया कि तूँ दुजिया जातिया बीचे रणे

वाले यहूदिया से मूसे के बिधानो से छ्वाडणे के बारे के सिखाएया और बोलोआ कि ना आपणे बच्चेया रा खतना कराओ और ना ई रवाजा पाँदे चलो, तो क्या करना चाईयो? 22 लोका जरूर सुणना कि तू आयी रा। 23 इजी री खातर जो आसे ताखे बोलूँए, से कर, आसा गे एती चार माणू ए, जिने मान्नत मानी राखी। 24 तिना से लयी की तेस साथे आपणे आपू से शुद्ध कर और तिना से खचाँ दे, ताकि सेयो बाल कटवाओ। तेवे सबी से पता लगी जाणा कि जो गल्ला तिना से तेरे बारे के सिखाईया गईया, तिना री कोई जड़ निए, पर तू आपू बी बिधानो से मानी की तिजी के मुताबिक चलेया 25 पर तिना दुजिया जातिया के बारे के, जिने विश्वास कित्तेया, आसे ये न्याय लयी की लिखी की पेजी राखेया कि सेयो मूर्तिया सामणे बलि कित्ते के मासो ते, खूनो ते, गला कोटे के मासो ते और व्याभिचारो ते बचे रओ। 26 तेवे पौलुस तिना माणूआ से लयी की दूजे दिने तिना साथे शुद्ध ऊई की मन्दरो के गया और बताई ता कि शुद्ध ऊणे के दिन, मतलब-तिना बीचा ते हर एकी से चढ़ावा चड़ाए जाणे तक के दिन कदी पूरे ऊणे।

27 जेबे सेयो सात दिन पूरे ऊणे वाले थे, तेवे आसिया प्रदेशो के यहूदिये पौलुसो से मन्दरो के देखी की सब लोक उकसाये और ये बोली की से पकड़ी ता, 28 “ओ इस्राएलियो! मताद करो, ये सेई माणू ए, जो लोका से और बिधानो से और एथो री जगा के विरोदो रे, हर जगा के सबी लोका से सिखाओआ, एथो तक कि यूनानिया से बी मन्दरो के ल्याई की तिने ये पवित्र जगा अशुद्ध करी ती।” 29 तिने तो इजी ते पईले तरुफिमुस इफिसुसवासिए से पौलुसो साथे नगरो के देखेया था और समजो थे कि पौलुस तेसखे मन्दरो के ली आयी रा।

30 तेवे सारे नगरो के आल्ला पड़ी गा और लोक दौड़ी की कटटे ऊईगे और पौलुसो से पकड़ी की मन्दरो के बारे कसिटी की ली आए और फटाफट द्वार बन्द करी ते। 31 जेबे सेयो तेसखे काणा चाओ थे, तेवे पलटणा के सरदारो से सन्देशा पऊँछेया कि सारे यरूशलेम नगरो के आल्ला पड़ी रा। 32 तेवे से फटाफट सिपाईया और सूबेदारा से लयी की तिना गे थाले दौड़ी की आया। जेबे पीडे फौजिया री पलटणा के सरदारो से और सिपाईया से देखी की पौलुसो से मारने कुटणे से बन्द करी ता।

33 तेवे पलटणा के सरदारो पौलुसो के नेडे आयी की से पकड़ी ता और दो जंजीरा साथे बानणे री आज्ञा देई की पूछणे लगेया, “ये कूणे और इने क्या करी राखेया?” 34 पर पीडा (भीड़) बीचा ते कोई कुछ बोलणे लगे और कोई कुछ और जेबे शोर-शराबे के मारे ठीक सच्चाईया रा पता नि लगेया तो तेसखे गद्दो के लयी जाणे री आज्ञा दिती। 35 जेबे से संगी पाँदे पऊँछेया, तेवे एड़ा ऊआ कि पीडा के दवाओ री बजअ ते सिपाईया से से चकी की निणा पड़ेया। 36 कऊँकि लोका री पीड़ ये बोली की तेस पीछे पड़ी गी कि एसरा अन्त करी दो।

37 जेबे सेयो पौलुसो से गद्दो के निणे वाले थे, तेवे तिने पलटणा के सरदारो से बोलेया, “क्या माखे आज्ञा आयी कि आऊँ ताखे कुछ बोलूँ?” तिने बोलेया, “क्या तू यूनानी पाषा जाणेया? 38 क्या तू सेई मिसरी निए, जो इना दिनो ते पईले बिरोदी बणाई की चार हजार आतंकवादी लोका से जंगलो के लयी गा था?” 39 पौलुसे बोलेया, “आऊँ तो तरसुसो रा यहूदी माणू ए, किलिकिया रा प्रसिद्ध रणे वाला निवासी आ और आऊँ तांते बिनती कऊँआ कि माखे लोका ते गल्ला करने दे।” 40 जेबे तिने आज्ञा दिती, तेबे पौलुसे संगीओ पाँदे खड़े ऊई की लोका से आथो साथे सारा (ईशारा) कित्तेया, जेबे सेयो चुप ऊईगे, तेबे से इब्रानी पाषा के बोलणे लगेया।

22

1 “ओ पाईयो! और पितरो, मेरा जवाब सुणो, जो आऊँ एबे तुसा सामणे बोलणे लगी रा।” 2 सेयो ये सुणी की कि से आसा साथे इब्रानी पाषा (भाषा) दे बोलीआ, और बी चुप ऊईगे। तेबे तिने बोलेया, 3 “आऊँ तो यहूदी माणू ए, और किलिकिया प्रदेशो के तरसुस नगरो रा जम्मे राए, पर एस नगरो के गमलिएलो के पैरा गे बैठी की पढ़ाई राखेया और बाप-दादेया के बिधानो री ठीक रीतिया के

सखाई राखेया और परमेशरो खे एड़ी धुन लगाई री राखूं था, जियाँ तुसे सब जणे आज लगाणे लगी रे।⁴ और मैं मर्द और जवाणस दूई खे बानी-बानी की और जेला रे पाई-पाई की एस पंथो खे एथो तक सताया कि सेयो मरवाईते।⁵ एसा गल्ला रे परदान पुरोईत और बड़ी सभा रे सब बुजुर्ग गवा ए कि तिना बीचा ते आऊँ पाईया रे नाओं पाँदे चिट्ठिया लयी की दमिश्क नगरो खे जाणे लगी रा था, ताकि जो तेती बी ओ तिना खे बी सजा दलाणे खे बानी की यरूशलेमो खे ल्याऊँ।

~~~~~  
(~~~~~ 9:1-19; 26:12-18)

<sup>6</sup> “जेबे आऊँ चलदे-चलदे दमिश्क नगरो रे नेडे पऊँछेया, तेबे एड़ा ऊआ कि तकरीबन त्याडिया जे सर्गो ते एकदम ज्योति मेरे चऊँ कनारे चमकी।<sup>7</sup> और आऊँ जमीना पाँदे रूडी गा, तेबे मैं ये शब्द सुणेया, ‘ओ शाऊल! ओ शाऊल’ तूँ माखे कऊँ सताणे लगी रा? <sup>8</sup> मैं बोलेया, ‘ओ प्रभु! तूँ कुणे ए?’ तिने बोलेया, ‘आऊँ यीशु नासरी ए, जेसखे तूँ सताएया।’<sup>9</sup> और मेरे साथिया ज्योति तो देखी, पर जो मां साथे जपणे लगी रा था, तिने तेसरा शब्द तो सुणेया, पर से समजी नि सके।<sup>10</sup> तेबे मैं बोलेया, ‘ओ प्रभु! आऊँ क्या करूँ?’ प्रभुए माखे बोलेया, ‘उठी की दमिश्को रे जा और जो कुछ तेरे करने राए, तेती ताखे सब कुछ बताया जाणा।’<sup>11</sup> जेबे तेसा ज्योतिया रे चमकणे ते माखे कुछ नि दिशेया, तेबे आऊँ आपणे साथिया रे आध पकड़ी की दमिश्क नगरो रे आया।

<sup>12</sup> “तेबे हनन्याह नाओं रा बिधानो रे मुताबिक एक चेला था, जो तेती रणे वाले सबी यहूदिया बीचे सुनाम था, मांगे आया।<sup>13</sup> और खडे ऊई की माखे बोलेया कि ओ शाऊल पाई फेर देखणे लगी जा। तेसी बखते मेरी आखी खुली गिया और मैं से देखेया।<sup>14</sup> तेबे तिने बोलेया कि आसा रे बाप-दादेया रे परमेशरे तूँ इजी री खातर टराई राखेया; ताकि तूँ तेसरी इच्छा खे जाणे और तेस तर्मियों खे देखी सके और तेसरे मुओ ते गल्ला सुणी सके।<sup>15</sup> कऊँकि तूँ तेसरी तरफा ते सबी मांणूआ सामणे तिना गल्ला रा गवा ऊणा, जो तै देखी राखिया और सुणी राखिया।<sup>16</sup> एबे देर कऊँ लगी रा करने? उठ बपतिस्मा लओ और तेसरा नाओं लयी की आपणे पापो खे तोओ।

~~~~~

¹⁷ “जेबे आऊँ फेर यरूशलेमो रे आयी की मन्दरो रे प्रार्थना लगी रा था करने, तेबे बेओश ऊईगा।¹⁸ और तिने देखेया कि से माखे बोलो आ कि फटाफट यरूशलेमो ते निकली जा, कऊँकि तिना लोका जो एती ए मेरे बारे रे तेरी गवाई नि मानणी।¹⁹ मैं बोलेया कि ओ प्रभु! तुसे तो जाणेए कि आऊँ तुसा पाँदे विश्वास करने वालेया खे जेला रे पाऊँ था और जगा-जगा प्रार्थना रे कअरो रे कुटवाऊँ था।²⁰ और जेबे तेरे गवा स्तिफुनुसो रा खून बइणे लगी रा था, तेबे आऊँ बी तेथी खड़ा था और एसा गल्ला रे शामिल था और तेसखे काणे वालेया रे टालेया री देख-रेख करूँ था।²¹ और प्रभुए माखे बोलेया, ‘चली जा, कऊँकि मां तूँ दुजिया जातिया गे दूर-दूर पेजणा।’”

²² सेयो लोक एसा गल्ला तक तेसरी सुणदे रये, तेबे जोरे की बोलणे लगे, “एड़े मांणूए रा अन्त करो, एसरा जिऊँदा रणा ठीक निए।”²³ जेबे सेयो चिंगणे, टाले सेटणे और सर्गो रे तूड़ उड़ाओ थे,²⁴ तेबे पलटणा रे सरदार बोलेया, “एसखे गदो रे लयी जाओ और कोडे बाई कि परखो, ताकि माखे बी पता लगो कि लोक किजी री बजअ ते एसरे बिरोदो रे एड़े चिंगणे लगी रे।”²⁵ जेबे तिने से तसमेया साथे बानेया, तेबे पौलुसे तेस सुबेदारो ते, जो नेडे था खड़ेया रा बोलेया, “क्या ये ठीक ए कि तुसे एक रोमी मांणूए खे और से बी बिना दोषो ते, कोडे बाओ?”²⁶ सुबेदारो ये सुणी की पलटणा रे सरदारो गे जाई की बोलेया, “तूँ ये क्या लगी रा करने? ये तो रोमी मांणू ए।”²⁷ तेबे पलटणा रे सरदार तेसगे आयी की बोलेया, “मांगे बता कि क्या तूँ रोमी ए?” तिने बोलेया, “आ।”²⁸ ये सुणी की पलटणा रे सरदार बोलेया, “मैं रोमी ऊणे रा पद बऊत पैसे देई की पाई राखेया।” पौलुसे बोलेया, “आऊँ तो जन्मो तेई रोमी ए।”²⁹ तेबे सेयो लोक जो तेसखे परखणे वाले थे। सेयो फटाफट तेसगे ते आटी गे और पलटणा रा सरदार बी ये जाणी की कि ये रोमी ए और मैं ये बानी राखेया, डरीगा।

~~~~~

30 दूजे दिने से ठीक-ठीक जाणने री इच्छा ते कि यहूदी तेस पाँदे कऊँ दोष लगाणे लगी रे, तेसरे बन्दन खोली ते और बड़े पुरोईत और सारी सभा से कट्ठे ऊणे री आज्ञा दिती और पौलुस थाले ल्याई की तिना सामणे खड़ा करी ता ।

## 23

ॐॐॐॐ ॐॐ ॐॐॐॐ ॐॐॐॐ

1 पौलुसे महासभा से टकटकी लगाई की देखेया और बोलेया, “ओ पाईयो! मैं आजो तक परमेशरो से बिल्कुल सच्चाईया साथे जीवन बिताया ।” 2 हनन्याह प्रदान पुरोईत, तिना री, जो तेसगे खड़ी रे थे, तेसरे मुओ रे थप्पड़ बाणे से बोलेया । 3 तेवे पौलुसे तेसखे बोलेया, “ओ दखावटी माणू, परमेशरो तूँ काणा, ताँ पाँदे परमेशरो री मार पड़नी । तूँ विधानो रे मुताबिक मेरा न्याय करने बैठी रा और तेवे क्या विधानो रे खलाफ माखे बाणे से बोलणे लगी रा?” 4 जो नेड़े थे खड़े रे तिने बोलेया, “क्या तूँ परमेशरो रे प्रदान पुरोईतो से बुरा लगी रा बोलणे?” 5 पौलुसे बोलेया, “ओ पाईयो! माखे नि था पता कि ये प्रदान पुरोईत ए, कऊँकि पवित्र शास्त्रो रे लिखी राखेया कि आपणे लोका रे प्रदानो से बुरा नि बोल ।”

6 तेवे पौलुसे ये जाणी की कि कितणे सद्की ए और कितणे फरीसी ए, सभा रे आक्का पाई की बोलेया, “ओ पाईयो! आऊँ फरीसी और फरीसिया रे वंशो राए, मरे रेया री उम्मीद और दुबारा जिऊँदा ऊणे रे बारे रे मेरा मुकद्दमा ऊणे लगी रा ।” 7 जेबे तिने ये गल्ल बोली तेवे फरीसी और सद्किया बीच चगड़ा ऊणे लगया और सभा रे फूट पड़ी गी । 8 कऊँकि सद्किया रा ये विश्वास ए कि ना तो दुबारा जिऊँदा ऊणा ए, ना स्वर्गदूत ए और ना ई आत्मा ए, पर फरीसी इना सबी गल्ला से मानो थे । 9 तेवे बऊत आल्ला पड़ी गा और बऊत शास्त्री, जो फरीसिया रे दलो रे थे, उठी की ये बोली की चगड़ने लगे, “आसे एस माणूए रे कोई बुराई नि पाँदे और जे कोई आत्मा या स्वर्गदूत एस साथे बोलेया, तो तेवे क्या ए?” 10 जेबे बऊत चगड़ा ऊईगा, तेवे पलटणा रे सरदारो, इजी रे डरो ते कि से केथी पौलुसो रे टुकड़े-टुकड़े नि करी देओ, पलटणा से आज्ञा दिती, “उतरी की पौलुसो से तिना बीचा ते जवरदस्ती खिंजी की निकयालो और गद्दो रे ली आओ ।” 11 तेसी राती प्रभू यीशुए पौलुसो गे आयी की बोलेया, “ओ पौलुस! इम्मत राख, कऊँकि जेड़ी तेँ यरूशलेमो रे मेरी गवाई दिती, तेड़ी ई ताखे रोमो रे बी गवाई देणी पड़नी ।”

ॐॐॐॐ ॐॐ ॐॐॐॐ ॐॐ ॐॐॐॐ

12 जेबे दिन ऊआ, तेवे कुछ यहूदिये एक ऊई की बोलेया और कसम खाई, “जदुओ तक आसे पौलुसो से काई नि देऊँगे, तदुओ तक खाऊँगे या पिऊँगे तो आसा पाँदे धिक्कार ए ।” 13 जिने आपू बीच ये कसम खाई, सेयो चालिया ते पाँदे थे । 14 तिने बड़े पुरोईत और बुजुर्गा गे आयी की बोलेया, “आसे ये ठाणी राखेया कि जदुओ तक आसे पौलुसो से नि काई लऊँगे, तदुओ तक जे कोई कुछ चाखो गा बी, तो आसा पाँदे धिक्कारो पाँदे धिक्कार ए ।” 15 इजी री खातर एवे बड़ी सभा समेत पलटणा रे सरदारो से समजयाओ कि पौलुसो से तांगे ली आओ, मानेया कि तुसे तेसरे बारे रे ओर बी परख करना चाओए और आसे तेसरे पऊँछणे ते पईले ई, तेसखे काणे से त्यार रणे ।” 16 पर पौलुसो री बईणा रे पाऊए सुणेया कि सेयो तेसखे काणे री ताका रे ए, तेवे तिने पौलुसो से गद्दो रे जाई की सन्देशा दितेया । 17 पौलुसे सूबेदारा बीचा ते एकी से आपू गे बुलाई की बोलेया, “एस जवानो से पलटणा रे सरदारो गे लयी जाओ, ये तेसखे कुछ बोलणा चाओआ ।” 18 तेवे सुबेदारे पौलुसो रे पांणजे से पलटणा रे सरदारो गे लयी जाई की बोलेया, “पौलुस बन्दुए माखे बुलाई की बिनती किती कि ये जवान पलटणा रे सरदारो ते कुछ बोलणा चाओआ, एसखे तेसगे लयी जा ।”

19 पलटणा रे सरदारो तेसरा आथ पकड़ी की और तेसखे लग जे लयी जाई की पूछेया, “मांगे क्या बोलणा चाएया?” 20 तिने बोलेया, “यहूदिये अगुवे एकता करी राखी कि ताते बिनती करो कि काल पौलुसो से बड़ी सभा रे ल्याओ, मानेया कि तूँ ओर ठीक तरअ ते तेसखे परखणा चाएया ।” 21 पर



एसरी ए बिनतिया नि मानणी, कऊँकि तिना बीचा ते चाली माणूआ ते पाँदे पौलुसो खे काणे री ताका रे ए, जिने ये ठाणी ला रा कि जदुओ तक आसे पौलुसे खे काई नि देऊँगे, तदुओ तक खाऊँ, पिऊँगे तो आसा पाँदे धिक्कार ए, और एबु सेयो त्यार ए और तेरे वचनो री उम्मीद देखणे लगी रे।”  
 22 तेवे पलटणा रे सरदार जवानो खे ये आज्ञा देई की बिदा कित्तेया, “केसी गे नि बोलणा कि तैं मांगे ये गल्ल बोली राखी।”

XXXXXXXXXX XX XXXXXXXXXXXX XX XXXXXX

23 तेवे सेनापतिये दो सूबेदारा खे बुलाई की बोलेया, “दो सौ सिपाई, सत्तर सवार और दो सौ भालैत, पहर राधियो खे कैसरिया नगरो खे जाणे खे त्यार करी की राखी 24 और पौलुसो री सवारिया खे कोड़े त्यार राखी, ताकि तेसखे फेलिक्स हाकिमो गे ठीक-ठाक पऊँछाया जाओ।” 25 सेनापतिये राज्यपालो खे ईयां पत्री बी लिखी, 26 “महाप्रतापी फेलिक्स हाकिमो खे क्लौदियूस लूसियासो री तरफा ते नमस्ते। 27 ये माणू यहूदिये पकड़ी की काणा चाया, पर जेबे माखे पता लगेया कि ये रोमी ए, तेवे पलटण लयी की छुड़ाई की ली आया। 28 आऊँ जाणना चाऊँ था कि सेयो एस पाँदे किजी री बजअ ते तेस पाँदे दोष लगाणे लगी रे, इजी री खातर आऊँ तेसखे तिना री महासभा रे लयी गा। 29 तेवे माखे पता लगी गा कि सेयो आपणी यहूदी बिधानो रे बईसो रे बारे रे एस पाँदे दोष लगी रे लगाणे, पर काणे जोगा और बानणे जोगा एसदे कोई दोष नि ए। 30 जेबे मांगे बताया गया कि सेयो लोक एसखे काणे री ताका रे लगी रे, तो मैं फटाफट से तांगे पेजी ता और दुश्मणा खे बी आज्ञा दिती कि तां सामणे तेसखे निर्दोष करेयो।”

31 तो तेवे जिंयाँ सिपाईया खे आज्ञा दिती थी तियाँ ई सिपाईए पौलुसो खे रातो-रात अन्तिपत्रिस नगरो खे ली आए। 32 दूजे दिने सेयो सवारा खे पौलुसो साथे कैसरिया नगरो खे जाणे खे छाडी की आपू गढो खे वापस आईगे। 33 तिने कैसरिया नगरो रे पऊँछी की हाकिमो खे पत्री दिती और पौलुस बी तेस सामणे खड़ा कित्तेया। 34 राज्यपाले पढी की पूछेया, “ये माणू कुण जे प्रदेशो राए?” पौलुसे उतर दित्तेया, “आऊँ किलिकिया प्रदेशो राए।” 35 जेबे जाणी ला कि किलिकिया राए तो राज्यपाले तेसखे बोलेया, “जेबे तेरे दुश्मण बी आओगे, तेवे आऊँ तेरा मुकदमा कहुँगा।” तिने पौलुस हेरोदेसो रे किले रे पईरे रे राखणे री आज्ञा दिती।

## 24

XXXXXXXXXXXXXXXXXXXXXXXXXXXXXXXXXXXX

1 पाँज दिना ते बाद हनन्याह नाओं रा प्रदान पुरोईत कई बुजुर्ग और तिरतुल्लुस नाओं रे केसी वकीलो खे साथे लयी की केसरिया नगरो खे आया, तिने हाकिमो सामणे पौलुसो पाँदे दोष लगाया। 2 जेबे पौलुस बुलाया, तेबे तिरतुल्लुस तिना पाँदे दोष लगाई की बोलणे लगेया, “ओ महाप्रतापी फिलेक्स! तेरे जरिए जो आसा खे बड़ा राम मिलोआ और तेरे परबन्धो ते इना जातिया खे कितणिया बुराईया सुदारिया जाओईया, 3 इना खे आसे हर जगा और हर प्रकारो ते धन्यवादो साथे मानूँ ए। 4 पर इजी री खातर कि आऊँ तेरा ओर जादा बखत खराब नि करना चाँदा। आऊँ तांते बिनती कहुँआ कि कृपा करी की म्हारिया दो-एक गल्ला सुणी लो। 5 कऊँकि आसे ये माणू ऊदम मचाणे वाला और दुनिया रे सारे यहूदिया बीचे अंगामा करने वाला और नासरियो रे अडदंगे कामो रा मुखिया पाई राखेया। 6 इने मन्दर अशुद्ध करना चाया पर आसे ये पकड़ी ता। (आसे एसखे आपणे बिधानो रे मुताबिक सजा दिती ऊँदी) 7 पर पलटणा रे सरदार लूसीयासे ये आसा ते जबरदस्ती छुड़ाई ला, 8 और दुश्मणा खे तां सामणे आऊणे खे बोलेया इना सबी गल्ला खे जिना रे बारे रे आसे एस पाँदे दोष लगाणे लगी रे, ताखे आपू ई एसखे परखी की पता लगी जाणा।” 9 यहूदिये बी तेसरा साथ देई की बोलेया कि यो गल्ला ईयां ई आईया।

XXXXXXXXXX XX XXXXXX

10 जेबे हाकिम पौलुसो खे बोलणे खे सारा (संकेत) कित्तेया, तेबे पौलुसे जवाब दित्तेया, “जेबे माखे पता लगेया कि तूँ बऊत साला ते एसा जातिया रा न्याय करदा आयी रा, तेबेई खुशिया साथे

आपणा जवाब देऊँआ। <sup>11</sup> तूँ आपू जाणी सकेया कि जदुओ ते आऊँ यरूशलेमो रे भक्ति करने खे मन्दरो रे आया, माखे बारा दिना ते जादा नि ऊई रे। <sup>12</sup> और तिने आऊँ ना मन्दरो रे, ना प्रार्थना रा कअर, ना नगरो रे केसी साथे बईस करदे या पीड़ (भीड़) लगादे ऊए देखेया, <sup>13</sup> और ना ई सेयो तिना गल्ला खे, जिना रा सेयो मां पाँदे दोष लगाणे लगी रे, तां सामणे सच साबित करी सकोए। <sup>14</sup> पर आऊँ तां सामणे ये मानी लऊँआ कि जेते कामो खे यो अड़दंगे काम बोलोए तेसरी ई रीतिया ते आऊँ आपणे बाप-दादेया रे परमेशरो री सेवा करूँआ और जो गल्ला बिधान और भविष्यबक्तेया री कतावा रे लिखी राखिया, तिना सबी पाँदे विश्वास करूँआ <sup>15</sup> और परमेशरो ते उम्मीद राखूँआ कि जो सेयो आपू बी राखोए कि तर्मी और पापी दोनो जिऊँदे ऊणे। <sup>16</sup> इजी ते आऊँ आपू बी कोशिश करूँआ कि परमेशरो री और मांणूआ री तरफा ते मेरा विवेक सदा निर्दोष रओ।

<sup>17</sup> “बऊत साला ते बाद आऊँ आपणे गरीब लोका खे दान पऊँछाणे और पेंट चढ़ाणे यरूशलेम नगरो खे आया था। <sup>18</sup> तिने आऊँ मन्दरो रे शुद्ध दशा रे और बिना पीड़ा ते और बिना दंगा करदे ऊए पेंट चढ़ादे ऊए देखेया-पर आ, आसिया प्रदेशो रे कई यहूदी थे, तिना खे ठीक था <sup>19</sup> कि जे मेरे बिरोदो रे तिना री कोई गल्ल ओ तो, एती मां सामणे आयी की मां पाँदे दोष लगादे। <sup>20</sup> या यो आपू ई बोलो कि जेबे आऊँ महासभा सामणे खड़ा था, तेबे इने मांदे कुण जा अपराध पाया? <sup>21</sup> एसा एकी गल्ला खे छाडी की जो मै इना बीचे आक्का पाई की बोली थी, ‘मरे ऊए रे जिऊँदे ऊणे रे बारे रे आज मेरा तुसा सामणे मुकदमा ऊणे लगी रा।’” <sup>22</sup> फेलिक्से जो एस कामो रिया गल्ला ठीक-ठीक जाणो था, सेयो ये बोली की टाली ते, “जेबे पलटणा रा सरदार लूसियास आऊणा, तेबे तुसा री गल्ला रा न्याय करूँगा।” <sup>23</sup> सूबेदारो खे बोलेया कि पौलुसो खे कुछ् टीअल (छूट) देई की रखवाली करेयो पर तेसरे दोस्ता बीचा ते केसी खे बी तेसरी सेवा करने ते नि रोकणा।

### CHAPTER 25 PREVIOUS CHAPTER NEXT CHAPTER

<sup>24</sup> थोड़े दिना ते बाद राज्यपाल फेलिक्स आपणी लाड़ी दरुसिल्ला खे, जो यहूदिणी थी, साथे लयी की कैसरिया नगरो खे आया और पौलुसो खे बुलाई की तेस विश्वासो रे बारे दे, जो यीशु मसीह पाँदे ए, तेसते सुणेया। <sup>25</sup> जेबे पौलुस तर्म, सबर और आऊणे वाले न्याय रे बारे रे बताओ था, तेबे फेलिक्से डरदे ऊए बोलेया, “एबु तो जा, मौका मिलणे पाँदे मां तूँ फेर बुलाणा।” <sup>26</sup> राज्यपाल फेलिक्सो खे पौलुसो ते कुछ् पैसे मिलणे री बी उम्मीद थी, इजी री बजअ ते से तेसखे ओर बी बुलाई-बुलाई की गल्ला करो था। <sup>27</sup> पर जेबे दो साल बीती गे, तेबे पुरकियुस फेस्तुस फेलिक्सो री जगा पाँदे राज्यपाल बणेया और फेलिक्स यहूदिया खे खुश करने री इच्छा ते पौलुसो खे बन्दुआ ई छाडी गा।

## 25

### CHAPTER 25 PREVIOUS CHAPTER NEXT CHAPTER

<sup>1</sup> फेस्तुस यहूदिया प्रदेशो रे राज्यपालो रा काम सम्बालने ते तीन दिन बाद कैसरिया नगरो ते यरूशलेमो खे गया। <sup>2</sup> तेबे बड़े पुरोईत और यहूदी अगुवे तेस सामणे पौलुसो पाँदे आरोप लगाए। <sup>3</sup> तिने फेस्तुसो ते बिनती किती कि से पौलुसो खे यरूशलेमो खे बुलाणे री कृपा करो, कऊँकि सेयो पौलुसो खे बाटा रेई काणे री ताका रे थे। <sup>4</sup> फेस्तुसे बोलेया, “पौलुस कैसरिया रे पईरे रे ए और मां आपू तेती चट ई जाणा।” <sup>5</sup> फेर बोलेया, “जो तुसा बीचे अक्क राखोए, सेयो बी साथे चलो और जे इने मांणूए कुछ् बुरा काम करी राखेया, तो तेस पाँदे दोष लगाओ।”

<sup>6</sup> फेस्तुस यरूशलेमो रे तिना बीचे कोई आठ-दस दिन रई की कैसरिया नगरो खे गया और दूजे दिने न्याय आसणो पाँदे बैठी की पौलुसो खे ल्याऊणे री आज्ञा दिती। <sup>7</sup> जेबे से आया, तेबे जो यहूदी अगुवे यरूशलेमो ते आयी रे थे, तिने नेडे-तेड़े खड़ी की तेस पाँदे बऊत सारे दोष लगाए, जिना रा तिना गे कोई सबूत नि था। <sup>8</sup> पर पौलुसे जवाब दितेया, “मै ना तो यहूदिया रा बिधानो रा, ना ई मन्दरो रा और ना ई कैसरो रे खलाफ कुछ् अपराध करी राखेया।” <sup>9</sup> तेबे फेस्तुसे यहूदिया खे खुश

करने री इच्छा ते पौलुसो ते पूछेया, “क्या तूँ यरूशलेमो खे जाणा चाएया और तेती मां सामणे तेरे एस मुकदमे रा न्याय कित्तेया जाणा?” <sup>10</sup> पौलुसे बोलेया, “आऊँ कैसरो रे न्याय आसणो सामणे खड़ी रा, मेरे मुकदमे रा एथी न्याय ऊणा चाईयो, जेड़ा तूँ अच्छी तरअ ते जाणेया कि यहूदिया रा मैं कुछ बी अपराध निए कित्तेया रा। <sup>11</sup> जे आऊँ अपराधी ए और काणे जोगा कुछ अपराधो रा काम करी राखेया, तो मरने ते नि मुकरदा। पर जिना गल्ला रा यो यहूदी अगुवे मां पाँदे दोष लगाणे लगी रे, जे तिना बीचा ते कोई गल्ल सच नि ऊई, तो कोई माखे तिना रे आधो रे नि देई सकदा। आऊँ कैसरो ते विनती करूँआ, सेई मेरा न्याय करो।” <sup>12</sup> तेबे फेस्तुसे मन्त्रिया री सभा साथे बात-चीत करी की बोलेया, “तैं कैसरो ते विनती करी राखी, तूँ कैसरो गे ई जाणा।”

~~~~~

¹³ कुछ दिन बितणें ते बादो ते अगिरप्पा राजा और तेसरी छोटी बईण बिरनिके कैसरिया रे आयी की फेस्तुसो खे मिले। ¹⁴ तिना रे बऊत दिन तक तेती रणे ते बादो ते फेस्तुसे पौलुसो रे बारे रे राजे गे बताया कि एक माणू ए, जेसखे फेलिक्स बन्दुआ छाड़ी गा रा। ¹⁵ जेबे आऊँ यरूशलेमो रे था, तेबे बड़े पुरोईत और यहूदिया रे बुजुर्गे तेस पाँदे आरोप लगाया और चाया कि तेसखे सजा मिलो। ¹⁶ पर मैं तिना खे बोलेया, “रोमिया री एड़ी रवाज निए कि केसी माणूए खे सजा मिलो, जदुओ तक अपराधिया खे तेस पाँदे दोष लगाणे वाले रे आमणे-सामणे खड़े ऊई की दोषो रा जवाब देणे रा अवसर नि मिलो। ¹⁷ तो जेबे यहूदी अगुवे मां साथे केसरिया आये थे, तेबे मैं देर नि कित्ती, पर दूजे ई दिने न्याय आसणो रे बैठी की तेस माणूए खे ल्याऊणे री आज्ञा दिती। ¹⁸ जेबे तेसरे दुश्मण खड़े ऊए, तेबे तिने एड़ी बुरी गल्ला रा दोष नि लगाया, जेड़ी आऊँ समजूँ था। ¹⁹ पर सेयो आपणे तर्म और यीशु नाओ रे केसी माणूए रे बारे दे, जो मरी गा था और पौलुस तेसखे जिऊँदा बताओआ, बईस करो थे। ²⁰ आऊँ उलजणा रे पड़ी गा कि इना गल्ला रा पता कियों लगाऊँ? इजी री खातर मैं पौलुसो ते पूछेया, क्या तूँ यरूशलेम जाणा चाएगा, ताकि तेती इना गल्ला रा न्याय ओ? ²¹ पर जेबे पौलुसे विनती कित्ती कि मेरे मुकदमे रा न्याय महाराजाधिराजो गे ओ, तो तेबे मैं आज्ञा दिती कि जदुओ तक तेसखे कैसरो गे नि पेजूँ, तदुओ तक तेसखे कैदा रे राखेया जाओ।” ²² तेबे अगिरप्पे फेस्तुसे खे बोलेया, “आऊँ बी तेस माणूए री सुणना चाऊँआ।” तिने बोलेया, “तां काल सुणी लणी।”

²³ तेबे दूजे दिने, जेबे महाराजा अगिरप्पा और बिरनिके बड़ी धूमधामा साथे पलटणा रे सरदार और नगरो रे बड़ेया लोका साथे दरबारो रे पऊँछेया, तेबे फेस्तुसे आज्ञा दिती कि पौलुसो खे ली आओ। ²⁴ फेस्तुसे बोलेया, “ओ राजा अगिरप्पा और सब लोको, जो आसा साथे एती ए, तुसे एस माणूए खे देखोए, जेसरे बारे रे सारे यहूदिये यरूशलेम और एती बी चींगी-चींगी की मांते विनती कित्ती कि एसरा जिऊँदा रणा ठीक निए। ²⁵ पर मैं जाणी ला की तिने एड़ा कुछ नि करी राखेया की तेसखे मारी देओ, और बल्कि तिने आपू ई महाराजे ते विनती कित्ती, तेबे मैं तेसखे रोम पेजणे रा फैसला कित्तेया। ²⁶ पर मैं तेसरे बारे रे कोई ठीक गल्ल नि पाई, ताकि आपणे स्वामिए खे लिखूँ, इजी री खातर आऊँ एसखे तुसा सामणे और महाराज अगिरप्पा तां सामणे ल्याई राखेया, ताकि परखणे ते बाद माखे कुछ लिखणे खे मिलो ²⁷ कऊँकि बन्दुओ खे पेजणा और जो तेस पाँदे दोष लगाई राखे, सेयो नि बताणें, माखे बेकार लगेओ।”

26

~~~~~

<sup>1</sup> अगिरप्पे पौलुसो खे बोलेया, “ताखे आपणे बारे रे बोलणे री आज्ञा आए।” तेबे पौलुस आध आगे करी की जवाब देणे लगेया, <sup>2</sup> “ओ अगिरप्पा राजा! जितणी गल्ला रा यहूदी अगुवे मां पाँदे दोष लगाणे लगी रे, आज तां सामणे तिना रा जवाब देणे खे आऊँ आपू खे धन्य समजूँआ। <sup>3</sup> खास कर इजी खे कि तूँ यहूदिया रे सब व्यवहार और बईसा खे जाणेया। तेबे आऊँ विनती करूँआ कि शान्त ऊई की मेरी सुणो।

4 “जेड़ा मेरा चाल-चलण शुरूओ ते आपणी जातिया बीचे और यरूशलेमो रे था, ये सब यहूदिया रे अगूवा जाणोए। 5 सेयो जे गवाई देणा चाओए, तो शुरूओ ते माखे पछ्ययाणोए कि आऊँ फरीसी ऊई की आपणे तमों रे सबी ते खरे पन्थो रे मुताबिक चलेया। 6 और एबे तेस वादे री उम्मीदा री बजअ ते, जो परमेशरे आसा रे बाप-दादेया साथे किती थी, मां पाँदे मुकद्दमा चली रा। 7 तेसी वादे रे पूरे ऊणे री उम्मीद लगाए रे आसा रे बारा गोत्र, आपणे सारे मनो ते रात-दिन परमेशरो री सेवा करदे आयी रे। ओ राजा! इजी उम्मीदा रे बारे रे यहूदी मां पाँदे दोष लगाणे लगी रे। 8 जबकि जादातर यहूदी ये विश्वास करोए कि परमेशर मरे रेया खे जिऊँदा करोआ, तो तुसा रे एती, ये गल्ल कऊँ विश्वासो जोगी नि समजी जांदी?

9 “मैं बी सोचेया था कि यीशु नासरियो रे नाओं रे बिरोदो रे माखे बऊत कुछ करना चाईयो। 10 और मैं यरूशलेमो रे एड़ा ई किचेया और बड़े पुरोईता ते अक्क पाई की बऊत सारे पवित्र लोक जेला रे पाए और जेबे सेयो काए जाओ थे, तो आऊँ बी तिना रे बिरोदो रे आपणी सलाह देऊँ था। 11 आऊँ हर प्रार्थना रे कअरो रे तिना खे कूटी-कूटी की यीशुए री निन्दा करवाऊँ था, एथो तक कि रोषो रे मारे इतणा पागल ऊईगा कि बारले नगरो रे जाई की बी तिना खे सताऊँ था।

**एक पढ़ाई के लेख**  
(**एक पढ़ाई के लेख** 9:1-19; 22:6-16)

12 “एसी धुना रे जेबे आऊँ बड़े पुरोईता ते अक्क और आज्ञा-पत्र लयी की दमिश्को नगरो खे जाणे लगी रा था, 13 तेबे ओ राजा! बाटा रे त्याड़िया जे, मैं सर्गों ते एक सूरजो री चमका ते बी बढ़ी की एक जोति आपू पाँदे और साथे चलणे वालेया रे चऊँ कनारे चमकदी ऊई देखी। 14 और जेबे आसे सब जमीना पाँदे रूड़ी गो, तेबे मैं इब्रानी पाषा (भाषा) रे मां साथे बोलदे ऊए ये शब्द सुणेया, ‘ओ शाऊल! ओ शाऊल! तू माखे कऊँ सताणे लगी रा? पईने पाँदे लाते बाणी ईंदे तेरा ई नुकशाण ए।’ 15 मैं बोलेया, ‘ओ प्रभु! तू कुण ए?’ प्रभुए बोलेया, ‘आऊँ यीशु ए, जेसखे तू सताएया। 16 पर तू उठ, आपणे पैरा पाँदे खड़ा ओ, कऊँकि मैं ताखे इजी री खातर दर्शन देई राखेया, ताकि ताखे तिना गल्ला रा सेवक और गवा ठराऊँ, जो तैं देखी राखिया और तिना रा बी, जिना री तई मां ताखे दर्शन देणा 17 यहूदियो और दुजिया जातिया ते, जिना बीचे आऊँ ताखे पेजणे लगी रा मां तू तिना ते बचाणा। 18 ताकि तू तिना री आखी खोल, ताकि सेयो न्हरे ते जोतिया री तरफा खे और शैतानो रे अक्को ते परमेशरो रे राज्य री तरफा खे फिरो। ताकि सेयो पापो री माफी और तिना लोका साथे जो मां पाँदे विश्वास करने ते पवित्र कित्ते रे ए, जायदात पाओ।’

**एक पढ़ाई के लेख**

19 “तो ओ अगिरप्पा राजा! मैं तेस स्वर्गिय दर्शनो री गल्ल मानी ली। 20 पर पईले दमिश्क नगरो रे और तेबे यरूशलेमो रे रणे वालेया खे, तेबे यहूदिया रे सारे देशो रे और दुजिया जातिया खे समजयांदा रया कि मन फिराओ और परमेशरो री तरफा खे फिरी की मन फिराणे जोगा काम करो। 21 इना गल्ला री बजअ ते यहूदी माखे मन्दरो रे पकड़ने और काणे री कोशिश करो थे। 22 पर परमेशरो री मइरवानिया ते आऊँ आजो तक बणी रा और छोटे-बड़े सबी सामणे गवाई देऊँआ और तिना गल्ला खे छाडी की ओर कुछ नि बोलदा, जो भविष्यबक्ते और मूसे बी बोलेया कि ऊणे वालिया ए 23 कि मसीह खे दुःख ऊणा और तेस ई सबी ते पईले मरे देया बीचा ते जिऊँदे ऊई की यहूदी लोका बीचे और दुजिया जातिया बीचे जोतिया रा प्रचार करना।”

24 जेबे पौलुस ईयां जवाब देणे लगी रा था, तेबे फेस्तुसे जोरे की बोलेया, “ओ पौलुस, तू पागल ऊईगा रा, जादा पढ़ाईये तू पागल बणाई ता दा।” 25 पर पौलुसे बोलेया, “ओ महाप्रतापी फेस्तुस! आऊँ पागल निए, पर सच्चाई और बुद्धि री गल्ल कहुँआ। 26 राजा बी जेस सामणे आऊँ निडर ऊई की बोलणे लगी रा, इना गल्ला खे जाणोआ और माखे विश्वास ए कि इना गल्ला बीचा ते कोई एसते छीपी दी निए, कऊँकि ये घटना कोई कूणे रे नि ऊई री। 27 ओ अगिरप्पा राजा! क्या तू भविष्यबक्तेया पाँदे विश्वास करेया? आ, आऊँ जाणूँआ कि तू विश्वास करेया।” 28 तेबे अगिरप्पे

पौलुसो खे बोलेया, “तू थोड़ा जा ई समजयाणे ते माखे मसीह बनाणा चाएया?” 29 पौलुसे बोलेया, “मेरी परमेशरो ते ये प्रार्थना ए कि क्या थोड़े जे, क्या बऊत जे, बस तूँई नि, पर जितणे लोक आज मेरी सुणने लगी रे, इना बन्दना खे छाडी की सेयो मां जेड़े मसीह बणी जाओ।” 30 तेवे राजा, हाकिम और बिरनिके और तिना साथे बैठणे वाले खड़े ऊईगे 31 और लग जे जाई की आपू बीचे बोलणे लगे, “ये माणू एड़ा कुछ तो नि करदा, जो मौत या फसणे जोगा ओ।” 32 अग्रिप्पे फेस्तुसो खे बोलेया, “जे ये माणू कैसरो री दुहाई नि देंदा, तो छूटी सको था।”

## 27

प्रेरितों के काम 27:1-27:20

1 जेबे फेस्तुस राज्यपालो खे ये पक्का निश्चा ऊईगा कि आसे जाहूजो रे इटलिया प्रदेशो रे रोम नगरो खे जाईए, तो तेवे तिने पौलुस और कुछ ओर कैदी बी यूलियुस नाओं री महाराजा अगुस्तुसो री पलटणारे एक सूबेदारो रे आथो रे देई ते। 2 अद्रमुत्तियुमो नगरो रे एक जाहूजो पाँदे, जो आसिया प्रदेशो रे कनारे री जगा रे जाणे वाला था, चढ़ी की आसे से खोली ता और अरिस्तर्खुस नाओं रा एक माणू आसा साथे था जो मकिदुनी प्रदेशो रे थिस्सलुनीके नगरो रा रणे वाला था। 3 दूजे दिने आसे सैदा नगरो रे पऊँछे और यूलियुसे पौलुसो पाँदे कृपा करी की से साथिया गे जाणे दितेया ताकि से तिना ते जरूरी चीजा ली आओ। 4 तेथा ते आसे लोके दुबारा यात्रा शुरू कित्ती। उल्टी अवा चलणे री बजअ ते आसे साइप्रसो टापूए री आड़ा रिये चले 5 और किलिकिया और पंफूलिया नगरो रे नेड़े समुद्रो रे ऊई की लूसिया प्रदेशो रे मूरा नगरो रे उतरे। 6 तेती सूबेदारो खे सिकन्दरिया नगरो रा एक जाहूज इटलिया प्रदेशो खे जांदा ऊआ मिलेया और तिने आसे तिदे चढाई ते। 7 जेबे आसे बऊत दिन तक, आऊले-आऊले चली की मुश्कला ते कनिडुस नगरो रे सामणे पऊँछे, तो तेबे कऊँकि अवा आसा खे आगे जाणे नि देओ थी, आसे सलमोने रे सामणे ते ऊई की करेते टापूए री आड़ा रे चले 8 और तिजी रे कनारे-कनारे पाँदे मुश्कला ते चली की शुभ लंगरबारी नाओं री एक जगा रे पऊँछे, जेथा ते लसया नगर नेडे था।

9 जेबे बऊत दिन बीती गे और जलयात्रा रे मुसीबत तेबे ओ थी, कऊँकि बअरतो रे दिन एबे बीती गे थे। तेबे पौलुसे सेयो ये बोली की समजयाए, 10 “ओ सज्जनो! माखे एड़ा लगोआ कि एसा यात्रा रे विपदा और बऊत नुकशाण, माल और जाहूजो रा ई नि, बलिक म्हारे प्राणो रा बी ऊणे वाला ए।” 11 पर सूबेदारो पौलुसो री गल्ला ते बढी की कप्तान और जाहूजो रे मालको री गल्ल मानी। 12 से बन्दरगाह टण्ड बिताणे खे ठीक नि थी, इजी री खातर बऊत जणेया रा बिचार ऊआ कि जे तेथा ते जाहूज खोली की जे कियॉ बी ऊई सको, तो फीनिक्सो रे पऊँछी की टण्ड बिताईये। ये तो करेते टापूए री एक बन्दरगाह ए, जो दक्खण-पच्छिम और उत्तर-पच्छिमो री तरफा खे खुलोआ।

प्रेरितों के काम 27:21-27:30

13 जेबे कुछ-कुछ दक्खण री अवा चलणे लगी, तेबे ये समजी गे कि आसा रा मतलब पूरा ऊईगा, आसे लंगर चकेया और कनारे पाँदेए करेते टापूए रिये जाणे लगे। 14 पर थोड़ी देर बाद जमीना री तरफा ते बऊत बड़ा तूफान आईगा, जेतेखे यूरकुलीन बोलोए। 15 जेबे तूफान जाहूजो साथे टकराया, तेबे जाहूज तेस सामणे ठईरी नि सकेया, तेबे आसे से हड़ने दितेया और ईयां ई हड़दे ऊए चली गे। 16 तेबे कौदा नाओं रे एक छोटे जे टापूओ री आड़ा रे हड़दे-हड़दे, बड़ी मुश्कला साथे डांगिया खे वशो रे करी सके। 17 तेबे मल्लाहे से चकी की बऊत तरीके करी की जाहूज थालो ते बानेया और सुरतिस खाड़िया रे चोरबालूओ पाँदे फसणे रे डरो ते तिने लंगरो खे थोड़ा थाले ऊतारी की जाहूज अवा साथे-साथे हड़ने खे छाडीता। 18 जेबे आसे तूफानो ते बऊत छूनके और ताक्के खाए, तेबे दूजे दिने सेयो जाहूजो रा माल सेटणे लगे 19 और तीजे दिने तिने आपणे आथो साथे जाहूजो रा साज्र समान बी सेटी ता। 20 जेबे बऊत दिन तक ना सूरज दिशेया और ना तारे और बड़ा तूफान चलदा रया, तेबे आखरी रे आसा रे बचणे री उम्मीद बी जांदी रई।

21 जेबे सेयो बऊत दिन तक पूखे रई चुके, तेबे पौलुसे तिना बीचे खडे ऊई की बोलेया, “ओ लोको! तुसा खे चाईयो था कि तुसे मेरी गल्ल मानी की करते टापूए ते जाहूज नि खोलदे और ना ई बिपदा आऊँदी और ना ई ये नुकशाण ऊँदा। 22 पर एबे आऊँ तुसा खे समजयाऊँआ कि इम्मत राखो, कऊँकि तुसा बीचा ते केसी रे बी पराणो रा नुकशाण नि ऊणा, पर सिर्फ जाहूजो रा। 23 कऊँकि परमेशर जेसरा आऊँ ए और जेसरी सेवा करूँआ, तेसरे स्वर्गदूते आज राती मांगे आयी की बोलेया, 24 ओ पौलुस! डर नि, तेरा कैसरो रे सामणे खडा ऊणा जरूरी ए, और देख परमेशरे तां पाँदे कृपा करी की सबी खे जो तां साथे यात्रा करोए, ताखे देईते रे। 25 इजी री खातर ओ सज्जनो! इम्मत राखो, कऊँकि आऊँ परमेशरो पाँदे विश्वास राखूँआ कि जेड़ा मांगे बोली राखेया, तेड़ा ई ऊणा। 26 पर आसा खे केसी टापूओ रे जाई की टिकणा चाईयो।”

XXXXXXXXXX

27 जेबे चऊदवीं रात आयी और आसे अदिरया समुद्रो रिये पटकदे फिरने लगी रे थे, तेबे आदिया राती रे नेडे मल्लाहे अनुमानो ते जाणेया कि आसे केसी देशो रे नेडे पऊँछणे लगी रे। 28 थाह लयी की तिने सैंती मीटर डूगा पाया और थोड़ा जा आगे चली की फेर थाह लयी, तेबे सताई मीटर डूगा पाया। 29 तेबे पाथरों वाली जगा रे टकराणे रे डरो ते तिने जाहूजो री पिछाड़िया रे चार लंगर बाए और प्याग न्यालने री कामना करदे रये। 30 पर जेबे मल्लाह जाहूजो ते नठणा चाओ थे और तिने जाहूजो रे सामणे री तरफा ते लंगर पाणे रे बाने रे डोंगी समुद्रो रे ऊतारी ती। 31 तेबे पौलुसे सूबेदार और सिपाईया खे बोलेया, “इना रा जाहूजो रे रणा जरूरी ए तेबे तुसे बची सकोए।” 32 तेबे सिपाईए रस्से बाडी की डोंगी रुड़ाई ती।

33 जेबे प्याग ऊणे वाली थी, तेबे पौलुसे ये बोली की सब रोटी खाणे खे समजयाए, “आज चौदा दिन ऊईगे कि तुसे उम्मीद देखदे-देखदे रये और बिल्कुल रोटी नि खाई। 34 इजी री खातर आऊँ तुसा खे बोलूँआ कि सब रोटी खाई लो जेते साथे तुसा रा बचाव ओ, और तुसे सब बिल्कुल ठीक-ठाक रणे।” 35 ये बोली की तिने रोटी लयी की सबी सामणे परमेशरो रा धन्यवाद करी की तोड़ी और खाणे लगेया। 36 तेबे सेयो सब बी इम्मत बानी की रोटी खाणे लगे। 37 आसे सब मिली की जाहूजो रे दो सौ छयात्तर जणे थे। 38 जेबे सेयो रोटी खाई की रजी गे तेबे कणक समुद्रो रे सेटी की जाहूज अलका करने लगे।

39 जेबे दिन ऊआ, तेबे तिने से देश नि पछ्याणेया, पर एक खाड़ी देखी, जेतेरा कनारा चौरस था और सोचेया कि जे ऊई सको तो एते पाँदे ई जाहूजो खे टिकाऊँए। 40 तेबे तिने लंगर खोली की समुद्रो रे छाडीता और तेबुई पतवारा रे रस्से खोली ते और अवा रे सामणे आगला पाल चड़ाई की कनारे पाँदो खे चले। 41 पर जेती दो समुद्रो रे संगमो री जगा पड़ो थी, तेती तिने जाहूज टिकाया, तेबे तिजी रा आगला इस्सा तो ताक्का खाई की दबी गी और टली नि सकी, पर पिछला इस्सा लईरा रे जोरो ते टूटणे लगेया। 42 तेबे सिपाईए सोचेया कि कैदिया खे काई देऊँए, केथी एड़ा नि ओ कि कोई तरी की नठी जाओ। 43 पर सूबेदार पौलुसो खे बचाणे री खातर सेयो एड़ा करने ते रोके और बोलेया कि जो तरी सकोए, सेयो पईले ई छवाल लयी की कनारे पाँदे निकली जाओ 44 और बाकी कोई पाटड़ेया पाँदे और कोई जाहूजो री ओरी केसी चीजा रे साअरे निकली जाओ। ईयां सब बची की जमीना पाँदे बची की निकली गे।

## 28

XXXXXXXXXX

1 जेबे आसे सब यात्री कनारे पाँदे ठीक-ठाक पऊँछी गे, तेबे आसा खे पता लगेया कि एस टापूओ खे माल्टा बोलोए। 2 तेथो रे रणे वाले लोके आसा पाँदे नऊखा प्यार दखाया, कऊँकि बादल बरसणे री बजअ ते टण्ड थी, तेबे तिने आग सुलगाई की आसे सब ठराए। 3 जेबे पौलुसे लकडुआ रा पारा (गट्टा) कट्टा करी की आगी पाँदे राखेया, तेबे एक साप आगी रे सेको रे निकलेया और तेसरे आथो रे लिपटी गा। 4 जेबे तेथो रे रणे वालेया साप तेसरे आथो रे लटकैया रा देखेया, तेबे आपू बीचे

बोलेया, “सच्ची ये माणू अत्यारा ए, हालाँकि समुद्रो ते बची गा, पर तेबे बी न्यायी देविए जिऊँदा नि रणे दित्तेया।”<sup>5</sup> पौलुसे साप आगी रे चडाकी ता और तेसखे कोई नुकशानि नि ऊआ।<sup>6</sup> पर सेयो लोक न्यालदे रये कि तेसरे सोजा आयी जाणा या एकदम रूडी की मरी जाणा, पर जेबे सेयो बऊत देर तक देखदे रये कि एसरा कुछ नि बिगड़ेया, तेबे तिने ओर ई बिचार कित्तेया और बोलेया, “ये तो कोई देवता ए।”

<sup>7</sup> तेसा जगा रे नेड़े-तेड़े तेस टापूओ रे प्रदान पुबलियुसो री जमीन थी। तिने आसे आपणे कअरे दोस्ता जेड़े निए और तीन दिन तक प्यारो साथे पराऊणचारी कित्ती।<sup>8</sup> पुबलियुसो रा पिता बुखार और खूनी री आंवा रा रोगी था, तेबे पौलुसे तेसरे कमरे रे जाई की तेसखे प्रार्थना कित्ती और तेस पाँदे आथ राखी की से ठीक कित्तेया।<sup>9</sup> जेबे एड़ा ऊआ, तेबे तेस टापूओ रे बाकी बमार बी पौलुसो गे आईगे और तिने सेयो ठीक कित्ते।<sup>10</sup> तिने आसा री बऊत आओ-बैठ कित्ती और जेबे आसे तथा ते तीन मीन्ने बाद चलणे लगे, तेबे जो कुछ आसा खे जरूरी था, से जाहजो पाँदे राखी ता।

### \*\*\*\*\*

<sup>11</sup> तीन मीन्ने ते बाद आसे सिकन्दरिया रे एक जाहजो पाँदे चली पड़े, जो तेस टापूओ पाँदे टण्ड पड़ने री बजअ ते रूकेया रा था। तेते जाहजो रे आगले इस्से पाँदे एक जोड़ी देवतेया री मूरत दियुसकूरी गद्दी री थी।<sup>12</sup> सुरकूसा नगरो रे लंगर पाई की आसे तेती तीन दिन तक रये।<sup>13</sup> तथा ते आसे कूमी की रेगियुम नगरो रे आए और एक दिन बाद दक्खणो ते अवा चली, तेबे आसे दूजे दिने पुतियुले नगरो रे आए।<sup>14</sup> तेती आसा खे विश्वासी पाई मिले और तिना रे बोलणे पाँदे आसे तिना रे कअरे सात दिन तक रये और तेबे रोमो खे चली गे।<sup>15</sup> रोमो ते कुछ विश्वासी पाई आसा रा समाचार सुणी की कि आसे तेती आऊणे लगी रे सेयो अप्पियुसो रे चौको रे और तीन सराए तक आसा खे मिलणे खे आए, जिना खे देखी की पौलुसे परमेशरो रा धन्यवाद कित्तेया और इम्मत बानी।<sup>16</sup> जेबे आसे रोम नगरो रे पऊँछे, तेबे पौलुसो खे एक सिपाईए साथे, जो तेसरी रखवाली करो था, कल्ले रणे री आज्ञा मिली।

### \*\*\*\*\*

<sup>17</sup> तीन दिना ते बाद तिने यहूदिया रे खास लोक बुलाए और जेबे सेयो कट्टे ऊए तो तिना खे बोलेया, “ओ पाईयो, मैं आपणे लोका रे या आपणे बाप-दादेया रे व्यवहारो रे बिरोदो रे कुछ नि बोलेया, तेबे बी कैदी बणाई की यरूशलेमो ते रोमी सरकारा रे आथो रे सम्बाली ता।<sup>18</sup> तिने आऊँ परखी की छाडणा चाया, कऊँकि मांदे मृत्यु-दण्डो जोगा कोई दोष नि था।<sup>19</sup> पर जेबे यहूदी अगुवे इजी रे बिरोदो रे बोलणे लगे, तेबे माखे कैसरो ते विनती करनी पड़ी, ये सोची की नि कि मां आपणे लोका पाँदे कोई दोष लगाणा था।<sup>20</sup> इजी री खातर मैं तुसे बुलाई राखे ताकि तुसा साथे मिलूँ और बातचीत करूँ, कऊँकि इस्राएलो री उम्मीदा खे आऊँ इना जंजीरा रे जकड़ी रा।”<sup>21</sup> तिने तेसखे बोलेया, “ना आसा खे तेरे बारे रे यहूदिया प्रदेशो ते चिट्ठिया मिलिया और ना ई विश्वासी पाईया बीचा ते आयी की किने तेरे बारे रे कुछ बताया और ना ई बुरा बोलेया।<sup>22</sup> पर तेरा बिचार क्या ए? सेई आसा तांते सुणना चाऊँए, कऊँकि आसे जाणूँए कि हर जगा रे एस मतो रे बिरोदो रे लोक गल्ला करोए।”

<sup>23</sup> तेबे तिने पौलुसो खे एक दिन ठराया और बऊत लोक तेसरे गे कट्टे ऊए और से परमेशरो रे राज्य री गवाई देदा ऊआ और मूसे रा बिधान और भविष्यबक्तेया री कताबा ते प्रभु यीशुए रे बारे रे समजयाई-समजयाई की प्यागा ते साँजा तक बोलदा रया।<sup>24</sup> तेबे कुछ जणेया सेयो गल्ला मानी लईया और कुछ जणेया विश्वास नि कित्तेया जो पौलुसे बोलिया थिया।<sup>25</sup> जेबे सेयो आपू बीचे एक मत नि ऊए, तेबे पौलुसो री एसा एक गल्ला बोलणे पाँदे चली गे, “पवित्तर आत्मे यशायाह भविष्यबक्ते रे जरिए तुसा रे बाप-दादेया खे ठीक ई बोलेया,

<sup>26</sup> “जाई की इना लोका खे बोल कि सुणदे तो रणे, पर समजणे नि और देखदे तो रणे, पर दिशणा नि।

27 कऊँकि इना लोका रा मन मोटा और तिना रे कान पारी ऊईगे रे और तिने आपणी आखी बंद करी ती रिया,

एइ नि ओ कि सेयो कदी आखी ते देखो और कानो ते सुणो और मनो ते समजो और फिरो और आऊँ तिना खे ठीक करँ।

28 “तेवे तुसे जाणो कि परमेशरो रे एस उद्धारो री कथा दुजिया जातिया गे पेजी ती री और तिना सुणनी।” 29 जेवे तिने ये बोलेया तो यहूदी आपू बीचे बऊत बईस करने लगे और तेथा ते चली गे।

30 से पूरे दो साल तक आपणे खर्चे रे कअरो रे रया 31 और जो तेसगे आओ थे, तिना सबी ते मिलदा रया और बिना रोका-टोका ते बऊत निडर ऊई की परमेशरो रे राज्य रा प्रचार करदा ऊआ और प्रभु यीशु मसीह री गल्ला सिखांदा रया।




## रोमियों रोम देशो रे विश्वासी मण्डलिया खे चिट्ठी भूमिका

रोमियों रे नाओं पौलुस प्रेरितों री चिट्ठिया रा मकसद था रोमो रे बणी री मण्डलिया री खातर बाट त्यार करना, जेतेरी योजना पौलुसे बनाई थी। तेसरी योजना थी कि थोड़े बखतो तक से तेथो रे मसीहिया बीचे काम करो, तेबे तिना री मतादा ते स्पेनो तक जाओ। मसीही विश्वासो रे आपणे ज्ञान और मसीह री जिन्दगिया रे एसरे व्यावहारिक गल्ला खे समजयाणे रिया तई पौलुसे ये चिट्ठी लिखी। एते कताबा रे आसा खे पौलुसो रे संदेशो रा सबी ते पूरा खुलासा मिलोआ।

रोमो री मण्डलिया रा आदर-सत्कार करने और तिना रिया खातर आपणी प्रार्थना रे बारे रे बताणे ते बाद, पौलुस एते चिट्ठिया रे मूल विषय रा वर्णन करोआ “कऊँकि तिदे (सुसमाचारो रे) परमेशरो री धार्मिकता विश्वासो ते और विश्वासो री खातर प्रगट ओई” 1:17।

पौलुस आगे एस मूल विषय खे विस्तारो रे समजयाओआ। सारी मानव जाति, यहूदी और दूजी जाति दूई खेई परमेशरो साथे मेल-मलाप करने री जरूरत ए, कऊँकि सारे समान रूपो ते पापो रे अक्को रे ए। यीशु मसीह पाँदे विश्वास करने रे जरिए ई लोका रा परमेशरो साथे मेल-मलाप ओआ। तेबे पौलुस मसीह साथे नयी जिन्दगिया रा वर्णन करोआ, जो परमेशरो साथे एस नये रिश्ते रा नतीजा ओआ। विश्वासिये रा परमेशरो साथे मेल-मलाप ओआ और परमेशरो रा पवित्र आत्मा पाप और मौता रे अक्को ते तेसखे आजाद करी देओआ। पाठ 5-8 रे पौलुस विश्वासिया री जिन्दगिया रे परमेशरो रे विधानो रा मकसद और परमेशरो री पवित्र आत्मा री सामर्था पाँदे बी विचार करोआ। तेबे प्रेरित एस सवालो ते चूजदा रओआ कि सारी मानव जातिया री खातर परमेशरो री योजना रे यहूदी और दूजी जाति कियाँ खरी-खरी बैटोई। से एते निचोड़ो रे पऊँछोआ कि यहूदिया रे जरिए यीशुए खे ना मानणा बी परमेशरो री तेसा योजना रा एक पाअग ए, जो सारी मानव जातिया खे यीशु मसीह रे परमेशरो री कृपा रे दायरे रे ल्याऊणे रिया खातर बनाई राखी और तेसरा विश्वास ए कि यहूदिया सदा तेसखे ना नि करदे रणा। अंतो रे पौलुस लिखोआ कि मसीही जीवन कियाँ जिऊणा चाईयो, खास करी की ओरी साथे प्यारो रा रिश्ता राखदे ऊए। से इना विषय-चीजा खे परमेशरो री सेवा, राज्य और एकी-दूजे रिया तई मसीहिया रा फर्ज और विवेको रे सवाला रे रूपो रे लओआ। से चिट्ठिया रा समापन (लिखणा बन्द करना) आपणे संदेश और परमेशरो री स्तुतिया साथे करोआ।



भूमिका और मूल विषय 1:1-17

मांणूआ रे उद्धारो री जरूरत 1:18-3:20

उद्धारो री परमेशरो री बाट 3:21-4:25

मसीह रे नया जीवन 5:1-8:39

परमेशरो री योजना रे इस्त्राएल 9:1-11:36

मसीही चाल-चलण 12:1-15:13

निचोड़ और व्यक्तिगत आदर-सत्कार 15:14-16:27



1 आऊँ पौलुस एसा चिट्ठिया खे लिखणे लगी रा जो यीशु मसीह रा दास ए। परमेशरे आऊँ प्रेरित ऊणे खे चुणी राखेया। तिने आऊँ सुसमाचारो रा प्रचार करने खे लग करी राखेया।<sup>2</sup> परमेशरे पईले तेई आपणे भविष्यवक्ताओं रे जरिए पवित्र शास्त्रो रे एस सुसमाचारो री प्रतिज्ञा किती

थी।<sup>3</sup> ये सुसमाचार आपणे पुत्र आसा रे परभु यीशु मसीह रे बारे रे था। से शरीरो रे मुताबिक तो राजा दाऊदो रे वंशो ते जम्मेया,<sup>4</sup> और पवित्र आत्मा री सामर्था ते से मेरे रेया बीचा ते जिऊँदा ऊआ। इजी ते ये साबित ऊआ कि से परमेशरो रा पुत्र ए और सेई यीशु मसीह आसा रा परभु ए।<sup>5</sup> यीशु मसीह रे जरिए माखे कृपा और परेरिताईया रा काम मिलेया, ताकि तेसरे नाओं री बजअ ते सब जातिया रे लोक सुसमाचारो पाँदे विश्वास करो और तेसरी आज्ञा मानो।<sup>6</sup> जिना बीचा ते तुसे बी ओ, जिना खे परमेशरे परभु यीशु मसीह रे लोक ऊणे खे बुलाई राखेया।  
<sup>7</sup> आऊँ ये चिट्ठी तुसा सबी लोका खे लिखणे लगी रा जो रोम नगरो रे परमेशरो रे प्यारे ए और आपणे पवित्र लोक ऊणे खे बुलाई राखे, आसा रे पिता परमेशर और परभु यीशु मसीह री तरफा ते तुसा खे कृपा और शान्ति मिलदी रओ।

### XXXXXXXX XX XXXXXXXX

<sup>8</sup> पईले आऊँ तुसा सबी खे परभु यीशु मसीह रे जरिए आपणे परमेशरो रा धन्यवाद कँआ, कऊँकि यीशु मसीह रे तुसा रे विश्वासो री चर्चा सारी दुनिया रे ऊणे लगी रिया।<sup>9</sup> परमेशर, जेसरी सेवा आऊँ आपणे पूरे मनो ते तेसरे पुत्रो रे सुसमाचारो रे बारे रे कँआ, सेई मेरा गवा ए कि आऊँ आपणी प्रार्थना रे तुसा लोका खे लगातर याद करदा रऊँआ।<sup>10</sup> और हर रोज आपणी प्रार्थना रे बिनती कँआ कि परमेशरो री इच्छा रे मुताबिक माखे आखरी रे तुसा लोका गे आऊणे रा मौका मिलो।

<sup>11</sup> कऊँकि आऊँ तुसा खे मिलणे री बड़ी इच्छा कँआ, ताकि आऊँ तुसा खे कोई आत्मिक बरदान देऊँ, जेते कि तुसे विश्वासो रे मजबूत ऊई जाओ।<sup>12</sup> मेरा मतलब ये कि आऊँ तुसा खे और तुसे माखे आपू बीचे एक दूजे खे विश्वासो रे मजबूत करिए। तुसे मजबूत ऊई जाणे कऊँकि तुसे जाणोए कि मैं कियोँ विश्वास कित्तेया और आऊँ मजबूत ऊई जाणा कऊँकि आऊँ जाणूँआ ए कि तुसे कियोँ विश्वास करोए।<sup>13</sup> ओ साथी विश्वासियो! आऊँ नि चांदा कि तुसे इजी ते अणजाण रओ कि मैं बार-बार तुसा गे आऊणा चाया पर एवुए तक आऊँ रोकी की राखी राखेया। आऊँ चाऊँआ कि जेडे मैं दूजी कई जगा रे दुजिया जातिया रे मसीह रे चले बणाए, तेडे ई रोमो रे तुसा बीचे मसीह रे चले बणाई सकूँ।<sup>14</sup> आऊँ आपणे आपू खे यूनानी पाषा बोलणे वालेया रा और अन्यभाषिया रा, अक्लमंद और मूर्खा खे सुसमाचारो रा प्रचार करने खे कर्जदार ए।<sup>15</sup> तो तेबे आऊँ तुसा खे बी जो रोम नगरो रे रओए, सुसमाचार सुनाणे खे त्यार ए।

### XXXXXXXXXX XX XXXXXXX

<sup>16</sup> कऊँकि आऊँ मसीह रे बारे रे एस सुसमाचारो ते शर्मांदा निए। ये तिना सबी खे उद्धारो रे निमित परमेशरो री सामर्थ ए, सबी ते पईले यहूदिया खे तिजी ते बाद दूजी जातिया खे जो एस सुसमाचारो पाँदे विश्वास करोए।<sup>17</sup> कऊँकि सुसमाचारो रे परमेशरो री धार्मिकता विश्वासो ते और विश्वासो खे प्रगट ओई, जेड़ा पवित्र शास्तरो रे लिखी राखेया, “विश्वासो रे जरिए तर्मी माणू जिऊँदा रणा।”

### XXXXXX XX XXXXXXX XX XXX

<sup>18</sup> परमेशरो रा रोष तो तिना सबी री अभक्ति और पापो पाँदे जो लोक करोए स्वर्गो ते प्रगट ओआ, जो सच्चो खे पापो रे कामो ते दबाई की राखोए।<sup>19</sup> इजी खे परमेशरो रे बारे रे ज्ञान तिना रे मनो रे प्रगट ए, कऊँकि परमेशरे तिना पाँदे प्रगट करी राखेया।<sup>20</sup> परमेशरो रे अणदेखे गुण, मतलब तेसरी सनातन सामर्थ और परमेशरो री तागत दुनिया री सृष्टिया रे बखतो ते, तेसरे कामे की देखणे रे आओए। इजी खे तिना लोका गे आपणे आपू खे बचाणे खे कोई जवाब निए, “आसे परमेशरो खे नि जाणदे।”<sup>21</sup> कऊँकि तिने परमेशरो खे जाणदे ऊए बी परमेशरो खे परमेशरो जोगा आदर और धन्यवाद नि कित्तेया। इजी रे बदले सेयो लोक बेकारो रे सोचणे लगे, एथो तक की तिना रे मूर्ख मनो रे न्हारा ऊईगा।<sup>22</sup> सेयो आपू खे अक्लमंद जताई की मूर्ख बणी गे।<sup>23</sup> और तिने अविनाशी महिमामय परमेशरो री आराधना छाडी की नाशवान माणू, पंछी, जानवर और लूने वाले जन्तुआ री मूर्तिया री आराधना किती।

24 इजीरी बजअ ते परमेशरे सेयो तिना रे शरीरो री पापमय इच्छा रे मुताबिक यौन अशुद्धता खे छाडी ते ताकि सेयो आपू बीचे बुरे कामो रे जरिए आपणे शरीरो रा अनादर करो। 25 तिने परमेशरो री सच्चाईया रे बारे रे विश्वास करने ते ना किती और चूठो पाँदे विश्वास कित्तेया। तिने परमेशरो रे बजाये तिना रे जरिए बणाई री सृष्टिया री पूजा और सेवा किती, जो सदा धन्य ए। आमीन।

26 इजीरी खातर परमेशरे सेयो निर्लज्ज वासनाओं रे वशो रे छाडी ते। एथो तक कि तिना री जवाणसे बी आपणा कुदरती यौन सम्बन्ध छाडी की तिजी खे जो सबाओ रे खलाफ ए, बदली ता। 27 तियाँ ई मर्द बी जवाणसा साथे कुदरती मेलजोल छाडी की आपू बीचे कामातुर ऊई की जलने लगे और मर्दे, मर्दा साथे बेशर्म काम करी की आपू पाँदे बुरे कामा री सजा रा ठीक फल पाया।

28 इजी ते बाद बी तिने ये ठीक नि समजेया कि परमेशरो रे सारे ज्ञानो खे मानो। तो परमेशरे बी सेयो सब गलत काम करने खे तिना रे नक्कमे मनो रे वशो रे छाडी ते। 29 सेयो सबी प्रकारा रे पाप, दुष्टता, लोब, बैरभावो ते परी गे और जलन, अत्या, चगड़े, छल और ईर्ष्या ते परी गे और चूगलखोर, 30 बदनाम करने वाले, परमेशरो ते करीणा करने वाले, ओरी रा अनादर करने वाले, कमण्डी, त्वालिया देणे वाले, बुरिया-बुरिया गल्ला बनाणे वाले, माया-बाओ रा कईणा ना मानणे वाले, 31 निर्बुध्द, विश्वासघाती, दयारहित और निर्दयी ऊईगे। 32 सेयो परमेशरो री ये तर्माँ री बिधि जाणोए कि एडे-एडे काम करने वालेया खे मौता री सजा मिलणी, तेवे बी ना सिर्फ आपणे आपू ई एडे काम करोए, बल्कि करने वालेया ते बी खुश ओ ए।

## 2

### ?????? ? ?

1 तुसा खे लगेओ कि तुसे एडे लोका पाँदे दोष लगाई सकोए पर ओ दोष लगाणे वालो! तूँ जो दूजेया पाँदे दोष लगाएया तांगे कोई बाह्ना निए। कऊँकि जेसा गल्ला रा तूँ दूजे पाँदे दोष लगाएया, तेसी गल्ला रे आपणे आपू खे बी दोषी बणाएया, इजीरी खातर, जो तूँ दोष लगाएया, आपू बी तिना ई कामा करेया। 2 और आसे जाणूँए कि एडे-एडे काम करने वालेया पाँदे परमेशरो री तरफा ते ठीक-ठीक दण्डो री आज्ञा ओई 3 और ओ माणूँ! तूँ जो एडे-एडे काम करने वालेया पाँदे दोष लगाएया और आपू तेडे ई काम करेया, क्या समजेया कि तूँ परमेशरो रे दण्डो ते बची जाणा? 4 क्या तूँ परमेशरो री पलाई, सईन शीलता और धीरजरूपी दौलता खे तुच्छ जाणोआ? और क्या ये नि समजदा कि परमेशरो री कृपा ताखे मन फिराणे री तरफा खे लई जाओई?

5 पर तुसे टीठ मनो रे ए और आपणे बुरे कामा ते मन फिराणे ते मना करी देओए। एडा करी की तुसे आपू खे बऊत पारी सजा कट्टी करने लगी रे। रोषो रा दिन आऊणे वाला ए जिदे परमेशरो री धार्मिकता रा न्याय प्रकट ऊणा। 6 परमेशरो हर एकी खे तेसरे कामो रे मुताबिक प्रतिफल देणा। 7 जो लोक खरे कामो रे खडे रई की महिमा, आदर और अमरता री टोला रे, तिना खे परमेशरो अनन्त जीवन देणा। 8 पर जो स्वार्थी ए और सच्चो खे नि जाणदे, बल्कि बुरे काम करोए, तिना पाँदे परमेशरो रा रोष और कोप पडना। 9 और क्लेश और संकट हर एकी माणूँए रे प्राणो पाँदे, जो बुरा करोआ, आऊणा। परमेशरो सबी ते पईले यहूदिया रा न्याय करना और तिजी ते बाद दूजिया जातिया रा न्याय करना। 10 पर महिमा, आदर और शान्ति हर एकी खे मिलणी, जो पला करोआ, पईले यहूदिया खे मिलणी, तेवे दूजिया जातिया खे। 11 कऊँकि परमेशर केसी रा पक्ष नि करदा।

12 कऊँकि जिने बिना मूसे रा बिधान पाए, पाप कित्तेया, तिना खे बिना मूसे रा बिधानो तेई सजा मिलणी और यहूदी जिने मूसे रा बिधान पाई कि पाप कित्तेया, तिना रा न्याय मूसे रा बिधानो रे मुताबिक ई ऊणा। 13 कऊँकि परमेशरो रे एती बिधानो खे सुणने वाले तर्मी निए, पर बिधानो पाँदे चलणे वाले तर्मी ठराए जाणे। 14 तेवे, जेवे दूजी जातिया रे लोक, जिना गे मूसे रा बिधान निए, सबाओ तेई बिधानो री गल्ला पाँदे चलोए और मूसे रा बिधान तिना गे ना ऊणे पाँदे बी, सेयो ये सिद्ध करी देओए की तिना रे मनो रे एक बिधान ए 15 सेयो परमेशरो रे बिधानो रिया गल्ला आपणे

दिलो रे लिखी रिया दखाओए। तिना रे विवेक बी गवाई देओए। तिना रे बिचार तिना खे कदी दोष लगाओए तो कदी तिना खे निर्दोष ठराओए। 16 ये तेस दिने सपष्ट ऊई जाणा जेस दिने परमेशर मेरे सुसमाचारो रे मुताबिक यीशु मसीह रे जरिए माणूआ री गुप्त गल्ला रा न्याय करोगा,

☞☞☞☞ ☞☞☞☞

17 आपणे बारे रे सोच जो तूँ आपू खे यहूदी समजेया और बिधानो पाँदे विश्वास राखेया और तूँ त्वालिया मारेया कि आऊँ परमेशरो रे खास जन ए। 18 तुसे परमेशरो री इच्छा जाणोए और तुसे खरिया-खरिया गल्ला जाणोए कऊँकि तुसे यो सब गल्ला मूसे रा बिधानो ते सीखी राखिया। 19 तुसा खे ये निश्चा ए कि तुसे अन्दे लोका खे पक्का ई बाट दखाई सकोए और जो न्हरे रे पटकणे लगी रे तिना खे तुसे जोतिया जेड़े ए। 20 तुसे सोचोए, “आऊँ मूखाँ खे सिखाणे वाला और बालका रा उपदेशक ए।” तुसा खे निश्चा ए कि परमेशरो रा बिधान तुसा खे पुरा ज्ञान और सच्चाई देओआ। 21 पर तूँ जो ओरी खे सिखाएया, आपणे आपू खे कऊँ नि सिखांदा? तूँ ओरी खे चोरी ना करने रा उपदेश दे आ और आपू ई चोरी करेया! 22 तूँ जो बोलेया, “व्याभिचार नि करना,” तो आपू ई व्याभिचार कऊँ करेया? तूँ जो मूर्तिया ते नफरत करेया, तो आपू ई कऊँ मन्दरा खे लूटोआ? 23 तूँ परमेशरो रा बिधानो रे बारे रे कमण्ड करेया और बिधानो खे ना मानी की परमेशरो रा नरादर कऊँ करेया। 24 इजी खे जेड़ा कि पवित्र शास्त्रो रे लिखी राखेया, “तुसा लोका री बजअ ते दूजी जातिया बीचे परमेशरो रे नाओं री निन्दा ओई।”

25 जे तूँ बिधानो पाँदे चले, तो खतने ते तो लाब ए, पर जे तूँ बिधानो खे नि माने, तो तेरा खतना बिना खतने जेड़ा ए। 26 तेवे जे बिना खतने रा माणू, परमेशरो रे बिधानो री बिधिया खे मानेया करो, तो क्या तेसरे बिना खतने री दशा, खतने रे बराबर नि गिणी जाणी? 27 और जो माणू शारीरिक रुपो ते बिना खतने ते परमेशरो रे बिधानो खे पूरा-पूरा मानोआ, तेस तुसे दोषी ठईराणे, कऊँकि तुसा गे परमेशरो रा लिखेया रा बिधान ए और खतना ऊँदे ऊए बी तुसे बिधानो खे नि मानदे। 28 असली यहूदी से नि ए जेसरा सिर्फ बारला रूप यहूदिया जेड़ा ए और असली खतना से नि ए जो बारले रूपो ते सिर्फ शरीरो रे करी राखेया। 29 पर यहूदी सेईए, जो मनो रे और खतना सेईए, जो पवित्र आत्मा रे जरिए दिलो रे कित्तेया जाओआ, ना कि लेखो खे मानणे ते, ईयाँ ई तारीफ आपणिया तरफा ते नि, बल्कि परमेशरो री तरफा ते ओई।

### 3

1 तो ओरी री बजाए यहूदिया खे जादा क्या मिलेया? और खतने ते क्या फायदा ऊआ? 2 आ, हर प्रकारा ते बऊत कुछ फायदा ऊआ। सबी ते जरूरी तो ये कि परमेशरो रे वचन यहूदिया गे सम्बाली ते। 3 जे कुछ विश्वासघाती निकले बी तो क्या ऊआ? क्या तिना रे विश्वासघाती ऊणे ते परमेशरो रा कित्तेया रा वादा बेकार जाणा? 4 कदी पनि! बल्कि परमेशर सदा सच बोलोआ और दुनिया रा हर माणू चूटा ठईरी सकोआ, जेड़ा लिखी राखेया,

“जेते कि तूँ आपणी गल्ला रे तर्मी बणो,

और न्याय करदे ऊए तेरी जय ओ।”

5 तेवे जे आसा रे बुरे काम परमेशरो री धार्मिकता दखाओई, तो आसे क्या बोलूँ? क्या ये कि परमेशर जो रोष करोआ, अन्यायी ए? ये तो आऊँ माणूआ री रीतिया पाँदे बोलूँआ। 6 कदी पनि। जे परमेशर अन्यायी ऊँदा तो तेस दुनिया रा न्याय कियाँ करना? 7 जे मेरे चूटो री बजअ ते, परमेशरो री सच्चाई तेसरी महिमा खे जादा करी की सामणे आयी, फेर कऊँ पापिया जेड़ा आऊँ दण्डो जोगा ओऊँआ। 8 कुछ लोक ये बोलदे ऊए आसा पाँदे दोष लगाओ कि इने बोलेया, “आसा खे बुरे काम करने देओ ताकि कुछ पला ऊई जाओ!” जो लोक मेरे बारे रे एड़िया गल्ला बोलोए से सजा पाणे जोगे ए।

☞☞☞☞☞☞☞☞

9 तो फेर क्या ऊआ? क्या आसे यहूदी ओरी ते जादा खरे ए? कदी पनि। कऊँकि आसे यहूदी और यूनानी दूँई पाँदे ये दोष लगाई चूके रे कि सेयो सब के सब पापो रे वशो रे ए। 10 जेड़ा पवित्तर शास्त्रो रे लिखी राखेया,

“परमेशरो री नजरा रे कोई तर्मी निए, एक पनि।

11 कोई समजदार निए,

कोई बी परमेशरो खे टोलने वाला निए।

12 सब परमेशरो ते दूर ऊईगे रे, सब के सब नक्कमे बणी गे रे,

कोई पला करने वाला निए, एक पनि।

13 तिना रा गला खुली री कबर ए,

तिने ई आपणी जीबा ते छुल कितेया,

तिना रे ओटा रे सापो जेड़ा विष निकलोआ।

14 और तिना रा मूँ श्राप और कड़वाहटा ते फरे राए।

15 तिना रे पैर खन करने खे फुर्तिले ए।

16 तिना री बाटा रे नाश और क्लेश ए।

17 तिने शान्तिया री बाट नि जाणी।

18 तिना रे परमेशरो रा डर अया ई नि।”

19 आसे जाणूँए कि बिधान जो कुछ बोलोआ, तिना खेई बोलोआ, जो बिधानो रे अधीन ए, ताकि लोका खे बाह्ना बनाणे ते रोकणे खे हर एक मूँ बंद करेया जाओ और सारी दुनिया रे लोक परमेशरो रे सामणे दोषी ठईरो। 20 कऊँकि बिधानो रे कामो ते कोई बी लोक परमेशरो रे सामणे तर्मी नि ऊणे, कऊँकि मूसे रा बिधान आसा खे दखाओआ कि आसे सब पापी ए।

#### XXXXXXXXXX XX XXXX XXXXXXXXXXXXX

21 पर एबे मूसा रे बिधानो खे बिना माने परमेशरो री धार्मिकता प्रगट ऊई री। ये गल्ला मूसे रा बिधान और भविष्यवक्तेया री कताबा रे बऊत पईले तेई लिखी राखिया कि परमेशर आसा खे कियोँ धार्मिक बणाओआ। 22 मतलब-परमेशरो री से धार्मिकता, जो प्रभु यीशु मसीह पाँदे विश्वास करने ते, सब विश्वास करने वालेया खे ए। यहूदी और दूजिया जातिया बीचे कुछ भेद निए। 23 कऊँकि सबी पाप करी राखेया और परमेशरो री महिमा ते दूर ऊईगे रे। 24 पर परमेशरो री कृपा ते तेस छुटकारे रे जरिए, जो यीशु मसीह रे ए, मुफ्तो रे तर्मी ठराए जाओए। 25-26 परमेशरो यीशु मसीह खे आसा री खातर बलिदान ऊणे खे पेजेया। यीशु मसीहे आपणी जिन्दगिया रा बलिदान इजी खे दितेया ताकि आसे तेस पाँदे विश्वास करी की परमेशरो रे नेडे जाई सकिए। बऊत पईले परमेशरो ये दखाणे खे कितेया कि से सईन शीलता दखाणे रे और पापिया खे माफ करने रे सई था। इजी ते ये बी पता चलोआ कि परमेशर सई ए, जेबे से तिना लोका खे अपनाओआ जो यीशुए पाँदे विश्वास करोए।

27 तो क्या एड़ा कुछ ए जेते कि आसे कमण्ड करी सकिए? तिजी खे तो कोई जगा ई निए, कुण जे नियमा री बजअ ते? क्या इजी खे कि आसे बिधानो खे मानूँए? ना, बल्कि यीशु मसीह पाँदे विश्वास करने री बजअ ते। 28 इजी री खातर आसे एते नतीजे पाँदे पऊँछी रे कि माणू बिधानो रे कामो ते बिना, विश्वासो रे जरिए तर्मी बणोआ। 29 क्या परमेशर सिर्फ यहूदिया रा ईए? क्या दूजी जातिया रा निए? आ, दूजिया जातिया रा बीए। 30 कऊँकि परमेशर एक ईए, जेस खतने वाले विश्वासो ते और बिना खतने वाले बी विश्वासो ते तर्मी ठराणे। 31 तो क्या आसे बिधानो खे विश्वासो रे जरिए बेकार ठराऊँए? कदी पनि, बल्कि बिधानो खे स्थिर कहुँए।

## 4

#### XXXXXXXXXX XX XXXX

1 एबे आसे आपण पुर्वज अब्राहमो रे बारे क्या बोलिये? क्या तिना खे शरीरो री नजरा ते कुछ मिलेया या कृपा ते मिलेया? 2 जे अब्राहम अच्छे कामो ते तर्मी ठराया जादा, तो से आपू पाँदे

कमण्ड करी सकी था। पर से आपणे अच्छे कामा खे परमेशरो रे नेडे कमण्ड नि करी सकदा।<sup>3</sup> पवित्र शास्त्र क्या बोलोआ? “अब्राहमे परमेशरो पाँदे विश्वास कित्तेया और ये तेसखे धार्मिकता गिणी गयी।”

<sup>4</sup> काम करने वालेया री मजदूरी देणा दान नि ए, पर अक्क समजेया जाओआ।<sup>5</sup> से माणू जो परमेशरो खे खुश करने खे बिधानो खे नि मानदा, बल्कि परमेशरो रे जो भक्तिहिनो खे तर्मी बणाओआ तिदे विश्वास करोआ, तो तेसरा ये विश्वास तेसखे धार्मिकता गिणेया जाओआ।<sup>6</sup> जेसखे परमेशर बिना कामो ते मतलब बिना बिधान माने तर्मी ठराओआ, तेसखे दाऊद बी धन्य बोलोआ।

<sup>7</sup> “धन्य ए सेयो जिना रे बुरे काम माफ ऊए,

और जिना रे पाप पुलाईते।

<sup>8</sup> धन्य ए से माणू जेसरे पापो रा लेखा प्रभु ए कदी नि लणा।”

<sup>9</sup> क्या ये धन्य वचन सिर्फ खतना वाले यहूदिया खे ईए या बिना खतना वाले दुजिया जातिया खे बीए? आसा रा मानणा ए, “अब्राहमो खे तेसरा विश्वास धार्मिकता गिणेया गया।”<sup>10</sup> तो तेसरी धार्मिकता कियों गिणी गई? खतने री दशा रे या बिना खतने री दशा रे? खतने री दशा रे नि, बल्कि बिना खतने री दशा रे।<sup>11</sup> बिना खतने ते रंदे बखते तिना खे विश्वासो रे जरिए जो धार्मिकता मिली, तिजी पाँदे मुहरा साई खतने रा चिह्न लगाया। ईयाँ अब्राहम तिना सबी रा बी पिता बणेया, जो बिना खतने री दशा रे विश्वास करोए, जेते कि तिना रा बी विश्वास तिना खे धार्मिकता मानेया जाओ।<sup>12</sup> अब्राहम तिना खतने वालेया रे बी पिता बणे, जो ना सिर्फ खतने पाँदे निर्भर रओए, पर आसा रे पिता अब्राहमो रे तेस विश्वासो पाँदे चलोए, जो तिने बिना खतने री दशा रे कित्तेया था।

XXXXXXXXXX XX XXXX XXXXXXXXXXXX XX XXXXXX

<sup>13</sup> परमेशरे अब्राहम और तेसरे वंशो ते वादा कित्तेया था कि की सेयो दुनिया रे बारस ऊणे। ये इजी खे नि ऊआ कि अब्राहमे बिधान मानेया, बल्कि इजी खे ऊआ कि तिने परमेशरो पाँदे विश्वास कित्तेया और परमेशरे सेयो तर्मी माने।<sup>14</sup> जे अब्राहम और तेसरे वंशो खे बिधानो खे मानणे ते वादा मिलेया तो विश्वास बेकार और निष्फल साबित ऊआ।<sup>15</sup> बिधानो खे नि मानणा रोष पैदा करोई और जेती बिधान नि ए, तेती तिजी रा ऊल्लंघन पनि ए।

<sup>16</sup> ये वादा परमेशरो रे विश्वासो पाँदे निर्भर ए, ताकि परमेशरो रा वादा तिना री कृपा रे जरिए पक्का ऊई जाओ। ये वादा सिर्फ अब्राहमो रे वंशो खे नि ए जिना गे बिधान ए। बल्कि तिना खे बीए, जो अब्राहमो जेडे विश्वासो वाले बी ए, सेई तो आसा सबी रा पिता ए।<sup>17</sup> जेड़ा पवित्र शास्त्रो रे लिखी राखेया, “मैं तूँ बऊत सारी जातिया रा पिता ठराई राखेया।” आसा रे पुवज अब्राहमे तेस ई परमेशरो पाँदे विश्वास कित्तेया और जो मरे रेया खे जिऊँदा करोआ और जो गल्ला आईया ई नि, तिना रा नाओं एड़ा लओआ, कि मानो सेयो आईया।

<sup>18</sup> तिने निराशा रे बी उम्मीद राखी की विश्वास कित्तेया, इजी री खातर कि तेस वचनो रे मुताबिक ओ कि, “तेरा वंश एड़ा ऊणा” कि से बऊत सारी जातिया रा पिता ऊणा।<sup>19</sup> और से जो एक सौ साला रा था आपणे मरे रे जे शरीर और सारा रे गर्भो री मरी री जी दशा जाणी की बी विश्वासो रे मजबूत बणेया रा रया।<sup>20</sup> ना ई अविश्वासी ऊई कि परमेशरो रे वादे पाँदे शक कित्तेया, पर विश्वासो रे मजबूत रई कि परमेशरो री महिमा किती।<sup>21</sup> और निश्चा कित्तेया कि जेसा गल्ला रा परमेशरे वादा करी राखेया, से तेसा खे पूरी करने रे बी सामर्थी ए।<sup>22</sup> तेसरे विश्वासो री बजअ ते ये तेसखे धार्मिकता गिणेया गया।<sup>23</sup> और ये वचन कि विश्वास तेसखे धार्मिकता गिणेया गया, ना बस तेसखे लिखेया गया<sup>24</sup> बल्कि आसा खे बी, जिना खे विश्वास धार्मिकता गिणेया जाणा, मतलब आसा खे जो परमेशरो पाँदे विश्वास करोए, जिने आसा रे प्रभु यीशुए खे मरे रेया बीचा ते जिऊँदा कित्तेया। तो आसे बी तेस विश्वासो री बजअ ते तर्मी माने जाणे।<sup>25</sup> यीशु मसीह आसा रे बुरे कामो री खातर मौता री सजा खे पकड़वाया गया और आसा खे तर्मी ठराणे खे जिऊँदा बी कित्तेया।

1 जेबे आसे विश्वासो रे जरिए तर्मी ठईरे, तो आपणे प्रभु यीशु मसीह रे जरिए जो तिने आसा खे करी राखेया परमेशरो साथे मेल राखिए। 2 मसीह रे जरिए विश्वासो री बजअ ते आसा री पऊँछ, तेसा कृपा तक ऊई री, जिदे आसे एबे बणे रे। आसे एसा गल्ला पाँदे कमण्ड करूँए कि आसा खे परमेशरो री महिमा रे इस्सेदार बणने री उम्मीद ए। 3 बस येई नि, बल्कि आसा खे क्लेशो पाँदे बी कमण्ड करना चाईयो, ये जाणी की कि क्लेशो ते सबर 4 और सबरो ते खरा निकलना और खरे निकलने ते उम्मीद जागोई 5 और उम्मीदा ते शर्म नि ऊँदी, कऊँकि पवित्र आत्मा, जो परमेशरो आसा खे देई राखेया तिजी रे जरिए परमेशरो रा प्यार आसा रे मनो रे पाई राखेया। 6 कऊँकि जेबे आसे कमजोर ई थे, तेबे मसीह ठीक बखतो पाँदे भक्तिहीना री खातर मरेया।

7 केसी तर्मी जणे खे कोई मरो, ये तो मुश्किल ए। फेर बी ऊई सकोआ कि केसी खरे मांणूए री खातर कोई मरने खे त्यार ऊई जाओ। 8 पर जेबे आसे पापी ई थे, तेबुई मसीह आसा री खातर मरेया। इजी ते परमेशरो आसा रिया तई आपणे प्यारो रा सबूत दित्तेया। 9 जे आसे मसीह रे खूनो रे जरिए तर्मी ठराई राखे, तो आसे पक्का ई मसीह रे जरिए परमेशरो रे रोषो ते बची जाणे। 10 जेबे आसे परमेशरो रे बैरी ई थे तो तेसरे पुत्रो री मौत ऊणे रे जरिए आसा रा मेल परमेशरो साथे ऊआ, तेबे मेल ऊई जाणे पाँदे, तेसरे जीवनों री बजअ ते आसा उद्धार कऊँ नि पाणा? 11 और बस येई नि, पर एबे तो आसा रे प्रभु यीशु मसीह रे जरिए परमेशरो ते मेल ऊईगा रा इजी खे आसे परमेशरो रे खुश ए।

~~~~~

12 तेबेई जेड़ा एक मांणू आदमो रे जरिए पाप दुनिया रे आया और पापो रे जरिए मृत्यु आयी और ईयां ई मृत्यु सबी मांणूआ रे फैली गी, कऊँकि सबी पाप करी राखेया। 13 मूसे रा बिधान आऊणे ते पईले ई दुनिया रे पाप था। पर जेती बिधान निए, तेती पाप नि गिणेया जांदा। 14 तेबे बी आदमो ते लयी कि मूसे तक मौते तिना लोका पाँदे बी राज कित्तेया, जिने आदमो जेड़ा आज्ञा तोड़ने रे जरिए पाप नि कित्तेया। आदम तेस मांणूए रा चिह्न था जो आऊणे वाला था।

15 पर आदमो रे पाप और परमेशरो री दया ते परी री कृपा रे बऊत बड़ा फर्क ए। कऊँकि जेबे एक मांणूए रे पापो री बजअ ते बऊत सारे मांणू मरे। तियां ई परमेशरो री कृपा और धार्मिकता रा तोफा जो तिने आसा खे यीशु मसीह रे जरिए दित्तेया बऊत सारे लोका रा पाप माफ करने खे बऊत बड़ा दान ए। 16 परमेशरो रा दित्तेया रा तोफा आदमो रे पापो जेड़ा निए। कऊँकि एक ई अपराध मौता री सजा लयी की आया। पर बऊत सारे अपराधा ते बाद परमेशरो जो बरदान दित्तेया तिजी रे जरिए पापो खे माफ करी की आपणी नजरा रे तर्मी बणाईते। 17 कऊँकि जेबे एक मांणूए रे पापो री बजअ ते मौते तेस एक ई री बजअ ते सारे लोका पाँदे राज कित्तेया, तो जेबे सेयो लोक कृपा और धर्मरूपी बरदान बऊत जणेया ते पाओ ए, सेयो एक मांणूए ते, मतलब प्रभु यीशु मसीह रे जरिए तिना पक्का अनन्त जीवनों रा राज करना।

18 तेबे जेड़ा एक पाप सबी मांणूआ खे मौता री सजा री बजअ ऊआ, तेड़ा ई एक तर्मी रा काम बी सबी मांणूआ रे जीवनों खे तर्मी ठराणे री बजअ ऊआ। 19 कऊँकि जेड़ा एक मांणूए री आज्ञा ना मानणे ते बऊत लोक पापी ठईरे तियां ई एक मांणूए री आज्ञा मानणे ते बऊत लोक तर्मी ठईरने। 20 बादो ते मूसे रा बिधान दित्तेया ताकि लोक एड़ा समजी सको कि से कितणा पापी ए। पर जेती पाप बऊत ऊआ, तेती कृपा तिजी ते बी केथी जादा ऊई। 21 ताकि जेड़ा पापो मौत फैलादे ऊए सारे लोका पाँदे राज कित्तेया, तेड़ा ई आसा रे प्रभु यीशु मसीह रे जरिए परमेशरो री कृपा तिना खे धार्मिक बणाओई और अनन्त जीवन देओई।

6

~~~~~

1 परमेशर आपणी कृपा ते आसा रे पापो खे माफ करोआ। तो आसे क्या बोल्तूँ? क्या आसे पाप करदे रईए, ताकि कृपा बऊत ओ? 2 कदी पनि, आसे जेबे पापो खे मरी गे तो आगो खे तिदे कियाँ

जीवन बिताईये? <sup>3</sup> आसे जाणूँए कि आसे जितणेया बी परभु यीशु मसीह रा बपतिस्मा लया, तो तेसरी मौता रा बपतिस्मा लया। <sup>4</sup> इजी खे जेबे आसे बपतिस्मा लया तो आसे यीशु मसीह साथे मारे गये और गाड़े गये। ताकि जियाँ मसीह पिता परमेशरो री महिमा रे जरिए मरे रेया बीचा ते जिऊँदा कित्तेया, तियाँ ई आसे बी नये जीवनो री जी चाल चलिए।

<sup>5</sup> कऊँकि जे आसे तेसरी मौता री समानता रे तेस साथे जुडी गे रे, तो पक्का ई तेसरे जिऊँदे ऊणे री समानता रे बी तेस साथे जुडी जाणे। <sup>6</sup> आसे जाणूँए कि आसा रा पुराणा जीवन यीशु मसीह साथे कूसो पाँदे चढ़ाईता रा ताकि पापो रा शरीर बेकार ऊई जाओ और आसे आगे खे पापो रे दास नि रऊँ। <sup>7</sup> जेबे आसे यीशु मसीह साथे मरी गे तो पापो रे वशो ते छूटी गे।

<sup>8</sup> तेबे जे आसे मसीह साथे मरी गे, तो आसा रा विश्वास ये कि तेस साथे जिऊँदे बी ऊई जाणे। <sup>9</sup> आसे ये जाणूँए कि मसीह मरे रेया बीचा ते जिऊँदा ऊई की फेर मरना नि। तेस पाँदे फेर मौत नि आऊणी। <sup>10</sup> जेबे मसीह मरी गा, तो पापो खे एक ई बार मरी गा, पर एबे जो जिऊँदा ए, तो परमेशरो री खातर जिऊँदा ए।

<sup>11</sup> ईयाँ ई तुसे बी आपणे आपू खे पापो खे मरे रा, पर परमेशरो री खातर यीशु मसीह रे जिऊँदा समजो। <sup>12</sup> इजी खे पापी इच्छा तुसा रे नाश ऊणे वाले शरीरो रे राज्य नि करो ताकि तुसे तेसरी इच्छा रे अधीन रओ। <sup>13</sup> और ना आपणे शरीरो रे अंगा खे अधर्मो रा अधियार ऊणे खे पापो खे सम्बालो, पर आपणे आपू खे मरे रेया बीचा ते जी उठे रा जाणी की आपणी जिन्दगी परमेशरो गो सम्बालो और आपणे शरीरो रे अंगा खे तर्मो रा अधियार ऊणे खे आपणी पूरी जिन्दगी परमेशरो गो सम्बाली देओ। <sup>14</sup> तेबे तुसा लोका पाँदे पापो रा कोई अक्क नि रणा। कऊँकि तुसे एबे बिधानो रे साअरे नि जिऊँदे बल्कि परमेशरो री कृपा रे सअरे जिओ ए।

### XXXXXXXXXX XX XXX

<sup>15</sup> तो क्या ऊआ? क्या आसे इजी री खातर पाप करिए कि आसे बिधानो रे अधीन निए, बल्कि कृपा रे अधीन ए? कदी पनि। <sup>16</sup> तुसे जाणोए कि जेबे केसी री आज्ञा मानणे खे तुसे आपणे आपू खे देई देओए और तेसरी आज्ञा खे मानोए तेबे तुसे तेसरे गुलाम बणी जाओए। ये गुलामी चाए पापो री ओ जेतेरा नतीजा मौत ए, चाए परमेशरो री ओ जेतेरी आज्ञा मानणे रा नतीजा धार्मिकता ए। <sup>17</sup> पर परमेशरो रा धन्यवाद ओ कि तुसे जो पापो रे दास थे, एबे मनो ते तेस उपदेशो खे मानणे वाले ऊईगे, जेतेरे सखाए रे तुसे चले। <sup>18</sup> परमेशरो रे जरिए पापो ते छुड़ाई की तर्मो रे दास ऊईगे।

<sup>19</sup> आऊँ तुसा री शरीरो री कमजोरिया री बजअ ते माणूआ री रीतिया पाँदे बोलूँआ। जियाँ तुसे आपणे शरीरो रे अंग अशुद्ध और कुकर्मो रे दास करी की सम्बालेया था। तियाँ ई एबे आपणे शरीरो रे अंग पवित्रता खे तर्मो रे दास करी की सम्बाली देओ। <sup>20</sup> जेबे तुसे पापो रे दास थे, तेबे तर्मो री तरफा ते आजाद थे। <sup>21</sup> तुसे बुरे काम कित्ते और एबे तुसे तिना गल्ला ते शर्मिदा ओए। तिना सारे बुरे कामा ते तुसा खे क्या फायदा ऊआ? कऊँकि तिना रा अंत तो मौत ए। <sup>22</sup> पर एबे पापो ते आजाद ऊई की परमेशरो रे दास बणी की तुसा खे से फल मिलेया, जेते कि पवित्रता मिलोई और तिजी रा अंत अनन्त जीवन ए। <sup>23</sup> कऊँकि पापो री मजदूरी तो मौत ए, पर परमेशरो रा बरदान आसा रे परभु यीशु मसीह रे अनन्त जीवन ए।

## 7

### XXXXXXXXXX XXXXXXXXXXXX XX XXXXX

<sup>1</sup> ओ साथी विश्वासियो! आऊँ बिधानो खे जाणने वालेया खे बोलूँआ, क्या तुसे नि जाणदे कि जदुओ तक माणू जिऊँदा रओआ, तदुओ तक ई तिना खे बिधान मानणा पड़ोआ? <sup>2</sup> ब्यायी री जवाणस बिधानो रे मुताबिक आपणे लाड़े रे जिऊँदे जिऊए, तेस साथे बंदी री रओई। पर जे लाड़ा मरी जाओ, तो से लाड़े रा बिधानो ते जो तेसा खे तेसते बानी की राखोई छूटी जाओई। <sup>3</sup> जे से आपणे लाड़े रे जिऊँदे जिऊए केसी ओरी मर्दो साथे रिश्ता बणाई लओ, तो तेसा खे व्याभिचारिणी



बोलोए। पर जे लाड़ा मरी जाओ, तो से तेसा बिधानो ते छूटी गी, एथो तक कि से केसी ओरी मर्दों साथे व्या करी लओगी, तो तेबे व्याभिचारिणी नि ऊणी।

4 तो ओ साथी विश्वासियो! जेबे तुसे मसीह साथे मरी गे तो तुसे बिधानो खे मरी गे। पर एबे तुसे मसीह रे मतलब जो मरे रेया बीचा ते जिऊँदा ऊईगा बणी गे रे, ताकि आसे परमेशरो खे फल ल्याऊँ। 5 जेबे आसे पापी शरीरो रे वशो रे थे, तो पापो री इच्छा, जो बिधानो ते थी, मौता रा फल पैदा करने खे, आसा रे अंगा रे काम करो थी। 6 पर आसे बिधानो खे मरी गे जेसरे बंदनो रे आसे पईले बंदी रे थे, एबे आसे बिधानो ते छूटी गे। ईयां आसे पुराणी लिखी रा बिधानो रे मुताबिक नि, बल्कि पवित्र आत्मा रे मुताबिक नईया रीतिया ते परमेशरो री सेवा करूँए।

~~~~~

7 तो आसे क्या बोलूँ? क्या बिधान पाप ए? कदी पनि, बल्कि बिना बिधानो ते आऊँ पापो खे नि पछ्याणदा। जे बिधान नि बोलदा, “लालच नि कर,” तो आऊँ ये नि जाणदा कि लालच क्या ए। 8 पर पापे मौका पाई की आज्ञा रे जरिए मांदे सब किस्मा रा लालच पैदा कितेया। कऊँकि बिना बिधानो ते पाप मुडदा ए। 9 एक बखत था जेबे आऊँ बिधानो खे नि जाणूँ था और आऊँ जिऊँदा था। पर जेबे मैं आज्ञा खे जाणेया तेबे मेरे पितरे पाप करने री इच्छा जागी और आऊँ परमेशरो ते दूर ऊईगा। 10 सेई आज्ञा, जो जिन्दगी देणे खे थी, माखे मौता री बजअ ऊई। 11 कऊँकि पापे मौका पाई की आज्ञा रे जरिए आऊँ बईकाया, और तिजी साथे आऊँ कायी बी दितेया। 12 ईयां आसे देखूँए कि बिधान पवित्र ए और तिजी री आज्ञा पवित्र ए, ठीक ए और खरी ए।

13 तो क्या बिधान जो अच्छा था, माखे मौत ऊई? कदी पनि। बल्कि पाप तेसा खरी चीजे की माखे मौत पैदा करने वाला ऊआ ताकि तेसरा पाप सामणे आओ, और आज्ञा रे जरिए पाप बऊत जादा पापमय ठईरो।

~~~~~

14 आसे जाणूँए कि बिधान तो आत्मिक ए। पर आऊँ सिर्फ एक माणूँ ए और शरीर और पापो री गुलामिया रे पूरिया तरअ ते बिकी रा। 15 और जो आऊँ करूँआ, से नि जाणदा, कऊँकि जो आऊँ चाऊँआ, से नि करदा, पर जेतेते माखे नफरत ओई, सेई करूँआ। 16 जे, जो आऊँ चाअदा नि, सेई करूँआ, तो आऊँ मानी लऊँआ कि बिधान खरा ए। 17 तो एड़ी दशा रे तेसा खे करने वाला आऊँ निए, बल्कि पाप ए, जो मांदे बसी रा। 18 कऊँकि आऊँ जाणूँआ कि मांदे मतलब मेरे पापी शरीरो रे कोई खरी चीज वास नि करदी। पले काम करने री इच्छा तो मांदे आयी, पर खरे काम मांते नि ऊँदे। 19 कऊँकि जेस खरे कामो री इच्छा आऊँ करूँआ, पर करी नि सकदा, पर जेसा बुराईया री इच्छा नि करदा, सेई करूँआ। 20 पर जे आऊँ सेई करूँआ, जेतेरी इच्छा नि करदा, तो से करने वाला आऊँ नि रया, पर पाप, जो मांदे बसी रा।

21 ईयां मेरा अनुभव ये कि जेबे आऊँ खरा करने री इच्छा करूँआ, तो मांते बुरा काम ई ऊई जाओआ। 22 आऊँ दिलो ते तो परमेशरो रा बिधानो ते बऊत खुश रऊँआ, 23 पर माखे आपणे शरीरो रे अंगा रे दजा ई बिधान दिखोई, जो मेरी अक्ला रा बिधानो ते लडोई और माखे पापो रा बिधानो रे बंदनो रे पाई देओई, जो मेरे शरीरो रे अंगा रे ए। 24 आऊँ केडा बदनसीब माणूँ ए। आऊँ एस शरीरो ते जो मौत लयी की आओई केस छुड़ाणा? 25 आऊँ परमेशरो रा धन्यवाद करूँआ जिने माखे प्रभु यीशु मसीह रे जरिए उद्धार दितेया। ईयां तो आऊँ आपणी अक्ला ते परमेशरो रे बिधानो राए, पर शरीरो ते पापो रे बिधानो रा इस्तेमाल करूँआ।

## 8

~~~~~

1 तो एबे जो यीशु मसीह रे ए, तिना पदि दण्डो री आज्ञा निए। कऊँकि सेयो शरीरो रे मुताबिक नि, पर आत्मा रे मुताबिक चलोए। 2 पवित्र आत्मा तुसा खे जिन्दगी देणी जो यीशु मसीह ते आओई। तेसा तुसे पाप और मौता ते आजाद करी देणे। 3 कऊँकि जो काम मूसे रा बिधान आसा रे पापी शरीरो रे सबाओ री बजअ ते कमजोर ऊई की नि करी सकी। से काम परमेशरे कितेया। मतलब आपणे ई

पुत्रो खे आसा जेड़ा पापी शरीरो री समानता रे और आसा रे पापो री खातर बलिदान ऊणे खे पेजी की परमेशेरे मसीह रे शरीरो रे पापो पाँदे दण्डो री आज्ञा दिती। ⁴ कऊँकि बिधानो री बिधिया री इच्छा आसा रे पापी शरीरो रे सबाओ रे मुताबिक नि, बल्कि पवित्र आत्मा रे मुताबिक चतूँए, पूरी करी जाओ।

⁵ कऊँकि शारीरिक मांणू शरीरो री गल्ला रे मन लगाओए, पर आध्यात्मिक पवित्र आत्मा री गल्ला पाँदे मन लगाओए। ⁶ शरीरो रे मन लगाणा तो मौत ए, पर आत्मा रे मन लगाणा जिन्दगी और शान्ति ए। ⁷ कऊँकि शरीरो रे पापी सबाओ पाँदे मन लगाणा तो परमेशरो साथे बैर राखणा ए। कऊँकि ना तो पापी सबाओ परमेशरो रा बिधानो रे अधीन ए और ना ई ऊई सकोआ। ⁸ और जो लोक पापमय शारीरिक दशा रे, सेयो परमेशरो खे खुश नि करी सकदे।

⁹ पर जबकि पवित्र आत्मा तुसा रे बसोआ, तो तुसे पापी शरीरो रे सबाओ री दशा रे निए, बल्कि आत्मिक दशा रे। जे कसी रे पवित्र आत्मा निए, तो से तेसरा जन निया। ¹⁰ और जे मसीह तुसा रे ए, तो शरीर पापो री बजअ ते मरे राए, पर आत्मा तमो री बजअ ते जिऊँदी ए। ¹¹ और जे परमेशरो रा आत्मा, जिने प्रभु यीशु मरे रेया बीचा ते जिऊँदा कित्तेया, तुसा रे बसी रा, तो जिने मसीह मरे रेया बीचा ते जिऊँदा कित्तेया, से तुसा रे मरे रे शरीरो खे बी आपणे आत्मे की, जो तुसा रे बसी री, जिऊँदा करोगा।

¹² तो ओ साथी विश्वासियो, आसे शरीरो रे कर्जदार निए कि शरीरो रे मुताबिक दिन काटिए। ¹³ कऊँकि जे तुसे शरीरो रे मुताबिक दिन काटोगे, तो मरने, जे पवित्र आत्मा ते शरीरो रे पापी सबाओ रे कामो खे मारोगे, तो जिऊँदे रणे। ¹⁴ कऊँकि जितणे लोक परमेशरो री आत्मा रे मुताबिक चलोए, सेयो ई परमेशरो रे पुत्र ए। ¹⁵ कऊँकि तुसा लोका खे गुलामिया री आत्मा नि मिली जेते कि फेर डरने लगे। बल्कि परमेशरो रा आत्मा मिली रा जेवे तिने तुसे आपणे गोदी पुत्रो रे रूपो रे अपनाए। एवे आसे तिना खे “ओ अब्बा, ओ पिता” करी की बुलाऊँए। ¹⁶ पवित्र आत्मा आपू ई आसा री आत्मा साथे गवाई देओआ कि आसे परमेशरो री ल्वादा ए। ¹⁷ और जे आसे ल्वादा ए, तो बारस बीए, बल्कि परमेशरो रे बारस और मसीह साथले बारस ए। सिर्फ एक शर्त ए कि आसे मसीह साथे दुःख उठाऊँए कि आसे तेस साथे महिमा बी पाऊँ।

???? ???? ???? ?? ???? ?? ???? ???? ?

¹⁸ आऊँ समजूँआ कि एस बखतो रे दुःख और क्लेश, तेसा महिमा रे सामणे, जो आसा पाँदे प्रगट ऊणे वाली ए, कुछ पनिए। ¹⁹ कऊँकि सृष्टि बड़ी उम्मीदा साथे परमेशरो री ल्वादा रे प्रगट ऊणे री बाट न्यालने लगी री। ²⁰ कऊँकि परमेशरे जो कुछ बी बणाया तिने सबी चीजे आपणी अहमियत खोई ती, इने सबी चीजे आपणी अहमियत आपणी इच्छा ते नि खोई बल्कि परमेशरे आपू एड़ा कित्तेया। पर एक उम्मीद ए ²¹ कि सृष्टि आपू ई नाशो रे बंदनो ते छुटकारा पाई कि, परमेशरो री ल्वादा री महिमा री आज्ञादिया खे प्राप्त ओ।

²² कऊँकि आसे जाणूँए कि सारी सृष्टि एबुए तक जद्दुओ ते आदमे पाप करी राखेया मिली की करलाओई और पीड़ा रे पड़ी की तड़फोई। ²³ और बस सृष्टि ई नि पर आसे बी पितरे ई पितरे करलाऊँए। आसा खे तो पवित्र आत्मा मिली चुकी रा जो परमेशरो री दया रे दानो रा पईला फल ए। आसे बी बड़ी उम्मीदा साथे गोदीपुत्र ऊणे री, मतलब-आपणे शरीरो रे छुटकारे री बाट न्यालदे रऊँए। ²⁴ आसा खे उम्मीदा रे जरिए ई उद्धार मिली रा। पर जेते चीजा री उम्मीद ओई, जेवे से देखणे खे मिलो, तो फेर तिजी री उम्मीद नि करी जांदी। कऊँकि जेसा चीजा खे कोई देखणे लगी रा, तो तिजी री उम्मीद कऊँ करनी? ²⁵ पर जेसा चीजा खे आसे देखदे नि, जे तिजी री उम्मीद राखूँए, तो सबरो साथे तेसा खे नयालु बी ए।

²⁶ ईयां ई पवित्र आत्मा बी आसा री मताद करोआ जेवे परमेशरो पाँदे आसा रा विश्वास कमजोर ओआ। कऊँकि आसे नि जाणदे कि प्रार्थना किर्या करनी चाईयो। पर पवित्र आत्मा आपू ई एडिया आहें परी-परी की, जो बखाण नि करी सकदे, आसा खे बिनती करोआ। ²⁷ परमेशर जो आसा रे मनो

खे परखणे वाला ए, ये जाणोआ कि पवित्तर आत्मा रा मकसद क्या ए। कऊँकि से पवित्तर लोका खे परमेशरो री इच्छा रे मुताबिक बिनती करोआ।

28 आसे जाणूँए कि जो लोक परमेशरो खे प्यार करोए, तिना खे सब गल्ला मिली की पलाई पैदा करोईया, मतलब तिना खेई, जो तेसरी इच्छा रे मुताबिक बुलाई राखे। 29 कऊँकि जो परमेशरे पईले तेई चुणी लये रे, सेयो पईले तेई ठराई बी राखे कि तेसरे पुत्रो जेडे ओ, ताकि से सारे बच्चेया बीचे जेठा ओ। 30 फेर जो परमेशरे पईले ते चुणी राखे, सेयो बुलाए बी और जो बुलाए, सेयो तर्मी बी ठराई राखे और जो तर्मी ठराए, तिना खे महिमा बी देई राखी।

?????? ?? ?????

31 इना सबी गल्ला खे त्यानो रे राखदे ऊए आसे एते नतीजे पाँदे पऊँछुए कि जे परमेशर आसा री तरफा खे आया, तो आसा रा बिरोदी कुण ऊई सकोआ? 32 परमेशरे जिने आपणा एकलौता पुत्रर पनि राखी छाडेया, पर आसा पाँदे कृपा करी की से आसा सबी खे देईता। तो इतणा देणे ते बाद, तेस आसा खे आपणे पुत्रो साथे सब कुछ कऊँ नि देणा? 33 परमेशरो रे चुणे रेया पाँदे दोष केस लगाणा? परमेशर ईए जो, तिना खे तर्मी ठराणे वाला ए। 34 आसा पाँदे कुण दोष लगाई सकोआ? कोई बी नि। कऊँकि से यीशु मसीह ईए जिने आपणा पूराण आसा रिया तँई देईता और तिजी ते बाद मुड़देया बीचा ते जिऊँदा बी ऊईगा और परमेशरो रे दाँणे कनारे ए और आसा री खातर बिनती बी करोआ। 35 कुण आसा खे मसीह रे प्यारो ते लग करी सकोआ? क्या क्लेश, संकट, उपद्रव, अकाल, नांगापण, खतरा या तलवार? 36 जेड़ा कि पवित्तर शास्त्रो रे लिखी राखेया, “ताखे आसे पुरे दिन घात करे जाऊँए,

आसे फाटणे वाली पेडा जेडे गिणी राखे।”

37 पर इना सबी गल्ला रे आसे तेसरे जरिए, जिने आसा खे प्यार कित्तेया, आसा गे उम्मीदा ते बी बढी की जीत ए। 38-39 कऊँकि माखे पक्का पता ए कि आसा खे परमेशरो रे प्यारो ते, जो आसा रे प्रभु यीशु मसीह रे ए, कोई बी लग नि करी सकदा। ना मृत्यु, ना जीवन, ना स्वर्गदूत, ना दुष्टात्मा, ना वर्तमान, ना भविष्य, ना सामर्थ, ना ऊच्चा, ना डूगा और ना ई कोई सृष्टि।

9

?????? ?? ????? ?? ????? ?? ???

1 आऊँ मसीह रे सच बोलूँआ, चूट नि बोलदा और मेरा विवेक बी पवित्तर आत्मा रे गवाई देओआ 2 कि माखे बऊत दुःख ए और मेरा मन मेरे लोका री खातर दुःखदा रओआ। 3 कऊँकि आऊँ एथो तक चाऊँ था कि आपणे यहूदी पाईया खे, जो शरीरो ते मेरे टब्बरो रे ए, आपू ई मसीह ते श्रापित और लग ऊई जांदा। 4 सेयो बी मां ई जेडे इस्राएली लोक ए। सेयो लोक बी परमेशरो रे चुणे रे गोदी पुत्र ए। परमेशरे आपणी महिमा तिना लोका पाँदे प्रकट किती। तिने तिना लोका साथे वाचा बादी और आपणा बिधान दित्तेया। परमेशरो तिना लोका खे आपणी भक्ति करने खे और आपणा नोखा वादा पाणे खे खास अकक दित्तेया। 5 मशुर पूर्वज बी तिना रेईए और मसीह बी शरीरो रे भावो ते तिना ई बीचा ते ऊआ। से परमेशर ए जो सबी पाँदे राज करोआ तेसरी तारीफ जुगो-जुगो ऊँदी रओ। आमीन।

6 फेर बी ये नि समजणा चाईयो कि परमेशर आपणा बादा निबाणे रे असफल ऊईगा रा। कऊँकि इस्राएलो रे वंशो रे जन्म लणे वाले सब लोक सच्चे इस्राएली निए। 7 अब्राहमो रे वंशो रे जन्म लणे तेई सब परमेशरो री सच्ची ल्वाद नि बणी जांदे। कऊँकि परमेशरे अब्राहमो खे बोलेया, “जिना इसहाको रे वंशो ते जन्म लणा सेयो ई तरे वंशो रे माने जाणे।” 8 इजी रा मतलब ये ए कि शरीरो ते जम्मे रे परमेशरो री ल्वाद निए, पर वादे रे जरिए जम्मे रेई अब्राहमो रे असली वंश गिणे जाओए। 9 कऊँकि वादे रा वचन ये ए, “आगले साल एस बखते मां फेर आऊणा और सारा रे एक पुत्र ऊणा।”

10 और बस येई नि, पर जेबे खिबका रे गर्भो रे एकी मर्द मतलब आसा रे पुर्वज इसहाको ते जुडुवा बच्चे थे। 11 और एबुए तक ना बालक जमी रे थे और ना तिने कुछ पला या बुरा कित्तेया रा था

कऊँकि परमेशरो री इच्छा, जो तेसरे चुणे रे मुताबिक ए, कर्मो री बजअ ते नि, पर बुलाणे वालेया री बजअ ते बणी रओ। 12 तिने बोलेया, “जेठा छोटो रा दास ऊणा।” 13 जेड़ा पवित्रो शास्त्रो रे लिखी राखेया, “मैं याकूबो खे प्यार कित्तेया, पर एसाव अपिरय जाणेया।”

14 तो आसे क्या बोलूँ? क्या परमेशरो रे कअरे अन्याय ए? कदी पनि। 15 कऊँकि परमेशरे मूसे खे बोलोआ,

“आऊँ जेस केसी पाँदे बी दया करना चाऊँ, तेस पाँदे दया करूँआ,

और जेस केसी पाँदे कृपा करना चाऊँ, तेस पाँदे ई कृपा करूँआ।”

16 इजी खे ये माणूआ री इच्छा या तेसरी मईणती पाँदे निर्भर नि करदे, बल्कि दया करने वाले परमेशरो पाँदे निर्भर रओए और जेसखे से चुणना चाओआ तेस पाँदे दया करोआ। 17 कऊँकि पवित्र शास्त्रो रे मिस्रो रे राजा फिरौनो खे बोलेया था, “मैं तूँ इजी खे राजा बणाया ताकि आऊँ ताँदे आपणी सामर्थ दखाऊँ और मेरे नाओं रा प्रचार सारी तरतिया रे ओ।” 18 तो परमेशर जेस पाँदे चाओआ, तेस पाँदे दया करोआ और जेसखे चाओआ, तेसखे हठी बणाई देओआ।

XXXXXXXXXX

19 तेबे कुछ लोका माखे बोलणा, “जे एड़ा ए तो परमेशरो कियाँ आसा खे दोषी ठराई सकोआ? कऊँकि कोई बी तिना खे रोकी नि सकदा जो से करना चाओआ।” 20 ओ पाई! पला तूँ कुण ए, जो परमेशरो ते बईस करी करोआ? क्या कअड़ी री चीज, कअइणे वालेया खे बोली सकोई कि तैं आऊँ एड़ी कऊँ बणाई राखी? 21 क्या कम्मरो खे माट्टिया पाँदे अक्क नि ए कि एक ई चाको पाँदो ते, एक पांडा खास कामो रे इस्तेमालो खे और दूजा हर रोज इस्तेमाल करने खे बणाओ?

22 हालीँकि परमेशरो खे आपणा रोष और आपणी सामर्थ प्रगट करने रा अक्क ए, फेर बी से तिना लोका साथे बऊत ई सबर राखोआ, जिना पाँदे तिना रा रोष आओआ और जो विनाशो खे त्यार कित्ते थे। 23 तिने एड़ा इजी खे कित्तेया कि दया रे तिना पांडेया पाँदे आपणी महिमा री शान प्रकट करना चाओ था जो तिने पईले तेई तेसा महिमा खे त्यार कित्ते। 24 मतलब आसा पाँदे जिने तिने ना बस यहूदिया बीचा ते, बल्कि दूजी जातिया बीचा ते बी बुलाया। 25 जेड़ा परमेशर होशे भविष्यवक्ता री कताबा रे बी दुजिया जातिया रे बारे रे बोलोआ,

“जो मेरी प्रजा नि थी, तिना खे मां आपणी प्रजा बोलणा

और जो प्यारी नि थी, तिना खे प्यारा बोलूँगा।”

26 और,

“एड़ा ऊणा कि जेते जगा रे तिना खे एड़ा बोलेया था कि

‘तुसे मेरी प्रजा नि ए,’

तेते जगा रे सेयो ‘जिऊँदे परमेशरो री ल्वाद ऊणे।’”

27 और यशायाह भविष्यवक्ता इस्राएली लोका रे बारे रे आक्का पाई की बोलोआ,

“चाए इस्राएलिया रे ल्वादा री गिणती समुद्रो रे बालूए रे बराबर ओ,

तेबे बी तिना बीचा ते थोड़े ई बचणे।

28 कऊँकि प्रभुए आपणा वचन तरतिया रे पूरा करी की

धार्मिकता ते चट ई तरतिया रे लोका रा न्याय करना।”

29 जेड़ा यशायाह भविष्यवक्ते पईले बी बोलेया था,

“जे सेनाओं रा प्रभु,

आसा खे कोई वंश नि छाडदा,

तो आसे सदोमो जेड़े ऊई जाणे थे

और गमोरा जेड़े ठईरने थे।”

XXXXXXXXXX

30 तो आसे क्या बोलूँ? ये कि दूजी जाति, जो तर्मो खे नि टोलो थे, तिना खे धार्मिकता मिली, मतलब तेसा धार्मिकता खे जो विश्वासो ते ए। 31 पर इस्राएली लोक जो तर्मो रे विधानो खे टोलदे ऊए, तर्मी बणने रे सफल नि ऊए। 32 किजी खे? इजी री खातर कि सेयो विश्वासो ते नि, पर मानो

अच्छे कामा ते तेसखे टोलोए, तिने तेस ठोकरा रे पात्थरो पाँदे ठोकर खाई।³³ जेड़ा पवित्र शास्त्रो रे लिखी राखेया,

“देखो, आऊँ सिय्योन नगरो रे एक ठोकर लगणे रा पात्थर

और ठोकर खाणे री जान राखूँआ

और जेस तेस पाँदे विश्वास करना, से शर्मिंदा नि ऊणा।”

10

1 ओ साथी विश्वासियो, मेरे मनो री इच्छा और इस्राएली लोका खे मेरी परमेशरो ते प्रार्थना ये ए कि तिना खे उद्धार मिलो।² कऊँकि आऊँ तिना री गवाई देऊँआ कि तिना खे परमेशरो री खातर धुन रओई, तिना लोका खे तिना री सेवा करने री ठीक समज निए।³ कऊँकि सेयो परमेशरो री धार्मिकता ते अणजाण ऊई की और आपणी धार्मिकता बनाणे री कोशिश करदे रओए। सेयो परमेशरो रे जरिए तय किती री धार्मिकता रे अधीन नि ऊए।⁴ कऊँकि मसीह ई धार्मिकता रे विधानो रा अंत ए और हर एक विश्वास करने वाले खे धार्मिकता देओए।

REMEMBER THE LORD

5 कऊँकि मूसे ये लिखी राखेया कि जो माणू तेसा धार्मिकता पाँदे, “जो विधानो रे ए चलोआ से इजी वजअ ते जिऊँदा रणा।”⁶ पर जो धार्मिकता विश्वासो ते ए, से ईयां बोलोई, “तूँ आपणे मनो रे ये नि बोलणा कि स्वर्गो पाँदे कुण चढ़ना?” मसीह खे त्वारी कि ल्याऊणे खे,⁷ या डूगे रे कुण उतरना? मतलब मसीह खे मरे रेया बीचा ते जिऊँदा करी की ऊबो खे निणे खे।⁸ पर से क्या बोलोई? “परमेशरो रा वचन तुसा गे ए, से तुसा रे मुओ रे और तुसा रे मनो रे ए।” ये विश्वासो रा से वचन ए, जो आसे प्रचार करूँए।⁹ जे तूँ आपणे मुओ ते यीशुए खे प्रभु जाणी की अंगीकार करेगा और आपणे मनो रे विश्वास करेगा कि परमेशरो से मरे रेया बीचा ते जिऊँदा कित्तेया, तो तेरा पक्का उद्धार ऊणा।¹⁰ कऊँकि विश्वास दिलो ते करेया जाओआ जेतेरा नतीजा धार्मिकता ए और अंगीकार मुओ ते करेया जाओआ जेतेरा नतीजा उद्धार ए।¹¹ जिंयाँ यशायाहे पवित्र शास्त्रो रे लिखी राखेया, “जो कोई तेस पाँदे विश्वास करेगा, से शर्मिंदा नि ऊणा।”¹² यहूदिया रे और यूनानिया रे कोई फर्क निए, कऊँकि परमेशर सबी रा प्रभु ए और आपणे सब नाओं लणे वालेया खे उद्धार ए।¹³ जिंयाँ पवित्र शास्त्रो रे लिखी राखेया, “जेस केसी प्रभुए रा नाओं लणा, तेसरा उद्धार ऊणा।”

14 पर जेस पाँदे तिने विश्वास नि कित्तेया, सेयो तेसरा नाओं कियाँ लओ? और जेसरे बारे रे सुणेया नि, तेस पाँदे विश्वास कियाँ करना और प्रचारका ते बिना कियाँ सुणना? ¹⁵ और जे पेजे नि जाओ, तो कियाँ प्रचार करो? जेड़ा पवित्र शास्त्रो रे लिखी राखेया, “तिना रे पैर केडे खरे ए, जो अच्छी गल्ला रा सुसमाचार सुणाओए।”

16 पर सबी इस्राएलिए तेस सुसमाचारो पाँदे विश्वास नि कित्तेया। जेड़ा यशायाह भविष्यवक्ता बोलोआ, “ओ प्रभु, किने आसा रे सुसमाचारो पाँदे विश्वास करी राखेया?” ¹⁷ तो विश्वास सुणने ते और सुणना मसीह रे वचनो ते ओआ। ¹⁸ पर आऊँ पुच्छूँआ, क्या तिने मसीह रे बारे नि सुणेया? सुणेया तो जरूर ए, कऊँकि पवित्र शास्त्रो रे लिखी राखेया,

“तिना री आवाज सारी तरतिया पाँदे,

और तिना रे वचन दुनिया रे कनारे तक पऊँछी गे रे।”

19 आऊँ फेर पुच्छूँआ कि क्या इस्राएलो रे लोक नि जाणो थे? पईले तो प्रभुए मूसा रे जरिए ये बोलोआ,

“मां तिना रे जरिए, जो यहूदी जाति निए, तुसा रे मनो रे जलन पैदा करनी,

मां एक मूर्ख दूजिया जातिया रे जरिए, तुसा खे रिस दलाणी।”

20 तेवे यशायाह बड़ी ई इम्मता साथे बोलोआ,

“जो माखे नि टोलो थे, तिना खे आऊँ मिली गा

और जो माखे पूछो तक नि थे, तिना रे सामणे आऊँ आया।”

11 पर इस्राएलो रे लोका रे बारे रे परमेशर यशायाह रे जरिए ये बोलोआ,
 “आऊँ सारे दिन आपणे आथ एक आज्ञा ना मानणे वाली
 और बईस करने वाली प्रजा री तरफा खे फैलाए रे रया।”

11

XX

1 एबे आऊँ पुछूँआ, “क्या परमेशर आपणी प्रजा छाडी ती? कदी पनि। आऊँ बी तो इस्राएली ए, अब्राहमो रे वंश और बिन्यामीनो रे गोत्रो तेआ।”² परमेशर आपणी से प्रजा नि छाडी, जेसखे से पईले तेई जाणो था, क्या तुसे नि जाणदे कि पवित् शास्त्र एलिथ्याह भविष्यवक्ता रे बारे रे क्या बोलोआ कि से इस्राएलो रे लोका रे बिरोदो रे परमेशरो ते बिनती करोआ? ³ तिने बोलेया, “ओ प्रभु, तिने तेरे भविष्यवक्ता काईते और तेरिया बेदिया नाश करी तिया। आऊँ ई कल्ला बची गा और सेयो मेरे प्राण बी लयी लणा चाओए।”⁴ पर परमेशर एलिथ्याह खे उत्तर दित्तेया, “मैं आपू खे सात हजार मर्द राखी राखे, जिने चूटे बाअल देवता रे आगे कुटणे टेकी की आराधना नि किती।”⁵ तो ईयाँ ई एस बखते बी, परमेशरो री कृपा ते चुणे रे कुछ यहूदी लोक बाकि ए। ⁶ जे ये परमेशरो री कृपा ते ऊई रा, तो तेवे विधानो रे कामा ते निए। जे ये विधानो रे कामा रे जरिए ऊँदा तो कृपा फेर कृपा नि रंदी।

⁷ फेर नतीजा क्या ऊआ? ये कि इस्राएली परमेशरो री जेसा कृपा खे टोलने लगी रे थे, से तिना खे नि मिली, बल्कि चुणे रेया खे मिली और बाकि लोक हठी बणाईते। ⁸ जेजा पवित् शास्त्रो रे लिखी राखेया,

“परमेशर तिना लोका खे आजके दिनो तक सुस्त दमाक देई राखेया

और एड़िया आखी दित्तिया, जो देखी ना सको और एंडे कान, जो सुणी नि सको।”

⁹ और राजा दाऊद बोलोआ,

“तिना री रोटी तिना खे जाल, और फन्दा बणे;

से तिना खे सजा और रूडने री बजअ ऊई जाओ।

¹⁰ तिना री आखी रे तलोजा आई जाओ जेते कि देखी नि सको

और तूँ सदा तिना री पीठी खे मुसीबता रे बोजो निटे चुकाई की राख।”

¹¹ तो आऊँ फेर पुछूँआ कि क्या इस्राएली लोके इजी खे टोकर खाई कि सेयो सदा खे नाश ऊई जाओ? कदी पनि। पर तिना रे अविश्वासो री बजअ ते दूजी जातिया खे उद्धार मिलेया, कि इस्राएली लोका खे जलन ओ। ¹² तो जे तिना रा अविश्वास दुनिया रे लोका खे बडी आशीष और तिना री कमी दूजी जातिया खे सम्पतिया री बजअ ऊई, तो कितणी जादा आशीष उणी जेवे सब इस्राएली लोक परमेशरो पदि विश्वास करी लओगे।

XX

13 आऊँ तुसा दूजी जातिया खे इना सवी गल्ला खे बोलूँआ, जबकि आऊँ दूजी जातिया खे प्रेरित ए। माखे आपणी एसा सेवा पदि बड़ा गर्व ए। ¹⁴ ताकि क्रियाँ बी आऊँ आपणे यहूदी लोका ते जलन कराई की तिना बीचा ते कई जणेया खे बचाऊँ। ¹⁵ कऊँकि जेवे तिना रा त्याग करना दुनिया रे लोका खे परमेशरो साथे मिलापो री बजअ ऊई, तो क्या तिना रा मसीह खे ग्रहण करना मरे रेया बीचा ते जिऊँदे ऊणे रे बराबर नि ऊणा? ¹⁶ जेवे गूँदे रे आटे रा पईला पेड़ा पवित् ठईरेया, तो पूरा गूँदिया रा आटा बी पवित् ए, और जेवे जड़ पवित् ठईरी, तो डालिया बी पवित् आईया।

¹⁷ इस्राएलो रे लोक जैतूनो रे डालो री डालिया जेडे ए और पिता अब्राहम, इसहाक और याकूब तेस जैतूनो रे डालो री जड़ा जेडे ए। तुसे दूजिया जातिया रे लोक जैतूनो रे डालो पदि कलम चढ़ाई री डालिया जेडे ए और तूँ जंगली डालिया जेड़ा तेसा बाडी री डालिया री जगा पदि जैतूनो री जड़ा री चिकणाईया रा इस्सेदार ऊआ। ¹⁸ पर तैं तेसा बाडी री डालिया ते आपणे आपू खे बढी की नि समजणा और जे तूँ आपणे आपू खे तिना ते बढी कि समजेया तो जाणी लो कि तूँ जड़ा खे नि,

पर जड़ ताखे सम्बालोई। 19 तेबे तां बोलणा, “डालिया तेबे बाडिया ताकि मां पाँदे तिजरी अच्छी कलम चढ़ाई जाओ।” 20 ये सच ए, सेयो तो अविश्वासो री बजअ ते बाडी की लग करी तिया, पर तूँ विश्वासो री बजअ ते आपणी जगा पाँदे बणे रा रओआ। इजी री खातर कमण्ड नि कर, बल्कि डर। 21 कऊँकि जेबे परमेशरे कुदरती डालिया नि छाडिया, तो तूँ पनि छाडणा।

22 इजी री खातर परमेशरो री दया और सख्ती देख, जो रूडी गे, तिना पाँदे सख्ती और तां पाँदे दया, तूँ तिदे बणैया रा रओ, नयी तो तूँ बी बाडी देणा। 23 जे इस्राएलो रे लोक बी विश्वास करना शुरू करी देओ तो सेयो बी फेर तेस डालो रे कलम चढ़ाई की जोड़े जाणे कऊँकि परमेशर सामर्थी ए कि फेर तिना खे जोड़ी सकोआ। 24 कऊँकि जे तूँ तेसा जैतूना ते, जो सबाओ तेई जंगली ए बाडी दित्तेया और सबाओ रे खलाफ अच्छी जैतूना रे डालो साथे जोड़ी ता, तो यो जो कुदरती डालिया ए, आपणी ई जैतूना रे कलम चढ़ाई की चट ई कऊँ नि बढ़ना!

REMEMBER RE RE

25 ओ साथी विश्वासियो! केथी एड़ा नि ओ कि तुसे आपणे आपू खे अक्लमंद समजी लो, इजी री खातर आऊँ चाऊँआ कि तुसे एस भेदो खे जाणी लो कि जदुओ तक दूजी जातिया पूरी तरअ ते नि आयी जाओ, तदुओ तक इस्राएलो रा एक इस्सा एड़ा ई सख्त रणा। 26 और ईयाँ ई सारे इस्राएलो रे लोका खे उद्धार मिलणा, जेड़ा कि पवित्तर शास्त्रो रे लिखी राखेया, “छुड़ाणे वाला सिव्योन नगरो ते आऊणा

और अभक्ति याकूबो रे वंशो ते दूर करनी।

27 और तिना साथे मेरी ये वाचा ऊणी,
जबकि मां तिना रे पाप माफ करी देणे।”

28 सेयो सुसमाचारो री नजरा ते तो आपू ई दुजिया जातिया री खातर परमेशरो रे बैरी ए। पर चुणने रे नजरा ते बाप-दादेया री बजअ ते परमेशरो रे प्यारे ए। 29 कऊँकि परमेशर आपणे बरदानो ते और बुलाहटा ते कदी पीछे नि अटदा। 30 कऊँकि जिंयाँ तुसे पईले ई परमेशरो री आज्ञा नि मानी, पर एबे इस्राएली लोका री आज्ञा ना मानणे ते तुसा पाँदे दया ऊई। 31 तियाँ ई तिने बी एबे आज्ञा नि मानी ताकि तुसा पाँदे जो दया ओई, इजी ते तिना पाँदे बी दया ओ। 32 कऊँकि परमेशरे सबी लोका खे आज्ञा ना मानणे री बजअ ते बन्दी बणाई की राखेया, ताकि से सबी लोका पाँदे दया करो।

REMEMBER RE RE

33 वाह, परमेशरो री कृपा रा धन, बुद्धि और ज्ञान कितणे गम्भीर ए!

तेसरे विचार कितणे गईरे ए,

और तेसरी बाट कितणी साफ ए।

34 “परभुए रा मन किने जाणेया?

या तेसरा सलाहकार कुण ऊआ?

35 या किने तेसखे पईले कुछ देई राखेया,

जेतेरा बदला तेसखे दित्तेया जाओ?”

36 कऊँकि परमेशरो री तरफा ते और तेसरे जरिए और तेसखे ई सब कुछ ए,

तेसरी महिमा जुगो-जुगो तक ऊँदी रओ। आमीन्।

12

REMEMBER RE RE

1 इजी री खातर ओ साथी विश्वासियो! आऊँ तुसा खे परमेशरो री दया याद कराई की विनती करूँआ कि आपणे आपू खे जिऊँदा और पवित्तर और परमेशरो खे अच्छा लगदा ऊआ बलिदान करी की चढ़ाओ। परमेशरो री सेवा करने रा येई सच्चा तरीका ए। 2 और एसा दुनिया रे लोका जेड़े नि बणो, बल्कि तुसा रे मनो रा नवाँ ऊई जाणे ते, तुसा रा चाल-चलण बी बदलदा रओ। ताकि तुसे परमेशरो री खरी, भावती और सिद्ध इच्छा अनुभवो ते पता करदे रओ।

3 कऊँकि आऊँ तेसा कृपा री बजअ ते, जो माखे मिली री, तुसा बीचा ते हर एकी खे बोलूँआ कि जेड़ा समजणा चाईयो, तिजी ते बढी की कोई बी आपू खे नि समजो, पर जेड़ा परमेशे हर एकी खे विश्वासो रे नतीजे रे मुताबिक बांडी ता रा, तेड़ा ई अच्छी सोचा साथे आपू खे समजो। 4 कऊँकि जेड़े म्हारे एक ई शरीरो रे बऊत अंग ए और सबी अंगा रा एक जेड़ा काम नि ए, 5 तेड़ा ई आसे जो बऊत ए, मसीह रे एक शरीर ऊई की आपू बीचे एकी दूजे रे अंग ए। 6 जबकि तेसा कृपा रे मुताबिक, जो आसा खे देई राखी, आसा खे लग-लग बरदान मिली रे, तो जेसखे भविष्यवाणी करने रा बरदान मिली रा, से विश्वासो रे नतीजे रे मुताबिक भविष्यवाणी करो। 7 ईयां ई जे सेवा करने रा बरदान मिली रा, तो सेवा करदे रओ, जे कोई सिखाणे वाला ए, तो सिखाणे रे लगे रा रओ। 8 जेसखे औसला देणे रा दान मिली रा, से लोका खे औसला देँदा रओ, दान देणे वाला उदारता ते देँदा रओ, जो अगुवाई करोआ, से लगना साथे अगुवाई करदा रओ, जो दया करो, से खुशिया ते दया करो।

9 प्यार बिना कपटो ते ओ, बुराईया ते नफरत करो, पलाईया रे लगे रे रओ। 10 पाईचारे रे प्यारो ते एकी-दूजे ते प्यार करो, आपू बीचे आदर करने रे एकी-दूजे ते जादा बढो। 11 कडी मईणत करो और आलसी नि बणो। आत्मिक खुशिया ते परे रे रओ, प्रभुए री सेवा करदे रओ। 12 उम्मीदा रे खुश ऊँदे रओ, क्लेशो रे स्थिर रओ, हर बखत प्रार्थना करदे रओ। 13 परमेशरो रे लोका खे जो कुछ जरूरी ओ, तिदे तिना री मताद करो, पराऊणचारिया रे लगे रे रओ।

14 आपणे सताणे वालेया खे आशीष देओ, आशीष देओ, श्राप नि देओ। 15 खुशी करने वालेया साथे खुशी करो और रोणे वालेया साथे रोओ। 16 आपू बीचे एक जेड़ा मन राखो, कमण्डी नि बणो। पर गरीब लोका साथे संगति राखणे खे सदा त्यार रओ। आपणी नजरा रे अक्लमंद नि ओ।

17 बुराईया रे बदले कसी साथे बुराई नि करो, जो गल्ल सबी लोका रे नेड़ खरी ओ, तिना री चिन्ता करेया करो। 18 जेथो तक ऊई सको आपणे सबी माणूआ साथे मेल-जोल राखो। 19 ओ प्यारो! आपणा बदला नि लओ, पर परमेशरो रे रोषो खे मौका देओ, कऊँकि पवित्तर शास्त्रो रे परमेशर बोलोआ, “बदला लणा मेरा काम ए, मां ई प्रतिलफल देणा।” 20 पर ये बी लिखी राखेया, “जे तेरा बैरी पूखा ओ, तो तेसखे रोटी खुला,

जे त्याया ओ, तो तेसखे पाणी पलया।

कऊँकि तुसा रे एड़ा करने ते तेसरा सिर शरमा रे मारे चूकी जाणा।”

21 बुराईया ते नि आरो, बल्कि पलाईया ते बुराईया खे जीती लओ।

13

1 हर एक माणू बड़े अधिकारिया रे अधीन रओ, कऊँकि कोई अक्क एड़ा नि ए, जो परमेशरो री तरफा ते नि ओ और जो अक्क आए, सेयो परमेशरे रे जरिए ई ठराई राखे। 2 इजी ते जो कोई अधिकारिए रा विरोद करोआ, से परमेशरो री आज्ञा रा विरोद करोआ और विरोद करने वालेया दण्ड पाणा।

3 कऊँकि जो कोई खरा काम करोए तिना खे अधिकारिया ते डरने री जरूरत नि ए। पर जो कोई बुरे काम करोआ तिना खे अधिकारिया ते डरना चाईयो। जे तूँ अधिकारिया ते निडर रणा चाओआ तो खरा काम कर और तेसरी तरफा ते तेरी तारीफ ऊणी। 4 कऊँकि से तेरी पलाईया खे परमेशरो रा सेवक ए, पर जे तूँ बुराई करे, तो डर। कऊँकि तिने तलवार बेकारो रे नि लयी राखी बल्कि से परमेशरो रा सेवक ए ताकि तेसरे रोषो रे मुताबिक बुरे काम करने वालेया खे दण्ड देओ। 5 इजी री खातर तिना रे अधीन रणा ना बस तेस रोषो ते, बल्कि डरो ते जरूरी ए, बल्कि विवेक बी येई गवाई देओआ।

6 इजी री खातर सरकारा खे मामला बी देओ, कऊँकि शासन करने वाले परमेशरो रे सेवक ए और सदा एसी कामो रे लगे रे रओए। 7 इजी री खातर हर एकी रा अक्क चुकाया करो, जेसखे मामला चाईयो, तेसखे मामला देओ, जेसखे शुल्क चाईयो, तेसखे शुल्क देओ, जेसते डरना चाईयो, तेसते डरो, जेसरा आदर करना चाईयो, तेसरा आदर करो। जो तारीफा जोगा ए, तेसरी तारीफ करो।

१३-१३:१३-१३:१३

8 आपू बीच प्यारो खे छ्हाडी की केसी बी गल्ला रे केसी रे बी कर्जदार नि ओ। कऊँकि जो दूजे साथे प्यार राखोआ, तिने ई बिधान पूरा करी राखेया। 9 मूसे रा बिधानो रे बऊत सारी आज्ञा ए कि व्याभिचार नि करना, अत्या, चोरी, लालच नि करना और इना खे छ्हाडी की ओर कोई बी आज्ञा ओ तो सबी रा निचोड़ एसा आज्ञा रे मिलोआ कि आपणे पड़ोसिये ते आपू जेड़ा प्यार राख। 10 प्यार पड़ोसियो री कुछ बी बुराई नि करदा। इजी री खातर जो प्यार करोआ से परमेशरो रे बिधानो खे पूरा करोआ।

11 और बखतो खे पछ्याणी की एड़ा ई करो, कऊँकि एबे तुसा खे नीजा ते जागणे री कअड़ी आईगी री, कऊँकि जेस बखते आसे विश्वास कित्तेया था, तेस बखतो रे बिचारो ते एबे आसा रा उद्धार नेडे ए। 12 रात बऊत बीती गी री और दिन निकलने वाला ए, इजी री खातर आसे न्हरे रे कामो खे छ्हाडी कि जोतिया रे अधियार बानी लऊँए। 13 जेड़ा दिनो खे अच्छा लगोआ, तेडी ई आसा सीदी चाल चलणी चाईयो, ना कि लीलाक्रीड़ा, पियक्कड़, ना व्याभिचार, ना लिचड़पण और ना चगड़े रे और जलना रे। 14 बल्कि प्रभु यीशु मसीह खे पईनी लो और शरीरो री बुरी इच्छा खे पूरा करने रा उपाय नि करो।

14

१४:१-१४:१५

1 विश्वासो रे कमजोर लोका खे तिना रे विश्वासो रे वारे रे केसी बी शंका ते बगैर ई अपनाई लो। 2 कऊँकि कुछ लोका खे विश्वास ए कि सब कुछ खाणा चाईयो, पर जो विश्वासो रे कमजोर ए, से साग-पात ई खाओआ। 3 जो लोक मांस खाओए तिना खे शाकाहारी लोक तुच्छ नि समजो और शाकाहारी लोक मांस खाणे वाले लोका पाँदे दोष नि लगाओ। कऊँकि परमेशरे सेयो दोनो ई ग्रहण करी राखे। 4 तूँ कुण ए जो प्रभुए रे सेवको पाँदे दोष लगाएया? तेसरा बणेया रा रणा और रुड़ना, तेसरे मालको तेई रिशता राखोआ, बल्कि से खड़ा ई करेया जाणा, कऊँकि प्रभु तेसखे खड़ा करी सकोआ।

5 तियाँ ई कोई तो एकी दिनो खे, दूजे ते बड़ा मानोआ और केसी खे सब दिन एक जेड़े ए। हर एक आपणे ई मनो रे निश्चा करी लो। 6 जो केसी खास दिनो खे मानोआ, से प्रभुए खे मानोआ। जो खाओआ, से प्रभुए री खातर खाओआ, कऊँकि से परमेशरो रा धन्यवाद करोआ और जो खाँदा नि, से प्रभुए री खातर नि खाँदा और परमेशरो रा धन्यवाद करोआ। 7 कऊँकि आसा बीचा ते कोई ना तो आपणी खातर जिओआ और ना ई कोई आपणी खातर मरोआ। 8 कऊँकि आसे जे जिऊँदे ए, तो प्रभुए री खातर जिऊँदे ए और जे मरूँए, तो प्रभुए री खातर मरूँए। इयाँ आसे जिऊँ, चाए मरूँ, आसे प्रभुए रेईए। 9 कऊँकि मसीह इजी री खातर ई मरेया और जिऊँदा बी ऊआ, से मरे रा और जिऊँदेया रा सबी रा प्रभुए।

10 तूँ आपणे साथी विश्वासिया पाँदे दोष कऊँ लगाएया? या आपणे साथी विश्वासिया खे तुच्छ कऊँ समजेया? आसे सब परमेशरो रे न्याय आसणो सामणे खड़े ऊणे। 11 कऊँकि पवित्र शास्त्रो रे लिखी राखेया,
 “प्रभु बोलोआ कि मेरी जिन्दगिया री कसम कि
 हर एकी मेरे सामणे आपणे कुटणे टेकणे
 और हर एक माणूआ परमेशर मानणा।”

12 तो आसा बीचा ते हर एकी परमेशरो खे आपणे-आपणे कामा रा लेखा देणा।

१४:१६-१४:१६

13 तो आगे ते आसे एकी-दूजे पाँदे दोष नि लगाओ, पर तुसे येई ठाणी लो कि कोई आपणे पाईया सामणे टेस या ठोकर खाणे री बजअ नि ओ। 14 आऊँ जाणूआ कि प्रभु यीशुए ते माखे निश्चा ऊई रा कि कोई बी खाणे री चीज आपू ते अशुद्ध निए। पर जो कोई तिजी खे अशुद्ध समजोआ, से तेसखे अशुद्ध ए। 15 जे तेरा पाई तेरी रोटिया ते नराज ओआ, तो तेवे तूँ प्यारो ते नि चलदा। जेतेरी खातर

मसीह भरेया, तेसखे तूँ आपणी रोटिया री बजअ ते नाश नि कर। 16 जो तुसा री नजरा रे ठीक ए तिजी री दूजे लोक निंदा नि करो। 17 कऊँकि परमेशरो रे राज्य रे खाणे-पीणे री अहमियत नि ए, बल्कि तर्म, मेल और खुशी ए जो पवित्तर आत्मा ते ओआ। 18 जो कोई इजी रीतिया ते मसीह री सेवा करोआ, से परमेशरो खे अच्छा लगेओआ और माणूआ बीचे ग्रहण करने जोगा ओआ।

19 इजी री खातर आसा खे इना गल्ला री कोशिश करनी चाईयो जिना साथे मेल-जोल और एकी-दूजे रे विश्वासो खे मजबूत करने रे मताद मिलो। 20 रोटिया री खातर परमेशरो रा काम नि बिगाड़। सब कुछ तो शुद्ध ए, पर तेस माणूए खे बुरा ए, जेसखे तेसरी रोटी खाणे ते ठोकर लगेई। 21 पला तो ये कि तूँ ना तो मांस खा और ना दाखरस पी और ना ई कुछ एड़ा कर, जेते की तेरा साथी विश्वासी ठोकर खाओ।

22 इना चीजा रे बारे रे जो बी तुसा रा विश्वास ओ, से तुसा रे और परमेशरो बीचली गल्ल ए। धन्य से माणू जो तेसा गल्ला रे, जेसखे से ठीक समजोआ, आपणे आपू खे दोषी नि मानदा 23 पर जो शक करी की खाओआ, से दण्डो जोगा ठईरी चुकेया, कऊँकि से विश्वास करी की नि खांदा। जो कुछ विश्वासो ते नि ए, से पाप ए।

15

११११ ११ ११११११ १११

1 जे म्हारा विश्वास मजबूत ए तो तिना साथी विश्वासिया साथे जिना रा विश्वास कमजोर ए तिना साथे धीरज राखो। आसा खे आपणे आपू खे खुश करने रे बदले तिना खे खुश करने री कोशिश करनी चाईयो। 2 आसा बीचा ते हर एक आपणे साथी विश्वासिया खे तेसरी पलाईया खे तिना खे खुश करो और तिना रे विश्वासो खे मजबूत करने री कोशिश करो कि तिना री तरक्की ओ। 3 कऊँकि मसीहे आपणे आपू खे खुश नि कित्तेया, पर जेड़ा पवित्तर शास्तरो रे लिखी राखेया, “तेरी निन्दा करने वालेया मेरी निन्दा करी राखी।” 4 जितणिया गल्ला पईले तेई पवित्तर शास्तरो रे लिखी राखी थिया, सेयो आसा री ई शिक्षा री खातर ई लिखिया ताकि आसे सब् और पवित्तर शास्तरो री शान्तिया रे जरिए उम्मीद राखूँ। 5 आऊँ प्रार्थना करूँआ कि सब् और इमम्ती रा दाता परमेशर तुसा खे ये बरदान देओ कि यीशु मसीह रे मुताबिक आपू बीचे एक मन ऊई कि रओ। 6 ताकि तुसे एक मन और एक आवाज ऊई की आसा रे प्रभु यीशु मसीह रे पिता परमेशरो री बढ़ाई करो।

१११ ११ ११११११११

7 तेवे, जेड़ा मसीहे बी परमेशरो री महिमा री खातर तुसे अपनाए, तेड़े ई तुसे बी एकी-दूजे खे अपनाओ। 8 आऊँ बोलूँआ कि जो वादे बाप-दादेया खे दित्ते थे, तिना खे मजबूत करने खे, मसीह, परमेशरो री सच्चाईया रा सबूत देणे खे खतना कित्ते रे लोका रा सेवक बणेया। 9 और दूजी जाति बी परमेशरो री दया पाई कि तेसरी बढ़ाई करो। जेड़ा पवित्तर शास्तरो लिखी राखेया, “इजी री खातर जातिया-जातिया बीचे मां तेरा धन्यवाद करना और तेरे नाओं रे पजन गाणे।”

10 फेर बोली राखेया,

“ओ दूजिया जातिया रे सब लोको,
परमेशरो री प्रजा साथे खुशी मनाओ।”

11 एकी ओरी जगा लिखी राखेया,

“ओ दूजिया जातिया रे सब लोको, प्रभुए री स्तुति करो
और ओ राज्य-राज्य रे सब लोको, तेसखे सराओ।”

12 और तेवे यशायाह बोलोआ,

“यिज्ञे रे वंशो ते एक सामणे आऊणा
और दूजी जातिया रा हाकिम ऊणे खे उठणा,
तेस पदि दूजी जातिया उम्मीद राखणी।”

13 आऊँ परमेशरो ते प्रार्थना करूँआ कि जो उम्मीदा रा दाता ए, तुसा खे विश्वास करने रे सब प्रकारा री खुशी और शान्तिया ते परिपूर्ण करो, ताकि पवित्र आत्मा री सामर्थ्य ते तुसा री उम्मीद बड़दी जाओ।

~~~~~

14 ओ मेरे साथी विश्वासियो! माखे आपू बी तुसा रे बारे रे निश्चा ए कि तुसे आपू बी पलाईया ते फरे रे और परमेशरो रे ज्ञानो ते बी फरे रे ए और एकी दूजे खे समज्याई सकोए। 15 तेबे बी मैं केथी-केथी याद दलाणे खे, तुसा खे बऊत इम्मत करी की लिखेया, ये तेस अनुग्रहो री बजअ ते ऊआ, जो परमेशरे माखे देई राखेया। 16 आऊँ दुजिया जातिया खे प्रभु यीशु मसीह रा सेवक ऊई की परमेशरो रे सुसमाचारो री सेवा, पुरोईतो जेड़ी करूँ। जेते कि दूजी जाति परमेशरो रे आगे अपनाणे जोगी भेंट बणी सको और पवित्र आत्मा रे जरिए परमेशरो खे पूरी तरअ ते पवित्र बणो।

17 तो आऊँ यीशु मसीह री बजअ तेई परमेशरो री सेवा रे गर्व करी सकूँआ। 18 आऊँ ये बोलणे खे इम्मत राखूँआ कि मसीहे मेरे जरिए जो नौखा काम करी राखेया जेतेरा नतीजा ये निकलेया कि दूजिया जातिया रे लोके परमेशरो पाँदे विश्वास कित्तेया जेबे तिने मेरा वचन सुणेया और मेरे काम देखे। 19 ये सब चिह्न और अचम्बे रे काम पवित्र आत्मा री सामर्थ्य ते मेरे ई जरिए कित्ते। एथो तक कि मैं यरूशलेमो ते लयी की चऊँ कनारे इल्लुरिकुमो तक, मसीह रे सुसमाचारो रा पूरा-पूरा प्रचार कित्तेया। 20 मेरे मनो री खुशी ये कि जेती-जेती यीशु मसीह रा नाओं नि लया, तेथी सुसमाचार सुणाऊँ, एड़ा नि ओ कि दूजे री निऊँवा पाँदे कअर बणाऊँ। 21 पर जेड़ा पवित्र शास्त्रो रे लिखी राखेया, तेड़ा ई ओ,

“जेसगे तेसरा सुसमाचार नि पऊँछेया, तिना ई देखणा

और जिने सुणेया नि, सेयो ई समजणा।”

22 तेबेई तो आऊँ तुसा गे आऊणे ते बार-बार रूकेया रा रया।

~~~~~

23 पर एबे माखे इना प्रदेशा रे मेरे कामा खे ओर जगा नि रई और बऊत साला ते माखे तुसा गे आऊणे री इच्छा ए। 24 तेबे, जेबे आऊँ स्पेनो खे जाऊँगा, तो तुसा गिये ई जाऊँगा, कऊँकि माखे उम्मीद ए कि तेसा यात्रा रे आऊँ तुसा ते मिलूँ, और जेबे तुसा री संगतिया ते मेरा जिऊ कुछ फरी जाओ, तो तुसे माखे स्पेनो रे सफरो खे मताद करी कि आगे पऊँछाई देओ। 25 पर एबु तो परमेशरो रे लोका री सेवा करने खे यरूशलेमो खे जाऊँआ। 26 कऊँकि मकिदुनिया और अखाया प्रदेशो रे लोका खे ये अच्छा लगेया कि यरूशलेमो रे परमेशरो रे लोका रे गरीबा खे कुछ चंदा कटटा करिए। 27 तिने ये खुशिया साथे तो कित्तेया, सेयो यरूशलेमो रे रणे वाले लोका रे कर्जदार बी ए, कऊँकि जेबे दूजी जातिया रे लोके तिना ते आत्मिक धन पाई राखेया तो तिना खे बी ठीक ए कि शारीरिक गल्ला रे तिना री सेवा करो। 28 तो तेबे आऊँ एस कामो खे पूरा करी की और तिना गे एस चंदे खे सम्बाली कि तुसा गिये ऊँदा ऊआ स्पेनो खे जाऊँगा। 29 और आऊँ जाणूआ कि जेबे आऊँ तुसा गे आऊणा, तो मसीह री पूरी आशीषा साथे आऊणा।

30 और ओ साथी विश्वासियो! आऊँ प्रभु यीशु मसीह रा जो आसा रा प्रभु ए और पवित्र आत्मा रे प्यारो री याद दलाई की तुसा ते विनती करूँआ कि माखे परमेशरो ते प्रार्थना करने खे मां साथे लौलीन रओ। 31 ताकि आऊँ यहूदिया प्रदेशो रे अविश्वासिया ते बचे रा रऊँ और मेरी से सेवा, जो यरूशलेमो खे ए, परमेशरो रे लोका खे अच्छी लगे। 32 और आऊँ परमेशरो री इच्छा ते तुसा गे खुशिया साथे आयी की तुसा साथे आराम करूँ। 33 आऊँ प्रार्थना करूँआ शान्तिया रा परमेशर तुसा सबी साथे रओ। आमीन्।

~~~~~

1 आऊँ पौलुस फिबे खे बिनती करूँआ कि तुसे तेसा रा आदर करो। से आसा री साथी विश्वासि बईण और किखिरया नगरो री मण्डलिया री सेविका ए। 2 तुसे लोक बईण फिबे खे प्रभुए री सेविका जाणी की तेसा रा स्वागत करो। और जेसा केसी गल्ला रे तेसा खे तुसा ते मतलब ओ, तेसा री मताद करो। कऊँकि तेसा रा बऊत जणेया पाँदे, बल्कि मां पाँदे बी तेसा रा उपकार ए।

3 बईण पिरस्कल्ला और तेसा रा लाड़ा अक्विला खे बी, जो यीशु मसीह रे मां साथे काम करने वाले ए, नमस्ते। 4 तिने मेरा प्राण बचाणे खे आपणी जिन्दगी दाव पाँदे लगाईती थी और बस आऊँ ई नि, बल्कि दूजी जातिया री सारी मण्डली बी, तिना रा धन्यवाद करोई। 5 और तेसा मण्डलिया खे बी नमस्कार, जो तिना रे कअरे कटटे ओए। मेरे प्यारे इपैनेतुसो खे, जो मसीह खे अपनाणे वालेया बीचा ते आसिया प्रदेशो रा पईला फल ए, नमस्ते। 6 मरियमा खे, जेसे तुसा री खातर बऊत मईणत किक्ती, नमस्कार।

7 पाई अन्दरुनीकुस और बईण यूनियासो खे, जो मां जेडे ई यहूदी ए और मां साथे जेला रे कैद ऊए थे, तिना खे मां पौलुसो रा नमस्कार। सेयो लोक प्रेरिता बीचे जाणे-माणे रे थे और मांते पईले मसीह खे मानणे वाले ऊए। 8 पाई अम्पलियातुसो खे, जो प्रभुए रे मेरा प्यारा ए, नमस्कार। 9 पाई उरवानुसो खे, जो मसीह रे आसा साथे काम करने वाला ए और मेरे प्यारे इस्तखुसो खे नमस्कार।

10 अपिलेसो खे जो मसीह रे खरा निकलेया, नमस्कार। अरिस्तुबुलुस रे कराने खे नमस्कार। 11 मेरे साथी यहूदी पाई हेरोदियोनो खे नमस्कार। नरकिस्सुसो रे कराने रे जो लोक प्रभुए रे ए, तिना खे नमस्कार। 12 प्रभुए री सेवा रे मईणत करने वालिया जवाणसा तूरूफैना और तूरूफोसा खे, जो प्रभुए रे मईणत करोए, नमस्कार। प्यारी बईण पिरसिसो खे, जिने प्रभुए रे बऊत मईणत किक्ती, नमस्कार। 13 रूफुसो खे, जो प्रभुए रे चुणी राखेया और तेसरी आम्मा खे जो मेरी बी आम्मा जेड़ी ए, दूई खे नमस्कार। 14 असुकिरतुसो और फिलगोन, हिमेंस, पत्रुबास, हिर्मास और तिना रे साथले साथी विश्वासिया खे, नमस्कार। 15 फिलुलुगुस, यूलिया, नेर्युस और तेसरी बईण, उलुम्पास और तिना साथले सब परमेशरो रे लोका खे नमस्कार। 16 आपू बीचे गले लगी की नमस्कार करो। तुसा खे मसीह री सारी मण्डलिया री तरफा ते नमस्कार।

### ??????????

17 एबे ओ साथी विश्वासियो, आऊँ तुसा ते बिनती करूँआ कि तिना लोका ते चौकस रओ जो तेसा शिक्षा रे खलाफ, जो तुसे पाई राखी और से फूट पडने और ठोकर खाणे री बजअ ओए। तिना ते दूर रओ। 18 कऊँकि एडे लोक म्हारे प्रभु मसीह री नि, बल्कि आपणे पेटो री सेवा करोए। सेयो लोक चिकणी-चूपडिया गल्ला करी की सीदे-सादे मनो वाले लोका खे बईकाई देओए। 19 तुसा री आज्ञा मानणे रे बारे रे सबी लोका खे पता लगी गा रा। इजी री बजअ ते आऊँ तुसा रे बारे रे खुश ओऊँआ। पर आऊँ ये चाऊँआ कि तुसे पलाईया खे, अक्लमंद, पर बुराईया खे पोले बणे रे रओ। 20 परमेशरो जो शान्तिया रा दाता ए, तुसा रे पैरो निठे शैतानो खे तुसा ते चट ई मंडाणा। म्हारे प्रभु यीशुए री कृपा तुसा पाँदे सदा ऊँदी रओ।

21 मां साथे काम करने वाला तीमुथियुसो री तरफा ते और मेरे यहूदी साथी लूकियुस, यासोन और सोसिपत्रुस तुसा लोका खे नमस्कार बोलोए। 22 आऊँ तिरतियुस जो पौलुसो री तरफा ते ये चिट्ठी लिखणे लगी रा, प्रभुए रे तुसा लोका खे नमस्कार बोलूँआ। 23 गयुस रा, जो मेरी और मण्डलिया री पराऊणचारी करने वाला ए, तेसरा तुसा खे नमस्कार। इरास्तुस, जो नगरो रा पण्डारी ए और पाई क्वारतुसो रा, तुसा खे नमस्कार। 24 आऊँ प्रार्थना करूँआ कि आसा रे प्रभु यीशु मसीह री कृपा, तुसा सबी लोका पाँदे सदा ऊँदी रओ।

### ??????????

25 तेस परमेशरो री स्तुति ओ, जो तुसा लोका खे मेरे सुसमाचार और प्रभु यीशु मसीह रे संदेशो रे मुताबिक स्थिर राखणे रे सामर्थी ए। ये सुसमाचार से पेट ए जो जुगो-जुगो ते छिपेया रा था। 26 पर एबे सामणे आयी की सनातन परमेशरो री आज्ञा ते, भविष्यबक्तेया रे पवित्र शास्त्रो री कताबा रे

जरिए, सबी जातिया खे बताया कि सेयो विश्वासो ते आज्ञा मानणे वाले ऊई जाओ। <sup>27</sup> तेस कल्ले अक्लमंद परमेशरो री वऊत जादा, प्रभु यीशु मसीह रे जरिए, जुगो-जुगो तक महिमा ऊँदी रओ। आमीन्।

## 1 कुरिन्थियों

### कुरिन्थ नगरो री विश्वासी मण्डलिया खे प्रेरित पौलुसो री पईली चिट्ठी भूमिका

पौलुसे कुरिन्थुस नगरो रे मण्डलिया री स्थापना किन्ती थी। तिदे मसीही जिन्दगी और विश्वासो साथे जुड़ी रिया कई समस्या पैदा ऊईया। तिना समस्या रा समाधानो रिया खातर कुरिन्थियों रे नाओं पौलुस प्रेरितों री पईली चिट्ठी लिखी थी। तेस बखते कुरिन्थुस यूनानो रा एक अन्तर्राष्ट्रीय नगर था। जो रोमी साम्राज्य रे आखाया राज्य री राजधानी थी। से आपणे व्यापारो ते सम्पन्न, वैभवशाली संस्कृति और कई तमों रिया खातर मशुर था। पर से आपणे बुरे चाल-चलणो री खातर बदनाम था।

प्रेरितों रे खास चिन्ता रे विषय थे मण्डलिया बटवारा और बुरा चाल-चलण, यौन और ब्या और विवेको ते जूड़े रे सवाल, मण्डलिया रा प्रबंद, पवित्र आत्मा रे दान और दुबारा जिऊंदा ऊणा। पौलुस आपणी गईरी अंतर्दृष्टिया ते ये बताओआ कि सुसमाचारो रे जरिए इना सवालो रा समाधान कियों ऊई सकोआ।

पाठ 13 रे पौलुस बताओआ कि परमेशरो रे लोका खे मिले रे बरदाना बीचा ते सबी ते उत्तम बरदान प्यार ए। ये एते कताबा रा सबी ते खास पाठ ए।

#### रूप-रेखा

भूमिका 1:1-9

मण्डलिया रे गुटवाजी 1:10-4:21

अच्छा चाल-चलण और परिवारो री जिन्दगी 5:1-7:40

मसीही और मूर्तिया खे पूजणे वाले 8:1-11:1

मण्डलिया री जिन्दगी और आराधना 11:2-14:40


मसीह यीशु और विश्वासिया रा दुबारा जिऊंदा ऊणा 15:1-58

यहूदिया रे मसीहिया खे दान 14:1-4

व्यक्तिगत विषय और निचोड़ 16:5-24



1 ये चिट्ठी मां पौलुस और आसा रे पाई सोस्थिनेसो री तरफा ते ए। आऊ परमेशरो री इच्छा ते यीशु मसीह रा प्रेरित ऊणे खे बुलाई राखेया।<sup>2</sup> आऊ ये चिट्ठी परमेशरो री तेसा मण्डलिया खे लिखूआ जो कुरिन्थुस नगरो रे ए। तुसे लोक यीशु मसीह रे जरिए पवित्र कित्ते रे और तिना सबी परमेशरो रे लोका साथे तुसे बी तिना रे लोक ऊणे खे बुलाए राखे जो हर जगा आसा रे प्रभु यीशु मसीह रे नाओं री मतलब से जो आसा रा और तिना रा सबी रा प्रभु ए, स्तुति करोए।<sup>3</sup> आऊ प्रार्थना कहुआ कि म्हारे पिता परमेशर और प्रभु यीशु मसीह री तरफा ते, तुसा खे कृपा और शान्ति मिलदी रओ।



4 आऊ तुसा रे बारे रे आपणे पिता परमेशरो रा धन्यवाद सदा कहुआ, कहुआ कि परमेशरो तुसा खे कृपा ते यीशु मसीह साथे एक करने रे जरिए बऊत आशीष देई राखी।<sup>5</sup> तुसे लोक यीशु मसीह रे हर तरअ ते भरपूर करी राखे। से ये ए कि तिने तुसा खे आपणे वचन बोलणे और समजणे खे हर तरअ ते खास काबलियत देई राखी।<sup>6</sup> ये तेसा गल्ला खे साबित करोआ कि मै मसीह रे बारे जो बताया था से सच ए।<sup>7</sup> नतीजन एस बखते, जबकि तुसे आसा रे प्रभु यीशु मसीह रे आऊणे री बड़ी बेसबरिया साथे इन्तजार करने लगी रे, तुसा रे पवित्र आत्मा रे जरिए दित्ते रे केसी बी आत्मिक बरदानो री कमी निए।<sup>8</sup> परमेशरो तुसे आखरी तक विश्वासो रे मजबूत बी करने, ताकि तुसे आसा रे प्रभु यीशु

मसीह रे आऊणे तक निर्दोष ठईरो। 9 परमेशर विश्वासो जोगा ए, जिने तुसे आपणे पुत्र, आसा रे प्रभु यीशु मसीह री संगतिया रे बुलाई राखे।

?????????? ?? ???

10 ओ साथी विश्वासियो! आऊँ तुसा ते आसा रे प्रभु यीशु मसीह रे नाओं ते बिनती कऱँआ कि तुसे सब एक ई गल्ल बोलो और तुसा बीचे फूट नि ओ, पर एक ई मन और एक ई इरादा करी की मिले रे रओ। 11 कऱँकि ओ मेरे साथी विश्वासियो! खलोए रे कराने रे लोके, मांगे तुसा रे बारे रे बताई राखेया कि तुसा बीचे चगड़े ऊणे लगी रे। 12 मेरे बोलणे रा मतलब ये ए कि तुसा बीचा ते कोई आपणे आपू खे पौलुसो रा चेला, कोई अपुल्लोसो रा, कोई पतरसो रा और कोई मसीह रा चेला बोलोआ।

13 तुसे लोक जो करने लगी रे से ठीक नि ए, क्या मसीह बंटी गा रा? क्या पौलुस तुसा री खातर कऱूसो पँदि चढ़ाया? या क्या तुसा खे पौलुसो रे नाओं ते बपतिस्मा मिलेया? 14 आऊँ परमेशरो रा धन्यवाद कऱँआ कि किरस्पुस और गयुस इना दो पाईया खे छाडी की मैं तुसा बीचा ते केली खे बी बपतिस्मा नि दित्तेया। 15 केथी एडा नि ओ कि कोई बोलो कि तुसा खे मेरे नाओं ते बपतिस्मा मिलेया। 16 और आ, मैं स्तिफनासो रे कराने खे बी बपतिस्मा दित्तेया, इना खे छाडी की आऊँ नि जाणदा कि मैं ओरी केली खे बपतिस्मा दित्तेया। 17 यीशु मसीह आऊँ बपतिस्मा देणे नि पेजेया। बल्कि तिने आऊँ सुसमाचार प्रचार करने पेजी राखेया और मैं ये काम माणूआ रे शब्दो रे ज्ञानो रे मुताबिक नि कित्तेया एडा नि ओ कि मसीह रा कऱूस बेकार ठईरो।

???? ??????? ?? ????? ?? ?????

18 जो लोक विनाशो री बाटा रिये चलोए तिना लोका खे कऱूसो री शिक्षा मुखता री गल्ल ए। पर आसा लोका खे जो उद्धारो री बाटा रिये चलोए कऱूसो री शिक्षा परमेशरो री सामर्थ ए। 19 कऱँकि पवित्र शास्त्रो रे लिखी राखेया, “मां ज्ञानवानो रा ज्ञान नाश करना और समजदारा री समज तुच्छ करी देणी।”

20 तो फेर समजदार लोका खे आसे क्या बोलिये? यहूदी बिधानो रे जाणने वाले माहिर शास्त्रिए रे बारे रे आसे क्या बोलिये? दुनिया रे तिना लोका रे बारे आसे क्या बोलिये जो बोलणे रे बऊत चलाक ए? परमेशरे दुनिया रा ज्ञान मूखँ और बेकार ठराईता रा। 21 कऱँकि परमेशरे आपणे ज्ञानो रे मुताबिक ये देखेया कि दुनिया रे लोक आपणे ज्ञानो रे जरिए तिना खे कदी बी नि जाणी सकदे, तेबई तिना लोका रा उद्धार करने खे जो विश्वास करोए सुसमाचारो रे प्रचारो रा इस्तेमाल कित्तेया, हालाँकि कुछ लोक इजी खे मूखता री गल्ल समजोए। 22 ये यहूदी लोका खे मूखता री गल्ल ए जो स्वर्गो ते चिहू चाओए, और दूजिया जातिया रे लोका खे बी मूखता री गल्ल ए जो माणूआ रे ज्ञानो री टोला रे ए। 23 पर आसे तो तेस कऱूसो पँदि चढ़ाए रे मसीह रा प्रचार कऱँए, जो यहूदिया खे ठोकरा री बजअ और दूजिया जातिया खे मूखता री गल्ल ए। 24 पर परमेशरो रे चुणे रे लोका खे क्या यहूदी, क्या दूजी जाति ढँई खेई येई मसीह परमेशरो री सामर्थ और परमेशरो रा ज्ञान ए। 25 कऱँकि परमेशरो री मूखता, माणूआ रे ज्ञानो ते ज्ञानवान ए और परमेशरो री कमजोरी, माणूआ री तागतती ते बऊत तागतवर ए।

26 ओ साथी विश्वासियो! आपणे तिना दिना खे याद करो जेवे तुसे परमेशरे बुलाए थे तेवे तुसे न तो दुनिया री नजरा रे ज्ञानी थे, न ई बऊत तागतवर थे और न ई समाजो रे तुसा रा कोई दबदबा था। 27 ज्ञानी माणू शर्मिंदा करने खे परमेशरे सेयो चूणी ले रे, जिना खे दुनिया मूखँ समजोई। तागतवरा खे बी शर्मिंदा करने खे तिने सेयो चूणी ले रे, जो दुनिया री नजरा रे कमजोर ए। 28 गणमानय लोका रे कमण्डो खे चूर करने खे परमेशरे सेयो लोक चूणी ले जो दुनिया री नजरा रे नीच, तुच्छ और कुछ नि समजे जाओए। 29 परमेशरे एडा इजी खे कित्तेया ताकि कोई बी प्राणी तेसरे सामणे कमण्ड नि करी सको। 30 पर परमेशरे आसे यीशुए साथे एक करी ते रे और मसीह रे जरिए तिने आसा खे

आपणा ज्ञान दित्तेया । परमेशर आपणी नजरा रे आसा खे तर्मी बी बणाओआ । तिने मसीह रे जरिए आसे पवित्तर करी राखे और से आसा खे आसा रे पापो ते छुटकारा देओआ । <sup>31</sup> ताकि जेड़ा पवित्तर शास्त्रो रे लिखी राखेया, तेड़ा ई ओ, “जो कमण्ड करो, से सिर्फ प्रभुए पाँदे कमण्ड करो ।”

## 2

**XXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXX**

1 ओ साथी विश्वासियो! जेबे आऊ परमेशरो रा पत सुणांदा ऊआ तुसा गे आया था, तो आऊ बड़े शब्दा रा या माणूआ रे ज्ञानो रा इस्तेमाल नि कित्तेया । <sup>2</sup> कऊँकि मैं ये ठाणी ला था कि तुसा बीचे यीशु मसीह, बल्कि कूरूसो पाँदे चढ़ाए रे मसीह खे छाडी की ओरी केसी गल्ला खे नि जाणूँ । <sup>3</sup> आऊँ कमजोर और डरो साथे और बऊत थरथरांदा ऊआ, तुसा साथे रया <sup>4</sup> और मेरी शिक्षा और मेरे प्रचारो रे ज्ञानो री लुबाणे वालिया गल्ला नि धिया, बल्कि पवित्तर आत्मा और सामर्था रा सबूत था । <sup>5</sup> इजी खे तुसा रा विश्वास माणूआ रे ज्ञानो पाँदे नि, बल्कि परमेशरो री सामर्था पाँदे नि भंर ओ ।

**XXXXXXXXXXXX XXXXXXXXXXXXX**

6 फेर बी आऊ तिना लोका खे ज्ञानो रा संदेश सुणाऊँआ, जो आत्मिक तौरो पाँदे सिद्ध ए । पर ये ज्ञान ना तो एसा दुनिया रा और ना एसा दुनिया रे हाकिमा राए, जिना रा नाश ऊणा तय ए । <sup>7</sup> पर आसे परमेशरो रा से गुप्त ज्ञान, पेतो री रीतिया पाँदे बताऊँए, जो परमेशरे जुगो ते आसा री महिमा खे ठराया । <sup>8</sup> परमेशरो री एसा योजना खे दुनिया रे हाकिमा बीचा ते किने नि समजेया, कऊँकि जे समजदे तो तेजोमय प्रभुए खे कूरूसो पाँदे नि चढ़ादे । <sup>9</sup> पर जेड़ा पवित्तर शास्त्रो रे लिखी राखेया, “जो गल्ला आखी ते नि देखिया और ना कानो ते सुणिया

और जो गल्ला माणूआ रे चित्तो रे नि चढ़िया सेयो ई आईया,

जो परमेशरे आपणे प्यार करने वालेया खे त्पार करी राखिया ।”

10 पर परमेशरे इना गल्ला खे पवित्तर आत्मा रे जरिए आसा प्ररिता पाँदे प्रगट कित्तेया ।

पवित्तर आत्मा सब गल्ला, बल्कि परमेशरो रिया खास गल्ला बी जाणोआ । <sup>11</sup> माणूआ बीचा ते कुण केसी माणूआ री गल्ल जाणोआ? बस माणूआ री आपणी आत्मा जो तेसरे ए । तियाँ ई परमेशरो री गल्ला कोई नि जाणदा, बस परमेशरो री आत्मा ई जाणोई । <sup>12</sup> पर आसा रे दुनिया रा आत्मा निए, पर से आत्मा पायी राखेया, जो परमेशरो री तरफा ते ए कि आसे तिना गल्ला खे जाणूँ, जो परमेशरे आसा खे देई राखिया । <sup>13</sup> जेबे आसे ये गल्ला तुसा खे सिखाऊँए तो माणूआ री तरफा ते आये रे ज्ञानो रा इस्तेमाल नि करदे । बल्कि आसे तिना वचना खे बोलूँए जो आत्मा रे जरिए देई राखे, आत्मिक सच्चाईया री व्याख्या करने खे पवित्तर आत्मा रे वचनो खे इस्तेमाल करोए । <sup>14</sup> पर शारीरिक माणू परमेशरो री आत्मा री सच्चाई ग्रहण नि करदा, कऊँकि सेयो तिना री नजरा रे मुखता री गल्ला ए और ना से तिना खे जाणी सकोआ, कऊँकि तिना री परख आत्मिक रीतिया ते ओई । <sup>15</sup> आत्मिक जणा सब कुछ जाणोआ, पर से आपू केसी ते नि परखेया जांदा । <sup>16</sup> कऊँकि प्रभुए रा मन किने जाणी राखेया कि तेसखे सखेयाओ? पर आसा रे मसीह रा मन ए ।

## 3

**XXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXX**

1 ओ साथी विश्वासियो, जेबे आऊ तुसा साथे था तो तुसा लोका खे गईरी शिक्षा नि देई सकेया जियाँ आऊँ आत्मिक लोका खे देऊँआ । मैं तुसा साथे ईयाँ गल्ला कित्तिया मानो तुसे शारीरिक लोक ए या जेड़े कि मसीह जिन्दगिया रे छोट्टे बच्चे ओ । <sup>2</sup> तेस बखते मैं तुसा लोका खे परमेशरो रे वचनो री शुरूओ री शिक्षा तो दिती पर गईरी शिक्षा नि दिती कऊँकि तुसे तेस बखते एड़ी शिक्षा समजणे जोगे नि थे । सच तो ये ए कि तुसे इजी खे एबे बी नि समजी सकदे । <sup>3</sup> तुसे विश्वासी ऊई की बी तुसा रा बर्ताव एबुए तक अविश्वासिया जेड़ा ए । आऊँ जाणूँआ कि तुसा बीचा ते कई जणे एकी दूजे ते



जलो ए और चगड़ा करोए और अविश्वासिया जेड़ा न्याय करोए? क्या तुसे अविश्वासी माणूआ री रीतिया पाँदे नि चलदे? <sup>4</sup>कऊँकि जेबे एक बोलोआ कि आऊँ पौलुसो राए और दूजा कि आऊँ अपुल्लोसो रा, तो क्या तुसा रा सबाओ संसारिक माणूए जेड़ा निए?

<sup>5</sup>तो फेर अपुल्लोस कुणे ए? और पौलुस कुणे ए? आसे लोक परमेशरो रे बस सेवक ईए, जिना रे जरिए तुसे मसीह रे विश्वास कित्तेया। आसा बीचा ते हर कोई से काम करोआ जो काम करने खे प्रभुए देई राखेया। <sup>6</sup>जे आऊँ तुसा री तुलना डोरूआ ते करूँ तो आऊँ ई से ए जिने तुसा रे दिलो रे वचनो रा बीज बाई राखेया और अपुल्लोसे से सिंजेया। पर परमेशर ईए जिने से बढ़ाया। <sup>7</sup>इजी री खातर ना तो बाणे वाले रा और ना सिंजणे वाले रा कुछ महत्व ए, पर सिर्फ परमेशरो रा महत्व ए जो तिने से बढ़ाई राखेया ए। <sup>8</sup>बाणे वाले और सिंजणे वाले दूई रा एक ई मकसद ए, पर हर एक माणूए आपणी ई मईणता रे मुताबिक परमेशरो ते आपणी मजदूरी पाणी। <sup>9</sup>कऊँकि आसे दोनो मिली की परमेशरो खे काम करूँए। तुसे कुरिन्थो रे विश्वासी परमेशरो री खेती और परमेशरो रे कअर ए।

<sup>10</sup>परमेशरो री तेसा कृपा रे मुताबिक, जो माखे देई राखी, मैं अक्लमंद राजमिस्त्रए जेड़ी निऊँ पाई और दूजा तेते पाँदे रद्दा राखोआ, पर हर एक माणू चौकस रओ कि से तेस पाँदे केड़ा रद्दा राखोआ। <sup>11</sup>कऊँकि तेसा निऊँआ खे छाडी की जो पड़ी री ए और से प्रभु यीशु मसीह ए, कोई दूजी निऊँ नि पाई सकदा <sup>12</sup>जे मसीह सेवक परमेशरो री तरफा ते दिती री सई शिक्षा खे सिखाओए तो सेयो तेस कअरो खे बनाणे वालेया जेड़े ए जिने सुईना, चाँदी और मईगा पात्थरो जेड़ी अच्छी किस्मा री चीजा रा इस्तेमाल करी की निऊँ बनाई। पर जे से चूटी शिक्षा सिखाओए तो से तेस कअरो खे बनाणे वाले जेड़े ए जो काठ, काआ और पुओ जेड़ा कटिया समानो रा इस्तेमाल करी की निऊँ पाओए। <sup>13</sup>पर न्याय रे दिनो रे आगी रे जरिए प्रकट ऊई जाणा कि हर एक कअर बनाणे वालेया केड़ा काम करी राखेया। आगी रे जरिए हर काम परखेया जाणा कि से काम केड़ा ए। <sup>14</sup>जे केसी रे जरिए बनाया रा कअर तिजी पाँदे बणे रा खड़ा रओगा तो तेस तिजी रा इनाम पाणा। <sup>15</sup>पर जे मसीह केसी माणूए खे बोलोआ कि इने अच्छा काम नि करी राखेया तो तेस माणूए मसीह री तरफा ते इनाम नि पाणा। पर तेस माणूए परमेशरो रे जरिए दिती री अनन्त जिन्दगी नि खोणी।

<sup>16</sup>क्या तुसे नि जाणदे कि तुसे परमेशरो रा मन्दर ए और परमेशरो री पवित्तर आत्मा तुसा रे वास करोआ? <sup>17</sup>जे कोई परमेशरो रे मन्दरो खे नाश करोगा, तो परमेशरो से नाश करी देणा। कऊँकि परमेशरो रा मन्दर पवित्तर ए और से मन्दर तुसे ए।

<sup>18</sup>कोई आपणे आपू खे तोखा नि देओ, जे तुसा बीचा ते कोई एसा दुनिया री नजर रे आपणे आपू खे ज्ञानी समजोआ, तो से मूर्ख बणे कि ज्ञानी ऊई जाओ। <sup>19</sup>कऊँकि एसा दुनिया रा ज्ञान परमेशरो रे नेड़े मूर्खता ए, जेड़ा कि पवित्तर शास्त्रो रे लिखी राखेया, “से ज्ञानिया खे तिना री चलाकिया रे फसाई देओआ।” <sup>20</sup>और फेर पवित्तर शास्त्र ये बी बोलोआ, “प्रभु ज्ञानिया रे बचारा खे जाणोआ कि बेकार ए।” <sup>21</sup>इजी री खातर माणूआ पाँदे कोई कमण्ड नि करो कऊँकि सब कुछ तुसा राए। <sup>22</sup>क्या पौलुस, क्या अपुल्लोस, क्या पतरस, क्या दुनिया, क्या जिन्दगी, क्या मरण, क्या वर्तमान, क्या भविष्य, सब कुछ तुसा राए <sup>23</sup>और तुसे मसीह रे ए और मसीह परमेशरो राए।

## 4

### REVEAL REVEAL

<sup>1</sup>तुसे लोक आसा खे मसीह रे सेवक और परमेशरो रे पेतो रा पण्डारी समजो जिना खे सुसमाचरो री लुकी री सच्चाईया खे समजयाणे रा काम समाली राखी। <sup>2</sup>एबे पण्डारियो ते ये उम्मीद किती जाओई कि से विश्वासो जोगा निकलो। <sup>3</sup>पर मेरी नजरा रे ये बऊत छोट्टी गल्ल ए कि तुसे या माणूआ रा कोई न्यायी माखे परखो, बल्कि आऊँ बी आपणे आपू खे नि परखदा। <sup>4</sup>कऊँकि मेरा विवेक माखे केसी बी गल्ला रे दोषी नि ठरांदा, पर इजी ते आऊँ निर्दोष नि ठईरदा कऊँकि मेरा परखणे वाला प्रभु ए। <sup>5</sup>तो जदुओ तक प्रभु नि आओ, बखतो ते पईले केसी बी गल्ला रा न्याय नि

करो, तेसी तो न्हरे रे लकोईया रिया गल्ला प्रयासे रे दखाणियां और मनो रे विचार सामणे ल्याऊणे, तेवे परमेशरो री तरफा ते हर एकी री तारीफ ऊणी ।


6 ओ साथी विश्वासियो, मैं इना गल्ला रे तुसा खे आपणी और अपुल्लोसो री चर्चा उदारणा री रीतिया पाँदे करी राखी, ताकि तुसे आसा रे जरिए ये सीखो कि कोई बी माणू पवित्तर शास्त्रो रे लिखी री गल्ला ते आगे नि बड़ना और एक अगुवे रा पक्ष लयी की दूजे अगुवे रा अनादर करदे ऊए गर्व नि करना । 7 कऊँकि ताँदे और दूजे रे कुण भेद करोआ? और तांगे क्या ए, जो तैं दूजे ते नि पाया और जबकि तैं दूजे ते पाई राखेया, तो एड़ा कमण्ड कऊँ करेया कि मानो पाई नि राखेया?

8 तुसे तो रजी गे, तुसे अमीर ऊई चुके, तुसे आसा ते बिना राज्य कितेया, पर पला ऊँदा कि तुसे राज्य करदे और आसे बी तुसा साथे राज्य करदे । 9 मेरी समजा रे परमेशरे आसा प्रेरिता खे सवी ते बाद तिना लोका जेड़े ठराया, जिना रे मरने री आज्ञा ऊई चुकी ओ, कऊँकि आसे दुनिया और स्वर्गदूत और माणूआ खे तमाशा ठईरी रे । 10 लोक आसा खे मूर्ख समजोए ए कऊँकि आसे मसीह रा प्रचार करूँए । पर तुसे लोक ये समजी बैठे कि आसे अक्लमंद मसीह ए । आसे कमजोर समजे जाऊँए ए, पर तुसे आपणे आपू खे तागतवर समजोए । लोक तुसा रा आदर करोए, पर आसा रा नरादर ओआ । 11 आसे इना दिना तक पूखे-त्याये और नांगे ए और मुक्के खाऊँए और मारे-मारे फिरूँए, 12 और आपणे ई आथो रा काम करी की मईणत करूँए । लोक बुरा बोलोए और आसे तिना खे आशीष देऊँए । सेयो सताओए, आसे सईन करूँए । 13 सेयो लोक आसा खे बदनाम करोए और आसे तिना ते नरमाईया साथे गल्ल करूँए । एथो तक एवे बी लोक आसा रा आदर नि करदे सेयो बोलोए कि आसा री कोई बी कीमत निए ।



14 आऊँ तुसा खे शर्मिदा करने खे इना गल्ला खे नि लिखदा, पर आपणे प्यारे बालक जाणी की तुसा खे चिताऊँआ । 15 कऊँकि मसीह रे तुसा खे सखयाणे वाले दस हज़ार बी ऊँदे, तेवे बी तुसा रे पिते बऊत निए, इजी री खातर कि यीशु मसीह रे सुसमाचारो रे जरिए आऊँ तुसा रा पिता ऊआ । 16 तो आऊँ तुसा ते बिनती करूँआ कि मेरी जी चाल चलो । 17 इजी री खातर मैं तीमुथियुसो खे, जो प्रभुए रे मेरा प्यारा और विश्वासो जोगा पाऊ ए, तुसा गे पेजी राखेया और से तुसा खे मसीह रे मेरा चाल-चलण याद कराओगा, जेड़ा कि आऊँ हर जगा, हर एकी मण्डलिया रे इजी रे बारे रे उपदेश करूँआ । 18 कुछ लोक ये समजी की कमण्ड करी की ईयां फूली गे रे कि मानो आऊँ तुसा गे फेर आऊणा ई नि । 19 पर प्रभु चाओ तो आऊँ तुसा गे चट ई आयी जाणा और तिना कमण्ड किते रिया गल्ला खे नि, पर तिना रे परमेशरो री सामर्था खे बी जाणी लऊँगा कि तिना रे पितरे ये सामर्थ आये की नई । 20 कऊँकि परमेशरो रा राज्य गल्ला रे निए, पर सामर्था रे ए । 21 तुसे क्या चाओए? क्या आऊँ जण्डा लयी की तुसा गे आऊँ या प्यारो रे और नरमाईया री आत्मा साथे?

## 5



1 कुछ लोक माखे बताया कि तुसा रे व्याभिचार ओआ, बल्कि एड़ा व्याभिचार जो अविश्वासिया बीचे पनि ऊँदा कि एक माणू आपणे पिते री लाडिया साथे व्याभिचार करोआ । 2 इजी ते अलावा इना गल्ला री बजअ ते तुसा खे शर्मिदा ऊई की शोग करना चाईयो था पर तुसे कमण्ड करोए । एड़ा काम करने वाले माणूए खे तो तुसा बीचा ते निकाली देणा चाईयो था । 3 शारीरिक तौरों पाँदे तुसा बीचे मौजूद ना ऊणे पाँदे बी आऊँ तुसा बीचे आत्मा रे मौजूद ए । आऊँ तेस बुरा काम करने वाले माणूए रे खलाफ आपणा फैसला यीशु मसीह रे नाओं ते देई चुके रा मानो आऊँ तेती आपू मौजूद ए । 4 जेवे तुसे मण्डलिया रे कट्टे ओए तेस बखते आऊँ तुसा साथे आत्मा रे मौजूद रणा और ईयां ई आसा रे प्रभु यीशुए री सामर्थ बी तुसा बीचे मौजूद रणी । 5 तेवे तुसे तेस माणूए खे बारे निकाली देओ और शैतानो रे हवाले करी देओ ताकि तेसरा पापी सवाओ शरीरो रा नाश ओ पर तेसरी आत्मा प्रभु यीशुए रे दिनो रे उद्धार पाओ ।

6 तुसा रा कमण्ड करना ठीक निए, क्या तुसे नि जाणदे कि थोड़ा जा सजेड़ा पूरे गुँदे रे आटे खे सजेड़ा करी देओआ। 7 पुराणा सजेड़ा निकयाली की आपणे आपू खे शुद्ध करो कि नया गुँदे रा आटा बणी जाओ, ताकि तुसे बिना सजेड़े वाली फसह रे त्योआरो री रोटिया जेड़े ओ, कऊँकि आसा रा बी फसह जो मसीह ए, बलिदान ऊई रा। 8 तो आओ आसे त्योआरो रे खुशी मनाईये, ना तो पुराणे सजेड़े की और ना बुराई और दुष्टता रे सजेड़े की, पर सीदी और सच्ची बिना सजेड़े री रोटिया ते।

9 में आपणी पिछली चिट्ठिया रे तुसा खे लिखी राखेया कि व्याभिचारिया री संगति नि करना। 10 ये नि कि तुसे बिल्कुल ई एसा दुनिया रे व्याभिचारी या लोबी या अन्दर करने वाले या मूर्तिपूजका री संगति नि करो। कऊँकि एते दशा रे तो तुसा खे दुनिया ते निकली ई जाणा पड़दा। 11 मेरे बोलणे रा मतलब ये कि जे कोई मसीह रा विश्वासी बोली की व्याभिचारी, लोबी, मूर्तिपूजक, गाली देणे वाला, पियक्कड़ या अन्दर करने वाला ओ, तो तेसरी संगति नि करो, बल्कि एड़े माणूआ साथे रोटी पनि खाओ। 12 माखे मण्डलिया ते बारलेया अविश्वास लोका रा न्याय करने ते क्या काम? पर पक्के तीरो पाँदे मण्डलिया रे पितरे पाप करने वाले लोका रा न्याय करने री जिम्मेवारी तुसा री ए। 13 पर मण्डलिया ते बारलेया अविश्वासिया रा न्याय परमेशर करोआ। इजी री खातर तेस कुकर्मियों खे आपू बीचा ते बारे निकयाली देओ।

## 6

### ?????? ? ? ?????????????

1 क्या तुसा बीचा ते कसी खे बी इतणी इम्मत ए कि जेबे दूजे साथे चगड़ा ओ, तो तेबे न्याय करने खे पापिया गे जाओ और परमेशरो रे लोका गे नि जाओ? 2 क्या तुसे नि जाणदे कि परमेशरो रे लोका दुनिया रा न्याय करना? तो जेबे तुसा दुनिया रा न्याय करना ए, तो क्या तुसे छोटे ते छोटे चगड़े रा न्याय करने जोगे पनिए? 3 क्या तुसे नि जाणदे कि आसा स्वर्गदूता रा न्याय करना? तो क्या दुनिया री गल्ला रा न्याय नि करिए? 4 जे तुसा बीचे कुछ दुनिया री गल्ला रा कुछ चगड़ा ए तो फँसला करवाणे खे बारलेया लोका गे कऊँ जाओए जो मण्डलिया री नजरा रे कुछ नि समजे जाँदे? 5 आऊँ तुसा खे शर्मिंदा करने खे ये बोलूँआ। क्या तुसा बीचे सच्ची कोई बी अक्लमंद नि मिलदा, जो आपणे साथी विश्वासिया रा न्याय करी सको? 6 बल्कि एक विश्वासी दूजे विश्वासिये रे खलाफ मुकद्दमा करोआ और से बी अविश्वासिया सामणे।

7 जे तुसा बीचे एकी दूजे रे खलाफ चगड़े रा मुकद्दमा चली रा ओ तो तुसे पईले ई आरी चुके रे। इजी रे बजाए तुसे ये अन्याय कऊँ नि सईन करदे? आपणा नुकशाण कऊँ नि सईन करदे? 8 इजी रे बदले तुसे आपू ई अन्याय करोए और तोखा देओए और से बी साथी विश्वासिया खे। 9 क्या तुसे नि जाणदे कि अन्यायी लोक परमेशरो रे राज्य रे बारस नि ऊणे? तोखा नि खाओ; ना वेश्यागामी, ना मूर्तिपूजा, ना परस्त्रीगमन, ना लुच्चे, ना पुरूषगामी, 10 ना चोर, ना लोब, ना पियक्कड़, ना गाली देणे वाला, ना अन्दर करने वाले परमेशरो रे राज्य रे बारस ऊणे। 11 और तुसा बीचे कितणे तो एड़े ई थे, पर तुसे प्रभु यीशु मसीह रे नाओं ते और म्हारे परमेशरो री आत्मा ते तोए राखे और पवित्र ऊए और तर्मी ठईरे।

### ???? ??????? ? ? ???? ? ? ?

12 जे तुसा बीचा ते कोई ये बोलो, “माखे सब कुछ करने री जाज़त ए” पर सब कुछ मेरे फाईदे री निया। आऊँ बी बोली सकूँआ, “माखे सब कुछ करने री जाज़त ए,” पर मां कसी बी चीजा रा गुलाम नि बणना। 13 कोई ये बी बोलोगा, “रोटी पेटो खे ए और पेट रोटिया खे ए” ये गल्ल सच ए पर परमेशरो पेट और रोटी दोनो नाश करी देणे। शरीर व्याभिचारो खे निए, बल्कि प्रभुए खे ए और प्रभु शरीरो री देख-रेख करने वाला ए। 14 परमेशरे जियाँ आपणी सामर्था साथे प्रभु जिऊँदा कितेया तियाँ ई आसे बी तेस आपणी सामर्था ते जिऊँदे करने। 15 क्या तुसे नि जाणदे कि तुसा रा शरीर मसीह रे शरीरो रा अंग ए? तो क्या आऊँ मसीह रे अंग लयी की तिना खे वेश्या रे अंग बणाऊँ? कदी पनि। 16 क्या तुसे नि जाणदे कि जो कोई वेश्या साथे व्याभिचार करोआ, से तेसा साथे

एक तन ऊई जाओआ? कऊँकि से पवित्तर शास्त्रो रे लिखी राखेया, “सेयो दोनो एक तन ऊणे।”  
17 और जो प्रभुए री संगतिया रे रओआ, से तेस साथे एक आत्मा ऊई जाओआ।

18 व्याभिचारो ते बचे रे रओ। माणू जितणे पाप करोआ, सेयो शरीरो ते बारे ए, पर व्याभिचार करने वाला आपणे ई शरीरो रे खलाफ पाप करोआ। 19 क्या तुसे नि जाणदे कि तुसा रा शरीर पवित्तर आत्मा रा मन्दर ए? से तुसा खे परमेशरो री तरफा ते मिली रा और से तुसा रे बसे राए। तुसा पाँदे तुसा रा आपणा अक्क निए। 20 कऊँकि प्रभुए तुसे आपणी जिन्दगिया रा दाम देई की मोले लयी राखे। इजी री खातर आपणे शरीरो रे जरिए परमेशरो री महिमा करो।

## 7

### CHAPTER 7

1 एबे मां तिना सवालो रा जवाब देणा जो तुसे चिट्ठी लिखी की मांते पूछेया, “क्या लोका खे ब्या करना ठीक ए?” 2 इजी रे बारे रे मेरा बिचार ये ए कि व्याभिचारो रे डरो ते हर एक मर्दो री लाड़ी और लाड़िया रा लाड़ा ओ। 3 लाड़ा आपणी लाड़िया रा अक्क पूरा करो और तियाँ ई लाड़ी बी आपणे लाड़े रा अक्क पूरा करो। 4 लाड़िया खे आपणे शरीरो पाँदे अक्क निए, बल्कि तेसा रे लाड़े रा अक्क ए, तियाँ ई लाड़े खे बी आपणे शरीरो पाँदे अक्क निए, पर लाड़िया राए। 5 तुसे एकी दूजे ते लग नि रओ, पर कुछ बखतो तक आपू बीचली रजाबंदिया ते कि प्रार्थना खे बखत मिलो। फेर साथे रओ, एड़ा नि ओ कि तुसा रे असंयमे की शैतान तुसा खे परखो। 6 आऊँ जो ये बोलूँआ से सिर्फ सलाह ए पर आज्ञा रे तौरो पाँदे निए। 7 आऊँ ये चाऊँआ कि जेड़ा आऊँ अया, तेड़े ई सब माणू ओ, पर हर एकी खे परमेशरो री तरफा ते खास-खास बरदान मिली रे, केसी खे केड़ा और केसी खे ओरी तरअ रा।

8 पर आऊँ कुआँर और बिदुआ रे बारे रे बोलूँआ कि तिना खे एड़े ई रणा ठीक ए, जेड़ा आऊँ ए। 9 पर जे सेयो संयम नि करी सको, तो ब्या करी लो, कऊँकि ब्या करना कामातुर रणे ते ठीक पला ए। 10 जिना रा ब्या ऊई चुके रा, तिना खे आऊँ नि, पर प्रभु आज्ञा देओआ कि लाड़ी आपणे लाड़े ते लग नि रओ। 11 और जे लग बी ऊई जाओ तो बिना दूजे ब्याओ ते रओ या आपणे लाड़े साथे फेर मेल-जोल करी लो और ना ई लाड़ा आपणी लाड़िया खे छाड़ो।

12 दूजे खे प्रभु नि पर आऊँ ई बोलूँआ, जे केसी विश्वासी पाईए री लाड़ी आसा रे प्रभुए रे विश्वास नि राखदी ओ और तेस साथे रणे ते खुश ओ, तो से तेसा खे नि छाड़ो। 13 और जेसा विश्वासी जवाणसा रा लाड़ा आसा रे प्रभुए रे विश्वास नि राखदा ओ और तेसा साथे रणे ते खुश ए, से लाड़े खे नि छाड़ो। 14 कऊँकि एड़ा लाड़ा जो विश्वास नि राखदा ओ, से लाड़िया री बजअ ते पवित्तर ठईरोआ और एड़ी लाड़ी जो विश्वास नि राखदी, लाड़े री बजअ ते पवित्तर ठईरोई, नई तो तुसा रे बाल-बच्चे अशुद्ध ठईरदे, पर एबे पवित्तर ए।

15 पर जो मर्द विश्वास नि राखदा, जे से लग ऊणा चाओआ, तो लग ऊणे देओ, एड़ी दशा रे कोई बी विश्वासी पाई या बईण बंदनो रे निए, पर जे ऊई सको तो आपणे अविश्वासी लाड़े या लाड़िया साथे ब्याओ रे बंदनो रे बणे रे रओ कऊँकि परमेशरे आसे मेल-जोलो खे बुलाई राखे। 16 ओ लाड़ियो! तुसे याद राखो कि तुसा री बजअ ते तुसा रे लाड़े उद्धार पाई सकोए और ओ लाड़ियो! तुसे बी याद राखो कि तुसा री बजअ ते तुसा री लाड़िया उद्धार पाई सकोईया।

### CHAPTER 7

17 जो आऊँ बोलणे लगी रा तिजी रा निचोड़ ये ए कि हर एक माणू जेसा बी दशा रे परमेशरे बुलाई राखेया तिजी रेई बणेया रा रओ और तिजी रे मुताबिक ई आपणी जिन्दगी जिओ। आऊँ सबी मण्डलिया खे येई नियम ठराऊँआ 18 जे प्रभुए रे विश्वास करने ते पईले केसी रा खतना ऊई चुकी रा तो से बिना खतने रा नि बणो। जे प्रभुए रे विश्वास करने ते पईले केसी रा खतना नि ऊई रा ओ तो से खतना नि कराओ। 19 ना खतना कुछ अया और ना बिना खतने ते, पर परमेशरो री आज्ञा खे मानणा ई सब कुछ ए। 20 हर एक माणू जेसा बी दशा रे परमेशरे बुलाई राखेया तिजी रेई बणेया रा रओ।

21 जे तूँ दासो री दशा रे बुलाई राखेया, तो चिन्ता नि कर। पर जे दासत्व ते आजाद ऊणे रा मौका मिलो तो एते मौके रा फाईदा जरूर उठा। 22 कऊँकि जो दासो री दशा रे परभुए रे बुलाई राखेया, से परभुए रा आजाद कित्ते राए और तियाँ ई जो आजादिया री दशा रे बुलाई राखेया, से मसीह रा दास ए। 23 परमेशरे बऊत बड़ी कीमत चुकाई की तुसे मोले लयी राखे, माणूआ रे दास नि बणो पर परमेशरो रे दास बणो। 24 ओ साथी विश्वासियो, जो जेड़ी दशा रे बुलाई राखेया, से तिदे ई परमेशरो साथे रओ।

~~~~~

25 कुआँरिया रे बारे रे परभुए री कोई आज्ञा माखे नि मिली, पर परभुए आपणी दया ते माखे ज्ञान देई राखेया जेते पाँदे परोसा करेया जाई सकोआ और तिजी रे मुताबिक आऊँ राय देऊँआ। 26 आऊँ समजूँआ कि आज-काल के क्लेशो रे येई अच्छा ए कि माणू जेड़ी दशा रे आए, तेड़ी ई दशा रई रओ। 27 जे तेरी लाड़ी आए, तो तेसा ते लग ऊणे री कोशिश नि कर। जे तेरे लाड़ी निए, तो लाड़िया री टोल नि कर 28 फेर बी जे तूँ ब्या बी करे, तो इदे कोई पाप निए। जे कोई कुआँरी बेटिया ब्या करोई तो से पाप नि करदी। पर एड़े लोका खे एस जिन्दगिया रे शारीरिक दुःख सईणे पड़ने। आऊँ तुसा लोका खे इना तेई बचाणा चाऊँआ। 29 ओ साथी विश्वासियो, आऊँ ये बोलूँआ कि बखत कम करी ता रा, इजी री खातर चाईयो कि जिना रे लाड़ी आए, सेयो तेड़े ओ, मानो तिना रे लाड़ी निए। 30 और रोणे वाले एड़े ओ, मानो रोँदे नि और खुशी करने वाले एड़े ओ, मानो खुशी नि करदे और मोल लणे वाले एड़े ओ कि मानो तिना गे कुछ अया ई नि। 31 एसा दुनिया साथे बर्ताव करने वाले एड़े ओ कि दुनिया रेई नि ऊई जाओ, कऊँकि एसा दुनिया रे रीति और सबाओ बदलदा जाओआ।

32 मेरी इच्छा ये ए कि तुसे दुनिया री लालसा ते दूर रओ। कुआँरा मर्द परभुए री सेवा चिन्ता रे रओआ कि परभुए खे कियाँ खुश राखिए। 33 पर ब्याए रा माणू दुनिया री चिन्ता रे रओआ कि आपणी लाड़िया खे कियाँ खुश राखूँ। 34 ब्याईया री और कुआँरिया री पसंदा रे बी फर्क ए। कुआँरी एसा चिन्ता रे रओई कि से परभुए री कियाँ सेवा करो। से शरीर और आत्मा दूँई रे पवित्र ऊणे री कोशिश करदी रओई। पर ब्याई री दुनिया री चिन्ता रे रओई कि आपणे लाड़े खे खुश राखूँ। 35 ये गल्ला तुसा रेई फाईदे खे बोलूँआ, ना कि तुसा खे फसाणे खे, बल्कि इजी री खातर कि जेड़ा शोभा देओआ, तेड़ा ई करेया जाओ कि तुसे एक चित्त ऊई की परभुए री सेवा रे लगे रे रओ।

36 जे कोई ये समजो कि आऊँ आपणी तेसा कुआँरिया रा अक्क मारने लगी रा, जेसारी जवानी टली जाओई और जरूरत बी ओ, तो जेड़ा चाओ, तेड़ा करो, इदे पाप निए, से तेसा रा ब्या ऊणे देओ। 37 पर जो मनो रे पक्का रओआ और तेसखे जरूरत नि ओ, बल्कि आपणी इच्छा खे पूरी करने रा अक्क राखोआ और आपणे मनो रे ये गल्ल ठाणी ली री ओ कि मां आपणी बेटी कुआँरी राखणी, से पला करोआ। 38 आपणी कुआँरिया रा ब्या करी देओआ, से खरा करोआ और जो ब्या नि करदा, से ओर बी खरा करोआ।

39 जदुओ तक कसी जवाणसा रा लाड़ा जिऊँदा रओआ, तदुओ तक से तेसते बंदी री ए, पर जेबे तेसा रा लाड़ा मरी जाओआ, तो जेस साथे चाओ, ब्या करी सकोई, पर बस परभुए रे। 40 पर जेड़ी आए जे तेड़ी ई रओ, तो मेरे ख्यालो ते ओर बी धन्य ए और आऊँ समजूँआ कि परमेशरो री आत्मा मां दे बीए।

8

~~~~~

1 तुसा री चिट्ठिया रे तुसे लोक मूर्तिया रे सामणे बलि कित्ती रिया चीजा रे बारे रे पछेया था। इजी रे बारे रे आसा सबी खे ज्ञान ए; पर ज्ञान आसा रे कमण्ड पैदा करोआ, पर प्यारो ते तरक्की ओई। 2 जे कोई समजो कि आऊँ कुछ जाणूँआ, तो जेसरे बारे रे जाणना चाईयो, तेसरे बारे रे तो एबुए तक कुछ जाणेया नि। 3 पर जे कोई परमेशरो ते प्यार राखोआ, तो तेसखे परमेशर पछेयाणोआ।

4 तो फेर आँऊ मूर्तिया रे सामणे बलि कित्ती रिया चीजा खे खाणे रे बारे रे उतर देणा चाऊँआ। आसे जाणुँए कि मूर्ति दुनिया रे कोई चीज निए और एकी खे छाडी की ओर कोई परमेशर निए। 5 हालाँकि सर्गों रे और तरतिया रे बऊत सारी चीजा खे ईश्वर और प्रभु बोलोए। पर तिना बीचा ते कोई बी ईश्वर और प्रभु निए 6 तेवे बी आसा रे नेडे तो एक ई परमेशर ए, मतलब-पिता, जेसरी तरफा ते सब चीजा ए और आसे तेसखे ई आए और एक ई प्रभु ए, मतलब-यीशु मसीह, जेसरे जरिए सब कुछ ऊईया और आसे बी तेसरे ई जरिए ए।

7 पर सबी खे ये ज्ञान निए, पर कितणे तो एबुए तक मूर्तिया खे कुछ समजणे री बजअ ते, मूर्तिया रे सामणे बलि कित्ती रिया चीजा खे मूर्तिया रा प्रसाद समजी की खाई लओए और तिना रे एस कामो ते तिना रा विवेक कमजोर ऊणे री बजअ ते अशुद्ध ऊई जाओआ। 8 रोटी आसा खे परमेशरो रे नेडे नि पऊँछाँदी, जे आसे नि खाऊँ, तो आसा रा कुछ काअटा निए और जे खाईये, तो कुछ फाईदा निए।

9 पर चौकस रओ, एडा नि ओ कि तुसा री ये आजादी केथी कमजोरा खे ठोकरा री बजअ ऊई जाओ। 10 कऊँकि जे कोई ताखे ज्ञानियो खे मूर्तिया रे मन्दरो रे रोटी खाँदा ऊआ देखो और से जो मनो ते कमजोर ओ, तो क्या तेसरा कमजोर मन तेते हदा तक नि पटकी जाणा कि तेसरी मूर्तिया रे सामणे बलि कित्ती री चीजा खे खाणे री इम्मत्त नि ऊई जाणी? 11 एसा रीतिया रे तेरे ज्ञानो री बजअ ते से पाई जेसरा विश्वास कमजोर ए, जेसखे मसीह मरेया, नाश ऊई जाणा। 12 ईयाँ विश्वासी पाईया रे खलाफ पाप करने और तिना रे विवेको खे जो कमजोर ए चोट पऊँछाँणे रे जरिए तुसे यीशु मसीह रे खलाफ पाप करोए। 13 इजी बजअ ते जे रोटी मेरे केसी विश्वासी पाईए खे ठोकर खुलाओ, तो मां कदी बी केसी रीतिया ते मांस नि खाणा, एडा नि ओ कि आऊँ आपणे विश्वासी पाईए खे ठोकरा री बजअ बणूँ।

## 9

### XXXXXXXX XX XXXX XX XXXX

1 आऊँ से सब कुछ करने खे आजाद ए जो आँऊ चाऊँआ। आऊँ एक प्रेरित ए। मैं यीशुए खे जो म्हारा प्रभु ए देखी राखेया। मेरे ई जरिए तुसे मसीह पाँदे विश्वास कित्तेया। 2 आऊँ ओरी री नजरा रे चाए प्रेरित नि बी ए तेवे बी तुसा री तँई तो प्रेरित ए। आँऊ सेईए जो तुसा बीचे सुसमाचार लयी की आया। प्रभु यीशुए रे तुसा रा विश्वास साफ-साफ बताओआ कि आँऊ मसीह रा प्रेरित ए।

3 जो लोक मेरी प्रेरिताईया रे बारे रे सवाल पूछोए तिना खे मेरा येई जवाब ए! 4 बरनबास और माखे पक्के तौरो पाँदे प्रेरिता रे रूपो रे आपणे कामो रे बदले खाणे-पीणे री चीजा लणे रा अक्क ए। 5 ओरी प्रेरिता और प्रभुए रे पाई और पतरसो साई माखे बी मसीह पाँदे विश्वास करने वाली जवाणसा साथे ब्या करी कि आपू साथे लयी चलणे रा अक्क ए। 6 माखे और बरनबासो खे बी ओरी प्रेरिता जेडे पैसेया री मताद पाणे रा अक्क ए और आसा खे आपणी जिन्दगी जिऊणे खे काम करने री जरूरत निए।


7 एडा कोई सिपाई निए जो आपणा ई पैसा खर्च करी की सिपाईए रा काम करोआ। एडा कोई जिम्मीदार निए जो अँगूरा रा बगीचा लगाई की तिजी रा फल नि खाँदा ओ। एडा कोई माणू निए जो डांगर पाली की तिना रा दूद नि पीँदा ओ। 8 आऊँ इना गल्ला खे सिर्फ माणूआ रे बिचारे रे आधारो पाँदे नि बोलदा। मूसे रा बिधान बी येई गल्ला बोलोई। 9 कऊँकि मूसे रा बिधानो रे लिखी राखेया, “खल्याणो रे जोडे रे बखते चलदे ऊए बलदा रा मूँ नि बानणा।” क्या परमेशर बलदा री ई चिन्ता करोआ? 10 या खास करी की आसा खे बोलोआ। आ, आसा खेई लिखी राखेया, कऊँकि खरा ए कि डोरू बाणे वाला उम्मीदा साथे बाओ और खलयाणो रे पूए ते अन्न लग करने वाला फसला रा अक्कदार ऊणे री उम्मीद तो राखोआ। 11 जे आसे तुसा दे आत्मिक बीज बाई राखे, तो क्या शारीरिक रोटिया री उम्मीद करनी कोई बड़ी गल्ल ए? 12 जे ओरी रा तुसा पाँदे ये अक्क ए, तो

क्या आसा रा इजी ते जादा नि ऊणा? फेर बी आसे ये अक्क कामो रे नि ल्याए। पर सब कुछ सईन करूँ, ताकि आसा री बजअ ते मसीह रे सुसमाचारो रे कोई रुकावट नि ओ।

13 क्या तुसे नि जाणदे कि जो पवित्र चीजा री सेवा करोए, सेयो मन्दरो ते खाओए और जो बेदिया री सेवा करोए, सेयो बेदिया साथे अक्कदार ओए। 14 ईयां ई प्रभुए री ये आजा ए कि जो लोक सुसमाचारो रा प्रचार करोए तिना री आऊँदणी सुसमाचारो ते ओ।

15 पर इना अधिकारा बीचा ते मैं एकी रा बी कदी इस्तेमाल नि कितेया। ये गल्ला मैं इजी खे बी नि लिखिया कि एड़ा कुछ मेरे बारे रे कितेया जाओ। बजाए इजी रे की कोई मांते तेसा गल्ला खेई छीनी लओ जेतेरा माखे गर्व ए। इजी ते तो आऊँ मरी जाणा ई खरा समजूँआ। 16 जे आऊँ सुसमाचार सुणाऊँ, तो इदे माखे कोई कमण्ड करने री गल्ल निए। कऊँकि सुसमाचार सुनाणा माखे दिती री जिम्मेवारी ए और जे आऊँ सुसमाचार नि सुणाऊँ, तो माखे हाय! 17 जे आऊँ आपणी इच्छा ते ये काम करूँआ तो माखे तिजी री मजदूरी मिली जाणी। पर जे आऊँ ये काम बिना इच्छा ते करूँआ जेते री जिम्मेवारी परमेशरे माखे देई राखी तो आऊँ मजदूरिया री उम्मीद नि करी सकदा। 18 तो फेर मेरी कुण जी मजदूरी ए? से ये कि आऊँ बिना कुछ लये सुसमाचारो रा प्रचार मुफ्तो रे करूँआ। और सुसमाचारो ते जूड़े आपणे अक्को रा पुरा इस्तेमाल नि करदा।

19 हालाँकि आऊँ केसी रे बी अधीन निए फेर बी मैं आपणे आपू खे सबी रा दास बणाईता रा कि आऊँ जादा ते जादा लोका खे मसीह गे खिंजी की ल्याऊँ। 20 आऊँ यहूदिया खे यहूदी बणेया ताकि, यहूदिया खे मसीह गे खिंजी की ल्याऊँ। जो लोक बिधानो रे अधीन ए, तिना री खातर आऊँ बिधानो रे अधीन ना ऊँदे ऊए बी बिधानो रे अधीन बणेया कि तिना खे जो बिधानो रे अधीन ए, खिंजी की ल्याऊँ। 21 तियाँ ई जो लोक बिधानो रे अधीन निए तिना खे मसीह गे ल्याऊणे खे तिना जेड़ा ई आऊँ बी बणीगा। हालाँकि मसीह रा बिधानो रे अधीन ऊणे री बजअ ते आऊँ आपू परमेशरो रा बिधानो ते आजाद निए। 22 आऊँ कमजोरा खे, कमजोर जा बणेया कि कमजोरा खे मसीह गे खिंजी की ल्याऊँ, आऊँ सबी माणूँआ खे सब कुछ बणेया कि कियाँ ना कियाँ कईया जणेया खे बचाऊँ। 23 आऊँ सब कुछ सुसमाचारो खे करूँआ, ताकि ओरी साथे तिजी रा अक्कदार ऊई जाऊँ।



24 क्या तुसे नि जाणदे कि दौड़ा रे तो सब दौड़ोए, पर इनाम एक ई लयी जाओआ? तुसे तेडे ई दौड़ो, ताकि जीती जाओ। 25 हर एक पईलवाण सबी किजी रा संयम करोआ, सेयो तो एक मुरजाणे वाले मुकुटो खे पाणे री खातर इतणा सब करोए, पर आसे तो तेस मुकुटो खे करूँ, जो मुरजाणा नि। 26 इजी री खातर आऊँ तेस माणूँए जेड़ा दौड़ुँआ, जेसरे सामणे एक लक्ष्य ए, आऊँ अवा रे मुक्के नि बाँदा। 27 आऊँ आपणे शरीरो खे बाऊँआ और कुटुँआ और बसो रे ल्याऊँआ, एड़ा नि ओ कि ओरी खे प्रचार करी की आऊँ आपू ई केसी रीतिया ते नकम्मा ठईरूँ।

## 10



1 ओ साथो विश्वासियो, आऊँ चाऊँआ कि तुसे लोक तिना गल्ला खे याद करो कि आसा रे सब बाप-दादे बादलो ते थाले थे और सब के सब समुद्रो रे बीचा ते पार ऊईगे 2 आसे ये बोली सकूँए कि जिंयाँ आसे प्रभु यीशुए रे विश्वासी ऊणे खे बपतिस्मा लया तियाँ ई तिने लोके बी बादलो रे और समुद्रो रे मुसे रा बपतिस्मा लया। 3 और सबी एक ई आत्मिक रोटी खाई। 4 और सबी एक ई आत्मिक पाणी पिया, कऊँकि सेयो तेसा आत्मिक चट्टानी ते पियो थे, जो तिना साथे-साथे चलो थी और से चट्टान मसीह था। 5 पर परमेशर तिना बीचा ते कई जणेया ते खुश नि ऊआ, इजी री बजअ ते सेयो सुनसाण जगा रे मरी गे।

6 यो सब गल्ला आसा खे चेतावणी ए कि जेड़ा आसा रे बाप-दादेया लालच कितेया, तेड़ा आसे बुरी चीजा रा लालच नि करूँ 7 और ना तुसे मूर्तिया खे पूजणे वाले बणो, जेड़ा कि तिना बीचा ते कई जणे बणी गे थे, जेड़ा पवित्र शास्त्रो लिखी राखेया, “लोक खाणे-पीणे बैटे और खेलणे-कूदणे

ऊठे।" 8 ना आसे व्याभिचार करूँ, जेड़ा तिना बीचा ते कई जणे कित्तेया, और एकी दिनो रे तेई हज़ार लोक मरी गे। 9 ना ई आसा खे परभु परखणा चाईयो, जेड़ा तिना बीचा ते कई जणे कित्तेया और सापो रे जरिए नाश कित्ते। 10 ना ई तुसे कुड़कुड़ाओ, जिंयाँ तिना बीचा ते कई जणे कुड़कुड़ाए और नाश करने वाले स्वर्गदूतो रे जरिए नाश कित्ते

11 पर तिना पाँदे बीती रिया सेयो सारिया गल्ला चिह्न धिया और सेयो आसा री चेतावणिया खे लिखी राखिया जो दुनिया रे आखरी बखतो रे रओए। 12 इजी री खातर जो ये समजोआ कि आऊँ विश्वासो रे मजबूत ए, से चौकस रओ। केथी एड़ा नि ओ कि रूडी जाओ। 13 तुसे केसी एड़ी परीक्षा रे नि पड़े, जो माणूआ रे सईणे ते बारे ओ। पर परमेशर विश्वासो जोगा ए और तेस तुसे सामर्था ते बारे परीक्षा रे नि पड़ने देणे, बल्कि परीक्षा साथे-साथे तिजी ते बचणे री बाट बी परमेशरो तुसा खे देणी, ताकि तुसे सईन करी सको।

~~~~~

14 इजी बजअ ते ओ मेरे साथी विश्वासियो, मूर्तिपूजा ते बचे रे रओ। 15 आऊँ अकलमंद जाणी की तुसा खे बोलूँआ तिजी रे बारे रे सोचो कि से ठीक ए कि नि। 16 से धन्यवादो रा कटोरा, जेस पाँदे आसे धन्यवाद करूँए, क्या आसा खे मसीह रे खूनो दे साजेदार नि बणांदा? से रोटी जो आसे तोड़ुए, क्या आसा खे मसीह रे शरीरो दे साजेदार नि बणांदा? 17 कऊँकि एक ई रोटी ए, तो आसे बी जो बऊत ए, एक शरीर ए, कऊँकि आसे सब तेसा एक ई रोटिया रे इस्सेदार ओऊँए।

18 जो शरीरो ते तो इस्राएली ए, तिना री रवाजा खे देखो। जेबे सेयो लोक वेदिया पाँदे चढ़ाई री बलिया खे खाओए तो सेयो परमेशरो री आराधना रे इस्सेदार बणी जाओए। ईयाँ ई जो लोक मूर्तिया पाँदे चढ़ाई राखी रोटी खाओए तो सेयो मूर्तिया री पूजा रे बी इस्सा लओए। 19 फेर मेरे बोलणे रा क्या मतलब ए? क्या ये कि मूर्तिया रे आगे कित्तेया रा बलिदान कुछ आए, या मूर्ति कुछ आए? ना। 20 बल्कि ये कि दूजी जाति जो मूर्तिया खे बलिदान करोई, से परमेशरो खे नि ए, पर दुष्टात्मा खे बलिदान करोए और आऊँ नि चांदा कि तुसे दुष्टात्मा रे सहभागी ओ। 21 तुसे परभुए रे कटोरे और दुष्टात्मा रे कटोरे, दूई ते नि पी सकदे। तुसे परभुए री मेज और दुष्टात्मा री मेज, दूई रे साजे नि ऊई सकदे। 22 जे तुसे लोक एड़ा करोए तो पक्का ई परभुए खे रोष दलाऊँए। याद राखो कि तुसे परभुए ते बढ़ी की तागतबर नि ए?

~~~~~

23 जे तुसा बीचा ते कोई ये बोलो, "माखे सब कुछ करने री जाज़त ए," पर सब कुछ तुसा खे ठीक निया। तुसे बोलोए, "माखे सब कुछ करने री जाज़त ए," पर सब कुछ फाईदे रा नि ए। 24 कोई आपणी ई पलाईया खे नि टोलो, बल्कि ओरी री बी।

25 जो कुछ कसाईया रे गे बिकोआ, से खाओ और विवेको री बजअ ते कुछ नि पूछो। 26 पवित्तर शास्त्र बोलोआ, "कऊँकि तरती और तरतिया रे जो कुछ बी ए सब कुछ परभुए रा ईए।"

27 जे अविश्वासिया बीचा ते कोई तुसा खे निऊँदा देओ और तुसे जाणा चाओए, तो जो कुछ तुसा सामणे राखेया जाओआ सेई खाओ और विवेको री बजअ ते कुछ नि पूछो। 28 पर जे कोई तुसा खे बोलो कि ये तो मूर्तिया खे बलि कित्ती री चीज ए, तो तेस बताणे वाले री बजअ ते और विवेको री बजअ ते नि खाओ। 29 मेरा मतलब, तुसा रे आपणे विवेको ते नि ए पर दूजे माणूए रे विवेको ते ए। मेरी आज्ञादी कऊँ केसी दूजे माणूए री बजअ ते परखी जाओ। 30 जे आऊँ धन्यवादो री प्रार्थना करी की रोटिया रे साजा ओऊँआ, तो मां पाँदे दोष कऊँ लगाया जाओआ। जेतेखे मैं परमेशरो रा धन्यवाद करी राखेया।

31 तो तुसे चाए खाओ, चाए पियो, चाए जो कुछ करो, सब कुछ परमेशरो री महिमा खे करो। 32 तुसे ना तो यहूदी और ना दूजी जातिया खे और ना ई परमेशरो री मण्डलिया खे टोकरा री बजअ बणो। 33 आऊँ बी सबी गल्ला रे सबी खे खुश राखणे री कोशिश करूँआ और आऊँ आपणे पले नि, पर ओरी रे पले रा त्यान राखूँआ ताकि सेयो उद्धार पाओ।



## 11

1 जेड़ा आऊँ मसीह री जी चाल चलूँआ, तुसे मेरी जी चाल चलो ।

*26:26-29; 27:14-22-25; 22:14-20*

2 आऊँ तुसा खे सराऊँआ कि सवी गल्ला रे तुसे माखे याद करोए और जो शिक्षा मैं तुसा खे देई राखी, तिजी रा सावदानिया साथे पालण करदे रओ । 3 पर आऊँ चाऊँआ कि तुसे एसा गल्ला खे जाणी लो कि हर एकी मर्दों रा सिर मसीह ए और जवाणसा रा सिर मर्द ए और मसीह रा सिर परमेशर ए । 4 जो मर्द सिर टकी की प्रार्थना और भविष्यवाणी करोआ, से मसीह री बेज्जती करोआ जो कि तेसरा सिर ए । 5 पर जो जवाणस क्वाड़े सिरे प्रार्थना या भविष्यवाणी करोई, से आपणे लाड़े री बेज्जती करोई जो कि तेसा रा सिर ए, कऊँकि से गँजी ऊणे रे बराबर ए । 6 जे जवाणस चादरु नि टखो, तो बाल बी कटाई लो, जे जवाणसा खे बाल कटवाणा या सिर गँजा करना शर्मा री गल्ल ए, तो चादरु टखो ।

7 आ, मर्दों खे आपणा सिर टकणा ठीक निए, कऊँकि मर्द परमेशरो रे रूपो रे बणाई राखेया और से तेसरी महिमा ए, ईयाँ ई जवाणस बी मर्दों री महिमा खे दखाओई । 8 कऊँकि पईला मर्द आदम जवाणसा ते नि ऊआ, पर पईली जवाणस हव्वा मर्दों ते ऊई । 9 और मर्द जवाणसा खे नि बणाया, पर जवाणस मर्दों री तँई बणाई राखी । 10 इजी री खातर इजी बजअ ते और स्वगंदूता री बजअ ते जवाणसा खे टीक ए कि से आपणी अधीनता दखाणे खे आपणे सिरों खे टकी की राखो । 11 तेबे बी प्रभुए रे ना तो जवाणस बिना मर्दों ते और ना मर्द बिना जवाणसा ते ए । 12 कऊँकि जियाँ जवाणस मर्दों ते आई, तियाँ ई एबे हर मर्द रा जन्म जवाणसा ते ओआ और सब चीजा परमेशरो ते आओईया ।

13 तुसे आपू ई सोचो कि क्या जवाणसा खे क्वाड़े सिरे परमेशरो ते प्रार्थना करना खरी गल्ल ए? 14 क्या कुदरती तौरों पँदे तुसे नि जाणदे कि जे माणू लांबे बाल राखो, तो तेसखे बेज्जतिया री गल्ल ए । 15 पर जे जवाणस लांबे बाल राखो तो तेसा खे शोभा ए, कऊँकि बाल तेसा खे टखणे खे देई राखे । 16 पर जे कोई बईस करना चाओ, तो ये जाणी लो कि ना म्हारी और ना परमेशरो री मण्डलिया री एड़ी खाज ए ।

*26:26-29; 27:14-22-25; 22:14-20*

*(26:26-29; 27:14-22-25; 22:14-20)*

17 ये आज्ञा देंदे ऊए आऊँ तुसा खे नि सरांदा, कऊँकि आराधना सभा रे तुसा रे कटटे ऊणे ते पलाई निए, पर नुकशाण ओआ । 18 कऊँकि पईले तो आऊँ ये सुणूँ था कि जेबे तुसे मण्डलिया रे आराधना खे कटटे ओए, तो तुसा रे फूट ओई और आऊँ कुछ-कुछ विश्वास बी करूँआ । 19 तुसा लोका रे फूट ऊणा तो एकी तरअ ते जरूरी ए ताकि ये साफ ऊई जाओ कि तुसा बीचे कुण लोक खरे चाल-चलणो रे चलोए । 20 जेबे तुसे लोक एकी जगा रे कटटे ओए तो सच्ची तुसा री दिलचस्पी प्रभु भोजो रे नि ऊँदी । 21 कऊँकि खाणे रे बखते एकी-दूजे ते पईले केसी खे न्याले बगैर आपणी रोटी खाई लओआ, तो कोई तो पूखा रओआ और कोई मतवाला ऊई जाओआ । 22 क्या खाणे-पीणे खे तुसा रे कअर निए? या परमेशरो री मण्डलिया खे तुच्छ जाणोए और जिना गे अथा नि तिना खे शर्मिंदा करोए? आऊँ तुसा खे क्या बोलूँ? क्या एते गल्ला रे तुसा री तारीफ करूँ? ना! आऊँ एसा गल्ला रे तुसा री बिल्कुल बी तारीफ नि करदा ।

23 जो शिक्षा मैं तुसा खे दिती थी ये सेई शिक्षा ए जो माखे प्रभुए ते मिली री और मैं तुसा गे बी पऊँछाई ती कि प्रभु यीशुए, जेस राती पकड़वाऊआ, रोटी लयी 24 और धन्यवाद करी की तोड़ी और बोलेया, “ये मेरा शरीर ए, जो तुसा खे ए, मेरी यादा रे येई करेया करो ।” 25 ईयाँ ई तिने रोटिया ते बाद कटोरा बी लया और बोलेया, “ये कटोरा मेरे खूनो रे जरिए किती री नयी वाचा ए, जेबे कदी पियो, तो मेरी यादा रे येई करेया करो ।” 26 कऊँकि जेबे कदी तुसे ये रोटी खाओए और एस कटोरे बीचा ते पियोए, तो प्रभुए री मौता खे, जदुओ तक से नि आओ, प्रचार करोए ।

27 इजी री खातर जो कोई अनुचित रीतिया ते प्रभुए री रोटी खाओआ या तेसरे कटोरे बीचा ते पियोआ, से प्रभुए रे शरीर और खूनो रा अपराधी ठईरना । 28 इजी री खातर माणू आपणे आपू खे

परखी लो और इजी रीतिया ते इजी कटोरे ते खाओ और इजी कटोरे ते पियो। <sup>29</sup> कऊँकि जो खाँदे-पँदि बखते प्रभुए रे शरीरो खे नि पछ्याणां, से एस खाणे और पीणे ते आपू पँदि दण्ड ल्याओआ। <sup>30</sup> इजी बजअ ते तुसा बीचा ते बऊत कमजोर और रोगी ए और बऊत सारे तो मरी बी गये। <sup>31</sup> जे आसे आपणे आपू खे परखदे, तो परमेशरो आसा खे दण्ड नि देणा। <sup>32</sup> पर प्रभु आसा खे दण्ड देई की आसा री ताड़ना करोआ, ताकि आसे दुनिया साथे दोषी नि ठईहँ।

<sup>33</sup> इजी री खातर ओ मेरे साथी विश्वासियो, जेबे तुसे प्रभु भोज खाणे खे कट्टे ओए, तो एकी-दूजे खे रुकेया करो <sup>34</sup> जे कोई पूखा ओ, तो आपणे कअरे खाई लो, जेते साथे तुसा रा कट्टा ऊणा दण्डो री बजअ नि बणो और बाकि गल्ला आऊँ आयी की ठीक करी देऊँगा।

## 12

### दण्डो रे दण्डो

<sup>1</sup> ओ साथी विश्वासियो, आँऊ चाऊँआ कि तुसे लोक पवित्तर आत्मा रे जरिए दित्ते रे आत्मिक बरदानो रे बारे रे ठीक-ठीक समजी लओ। <sup>2</sup> तुसे जाणोए कि जेबे तुसे प्रभुए पँदि विश्वास नि करो थे तो तेबे गुँगिया मूर्तिया पीछे जिंयाँ चलाए जाओ थे तियाँ ई चली पड़ो थे। <sup>3</sup> इजी री खातर आऊँ तुसा खे समजयाणा चाऊँआ कि जो कोई परमेशरो री आत्मा री अगुवाईया ते बोलोआ, से नि बोलदा कि यीशु स्रापित ए और सिर्फ पवित्तर आत्मा ई केसी खे ये बोलणे जोगा वणाओआ, “यीशु ई प्रभु ए।”

<sup>4</sup> आत्मिक बरदान तो कई प्रकारा रे ए, पर आत्मा एक ईए <sup>5</sup> और सेवा बी कई प्रकारा री ए, पर प्रभु एक ईए <sup>6</sup> परमेशर कई तरीके ते आसा री जिन्दगिया रे काम करोआ पर परमेशर एक ईए, जो आसा सबी रे जरिए काम करोआ।

<sup>7</sup> परमेशर आसा सबी खे आत्मिक बरदान देओआ ताकि आसे एकी दूजे री सेवा करी सकिए। <sup>8</sup> परमेशरो री आत्मा एकी माणूए खे बुद्धिया साथे परेया रा संदेश बोलणे री योग्यता देओआ और सेई आत्मा केसी दूजे माणूए खे ज्ञानो रे मुताबिक संदेश बोलणे री योग्यता देओआ। <sup>9</sup> सेई आत्मा केसी माणूए खे मसीह रे विश्वास करने री योग्यता देओआ और केसी खे तेसी ई आत्मा ते चंगा करने रा बरदान दित्तेया जाओआ। <sup>10</sup> सेई आत्मा केसी खे सामर्था रे काम करने री शक्ति और केसी खे भविष्यबाणी करने री योग्यता देओआ। फेर केसी ओरी खे तिजी खे परखणे री योग्यता देओआ कि से वचन परमेशरो री आत्मा री तरफा तेआ या दुष्टात्मा री तरफा तेआ। फेर केसी ओरी खे कई प्रकारा री पाषा बोलणे री योग्यता देओआ और केसी ओरी खे तेसा पाषा रा मतलब बताणे री योग्यता देओआ। <sup>11</sup> ये सारे बरदान एक ई आत्मा रा काम ए। से आपणी इच्छा रे मुताबिक हर माणूए खे लग-लग बरदान देओआ।

### दण्डो रे दण्डो

<sup>12</sup> कऊँकि जिंयाँ शरीर तो एक ए और तिजी रे अंग बऊत ए और तेस एक शरीरो रे सब अंग, बऊत ऊँदे ऊए बी, सब मिली की एक ईए, तियाँ ई मसीह बीए। <sup>13</sup> कऊँकि आसे सबी क्या यहूदी, क्या दूजी जाति, क्या दास, क्या आजाद एक ई आत्मा रे जरिए, एक शरीर ऊणे री तँई बपतिस्मा लया और आसा सबी खे एक ई आत्मा पलयाया।

<sup>14</sup> शरीरो रे एक ई अंग नि, बल्कि बऊत अंग ए। <sup>15</sup> जे पैर बोलो, “आऊँ आथ निए, तेबे आँऊ शरीरो रा अंग निए,” तो क्या तेसरे एडा बोलणे ते से शरीरो रा अंग नि रँदा? <sup>16</sup> जे कान बोलो, “आऊँ आखी रा निए, तेबे आँऊ शरीरो रा अंग निए,” तो क्या तेसरे एडा बोलणे ते से शरीरो रा अंग नि रँदा? <sup>17</sup> जे सारा शरीर आखी रा ई ऊँदा, तो सुणना केथो ते था? जे सारा शरीर कानो रा ई ऊँदा, तो सिंगणा केथो ते था? <sup>18</sup> पर सच्ची परमेशरे अंग आपणी इच्छा रे मुताबिक एक-एक करी की शरीरो रे राखी राखे। <sup>19</sup> जे सेयो सारे एक ई अंग ऊँदे, तो शरीर केथा ऊँदा? <sup>20</sup> पर एबे अंग तो बऊत सारे ए, पर शरीर एक ईए।

21 आखे आथो खे नि बोली सकदी, “माखे तेरी कोई जरूरत नि ए।” ना सिर पैरो ते बोली सकदा, “माखे तेरी कोई जरूरत नि ए।” 22 पर शरीरो रे सेयो अंग, जो ओरी ते कमजोर लगोए, बऊत ई जरूरी ए। 23 शरीरो रे जिना अंगा खे आसे आदरो जोगा नि समजदे, तिना खेई आसे जादा आदर देऊँए, और गुप्त अंगा रा खास त्यान राखदे ऊए तिना खे आसे टकी की राखूँए, 24 तेबे बी म्हारे आदरो जोगे अंगा खे खास देख-पालो री जरूरत नि ए। पर परमेशरे शरीर एड़ा बणाईता कि जेस अंगो खे आदरो री कमी थी, तिजी रा ई ओर बी आदर ओ। 25 ताकि शरीरो रे फूट नि पड़ो, बल्कि अंग एकी-दूजे री बराबर चिन्ता करो। 26 तेबेई तो जेबे एकी अंगो खे दुःख ओआ, तो सारे अंगा खे तिजी साथे दुःख ओआ। जे एकी री तारीफ ओई, तो तिजी साथे सारे अंग खुशी मनाओए।

27 ईयाँ ई तुसे सारे मिली की मसीह रा शरीर ए और लग-लग तेसरे अंग ए। 28 मसीह रे एस शरीरो रे परमेशरे लग-लग माणू नियुक्त करी राखे, पईले प्रेरित, दूजे भविष्यबक्ता, तीजे गुरु, तेबे सामर्था रे काम करने वाले, तेबे ठीक करने वाले, तेबे उपकार करने वाले, तेबे प्रदान और कई प्रकारा रिया पाषा बोलणे वाले। 29 क्या सारे प्रेरित ए? क्या सारे भविष्यबक्ता ए? क्या सारे उपदेशक ए? क्या सारे सामर्था रे काम करने वाले ए? 30 क्या सबी खे ठीक करने रा बरदान ए? क्या सारे कई प्रकारा रिया पाषा बोलोए? क्या सारे अनुवाद करोए? 31 तुसे बड़े ते बड़े बरदानो री धुना रे रओ, पर आऊँ तुसा खे ओर बी सबी ते खरी बाट बताऊँआ।

## 13

~~~~~

1 जे आऊँ माणूआ रिया और स्वर्गदूता रिया पाषा बोलूँ और प्यार नि राखूँ, तो आऊँ ठणठणादा ऊआ पीतल और छणछण करदी ऊई झांजर ए। 2 जे आऊँ भविष्यवाणी करी सकूँ और सारे पेट और सब प्रकारा रे ज्ञानो खे समजूँ और माखे एथो तक विश्वास ओ कि आऊँ पाहूँडो खे टाई सकूँआ, पर प्यार नि राखूँ, तो आऊँ कुछ पनि ए। 3 जे आऊँ आपणी सारी सम्पति कंगाला खे खुलाई देऊँ या आपणा शरीर फूकणे खे देई देऊँ और प्यार नि राखूँ, तो माखे कुछ बी फाईदा नि ए।

4 प्यार सब्रस्वर ए और कृपा करने वाला ए। प्यार जलन नि करदा, प्यार आपणी तारीफ नि करदा और कमण्ड नि करदा। 5 प्यार अनुचित रीतिया ते नि चलदा, से आपणी पलाई नि चांदा, प्यारो रे चट गुस्सा नि आऊँदा, बुरा नि मानदा। 6 प्यार कुकर्मो ते खुश नि ऊँदा, पर सच्चे ते खुश ओआ। 7 प्यार सारिया गल्ला सईन करी लओआ, सारिया गल्ला रा विश्वास करोआ, सबी गल्ला री उम्मीद राखोआ, सबी गल्ला रे सब्र राखोआ।

8 प्यार कदी टलदा नि, भविष्यवाणिया ओ तो, खत्म ऊई जाणिया, पाषा ओ तो खत्म ऊई जाणिया, ज्ञान ओ तो मिटी जाणा। 9 कऊँकि आसा रा ज्ञान आदा-अदुरा ए और आसा री भविष्यवाणी बी अदुरी ए। 10 पर जेबे सर्वसिद्ध आऊणा, तो अदुरा मिटी जाणा। 11 जेबे आऊँ बालक था, तेबे आऊँ बालको जेड़ा बोलूँ था, बालका जेड़ा मन था, बालका जेड़ी समज थी, पर जेबे स्थाणा ऊईगा, तेबे बालका रिया गल्ला छाडी तिया। 12 एबे आसा खे शीशे रे तुन्दला जा दिखोआ, पर तेस बखते आमणे-सामणे देखणा। एस बखते मेरा ज्ञान आदा-अदुरा ए पर तेस बखते मेरा ज्ञान तेड़ा ई ऊणा जेड़ा एस बखते मेरे बारे रे परमेशरो राए। 13 पर एबे विश्वास, उम्मीद, प्यार यो तीनो स्थाई ए, पर इना बीचे सबी ते बड़ा प्यार ए।

14

~~~~~

1 एकी-दूजे ते प्यारो खे हर तरअ ते कोशिश करो। आत्मिक बरदानो री बी धुना रे रओ, खास करी की ये कि भविष्यवाणी करो। 2 कऊँकि जो दुजिया पाषा रे गल्ल करोआ, से माणूआ साथे नि, बल्कि परमेशरो साथे गल्ला करोआ। तेबेई तो तेसरी गल्ला केसी खे बी समज नि आऊँदिया, कऊँकि से पेतो रिया गल्ला पवित्र आत्मा रे उई की बोलोआ। 3 पर जो भविष्यवाणी करोआ, से ओरी ते

तरक्की, उपदेश और सबरो री गल्ला करोआ। 4 जो दुजिया पाषा रे गल्ला करोआ, से आपणे ई विश्वासो खे मजबूत करोआ, पर जो भविष्यवाणी करोआ, से मण्डलिया रे विश्वासिया रे विश्वासो खे मजबूत करोआ। 5 आऊँ चाऊँआ कि तुसे सारे दुजिया पाषा रे गल्ला करो, पर जादा ये चाऊँआ कि भविष्यवाणी करो। कऊँकि जे दूजी पाषा बोलणे वाला मण्डलिया री तरक्किया खे अनुवाद नि करो, तो भविष्यवाणी करने वाला तेसते बड़ा ए।

6 इजी री खातर ओ साथी विश्वासियो, जे आऊँ तुसा गे आयी की दुजिया पाषा रे जपूँ तो मेरिया गल्ला ते तुसा खे क्या फाईदा ऊणा? पर जे आऊँ परमेशरो रे जरिए दित्तेया रा प्रयासा, ज्ञान, भविष्यवाणी या उपदेशो रिया गल्ला तुसा साथे करूँ तो इजी ते तुसा खे जरूर फाईदा ऊणा। 7 ईयां जे निर्जीव चीजा बी, जिना री छेड़ निकलोई, जियाँ बंसरी या बीन, जे तिना री आवाजा रे फर्क नि ओ, तो जो फूकेया या बजाया जाओआ, से कियों पछ्यणना? 8 जे तुरहिया री आवाज साफ नि ओ, तो लड़ाईया खे केस तयारी करनी? 9 ईयां ई जे तुसे जीबा ते साफ गल्ला नि बोलो, तो जो कुछ बोलेया जाओआ, से कियों समजणा? तुसे तो अवा साथे गल्ला करने वाले ई ऊणे। 10 दुनिया रे चाए कितणिया ई प्रकारा रिया पाषा कऊँ नि ओ, पर तिना बीचा ते हर एक पाषा रा आपणा मतलब ओआ। 11 पर जे आऊँ केसी गल्ला रा मतलब नि समजूँ, तो बोलणे वाले री नजरा रे परदेशी लगणा और बोलणे वाला मेरी नजरा रे परदेशी ऊणा। 12 तुसा लोका रे बारे रे बी येई गल्ला सच ए। तुसे लोक आत्मिक बरदानो री धुना रे रओए, तो एडे बरदान पाणे री कोशिश करो जेते की मण्डलिया री तरक्की ओ।

13 इजी बजअ ते जो दूजी पाषा बोलो, तो से प्रार्थना करो कि तिजी रा अनुवाद बी करी सको। 14 तेबे जे आऊँ दुजिया पाषा रे जपूँ, तो मेरी आत्मा प्रार्थना करोई, पर मेरा दमाक काम नि करदा। 15 तो क्या करना चाईयो? मां आत्मा ते बी प्रार्थना करनी और दमाको ते प्रार्थना करनी। आत्मा ते बी गाणा और दमाको ते बी गाणा। 16 नई तो जे तूँ आत्मा तेई धन्यवाद करेगा, तो तेबे अज्ञानिया तेरे धन्यवादो पाँदे आमीन कियों बोलणा? कऊँकि से तो जाणदा नि कि तूँ क्या बोलणे लगी रा। 17 तूँ तो ठीक-टंगो रे धन्यवाद करेया, पर दूजेया री तरक्की नि ऊँदी। 18 आऊँ आपणे परमेशरो रा धन्यवाद करूँआ कि आऊँ तुसा सबी ते जादा दुजिया पाषा रे बोलूँआ। 19 पर मण्डलिया रे दुजिया पाषा रे दस हजार गल्ला बोलणे ते, माखे ये ओर बी खरा लगेआ कि ओरी खे सिखाणे री तई अक्ला ते पाँज ई गल्ला बोलूँ।

20 ओ साथी विश्वासियो, तुसे समजणे रे बालक नि बणो, पर तेबे बी बुराईया रे बालक रओ, पर समजणे रे स्याणे बणो। 21 पवितूर शास्तुरो रे लिखी राखेया,

“मां दुजिया पाषा बोलणे वालेया रे जरिए

और पराए मुंओ रे जरिए

इना लोका साथे गल्ला करनिया,

तेबे बी तिना मेरी नि सुणनी।

परभु बोलोआ।”

22 तेबेई तो दुजिया पाषा रे गल्ला करनिया विश्वासिया खे निए, बल्कि अविश्वासिया खे चिहूँ ए और भविष्यवाणी करनी अविश्वासिया खे निए, बल्कि विश्वासिया खे चिहूँ ए। 23 तेबे जे मण्डली एकी जगा रे कट्टे ओ और सब के सब दूजी पाषा बोलो, तेबे जो लोक एसा पाषा खे नि समजदे या अविश्वासी लोक पीतरे आयी जाओ, तो क्या तिना तुसा खे पागल नि बोलणा? 24 पर जे सारे भविष्यवाणी करने लगे, तेबे जो लोक इजी खे नि समजदे या अविश्वासी मांण पीतरे आयी जाओ, तो सबी से दोषी ठराणा और परखी लणा, 25 और तेसरे मनो रे पेत सामणे आयी जाणे और तेबे तेस मुंओ रे पारे पड़ी की परमेशरो गे माथा टेकणा और तेस मानी लणा कि सच्ची परमेशर तुसा बीचे ए।



26 ओ साथी विश्वासियो, सुणो, क्या करना चाईयो? जेबे तुसे आराधना करने खे कट्टे ओए, तो हर एकी रे दिलो रे, पजन, उपदेश, दूजी पाषा, प्रयासा और दुजिया पाषा रा मतलब बतादे रणा


चाईयो। सब कुछ आत्मिक तरक्किया खे ऊणा चाईयो। 27 जे दुजिया पाषा रे गल्ला करनिया ओ, तो दो-दो या बऊत ओ तो तीन-तीन जणे बारिया-बारिया ते बोलो और पक्का ई तिजी खे अनुवाद करने खे कोई ना कोई ऊणा चाईयो। 28 पर जे अनुवाद करने वाला नि ओ, तो दूजी पाषा बोलणे वाले खे मण्डलिया रे शान्त रणा चाईयो और आपणे मनो ते और परमेशरो साथे गल्ला करदा रओ।

29 भविष्यवक्तेया बीचा ते दो या तीन जणे बोलो और बाकि लोक तिना रे वचनो खे परखो 30 जे तेसी बखते केसी दूजे खे परमेशरो रा प्रकाशन मिलो तो से जो ए स बखते भविष्यवाणी करने लगी रा तो से चुप ऊई जाओ 31 कऊँकि तुसे सारे एक-एक करी की भविष्यवाणी करी सकोए, ताकि सब सीखो और सब औसला पाओ। 32 एक भविष्यवक्ता जो परमेशरो रा वचन बोलोआ से आपणे आपू खे वशो रे राखोआ। से आपणी इच्छा रे मुताबिक बोलणे रे या चुप रणे रे निपुण ए। 33 कऊँकि परमेशर गड़बड़ी नि करदा, पर शान्ति बनाणे वाला ए। जेड़ा पवित्र लोका रिया सारिया मण्डलिया रे ए।

34 जवाणसा खे मण्डलिया री सभा रे चुप रणा चाईयो, कऊँकि तिना खे गल्ला करने री आज्ञा नि ए, पर अधीन रणे री आज्ञा ए, जेड़ा विधानो रे लिखी बी राखेया। 35 जे सेयो कुछ सिखणा चाओ, तो कअरे आपणे लाड़े ते पूछो। कऊँकि मण्डलिया रे जवाणसा रा जपणा शर्मा री गल्ल ए।

36 क्या परमेशरो रा वचन तुसा बीचा ते निकली रा या बस तुसा तक ई पऊँछी रा? 37 जे कोई माणू आपणे आपू खे भविष्यवक्ता या आत्मिक जणा समजो, तो से जाणी लो कि जो गल्ला आऊँ तुसा खे लिखूँआ, सेयो प्रभुए री आज्ञा ए। 38 पर जे कोई एसा सच्चाईया खे नि मानो, तो से बी नि मानेया जाणा। 39 तेवेई ओ साथी विश्वासियो, भविष्यवाणी करने री धुना रे रओ और दूजी पाषा बोलणे ते ना नि करो। 40 तुसे आराधना रे बखते जो कुछ बी करोए सारिया गल्ला तमीज्जारे और एक-एक करी की किर्तिया जाओ।

## 15



1 ओ साथी विश्वासियो, एबे बी आऊँ तुसा खे सेई सुसमाचार याद दलाऊँआ जेतेरा मैं तुसा बीचे प्रचार कित्तेया था। से सुसमाचार तुसे मानेया बी था और जिदे तुसे बणे रे बीए। 2 परमेशरे तेसी सुसमाचारो रे जरिए तुसा रा उद्धार करी राखेया। जे तुसे तेसी सुसमाचारो रे जो मैं तुसा बीचे प्रचार कित्तेया था तिदे बणे रे रओगे नयी तो तुसा रा विश्वास करना बेकार ए।

3 इजी बजअ ते मैं तुसा लोका खे प्रभु यीशुए ते मिली री बऊत जरूरी सच्चाई बताई ती। से सच्चाई ये ए कि पवित्र शास्त्रो रे मुताबिक यीशु मसीह आसा रे पापो री तई मरी गा। 4 और दबाए गये और पवित्र शास्त्रो रे मुताबिक तीजे दिने जिऊँदे बी ऊईगे। 5 तेबे पतरसो खे और तेबे बारा चलेया खे दिखे। 6 इजी ते बाद पाँज सौ ते जादा विश्वासी पाईया खे दिखे, जिना बीचा ते बऊत जणे एवुए तक जिऊँदे ए और कुछ जणे मरी गे रे। 7 फेर याकूबो खे दिखे, तेबे सबी प्रेरिता खे दिखे 8 और सबी ते बाद माखे बी दिखे, जो मानो आदे दिना रा जम्मैया रा ओ।

9 कऊँकि आऊँ प्रेरिता बीचे सबी ते छोटा ए, बल्कि प्रेरित बोलणे रे काबिल पनि ए, कऊँकि मैं परमेशरो री मण्डली सताई थी। 10 पर आऊँ जो प्रेरित ए, से परमेशरो री कृपा ते ए और तेसरी कृपा जो मां पँदे ऊई, से बेकार नि ऊई। पर मैं तिना सबी प्रेरिता ते बड़ी की मईणत बी किती तेबे बी ये मेरी तरफा ते नि ऊआ, पर परमेशरो री कृपा ते, जो मां पँदे ए। 11 तो चाए आऊँ ए, चाए सेयो ओ, आसे येई प्रचार करूँए और इजी पँदे ई तुसे विश्वास बी कित्तेया।



12 जबकि मसीह रा प्रचार करेया जाओआ कि से मरे रेया बीचा ते जिऊँदा ऊआ, तो तुसा बीचा ते बऊत जणे कऊँ बोलोए कि मरेया रा दुबारा जिऊँदा ऊणा ऊई नि सकदा? 13 जे मरे ऊए रा दुबारा जिऊँदा ऊणा ऊई नि सकदा, तो मसीह पनि जिऊँदा ऊँदा। 14 जे मसीह पनि जिऊँदा ऊआ, तो आसा रा प्रचार करना बी बेकार ए और तुसा रा विश्वास बी बेकार ए। 15 बल्कि आसे परमेशरो

रे चूटे गवा ऊए, कऊँकि आसे परमेशरो रे बारे रे ये गवाई दित्ती कि तिने मसीह मरे रया बीच ते जिऊँदा कित्तेया। पर जे मरे रे जिऊँदे नि कित्ते जादे तो परमेशरे मसीह बी जिऊँदा नि कित्तेया। 16 आऊँ फेर बोलूँआ जे मुड़दे जिऊँदे नि ऊँदे, तो मसीह बी जिऊँदा नि ऊँआ। 17 और जे मसीह जिऊँदा नि ऊँआ, तो तुसा रा विश्वास बेकार ए और तुसे एवुए तक आपणे पापो रे फसी रे। 18 बल्कि जो विश्वासी मसीह रे मरी गे रे, सेयो बी नाश ऊई चुके रे। 19 जे आसे बस एसा जिन्दगिया रेई मसीह री उम्मीद राखूँए, तो आसे सबी माणूआ ते नवाग ए।

20 पर सच्चाई ये ए कि परमेशरे मसीह मुड़देया बीच ते जिऊँदा करी ता रा और से मरे रेया बीच ते जिऊँदा ऊणे वाला पईला फल बणी चुकी रा। 21 जियौँ एक माणू आदमो रे जरिए मौत आयी, तियाँ ई एक माणू मतलब मसीह रे जरिए मरे रेया बीच ते दुबारा जिऊँदा ऊणा बी आया। 22 जियौँ आदमो रे सारे मरोए, तियाँ ई मसीह रे सारे जिऊँदे करे जाणे। 23 पर हर एकी आपणी-आपणी बारिया ते मरे रेया बीच ते जिऊँदे ऊणे रा इन्तजार करना। तिना बीच ते पईला फल मसीह ए। इजी ते बाद सेयो सारे जो मसीह रे आऊणे तक तिना रे बणे रणे। 24 इजी ते बाद अंत ऊणा, तेस बखते तेस सारी प्रदानगिरी, सारा अक्क और सामर्था रा अंत करी की राज्य परमेशर पिते रे आधो रे देई देणा। 25 कऊँकि जदुओ तक परमेशर तेसरे दुश्मणा खे तेसरे वशो रे नि करी देओगा, तदुओ तक तेसरा राज्य करना जरूरी ए। 26 सबी ते बादला दुश्मण जो नाश करना, से मौत ए। 27 पवितर शास्त्र बोलोआ, “परमेशरे सब कुछ तेसरे पैरा निठे करी ता,” पर जेबे से बोलोआ कि सब कुछ तेसरे वशो रे करी ता रा तो ये साफ ए कि परमेशर जिने सब कुछ मसीह रे वशो रे करी ता रा, तो परमेशर इदे सबी रे शामिल निया। 28 जेबे सब कुछ तेसरे अधीन ऊई जाणा, तो पुत्र आपू बी तेसरे अधीन ऊई जाणा, तिने सब कुछ तेसरे अधीन करी ता ताकि परमेशर ई सबी चीजा रा मालक ओ।

29 नई तो जो लोक मरे रेया खे बपतिस्मा लओए, तिना क्या करना? जे मुड़दे जिऊँदे ऊँदे ई नि, तो तेबे तिना खे बपतिस्मा कऊँ लओए? 30 और आसे बी कऊँ हर कअडी खतरेया रे पडे रे रऊँए? 31 ओ साथी विश्वासियो, तुसे लोक प्रभु यीशु मसीह रे माखे कमण्ड ए। आऊँ तुसा री कसम खाई की बोलूँआ कि माखे हर रोज मौता रा सामणा करना पडोआ। 32 जे आऊँ माणूआ री रीतिया ते इफिसुसो रे बणो रे डांगरा ते लडेया, तो माखे क्या फाईदा ऊँआ? जे मुड़दे जिऊँदे नि कित्ते जाओगे, “तो आओ, खाओ-पीओ,

कऊँकि काल तो मरी ई जाणे।”

33 तिना लोका ते तोखा नि खाओ जो एडिया गल्ला बोलोए, “बुरी संगत खरे चाल-चलणो खे बिगाडी देओई।” 34 ओशा रे आओ और पाप करना छाडी देओ। कऊँकि बऊत जणे एडे ए, जो परमेशरो खे नि जाणदे। आऊँ तुसा खे शर्मिदा ऊणे खे ये बोलणे लगी रा।

~~~~~

35 एबे केसी ये बोलणा, “मुड़दे कियाँ जिऊँदे ओए और कुण जे शरीरो रे आओए?” 36 ओ बिना दमाको वालेयो! जो कुछ तूँ बाएआ, जदुओ तक से नि मरो, जिऊँदा नि ऊँदा। 37 और जो तूँ बाएआ, ये से शरीर निए, जो जमणे वाला ए, पर सेई दाँणा ए चाए कणका रा चाए केसी ओरी अन्नो रा 38 पर परमेशर आपणी इच्छा रे मुताबिक तेसखे शरीर देओआ और हर एक बीजो खे तेसरा खास शरीर। 39 सारे शरीर एक जेडे निए, बल्कि माणूआ रा शरीर ओर ए, डांगरा रा शरीर ओर ए, पंछिया रा शरीर ओर ए, मछलिया रा शरीर ओर ए। 40 स्वर्गिय शरीर ए और संसारिक शरीर बीए, पर स्वर्गिय शरीरो रा तेज ओर ए और संसारिक शरीरो रा तेज ओर ए। 41 सूरजो रा तेज ओर ए, चाँदो रा ओर ओर और तारेया रा तेज ओर ए कऊँकि एक तारे ते दूजे तारे रे तेजो रे फर्क ए।

42 मुड़देया रा जिऊँदा ऊणा बी एडा ईए। शरीर नाश ऊणे री दशा रे बाया जाओआ और अविनाशी रूपो रे जिऊँदा ओआ। 43 जेबे म्हारे शरीरो खे दबाया जाओआ तेस बखते से बदसूरत और कमजोर ओआ। पर जेबे से जिऊँदे ऊई जाणे तेबे से बाँके और सामर्था बणी जाणे। 44 कुदरती शरीर बाया जाओआ और आत्मिक शरीर जिऊँदा ओआ,

जबकि कुदरती शरीर ए, तो आत्मिक शरीर वीए।⁴⁵ एड़ा ई पवित्र शास्त्रो रे लिखी बी राखेया, “पईला माणू, मतलब-आदम जिऊँदा प्राणी बणेया” पर आखरी आदम मतलब मसीह अनन्त जिन्दगी देणे वाला बणेया।⁴⁶ पर पईले आत्मिक नि था, पर कुदरती था, तेबे इजी ते बादो ते आत्मिक बणेया।⁴⁷ पईला माणू तरती ए, मतलब-माट्टिया रा बणेया रा था, दूजा माणू स्वर्गिय ए।⁴⁸ जेड़ा से माट्टिया रा बणेया रा था, तेड़े ई ओर माट्टिया रे बणी रे थे और जेड़ा से स्वर्गिय ए, तेड़े ई ओर वी स्वर्गिय ए।⁴⁹ जियाँ आसे माट्टिया रे बणे रे माणूए रा रूप धारण कितेया तियाँ ई आसा स्वर्गिय माणूए रा रूप धारण करना।

⁵⁰ ओ साथी विश्वासियो, आऊँ ये बोलूँआ कि मांस और खून परमेशरो रे राज्य रे अक्कदार नि ऊई सकदे और ना ई नाश ऊणे वाला अविनाशो रा अक्कदार ऊई सकोआ।⁵¹ देख, आऊँ तुसा खे पेतो री गल्ल बताऊँआ कि आसा वीचा ते कुछ तो नि मरने पर बदली जाणे।⁵² और ये सब कअडिया रेई, पलक झपकदे ई आखरी तुरही फूकदे ई ऊई जाणा, कऊँकि तुरहिया रे फूकर बाई जाणी और मुड्डे अविनाशी दशा रे ठवाले जाणे और आसे बदली जाणे।⁵³ कऊँकि जरूरी ए कि से नाशवान शरीर अविनाशो खे पईनी लो और ये मरनहार शरीर अमरता खे पईनी लो।⁵⁴ जेबे ये नाशवान अविनाशो खे पईनी लओगा और ये मरनहार शरीर अमरता खे पईनी लओगा, तेबे से वचन जो पवित्र शास्त्रो रे लिखी राखेया पूरा ऊई जाणा,

“जय मौत निगली ली।

⁵⁵ ओ मौत! तेरी जय केयी रई?

ओ मौत! तेरा डंग केयी रया?”

⁵⁶ मौता रा डंग पाप ए और पापो खे बिधानो ते तागत मिलोई।⁵⁷ पर परमेशरो रा धन्यवाद ओ, जो म्हारे प्रभु यीशु मसीह रे जरिए आसा खे जयवंत करोआ।⁵⁸ तो ओ मेरे साथी विश्वासियो, विश्वासो रे पक्के और अटल बणे रे रओ और प्रभुए रे कामो रे सदा बड़दे जाओ, कऊँकि तुसे जाणोए कि प्रभुए रे तुसा री मईणत बेकार निए।

16

XXXXXXXXXX XX XXX

¹ एबे यरूशलेम नगरो रे परमेशरो रे लोका खे चंदा कट्टा करने रे बारे जो सवाल तुसे मांते पृछेया था तिजी रे बारे रे मैं जो आज्ञा गलातिया प्रदेशो री मण्डलिया खे देई राखी, तेसा ई आज्ञा खे तुसे वी मानेया करो।² अफते रे पईले दिने तुसा वीचा ते हर एक आपणी आऊँदणियां रे मुताबिक कुछ आपू गे राखी लया करो, ताकि मेरे आऊणे रे चंदा नि करना पड़ो।³ और जेबे आऊँ आऊँगा, तो जिना खे तुसे चाओगे, तिना खे आऊँ चिट्टिया देई की पेजी देऊँगा कि तुसा रा दान यरूशलेम नगरो रे पऊँछाई देओ।⁴ जे तुसा खे ठीक लगे कि आऊँ वी जाऊँ, तो सेयो मां साथे जाई सकोए।

XXXXXXXXXX XX XXXXXXXXXXXXXXXXXXXXXXX

⁵ मां मकिडुनिया प्रदेशो रा सफर पूरा करी की तुसा गे आऊणा। कऊँकि आऊँ मकिडुनिया जाणे वाला ए⁶ जे ऊई सकोगा तो मां तुसा रे एती कुछ बखतो तक रणा और शायद आऊँ ठण्ड तुसा गे ई बिताऊँ। इजी ते बाद मां जेती वी जाणा ओगा, तुसे लोक माखे तेती जाणे रा इन्तजाम करी देओ।⁷ कऊँकि आऊँ एबे बाटा रे तुसा साथे मिलणा नि चांदा, पर माखे उम्मीद ए कि प्रभु चाओगा तो कुछ बखतो तक तुसा साथे रऊँगा।⁸ पर मां पेन्तिकुस्तो रे त्योआरो तक इफिसुस नगरो रे रणा।⁹ कऊँकि माखे तेती एक बड़ा और कामो रा सेवा रा द्वार खुली रा और बिरोदी बऊत ए।

¹⁰ जेबे तीमुथियुस आओ तो एसा गल्ला रा त्यान राखणा कि तेसखे तुसा गे कोई चिन्ता नि ऊणी चाईयो, कऊँकि से मां जेड़ी प्रभुए री सेवा करोआ।¹¹ इजी री खातर कोई तेसखे तुच्छ नि जाणो। पर तेसखे शान्तिया साथे ओरे पऊँछाई देओ कि मांगे आयी जाओ। कऊँकि आऊँ तेसखे न्यालने लगी रा कि से विश्वासी पाईया साथे आओ।

¹² पाई अपुल्लोसो ते मैं बिनती करी राखी कि तुसा गे पाईया साथे जाओ। पर तिन तेस बखते जाणे री कोई इच्छा नि किती, पर जेबे मोका मिलोगा, से आयी जाणा।

???? ???? ? ? ?

13 जागदे रओ, विश्वासो रे पक्के रओ, निडर बणो, तागतबर ओ। 14 जो कुछ करोए, प्यारो रे करो।

15 ओ साथी विश्वासियो, तुसे स्तिफनासो रे कराने खे जाणोए कि सेयो अखाया प्रदेशो रे पईले फल थे और परमेशरो रे लोका री सेवा खे त्यार रओ थे। 16 तुसे लोक एडे अगुवो री आज्ञा खे मानो और तिना सबी लोका री बी मानो जो तिना साथे मईणत करोए। 17 आऊँ स्तिफनास, फूरतूनातुस और अखईकुसो रे आऊणे ते खुश ऊआ, कऊँकि तिने तुसा री कमी पूरी किती। 18 तिने मेरी और तुसा रे मनो री चिन्ता दूर करी ती। तुसे एडे लोका रा आदर करेया करो।

19 आसिया प्रदेशो री मण्डलिया री तरफा ते तुसा खे नमस्कार। अक्विला और तेसरी लाड़ी प्रिस्क्ल्ला रा और तिना री कअरो री मण्डलिया रा बी तुसा खे प्रभुए रे बऊत-बऊत नमस्कार। 20 सबी विश्वासी पाईया री तरफा ते तुसा खे नमस्कार, गले लगी की आपू बीचे नमस्कार करो।

21 मां पौलुसो रा आपणे आथो रा लिखेया रा नमस्कार। 22 जे कोई प्रभुए साथे प्यार नि राखो, तो से सरापित ए। ओ म्हारे प्रभु आओ। 23 प्रभु यीशु मसीहे री कृपा तुसा पाँदे ऊँदी रओ। 24 मेरा प्यार यीशु मसीहे रे तुसा सबी साथे रओ। आमीन्।

2 कुरिन्थियों

कुरिन्थ नगरो री विश्वासी मण्डलिया खे प्रेरित पौलुसो री दूजी चिट्ठी भूमिका

कुरिन्थियों रे नाओं पौलुस प्रेरितों री दूजी चिट्ठी पौलुस और कुरिन्थुसो री मण्डलिया बीचे जेबे कट्टर रिश्ते थे, तेस बखते लिखी थी। मण्डलिया रे कई सदस्ये पौलुसो रे खलाफ स्पष्ट रूपो रे गम्भीर आरोप लगाए थे, पर से मेल-मलापो री आपणी गईरी इच्छा खे दखाओआ और जेबे एड़ा ऊई जाओआ तेबे से आपणी बऊत जादा खुशिया खे प्रगट करोआ।

एसा चिट्ठिया रे पईले पाअगो रे पौलुस कुरिन्थुसो री मण्डलिया साथे आपणे रिश्ते रे बारे रे विचार करोआ और से तिना खे समजयाओआ कि तिने कऊँ मण्डलिया रे बेज्जती और बिरोद करने जेड़ा कटोर बताव कित्तेया और तेबे आपणी खुशिया खे प्रगट करोआ कि तेसरी कटोरता रा नतीजा पछतावा और मेल-मलाप ऊआ। तेबे से मण्डलिया ते, यहूदिया रे गरीब मसीहिया री खातर उदारता साथे दान देणे री प्रार्थना करोआ। आखरी रे पाठा रे पौलुस कुरिन्थुसो रे कई लोका रे खलाफ आपणी प्रेरताईया रा समर्थन करोआ, जिने आपणे-आपू खे सच्चा चले ऊणे रा दर्जा देईता था, जबकि सेयो पौलुसो पाँदे चूटा चले ऊणे रा आरोप लगाया करो थे।

??????

भूमिका 1:1-11

पौलुस और कुरिन्थुसो री कलीसिया 1:12-7:16

यहूदिया रे मसीहिया खे दान 8:1-9:15

पौलुसो रे जरिए प्रेरितों रे रूपो रे आपणे अक्को रा समर्थन 10:1-13:10

निचाड़ 13:11-14

??????

1 ये चिट्ठी पौलुस और आसा रा पाई तीमुथियुसो री तरफा ते ए। आँऊ पौलुस परमेशरो री इच्छा ते यीशु मसीह रा प्रेरित ए। ये चिट्ठी परमेशरो री तेसा मण्डलिया रे नाओं पाँदे लिखूआ जो कुरिन्थुस नगरो रे ए और परमेशरो रे सब पवित्तर लोका रे नाओं पाँदे जो सारे अखाया प्रदेशो रे रओए। 2 म्हारे पिता परमेशर और प्रभु यीशु मसीह री तरफा ते कृपा और शान्ति मिलदी रओ।

?????? ? ? ? ? ? ? ? ?

3 म्हारे प्रभु यीशु मसीह रे पिता परमेशरो रा धन्यवाद ओ। परमेशर दया रा पिता और सब प्रकारा री सुख-शान्ति देणे वाला ए। 4 परमेशर म्हारे सबी क्लेशो रे सुख-शान्ति देओआ ताकि आसे बी ओरी लोका खे तिना रे क्लेशा रे सेई सुख-शान्ति देई सकिए जो परमेशरो ते आसे पाई राखी। 5 कऊँकि जिंयाँ मसीह रे दुःखो रे आसे जादा सहभागी ओए, तिंयाँ ई आसे शान्तिया रे बी मसीह रे जरिए जादा सहभागी ओए। 6 जे आसे क्लेश पाऊँए, तो ये तुसा री शान्ति और उद्धारो खे ए और जे आसे शान्ति पाऊँए, तो ये तुसा री शान्तिया खे ए। जेतरे असरो ते तुसे सबरो साथे तिना क्लेशो खे सयी लओए, जिना खे आसे बी सऊँए। 7 और म्हारी उम्मीदा तुसा रे बारे रे पक्की ए, कऊँकि आसे जाणूँए कि जेडे तुसे म्हारे दुःखो रे सहभागी ए, तेडे ई तुसे आसा री शान्तिया रे बी सहभागी ऊणे।

8 ओ साथी विश्वासियो! आसे नि चांदे कि तुसे म्हारे तिना क्लेशो ते अणजाण रओ जो आसिया प्रदेशो रे आसा पाँदे पड़ेया कि एडे पारी बोजो ते दबी गे थे, जो म्हारे सईणे ते बी बारे था। एथो तक कि आसे आपणी जिन्दगिया ते जिऊणे री बी उम्मीद छाडी ती थी। 9 बल्कि आसे आपणे मनो रे समजी ला था कि आसा पाँदे मौता री सजा ऊई चुकी री। पर ये तेबे ऊआ ताकि आसे आपू पंदि नि,

पर तेस परमेशरो पाँदे विश्वास राखिए जो मेरे रेया खे जिऊँदा करोआ। ¹⁰तिने ई आसे एड़ी बड़ी मौता ते बचाए और बचाणे बीए। तेस पाँदे आसा री ये उम्मीद ए कि से आसा खे आगे बी बचांदा रणा। ¹¹जेड़ा कि तुसे बी आपणी प्रार्थना रे जरिए म्हारी मताद करोए कि जो बरदान बऊत लोका री प्रार्थना रे जरिए आसा खे मिलेया, तिजी री बजअ ते बऊत लोक म्हारी तरफा ते धन्यवाद करो।

~~~~~

<sup>12</sup>आसा खे इजी गल्ला पाँदे कमण्ड ए कि आसा रा विवेक साफ ए कि दुनिया रे और खास करी की तुसा बीचे म्हारा चाल-चलण परमेशरो जोगा, एड़ा पवित्तर और सच्चाईया साथे था, जो शरीरो रे ज्ञानो ते नि, बल्कि परमेशरो री कृपा साथे था। <sup>13</sup>आसे तुसा खे ओर कुछ नि लिखदे, बस सेई जो तुसे पढो या मानो बी ए। माखे उम्मीद ए कि एक दिन तुसा आँऊ पुरिया तरअ ते समजी लणा। <sup>14</sup>जेड़ा तुसा बीचा ते कितणे जणेया मानी ला रा कि आसे तुसा रे कमण्डो री बजअ ए तियाँ ई तुसे बी प्रभु यीशुए रे वापस आऊणे रे दिने आसा खे कमण्डो री बजअ ठईरने।

<sup>15</sup>और एस परोसे ते आऊँ चाऊँ था कि पईले तुसा गे आऊँ ताकि तुसा खे एक और दान मिलो। <sup>16</sup>मेरी सलाह थी कि आँऊ तुसा गिये ऊई कि मकिदुनिया प्रदेशो खे जाऊँ और फेर मकिदुनिया प्रदेशो ते तुसा गे आऊँ। तिजी ते बाद तुसे माखे सफरो रे जरूरी समान देई की यहूदिया प्रदेशो खे पेजो। <sup>17</sup>इजी री खातर मैं जो ये सोचेया था तो क्या मैं तिदे लापरवाई दखाई? या जो आँऊ करना चाऊँआ क्या से दुनिया रे लोका रे मुताबिक कऱूँआ कि एक ई बखतो री गल्ला दे आ-आ बी करदा रऊँ और ना-ना बी करदा रऊँ?

<sup>18</sup>जियाँ सच्ची ई परमेशर विश्वासो जोगा ए, तियाँ ई आसा री गल्ला रे बी "आ" रा मतलब आ और "ना" रा मतलब ना ई ओआ। <sup>19</sup>कऱूँकि परमेशरो रा पुत्र यीशु मसीह जेसरा प्रचार सिलवानुस, तीमुथियुस और मैं तुसा बीचे कित्तेया। तिदे आ और ना दोनो नि थे, बल्कि तिदे सदा आ और आ ई थी। <sup>20</sup>कऱूँकि परमेशरो री जितणिया बी प्रतिया ए, सेयो सब मसीह रे आ साथे ए, इजी बजअ ते तेस साथे आमीन बी ऊई ताकि म्हारी बजअ ते परमेशरो री महिमा ओ। <sup>21</sup>और जो आसा खे तुसा साथे मसीह रे पक्का करोआ और जिने आसा रा अभिषेक कित्तेया, सेई परमेशर ए। <sup>22</sup>जिने आसा पाँदे छाप बी करी ती री और बयाने रे आत्मा आसा रे मनो रे दिती।

<sup>23</sup>आऊँ परमेशरो खे गवा कऱूँआ कि आऊँ एबुए तक कुरिनथ नगरो रे इजी री खातर नि आया कऱूँकि आँऊ तुसा खे जो गलत काम तुसे करी राखे तिजी खे डांटणा नि चाऊँ था। <sup>24</sup>ये नि कि आसे विश्वासो रे बारे रे तुसा पाँदे अक्क जताणा चाऊँए, पर तुसा री खुशिया रे शामिल ए, कऱूँकि तुसे विश्वासो साथे ई खड़े रओए।

## 2

<sup>1</sup>मैं आपणे मनो रे ये ठाणी ला था कि एक बार फेर तुसा गे आई कि तुसा खे दुःख नि देऊँ। <sup>2</sup>कऱूँकि तेती आई कि जे आऊँ ई तुसा खे दुःखी कऱूँ तो माखे खुश करने वाला कुण ऊणा, बस सेई जो मैं दुःखी कित्तेया? <sup>3</sup>मैं तुसा खे ये गल्ल इजी खे लिखी ताकि एड़ा नि ओ कि मेरे आऊणे ते जिना ते माखे खुशी मिलणी चाईयो, आऊँ तिना ते दुःखी ऊई जाऊँ। कऱूँकि माखे तुसा सबी पाँदे एसा गल्ला रा विश्वास ए कि जो मेरी खुशी ए, सेई तुसा सबी री बी ए। <sup>4</sup>बड़े क्लेश और मनो रे कष्टो ते मैं आसू बाई-बाई कि से चिट्ठी तुसा खे लिखी थी। इजी री खातर नि कि तुसे उदास ऊई जाओ, बल्कि इजी री खातर कि तुसे तेस बड़े प्यारो खे जाणी लओ, जो माखे तुसा ते ए।

~~~~~

⁵जे किने दुःखी करी राखे, तो आऊँ ई नि बल्कि कुछ-कुछ तो तुसे सब लोक बी दुःखी करी राखे। आँऊ इजी रे बारे रे इजी ते जादा कुछ ओर नि बोलणा चाँदा। ⁶ये सजा जो तुसे विश्वासी पाईया बीचा ते तेसखे देई राखी काफी ए। ⁷इजी ते तो ये खरा ए कि तेसरा अपराध माफ करो और तेसखे शान्ति देओ। एड़ा नि ओ कि एड़ा माणू, निराशा रेई डूबी जाओ। ⁸इजी बजअ ते आऊँ तुसा ते बिनती कऱूँआ कि तेसखे आपणे प्यार-प्रमो रा सबूत देओ। ⁹कऱूँकि मैं इजी खे बी लिखेया था

ताकि तुसा खे परखुँ कि तुसे सब मेरी गल्ला खे मानणे खे त्यार ए कि नई। ¹⁰ जेसखे तुसे कुछ माफ करोए, तेसखे आऊँ बी माफ करूँआ। कऊँकि मैं बी जो कुछ माफ करी राखेया, जे माफ करी राखेया ओ, तो तुसा री बजअ ते मसीह री जगा पाँदे ऊई की माफ करी राखेया, ¹¹ ताकि शैतानो रा आसा पाँदे कोई दावो नि चलो। कऊँकि आसे तेसरी चाला ते अणजाण निए।

¹² जेबे आऊँ मसीह रा सुसमाचार सुनाणे खे त्रोआस नगरो रे आया और परभुए माखे सुसमाचार प्रचार करने खे मौका देईता। ¹³ तेबे मेरे मनो खे चैन नि मिलेया कऊँकि मैं आपणा विश्वासी पाई तीतुस नि देखेया। तेबेई मैं त्रोआस नगरो रे विश्वासी लोका ते बिदा ऊई की मकिदुनिया प्रदेशो खे तीतुसो खे टोलने वापस चली गा।

¹⁴ पर परमेशरो रा धन्यवाद ओ, कऊँकि मसीह री एकता री बजअ ते से आसा खे सदा आपू साथे चलाओआ और आसा के जय दलाओआ और आपणे ज्ञानो री खुशबू आसा रे जरिए हर जगा रे फैलांदा रओआ। ¹⁵ आसे परमेशरो खे मसीह री खुशबू जेड़े ए। जो सुसमाचार आसे प्रचार करी राखेया से चाए से उद्धार पाणे वाले ओ या नाश ऊणे वाले ओ सबी लोका खे एक खुशबू जेड़ा फैलणे लगी रा। ¹⁶ बऊत जणेया खे तो मरने जोगी मौता री बास और बऊत जणेया खे जिऊणे जोगी जिऊणे री खुशबू और पल्ला इना गल्ला जोगा कुण ए? ¹⁷ कऊँकि आसे तिना सबी जेड़े निए, जो परमेशरो रे वचनो रा प्रचार अमीर ऊणे खे करोए। पर मनो री सच्चाईया ते और परमेशरो री तरफा ते, परमेशरो खे आजीर जाणी की मसीह रे बोलोए।

3

¹ क्या आसे फेर आपणी बडयाईया करने लगे? या आसा खे कईया लोका जेड़े सपारीशा री चिट्ठिया तुसा गे ल्याऊणिया या तुसा ते लणियां ए? ² तुसे आपू ई आसा खे चिट्ठिया जेड़े ए जो आसा खे सपारिश करोए और तुसा खे सब मांण पछ्याणोए और पढोए। ³ ये सामणे ए कि तुसे मसीह री चिट्ठिया जेड़े ए, जो मसीह आसे रे जरिए लखाई। ये चिट्ठी स्याईया ते निए, बल्कि जिऊं दे परमेशरो री पवित्र आत्मा ते, पात्थरो री पट्टिया पाँदे नि, बल्कि दिलो रे मासो री पट्टिया पाँदे लिखी राखी।

⁴ आसे मसीह रे जरिए परमेशरो पाँदे एड़ा ई परोसा राखूँए। ⁵ आसे ये नि बोलदे कि आसा गे कुछ करने री काबलियत ए। पर म्हारी काबलियत परमेशरो री तरफा ते ए। ⁶ तिने आसे नई वाचा रा काम करने जोगे सेवक बणाए। ये वाचा लिखी रे बिधानो री नि बल्कि आत्मा री ए। कऊँकि बिधान मौता खे जन्म देओआ पर आत्मा जिन्दगी देओई।

⁷ जे मौता रा से बिधान, जेतेरे अक्षर पात्थरा पाँदे खणे थे, एथो तक तेजोमय ऊई की मूसे रे मुंओ पाँदले तेजो री बजअ ते जो कटदा बी जाओ था, इस्राएली तेसरे मुंओ पाँदे देखी नि सको थे। ⁸ तो आत्मा री वाचा ओर बी तेजोमय कऊँ नि ऊणी? ⁹ कऊँकि जेबे दोषी ठईराणे वाली वाचा तेजोमय थी, तो परमेशरो रे सामणे तर्मी ठईराणे वाली नई वाचा ओर बी तेजोमय कऊँ नि ऊणी? ¹⁰ सच तो ए कि जो तेजोमय था से बी तेसा नई वाचा रे तेजो री तुलना रे तेजोमय नि ठईरया। ¹¹ जेबे मूसे रा बिधान इतणी तेजोमय थी जो थोड़े ई बखतो खे थी तो नई वाचा रा तेज कितणा जादा ऊणा जो सदा खे ए?

¹² तो एड़ी उम्मीद राखी कि आसे इम्मता साथे बोलूँए। ¹³ आसे मूसे जेड़े नि, जिने आपणे मुंओ पाँदे पड़दा पाया था ताकि इस्राएली लोक तेस कटणे वाले तेजो रे अंतो खे नि देखो। ¹⁴ पर इस्राएली लोक बिना दमाको रे ऊईगे। आजो तक पुराणी वाचा खे पढ़दे बखते तिना रे दिलो पाँदे तेड़ा ई पड़दा पड़े रा रओआ। ये पड़दा सिर्फ मसीह पाँदे विश्वास करने तेई उठाया जाई सकोआ। ¹⁵ और आजो तक जेबे कदी मूसे री कताब पढ़ी जाओई, तो तिना रे दिलो पाँदे पड़दा पड़े रा रओआ और सेयो इजी खे पूरिया तरअ ते समजी नि सकदे। ¹⁶ पर जेबे कदी तिना रा दिल परभु यीशुए री

तरफा खे फिरना, तेबे से पड़दा उठी जाणा। 17 प्रभु और पवित्र आत्मा एक ईएँ और जेती केथी प्रभुएँ रा आत्मा ए, तेती बिधानो ते आजादी ए। 18 पर जेबे आसा सबी रे क्वाडे मुंओ पाँदो ते प्रभुएँ रा प्रताप ईयाँ सामणे आओआ, जिंयाँ शीशे रे, तो प्रभुएँ रे पवित्र आत्मा रे जरिएँ आसे तेसी तेजस्वी रूपो रे अंश-अंश करी की बदलदे जाऊँए।

4

?????????? ?? ?????????? ?? ??

1 तेबे जेबे आसा पाँदे परमेशरो री एड़ी दया ऊई कि आसा खे परमेशरो रा संदेश प्रचार करने री सेवा मिली, तो आसे इम्मत नि छाडदे। 2 पर आसे शरमा रे गुप्त काम छाडी ते। ना चलाकिया रे चलूँए और ना ई परमेशरो रे वचनो रे मिलाऊट करूँए। परमेशर आसा रा गवा ए कि आसे सिर्फ सच बोलूँए, जेते की ओर लोक ये पक्का जाणी लो कि आसे परोसे जोगे ए। 3 जे आसा रे सुसमाचारो पाँदे जो आसे प्रचार कित्तेया पड़दा पड़ी रा, तो ये नाश ऊणे वालेया खेई पड़ी रा। 4 और तिना अविश्वासिया खे, जिना रा दमाक एते दुनिया रे ईश्वर शैताने अन्दा करी ता रा ताकि मसीह जो परमेशरो रा रूप ए, तेसरे तेजोमय सुसमाचारो खे नि समजी सको। 5 आसे आपणे बारे रे प्रचार नि करदे। बल्कि यीशु मसीह रा प्रचार करूँए कि से प्रभु ए। आसे यीशुएँ री बजअ ते आपणे आपू खे तुसा लोका रे सेवक समजूँए। 6 तेबेई परमेशर बोलेया, “न्हरे बीचा ते जोति चमको,” और सेई आसा रे दिलो रे चमकेया ताकि परमेशरो री महिमा खे पछयाणी सको जो यीशु मसीह रे प्रकट ऊई री।

7 आसे माट्टिया रे पांडेया जेडे ए जिदे ये धन राखी राखेया। ताकि एसा गल्ला रा पता लगी जाओ कि ये बड़ी सामर्थ म्हारी तरफा ते नि, बल्कि परमेशरो री ई तरफा तेईएँ। 8 आसा खे चऊँ कनारो ते क्लेश तो ओआ, पर मुसीबता रे नि पड़दे। आसे कबराए रे तो आएँ, पर निराश नि ऊँदे। 9 सताएँ तो जाऊँए, पर छाडे नि जाँदे, रूडाएँ तो जाऊँए, पर नाश नि ऊँदे। 10 आसे हर बखत आपणे शरीरो रे यीशुएँ रे दुःख और मौता खे लयी की फिहूँए, ताकि यीशुएँ रा जीवन बी आसा रे शरीरो ते प्रकट ओ। 11 कऊँकि आसे जिऊँदे जिऊँए सदा यीशुएँ री बजअ ते मौता रे आथो रे सम्बाले जाऊँए ताकि यीशुएँ रा जीवन बी आसा रे मरने वाले शरीरो ते प्रकट ओ। 12 इजी बजअ ते मौत तो आसा पाँदे असर पाओई पर अनन्त जीवन तुसा पाँदे असर पाओआ।

13 पर आसे प्रचार करना जारी राखूँए कऊँकि आसा गे सेई विश्वास ए जो पवित्र शास्त्रो रे लिखी राखेया, “मैं परमेशरो पाँदे विश्वास कित्तेया, तेबेई मैं बोलेया।” 14 कऊँकि आसे जाणूँए कि परमेशर जिने प्रभु यीशुएँ खे मरे रेया बीचा ते जिऊँदा कित्तेया। तेस आसे बी यीशुएँ रे सहभागी जाणी कि जिऊँदे करने। तिजी ते बाद परमेशरो आसे तुसा साथे आपणे सामणे आजीर करने। 15 ये सब कुछ तुसा लोका री पलाईया खे ऊणे लगी रा, तेबेई जादा ते जादा लोका जाणी लणा कि परमेशर कितणा दयालु ए और तिना परमेशरो री तारीफ और धन्यवाद करना।

16 इजी री खातर आसे इम्मत नि छाडदे, हालाँकि आसा रा बारला रुप नाश बी ऊँदा जाओआ, तेबे बी आसा रा पीतरला रुप हर रोज नया ऊँदा जाओआ। 17 कऊँकि आसा रा दूँई कअडिया रा अलका जा क्लेश आसा खे बजत ई खास और अनन्त जीवनो री महिमा पैदा करोआ 18 और आसे देखी री चीजा खे नि, पर बिना देखी री चीजा खे देखदे रऊँए, कऊँकि देखी री चीजा तो थोडे ई दिनो खे ए, पर बिना देखी री चीजा सदा बणी री रओईया।

5

???? ?? ?????????? ?? ???

1 आसे जाणूँए कि तरतिया पाँदे आसा रा शरीर एक तम्बूएँ जेडा ए जिदे आसे रओएँ। पर जेबे आसा रा तरतिया पाँदला तम्बू सरिखा कअर टालेया जाणा, तो आसा खे परमेशरो री तरफा ते स्वर्गो पाँदे एडा भवन मिलणा, जो आथो साथे बणाएँ रा कअर नि, पर सदा खे बणेया रा ऊणा। 2 आसे एते शरीरो रे तरतिया पाँदे कणदे रऊँए और तेस स्वर्गो रे कअरो खे तारण करने री इच्छा करदे रऊँए।

3 जेबे आसा से स्वर्गिय शरीर पाई लणा तेबे आसे नांगे नि पाए जाणे । 4 और आसे एस तम्बू सरिखे शरीरो रे रंदे ऊए बोजो साथे दबे रे कणदे रऊँए, कऊँकि आसे संसारिक शरीर छाडे बिना तेस पाँदे स्वर्गिय शरीर पईनणा चाऊँए । ताकि जो मरनहार शरीर ए से अविनाशी शरीरो रे बदली जाओ 5 और परमेशर आपू ईए जिने आसे इजी गल्ला खेई त्यार करी राखे, और तिने आसा खे बयाने रे पवित्तर आत्मा बी देई राखेया । ये बयाना से वादा ए जो परमेशरो बादो ते पुरा करना ।

6 तो आसे सदा इम्मत बाने रे राखूँए और ये जाणूँए कि जेबे आसे शरीरो रे रऊँए, तद्दुओ तक प्रभुए ते लग ए । 7 जेबे आसे एबु बी एते दुनिया रे जिऊणे लगी रे तो आसे विश्वासो ते प्रभुए पीछे चलूँए न कि तेसखे देखी की । 8 इजी री खातर आसे इम्मत राखूँए और शरीरो ते लग ऊई की आसे मरने ते बाद प्रभुए साथे रणा ओर बी खरा समजूँए । 9 इजी बजअ ते आसा रे मनो री इच्छा ये कि चाए आसे तेस साथे स्वर्गो रे रईये, चाए आसे एसा तरतिया पाँदे रईये पर आसे तेसखे खरे लगदे रईये । 10 कऊँकि जरूरी ए कि आसा सबी रा आल मसीह रे न्याय आसणो रे सामणे खुली जाओ, ताकि हर एक माणू आपणे-आपणे खरे-बुरे कामो रा बदला, जो तिने शरीरो रे जरिए करी राखेया, पाओ ।

?????? ???? ???-???

11 तो प्रभुए रा डर मानी की आसे लोका खे सच्चो पाँदे विश्वास करने खे बिनती करूँए और परमेशर आसा खे पूरिया तरअ ते जाणोआ और मेरी ये उम्मीद ए कि तुसा री समजे बी आसे अच्छी तरअ जाणी ले रे कि आसे केडे लोक ए । 12 आसे तेबे बी आपणी बडयाईया तुसा सामणे नि करदे, बल्कि आसे आपणे बारे रे तुसा खे कमण्ड करने रा मौका देऊँए, ताकि तुसे तिना खे जवाब देई सको, जो मनो पाँदे निए, बल्कि दखाऊटी गल्ला पाँदे कमण्ड करोए । 13 जे आसे ओशा रे निए, तो परमेशरो री खातर, और जे ओशा रे, तो तुसा री पलाईया री खातर ए । 14 कऊँकि मसीह रा प्यार आसा खे मजबूर करी देओआ । आसा खे ये पक्का विश्वास ए कि मसीह सबी री खातर मरेया, तो आसे सब पुराणे जीवनों खे मरी गे । 15 और मसीह सबी री खातर इजी खे मरेया ताकि जो जिऊँदे ए, सेयो आगो खे आपणी खातर नि जियो, बल्कि तेसरी खातर, जो तिना री खातर मरेया और तेबे जिऊँदा ऊआ ।

???? ?? ?? ???????

16 तो आजो ते आसे केसी रा बी दुनिया रे मुताबिक न्याय नि करदे । आसे मसीह खे पईले दुनिया री नजरा ते देखेया, पर एबे आसे एडा नि करदे । 17 जे कोई मसीह रे विश्वास करोआ, तो से नई सृष्टि ए, पुराणिया गल्ला बीती गी रियां, देखो, सेयो सब नईया ऊईगी रिया । 18 ये सब गल्ला परमेशरो री तरफा ते ए, जिने मसीह रे जरिए आपू साथे आसा रा मेल-जोल करी ता और मेल-जोलो री सेवा आसा खे सम्बाली ती री । 19 मतलब-परमेशर मसीह रे ऊई की आपणा दुनिया साथे मेल-जोल करी ला और लोका रे पापो रा दोष, तिना पाँदे नि लगाया और परमेशर मेल-जोलो रा संदेश आसा गे सम्बाली ता रा । 20 आसे मसीह रे राजदूत ए, मानो परमेशर आसा रे जरिए लोका ते आपणा संदेश मानणे खे बिनती करने लगी रा । आसे मसीह री तरफा ते बिनती करूँए कि परमेशरो साथे मेल-जोल करी लो । 21 मसीह निष्पाप था, पर परमेशर आसा खे तेसते पापिए जेडा बर्ताव कितेया ताकि आसे मसीह रे ऊई की परमेशरो री धार्मिकता बणी जाऊँ ।

6

1 आसे परमेशरो साथे मिली की काम करने वाले ए और तुसा लोका ते ये बिनती करूँए कि परमेशरो री कृपा जो तुसा पाँदे ऊई, तिजी खे बेकार नि जाणे देओ । 2 कऊँकि पवित्तर शास्त्रो रे परमेशर बोलोआ,

“सई बखतो पाँदे मैं तुसा री प्रार्थना सुणी ली

और उद्धारो रे दिने मैं तुसा री मताद किती ।”

सुणो, एबु सई बखत ए, सुणो, एबु उद्दारो रा दिन ए।³ आसे केसी बी गल्ला रे टोकर खाणे रा कोई बी मोका नि देंदे, ताकि म्हारी सेवा पाँदे कोई दोष नि आओ।⁴ पर आसे हर बखतो रे हर तरअ ते आपणे बर्ताव रे जरिए ये साबित करूँए कि सच्ची आसे परमेशरो रे अच्छे सेवक ए। आसे सबरो साथे क्लेश सईन करने रे, गरीबिया रे, मुसीबता रे,⁵ कोड़े खाणे रे, कैद ऊणे रे, आल्ले-गोल्ले रे, मईणती रे, जागदे रणे रे, बअरत करने रे,⁶ पवित्तरता रे, ज्ञानो रे, सबरो रे, कृपा रे, पवित्तर आत्मा रे, सच्चे प्यारो रे,⁷ सच्चो रे वचनो रे, परमेशरो री सामर्था रे; आसा गो धार्मिकता रे अधियार ए जेते की आसे अमला बी करूँए और बचाव बी करूँए।⁸ आदर और निरादरो रे, बुरे नाओं और सुनामो रे, आसा खे कपट्टी समजेया जाओआ, तेवे बी आसे सच बोलूँए।⁹ कुछ लोक आसा खे अणजाण समजोए ए, तेवे बी कुछ लोक आसा खे जाणे-माणे रे समजोए ए, मरने वालेया जेडे ए, पर तेवे बी जिऊँदे ए, मार खाणे वालेया जेडे ए, पर प्राणो ते मारे नि जाँदे।¹⁰ शोग करने वालेया जेडे ए, पर सदा खुशी मनाऊँए, आसे आपू कंगाल ए, पर बऊत जणेया खे आत्मिकता दे अमीर बनाई देऊँए, आसे एडे ए, जेड़ा आसा गो कुछ निए तेवे बी सब कुछ राखोए।

¹¹ ओ कुरिन्थियों रे विश्वासियो, आसे खुली कि तुसा साथे गल्ला करी राखिया, आसे तुसा ते खुले दिलो साथे प्यार कितेया।¹² तुसा री तई म्हारे मनो रे कोई शक निए, पर तुसा रे मनो रेई आसा खे शक ए।¹³ पर आपणे बाल-बच्चे जाणी की तुसा खे बोलूँआ कि तुसे बी तिजी रे बदले आसा साथे प्यार राखो।

~~~~~

<sup>14</sup> अविश्वासिया साथे लग जुँगडे रे नि जुड़ो, कऊँकि धार्मिकता और पापो रा क्या मेल-जोल या जोति और न्हरे री कियाँ दोस्ती ऊई सकाई? <sup>15</sup> और मसीह रा शैतानो साथे क्या लगाव! या विश्वासियो साथे अविश्वासिया रा क्या नाता? <sup>16</sup> और मूर्तिया साथे परमेशरो रे मन्दरो रा क्या सलबंद? कऊँकि आसे तो जिऊँदे परमेशरो रा मन्दर ए, जेड़ा परमेशरे पवित्तर शास्त्रो रे बोली राखेया,

“मां तिना लोका साथे रणा और तिना रे चलेया फिरेया करना;  
और आऊँ तिना रा परमेशर ऊणा और सेयो मेरे माणू ऊणे।”

<sup>17</sup> इजी री खातर प्रभु बोलोआ,  
“अविश्वासिया बीचा ते निकलो  
और लग रओ;  
और अशुद्ध चीजा खे नि छूँओ,  
तो मां तुसे अपनाणे।

<sup>18</sup> आऊँ तुसा रा पिता ऊणा  
और तुसे मेरे माठे-बेटिया ऊणे।  
ये सर्वशक्तिमान् प्रभु परमेशरो रा वचन ए।”

## 7

<sup>1</sup> तो ओ प्यारेओ! जबकि आसा खे यो वादे मिली रे, तो आओ, आसे आपणे आपू खे शरीर और आत्मा रे सब मईलो ते साफ करूँए और परमेशरो रा डर और आदर करदे ऊए, पवित्तरता री भरपूरिया तक पऊँछणे री कोशिश करदे रऊँए।

~~~~~

² आसा खे आपणे दिलो रे जगा देओ। आसे ना तो केसी साथे अन्याय कितेया, ना कोई बिगाडेया और ना ई कोई टगेया।³ आऊँ तुसा पाँदे दोष लगाणे खे नि लगी रा बोलणे, कऊँकि आऊँ पईले ई बोली चुकेया रा कि तुसे म्हारे दिलो रे एडे वसी चुके रे कि आसे तुसा साथे मरने-जिऊणे खे त्यार ए।⁴ माखे तुसा पाँदे बऊत परोसा ए और आऊँ तुसा पाँदे बड़ा कमण्ड करूँआ। आऊँ शान्तिया साथे परी गा रा, सारे क्लेशा रे आऊँ बडे मजे ते रऊँआ।

5 जेबे आसे त्रोआस नगरो खे छाडी की मकिदुनिया प्रदेशो रे आए, तेबे बी आसा रे शरीरो खे चैन नि मिलेया, बल्कि आसा खे चऊँ कनारे ते क्लेश मिलो था, बारे लड़ाईया थिया, पीतरे डरो रिया गल्ला थिया। 6 तेबे बी निराश लोका खे सुख-शान्ति देणे वाले परमेशरे तीतुसो रे आऊणे ते आसा खे शान्ति दिती। 7 और बस तेसरे ई आऊणे तेई नि, बल्कि तेसरी तेसा शान्तिया ते बी, जो तेसखे तुसा री तरफा ते मिली थी और तिने तुसा री इच्छा, तुसा रे दुःख, और मरिया तई तुसा री धुना रा समाचार आसा गे सुणाया, जेते की माखे ओर बी खुशी ऊई।

8 हालाँकि मैं तुसे लोक आपणी तेसा चिट्ठिया ते दुःखी कित्ते, तेबे बी माखे तिजी ते पछतावा निया। जेड़ा कि पईले पछताऊँ था, कऊँकि आऊँ देखूँआ कि तिजी चिट्ठिया साथे तुसा खे दुःख तो ऊआ, पर से थोड़ी देरा खे था। 9 एबे आऊँ खुश ए। पर इजी री खातर नि कि तुसा खे दुःख ऊआ, बल्कि इजी री खातर कि तुसे तेस दुःखो री बजअ ते मन फिराया। तुसा रा दुःख परमेशरो री इच्छा रे मुताबिक था, ताकि म्हारी तरफा ते तुसा खे कोई नुकशान नि पऊँछो। 10 से दुःख जो परमेशरो री भक्तिया री तरफा ते आओआ, तिजी रा नतीजा मन फिराणा और उद्धार ओआ और एस दुःखो ते पछताणा नि पड़दा। बल्कि दुनिया रे लोका रा दुःख सदा री मौत पैदा करोआ। 11 त्यान देओ कि परमेशरो री भक्तिया री बजअ ते आये रे दुःखे तुसे पूरिया तरअ ते बदली ते। तिने तुसा रे उत्साह, आपू खे बेकसुर साबित करने री इच्छा, अन्याय रे खलाफ गुस्सा, मुसीबता रे बखते एड़ी चौकसी, माते मिलणे री एड़ी इच्छा, सेवा रिया तई एड़ी धुन और दुराचारिए खे दण्ड देणे रा बिचार पैदा कित्तेया। तुसे सबी प्रकारा ते ये सिद्ध करी की दखाई ता कि तुसे इना गल्ला ते निर्दोष ए। 12 तेबे मैं जो तुसा गे चिट्ठी लिखी थी, से ना तो तिजी बजअ ते लिखी, जिने अन्याय कित्तेया और ना ई तेसरी बजअ ते जेस पाँदे अन्याय कित्तेया, बल्कि इजी री खातर कि तुसा रा उत्साह, जो आसा री खातर ए, से परमेशरो सामणे तुसा पाँदे प्रगट ओ। 13 इजी ते आसा खे औसला मिलेया।

म्हारे एस औसले साथे तीतुसो री खुशिया री बजअ ते ओर बी खुशी ऊई, कऊँकि तेसरा जिऊ तुसा सबी री बजअ ते अरा-परा ऊईगा रा। 14 कऊँकि जे मैं तेस सामणे तुसा रे बारे रे कुछ कमण्ड दखाया, तो शर्मिदा नि ऊआ, पर जियाँ ई आसे तुसा गे सब गल्ला सच-सच बोलिया, तियाँ ई म्हारा कमण्ड दखाणा तीतुसो सामणे सच ऊआ। 15 और जेबे तेसखे तुसा सबी रे आज्ञाकारी ऊणे री याद आओई कि कियाँ तुसे डरदे और थरथरादे ऊए तेसरा स्वागत कित्तेया, तो तेसरा प्यार तुसा खे ओर बी बड़दा जाओआ। 16 आऊँ एबे बऊत खुश ए कऊँकि माखे तुसा पाँदे पूरा परोसा ए।

8

1 एबे ओ साथी विश्वासियो! आसे तुसा खे परमेशरो री तेसा कृपा रा समाचार देऊँए, जो मकिदुनिया प्रदेशो री विश्वासी मण्डलिया रे ऊई री। 2 जेबे बऊत मुसीबता रे जरिए तिना री परीक्षा ऊई, तेबे तिने तिदे बी बड़ी खुशी मनाई और बेशक सेयो बड़े पारी गरीब थे तेबे बी तिने दूजे विश्वासिया री खुले दिलो पैसेया साथे मताद किती। 3 और तिना रे बारे रे मेरी ये गवाई ए कि तिने आपणी सामर्था ते, बल्कि आपणी सामर्था ते बी जादा आपणी इच्छा ते मताद किती। 4 तिने आपू ई आसा ते बार-बार बिनती किती कि यरूशलेम नगरो रे विश्वासिया री मताद करने खे आसा खे मौका मिलो। 5 और जेड़ी आसे उम्मीद किती थी, तेड़ी ई नि, बल्कि तिने सबी ते पईले आपणे आपू खे प्रभुए री सेवा करने खे देईता। तिजी ते बाद तिने आपणे आपू खे परमेशरो री इच्छा रे मुताबिक आसा खे देईता। 6 इजी री खातर आसे तीतुस समजयाया कि जेड़ा तिने पईले शुरूओ रे कित्तेया था, तेड़ा ई तुसा बीच बी एस दानो रे कामो खे पूरा बी करी लो। 7 तो जेड़ा तुसे हर गल्ला रे मतलब-विश्वास, वचन, ज्ञान और सब प्रकारा री कोशिश रे और तेस प्यारो रे, जो आसा साथे राखोए, बड़दे जाओए, तेड़ा ई गरीब विश्वासिया खे दान देणे रे बी बड़दे जाओ।

8 आऊँ आज्ञा री रीतिया पाँदे नि, पर ओरी री खुशिया ते तुसा रे प्यारो री सच्चाई परखणे खे बोलूँआ। 9 तुसे म्हारे परभु यीशुए मसीह री कृपा जाणोए कि से अमीर ऊई की बी तुसा री तँई कंगाल बणीगा ताकि तेसरे कंगाल ऊणे ते तुसे अमीर बणी जाओ।

10 सबी ते पईले सिर्फ तुसे लोके ई पिछले साल जो दान देणे रा काम शुरू कितेया और जेतेरी योजना तुसे आपू ई बणाई थी। ये तुसा खे अच्छा ए और एसा गल्ला रे आऊँ ये सलाह देऊँआ। 11 कि एबे एस कामो खे पूरा करो जो तुसे शुरू कितेया था। जेड़ी तुसा री इच्छा गरीब विश्वासिया री मताद करने खे पईले थी, तेडी ई एबे बी आपणी-आपणी सम्पतिया रे मुताबिक पूरी बी करो। 12 कऊँकि जे मनो री त्यारी ओ तो दान तेते मुताबिक लया जाओआ, जो तेसगे अया, ना कि तेते मुताबिक जो तेसगे अया नि।

13 आऊँ ये नि चांदा कि ओरी री पलाई करने री बजअ ते तुसा खे कष्ट ओ। पर सबी खे एक जेड़ा मिलणा चाईयो 14 पर बराबरिया रे बिचारो ते एस बखते तुसा री बड़दी तिना री कटिया रे कामे आओ, ताकि तिना री बड़दी बी तुसा री कटिया रे कामे आओ कि बराबरी ऊई जाओ। 15 जेड़ा पवित्र शास्तरो रे लिखी राखेया, “जिने बऊत कटटा कितेया तेसरा कुछ जादा नि निकलेया और जिने थोड़ा कटटा कितेया तेसरा तिजी तेई गुजारा ऊईगा।”

~~~~~

16 परमेशरो रा धन्यवाद ओ, जिने तुसा री खातर सेई उत्साह तीतुसो रे दिलो रे पाईता रा जो मांदे था। 17 जेबे आसे तीतुसो खे तुसा गे जाणे खे बिनती किती तेबे तिने म्हारी गल्ल मानी ली। बल्कि बऊत उत्साही ऊई कि से आपणी इच्छा ते तुसा गे आऊणे लगी रा। 18 और आसे तेस साथे एक ओर विश्वासी पाई पेजणे लगी रे जेसरा नाओ सुसमाचार फैलाणे रे बारे रे सबी मण्डलिया रे फैली गा रा। 19 और इतणा ई नि, पर से मण्डलिया ते ठईराया बी गया कि एस दानो रे कामो खे आसा साथे जाओ और आसे ये सेवा इजी री खातर करूँए ताकि परभुए री महिमा ओ और म्हारे मनो री त्यारी मताद करने खे सामणे आयी जाओ। 20 आसे एसा गल्ला रे चौकस रऊँए कि साथी विश्वासिये खे तीतुसो साथे पेजी की एस उदारता ते दित्ते रे दानो रे बारे रे, जेसरी सेवा आसे करूँए, कोई आसा पाँदे दोष नि लगाई सको। 21 कऊँकि जो गल्ला बस परभुए रेई नेडे निए, बल्कि माणूआ रे नेडे बी खरी ए, आसे तिना री चिन्ता करूँए। 22 इना दूँई साथे आसे आपणा एक ओर विश्वासी पाई पेजणे लगी रे। जो आसे बार-बार परखी कि बऊत गल्ला रे खुश पाया। पर एबे तुसा पाँदे तेसखे बऊत विश्वास ए, इजी बजअ ते से ओर बी जादा खुश ए। 23 जे कोई तीतुसो रे बारे रे पूछो, तो से मेरा साथी, तुसा खे मेरा सहकर्मी और जे म्हारे विश्वासी पाईया रे बारे रे पूछो, तो सेयो मण्डलिया रे पेजे रे और मसीह री महिमा करोए। 24 तो आपणा प्यार और आसा रा से कमण्ड जो तुसा रे बारे रे ए मण्डलिया रे सामणे तिना खे सिद्ध करी की बताओ।

## 9

~~~~~

1 यरूशलेमो री मण्डलिया रे विश्वासिया खे पैसेया साथे मताद करने री सेवा रे बारे रे माखे तुसा लोका खे लिखणा जरूरी निए। 2 कऊँकि आऊँ तुसा रे मनो री त्यारिया खे जाणूँआ, जेतेरी बजअ ते आऊँ तुसा रे बारे रे मकिदुनिया प्रदेशो रे लोका रे सामणे कमण्ड दखाऊँआ कि तुसे कुरन्थी लोक अखाया प्रदेशो रे एकी सालो ते त्यार ऊई रे और तुसा रे उत्साहे ओर बी बऊत उभारी राखे। 3 पर आऊँ तीतुस और दो पाईया खे तुसा गे इजी खे पेजणे लगी रा कि आसे जो कमण्ड तुसा रे बारे रे दखाया, से एसा गल्ला रे बेकार नि ठईरो, पर जेड़ा मैं बोलेया, तेडे ई तुसे यरूशलेमो रे विश्वासिया खे पैसे देणे खे त्यार रओ। 4 एडा नि ओ कि जे कोई मकिदुनीवासी मां साथे आओ और तुसा खे त्यार नि पाओ, तो क्या पता एस परसे री बजअ ते जो आसा खे तुसा पाँदे ए शर्मिदा ऊणा पड़ो। पर तुसा खे ओर बी जादा शर्मिदा ऊणा पड़ना। 5 इजी री खातर मैं विश्वासी पाईया ते ये बिनती करना

जरूरी समजेया कि सेयो पईले तेई तुसा गे जाओ और तुसा री उदारता रा फल जेतेरे बारे रे पईले तेई वचन दिन्तेया था, त्यार करी की राखो कि ये दबाओ ते नि पर उदारता रे फलो जेड़ा त्यार ओ।

????? ???? ???? ???? ???? ?

6 पर गल्ल तो ये कि जो थोड़ा बीजोआ, तेस थोड़ा ई बाडणा बी और जो बऊत बीजोआ, तेस बऊत बाडणा। 7 हर एक जणा जेड़ा मनो रे टाणो तेड़ा ई दान करो, ना कि कुड़कुड़ाई की और ना दबाओ ते, कऊँकि परमेशर खुशिया ते देणे वालेया साथे प्यार राखोआ। 8 और परमेशर सब परकारो री कृपा तुसा खे बऊत जादा देई सकोआ। जेते साथे हर गल्ला रे और हर बखते, सब कुछ, जो तुसा खे जरूरी ए, तुसा गे रओ और हर एक खरे कामो खे तुसा गे बऊत कुछ ओ। 9 जेड़ा पवित्र शास्त्रो रे लिखी राखेया,

“परमेशर खुले दिलो ते कंगाला खे दान देओआ,

तेसरा तर्म सदा बणेया रा रणा।”

10 परमेशर ईए जो जिम्मीदारो खे बाणे खे बीजो रा और खाणे खे रोटिया रा इन्तजाम करोआ। तेस तुसा खे बी इन्तजाम करना और तुसे फलवंत करने, ताकि तुसे जरूरतमंद लोका खे खुले दिलो ते मताद करी सको। 11 तुसे लोक हर प्रकारा री आशीषा ते भरपूर ऊई जाणे। जेबे आसा तुसा रा दान बाँडणा तो बऊत सारे लोका परमेशरो रा धन्यवाद करना।

12 ये सेवा पूरी करने ते, ना बस विश्वासी लोका रिया कमिया पूरिया ओईया, बल्कि तिना री तरफा ते परमेशरो रा बऊत धन्यवाद ओआ। 13 कऊँकि दान देई की ओरी खे मताद करने री सेवा खे सबूत मानी की परमेशरो री महिमा सामणे आओई कि तुसे मसीह रा सुसमाचार मानी की तेसरे अधीन रओए और तिना री और सबी री मताद करने रे उदारता दखाओए। 14 सेयो तुसा खे परमेशरो ते प्रार्थना करोए और तुसा खे देखणे री इच्छा करोए। कऊँकि परमेशरे तिना खे आशीष देणे रे तुसा लोका रा इस्तेमाल करी राखेया। 15 परमेशरो रा तेसरे तेस दानो खे जो कईणे ते बारे ए, धन्यवाद ओ।

10

????? ? ? ? ? ? ? ?

1 आऊँ पौलुस तुसा खे मसीह री नमरता और नरमाईया साथे मेरी गल्ला सुणने खे विनती करूँआ। माखे तुसा बीचे आजीर ऊणे पाँदे बोलणे रे डरपोक और पीठी पीछे नडरा समजेया जाओआ। 2 आऊँ ये विनती करूँआ कि जेबे आऊँ तेती तुसा गे आऊँ तो माखे तिना लोका खे जो ये सोचोए कि आसे दुनिया रे लोका रे मुताबिक चलणे वाले ए, से सखतयाई माखे दखाणी ना पड़ो जेतेरी मांते उम्मीद किती जाओई। 3 हालाँकि आसे दुनिया रे चलूँ-फिरूँ, तेबे बी दुनिया रे लोका जेड़े आसे दुश्मणा ते नि लड़दे। 4 कऊँकि म्हारी लड़ाईया रे अधियार दुनिया जेड़े निए, पर दुश्मणा रे गढ़ो खे टालने खे परमेशरो रे सामर्थी अधियार ए। 5 तो आसे ख्यालो खे और हर एक ऊच्चि गल्ला खे, जो परमेशरो री पछयाणी रे विरोदो रे ऊटोई, खण्डन करूँए; और हर एकी इच्छा खे कैद करी की मसीह रा आज्ञाकारी बणाई देऊँए। 6 और जेबे तुसे मसीह री आज्ञा पूरिया तरअ ते मानणे लगी जाओ, तो आसे हर एक तरअ री आज्ञा ना मानणे वालेया खे सजा देणे खे त्यार ए।

7 तुसे इना ई गल्ला खेई देखोए, जो आखी रे सामणे ए, जे केसी रा आपू पाँदे ये विश्वास ओ कि आऊँ मसीह राए, तो से ये बी जाणी लो कि जेड़ा से मसीह राए, तेड़े ई आसे बी मसीह रे ए। 8 कऊँकि जे आऊँ तेस अक्को रे बारे रे ओर बी कमण्ड दखाऊँ, जो प्रभुए तुसा रे विश्वासो खे नाश करने खे नि, पर तुसा रे विश्वासो खे बड़ाणे खे आसा गे देई राखेया, तो आऊँ शर्मिदा नि ऊणा। 9 ये आऊँ इजी री खातर बोलूँआ कि चिट्ठिया रे जरिए तुसा खे डराणे वाला नि ठईरूँ। 10 कऊँकि तुसा बीचा ते कुछ लोक बोलोए, “तेसरी चिट्ठिया तो दमदार और असरदार ए; पर जेबे देखोए तो से शरीरो रा कमजोर और बोलणे रे अलका जाणोआ।” 11 तो जो लोक एड़ा बोलोआ, से ये समजी लो कि जेड़ा पीठी पीछे चिट्ठिया रे म्हारे वचन ए, तेड़ा ई तुसा रे सामणे म्हारे काम बी ऊणे।

12 कऊँकि आसा रे ये इम्मत नि ए कि आसे आपणे आपू खे तिना बीचा ते एड़े कितणेया साथे गिणिये या तिना साथे आपू खे मलाईये, जो आपणी तारीफ आपू करोए और आपू खे आपू बीचे नापी-तोली की एकी दूजे साथे मिली की मूर्ख ठराओए। 13 आसे तो कामो री सीमा ते बारे कदी बी कमण्ड नि करदे, पर तेसा ई सीमा तक जो परमेशरे आसा री तँई ठराई राखी और तिदे तुसे बी आईगे रे और तिजी रे मुताबिक कमण्ड बी करूँगे। 14 कऊँकि आसे आपणे कामो री सीमा ते बारे आपू खे बड़ाणा नि चाँदे, जेड़ा कि तुसा तक पऊँछणे री दशा रे ऊँदा। आसे तुसा खे मसीह रा सुसमाचार सुनाणे खे सबी बाटा रिये ऊँदे ऊए कुरिन्थ नगरो रा सफर करने वाले पईले माणू थे। 15 और आसे सीमा ते बारे ओरी री मईणता पाँदे कमण्ड नि करदे, पर आसा खे उम्मीद ए कि जियाँ-जियाँ तुसा रा विश्वास बड़दा जाणा, तियाँ-तियाँ आसे आपणी सीमा रे मुताबिक तुसा री बजअ ते ओर बी लोका तक पऊँछदे जाणे, 16 ताकि आसे तुसा री सीमा ते आगे बड़ी की दूर-दूर जगा रे बी सुसमाचार सुणाईए। कऊँकि ये नि ए कि आसे ओरी री सीमा रे पीतरे वणे-वणाए कामो पाँदे कमण्ड करि ए। 17 जेड़ा कि पवित्तर शास्त्र बोलोआ, “जो कमण्ड करो, से सिर्फ प्रभुए पाँदे कमण्ड करो।” 18 कऊँकि जो आपणी तारीफ करोआ, से नि, बल्कि जेसरी तारीफ प्रभु करोआ, सेई ग्रहण कित्तेया जाओआ।

11

XXXXXXXXXXXXXXXXXXXX

1 तुसे ओरी लोका री जो आपणे बारे रे खरिया गल्ला बोलोए तिना खे सईन करी लओए। आँऊ बी ये उम्मीद करूँआ कि तुसे मेरी बी थोड़ी जी मूर्खता सईन करी लओ। 2 जियाँ परमेशर त्यान राखोआ तियाँ ई आऊँ तुसा रे बारे रे चिन्ता करूँआ। तुसे एक पवित्तर कुआँरिया जेड़े ए जो मैं एकलौते लाड़े यीशु मसीह खे देणे खे चुणी राखे। 3 पर आऊँ डरूँआ कि जेड़े शैताने सापो रे रूपो रे पईली जवाणस हव्वा बईकाई, तेड़े ई तुसा रे मन तेसा सिधाईया और पवित्तरता ते जो मसीह साथे ऊणी चाईयो, केथी प्रष्ट नि करे जाओ। 4 जे कोई तुसा गे आयी की केसी दूजे यीशुए रा प्रचार करो, जेतेरा प्रचार आसे नि कित्तेया; या कोई और ई आत्मा तुसा खे मिली जाओ, जो पईले नि मिलेया था; या और ई कोई सुसमाचार सुणाओ जो तुसे पईले नि मानी राखेया ओ, तो तुसा रा इना शिक्षा खे मानणा गलत ए।

5 आऊँ तो समजूँआ कि आऊँ किजी बी गल्ला रे तिना ते जो आपणे आपू खे बड़ा प्रेरित समजोए कम निया। 6 जे आऊँ बोलणे दे अनाड़ी ए, फेर बी माखे मसीह और सुसमाचारो रे बारे रे ज्ञान ए। आसे इजी रा सबूत हर प्रकारा री गल्ला दे सिखाणे रे जरिए देईता रा। 7 क्या इदे मैं कुछ पाप करेया कि मैं तुसा खे परमेशरो रा सुसमाचार मुफ्त सुणाया और आपणे आपू खे नीच करेया, ताकि तुसे ऊच्चे ऊई जाओ? 8 तुसा लोका री मुफ्तो रे सेवा करने खे मैं ओरी मण्डलिया ते आपणा जीवन चलाणे खे दान लया तुसे एड़ा नि बोलो कि मैं सेयो लुटिते। 9 जेवे आँऊ तुसा साथे था और माखे पैसेया री जरूरत ऊई, तो मैं केसी पाँदे पाअर नि दित्तेया। कऊँकि विश्वासी पाईए मकिदुनिया प्रदेशो ते आयी कि मेरी पैसेया री जरूरत पूरी किती। मैं हर गल्ला रे आपू खे तुसा पाँदे पाअर ऊणे ते रोकेया और रोकेया रा राखूँगा। 10 जे मसीह री सच्चाई माँदे आए, तो अखाया प्रदेशो रे कोई माखे इजी पाँदे कमण्ड करने ते नि रोकी सकदा। 11 मैं तुसा रे पैसे कऊँ नि लये? क्या इजी खे कि आऊँ तुसा खे प्यार नि करदा? परमेशर ये जाणोआ कि आऊँ प्यार राखूँआ।

12 पर जो आऊँ करूँआ, सेई करदा रणा ताकि जो लोक मोका टोलोए, तिना खे मां मोका नि देणा, ताकि सेयो तिना कामा रे कमण्ड नि करो, कि तिना रा काम आसा जेड़ा ईए। 13 कऊँकि एड़े लोक चूटे प्रेरित, तोखे साथे काम करने वाले और मसीह रे प्रेरित ऊणे रा ढोंग करोए। 14 और ये कुछ अचम्बे री गल्ल नि ए कऊँकि शैतान आपू बी ज्योतिर्मय स्वर्गदूत ऊणे रा ढोंग करोआ। 15 तो जे शैतानो रे सेवक बी तर्मी सेवको जेड़े ऊणे रा ढोंग करोए, तो कोई बड़ी गल्ल नि ए, पर तिना रा अंत तिना रे कामो रे मुताबिक ऊणा।

XXXXXXXXXX XX XXXX XX XXXXXXXX XX XX:XXXXX

16 आऊँ फेर बोलूँआ कि कोई माखे मूर्ख नि समजो। पर जे तुसे आऊँ एड़ा मानी ला रा तो माखे मूर्ख ई समजी की सईन करी लो, ताकि आऊँ बी थोड़ा जा कमण्ड करूँ। 17 इजी रे बारे रे आऊँ जो कुछ बोलूँआ से प्रभुए री आज्ञा रे मुताबिक निए, पर न समजो रे मुताबिक नशंग कमण्डो ते बोलूँआ। 18 जबकि बऊत लोक दुनिया रे लोका रे मुताबिक कमण्ड करोए, तो मां बी कमण्ड करना। 19 तुसे तो समजदार ऊई की खुशिया साथे मुखां री सईन करी लओए। 20 कऊँकि जेबे तुसा खे कोई दास बणाई लओआ या तुसा गे जो कुछ बी ओ से बी लई लओआ, या तोखा देई की फाईदा लई लओआ, या आपणे आपू खे तुसा ते बड़ा बणाई देओआ, या तुसा रे मुंओ पँदि थप्पड़ बाओआ, तो तुसे सयी लओए। 21 शायद माखे शर्मिदा ऊणा चाईयो कि माखे तुसा लोका साथे एड़ा बर्ताव करने री इम्मत नि ऊई।

पर जेसा केसी गल्ला रे कोई कमण्ड करोआ आऊँ मूर्खताईया रे बोलणे लगी रा कि आऊँ बी कमण्ड करी सकूँआ। 22 क्या सेयो ई इबरानी ए? आऊँ बी ए। क्या सेयो ई इस्राएली ए? आऊँ बी ए। क्या सेयो ई अब्राहमो रे वंशो रे ए? आऊँ बी ए। 23 क्या सेयो ई मसीह रे सेवक ए? आऊँ पागलो जेड़ा बोलूँआ, पर आऊँ तिना ते केथी बढी की सेवक ए। मैं तिना ते केथी जादा मईणत करी राखी, तिना ते जादा आऊँ बार-बार जेला रे गया, कई बार कोड़े खाई राखे, जादातर मेरे ई प्राण मुसीबता रे पड़ी रे। 24 पाँज बार मैं यहूदी अगुवे रे आथो साथे ऊँताली-ऊँताली कोड़े खाए। 25 तीन बार मैं डण्डे खाए, एक बार मां पँदि पात्थर बाए, तीन बार जाहूजो रे जिना पँदि आऊँ चढेया था, टूटी गे, एक दिन और एक रात मैं समुद्रो रे बिताया। 26 आऊँ बार-बार सफरो रे, नदिया रे खतरेया रे, डाकूआ रे खतरेया रे, आपणी जाति वालेया रे खतरेया रे, दूजी जातिया रे खतरेया ते, नगरो रे खतरेया रे, सुणसाण जगा रे खतरेया रे, समुद्रो रे खतरेया रे, चूटे विश्वासी पाईया बीचे खतरेया रे रया। 27 मैं सख्त मईणत किती और बऊत राती जागदे ऊए बिताई। माखे बार-बार खाणे खे रोटी नि मिली। पूख-त्याय, सेला और टालेया री कमी इना सवी तकलीफा खे सईन करदा रया। 28 और ओरी गल्ला खे छाडी की जिना रे बारे रे आऊँ नि बतांदा, सवी मण्डलिया री चिन्ता माखे हर रोज दबाओ थी। 29 जेबे कोई कमजोर ओआ तो आऊँ बी कमजोरी महसूस करूँआ। जेबे कोई पापो रे पड़ोआ तो मेरा जिऊ बऊत दुःखी ओआ।

30 जे कमण्ड करना जरूरी ए, तो मां आपणी कमजोरिया री गल्ला पँदि करना। 31 प्रभु यीशु मसीह रा पिता परमेश्वर जो सदा धन्य ए, जाणोआ कि आऊँ चूट नि बोलदा। 32 जेबे आऊँ दमिश्क नगरो रे था तो अरितास राजे रे राज्यपाले माखे पकड़ने खे दमिश्क नगरो रे पईरा बठयाली ता 33 और आऊँ टोकरिया रे दवारिया ते ऊई की पीतो पँदा ते त्वारेया और तेसरे आथो ते बची की निकली गा।

12

XXXXXXXXXX XX XXXX XXXXXX XX XXXXXXX

1 त्वालिया देणे ते कुछ बी फाईदा निए, तेबे बी माखे एड़ा करना पड़ोआ। आऊँ प्रभुए रे दित्ते रे दर्शन और परकाशनो री चर्चा करूँगा। 2 आऊँ चौदा साल पईले स्वर्गो रे चकी ता। चाए आऊँ आपणे शरीरो रे या आपणे शरीरो रे बारे था आऊँ नि जाणदा परमेश्वर ई जाणोआ। 3 आ, सिर्फ परमेश्वर ई जाणोआ कि आऊँ शरीरो रे था या शरीरो ते बारे था। पर आऊँ जाणूँआ 4 कि आऊँ स्वर्ग रे चकी ला था। मैं तेती एडिया नौखिया गल्ला सुणिया जिना खे शब्दा रे जरिए नि बोली सकदे और जिना रा मुंओ रे ल्याऊणा मांणूआ खे ठीक निए। 5 इना गल्ला पँदि कमण्ड करना ठीक ए, पर आऊँ एड़ा करने वाला निए। मां सिर्फ आपणी कमजोरिया पँदि कमण्ड करना।

6 जे आऊँ कमण्ड करना चाऊँ बी तो मूर्ख नि ऊणा, कऊँकि सच बोलूँगा। पर आऊँ आपणे आपू खे कमण्ड करने ते रोक्ँआ। कऊँकि लोक जेड़ी मेरी जिन्दगिया खे देखोए और मांते उपदेश सुणोए तिजी ते जादा बढी की माखे कुछ बी नि समजो।

7 माखे परमेशरे बऊत ई नौखिया गल्ला दखाईया। आऊँ इना गल्ला पाँदे कमण्ड नि करूँ इजी खे मेरे शरीरो रे एक कांडा चुवाई राखेया। से कांडा शैतानो रा दूत ए से माखे तकलीफ देँदा रओआ कि आऊँ कमण्ड नि करूँ। 8 इजी रे बारे रे मैं प्रभुए ते तीन बार विनती किती कि ये मांते दूर ऊई जाओ। 9 प्रभुए माखे बोलेया, “मेरी कृपा ताखे बऊत ए; कऊँकि मेरी सामर्थ कमजोरिया रे बऊत अच्छा काम करोई।” इजी री खातर आऊँ बड़ी खुशिया साथे आपणी कमजोरिया पाँदे कमण्ड करूँगा ताकि मसीह री सामर्थ मां पाँदे छाँए करदी रओ। 10 इजी बजअ ते आऊँ मसीह री खातर कमजोरिया रे, निन्दा रे, गरीबिया रे, उपद्रवो रे और मुसीबता रे खुश ए; कऊँकि जेबे आऊँ कमजोर ओऊँआ, तेबे मसीह री सामर्थ ते तागतबर ओऊँआ।

?????????? ?? ??????? ?? ???????

11 आऊँ मूखेता री गल्ला करूँआ, पर तुसे लोक ई मांते ये जबरदस्ती कराया। तुसा तो मेरी सपारिश करनी चाईए थी, हालाँकि आऊँ कुछ पनिए, तेबे बी तिना बडेया ते बडे प्रेरित बोलणे वालेया ते किजी गल्ला रे बी कम निए। 12 जेबे आऊँ तुसा साथे था तो मैं तुसा खे प्रेरित ऊणे रा प्रमाण दितेया। मैं सबरो साथे तुसा बीचे चिह्न, अचम्बे रे काम और सामर्थ रे काम दखाए। 13 ओरी मण्डलिया रे मुकाबले रे तुसा लोका रे किजी गल्ला री कमी रईगी? आ, आऊँ तुसा लोका पाँदे बोज नि बणेया। तुसे मेरा ये अन्याय माफ करेयो।

14 देखो, आऊँ तीजी बार तुसा गे आऊणे खे त्यार ए और मां तुसा पाँदे कोई बोज नि राखणा। कऊँकि आऊँ तुसा री सम्पति नि, बल्कि तुसा खेई चाऊँआ। कऊँकि बच्चेया, माया-बावा खे पैसा कट्टा नि करना चाईयो, पर माया-बावा, बच्चेया खे पैसा कट्टा करना चाईयो। 15 मां तुसा लोका रिया तई बड़ी खुशिया साथे खर्च करना, और आपणे प्राण बी तुसा खे देई देणे। क्या जितणा जादा आऊँ तुसा साथे प्यार राखूँआ, तिथणा ई कअटी की तुसे बी मांते प्यार राखेगे?

16 फेर बी तुसा खे ये मानणा पडना कि आऊँ तुसा लोका पाँदे बोज नि बणेया, पर एडा ऊई सकोआ कि कोई बोलो कि मैं चलाकिया ते तुसे तोखा देई कि फसाई ले। 17 तुसेई बताओ जो लोक मैं तुसा गे पेजे, क्या तिना लोका बीचा ते किने बी तोखा करी की तुसा ते कुछ गलत फाईदा लया? 18 मैं तीतुसो खे समजयाई की तेस साथे से पाई पेजेया, तो क्या तीतुसे तोखा करी की तुसा ते कुछ गलत फाईदा लया? क्या आसे एक ई पवित्र आत्मा रे चलाए नि चले? क्या एक ई बाटा रे नि चलिए?

19 पर तुसे एबुए तक समजणे लगी रे ऊगे कि आसे तुसा सामणे जवाब देणे लगी रे। आसे तो परमेशरो खे आजीर जाणी की मसीह रे बोलूँए। ओ प्यारेओ, सब गल्ला तुसा रे विश्वासो री बड़ोतरिया खे बोलूँए। 20 कऊँकि माखे डर ए कि केथी एडा नि ओ कि आऊँ आईकि जेडा चाऊँआ, तियाँ तुसा खे नि पाऊँ और माखे बी जेडा तुसे नि चाँदे, तेडा ई पाओ। केथी एडा नि ओ कि आऊँ तुसा रे एती आईकि चगड़ा, जलन, रोष, विरोद, ईर्ष्या, चुगली, कमण्ड और बखेडे पाऊँ 21 और केथी एडा नि ओ कि जेबे आऊँ वापस आऊँ तो मेरा परमेशर माखे तिना सामणे शर्मिंदा नि करी देओ और माखे बऊत जणेया खे फेर शोग करना पडो, जिने पईले पाप कितेया था और गन्दे काम, व्याभिचार, लीचड़पण ते, जो तिने कितेया, मन नि फेरया।

13

???? ???????

1 एबे तीजी बार आऊँ तुसा लोका गे आऊणे वाला ए। पवित्र शास्त्र बोलोआ, “दो या तीन गवाओ री गवाईया रे जरिए हर एक गल्ल साबित किती जाओ।” 2 जेडा जेबे आऊँ दूजी बार तुसा साथे था, तो तेडा ई एबे दूर रंदे ऊए तिना लोका खे जिने पईले पाप कितेया और बाकि सबी लोका खे एबे पईले तेई बोली देऊँआ कि जे आऊँ फेर आऊँगा, तो सजा दिते बिना छाड़ूंगा नि। 3 आऊँ तुसा ते बोलूँआ कि तुसे तो इजी रा सबूत चाओए कि मसीह मेरे जरिए बोलोआ। तुसा खे सुदारने खे मसीह कमजोर निए, पर तुसा रे सामर्थी ए। 4 से कमजोरिया री बजअ ते करूसो पाँदे चढ़ाया

तो गया, तेबे बी परमेशरो री सामर्था ते जिऊंदा ए। आसे बी तो तेसदे कमजोर ए, पर परमेशरो री सामर्था ते जो तुसा खे ए, तेस साथे जिऊणे।

5 आपणे आपू खे परखो कि तुसे विश्वासो रे आए कि नि। आपणे आपू खे परखो, क्या तुसे आपणे बारे रे ये नि जाणदे कि यीशु मसीह तुसा रे ए? नई तो तुसे परखणे रे नक्कमे निकली रे। 6 पर मेरी उम्मीद ए कि तुसे जाणी लो कि आसे नक्कमे नि निकले। 7 और आसे आपणे परमेशरो ते प्रार्थना करूँए कि तुसे कोई बुराई नि करो; इजी खे नि कि आसे खरे दिखूँ, पर आसे एड़ा ई चाऊँए कि तुसे पलाई करो, चाए आसे नक्कमे ई ठईरूँ। 8 कऊँकि आसे सच्चो रे बिरोदो रे कुछ्छ नि करी सकदे, पर सच्चो साथे सदा खड़े रई सकूँए। 9 जेबे आसे कमजोर ए और तुसे तागतबर ए, तो आसे खुश ओऊँए और ये प्रार्थना बी करूँए कि तुसे विश्वासो रे मजबूत ऊई जाओ। 10 येई वजअ ए कि आऊँ तुसा गे आऊणे ते पईले इना सारी गल्ला खे लिखूँआ ताकि माखे आपणे अक्को रा इस्तेमाल करी की तुसा खे सजा देणे रे जरूरत नि पड़ो, से अक्क माखे परमेशरे देई राखेया। कऊँकि आऊँ आपणा अक्क तुसा रे विश्वासो खे मजबूत करने खे चाऊँआ न कि तिजी खे नाश करने खे।



11 ओ साथी विश्वासियो, आऊँ इना शब्दा साथे आपणी चिट्ठी बन्द करूँआ। खुश रओ, सिद्ध बणदे जाओ, एकी दूजे खे औसला देंदे रओ, एक ई मन राखो, मेल-मिलापो साथे रओ। तेबे प्यार और शान्तिया रा परमेशर तुसा साथे रणा।


12 एकी-दूजे खे प्यारो साथे गले मिली की नमस्कार करो। 13 सब परमेशरो रे पवित्र लोक तुसा खे नमस्कार करोए।

14 प्रभु यीशु मसीह री कृपा, परमेशरो रा प्यार और पवित्र आत्मा री सहभागिता तुसा सबी साथे ऊँदी रओ।

गलातियों गलाती नगरो री विश्वासी मण्डलिया खे प्रेरित पौलुसो री चिट्ठी भूमिका

जेबे यीशुए रे सुसमाचारो रा प्रचार गैर-यहूदिया बीचे ऊणे लगेया, तेबे ये सवाल उठणे लगेया कि एक सच्चा मसीह ऊणे रिया खातर एक मांणूए खे मूसे रे बिधानो खे मानणा जरूरी ए या नई? पौलुस ये सलाह देओआ कि ये जरूरी ए। से बोलोआ कि सच्ची ई मसीह रे जिन्दगिया रा एक मात्र पक्का आधार ए विश्वास। तेसरे जरिए ई सबी लोका रा परमेशरो साथे रिश्ता सुदरोआ। पर एशिया टापूए रे स्थित एक रोमी राज्य, गलातिया री मण्डलिया रे लोके पौलुसो रा बिरोद कित्तेया और दावा कित्तेया कि परमेशरो साथे सयी रिश्ते राखणे रिया खातर एक मांणूए खे मूसे रे बिधानो खे मानणा बी जरूरी ए।

गलातिया रे नाओ पौलुस प्रेरितों री चिट्ठी इजी री खातर लिखी थी ताकि सेयो लोक जो एसा गलत शिक्षा ते बईकि गे थे, तिना खे सच्चे विश्वास और व्यवहारो रे वापस ल्याई सकिए। पौलुस एसा चिट्ठिया री शुरूआत यीशु मसीह रा एक प्रेरित ऊणे रे आपणे अक्को रे समर्थनो साथे करोआ। से एसा गल्ला पाँदे जोर देओआ कि एक प्रेरित ऊणे रिया खातर तेसरा बुलाणा परमेशरो रिया तरफा ते ए, ना कि केसी मांणूए रे अक्को ते और ये बी कि तेसरा मकसद खास करी की दुजिया जातिया बीचे सुसमाचार प्रचार करना था। तेबे से एक सलाह देओआ कि बस विश्वासो रे जरिए ई लोका रा परमेशरो साथे रिश्ता सुदरोआ। अंतो रे पाठा रे पौलुस ये देखाओआ कि मसीह रे विश्वास करने रे परिणाम स्वरूप पैदा ऊए रे प्यारो रे जरिए ई मसीही चरित्र कुदरती रूपो रे ओआ।



भूमिका 1:1-10

प्रेरितों रे रूपो रे पौलुसो रा अक्क 1:11-2:21

परमेशरो री कृपा रा सुसमाचार 3:1-4:31


मसीही आजादी और फर्ज 5:1-6:10

निचोड़ 6:11-18



1 ये चिट्ठी मां प्रेरित पौलुसो री तरफा ते ए। आँऊ प्रेरितों रे तौरो पाँदे ना तो केसी मांणूआ री टोलिया री तरफा ते ए और ना ई केसी मांणूए रे जरिए चुणी राखेया। पर परमेशर पिते रे जरिए और यीशु मसीह रे जरिए जो मरे रेया बीचा ते जिऊँदा ऊईगा, आँऊ प्रेरित चुणी राखेया।² और ये चिट्ठी मां साथे रणे वाले सारे विश्वासी पाईया री तरफा ते गलातिया प्रदेशो री मण्डलिया खे पेजणे लगी रे।

³ आँऊ विनती करूँआ कि परमेशर पिता और म्हारे प्रभु यीशु मसीह री तरफा ते तुसा खे कृपा और शान्ति मिलदी रओ।⁴ आसा रे पिता परमेशरो री इच्छा रे मुताबिक यीशु मसीह आपणे आपू खे आसा रे पापो री खातर बलिदान करी ता ताकि आसे एसा आज की दुनिया रे लोका रे बुरे कामा ते बची रईए।⁵ परमेशरो री स्तुति और महिमा जुगो-जुगो तक ऊँदी रओ। आमीन्।



6 माखे ये गल्ल जाणी कि बऊत ई दुःख ऊआ कि तुसे परमेशरो ते जिने तुसे मसीह री कृपा ते बुलाए, तेसते तुसे इतणी चट पटकी गे। और तुसे ओर ई प्रकारा री शिक्षा री तरफा खे चुकणे लगे, जेतेखे कुछ लोक सुसमाचार बोलोए।⁷ पर सच तो ये ए कि दूजा सुसमाचार अया ई नि। पर गल्ल

ये ए कि कुछ लोक एडे ए, जो तुसा खे बड़ी उलजणा दे पाई देओए और मसीह रे सुसमाचारो खे बिगाडना चाओए।⁸ पर जे आसे या स्वर्गो ते कोई स्वर्गदूत बी तेस सुसमाचारो खे छाडी की जो आसे तुसा खे सुणाया, कोई ओर सुसमाचार तुसा खे सुणाओ, तो से परमेशरो री तरफा ते स्रापित ए।⁹ जेडा आसे पईले बोली चुकी रे, तेडा ई आऊँ एबे फेर बोलूँआ कि तेस सुसमाचारो खे छाडी की जो तुसे मानी राखेया, जे कोई ओर सुसमाचार सुणाओआ, तो से परमेशरो री तरफा ते स्रापित ए।

¹⁰ ये गल्ल बिल्कुल साफ ए कि आऊँ माणूआ खे खुश करने री कोशिश नि करदा, पर आऊँ परमेशरो खे खुश करना चाऊँआ। जे आऊँ एबुए तक माणूआ खे खुश करदा रंदा, तो मसीह रा दास नि ऊँदा।

????? ?????? ??????? ??????

¹¹ ओ साथी विश्वासियो! आऊँ तुसा खे बताई देऊँआ कि जो सुसमाचार मै सुणाई राखेया, से केसी माणूआ रे दमाको री ऊपज नि ए।¹² कऊँकि से मांगे केसी माणूआ री तरफा ते नि पऊँछेया और ना ई किने माणूए माखे सिखाया। पर माखे ये संदेश सीदा ई यीशु मसीह री तरफा ते मिली रा।

¹³ तुसे सुणी चुकी रे कि यहूदी मतो रे पईले मेरा केडा चाल-चलण था कि आऊँ परमेशरो री मण्डलिया खे बऊत जादा सताऊँ था और नाश करने री कोशिश करदा रऊँ था।¹⁴ आऊँ आपणे साथी यहूदी पाईया ते जादा यहूदी मतो रे आगे बडदा जाऊँ था और आपणे बाप-दादिया रे रीति-रवाजा खे बऊत ई तनो-मनो ते मानो था।¹⁵ पर परमेशरो री जिने आऊँ मेरी आम्मा रे गर्भो तेई ठराया और आपणी कृपा ते बुलाई ला।¹⁶ जेबे इच्छा ऊई कि मांदे आपणे पुत्रो खे प्रगट करो, ताकि आऊँ दुजिया जातिया रे तेसरा सुसमाचार सुणाऊँ, तो आऊँ तेबुई केसी बी माणूआ गे नि गया कि तिना रा सन्देश पाऊँ¹⁷ और ना यरूशलेमो रे तिना गे गया, जो मांते पईले पुरेरित चुणे जाई चुके थे, पर फटाफट अरब देशो खे चली गा और तेबे तथा ते दमिश्क नगरो खे वापस आईगा।

¹⁸ तेबे तीन साल बाद आऊँ पुरेरित पतरसो खे मिलणे खे यरूशलेम नगरो रे गया और तेस साथे पंद्रा दिना तक रया।¹⁹ पर आऊँ प्रभुए रे पाई पुरेरित याकूबो खे छाडी की केसी ओरी पुरेरिता खे नि मिलेया।²⁰ जो गल्ला आऊँ तुसा खे लिखूँआ, देखो, परमेशरो खे आजीर जाणी की बोलूँआ कि सेयो चूठिया नि ए।

²¹ यरूशलेम नगरो खे छाडणे ते बाद आऊँ सीरिया और किलिकिया रे देशो रे आया।²² पर मां साथे यहूदिया प्रदेशो रे रणे वाले मसीह विश्वासिया री मण्डली एबुए तक नि मिली थी।²³ पर येई सुणेया करो थी कि एक बखत था जेबे से आसा खे पईले सताया करो था, से एबे तेस ई विश्वासो रा सुसमाचार सुणाओआ, जेतेखे पईले नाश करने री कोशिश करो था²⁴ और सेयो लोक मेरे बारे रे परमेशरो रा धन्यवाद करदे रओए कऊँकि परमेशरे आऊँ मण्डलिया खे सताणे वाले ते बदली कि मसीह रा विश्वासी बणाईता।

2

???? ?????? ?? ???? ?????? ?? ???????

¹ चौदा साल बाद आऊँ बरनबासो साथे यरूशलेम नगरो खे फेर गया और तीतुसो खे बी आपू साथे लयी गा।² आऊँ तेती गया कऊँकि परमेशरे माखे ये प्रकट कितेया कि आऊँ तेती जाऊँ। मै तेती जो मण्डलिया रे जाणे-माणे रे अगुवे थे लग जे मिली की तिना खे बताई ता कि आऊँ दुजिया जातिया बीचे सुसमाचार प्रचार करूँआ। ताकि एडा नि ओ कि मेरे एस बखतो री या आगली दौड़-तूप बेकार ओ।³ तीतुस जो मां साथे आया था से यूनानी था और बिना खतने रा था। पर यरूशलेम नगरो री मण्डलिया रे तिने अगुओ से अपनाया और खतना कारणे खे मजबूर नि कितेया।⁴ तीतुसो रा बिना खतने ते ऊणा एक मसला बणीगा। ये तिना चूटे पाईया री बजअ ते ऊआ, जो चोरिए कूसी की आए थे, ताकि तेसा आजादिया रा जो मसीह यीशुए रे आसा खे मिली री, पेट लयी की आसा खे दास बणाओ।⁵ पर आसे तिना लोका री गल्ला ते एक कअडिया खे बी सईमत नि ऊए, ताकि सुसमाचारो री सच्चाई तुसा रे बणी री रओ।

6 जो लोक जाणे-माणे रे अगुवे थे सेयो चाए केडे बी थे, इजी ते मेरे बचारा रे कोई फर्क नि पड़दा। कऊँकि परमेशर मूँ देखेया न्याय नि करदा। तिना लोका ते माखे कुछ बी नवाँ उपदेश नि मिलेया। 7 इजी ते लग तिने लोके समजेया कि जेड़ा यहूदी लोका खे सुसमाचार सुनाणे रा काम पतरसो गे देई राखेया, तेड़ा ई दुजिया जातिया रे लोका खे सुसमाचार सुनाणे रा काम परमेशरे माखे देई राखेया। 8 कऊँकि जिने परमेशरे पतरसो खे यहूदिया रा प्रेरित बणाई की तिना रे जरिए सेवा रा काम कित्तेया, तिने ई परमेशरे माखे बी दुजिया जातिया रा प्रेरित बणाई की मेरे जरिए सेवा रा काम कित्तेया। 9 जो लोक मण्डलिया रे खम्बे समजे जाओ थे मतलब याकूब, कैफा और यूहन्ना तिने कृपा रा से वरदान पछ्याणेया जो माखे मिलेया। तिने माखे और बरनबासो खे आपणे साथी समजी की आसा खे सहभागिता रा दाँणा आथ दित्तेया। सेयो एते गल्ला खे सईमत ऊए कि आसे दुजिया जातिया गे सुसमाचार सुनाणे खे जाऊँ और सेयो यहूदिया गे जाओ। 10 तिने बस आसा ते येई बिनती किती कि आसे यरूशलेम नगरो रे गरीब विश्वासिया री मताद करिए और एस ई कामो खे करने री आऊँ आपू बी कोशिश करने लगी रा था।

??????

11 पतरसो रा अन्ताकिया नगरो रे आऊण ते बाद एक दिन मैं तेसरा लोका रे सामणे बरोद कित्तेया, कऊँकि जो से करने लगी रा था से गलत था। 12 से पईले दुजिया जातिया साथे रोटी खाया करो था, पर जेवे याकूबो री तरफा ते कुछ यहूदी लोक आये, तो खतना कित्ते रे यहूदी लोका रे डरो रे मारे से तिना ते पीछे आटीगा और कनारा करने लगेया। 13 और तेस साथे बाकि यहूदी विश्वासिये बी कपट कित्तेया, एथो तक कि बरनबास बी तिना रे कपटो रे पड़ी गा।

14 पर जेवे मैं देखेया कि सेयो सुसमाचारो री सच्चाईया पाँदे सीदी चाल नि चलदे, तो मैं सभी सामणे पतरसो खे बोलेया, “जेवे तूँ यहूदी ऊई की दुजिया जातिया जेडे चलेया और यहूदिया जेड़ा निए, तो तूँ दुजिया जातिया खे यहूदिया जेडे चलणे खे कऊँ बोलेया?”

??????

15 “आसे जो जन्मो रे यहूदी ए और ‘पापी दूजी जाति’ निए, जेड़ा कि आसे यहूदी तिना खे दुजिया जातिया रे बोलेए। 16 तेवे बी आसे ये जाणूए कि माणू मूसे रा बिधानो रे कामो ते तर्मी नि ठईरदा। पर बस यीशु मसीह पाँदे विश्वास करने ते तर्मी ठईरोआ। आसे आपू बी यीशु मसीह पाँदे विश्वास कित्तेया, कि आसे बिधानो रे कामो ते नि पर मसीह पाँदे विश्वास करने ते तर्मी ठईरूँ। कऊँकि बिधानो रे कामो ते कोई माणू तर्मी नि ठईरना।

17 “कुछ यहूदी सोचोए कि बस यीशु मसीह पाँदे विश्वास करी की आसे पाप कित्तेया। कऊँकि आसे तर्मी बणने खे बिधानो खे मानणे री बजाये बस मसीह पाँदे विश्वास करूँए। तो क्या मसीह पापो रा पालण-पोषण करने वाले ए? कदी पनि! 18 पर जे आऊ फेर सेई बिधानो खे मानणे रा काम करूँ जो मैं छाडीता था, तो आपणे आपू खे अपराधी ठराऊँआ।

19 “कऊँकि आऊँ तो बिधानो रे जरिए बिधानो खे मरी गा, ताकि आऊँ परमेशरो री खातर जिऊँ। 20 आऊँ मसीह साथे करूसो पाँदे चढ़ाया। आऊँ एवे जिऊँदा नि रया, पर मसीह माँदे जिऊँदा ए। आऊँ शरीरो रे जो एबु जिऊँदा ए, तो बस तेस विश्वासो ते जिऊँदा ए, जो परमेशरो रे पुत्रो पाँदे ए, जिने माखे प्यार कित्तेया और मेरी खातर आपू खे देईता। 21 आऊँ परमेशरो री कृपा बेकार नि ठराई सकदा। जे बिधानो रे जरिए धार्मिकता ऊँदी, तो मसीह रा मरना बेकार ऊँदा।”

3

??????

1 ओ नासमज गलातिया रे रणे वालेयो! तुसे किने मोही ले? मैं तुसा लोका खे यीशु मसीह खे करूसो पाँदे चढ़ाए जाणे रा मतलब साफ-साफ समजाईता था जिंयो मानो तुसा री आखी सामणे से करूसो पाँदे चढ़ाई राखेया ओ। 2 आऊँ तुसा ते बस ये पूछणा चाऊँआ कि क्या तुसे पवित्र आत्मा

मूसा रे बिधानो खे मानणे ते पाया? बिल्कुल नि! बल्कि तुसे यीशु मसीह रे सुसमाचारो पाँदे विश्वास करने ते पवित्र आत्मा पाया। ³क्या तुसे एड़े नासमज ए कि पवित्र आत्मा री रीतिया ते शुरू करी की एबे शरीरो री रीतिया पाँदे अंत करना? ⁴क्या तुसे विश्वासो रे आऊणे ते बाद इतणा दुःख ईयां ई उठाय? पर कदी बी बेकार नि। ⁵आऊँ तुसा ते फेर पृच्छणा चाऊँआ कि परमेशर जो तुसा खे पवित्र आत्मा देओआ और तुसा बीचे सामर्था रे काम करोआ, क्या से एड़ा इजी खे करोआ कि तुसे बिधानो खे मानोए या तुसे सुसमाचारो पाँदे विश्वास कित्तेया इजी खे एड़ा करोआ? ⁶पवित्र शास्त्रो रे बोली राखेया, “अब्राहमे परमेशरो पाँदे विश्वास कित्तेया और ये तेसखे धार्मिकता गिणी गयी।”

⁷तुसे एसा गल्ला खे जाणी लो कि जो लोक अब्राहमो जेड़े परमेशरो रे विश्वास करोए सेयो लोक ई अब्राहमो री असली ल्वाद ए। ⁸और पवित्र शास्त्रे पईले ई ये जाणी की कि परमेशरो दूजी जाति विश्वासो रे जरिए तर्मी ठराणी, पईले तेई अब्राहमो खे ये सुसमाचार दित्तेया, “तेरे जरिए तरतिया री सबी जातिया आशीष पाणी।” ⁹तो जो लोक अब्राहमो जेड़े परमेशरो रे विश्वास करोए सेयो विश्वास करने वाले लोक अब्राहमो जेड़े आशीष पाओए।

¹⁰तो जितणे लोक बिधानो रे कामो पाँदे विश्वास राखोए, सेयो सब स्रापो रे अधीन ए, कऊँकि लिखी राखेया, “जो कोई बिधानो री कतावा रे लिखी रिया सब गल्ला रे करने रे स्थिर नि रंदा, से श्रापित ए।” ¹¹पर ये गल्ल प्रकट ए कि कोई बी माणू बिधानो रे जरिए परमेशरो गे तर्मी नि ठईरदा। कऊँकि पवित्र शास्त्रो रे लिखी राखेया, “तर्मी माणू विश्वासो रे जरिए जिऊँदा रणा।” ¹²पर मूसा रे बिधानो रा विश्वासो साथे कोई रिश्ता निए, कऊँकि पवित्र शास्त्रो रे लिखी राखेया, “जो इना सबी गल्ला खे मानोगा, से तिना री बजअ ते जिऊँदा रणा।” ¹³पर मसीहे आसे तेस श्रापो ते छुड़ाईते जो बिधान ना मानणे ते आसा खे मिलोआ। आपू ई मसीह म्हारे पापो रा श्राप आपू पाँदे लयी की करूसो पाँदे मरेया। कऊँकि पवित्र शास्त्रो रे लिखी राखेया, “जो कोई काठो पाँदे लटकया जाओ आ से श्रापित ए” ¹⁴ये इजी री खातर ऊआ, ताकि अब्राहमो री आशीष मसीह यीशुए रे दुजिया जातिया तक पऊँछो और आसे विश्वासो रे जरिए तेसा पवित्र आत्मा खे पाऊँ, जेतेरा वादा ऊई रा।

????? ? ?

¹⁵ओ साथी विश्वासियो, आऊँ माणूए री रीतिया पाँदे बोळूँआ कि केली माणूआ रा वसीयतनामा पक्का ऊई जाणे ते बाद ना तो तिजी खे कोई रद्द करी सकोआ और ना ई तिदे कुछ जोड़ी सकोआ। ¹⁶एबे जो वादे अब्राहमो खे और तेसरे वंशो खे दित्ते, तिजी रे बारे रे पवित्र शास्त्रे ये नि बोलदा कि, “तिना रे वंशो खे” जेड़ा कि बऊत जणेया रे बारे रे, बल्कि “तिना रे वंशजो खे”, मानो एकी ई माणूए खे, और से वंश मसीह ए। ¹⁷मेरा बोलणे रा मतलब ये ए कि परमेशरे अब्राहमो साथे एक वाचा पक्की किती और तिजी खे पूरा करने रा वादा बी कित्तेया। चार सौ तीई साल बाद परमेशरे मूसे रे जरिए बिधान दित्ता। मूसा रा से बिधान परमेशरो री वाचा खे टाली नि सकी कि परमेशरो रा वादा बेकार ठईरो। ¹⁸जे बिधानो रे जरिए जायदात मिलदी, तो वादे ते तिजी रा कोई मतलब नि ऊँदा। पर वादे रे जरिए ई परमेशरे तेसा जायदाता खे अब्राहमो खे देणे री कृपा किती।

¹⁹तो तेबे बिधानो रा क्या इरादा ए? परमेशरे वादे साथे बिधान इजी खे दित्ता कि लोक आपणे पापो री पछ्याण करी सको। अब्राहमो रे वादे रा वंश आऊणे तक ई जेतेखे परमेशरे देणे रा वादा कित्तेया था मूसे रा बिधान बणी री रई। परमेशरे आपणा बिधान स्वर्गदूता रे जरिए मूसे खे दित्ती, जो परमेशर और लोका बीचे बचोला था। ²⁰बचोलापण तो कम ते कम दूई जणेया बीचे कित्तेया जाओआ। पर परमेशर जो एक ईए, तिने अब्राहमो ते वादा करदे बखते बचोले रा इस्तेमाल नि कित्तेया।

????? ? ?

²¹तो क्या बिधान परमेशरो रे वादे रे विरोदो रे ए? कदी पनि, कऊँकि जे एड़ी बिधान देदे जो जीवन देई सको, तो सच्ची तेसा बिधानो खे मानणे ते धार्मिकता मिली जादी। ²²पर पवित्र शास्त्रे सब

पापो रे अधीन करी ते, ताकि से वादा जेतेरा आधार परभु यीशु मसीह पाँदे विश्वास करना ए, विश्वास करने वालेया खे पूरा ओ।

23 पर विश्वासो रे आऊणे ते पईले विधानो री अधीनता रे आसे कैद थे और तेस विश्वासो रे आऊणे तक, जो प्रकट ऊणे वाला था, आसे तिजी रेई बन्दनो रे बंदी रे थे। 24 तेवेई मसीह रे आऊणे तक आसा री अगुवाई करने खे और आसा री देखपाल करने खे विधान दित्ता, ताकि आसे विश्वासो ते तर्मी ठईरूँ। 25 पर एवे जेवे आसे मसीह पाँदे विश्वास करी ता रा तो आसे एवे विधानो रे अधीन नि रये।

26 कऊँकि तुसे सब तेस यीशु मसीह पाँदे विश्वास करने रे जरिए परमेशरो री ल्वाद ए। 27 और तुसा बीचा ते जितणेया यीशु मसीह रा बपतिस्मा लया, तिने मसीह पईनी ला रा। 28 यीशु मसीह रे विश्वास करने ते तुसे सब एक जेडे बणी गे रे, चाए कोई यहूदी ए या दूजी जाति, चाए कोई दास ए या आजाद, चाए कोई मर्द ए या जवाणस सब यीशु मसीह रे एक ए 29 और जे तुसे मसीह रे ए, तो अब्राहमो रे वंश और वादे रे मुताबिक वारस बीए।

4

1 मेरे बोलणे रा मतलब ये ए कि पाऊ आपणे पिते री जायदाता रा अक्कदार ओआ पर जदुओ तक से नाबालिक ए तदुओ तक से दासो जेड़ा ईए। बल्कि से आपणे पिते री सबी चीजा रा मालक बी ए, तेबे बी तेसरे और दासो रे कोई फर्क निए। 2 पर पिते रे ठराए रे बखतो तक से देख-रेख करने वाले और पण्डारियो रे वशो रे रओआ। 3 तियाँ ई आसे बी जेबे तेस बालको जेडे थे, तो तिना रीति-रिवाजा और तेसा विधानो रे दास थे जो एसा दुनिया रे ए। 4 पर जेबे ठीक बखत आया, तो परमेशरे आपणा पुत्र एते दुनिया रे पेजेया, जो जवाणसा ते जम्मेया। से यहूदिया रे परिवारो रे पैदा ऊआ और मूसे रा विधानो रे मुताबिक आपणी जिन्दगी जी। 5 ताकि मूसे रा विधानो रे अधीन रणे वालेया खे मोले लयी की छुड़ाई लो और आसा खे आपणे बच्चेया रे रूपो रे अपनाओ। 6 कऊँकि आसे तेसरे पाऊ ए, परमेशरे आपणे पुत्रो रा आत्मा आसा रे दिलो रे पेजेया, से आत्मा परमेशरो खे, ओ अब्बा! ओ पिता! बोली की आक्का पाओआ। 7 तेवेई एवे आसे दास निए, बल्कि पाऊ बणी गे, कऊँकि एवे आसे परमेशरो री ल्वाद ए, तो जो कुछ बी तेसगे अया तेस सब कुछ आसा खे देई देणा।

XXXXXXXXXX XX XXXX XX XXXXXXXX XX XXXXXXXX

8 जेबे तुसे परमेशरो खे नि जाणा थे, तेस बखत तुसे तिना रे दास थे, जो सच्चो खेई परमेशर अया ई नि। 9 पर एवे तुसे परमेशर पछयाणी ला रा, बल्कि एडा बोलो कि परमेशरे तुसे अपनाई ले रे, तो फेर तुसे कमजोर और नकम्मी दुनिया रे रीति-रवाज और शुरूओ री शिक्षा रे दास बणने खे कऊँ वापस ऊणे लगी रे? क्या तुसा खे फेर तिना रे दास बणने री इच्छा ए? 10 तुसे दुजिया जातिया रे लोक मूसे रा विधानो रे मुताबिक दिन और मीन्ने, ठीक बखत और सालो खे मानोए। 11 आऊँ तुसा रे बारे रे डरूँआ, केथी एडा नि ओ कि जो मईणत में तुसा री तई किती बेकार जाओ।

12 ओ साथी विश्वासियो, आऊँ तुसा ते बिनती करूँआ कि तुसे बी मां जेडे मूसे रा विधानो ते आजाद ऊई जाओ, कऊँकि आऊँ बी तुसा जेड़ा बणीगा रा, तुसे मेरी ठीक देखपाल किती। 13 तुसा खे याद ओगा कि पईली बार में आपणी बमारी और कमजोरिया री दशा रे तुसा खे सुसमाचार सुणाया 14 और तुसे मेरी शरीरो री दशा खे, जो तुसा खे मुसीबता री बजअ थी, तुच्छ नि जाणी, ना तिजी ते चीढ़ किती पर परमेशरो रे स्वर्गदूत बल्कि मसीह जेड़ा आऊँ मानेया। 15 तो तुसा री से खुशी मनाणी केथी गयी? आऊँ तुसा रा गवा ए कि जे ऊई सकदा, तो तुसे आपणी आखी बी निकयाली की माखे देई देदे। 16 तो क्या तुसा ते सच बोलणे री बजअ ते आऊँ तुसा रा दुश्मण ऊईगा?

17 सेयो चूटे शिक्षक तुसा खे आपणी तरफा खे करने खे उतावले ए, पर खरी नियता ते नि, बल्कि तुसा खे मांते लग करना चाओए, ताकि तुसे तिना खेई दोस्त बणाई लो। 18 सदा ई खरे इरादे रे इच्छुक ऊणा बढ़िया ओआ और सिर्फ तेस बखते ई नि जेबे आऊँ तुसा साथे रऊँआ। 19 ओ मेरे बालको! जदुओ तक तुसा रे मसीह री शकल नि बणी जाओ, तदुओ तक आऊँ तुसा री तई फेर

बच्चा ऊणे री जिया पीड़ा सईन करूँआ। ²⁰ आऊँ चाऊँआ कि एस बखते आऊँ तुसा गे ऊँदा और तुसा ते प्यारो साथे गल्ला करदा, कऊँकि मेरिया समजा रे नि आऊँदा कि आऊँ तुसा ते क्या बोलूँ।

~~~~~

<sup>21</sup> तुसे जो मूसे रा बिधानो रे अधीन ऊणा चाओए, मेरी गल्ल सुणो, मां तुसा खे बताणा कि मूसा रे बिधानो री कताबा रे क्या लिखी राखेया? <sup>22</sup> पवित्र शास्तुरो रे लिखी राखेया कि अब्राहमो रे दो पाऊ थे। एक पाऊ अब्राहमो री दासी हाजिरा ते पैदा ऊआ और दूजा पाऊ तेसरी लाडी जो दासी नि थी तेसा ते पैदा ऊआ। <sup>23</sup> पर अब्राहमो रा जो पाऊ तेसा दासी जवाणसा ते पैदा ऊआ, से शरीरो री रीतिया ते जम्मेया और से पाऊ जो आजाद जवाणसा ते मतलब तेसरी लाडिया ते पैदा ऊआ से परमेशरो रे वादे रे मुताबिक जम्मेया।

<sup>24</sup> इना गल्ला रे उदारण ए, यो जवाणसा मानो दो वाचा ए। पईली जवाणस हाजिरा जो सीने पाहड़ो खे दखाओई, जेती परमेशरे इस्राएली लोका खे बिधान दिता जेसा ते दास ई जम्मेए। <sup>25</sup> यरूशलेमो रे लोक आज गुलामिया रे ए कऊँकि से यहूदी बिधानो खे मानोए। ये लोक हाजिरा जेडे ई गुलामिया रे ए जो अरब देशो रे सीने पाहड़ो पाँदि दिती रे बिधानो खे दखाओआ। <sup>26</sup> और दूजी जवाणस सारा ए जो स्वर्गिय यरूशलेमो खे दखाओई। से आजाद जवाणस ए और से म्हारी आम्मा ए। <sup>27</sup> जेड़ा कि यशायाह भविष्यवक्ते पवित्र शास्तुरो रे लिखी राखेया, “ओ बांझ जवाणस, तूँ जो जमांदी नि, खुशी मना,

तूँ जेसखे पीड़ा नि लगदिया,

गला खोली की जय-जयकार कर,

कऊँकि त्यागिया री ल्वादा,

स्वागणी री ल्वादा ते बी जादा ए।”

<sup>28</sup> ओ साथी विश्वासियो! आसे इसहाको जेडे वादे री ल्वादा ए। <sup>29</sup> पर एबे तुसे तिना लोका रे जरिए सताए जाओए जो तुसा खे बिधानो रे अधीन राखणा चाओए। ठीक इश्माएलो जेडे ई जो शरीरो री इच्छा रे मुताबिक जम्मेया और परमेशरो रे वादे रे मुताबिक जम्मे रे पाऊ इसहाको खे सताओ था। <sup>30</sup> पर पवित्र शास्त्र क्या बोलोआ? “दासी और तेसा रे पाऊए खे निकयाली दे, कऊँकि दासिया रा पाऊ आजाद जवाणसा रे पाऊए साथे वारिस नि ऊणा।” <sup>31</sup> तेवेई ओ साथी विश्वासियो! आसे दासी जवाणस मतलब बिधानो रे नि, बल्कि आजाद जवाणस मतलब विश्वासो री ल्वादा ए।

## 5

~~~~~

¹ मसीह मूसे रा बिधानो ते आजाद रणे खे आसे आजाद करी राखे। तो आपणी आजादिया रे बणे रे रओ और बिधानो री गुलामिया रे फेर बंदी कि नि रओ।

² देखो, आऊँ पौलुस तुसा खे बोलूँआ कि जे खतना कराओगे, तो मसीह रे तुसा खे कुछ फाईदा नि ऊणा। ³ आऊँ हर खतना कराने वालेया खे फेर और बी जोर देई की बताई देऊँआ कि तेसखे मूसा री सारा बिधान मानणी पड़नी। ⁴ तुसे जो मूसे रा बिधान मानणे रे जरिए तर्मी ठईरना चाओए, मसीह ते लग ऊईगे रे और परमेशरो री कृपा तुसे आपू ई टुकराईती, जेतेरे जरिए आसे परमेशरो रे सामणे तर्मी ठईरूँए। ⁵ आऊँ ये बोली सकूँआ कि आसा खे पवित्र आत्मा री तरफा ते पूरा परोसा ए कि परमेशरो आसे मसीह रे विश्वासो री बजअ ते तर्मिया रे रूपो रे मानणे। ⁶ यीशु मसीह रे ना तो खतना, ना बिना खतना कुछ कामो राए, पर बस विश्वासो रा, जो प्यारो रे जरिए असर करोआ।

⁷ मसीह रे तुसे ठीक-ठाक तरक्की करने लगी रे थे। एबे तुसे किने रोकी ते, कि सच्चो खे नि मानो? ⁸ एड़ी शिक्षा तुसा गे परमेशरो री तरफा ते नि आई री जिने तुसे आपणे बच्चेया जेडे बुलाई राखे। ⁹ एक कहावत ए जो ईयां बोलोई कि थोड़ा जा सजेड़ा सारे मूँदे रे आटे खे सजेड़ा बणाई देओआ। ¹⁰ आऊँ प्रभुए पाँदि तुसा रे बारे रे परोसा करूँआ कि तुसे केसी दूजे री शिक्षा खे नि मानोगे। पर

जो कोई तुसा खे आपणी चूटी शिक्षा ते कवराई देओआ, से चाए कोई बी ओ, परमेशरो री तरफा ते तेसखे सजा मिलणी। ¹¹ओ साथी विश्वासियो, जे आऊँ एबुए तक खतने रा प्रचार करूँआ, तो यहूदिया रे जरिए कऊँ एबुए तक सताया जाऊँआ? जे मसीह री मौता री बजाए खतने रा प्रचार करदा तो यहूदी मेरे खलाफ बरोद नि करदे। ¹²पला ऊँदा कि जो तुसा खे चूटी शिक्षा ते कवराई देओए, सेयो आपणे आपू खे नपूसक बणाई देंदे।

¹³ओ साथी विश्वासियो, तुसे परमेशरो रे जरिए आजाद ऊणे खे बुलाई राखे, पर एडा नि ओ कि ये आजादी शरीरो रे पापी सबाओ री इच्छा खे पूरा करने रा मौका बणो, बल्कि प्यारो साथे एकी-दूजे रे दास बणो। ¹⁴कऊँकि सारा विधान इजी एकी गल्ला रे पूरी ऊई जाओई, “तूँ आपणे पड़ोसिये साथे आपू जेड़ा प्यार राख।” ¹⁵पर जे तुसे जानवरा जेड़े एकी-दूजे खे दौंदि देओए और फाड़ने री कोशिश करोए, तो चौकसर रओ। केथी एडा नि ओ कि तुसे एकी-दूजे रा सत्यानाश नि करी देओ।

पवित्र आत्मा रे मुताबिक चलो

¹⁶पर आऊँ बोलूँआ कि पवित्र आत्मा रे मुताबिक चलो, तो तुसा शरीरो री इच्छा कियौं बी पूरी नि करनी। ¹⁷कऊँकि शरीरो रा पापी सबाओ आत्मा रे विरोदो रे इच्छा करोआ और यो एकी-दूजे रे विरोदी ए, ताकि जो कुछ तुसे करना चाओए, से करी नि सको। ¹⁸और जे तुसे आत्मा रे मुताबिक चलोए, तो विधानो रे अधीन नि रये। ¹⁹शरीरो रे काम तो प्रकट ए, मतलब-व्याभिचार, गन्दे काम, लीचड़पण, ²⁰मूर्तिपूजा, जादू-टोणा, बैर, चगड़ा, ईर्ष्या, रोष, विरोद, फूट, पाप, ²¹डाह, मतवालापण, लीला-करीड़ा और इना जेड़े ओर बी और काम ए। इना रे वारे रे आऊँ तुसा खे पईले ई बताई देऊँआ, जेड़ा पईले बी बोली चुकेया रा कि एड़े-एड़े काम करने वाले परमेशरो रे राज्य रे बारिस नि ऊणे।

²²पर पवित्र आत्मा रा फल प्यार, खुशी, शान्ति, सबर, कृपा, पलाई, विश्वासो जोगा, ²³नम्रता और संयम ए। एड़े-एड़े कामो रे विरोदो रे कोई विधान निए। ²⁴और जो यीशु मसीह रे ए, तिने शरीरो रे पापी सबाओ खे तेसरी वासना और इच्छा समेत करूसो पाँदि चड़ाई ता रा। ²⁵जे आसे पवित्र आत्मा रे जरिए जिऊँदे ए, तो पवित्र आत्मा रे मुताबिक चलिए बी। ²⁶आसे ना तो कमण्डी बणिए और ना एकी-दूजे खे पड़काईए और ना ई एकी-दूजे ते जलन करिए।

6

आपणे आपू खे ए समजोआ कि आँऊ ओरी ते बढी की ए तो से आपणे आपू खे तोखा देओआ

¹ओ साथी विश्वासियो! जे कोई माणू केसी पापो रे पकड़या जाओ, तो तुसे जो पवित्र आत्मा री अगुवाईया रे चलोए, नरमाईया साथे एड़ेया खे तमों री बाटा रे फेर आऊणे रे मताद करो और आपणी बी चौकसी राखो, ताकि तुसे बी परीक्षा रे नि पड़ो। ²तुसे एकी-दूजे रा पार चको और ईयां मसीह रा विधान पूरी करो। ³कऊँकि जे कोई आपणे आपू खे ए समजोआ कि आँऊ ओरी ते बढी की ए तो से आपणे आपू खे तोखा देओआ। जबकि से कुछ बी निए। ⁴पर हर एक जन आपणे ई कामो खे परखी लओ। जे से अच्छा ओगा तो तुसे आपणे कामो पाँदि दूजे रे कामो ते तुलना किते बिना कमण्ड करी सकोए। ⁵कऊँकि हर एकी माणूए खे आपणा ई बोजा चकणा पड़ना। ⁶जो लोक परमेशरो रे वचनो री शिक्षा पाओआ, सेयो लोक सब खरिया चीजा रे आपणे सिखाणे वालेया खे शामिल करो।

⁷तोखा नि खाओ, परमेशर मजाको रे नि उड़ाया जांदा, कऊँकि माणूए जो कुछ बीजणा, सेई बाडणा। ⁸कऊँकि जो आपणे शरीरो रे पापी सबाओ री तंई बीजोआ, तेस शरीरो रेई जरिए विनाशो री फसल बाडणी। और जो पवित्र आत्मा खे बीजोआ, तेस पवित्र आत्मा रेई जरिए अनन्त जीवनो री फसल बाडणी। ⁹आसे खरे काम करने रे इम्मत नि छाडिए, कऊँकि जे आसे टिल्ले नि ऊए, तो ठीक बखतो पाँदि फसल बाडणी। ¹⁰इजी री खातर जेथो तक मौका मिलो आसे सबी साथे पलाई करिए, खास करी की विश्वासी पाईया साथे पलाई करिए।

आपणे आपू खे ए समजोआ कि आँऊ ओरी ते बढी की ए तो से आपणे आपू खे तोखा देओआ

11 देखो, मैं कितने बड़े-बड़े अक्षरा रे तुसा खे आपणे आथो साथे लिखी राखेया। 12 जो लोक शरीरो रा दखावा चाओए सेयो ई तुसा रा खतना करवाणे खे जोर पाओए, इजी खे की सेयो मसीह रे करूसो रे जरिए सताए नि जाओ। 13 कऊँकि खतना करणे वाले आपू तो मूसे रा बिधानो पाँदे नि चलदे, पर तुसा रा खतना इजी खे करवाणा चाओए ताकि तुसा रे शरीरो री दशा पाँदे कमण्ड करी सको। 14 पर एडा नि ओ कि आऊँ किजी ओरी गल्ला पाँदे कमण्ड करूँ, बस म्हारे प्रभु यीशु मसीह रे करूसो रा, जेतेरी बजअ ते दुनिया मेरी नजरा रे और आऊँ दुनिया री नजरा रे करूसो पाँदे चड़ाई ता रा। 15 केसी रा खतना ऊई रा ओ या बिना खतने रा ओ इजी री कोई अहमियत निए। पर अहमियत इजी गल्ला रिये कि आसे पूरे तौरौ पाँदे नई सृष्टि बणी जाईए। 16 और जितणे एस नियमो पाँदे चलणे, तिना पाँदे और परमेशरो रे इस्राएलो पाँदे, शान्ति और कृपा ऊँदी रओ।

17 आगे कोई माखे दुःख नि देओ, कऊँकि आऊँ प्रभु यीशुए रे दाग, आपणे शरीरो रे लयी की फिरदा रऊँआ।

18 ओ साथी विश्वासियो! आऊँ बिनती करूँआ कि म्हारे प्रभु यीशु मसीह री कृपा तुसा री आत्मा साथे रओ। आमीन्।

इफिसियों इफिसुस नगरो री विश्वासी मण्डलिया खे प्रेरित पौलुसो री चिट्ठी भूमिका

इफिसियों रे नाओं पौलुस प्रेरितों री चिट्ठी सबी ते पईले परमेशरो री योजना ते जुड़ी री ए "ताकि जो कुछ स्वर्गों रे ए और जो कुछ तरतिया पाँदे ए, से सब कुछ मसीह रे कट्टा ओ।" 1:10 ये परमेशरो रे लोका साथे प्रार्थना बीए कि सेयो यीशु मसीह रे एकजुट ऊई की मानव जातिया री मजौटिया री खातर, एसा महान् योजना रे मुताबिक जिन्दगी बिताओ।

इफिसियों रे पईले पाअगो रे लिखणे वाला मजौटिया रे विषय खे स्पष्ट करोआ; तेसा बाटा रे बारे रे बतादे ऊए जेतेरे जरिए परमेशर पिते आपणे लोका रा चुनाव कित्तेया कि कियों आपणे पुत्र यीशु मसीह रे जरिए तिने आपणे पापो ते माफी पायी और छुड़ाए और कियों पवित्र आत्मा रे जरिए परमेशरो री महान् प्रतिका पूरी ऊणे रा याओ दित्तेया। दूजे पाअगो रे से पढ़ने वालेया ते एड़ी जिन्दगी जिऊणे री प्रार्थना करोआ ताकि मसीह रे तिना री मजौटी तिना रे सामूहिक जिन्दगिया री सच्चाई बणी जाओ।

मसीह साथे जुड़े रे परमेशरो रे लोका री मजौटी दखाणे खे कई उपमा रा इस्तेमाल करी राखेया : कलीसिया एक शरीरो जेड़ी ए, जेतेरा सिर मसीह ए या से एक भवना जेड़ा ए, जेतेरे कूणे रा पात्थर मसीह ए या एक लाड़िया जेड़ा ए जेसा रा लाड़ा मसीह ए। मसीह रे परमेशरो री कृपा री तारणा ते प्रभावित लेखको री बजअ ते ये चिट्ठी अभिव्यक्ति री महान् ऊच्चाईया खे छुँई लओई। हर एक गल्ला खे इदे मसीह रा प्यार, बलिदान, माफी, कृपा और सिद्धता रे प्रयासे रे देखी राखेया।

000-0000

भूमिका 1:1, 2

मसीह और कलीसिया 1:3-3:21

मसीह रे नयी जिन्दगी 4:1-6:20

निचोड़ 6:21-24

1 ये चिट्ठी मां पौलुसो री तरफा ते ए। आँऊ परमेशरो री इच्छा ते यीशु मसीह रा प्रेरित ए। आँऊ ये चिट्ठी परमेशरो रे तिना पवित्र और यीशु मसीह रे विश्वासी लोका खे लिखणे लगी रा जो इफिसुस नगरो रे ए।² आँऊ बिनती करूँआ कि म्हारे पिता परमेशर और प्रभु यीशु मसीह री तरफा ते तुसा खे कृपा और शान्ति मिलदी रओ।

0000 00 000000 00000

3 म्हारे प्रभु यीशु मसीह रे पिता परमेशरो रा धन्यवाद ओ कि तिने आसा खे मसीह रे स्वर्गों री जगा रे सब प्रकारा री आत्मिक आशीषा ते आशीषित करी राखेया।⁴ परमेशरे दुनिया री उत्पत्तिया ते पईले ई मसीह रे आसे चूणी ले, ताकि आसे तेसरी नजरा रे पवित्र और निर्दोष ओऊँ।⁵ कऊँकि परमेशरे आसा ते प्यार कित्तेया, तिने फैसला कित्तेया कि से आसा खे यीशु मसीह रे जरिए गोदी पुत्रो रे रुपो रे अपणाओ। परमेशरे ये आपणी इच्छा और खुशिया साथे कित्तेया।⁶ परमेशरो री तेसा महिमामय कृपा खे तेसरी स्तुति ओ। से महिमामय कृपा तिने आसा खे आपणे प्यारे पुत्रो रे जरिए मुफ्तो रे दिती।⁷ यीशु मसीह खे करूसो पाँदे आपणा खून बाह्ने रे जरिए परमेशरे आसा खे छुटकारा मतलब पापो खे माफ करिता। परमेशरो री कृपा कितणी महान् ए, जो तिने आसा खे बऊत जादा देई राखी।⁸ परमेशरे ये कृपा आसा पाँदे आपणी सारी बुद्धि और समजा साथे बऊत जादा किती।⁹ परमेशरे एबे मसीह रे बारे रे आपणा पेत आसा पाँदे आपणे खरे मकसदो रे मुताबिक प्रकट

कित्तेया जो तिने आपणे आपू रे ठाणी राखेया था। ¹⁰ और योजना ये ए कि सई बखतो पाँदे से जो कुछ बी स्वर्गो रे ए और जो कुछ तरतिया पाँदे ए, सब कुछ तेस मसीह रे अधीन कट्टा करना।

¹¹ मसीह साथे एक ऊणे री बजअ ते आसा खे परमेशरो री तरफा ते जायदात मिली। कऊँकि परमेशरे आसे पईले तेई आपणे लोक करी की चुणी राखे और आपणी योजना रे मुताबिक सारे काम करी राखे। ¹² तिने एडा इजी खे कित्तेया कि आसे यहूदी परमेशरो री स्तुति और महिमा करिए, जो कि आसे मसीह रे विश्वास करने वाले पईले लोक थे। ¹³ तुसे लोके बी सच्चो रा वचन मतलब आपणे उद्धारो रा सुसमाचार सुणी की प्रभु यीशु मसीह पाँदे विश्वास कित्तेया और तुसा लोका पाँदे बी तेसा पवित्तर आत्मा री छाप लगी जेतेरा वादा करी राखेया था। ¹⁴ पवित्तर आत्मा परमेशरो री तरफा ते से बयाना ए कि तेस आसा खे जायदात देणी जो तिने देणे रा वादा करी राखेया था और ये कि तिने आसे आपणे लोक करी की खरीदी ला रा। तिने एडा इजी खे कित्तेया ताकि आसे तेसरी तारीफ और महिमा करी सकिए।

XXXXXXXXXXXXXXXXXXXX

¹⁵ मैं प्रभु यीशुए पाँदे तुसा लोका रा विश्वास और सब परमेशरो रे लोका रे परति तुसा रे प्यारो रे बारे रे सुणी राखेया। ¹⁶ तेबेई आँऊ तुसा खे परमेशरो रा धन्यवाद करना नि छाडदा और आपणी प्रार्थना रे तुसा खे लगातार याद करदा रऊँआ। ¹⁷ आँऊ बिनती कँआ कि म्हारे प्रभु यीशु मसीह रा परमेशर जो महिमा रा पिता ए, तुसा खे बुद्धिया री आत्मा और आपणे ज्ञानो रा प्रयासा देओ कि तुसे परमेशरो खे ठीक तरअ ते जाणी सको। ¹⁸ आँऊ ये बी बिनती कँआ कि परमेशर तुसा रे मनो खे खोली देओ जेते कि तुसे ये जाणी लओ कि आसा रे बुलाणे री उम्मीद क्या ए, और परमेशरो रे लोका रे तेसरी जायदाता री महिमा रा धन केडा ए। ¹⁹ आँऊ चाऊँआ कि तुसे एसा गल्ला खे जाणो कि जो मसीह रे विश्वास करोए परमेशरो गे तिना खे कितणी महान और सामर्थी तागत ए। ये सेई महान तागत ए, ²⁰ जिने मसीह मरे रेया बीचा ते जिऊँदा कित्तेया और स्वर्गो री जगा रे आपणे दाँणे कनारे बठयालेया। ²¹ तेती मसीह सारी प्रदानता, अक्क, राज और सामर्थी पाँदे राज करोआ। से दुनिया रे सबी प्राणिया पाँदे राज करोआ और आऊणे वाली दुनिया रे बी राज करना। ²² और सब कुछ तेसरे पैरो निठे करी ता और से सबी चीजा पाँदे शिरोमणी ठराई की मण्डलिया खे देईता। ²³ मण्डली मसीह रा शरीर ए, मसीह री परिपूर्णता ए, जो सबी रे सब कुछ पूरा करोआ।

2

XXXXXXXXXXXXXXXXXXXX

¹ मसीह रे विश्वास करने ते पईले तुसे पाप और परमेशरो री आज्ञा ना मानणे री बजअ ते मरे रेया जेडे थे। तुसा रे जीवन नि था जो परमेशरो री तरफा ते मिलोआ। ² तेस बखते तुसे दुनिया री रवाजा रे मुताबिक चलो थे और शैतानो री आज्ञा मानेया करो थे। से हाकिम मतलब शैतान जो सर्गो रे दुष्टात्मा खे चलाओए, एबे बी आज्ञा ना मानणे वाले लोका रे मनो रे काम करोआ। ³ इदे आसे बी सब के सब तिना लोका जेडे पईले आपणे पापी शरीरो री इच्छा रे दिन बिताऊँ थे और शरीर और मनो री इच्छा पूरी करँ थे। ओरी लोका जेडे आपणे सबाओ री बजअ ते परमेशरो ते सजा पाणे जोगे थे। ⁴ पर परमेशरे जो दया रा धनी ए, आपणे तेस बडे प्यारो री बजअ ते, जेतेते तिने आसा साथे प्यार कित्तेया। ⁵ जेबे आसे पापो री बजअ ते मरे रे थे, तो आसे मसीह साथे जिऊँदे कित्ते। परमेशरो री कृपा तेई तुसा रा उद्धार ऊई रा। ⁶ तिने यीशु मसीह साथे आसे लोक मरे रेया बीचा ते जिऊँदा कित्ते और स्वर्गिय जगा रे मसीह साथे बठयाले। ⁷ परमेशरे आसा पाँदे यीशु मसीह रे जो बडी दया दखाई तिजी रे जरिए तिने आऊणे वाले जुगो खे आपणी कृपा रा असीम धन दखाया। ⁸ कऊँकि विश्वासो रेई जरिए कृपा तेई तुसा रा उद्धार ऊई रा और ये तुसा री तरफा ते निए, बल्कि परमेशरो रा दान ए। ⁹ और ना कामो री बजअ ते, एडा नि ओ की कोई कमण्ड करो। ¹⁰ परमेशरे आसे बणाई राखे। तिने आसे यीशु मसीह रे तिना खरे कामो री खातर बणाए जेतेखे परमेशरे पईले तेई म्हारे करने खे तयार करी राखेया।

???? ? ? ?

11 इजी बजअ ते याद करो कि तुसे जो जन्मो ते दूजी जाति ए और जो लोक शरीरो रे आधो ते किते रे खतने ते खतने वाले ओए, सेयो लोक तुसा खे बिना खतने रे बोली की तुसा रा मजाक ऊड़ाओए। 12 तिना दिना रे तुसे लोक मसीह खे नि जाणो थे। इस्त्राएलो री प्रजा रे पदो ते लग किते रे थे और वादे री वाचा रे शामिल नि थे। तुसे लोक एते दुनिया रे बिना उम्मीदा ते और बिना ईश्वरो ते जिन्दगी बिताणे लगी रे थे। 13 एक बखत था जेबे तुसे परमेशरो ते दूर थे पर एबे यीशु मसीह रे खूनो रे जरिए तेसरे नेडे आईगे रे।

14 यीशु मसीहे आपू आसा बीचे शान्ति ल्याई। पईले एड़ा था मानो एक दवाले यहूदी और दूजी जाति लग कित्ती री थी। सेयो एकी-दूजे ते कृणा करो थे। पर एबे मसीहे से लग करने वाली दवाले टाली ती और दोनो दल एक करी ते। 15 आपणी मौता रे जरिए तिने मूसा रे बिधानो खे तेसरी बिदिया साथे मटयाईता। ताकि से आपू यहूदिया और दुजिया जातिया बीचे शान्ति ल्याई सको और ईयां एक नया मानवता रा दल बणाई सको। 16 कूरूसो पाँदे आपणी मौता रे जरिए मसीहे दोनो दल एक करी ते और तिना रा परमेशरो साथे मेल कराईता। ईयां यहूदिया और दूजिया जातिया बीचे बैर नाश करी ता। 17 तिने आयी की तुसा खे जो परमेशरो ते दूर थे और तिना खे जो परमेशरो रे नेडे थे, दूई खे मेल-जोलो रा सुसमाचार सुणाया। 18 कऊँकि तेसरे ई जरिए आसे दोनो एक ई आत्मा ते प्रेरित ऊई कि पिते गे पऊँछी सकोए।


19 तो तुसे दुजिया जातिया रे परदेशी और मुसाफर नि रये, बल्कि पवित्र लोका साथे स्वदेशी और परमेशरो रे कराने रे ऊईगे। 20 आसे लोक कट्टे मिली की तेसरे कअर ए जो प्रेरितों और भविष्यवक्त्या री निऊँआ पाँदे बणाई राखेया और जेतेरे कृणे रा पात्थर आपू यीशु मसीह ईए। 21 आसे मसीह रे कट्टे जुड़ी कि प्रभुए खे पवित्र मन्दर बणदे जाऊँए। 22 जिदे तुसे बी पवित्र आत्मा रे जरिए, परमेशरो री रणे री जगा ऊणे खे, साथे-साथे बणाए जाओए।

3

?????? ???? ? ? ?

1 इजी बजअ ते आऊँ पौलुस तुसा खे प्रार्थना करूँआ। तुसा दूजिया जातिया रे लोका खे सुसमाचार सुनाणे खे आऊँ यीशु मसीह रा कैदी ए। 2 तुसे लोके पक्का ई परमेशरो री कृपा ते दिती री तेसा जिम्मेवारिया रे बारे रे सुणेया, जो माखे तुसा लोका रे पले री खातर दिती। 3 जेड़ा आऊँ पईले ई संक्षेपो रे लिखी चुकी रा कि परमेशरे आपू से पेत मां पाँदे प्रयासे रे जरिए प्रकट करी राखेया। 4 एसा चिटठिया खे पद्दी की तुसे जाणी सकोए कि आऊँ मसीह रा से पेत केथो तक समजूँआ। 5 परमेशरे ये गुप्त पेत पिछली पीढ़िया रे लोका पाँदे प्रकट नि कित्तेया, पर एबे आपणे पवित्र प्रेरितों और भविष्यवक्त्या पाँदे पवित्र आत्मा रे जरिए प्रकट करी राखेया। 6 मतलब ये कि यीशु मसीह रे सुसमाचारो रे जरिए दुजिया जातिया रे लोक जायदाता रे साजे और एकी ई शरीरो रे और वादे रे शामिल ए।

7 परमेशरो री कृपा और सामर्था रे जरिए माखे ये खास अक्क मिलेया कि सुसमाचार सुनाणे रे जरिए आऊँ तेसरी सेवा करूँ। 8 मां पाँदे जो सब परमेशरो रे लोका बीचे छोटे ते छोट्टा ए, ये कृपा ऊई, ताकि आऊँ दुजिया जातिया खे मसीह रे कदी नि खत्म ऊणे वाले धनो रा सुसमाचार सुणाऊँ। 9 और सबी मांणूआ खे तेस गुप्त पेतो रे बारे रे बताऊँ जो सब कुछ बनाणे वाले परमेशरे जुगो ते लकोई राखेया था। 10 ताकि एबे मण्डलिया रे जरिए परमेशरो रा कईया प्रकारा रा ज्ञान स्वर्गिय जगा रे प्रदाना और अधिकारिया पाँदे प्रकट कित्तेया जाओ। 11 परमेशरे ये आपणे सदा रणे वाले मकसदो रे मुताबिक कित्तेया जो तिने म्हारे प्रभु यीशु मसीह रे जरिए पुरा कित्तेया। 12 मसीह और तेस पाँदे विश्वासो री बजअ ते एबे आसे इम्मत और परोसे साथे परमेशरो रे नेडे आई सकूँए। 13 इजी री खातर आऊँ तुसा लोका ते बिनती करूँआ कि जो क्लेश तुसा री खातर आऊँ सईणे लगी रा, तिना री बजअ ते इम्मत नि छाडो, कऊँकि ये सब तुसा री ई पलाईया खे ए।



14 आऊँ इजी बजअ ते तेस परमेशर पिते रे सामणे कुटणे टेकुँआ। 15 जेतेते स्वर्ग और तरतिया रे, हर एक कराने रा नाओं राखेया जाओआ। 16 आऊँ परमेशरो ते बिनती करूँआ कि से आपणी महिमा रे धनो रे मुताबिक तुसा खे ये दान देओ कि तुसे तेसरी आत्मा ते, आपणे पितरले माणूए रे सामर्थ पाई की तागतवर ऊँदे जाओ। 17 और विश्वासो रे जरिए मसीह तुसा रे दिलो रे बसो कि परमेशरो खे और एकी-दूजे खे तुसा रा प्यार मजबूत बणो और तुसा खे रूडने ते बचाओ। 18 ईयां तुसे लोक ओरी सबी परमेशरो रे लोका साथे मसीह रे प्यारो री चौड़ाई, लम्बाई, ऊँचाई और गईराई समजी सकणे। 19 आऊँ बिनती करूँआ कि तुसे मसीह रे तेस प्यारो खे जाणी सको, जो ज्ञानो ते पोरे ए, ताकि तुसे परमेशरो री सारी भरपूरिया तक परिपूर्ण ऊँई जाओ।

20 परमेशरो री महिमा ऊँदी रओ। तेसरी ई सामर्था ते जो आसा रे पीतरे काम करोई, से आसा री बिनती और उम्मीदा ते केथी जादा काम करी सकोआ। 21 तेसरी ई महिमा मण्डलिया रे और यीशु मसीह रे पीढ़िया ते पीढ़िया तक जुगो-जुगो तक ऊँदी रओ। आमीन्।

4



1 तो आऊँ जो परभुए रे केदी ए, तुसा ते बिनती करूँआ कि तेस बुलाणे रे मुताबिक जेतेखे परमेशरो तुसे आपणे लोक करी की बुलाई राखे, तेतरे मुताबिक जिन्दगी जिओ। 2 सदा दीनता और नरमाईया साथे रओ। सबरो साथे एकी-दूजे खे सईन करी लो और एकी-दूजे साथे प्यार करो। 3 शान्तिया रे बंदनो रे बंदी की तेसा एकता खे जेतेखे पवित्तर आत्मा देओआ बणाए राखणे री कोशिश करदे रओ। 4 एक ई शरीर ए, एक ई परमेशरो रा आत्मा और एक ई उम्मीद ए, जेतेखे तुसे लोक बुलाई राखे। 5 एक ई परभु ए, एक ई विश्वास और एक ई बपतिस्मा ए; 6 एक ई परमेशर ए, जो सबी लोका रा पिता ए। से सबी पाँदे ए, सबी साथे और सबी रे मौजूद ए।

7 पर मसीह रे आसा बीचा ते हर एकी खे तिना रा काम करने खे लग-लग खास काबलियत देई राखी। 8 तेवेई तो पवित्तर शास्त्र बोलोआ,

“से चूँडिया पाँदे चढ़ेया

और बन्दिया खे बानी की लयी गा
और माणूआ खे दान दिते।”

9 त्यान देओ जेवे पवित्तर शास्त्र बोलोआ, “से चूँडिया पाँदे चढ़ेया” इजी रा मतलब साफ एक कि मसीह तरतिया री सबी ते थालली जगा रे बी उतरेया था। 10 से जो थाले उतरेया, ये सेईए जो सर्गो ते बी ऊँची जगा रे बड़े आदरो साथे चढ़ी गा, ताकि सारिया सृष्टिया खे परिपूर्ण करो। 11 मसीहे आपू कुछ परितर नियुक्त करी की और भविष्यवक्ता नियुक्त करी की और कुछ तो सुसमाचार सुनाणे वाले नियुक्त करी की और कुछ तो रखवाले और उपदेशक नियुक्त करी की देई ते। 12 तिने लोका खे ये काबलियत इजी खे देई राखी कि सेयो परमेशरो रे लोका खे सेवा खे त्यार करी सको और सिद्ध करी सको और मसीह रस शरीर मतलब मण्डलिया री तरक्की करी सको। 13 ये तदुओ तक ऊँदा रणा जदुओ तक आसे सारे जणे आपणे विश्वास और परमेशरो रे पुत्रो री पछ्याणी रे एकजुट नि ऊँई जाईए। तेवे आसे मसीह जेडे एक सिद्ध माणू बणी जाणे और आसे मसीह रे पूरे डील-डोला तक बडी जाणे।

14 तेवे आसे आगो खे बालक नि रणे, जो माणूए री टग-बिद्या और चलाकिया ते, तिना रे बईमो री तरकीब और उपदेशो रे हर एक झोंके ते उछाले और ओरे-पोरे कूमाए जाओए। 15 आसे प्यारो साथे सच बोलिये और मसीह रे जो मण्डलिया रा सिर ए, तिदे हर तरअ ते तरक्की करदे जाईए। 16 जेतें कि सारा शरीर हर एक जोडो री मतादा ते, एकी साथे मिली की और एकी साथे गाठी की, तेस असरो रे मुताबिक जो हर एक अंगो रे ठीक-ठीक काम करने रे जरिए तिदे ओआ, आपू खे बड़ाओई, ताकि से प्यारो रे तरक्की करदा जाओ।

?????? ?? ?? ???????

17 इजी री खातर आऊँ तेस अक्को साथे बोलूँआ जो प्रभुए माखे देई राखेया कि जियाँ अविश्वासी लोक आपणे मनो री अनर्थो री रीतिया पाँदे चलोए, तुसे आजो ते फेर तेड़े नि चलो। 18 कऊँकि तिना रे दमाको रे न्हैरा ऊईगा रा और तेस अज्ञानो री बजअ ते, जो तिना रे ए और तिना रे काठे मनो री बजअ ते, सेयो परमेशरो रे जीवनों ते लग करी राखे। 19 और सेयो सून्न ऊई की लीचइपणो रे लगी गे दे, ताकि सारे गन्दे काम लालसा ते करो।

20 पर तुसे मसीह ते एड़ी शिक्षा नि पाई राखी। 21 बल्कि तुसे सच्ची तेसरी सुणी और जेड़ा प्रभु यीशुए रे सच ए, तिदे ई सिखाए बी राखे। 22 कि तुसे आपणे पुराणे चाल-चलणो रा पुराणा जीवन, जो भरमाणे वाली इच्छा रे मुताबिक प्रष्ट ऊँदा जाओआ, उतारी देओ 23 और आपणे मनो रे आत्मिक सबाओ रे नये बणदे जाओ। 24 और नया सबाओ पईनी लो, जो परमेशरो रे मुताबिक सच्चो री धार्मिकता और पवित्रता रे बणाई राखेया।

25 इजी बजअ ते चूट बोलणा छाडी की हर एक, आपणे साथी विश्वासिया ते सच बोलो, कऊँकि आसे एक ई शरीरो रे अंग ए। 26 जे तुसा खे रोष आई जाओ तो एसा गल्ला रा त्यान राखो कि तुसे रोषो रे पाप नि करो। सूरज डूबणे तक तुसा रा रोष नि रओ 27 और ना ई शैतानो खे मौका देओ। 28 चोरी करने वाला दुबारा चोरी नि करो, बल्कि खरे काम करने रे आपणे आथो साथे मईणत करो, ताकि जेसखे जरूरत ओ, तेसखे देणे खे तेसगे कुछ ओ।

29 कोई गन्दी गल्ल तुसा रे मुँओ ते नि निकलो, पर जरूरता रे मुताबिक सेई निकलो, जो ओरी रिया तरक्किया खे पला ए, ताकि तिजी ते सुणने वालेया पाँदे कृपा ओ। 30 परमेशरो रे पवित्र आत्मा खे आपणे बुरे चाल-चलणो ते दुःख नि देओ, जेतेरे जरिए तुसा खे छुटकारे रे दिनो खे छाप देई राखी। 31 सब प्रकारा री कइवाहट, प्रकोप, रोष, क्लेश, निन्दा और सब बैरभाव तुसा ते दूर ऊई जाओ। 32 एकी दूजे-पाँदे कृपा करने वाले और दयालु बणो। जियाँ परमेशरे मसीह रे तुसा रे अपराध माफ कित्ते, तियाँ ई तुसे बी एकी-दूजे रे अपराध माफ करो।

5

???????? ?? ???????

1 तुसे लोक परमेशरो री प्यारी ल्वादे ए इजी री खातर तुसा रा चाल-चलण तिना रे सबाओ जेड़ा ओ। 2 और प्यारो रे चलो, जेड़ा मसीहे बी तुसा साथे प्यार कित्तेया और आसा री खातर आपणे आपू खे सुखो री खुशबूआ खे परमेशरो रे आगे पेंट करी की बलिदान करी ता।

3 जेड़ा परमेशरो रे लोका खे सई ए, तुसा लोका बीचे व्याभिचार और कोई बी अशुद्ध काम या लोबो री चर्चा तक नि ओ। 4 और ना बेशर्मी, मूर्खता री गल्ल ओ, ना टट्टे री, कऊँकि यो गल्ला शोभा नि देंदिया, बल्कि तुसे लोक परमेशरो खे धन्यवाद ई देया करो। 5 कऊँकि तुसे ये अच्छी तरअ ते जाणोए कि केसी व्याभिचारी या अशुद्ध जणा या लोबी मांणूए री, जो मूर्तिया खे पूजणे वालेया रे बराबर ए, मसीह और परमेशरो रे राज्य रे कोई जायदात नि ए। 6 कोई बी तुसा खे बेकार गल्ला रे सलाह देई कि तोखा नि देओ कऊँकि इना ई कामो री बजअ ते परमेशरो रा रोष, आज्ञा ना मानणे वालेया पाँदे पड़कोआ। 7 इजी री खातर तुसे तिना लोका रे गलत कामा रे शामिल नि ओ।

8 कऊँकि तुसे तो पईले न्हैरे रे थे, पर एवे प्रभुए रे जोति ए, तो जोतिया री ल्वादा जेड़े चलो। 9 जेती ज्योति ए तेती सब प्रकारा री पलाई, धार्मिकता और सच ओआ। 10 और ये परखो कि प्रभुए खे क्या अच्छा लगोआ? 11 और न्हैरे रे निष्फल कामो रे शामिल नि ओ, बल्कि तिना खे लवामे देओ। 12 कऊँकि तिना अविश्वासी लोका रे गुप्त कामो री चर्चा बी शरमा री गल्ल ए। 13 पर जितणेया कामा पाँदे लवामे दित्ते जाओए, सेयो सब जोतिया ते प्रकट ओए, कऊँकि जो सब कुछ प्रकट करोआ, से जोति ए। 14 तेबेई तो से बोलोआ,

“ओ सऊणे वाले जाग

और मुड़दया बीचा ते जिऊँदा ऊई जा,

मसीह री जोति तां पाँदे चमकणी ।”

15 इजी री खातर त्यानो ते देखो कि तुसे केडी चाल चलोए; बिना बुद्धि वालेया जेडे नि पर अक्लमंद लोका जेडे चलो। 16 मौके खे किमती समजो, कऊँकि दिन बुरे ए। 17 इजी बजअ ते निर्बुद्धि नि ओ, पर त्यानो साथे समजो कि प्रभुए री क्या इच्छा ए। 18 शराब पी की मतवाले नि बणो, कऊँकि इजी ते लुचपण ओआ, बल्कि पवित्र आत्मा ते परदे जाओ। 19 आपू बीचे पजन, स्तुतिगान और आत्मिक गीत गाया करो और आपणे-आपणे मनो रे प्रभुए सामणे गाँदे और कीर्तण करदे रओ। 20 सदा सब गल्ला खे म्हारे प्रभु यीशु मसीह रे नाओं ते परमेशर पिते रा धन्यवाद करदे रओ। 21 मसीह रे डरो ते एकी-दूजे रे अधीन रओ।

~~~~~

22 ओ लाड़ियो! आपणे-आपणे लाड़े रे एडे अधीन रओ, जेडे प्रभुए रे। 23 कऊँकि लाड़ा, लाड़िया रा सिर ए, जेड़ा कि मसीह मण्डलिया रा सिर ए और आपू ई मण्डलिया रा उद्धारकर्ता ए जो तिना रा शरीर ए। 24 जेड़ी मण्डलिया मसीह रे अधीन ए। तियाँ ई लाड़िया बी हर गल्ला रे आपणे-आपणे लाड़े रे अधीन रओ।

25 ओ लाड़ियो! आपणी-आपणी लाड़िया साथे प्यार राखो, जेड़ा मसीहे बी मण्डलिया साथे प्यार करी की आपणे आपू खे मण्डलिया खे देईता। 26 तिने एड़ा इजी खे कित्तेया कि से मण्डलिया खे वचनो रे जरिए पापो ते शुद्ध करी की पवित्र बणाओ, ठीक तियाँ ई जियाँ लोक केसी चीजा खे पाणिए साथे तोई की साफ करोए। 27 और तेसा खे एक एड़ी तेजस्वी मण्डली बणाई की आपू साथे खड़ी करो, जिदे ना कलंक, ना झुर्री, ना ई कोई ओर एड़ी चीज ओ, बल्कि पवित्र और निर्दोष ओ। 28 ईयाँ ई लाड़ा आपणी-आपणी लाड़िया साथे आपणे शरीरो जेड़ा प्यार राखो, जो आपणी लाड़िया खे प्यार करोआ, से आपू साथे प्यार करोआ। 29 कऊँकि कोई बी आपणे शरीरो ते बैर नि राखदा, बल्कि तिजी रा पालण-पोषण करोआ, जेड़ा मसीह बी मण्डलिया साथे करोआ। 30 कऊँकि आसे मसीह रे शरीरो रे अंग ए। 31 जेड़ा कि पवित्र शास्त्र बोलोआ, “इजी बजअ ते मर्द आपणे माए-बाओ छाडी की आपणी लाड़िया साथे मिले रा रणा और सेयो दोनो एक तन ऊणे।” 32 ये पेत तो बड़ा ए, पर आऊँ मसीह और मण्डलिया रे बारे रे बोलण लगी रा। 33 पर ये तुसा खे बी लागू ओआ कि तुसा बीचा ते हर एक आपणी लाड़िया साथे, आपू जेड़ा प्यार राखो और लाड़ी बी आपणे लाड़े रा आदर करो।

## 6

~~~~~

1 ओ बालको, आपणे माया-बाओ रे आज्ञाकारी बणो, एड़ा करना तुसा खे पला ए कऊँकि तुसे प्रभुए रे ए। 2 “आपणे माया-बाओ रा आदर करो।” ये एड़ी पईली आज्ञा ए जेते साथे वादा बीए। 3 से वादा ये ए कि, “कि तेरा पला ओ और तूँ तरतिया पाँदे बऊत दिनो तक जिऊँदा रओ।”

4 ओ बाल-बच्चे वालेयो! आपणे बच्चेया खे रिस नि देओ, पर प्रभुए री शिक्षा और चेतावणी देंदे ऊए, तिना खे पालो-पोषो।

~~~~~

5 ओ दासो, जो लोक दुनिया रे मुताबिक तुसा रे मालक ए तिना री आपणे मनो री सच्चाईया ते आदर करदे और डरदे ऊए आज्ञा मानो, जेड़ी मसीह री मानोए। 6 माणूआ खे खुश करने वालेया जेडे दखाणे खे सेवा नि करो, पर मसीह रे दासो जेडे, मनो ते परमेशरो री इच्छा पाँदे चलो 7 खुशिया साथे एक सेवको रे रूपो रे एडे काम करो जेड़ा मानो तुसे लोका री नि प्रभुए री सेवा करने लगी रे। 8 कऊँकि तुसे जाणोए कि जेस केसी जेड़ा खरा काम करना, चाए दास ओ, चाए आजाद ओ, प्रभुए ते तेड़ा ई इनाम पाणा।

9 ओ मालको! तुसे बी तमकिया देणा छाडी की तिना साथे तेड़ा ई बर्ताव करो, कऊँकि तुसे जाणोए कि तिना रा और तुसा दूँई रा मालक स्वर्गो रे ए और से केसी रा पक्षपात नि करदा।

?????? ??????? ?? ???????

10 मेरा आखरी वचन तुसा लोका खे ये ए कि प्रभुए रे और तेसरी शक्तिया रे असरो रे तागतबर बणो। 11 परमेशरो रे सारे अधियार बानी लो, ताकि तुसे शैतानो री योजना रे सामणे खड़े रई सको। 12 कऊँकि म्हारा ये मलयुद्ध खून और मासो ते बणे रे माणूआ ते निए, बल्कि प्रदाना ते और अधिकारिया ते और एसा दुनिया रे न्हरे रे हाकिमा ते और तेस दुष्टो री आत्मिक सेना साथे ए, जो सर्गो रे ए। 13 इजी री खातर परमेशरो रे सारे अधियार बानी लो, ताकि तुसे बुरे दिनो रे सामणा करी सको और सब कुछ पूरा करी की खड़े रई सको। 14 तो सच्चाईया साथे आपणा लक बानी की और तमो री झिलम पईनी की 15 और पैरो रे मेल-जोलो रे सुसमाचारो रे जोड़े पईनी की 16 और तिना सबी साथे विश्वासो री ढाल लयी की खड़े रओ, जेते साथे तुसे, तेस दुष्टो रे सारे बले रे तीर बजयाई सको। 17 और उद्धारो रा टोप और आत्मा री तलवार, जो परमेशरो रा वचन ए, लयी लो।

18 हर बखत और हर प्रकारा ते पवितर आत्मा री अगुवाईया रे प्रार्थना और बिनती करदे रओ और इजी खेई जागदे रओ कि सारे परमेशरो रे लोका खे लगातार बिनती करेया करो। 19 और माखे बी प्रार्थना करो कि माखे बोलणे रे बखते एड़ा प्रबल वचन दितेया जाओ, ताकि आऊँ इम्मता साथे सुसमाचारो रा पेट बताई सकूँ, 20 इजी री खातर आऊँ जंजीरा साथे जकड़े रे राजदूतो जेड़ी सेवा करने लगी रा। प्रार्थना करो कि माखे जियाँ बोलणा चाईयो, तियाँ ई आऊँ बिना डरे सुसमाचार सुणाई सकूँ।

????? ???????

21 तुखिकुस जो मेरा प्यारा साथी विश्वासी और प्रभुए रे विश्वासो जोगा सेवक ए, तेस तुसा खे सब गल्ला बताणिया, ताकि तुसे बी मेरी दशा जाणी लो कि आऊँ केड़ा रऊँआ। 22 से मैं तुसा गे इजी खेई पेजी राखेया, ताकि तुसे म्हारी दशा जाणो और से तुसा रे मनो खे औसला देओ। 23 आऊँ परमेशर पिता और प्रभु यीशु मसीह ते प्रार्थना करूँआ कि से तुसा खे शान्ति देओ। तुसा लोका खे एकी-दूजे साथे प्यारो साथे रणे रे और मसीह रे विश्वासो रे बणे रणे रे मताद करो। 24 परमेशरो री कृपा तिना सबी लोका पाँदे बणी री रओ जो म्हारे प्रभु यीशु मसीह ते कदी नि खत्म ऊणे वाला प्यार करोए।

## फिलिप्पियो फिलिप्पी नगरो री विश्वासी मण्डलिया खे प्रेरित पौलुसो री चिट्ठी भूमिका

फिलिप्पियो रे नाओं पौलुस प्रेरितों री चिट्ठी यूरोपो री तरतिया पाँदे बणी री पईली मण्डलिया खे लिखी थी, जेतेरी स्थापना पौलुसे कित्ती थी। से रोमी राज्य रे मकिदूनिया रे मौजूद थी। ये चिट्ठी तेस बखते लिखी थी जेबे प्रेरित जेला रे था और जेबे से ओरी काम करने वालेया मसीहिया ते आपणे बिरोदो रिया बजअ ते परेशान और फिलिप्पियो री मण्डलिया रे ऊणे वाली गलत शिक्षा ते दुःखी था। तेबे बी ये चिट्ठी एक खुशी और निश्च खे बताओई जेतेखे बस यीशु मसीह रे, पौलुसो रे गईरे विश्वासो रे जरिए ई समजयाई सकोए।

एसा चिट्ठिया खे लिखणे री खास बजअ थी फिलिप्पिया रे मसीहिया खे धन्यवाद देणा, तेसा पेंटा खे जो तिने पौलुसो री जरूरता रे बखते तेसखे पेजी थी। से एस मौके रा फायदा तिना खे याओ देणे खे करोआ, ताकि सेयो तेसरी और साथे-साथे आपणी सारी परेशानिया रे बावजूद याओ और विश्वास राखो। से तिना ते प्रार्थना करोआ कि सेयो स्वार्थी इच्छा और कमण्डो रे बदले यीशुए रे नम्र सवाओ खे अपणाओ। से तिना खे याद दलाओआ कि मसीह रे तिना री जिन्दगी परमेशरो रा एक दान ए, जो तिने विश्वासो रे जरिए पाई राखेया, ना कि यहूदी बिधानो री बिदिया रा पालन करने रे जरिए। से तेसा खुशिया और शान्तिया रे बारे रे लिखोआ जो परमेशर तिना लोका खे देओआ, जो मसीह साथे एकता री जिन्दगी जियोए।

मसीही विश्वास और जिन्दगिया रे खुशी, निश्चा, एकता और दृढ़ता पाँदे जोर देणा एसा चिट्ठिया रा खास गुण ए। ये चिट्ठी फिलिप्पियो री मण्डलिया रे प्रति पौलुसो रे गईरे प्यारो खे बताओई।

☞☞☞☞☞

भूमिका 1:1-11

पौलुसो री व्यक्तिगत परिस्थितिया 1:12-23

मसीह रे जिन्दगी 1:27-2:18

तीमुथियुस और इपफरुदीतुसो खे योजना 2:19-30

दुश्मण और खतरेया रे खलाफ चेतावणी 3:1-4:9

पौलुस और फिलिप्पी दोस्त 4:10-20

निचोड़ 4:21-23

1 ये चिट्ठी यीशु मसीह रे दास पौलुस और तीमुथियुसो री तरफा ते ए। आँऊ ये चिट्ठी फिलिप्पी नगरो रे रणे वाले परमेशरो रे सारे पवित्र लोक, अध्यक्ष और सेवका खे लिखणे लगी रा जो यीशु मसीह रे ए।<sup>2</sup> म्हारे पिता परमेशर और प्रभु यीशु मसीह री तरफा ते तुसा खे कृपा और शान्ति मिलदी रओ।

☞☞☞☞☞ ☞☞ ☞☞☞☞☞☞☞☞ ☞☞ ☞☞☞☞☞☞☞

3 आऊँ जेबे-जेबे तुसा खे याद करूँआ, तेबे-तेबे आपणे परमेशरो रा धन्यवाद करूँआ।<sup>4</sup> और जेबे कदी तुसा सबी खे प्रार्थना करूँआ, तो सदा खुशिया साथे बिनती करूँआ।<sup>5</sup> कऊँकि तुसे पईले दिनो ते लयी कि आजो तक प्रभु यीशुए रे सुसमाचारो खे फैलाणे खे मेरे सहभागी रई रे।<sup>6</sup> और माखे एते गल्ला रा विश्वास ए कि परमेशरे जिने तुसा रे खरा काम शुरू करी राखेया, तेस ई से काम जेबे यीशु मसीह फेर वापस आऊणा तेस दिनो तक पूरा करना।

7 ये खरा ए कि आऊँ तुसा सबी खे एडा ई बिचार करूँ, कऊँकि आऊँ तुसा ते बऊत प्यार करूँआ और जेबे आँऊ जेला रे ए और सुसमाचारो री रक्षा खे और इजी खे सच साबित करने रे तुसे सब

मां साथे कृपा रे शामिल ए।<sup>8</sup> इदे परमेशर मेरा गवा ए कि जियौं यीशु मसीह तुसा ते प्यार करोआ सच्ची आऊं बी तियाँ ई तिना जेड़ा तुसा सबी ते प्यार करूँआ।<sup>9</sup> और आऊं ये प्रार्थना करूँआ कि तुसा रा एकी दूजे ते प्यार, ज्ञान और पूरिया समजा साथे ओर बी बड़दा जाओ।<sup>10</sup> तेवेई तुसे इना गल्ला खे परखणे रे जोगे ऊई जाओ कि कुण जी गल्ल करने खे खरी ए और मसीह रे फेर वापस आऊणे रे दिनो तक पवित्र और निष्कलंक बणे रे रओ।<sup>11</sup> और यीशु मसीह रे जरिए पैदा ऊणे वाले धार्मिकता रे कामा ते आपू खे परी लओ, जेते कि परमेशरो री महिमा और स्तुति ऊँदी रओ।

XXXXXXXXXX XXXX XXXXXXXXXXXXXXXXXXXX

12 ओ प्यारे साथी विश्वासियो! आऊं चाऊंआ कि तुसे ये जाणी लो कि मां पाँदे जो बीती रा, तिजी री बजअ ते बऊत सारे लोके सुसमाचारो पाँदे विश्वास कित्तेया।<sup>13</sup> एथो तक कि कैसर राजे रे राज्य री सारी पलटण और बाकि बचे रे सारे लोका सामणे ये आईगा रा कि आऊं मसीह री खातर जेला रे कैद ए।<sup>14</sup> और पूरभुए रे जो पाई ए, तिना बीचा ते बऊत जणे मेरे जेला रे कैद ऊणे री बजअ ते, मजबूत विश्वासो साथे, परमेशरो रा वचन नशंग सुनाणे री ओर बी इम्मत करोए।

15 ये सच ये कि कुछ लोक जलन और चगड़े री बजअ ते मसीह रे सुसमाचारो रा पूरचार करोए और कुछ खरे इरादे ते।<sup>16</sup> ये एड़े लोक जो मसीह रे सुसमाचारो रा पूरचार अच्छे इरादे और प्यारो ते करोए। सेयो जाणोए कि आऊं यीशु मसीह रे सुसमाचारो रा जबाब देणे खे जेला रे कैद ए<sup>17</sup> पर ये चगड़ा करने वाले लोक जो सच्चाईया ते नि पर आपणे मतलबो खे मसीह रा सुसमाचार सुणाओए, ये सोचोए की कि जेबे आऊं जेला रे कैद ए, माखे ओर जादा क्लेश पैदा करो।<sup>18</sup> तो क्या ऊआ? बस ये कि हर कियाँ चाए बुरिया बजअ ते, चाए सच्चाईया ते मसीह रा सुसमाचार सुणाया जाओआ। आऊं इजी ते खुश ए और खुश ऊँदा रणा बी।

XXXXXXXXXX XXX XXXX X

19 कऊँकि आऊं जाणूँआ कि तुसा री प्रार्थना रे जरिए और यीशु मसीह री तरफा ते पेजी री पवित्र आत्मा री मतादा रे जरिए, इजी रा ईनाम, माखे अच्छा ई ऊणा।<sup>20</sup> आऊं तो दिलो ते येई इच्छा और उम्मीद राखूँआ कि आऊं किजी बी गल्ला रे शर्मिंदा नि ओऊं, पर जेडी मेरी बड़ी इम्मता री बजअ ते, मसीह री तारीफ मेरे शरीरो रे जरिए सदा ऊँदी रओई, तेड़ा ई एबे बी ओ, चाए आऊं जिऊँदा रऊँ या मरी जाऊँ।<sup>21</sup> कऊँकि जे आऊं जिऊँ तो सिर्फ मसीह री खातर, और जेबे आऊं मरूँ तो से माखे बऊत ई अच्छा ऊणा कऊँकि आऊं मरने ते बाद बी मसीह साथे रणा।<sup>22</sup> पर जे शरीरो रे जिऊँदा रणा ई मेरे कामो खे फायदेमंद ए, तो आऊं नि जाणदा कि केसखे चुणुँ? <sup>23</sup> कऊँकि इना दुई बीचा ते केसी एकी खे चुणना माखे बऊत ई कठण ए। जिऊ तो चाओआ कि मरी की मसीह गे जाई की रऊँ, कऊँकि ये माखे बऊत ई अच्छा ए।<sup>24</sup> पर शरीरो रे रणा ओर बी जरूरी ए कऊँकि तुसा खे मेरी मतादा री जरूरत ए।<sup>25</sup> इजी खे कि माखे इजी रा विश्वास (भरोसा) ए कि आऊं जिऊँदा रणा, बल्कि तुसा सबी साथे रणा, जेते की आऊं तुसा खे विश्वासो रे मजबूत करने और तिदे खुश रणे रे तुसा री मतादा करूँगा।<sup>26</sup> जो कमण्ड तुसे मेरे बारे रे करोए, से मेरा तुसा गे जेला ते फेर वापस आऊणे ते, यीशु मसीह रे ओर जादा बड़ी जाओ।

27 बस इतणा करो कि तुसा रा चाल-चलण मसीह रे सुसमाचारो जोगा ओ, तेबे चाए आऊं आईकि तुसा खे देखूँ, चाए ना बी आऊं, बस तुसा रे बारे रे ये सुणूँ कि तुसे एक ई इरादे रे मजबूत रओ और एक मन ऊई कि सुसमाचारो रे विश्वासो खे मईणत करदे रओए।<sup>28</sup> केसी बी गल्ला रे विरोदिया ते डरदे नि, तुसा री इम्मत तिना खे नाशो रा साफ चिह्न ए, पर तुसा खे उद्धारो रा और ये परमेशरो री तरफा ते ए।<sup>29</sup> कऊँकि मसीह री बजअ ते तुसा पाँदे ये कृपा ऊई कि ना बस तेस पाँदे ई विश्वास करो, पर तेसरिया तँई दुःख बी सईन करो,<sup>30</sup> और तुसा खे तेड़ा ई दुःख सईन करना ए, जेड़ा तुसे आऊं सईन करदे देखी राखेया, जेबे आऊं तुसा साथे फिलिप्पी नगरो रे था और एबे बी सुणोए कि दुःख सईन करूँआ।

## 2

~~~~~

1 तेबई जे तुसा लोका बीच मसीह रे कुछ बी औसला, प्यारो रे जरिए पैदा इम्मत, आत्मा री सहभागिता और कुछ करुणा और दया ए, 2 तो मेरी ये खुशी पूरी करो कि एकी दूजे ते सहमत रओ और एक जेड़ा प्यार राखो, एकी दूजे ते मेलजोल राखो और एक ई इच्छा राखो। 3 आपणे फाईदे या कमण्डो ते कुछ नि करो, पर दीनता ते एकी-दूजे रा आपू ते जादा त्यान राखो। 4 हर एक आपणे ई पलाईया री नि, बल्कि दूजे री पलाईया री बी चिन्ता करेया करो। 5 जेड़ा यीशु मसीह रा सबाओ था, तियाँ ई तुसा रा सबाओ बी एकी-दूजे साथे ऊणा चाइयो।

6 हालाँकि मसीह सच्ची परमेशर था तेबे बी तिने लोक एसा गल्ला खे मजबूर नि कित्ते कि सेयो तेस साथे परमेशरो जेड़ा बर्ताव करो,
7 बल्कि आपणे आपू खे एड़ा शून्य करी ता और दासो जेड़ा बणीगा और मांणूए जेड़ा ऊईगा।

8 और मांणूए रे रूपो रे आयी की आपू खे दीन कितेया और से आपणी मौता तक आज्ञाकारी रया, एथो तक कि तिने क्रूसो पाँदे दर्दनाक मौत बी सईन करी ली।

9 इजी बजअ ते परमेशरे तेसखे सबी ते ऊचवी पदवी दिती और तेसखे से नाओं दितेया, जो सबी नाओं ते बड़ा ए।

10 ताकि जो स्वर्गो रे ए और तरतिया रे ए और तरतिया ते थाले ए, सेयो सारे यीशुए रे नाओं खे तेसखे आदर देणे खे जानूआ रे पाअरे बैठो।

11 और पिता परमेशरो री महिमा खे हर माणू आपणे मुंए ये मानी लओ कि यीशु मसीह ई प्रभु ए।

~~~~~

12 तो ओ प्यार साथी विश्वासियो! जियाँ तुसे सदा ते आज्ञा मानदे आयी रे, तियाँ ई एबे बी, ना बस मां साथे रंदे ऊए, पर खास करी की एबे मेरे दूर रंदे ऊए बी डरदे और थरथरंदे ऊए लगातार अच्छे काम करो जो तुसा रे उद्धारो ते आओए। 13 कऊँकि ये परमेशर ईए, जो आपणी पवित्र आत्मा रे जरिए तुसा रे मनो रे तेसरी खरी इच्छा और खरे काम करने री इम्मत देओआ।

14 सारे काम बिना कुड़कुड़ाए और बिना बईसा ते करेया करो। 15 ताकि तुसे निर्दोष और पोले ऊई की टेडे और टीट लोका बीच परमेशरो री निष्कलंक ल्वाद बणे रे रओ, जिना बीच तुसे जीवनो रा वचन लयी की दुनिया रे सर्गो रे चमकीले तारेया जेड़े दिशोए। 16 ताकि मसीह रे वापस आऊणे रे दिने माखे कमण्ड करने री बजअ ओ कि ना मेरी दौड़-तूप और ना ई मेरी कड़ी मईणत करना बेकार ऊआ। 17 तुसा रा मसीह रे विश्वास और तुसा री सेवा परमेशरो खे चढ़ाई री बलिया जेड़े ए। जे सेयो माखे मारी बी देओ तेबे बी आऊँ खुश ए और तुसा सबी साथे खुशी मनाऊँआ। 18 तियाँ ई तुसे बी खुश ओ और मां साथे खुशी मनाओ।

~~~~~

19 माखे प्रभु यीशुए रे उम्मीद ए कि मां तीमुथियुस तुसा गे चट ई पेजणा ताकि तुसा रा आल सुणी की मेरा औसला बड़ो। 20 कऊँकि मांगे एड़े सबाओ रा कोई निए जो साफ मनो ते तुसा री चिन्ता करो। 21 कऊँकि सब आपणे स्वार्थ निकालने री खोजा रे रओए, ना कि यीशु मसीह री। 22 पर तुसे तो तीमुथियुसो री योग्यता खे जाणोए कि जेड़ा पाऊ पिते साथे करोआ, तेड़ा ई तिने एस सुसमाचारो खे फैलाणे दे, मां साथे कड़ी मईणत कित्ती। 23 तो माखे उम्मीद ए कि जियाँ ई माखे पता लगणा कि मेरी क्या दशा ऊणी, तियाँ ई मां से फटाफट पेजी देणा। 24 और माखे प्रभुए पाँदे विश्वास ए कि मां आपू बी चट आऊणा।

25 पर मैं इपफरुदीतुसो खे तुसा गे वापस पेजणा जरूरी समजेया। ये मेरा पाई और मेरा सहकर्मी और मां साथे संगी सिपाई और तुसा रा संदेश पऊँछाणे वाला और जरूरी गल्ला रे मेरी सेवा करने

वाला ए। ²⁶ कऊँकि तेसरा मन तुसा सबी रे लगी रा था, और से बेचैन रओ था, कऊँकि तुसे तेसरी बमारिया रा आल सुणेया था। ²⁷ पक्का से तो बमार ऊईगा था, एथो तक कि मरने वाला था। पर परमेशरे तेस पाँदे दया किती और बस तेस ई पाँदे नि, पर मां पाँदे बी किती ताकि माखे दुःखो पाँदे दुःख नि ओ। ²⁸ इजी री खातर मैं तेसखे पेजणे री ओर बी कोशिश किती ताकि तुसे तेस साथे फेर प्रभुए रे मिली कि खुश ऊई जाओ और मेरी चिन्ता बी कम ऊई जाओ। ²⁹ इजी री खातर तुसे प्रभुए रे, तेस साथे बऊत खुशिया ते मिलेओ और एडेया री आओ-बैठ करेया करनी। ³⁰ कऊँकि सेई मसीह रे कामो खे आपणे प्राणो खे मुसीबता रे पाई की मरने जोगा ऊईगा था, ताकि जो कमी तुसा री तरफा ते मेरी सेवा रे ऊई, तिजी खे पूरी करो।

3

????? ????????

¹ इजी री खातर ओ प्यारे साथी विश्वासियो, प्रभुए रे खुश रओ! सेयो ई गल्ला बार-बार लिखणे रे माखे कोई कष्ट नि ऊँदा पर ये गल्ला तुसा खे चूठिया शिक्षा ते बचाओईया। ² तिना लोका ते चौकस रओ जो तुसा खे जंगली कुत्तेया जेडे खतरनाक ए, बुरा काम करने वाले ए और ये बोलोए कि उद्धार पाणे खे खतना जरूरी ए। ³ कऊँकि परमेशरो रे सच्चे लोक आसे ईए। जो परमेशरो री पवित्तर आत्मा री अगुवाईया ते भक्ति करोए और मसीह यीशुए रे कमण्ड करोए और शरीरो रे कामा पाँदे परोसा नि राखदे।

⁴ जे केसी ओरी खे शरीरो रे कामा पाँदे परोसा राखी की त्वालिया देणे रा बिचार ओ, तो जे आँऊ चाऊँ तो शरीरो रे कामा पाँदे बी परोसा राखी की आँऊ बी तिना ते जादा त्वालिया देई सकूँआ। ⁵ जियाँ परमेशरे आज्ञा दिती तियाँ ई आटुए दिने मेरा खतना ऊआ, आऊँ इस्राएलो रे वंशो रा और विन्यामीनो रे गोत्रो राए; आँऊ पक्का इब्रानी ए और मेरे बुजुगं बी पक्के इब्रानी थे। मूसे रे बिधानो खे मानणे रे बारे रे जे बोलो तो आँऊ फरीसी ए। ⁶ इम्मता रे बारे रे जे बोलो तो, मण्डलिया खे सताणे वाला और यहूदी बिधानो खे मानणे रे बारे रे जे कोई बोलो तो, आँऊ तर्मी माणू था। कऊँकि मैं तेसा बिधानो खे मानणे रा पालन कितेया।

⁷ पर जो-जो गल्ला मैं सोचिया कि सेयो मेरे लाबो री थिया, एबे सेई मैं मसीह खे ओर बी जादा जाणने खे बेकार समजी लईया। ⁸ इजी ते बी जादा बढी की आँऊ आपणे प्रभु यीशु मसीह खे जाणने री जरूरता रे सामणे सारी गल्ला खे बेकार समजूँआ, जेतेरी बजअ ते मैं सारी चीजा रा नुकशाण उठायो और तिना खे कूड़ा समजूँआ; जेते कि आऊँ मसीह खे जाणी सकूँ। ⁹ ताकि आँऊ तेस साथे एकता रे जी सकूँ, ना कि आपणी तेसा धार्मिकता साथे, जो मूसे रा बिधानो ते ए, बल्कि तेसा धार्मिकता साथे, जो मसीह पाँदे विश्वास करने री बजअ ते ए और परमेशरो री तरफा ते विश्वास करने ते माखे मिलोई। ¹⁰ आऊँ ये चाऊँआ कि मसीह खे जाणी लऊँ। तेसरे फेर जिऊँदे ऊणे री सामर्था खे महसूस करूँ, और तिना साथे दुःखो रे सहभागी ऊई की मौता रे तिना जेड़ा बणी जाऊँ। ¹¹ ताकि आऊँ कियाँ बी मरे ऊए रे बीचा ते फेर जिऊँदे ऊणे रे पदो तक पऊँछी सकूँ।

????? ?? ???? ?? ??????

¹² ये मतलब नि कि आऊँ इना सबी चीजा खे पईले तेई पायी चुकी रा या सिद्ध ऊई चुकी रा। पर आँऊ तेसा चीजा खे पाणे री खातर दौड़ी की आगे बढदा चली जाणे लगी रा कि आँऊ सिद्ध ऊई जाऊँ। जेतेखे यीशु मसीह आऊँ चुणेया था। ¹³ ओ साथी विश्वासियो! मेरा मानणा ये निए कि आऊँ तिजी खे पायी चुकी रा। पर बस ये एक काम करूँआ कि जो गल्ला बीती चुकी रिया, तिना खे पूली की आगे री तरफा खे बड़दा जाऊँआ। ¹⁴ आँऊ नशाणे री तरफा खे दौड़दा जाऊँआ, ताकि आँऊ स्वर्गो रे बुलाए जाणे रा ईनाम पाई सकूँ। जेतेरी खातर परमेशरे आऊँ यीशु मसीह रे जरिए स्वर्गो दे बुलाई राखेया।

15 तो आसा बीचा ते जितणे विश्वासो रे मजबूत ए, येई सोच राखो और जे केसी गल्ला रे तुसा री ओर ई सोच ओ, तो, परमेशेर तुसा खे से बी बताई देणा। 16 तेबेई आसा खे तेसा सच्चाईया रे मुताबिक चलणा चाईयो जो परमेशेर आसा खे पईले तेई देई राखी।

17 ओ साथी विश्वासियो! तुसे सब मिली की मेरी जी चाल चलो और तिना लोका खे बी जो मेरी जेड़ी चाल चलोए पछयाणो और तिना जेड़ी चाल चलो। 18 कऊँक बऊत बुरी चाल चलोए, जेतरे बारे आऊँ तुसा खे बार-बार बताई चुकी रा और एवे बी रोयी-रोयी की बोलूँआ कि सेयो आपणे चाल-चलणो ते मसीह रे करूसो रे बैरी ए। 19 तिना रा अंत नाश ए। तिना रा ईश्वर तिना री शारीरिक जरूरत ए, सेयो आपणी शर्मा री गल्ला पाँदे कमण्ड करोए। तिना रा मन तरतिया री चीजा पाँदे लगे रा रओआ। 20 पर म्हारा आपणा देश स्वर्गो रे ए और आसे एक उद्धारकर्ता प्रभु यीशु मसीह रे तेथा ते वापस आऊणे री बाट देखणे लगरी रे। 21 से आपणी शक्तिया रे तेस असरो रे मुताबिक जेतरे जरिए से सारिया चीजा खे आपणे वशो रे करी सकीआ। से म्हारे दीन-हीन शरीरो रा रूप बदली की, आपणी महिमा रे शरीरो रे मुताबिक बणाई देणा।

4

1 ओ प्यारे साथी विश्वासियो! आऊँ तुसा सबी ते प्यार करूँआ और तुसा लोका ते मिलणे री बडी इच्छा राखूँआ। प्रभुए रे विश्वासो जोगे और स्थिर बणे रे रओ जेड़ा मैं तुसा खे बताई राखेया। तुसे सब मेरी खुशी और ईनाम ए।



2 आऊँ यूओदिया ते बिनती करूँआ और सुन्तुखे ते बी बिनती करूँआ कि सेयो प्रभुए रे एक मन ऊई कि रओ। 3 ओ सच्चे सहकर्मी! आऊँ तांते बिनती करूँआ कि तूँ इना जवाणसा री मेल-मिलाप करने रे मताद कर, कऊँक इने मां साथे सुसमाचार फैलाणे दे, क्लेमंस और मेरे ओर साथे काम करने वालेया समेत मईणत किती, जिना सबी रे नाओ जीवनी री कताबा रे लिखी राखे।

4 प्रभुए रे सदा खुश रओ, आऊँ फेर बोलूँआ कि खुश रओ। 5 तुसा री नरमाई सबी लोका सामणे प्रकट ओ। प्रभुए रा वापस आऊणा नेडे ए। 6 केसी बी गल्ला री चिन्ता नि करो। पर हर एकी परिस्थितिया रे तुसा री अर्ज, प्रार्थना और बिनतिया रे जरिए, धन्यवादा साथे परमेशरो सामणे ल्याए जाओ। 7 तेबे परमेशरो तुसा खे शान्ति देणी। ये शान्ति माणूँआ री समजा ते बिल्कुल बारे ए। एसा तुसा रे दिल और तुसा रे सोच-बिचार मसीह यीशुए रे सयी-सलामत राखणे।

8 आखरी रे ओ साथी विश्वासियो! तुसे आपणा त्यान तिना गल्ला पाँदे लगाओ जो-जो गल्ला सच ए, आदरणीय ए, खरिया ए, पवित्र ए, सुन्दर ए और मनो खे खरिया लगणे वालिया ए। तिना ई गल्ला रे बारे रे सोचो जो उत्तम और तारीफा जोगिया ए। 9 जो गल्ला मैं तुसा खे सिखाई राखिया और तुसे मांते सुणिया और सिखिया और सेयो मानिया, और जो माखे करदे ऊए देखोए, तिना ई गल्ला खे मानेया करो। तेबे परमेशर, जो शान्तिया री सुबल ए तुसा लोका साथे रणा।



10 आऊँ प्रभुए रे बऊत खुश ए कऊँक एवे इतणे दिनी ते बाद फेर तुसे मेरी चिन्ता मेरी मताद करने खे किती। पक्का तुसा खे शुरूओ रे बी इजी गल्ला री चिन्ता थी, पर तुसा खे मेरी मताद करने रा मौका नि मिलेया। 11 ये नि कि आऊँ आपणी कमिया री बजअ ते ये बोलणे लगरी रा, कऊँक मैं ये सिखी राखेया कि जेत दशा रे आए, तिदे ई तसल्ली राखूँ। 12 मैं गरीबी और भरपूरी दूँई दशा रे रणा सीखी ला रा। हर एकी गल्ला रे और सबी दशा रे मैं रजे रे ऊणा या पूखा रणा और बढ़ना-कटणा सीखी ला रा। 13 मसीह रे जरिए जो माखे सामर्थ देओआ तिदे आऊँ सब कुछ करी सकूँआ।

14 फेर बी तुसे मेरे बुरे बखतो रे मेरी मताद करी की बऊत खरा काम कितेया। 15 ओ फिलिप्पिया रे लोको! तुसे आपू बी जाणोए कि सुसमाचार प्रचारो री शुरूआता दे, जेबे आऊँ मकिदुनिया प्रदेशो ते चली पड़ेया, तेबे तुसा खे छाडी की ओरी किने बी मण्डलिए लणे-देणे रे बारे रे मेरी मताद नि किती। 16 ईयां ई जेबे आऊँ थिस्सलुनीके रे था, तेबे बी तुसे मेरी जरूरत पूरी करने खे, एकी बारिया

ते बी जादा मताद पेजी । 17 आँऊ ये इजी खे नि बोलदा कि माखे पैसेया री कुछ मताद चाईयो, पर ये कि तुसे से आशीष पाओ जो परमेशरो री तरफा ते दान देणे ते आओई । 18 मांगे सब कुछ ए, बल्कि बऊत जादा बी ए, जो चीजा तुसे इपफरुदीतुसो रे आथो रे पेजिया थिया, तिना खे पाई की आऊँ रज्जी गा रा । से तो सुख देणे वाली खुशबू जेड़ी और मानणे जोगा बलिदान ए, जो परमेशरो खे अच्छा लगोआ । 19 आँऊ प्रार्थना करूँआ कि परमेशर बी आपणे तेस धनो रे मुताबिक, जो महिमा समेत यीशु मसीह रे ए, तुसा री सारी जरूरता खे पूरी करो । 20 म्हारे परमेशर और पिते री महिमा जुगो-जुगो तक ऊँदी रओ । आमीन्

???? ???????

21 यीशु मसीह रे परमेशरो रे सब पवित्तर लोका खे मेरी तरफा ते नमस्कार बोलो । जो विश्वासी पाई मां साथे ए, सेयो तुसा खे नमस्कार बोलोए । 22 सब परमेशरो रे पवित्तर लोक जो एती ए, खास करी की जो महाराजा कैसरो रे कराने रे विश्वासी ए, तुसा खे नमस्कार बोलोए । 23 म्हारे प्रभु यीशु मसीह री कृपा तुसा सबी साथे सदा ऊँदी रओ । आमीन् ।

कुलुस्सियों कुलुस्स नगरो री विश्वासी मण्डलिया खे प्रेरित पौलुसो री चिट्ठी भूमिका

कुलुस्सियों रे नाओं पौलुस प्रेरितों री चिट्ठी एशिया रे कुलुस्से नाओं रे नगरो री मण्डलिया खे लिखी थी, जो इफिसुस नगरो रे पूर्वो रे था। एसा मण्डलिया री स्थापना पौलुसे नि किती थी, पर ये तेस जगा रे थी जेतेरी जिम्मेवारी पौलुस आपणे कान्दा पदि मेहसुस करो था, जेड़ा कि आसे पौलुसो खे रोमी साम्राज्य रे एक राज्य, अखाया री राजधानी इफिसुसो ते मसीही सेवका खे पेजदे ऊए पाऊँए। पौलुसो खे ये पता लगेया था कि कुलुस्से री मण्डलिया रे कुछ गलत शिक्षक थे जो एते गल्ला पदि जोर देओए थे कि परमेशरो खे जाणने और पूरा उद्धार पाणे रिया खातर एक माणूए खे कुछ खास “आत्मिक प्रधान और अधिकारिया” री उपासना करना जरूरी था।

इजी साथे-साथे यो शिक्षक बोलो थे कि माणूआ खे कुछ खास तर्म-विधिया जियाँ-खतने खे मानणा और रोटी और कई और गल्ला ते जुड़ी री सख्त नियमो खे मानणा जरूरी ए। पौलुस इना शिक्षा रा विरोद करने रिया खातर, सच्चे मसीही संदेशो साथे ये चिट्ठी लिखोआ। तेसरे उत्तरो रा मर्म ये कि यीशु मसीह पूरा उद्धार देणे रे समर्थ ए और ये कि यो बाकि विश्वास और विधिया सच्चो रे माणूए खे दूर करी देओईया। मसीह रे जरिए ई परमेशरे एसा सृष्टिया री रचना किती और एवे तेसरे जरिए ई से इजी खे आपू गे वापस ल्याऊणे लगी रा। बस मसीह रेई दुनिया रे उद्धारो री उम्मीद ए। तेबे पौलुस विश्वासिया री जिन्दगिया री खातर एसा महान् शिक्षा रा मतलब बताओआ।

ये त्यान देणे जोगी गल्ल ए कि तुखिकुस, जो पौलुसो री ये चिट्ठी कुलुस्से लयी गा था, तेस साथे उनेसिमस बी था-से गुलाम जेसरे पक्षो रे पौलुसे फिलेमोनो री चिट्ठी लिखी थी।

???????

भूमिका 1:1-8

मसीह रा सवाओ और काम 1:9-2:19

मसीह रे नयी जिन्दगी 2:20-4:6

निचोड़ 4:7-18

???????

1 ये चिट्ठी पौलुस और आसा रा पाई तीमुथियुसो री तरफा ते ए। आँऊ पौलुस परमेशरो री इच्छा ते यीशु मसीह रा प्रेरित ए।² आऊँ ये चिट्ठी मसीह रे परमेशरो रे तिना पवित्तर लोका खे और विश्वास जोगे पाईया खे लिखणे लगी रा जो कुलुस्से नगरो रे रओए। म्हारे पिता परमेशरो री तरफा ते तुसा खे कृपा और शान्ति मिलदी रओ।

?????????? ? ? ? ? ? ? ? ? ? ?

3 जेबे आसे तुसा खे प्रार्थना करूँए तो आसे आपणे प्रभु यीशु मसीह रे पिता, परमेशरो रा सदा धन्यवाद करूँए।⁴ कऊँकि आसे सुणी राखेया कि यीशु मसीह पदि तुसा रा विश्वास ए और सब परमेशरो रे लोका साथे प्यार राखोए।⁵ तुसा रा विश्वास और प्यार तेसा उम्मीदा रे मुताबिक ए, जो स्वर्गो रे परमेशरे तुसा खे राखी री ए। तुसे तिजी रे बारे रे तेस सुसमाचारो रे सच्चे वचनो रे पईले ई सुणी चुकी रे, जो तुसा गे पऊँछी रा।⁶ ये सुसमाचार सारी दुनिया रे लगातार फैलणे लगी रा और बऊत सारे लोक विश्वासी बणने लगी रे। तुसा रे बी तेसी दिनो ते ये फलने-फूलने लगी रा जेस दिनो ते तुसे सुणेया और सच्चाईया ते परमेशरो री कृपा पछ्याणी।⁷ तिजी री ई शिक्षा तुसे म्हारे प्यारे और साथे काम करने वाले इपफ़रासो ते सीखी, जो आसा खे मसीह रे विश्वासो जोगा सेवक

ए।⁸ तिने ई आसा खे बताया कि पवित्तर आत्मे तुसा लोका रे मनो रे ओरी री खातर बऊत प्यार परी ता।

⁹ जेस दिनो ते आसे ये सुणेया, आसे तुसा लोका खे लगातार प्रार्थना करदे रऊँए। आसे ये विनती करूँए कि पवित्तर आत्मा तुसा खे आत्मिक बुद्धि और समज देओ ताकि तुसे परमेशरो री इच्छा पूरिया तरअ ते समजी सको।¹⁰ ताकि तुसा रा चाल-चलण प्रभुए खे महिमा देणे जोगा ओ और सदा सेई काम करो जेते की प्रभु खुश ओ। तुसा री जिन्दगिया रे हर प्रकारो रे खरे कामो रा फल लगो और तुसे परमेशरो री पछ्याणा रे बड्दे जाओ।

¹¹ आऊँ प्रार्थना करूँआ कि परमेशर आपणी महिमा री शक्तिया रा इस्तेमाल करी कि तुसा खे सब प्रकारो री सामर्था ते तागतबर करो। जेते कि तुसे खुशिया साथे हर प्रकारो ते सबर और सईन शीलता दखाई सको।¹² तुसे लोक पिता परमेशरो रा धन्यवाद करदे रओ, जिने आसे एते जोगे बणाए कि स्वर्गो रे राज्य रे परमेशरो रे लोका साथे जायदाता रे बराबर इस्सेदार ओऊँ।¹³ कऊँकि परमेशरे ई आसे शैतानो रे वशो ते छुड़ाई कि आपणे प्यारे पुत्रो रे राज्य रे प्रवेश करवाया।¹⁴ आसा खे तिदे ई छुटकारा मतलब पापो री माफी मिलोई।

XXXXXXXXXX XX XXXX XX XXX

¹⁵ मसीह ना दिशणे वाले परमेशरो रा दिशणे वाला प्रतिरूप ए। से सब चीजा बणने ते पईले ई मौजूद ए और से परमेशरो री बणाई री सारी सृष्टिया पाँदे प्रदान अधिकारी ए।¹⁶ कऊँकि तेसदे ई सारिया चीजा री सृष्टि ऊई। सब कुछ चाए से स्वर्गो री ओ या तरतिया री, देखी री या बिना देखी री, क्या सिंहासन, क्या राज करने वाले, क्या प्रदानगिरी, क्या अक्क, सारी चीजा तेसरे ई जरिए और तेसरिया ई खातर बणाई राखिया।¹⁷ मसीह सब चीजा बणने ते पईले ई मौजूद था और सब चीजा तेसरी ई इच्छा रे मुताबिक मिली की काम करदी रओईया।¹⁸ मण्डली मसीह रा शरीर ए और मसीह मण्डलिया रा सिर ए। सेई आदि ए और मरे रेया बीचा ते जिऊँदा ऊणे वालेया रे जेठा ए ताकि सबी गल्ला रे सेई प्रदान ओ।¹⁹ कऊँकि पिता परमेशरो री खुशी इदे ईए कि तेसरा पूरा सबाओ मसीह रे वास करो।²⁰ मसीहे करूसो पाँदे जो आपणा खून बाह्या तिजी रे जरिए परमेशरे मेल-जोलो री शुरूआत किती। परमेशरो खे ये खरा लगेया कि से मसीह रे जरिए सब चीजा रा चाए सेयो तरतिया पाँदलियाए या स्वर्गो रिया ए आपू साथे मेल-जोल करी लो।

²¹ तुसे जो पईले परमेशरो ते दूर थे और बुरे कामो री वजअ ते मनो ते वैरी थे।²² पर एवे परमेशरे आपणे पुत्र मसीह रे करूसो पाँदे मरने रे जरिए तुसा साथे बी मेल-जोल करी ला, ताकि तुसा खे आपणे सामणे पवित्तर और निष्कलंक और निर्दोष बणाई कि आजीर करो।²³ तुसे मसीह रे विश्वासो री निऊँआ पाँदे पक्के बणे रे रओ। तेसा उम्मीदा खे नि छाडो जो सुसमाचार सुणने ते बाद तुसा खे मिली। एस सुसमाचारो रा प्रचार सर्गो निटे सारी सृष्टिया रे कित्तिया और जेतेरा प्रचार करने खे आऊँ पौलुस सेवक बणेया।

XXXXXXXXXX XX XXXX-XXXX

²⁴ एवे आऊँ तिना दुःखो रिया वजअ ते खुशी मनाऊँआ, जो तुसा री तंई उठाऊँआ। आऊँ मसीह रे क्लेशो री कअटी, आपणे शरीरो रे, तिना री मण्डलिया खे, जो मसीह रे शरीरो रे पूरी करी देऊँआ।²⁵ जेसरा आऊँ परमेशरो रे तेस परबंदो रे मुताबिक तेसरी मण्डलिया रा सेवक बणेया, जो तुसा खे मांगे सम्बालेया, ताकि आऊँ परमेशरो रे वचनो रा पूरा-पूरा प्रचार करूँ।²⁶ मतलब तेस पेतो खे जो सदिया और पीढ़िया ते गुप्त रया, पर एवे परमेशरो रे तिना पवित्तर लोका पाँदे प्रकट ऊआ।²⁷ परमेशरे ये इजी खे प्रकट कित्तिया कऊँकि से चाओ था कि तुसे दूजी जाति तिना रे नौखी और महिमा रे पेतो खे समजो। से पेत ये कि मसीह तुसा लोका बीचे रओआ और तिना रे तुसा लोका री महिमा री उम्मीद ए।

²⁸ आसे मसीह रा प्रचार करूँए और परमेशरो री तेसा बुद्धिया ते हर एक माणूए खे चतौपी और पूरे ज्ञानो रा उपदेश देऊँए। जेते कि हर एक माणूए खे मसीह रे सिद्ध करी की तिना सामणे आजीर

करो। ²⁹इजी खे आऊँ तेसरी तेसा शक्तिया रे मुताबिक तन मन लगाई की मईणत करूँआ जो माखे मसीह रे जरिए मिलोई और जो मांदे काम करोई।

2

¹आऊँ चाऊँआ कि तुसे जाणी लो कि तुसा खे और लौदीकिया नगरो री मण्डलिया खे और तिना सबी लोका खे बी जिने आऊँ देखी बी नि राखेया तिना सबी खे आऊँ केडी कडी मईणत करूँआ। ²आऊँ एडा इजी खे करूँआ ताकि तिना रे मनो रे शान्ति मिलो और सेयो प्यारो रे आपू बीचे बणे रे रओ। आऊँ चाऊँआ कि तिना खे पूरा आत्म विश्वास ओ कऊँकि तिना खे परमेशरो री गुप्त योजना री पूरी समज ए। जो कि यीशु मसीह आपू ए। ³जेसरे बुद्धि और ज्ञानो रे सारे पण्डार छिपे रे ए। ⁴ये आऊँ इजी खे बोलूँआ कि कोई माणू तुसा खे चूटी लुबाणे वाली शिक्षा ते तोखा नि देओ। ⁵कऊँकि आऊँ जे शरीरो ते तुसा ते दर ए, तेबे बी आत्मा रे तुसा साथे ए। माखे ये जाणी की खुशी ओई कि तुसा रा जीवन सई टंगो ते ए और मसीह रे तुसा रा विश्वास बऊत मजबूत ए।

~~~~~

<sup>6</sup>जियाँ तुसे यीशु मसीह खे परभु करी की मानी ला रा। तियाँ ई एबे मसीह रे चलदे रओ। <sup>7</sup>और तेसदे ई जड़ पकड़दे और बड़दे जाओ और जेड़े तुसे सिखाई राखे, तेड़े ई विश्वासो रे पक्के ऊँदे जाओ और जादा ते जादा धन्यवाद करदे रओ।

<sup>8</sup>चौकस रओ कि कोई तुसा खे आपणे चूटे दर्शनशास्त्रो री बेकारो रिया गल्ला ते बईकाई ना देओ। ये सारिया गल्ला माणूआ री रीति-रवाजा रे और दुनिया री शुरूओ री शिक्षा रे मुताबिक ए, पर मसीह री शिक्षा रे मुताबिक नि ए। <sup>9</sup>इजी खे तोखा नि खाओ कऊँकि मसीह रे शरीरो रे परमेशरो रे सारे गुण और सामर्थ भरपूरिया ते वास करोए। <sup>10</sup>मसीह हर एक प्रदानगिरी और अक्को पाँदे शिरोमणी ए। तुसे तिना रे आत्मिक रूपो ते भरपूर ए कऊँकि तुसे मसीह रे ए। <sup>11</sup>तिदे ई तुसा रा बी खतना ऊई रा। से खतना लोका रे आयो रे जरिए नि ऊआ, पर से मसीह रा खतना मतलब बपतिस्मा ए, जेते कि पापमय शरीर त्वारी देओए। <sup>12</sup>और तुसे लोक बपतिस्मे रे मसीह साथे दबाए गये और तिदे ई परमेशरो री शक्तिया पाँदे विश्वास करी की, जिने से मरे रेया बीचा ते जिऊँदा कितेया, तेस साथे जिऊँदे बी ऊए।

<sup>13</sup>परमेशरे तुसे बी, जो आपणे अपराधो और शरीरो रे बिना खतने री दशा रे मुड़दे थे, मसीह साथे जिऊँदे किते और म्हारे सारे पाप माफ किते। <sup>14</sup>और बिदिया रा से लेख जो म्हारे नाओं पाँदे और म्हारे विरोदो रे था, मटयाईता और से करूसो पाँदे कीला ते जड़ी की सामणे ते टाई ता रा। <sup>15</sup>और मसीहे प्रदानगिरी और अक्को खे अरायी की तिना रा खुल्लमखुल्ला तमाशा बणाया और करूसो री बजअ ते तिना पाँदे जय-जयकारो री आवाज सुणाई।

<sup>16</sup>तेबेई कोई तुसा खे तोखा नि देणे पाओ और खाणे-पीणे या त्योआर, नए चाँद या आरामो रे दिनो रे बारे रे तुसा रा कोई न्याय नि करो। <sup>17</sup>कऊँकि यो सब नियम आऊणे वाली गल्ला रिया छायाँ ए, पर मूल चीजा मसीह रिया ए। <sup>18</sup>तुसे तिना लोका ते तोखा नि खाओ जो बिनमरता रा चूटा दखावा और स्वर्गदूता री पूजा करोए। सेयो तुसा खे दौड़ा रे फलो ते रोकी की नि राखो। एडा माणू देखी रिया गल्ला रे लगे रा रओआ और आपणी शारीरिक समजा पाँदे बेकार फूलदा रओआ। <sup>19</sup>और सेयो लोक यीशु मसीह खे पकड़ी की नि राखदे जो पूरे शरीरो रा सिर ए। जियाँ सिर पूरे शरीरो खे दिशा देओआ तियाँ ई यीशु मसीह आपणे सारे लोका खे दिशा देओआ ताकि सेयो एकजुट और कट्टे रओ जियाँ शरीरो रे सारे जोड़ और मांसपेसी शरीरो खे पकड़ी की राखोए और परमेशरो री तरफा ते बड़दे जाओए।

~~~~~

²⁰जबकि तुसा रा पापी सबाओ मसीह साथे मरी गा, इजी खे तुसा खे एसा दुनिया री शुरूओ री शिक्षा मानणे री जरूरत नि ए। तो फेर तिना जेड़े जो दुनिया रे जीवन बिताओए, माणूआ री आज्ञा और शिक्षा रे मुताबिक और एड़ी बिदिया रे वशो रे कऊँ रओए? ²¹कि ये नि छूणा, ये नि चाखणा

और इजी खे आथ नि लगाणा । 22 यो सब विधान कामो रे ल्याई-ल्याई की नाश ऊई जाणे । कऊँकि ये माणूआ री आज्ञा और शिक्षा रे मुताबिक ए । 23 आपणी ई सुविदा रे मुताबिक बणाया रा आराधना करने रा तरीका, चूटी बिनमरता रा दखावा और आपणे शरीरो खे कष्ट देणे रे जरूर अक्लमंदी दखाई देओई । पर सच्ची ई ये विधान लोका खे तिना रे शरीरो री बुरी इच्छा खे रोकणे रे मताद नि करदे ।

3

1 जबकि तुसे मसीह साथे जिऊँदे कित्ते, तो स्वर्गो रिया चीजा री टोला रे रओ, जेती मसीह परमेशरो री बगला रे दाँणे कनारे बऊत ई सम्मानित जगा रे बैठी रा और परमेशरो रे दाँणे कनारे बैठी रा । 2 तरतिया पाँदलिया नि, पर स्वर्गो री चीजा री टोला रे रओ । 3 कऊँकि तुसे तो पापी सबाओ रे मरी गे और तुसा रा जीवन मसीह साथे परमेशरो रे छिपे राए । 4 मसीह जो म्हारा जीवन ए जेबे एसा दुनिया रे वापस आऊणा, तेबे तुसे बी तेस साथे महिमा समेत सामणे ल्याए जाणे ।

~~~~~

5 इजी री खातर आपणी तिना शरीरो री इच्छा खे काई देओ, जो तरतिया पाँदे ए, मतलब-व्याभिचार, अशुद्धता, बुरी इच्छा, बुरी लालसा और लोब, जो मूर्तिपूजा रे बराबर ए । 6 इना ई कामा खे करने री ई बजअ ते परमेशरो रा प्रकोप आज्ञा ना मानणे वालेया पाँदे पड़ोआ । 7 और तुसे बी, जेबे इना बुराईया रे जीवन बिताओ थे, तो इना रेई मुताबिक चलो थे । 8 पर एबे तुसे बी इना सबी खे, मतलब-गुस्सा रोष, बैर, निन्दा और गालिया बकणा, इना सबी गल्ला खे छाडी देओ । 9 एकी-दूजे ते चूट नि बोलो कऊँकि तुसे पुराणा पापी सबाओ तेसरे कामो समेत त्वारी ता रा । 10 और एबे तुसे नया सबाओ तारण करी ला रा, जो आपणे बनाणे वाले रे रूपो रे मुताबिक ज्ञान पाणे खे नया बणदा जाओआ । 11 तिदे ना तो यूनानी रया, ना यहूदी, ना खतना, ना बिना खतने ते, ना जंगली, ना स्कूती, ना दास और ना आजाद; बस मसीह ईए जो सब कुछ ए और सबी रे ए ।

12 तुसे लोक परमेशरो री पवित्र और प्यारी चुणी री प्रजा ए । तेबेई तुसे लोक बडी करूणा और पलाई, दीनता, नरमाई और सईन शीलता खे तारण करो । 13 और जे केसी गे केसी पाँदे दोष लगाणे री कोई बजअ ओ, तो एकी-दूजे खे सईन करी लो और एकी-दूजे रे अपराध माफ करो, जेडे प्रभुए तुसा रे अपराध माफ कित्ते, तियाँ ई तुसे बी करो । 14 और इना सबी पाँदे, प्यारो खे जो सिद्धता रा कटिबन्द ए बानी लो । 15 शान्ति जो मसीह देओआ तुसा रे दिलो रे राज्य करो । एडी शान्तिया खे तुसे एक शरीर ऊई की बुलाई बी राखे । तुसे सदा धन्यवादी बणे रे रओ । 16 मसीह रे वचनो खे आपणे दिलो रे बऊत जादा बसणे देओ । सिद्ध ज्ञानो समेत एकी-दूजे खे सिखाओ और चिताओ । आपणे-आपणे मनो रे धन्यावादो साथे परमेशरो खे पजन, स्तुतिगान और आत्मिक गीत गाओ । 17 और वचनो ते और कामो ते जो कुछ बी करो, सब प्रभु यीशुए रे नाओं ते करो और तेस साथे परमेशर पिते रा धन्यवाद करो ।

~~~~~

18 ओ लाडियो! जेड़ा प्रभुए रे खरा ए, तेडे ई आपणे-आपणे लाड़े रे अधीन रओ । 19 ओ लाडेयो! आपणी-आपणी लाडिया साथे प्यार राखो और तिना साथे सख्ती नि करो । 20 ओ बालको! सबी गल्ला रे आपणे-आपणे माया-बाओ री आज्ञा रा पालण करो, कऊँकि प्रभु इजी ते खुश ओआ । 21 ओ बाल-बच्चेया वालेयो! आपणे बालका खे तंग नि करो, एड़ा नि ओ कि तिना रा सबर टूटी जाओ । 22 ओ दासो! जो शरीरो रे मुताबिक तुसा रे मालक ए, सबी गल्ला रे तिना री आज्ञा खे मानो, माणूआ खे खुश करने जेड़ा दखाणे खे नि, पर सीदे मनो ते और प्रभुए रे डरो ते । 23 और जो कुछ तुसे करोए, तनो-मनो ते करो, ये सोची की कि माणूआ खे नि पर प्रभुए खे करने लगरी रे । 24 कऊँकि तुसे जाणोए कि तुसा खे इजी रे बदले प्रभुए ते जायदात मिलणी, तुसे प्रभु यीशु मसीह री सेवा करोए । 25 कऊँकि जो बुरा करोआ, परमेशरो तिना खे तेसा बुराईया री खातर सजा देणी, तेती केसी साथे भेद-भाव नि ऊँदा ।

4

1 ओ मालको! आपणे-आपणे दासा साथे न्याय और ठीक टंगो रा बर्ताव करो, ये समजी की कि स्वर्गो रे तुसा रा बी एक मालक ए।

~~~~~

2 चौकस रं दे ऊए धन्यावादा साथे लगातार परमेशरो ते प्रार्थना करदे रओ। 3 और इजी साथे-साथे आसा खे बी प्रार्थना करदे रओ, ताकि परमेशर आसा खे वचन सुनाणे रा एड़ा मौका देई देओ कि आसे मसीह रे तेस पेतो रे बारे रे बखान करी सकिए, जेतेरी बजअ ते आऊँ कैदा रे आ। 4 इजी खे प्रार्थना करो कि आऊँ मसीह रे बारे रे ठीक टंगो रे प्रचार करी सकूँ ताकि सुणने वाले लोक तेस प्रचारो खे ठीक टंगो ते समजी सको। 5 अविश्वासिया साथे समजा साथे बर्ताव करो। हर एक मौके खे किमती जाणी की तिजी रा सई इस्तेमाल करो। 6 तुसा री बोली सदा कृपा साथे और साअन ओ ताकि तुसा खे हर माणूए खे तुसा रे विश्वासो रे बारे रे ठीक टंगो रे जवाब देणा आयी जाओ।

~~~~~

7 विश्वासो जोगा सवक और प्रभुए री सेवा रे मां साथे काम करने वाला आसा रा प्यारा पाई तुखिकुस तुसा लोका खे मेरिया सब गल्ला बताई देओगा। 8 से मैं तुसा गे इजी खे पेजी राखेया कि तुसा खे म्हारी दशा रा पता लगी जाओ और से तुसा रे दिलो खे औसला देओ। 9 तेस साथे उनेसिमुस बी पेजी राखेया जो विश्वासो जोगा और आसा रा प्यारा पाई ए, से तुसा रे नगरो रा ईए, एस तुसा गे एथो रिया सारिया गल्ला बताई देणियां। 10 अरिस्तर्खुस, जो मां साथे कैदी ए और बरनबासो रा रिस्तेदार मरकुसो री तरफा ते तुसा खे नमस्ते। मरकुसो रे बारे रे तुसे आज्ञा पाई थी कि जे से तुसा गे आओ तो तेसरी ठीक टंगो रे आदर-खातर करनी। 11 यीशु, जेसखे लोक यूस्तुस बोलोए, तुसा खे नमस्कार बोलोआ। यहूदी विश्वासिया बीचा ते सिर्फ बस ये तीन लोक ई परमेशरो रे राज्य खे मां साथे काम करने वाले और मेरी शान्तिया री बजअ रई रे।

12 इफ्रास जो तुसा रेई नगरो राए और यीशु मसीह रा दास ए, तुसा खे नमस्कार बोलोआ। से सदा तुसा खे प्रार्थना करदा रओआ ताकि तुसे सिद्ध ऊई कि पूरे विश्वासो साथे, परमेशरो री इच्छा पाँदे खड़े रओ। 13 आऊँ तेसरा गवा ए कि से तुसा खे और लौदीकिया रे लोका खे और हियरापुलिस वालेया खे लगातार प्रार्थना करदा रओआ। 14 प्यारा बैद लूका और देमास तुसा खे नमस्ते बोलोए। 15 लौदीकिया नगरो रे विश्वासी पाई, नुमफास और तिना रे कअरो री मण्डलिया खे नमस्कार बोलणा। 16 जेबे ये चिट्ठी तुसे पढ़ी लो तो एड़ा करना कि लौदीकिया नगरो री मण्डलिया रे बी पढ़ाई दे ओ, और से चिट्ठी जो लौदीकिया मण्डलिया ते आओ से तुसे पढ़ी लयो। 17 और अरखिप्सुसो खे बोलणा कि जो सेवा प्रभुए रे तांगे सम्बाली राखी, से सावधानिया साथे पूरी करेया। 18 आऊँ पौलुस चिट्ठिया रा ए इस्सा आपणे आथो साथे लिखणे लगी रा तुसा खे नमस्कार बोलूँआ। याद राखो कि आऊँ जेला रे ए और माखे प्रार्थना करदे रओ। तुसा पाँदे परमेशरो री कृपा ऊँदी रओ। आमीन्।

1 थिस्सलुनीकियों

थिस्सलुनी नगरो री विश्वासी मण्डलिया खे प्रेरित पौलुसो री पईली चिट्ठी

भूमिका

रोमी साम्राज्य रे कई राज्य थे तिना बीचा ते मकिडुनिया एक था और थिस्सलुनीके नगर तिजी री राजधानी थी। फिलिप्प नगरो ते आऊणे ते बाद पौलुसे एती एक मण्डली बणाई थी। एती बी चट ई तिना यहूदिया रे जरिए बिराद शुरू ऊणे लगेया, जो गैर यहूदिया रे पौलुसो रे मसीह संदेशो रे प्रसारो री कामयाबिया ते जलो थे, कऊँकि यो गैर-यहूदी, यहूदी तमों रे रूची राखो थे। तेवे पौलुसो खे थिस्सलुनीके छाडणा पड़ेया और से बिरिया खे चली गा। बादो ते जेवे से कुरिन्थुस पऊँछेया, तो पौलुसो खे तेस साथे काम करने वाले और तीमुथियुस साथिये रे जरिए व्यक्तिगत रूपो ते थिस्सलुनीके री मण्डलिया री स्थितिया रे बारे रे समाचार मिलेया।

ये समाचार मिलणे ते बाद थिस्सलुनीकियों रे नाओं पौलुस प्रेरितों री पईली चिट्ठी तेथो रे मसीहिया खे उत्साहित करने और तिना खे याओ देणे खे लिखी। से तिना रे विश्वास और प्यारो रे बारे रे समाचारो रिया खातर धन्यवाद देओ था। से तिना खे आपणी जिन्दगिया री याद दलाओआ जो तिने तिना साथे रंदे ऊए बिताई थी। तेवे से मसीह रा दुबारा आऊणे ते जुड़े रे सवाला रा जवाब देओआ, जो तेती मण्डलिया रे उठे थे। सवाल ये थे-क्या एक विश्वासी जो मसीह रे दुबारा आऊणे ते पईले ई मरी जाओआ, तेसा जिन्दगिया रा इस्सेदार ऊणा, जो तेसरे आऊणे ते मिलणे वाला ए? मसीह रा दुबारा आऊणा कदी ऊणा? पौलुस एते मौके पाँदे तिना खे ये बताओआ कि तेसा स्थितिया रे जेवे तुसे मसीह रा दुबारा आऊणे री उम्मीदा साथे इन्तजार करोए, चुपचाप आपणे कामो रे लगे रे रओ।

???????

भूमिका 1:1

धन्यवाद और स्तुति 1:2-3:13

मसीही चाल-चलणो ते जुड़े रे सवाल 4:1-12

मसीह रा दुबारा आऊणे रे बारे रे शिक्षा 4:13-5:11

आखरी उपदेश 5:12-22

निचोड़ 5:23-28

?????????

1 ये चिट्ठी पौलुस, सिलवानुस और तीमुथियुसो री तरफा ते ए। आसे एसा चिट्ठिया खे थिस्सलुनीकियों नगरो री मण्डलिया खे लिखणे लगी रे, जो परमेशर पिता और प्रभु यीशु मसीह रे ए। परमेशरो री तरफा ते कृपा और शान्ति तुसा खे मिलदी रओ।

?????????????????????? ? ? ? ? ? ? ? ? ?

2 आसे तुसा सबी खे लगातार प्रार्थना करदे रऊँए और सदा तुसा सबी रे बारे रे परमेशरो रा धन्यवाद करूँए। 3 आसे आपणे पिता परमेशरो रे सामणे प्रार्थना करदे बखते तुसा रे विश्वासो रे काम और प्यारो री मईणत और म्हारे प्रभु यीशु मसीह रे तुसा री उम्मीदा री सबरता खे लगातार याद करूँए। 4 ओ साथी विश्वासियो! परमेशरो रे प्यारे लोको! आसे जाणूँए कि परमेशरे तुसे आपणे लोक करी की चूणे ले रे। 5 कऊँकि आसा रे प्रभु यीशु मसीह रा सुसमाचार तुसा गे, ना कि बस वचन मात्र ईए, बल्कि पवित्र आत्मा री सामर्थ और बड़े निश्च साथे पऊँछी रा। तुसे जाणोए कि जेवे आसे तुसा साथे थे आसे तुसा रे पले री खातर, तुसा बीचे केड़ा जीवन जिया। 6 तुसे बड़े क्लेशो

रे पवित्तर आत्मा री प्रेरणा ते खुशिया साथे प्रभुए रे संदेशो खे मानी ला। ईयां तुसे म्हारी और प्रभुए री जी चाल चलणे लगे।⁷ एथो तक कि मकिदुनिया और अखाया प्रदेशो रे सबी विश्वासिया खे तुसे आदर्श बणे।

⁸ तुसा रे एथा ते ना केवल मकिदुनिया और अखाया प्रदेशो रे बी प्रभुए रा वचन सुणाया, पर तुसा रे विश्वासो री जो परमेशरो रे ए, हर जगा रे एड़ी चर्चा फैली गी कि आसा खे इजी रे बारे रे कुछ बी बोलणे री जरूरत नि ए।⁹ दूर-दराजो रे लोक हर जगा तुसा रे जरिए किति री खातरदारिया रे बारे रे बताओ ए। और ये बी कि कियाँ तुसे मूर्तिया ते दूर ऊई की परमेशरो री तरफा खे फिरे, ताकि जिऊं दे और सच्चे परमेशरो री सेवा करो।¹⁰ और एबे तुसे परमेशरो रे पुत्र यीशु मसीह री स्वर्गो ते फेर आऊणे री बाट न्याल दे रओ। जो परमेशरे मरे रेया बीचा ते जिऊंदा कित्तेया, जो आसा खे आऊणे वाले प्रकोपो ते बचाओ आ।

2

?????? ?? ??????? ?? ???

¹ ओ प्यारे साथी विश्वासियो! तुसे आपू ई जाणो ए कि म्हारा तुसा गे आऊणा फाईदेमंद ऊआ।
² जेड़ा तुसे आपू बी जाणो ए कि आसे पईले-पईले फिलिप्पियो नगरो रे दुःख सईन कित्तेया और बुरा बर्ताव सईन करने ते बाद बी म्हारे परमेशरे आसा खे एड़ी इम्मत दिती कि आसे परमेशरो रा सुसमाचार तुसा रे नगरो रे लोका री तरफा ते पारी (भारी) विरोद ऊं दे ऊ ए बी तुसा खे सुणाऊं।
³ कऊंकि म्हारा उपदेश ना तोखे रा ए, ना गलत इरादे ते ए और ना ई टग-बाजिया साथे ए।

⁴ पर परमेशरे आसे एते जोगे समजी की आसा गे सुसमाचार सम्बालेया, आसे तेड़ा ई बताऊं ए। इजी खे आसे माणूआ खे नि, पर परमेशरो खे, जो म्हारे मनो खे परखोआ, खुश करने खे उपदेश देऊं ए।⁵ तुसे जाणो ए कि आसे ना तो कदी चापलूसिया रिया गल्ला करूँ थे और ना ई आसे तुसा ते कुछ पाणे रिया तईं कुछ लालच कित्तेया। इना गल्ला रा परमेशर गवा ए कि आसे एडे लोक नि थे।⁶ हालाँकि आसा खे मसीह रे प्रेरित ऊणे री बजअ ते, तुसा ते मताद पाणे रा अक्क था, तेबे बी आसे माणूआ ते आदर नि चाऊं थे, ना तुसा ते और ना ई कसी ओरी ते।

⁷ पर जियाँ मा ए आपणे बाल-बच्चे खे पालो-पोषोई, तियाँ ई आसे बी तुसा बीचे रई कि नरमाई दखाई⁸ और तियाँ ई आसे तुसा री लालसा करदे ऊ ए, बस परमेशरो रा ई सुसमाचार नि, पर आपणा-आपणा प्राण तुसा खे देणे खे बी त्यार थे, कऊंकि तुसे म्हारे बडे पारी प्यारे ऊईगे थे।

⁹ कऊंकि ओ प्यारे साथी विश्वासियो! तुसे म्हारी मईणत और कष्टो खे याद राखो ए कि आसे इजी री खातर रात-दिन काम-तंदा करदे ऊ ए तुसा बीचे परमेशरो रा सुसमाचार प्रचार कित्तेया, ताकि तुसा कसी पाँदे बी बोज ना ओ।¹⁰ तुसे आपू ई गवा ए और परमेशर बी कि तुसा सारे विश्वासिया साथे आसा रा बर्ताव, केड़ा पवित्तर, धार्मिक और निर्दोष रया।¹¹ जेड़ा तुसे जाणो ए कि जेड़ा पिता आपणे बालका साथे बर्ताओ करोआ, तियाँ ई आसे बी तुसा बीचा ते हर एकी खे उपदेश करदे, शान्ति देऊं थे और समजयाऊं थे।¹² कि तुसा रा चाल-चलण एड़ा ओ कि परमेशरो खे आदरो जोगा ओ, जो तुसा खे आपणे राज्य रे और महिमा रे बुलाओआ।

¹³ इजी री खातर आसे बी परमेशरो रा धन्यवाद लगातार करदे रऊं ए कि जेबे आसा रे जरिए परमेशरो रे सुसमाचारो रा वचन तुसे सुणेया, तो से माणू ए रा नि, पर परमेशरो रा वचन समजी की तुसे मानेया जो सच्ची ये सुसमाचार परमेशरो री तरफा तेआ। एस उपदेशो रे जरिए परमेशर तुसा रे काम करोआ जो मसीह यीशुए पाँदे विश्वास राखो ए।¹⁴ तेबेई तुसे, ओ प्यारे साथी विश्वासियो! परमेशरो री तिना मण्डलिया री जी चाल चलणे लगे, जो यहूदिया प्रदेशो रे मसीह यीशुए रे ए, कऊंकि तुसा खे बी आपणे लोका ते तेड़ा ई दुःख मिलेया, जेड़ा तिना खे यहूदिया ते मिलेया था।¹⁵ इने यहूदिये प्रभु यीशु और भविष्यवक्ता बी काई ते और आसे बी सताए, परमेशर तिना ते खुश नि ए और सेयो सबी माणूआ रा विरोद करो ए।¹⁶ और सेयो दुजिया जातिया खे प्रभुए रे उद्धारो

रिया गल्ला करने ते, आसा खे रोको ए। ईयां सेयो आपणे पापो रा कअड़ा (घड़ा) परदे रओ। एवे आखरकार तिना पाँदे परमेशरो रा डराऊणा प्रकोप आईगा रा।

XXXXXXXXXX XX XXXXX XX XXXXX

17 ओ प्यारे साथी विश्वासियो! जेबे आसे थोड़ी देरा खे मनो ते नि, बल्कि तुसा रे सामणे ते लग ऊईगे थे, तो आसे बड़ी इच्छा साथे तुसा खे देखणे रिया तंई ओर बी जादा कोशिश किती। 18 इजी री खातर आसे, खास कर मैं पौलुसे एक बार नि, बल्कि कई बार तुसा गे आऊणा चाया, पर शैताने आसे तुसा गे फेर आऊणे नि दिते। 19 म्हारी उम्मीद, खुशी और तारीफो रा मुकुट कुण ए? क्या म्हारे प्रभु यीशु मसीह रे सामणे, तेसरे वापस आऊणे रे बखते, तुसेई नि ऊणे? 20 म्हारी तारीफ और खुशी सच्ची तुसे ईए।

3

XXXXXXXXXX XX XXXXX

1 आखरकार, जेबे आसा ते ओर नि रऊआ, तेबे आसे ये सोचेया कि एथेंस नगरो रे कल्ले रई जाऊँए 2 और आसे तीमुथियुस तुसा गे पेजेया कि से तुसा खे विश्वासो रे मजबूत करो और समजयाओ, ताकि तुसा रा विश्वास यीशु मसीह रे लगातार बणेया रा रओ। से मसीह रे सुसमाचारो रे आसा साथे काम करने वाला पाई और परमेशरो रा सेवक ए। 3 तुसा रा विश्वास इना क्लेशो री बजअ ते मसीह ते आटी नि जाओ, कऊँकि तुसे आपू जाणोए कि आसा पाँदे ये क्लेश आऊणे ईए। 4 कऊँकि पईले बी जेबे आसे तुसा गे थे, तो तुसा खे बोलेया कहुँ थे कि आसा सबी खे क्लेश ऊटाणे पड़ने और एड़ा ई ऊआ और तुसे जाणो बीए। 5 इजी बजअ ते जेबे मांते ओर नि रऊआ, तो तुसा रे विश्वासो रा आल जानने खे मैं तीमुथियुस तुसा गे पेजेया। माखे डर था कि केथी एड़ा नि ओ कि परखणे वाले शैताने तुसे परखे ओ और म्हारी कड़ी मईणत बेकार ऊईगी ओ।

XXXXXXXXXX XX XXXXX XXXXX XXXXX

6 पर एवु तीमुथियुसे जो तुसा गे ते आसा गे आयी की तुसा रे विश्वासो और प्यारो रा सुसमाचार सुणाया। ये गल्ल बी सुणाई की तुसे सदा प्यारो साथे आसा खे याद करोए और आसा खे देखणे री लालसा राखोए, जेड़ा आसे बी तुसा खे देखणे री लालसा राखूँए। 7 इजी री खातर ओ प्यारे साथी विश्वासियो! आसे आपणी मुसीबत और क्लेशो रे तुसा रे विश्वासो रे बारे रे सुणी की तुसा रा विश्वास यीशु मसीह रे बऊत मजबूत ए आसे शान्ति पाई। 8 प्रभुए रे तुसा रा मजबूत विश्वास आसा खे नए जीवन देणे जेड़ा ए। 9 और जेड़ी खुशी आसा खे तुसा री बजअ ते परमेशरो सामणे ए, तिजी रे बदले तुसा रे बारे रे आसे कियाँ परमेशरो रा धन्यवाद करिए? 10 आसे रात-दिन बऊत ई प्रार्थना करदे रऊँए कि तुसा गे फेर आईए और प्रभु यीशु मसीह रे ओर बी मजबूतिया साथे विश्वास करने रे तुसा री मताद करिए।

11 आसे प्रार्थना कहुँए कि म्हारा पिता परमेशर और प्रभु यीशु तुसा गे आऊणे री म्हारी अगुवाई करो। 12 और आसे प्रार्थना कहुँए कि प्रभु एड़ा करो जेड़ा आसे तुसा साथे प्यार राखूँए, तेड़ा ई तुसा रा प्यार आपू बीचे और सब माणूआ साथे बड़ो और तरक्की करदा जाओ। 13 ताकि से तुसा रे मनो खे एड़ा मजबूत करो कि जेबे म्हारा प्रभु यीशु आपणे सबी पवितर लोका साथे फेर वापस आओ, तो तुसे म्हारे पिता परमेशरो सामणे पवितरता रे निर्दोष ठईरो।

4

XXXXXXXXXX XX XX XXXXXXXXXXXX XX XXX XXX

1 आखरी रे ओ प्यारे साथी विश्वासियो! आसे तुसा ते बिनती कहुँए और तुसा खे प्रभु यीशुए रे समजयाऊँए कि जेड़ी तुसे प्रभुए रे नाओं ते एडे तरीके ते जिन्दगी जिओ जो परमेशरो खे खुश करोई और जेड़ा तुसे चलो बीए, तियाँ ई ओर बी बड़दे जाओ। 2 कऊँकि तुसे जाणोए कि आसे प्रभु यीशुए री तरफा ते कुण-कुण जिया आज्ञा तुसा गे पऊँछाईया।

3 कऊँकि परमेशरो री ये इच्छा ए कि तुसे पवित्तर बणो, मतलब-व्याभिचारो ते बचे रे रओ। 4 तुसा बीचा ते हर एक मार्णु सईन शीलता साथे आपणे शरीरो खे वशो रे करना सीखो और आपणी लाड़िया साथे पवित्तरता और आदरो साथे जिओ। 5 ये काम आपणी इच्छा ते नि और ना ई तिना दूजिया जातिया जेड़े करो जो परमेशरो खे नि जाणदी। 6 शरीरो री इच्छा रे पड़ी की कोई बी आपणे विश्वासी पाईए रे खलाफ पाप नि करो और ना तेस पदि कोई दाव चलाओ, कऊँकि प्रभु यीशु इना सबी कामा करने वालेया ते बदला लणे वाला ए, जेड़ा कि आसे तुसा खे पईले बी बताया था और चिताया बी था। 7 कऊँकि परमेशरे आसा खे अशुद्ध जिन्दगी जीणे खे नि, पर पवित्तर जिन्दगी जीणे खे बुलाई राखेया। 8 इजी बजअ ते जो इना नियमा रे मुताबिक जिन्दगी जिऊणे ते ना करोआ, से माणूआ खे नि, पर परमेशरो खे ना करोआ, जो आपणा पवित्तर आत्मा तुसा खे देओआ।

9 पर विश्वासी पाईचारे रे प्यारो रे बारे रे ये जरूरी निए कि आऊँ तुसा गे कुछ लिखूँ, कऊँकि आपू बीचे प्यार राखणा, तुसे आपू ई परमेशरो ते सीखी राखेया। 10 सारे मकिदुनिया प्रदेशो रे सब विश्वासी पाईया साथे सच्ची एड़ा ई प्यार करोए, पर ओ प्यारे साथी विश्वासियो! आसे तुसा खे बिनती करूँ कि तुसे मसीह रे प्यारो रे ओर बी बड़दे जाओ। 11 जेड़ा आसे तुसा खे समजयाया, तियाँ ई चुपचाप आपणी जिन्दगी जिओ। दूजे रे कामो रे दखलअन्दाजी नि करो और आपणे-आपणे आधो साथे कमाणे री कोशिश करो। 12 अविश्वासिया साथे आदरो साथे बर्ताव करो ताकि तुसा खे किजी चीजा री कमी ना ओ।

13 ओ प्यारे साथी विश्वासियो! आसे नि चाँदे कि तुसे तिना रे बारे दे अणजाण रओ, जो मसीह दे मरी गे रे, एड़ा नि ओ कि तुसे ओरी जेड़ा शोग मनाओ, जिना खे उम्मीद निए। 14 कऊँकि जे आसे विश्वास करूँ कि प्रभु यीशु मरेया और जिऊँदा बी ऊआ, तो तियाँ ई परमेशरो, तिना खे बी जो प्रभु यीशुए रे मरी गे रे, तेस साथे ई वापस लयी आऊणे। 15 कऊँकि आसे प्रभु यीशुए रे वचनो रे मुताबिक तुसा खे ये बोलूँ कि आसे जो जिऊँदे ए और प्रभुए रे फेर वापस आऊणे तक बचे रे रणे, तो सेयो पईले मरे रे विश्वासी आसा ते पईले मसीह साथे मिलणे। 16 कऊँकि प्रभु यीशु स्वर्गो ते आपू ई उतरना, तेस बखते ललकार और प्रदान दूतो रा शब्द सुणना और परमेशरो री तुरही बजाई जाणी और जो विश्वासी मसीह रे एसा दुनिया खे छाडी की चली गे रे सेयो पईले जिऊँदे ऊणे। 17 तेवे आसे जो जिऊँदे और बचे रे रणे, तिना साथे बादलो पाँदे चकी देणे ताकि सर्गो रे प्रभुए साथे मिलूँ और तेसी बखतो ते आसे सदा प्रभुए साथे रणे। 18 तो इना गल्ला ते एकी-दूजे खे औसला देया करो।

5

1 पर ओ प्यारे साथी विश्वासियो! इजी री कोई जरूरत नि कि प्रभु यीशुए रे वापस आऊणे रे बखत और तरीका रे बारे रे तुसा खे कुछ लिखेया जाओ। 2 कऊँकि तुसे आपू ई ठीक जाणोए कि जेड़ा राधियो खे चोर आओआ, तेड़े ई प्रभु यीशु दूजी बार अचाणक आऊणे वाला ए। 3 जेबे लोक बोलणे लगी रे ऊणे, “ठीक ए और कुछ डर निए,” तेस बखते तिना पाँदे एकदम संकट आयी जाणा, जियाँ गर्भवतिया री पीड़ा, और सेयो तेस विनाशो ते कियाँ पनि बचणे।

4 पर ओ प्यारे साथी विश्वासियो! तुसे आत्मिक न्हरे रे निए तेबेई प्रभुए रे वापस आऊणे रा दिन तुसा पाँदे चोरो जेड़ा नि पड़ना। 5 कऊँकि तुसे सब जोतिया री ल्वाद् ए और दिनो री ल्वाद् ए, आसे ना तो राती रे ए और ना ई न्हरे ए।

6 इजी री खातर आसा खे ओरी जेड़ा सये रे नि रणा चाईयो, पर जागदे और सावधान रणा चाईयो। 7 कऊँकि जो सओए, सेयो राधियो खेई सओए और जो नशे रे मतवाले ओए सेयो राधियो खेई मतवाले ओए। 8 पर आसे तो दिनो रे ए, विश्वास और प्यारो री झिलम पईनी की और उद्धारो री उम्मीदा रा टोप पईनी की सावधान रओ। 9 कऊँकि परमेशरे आसे आपणे गुस्से ते सजा देणे खे नि

चुणी राखे, पर इजी खे चुणी राखे ताकि आसे आपणे परभु यीशु मसीह रे जरिए उद्धार पाऊँ। 10 यीशु मसीह आसा री खातर इजी खे मरेया, ताकि चाए आसे जिऊँदे रईए या मरी जाईए, जेबे से वापस आओ तेबे आसे सब मिली की तिना साथे सदा जिऊँदे रईए। 11 इजी बजअ ते एकी-दूजे खे औसला देओ और एकी-दूजे री विश्वासो रे मजबूत ऊणे खे मताद करो, बल्कि तुसे एड़ा करो बीए।

??????????

12 ओ प्यारे साथी विश्वासियो! आसे तुसा ते विनती करूँ कि तुसे जो मईणत करोए और परभुए रे तुसा रे अगुवे ए और तुसा खे शिक्षा देओए, तिना री मानो और आदर करो। 13 तिना रे कामो री बजअ ते प्यारो साथे तिना खे बऊत ई आदरो जोगा समजो। आपू बीचे मिली-जुली की शान्तिया साथे रओ। 14 और ओ प्यारे साथी विश्वासियो! आसे तुसा ते विनती करूँ कि जो लोक आलसी ए, तिना खे चेतावणी देओ, जो डरपोक ए तिना खे इम्मत देओ, कमजोरा खे सम्बालो, सबी खे सईन शीलता दखाओ। 15 खबरदार! कोई कसी साथे बुराईया रे बदले बुराई नि करो, पर सदा पलाई (भलाई) करने रे आगे रओ, आपू बीचे और सबी साथे बी सदा पलाईया रे काम करने री कोशिश करो।

16 सदा खुश रओ। 17 लगातार प्रार्थना रे लगे रे रओ। 18 हर गल्ला रे परमेशरो रा धन्यवाद करो, कऊँकि तुसा खे मसीह यीशुए रे परमेशरो री येई इच्छा ए।

19 पवित्र आत्मा रे कामा खे लोका रिया जिन्दगिया दे ऊणे ते नि रोको। 20 भविष्यवाणिया खे सुणी की अणसुणा नि करो। 21 सबी गल्ला खे परखो, जो अच्छी ये तेसा खे मानेया करो। 22 हर प्रकारा री बुराईया ते बचे रे रओ।

??????????

23 शान्तिया रा परमेशर आपू ई तुसा खे पूरी रीतिया ते पवित्र करो। तुसा री आत्मा, प्राण और शरीर म्हारे परभु यीशु मसीह रे वापस आऊणे तक, पूरे-पूरे और निर्दोष सयी-सलामत राखणे। 24 जिने तुसे चुणी राखे तेस एड़ा करना कऊँकि से विश्वासो जोगा ए।

25 ओ प्यारे साथी विश्वासियो! आसा खे प्रार्थना करो। 26 सबी विश्वासिया खे साफ मनो ते गले मिली की नमस्कार करो। 27 आऊँ तुसा खे परभुए रे आज्ञा देऊँआ कि ये पत्नी सबी विश्वासी पाईया रे सामणे पढी की सुणाई जाओ। 28 म्हारे परभु मसीह यीशुए री कृपा तुसा पाँदे ऊँदी रओ।

1 थिस्सलुनीकियों

थिस्सलुनी नगरो री विश्वासी मण्डलिया खे प्रेरित पौलुसो री दूजी चिट्ठी भूमिका

मसीह रे दुबारा आऊणे ते जुड़ी री उलजणा रिया बजअ ते थिस्सलुनीकियों री मण्डलिया रे गड़बड़िया री स्थिति बणी री थी। थिस्सलुनीकियों रे नाओं पौलुस प्रेरितों री दूजी चिट्ठी एते तारणा पाँदे कि प्रभुए रे आऊणे रा दिन पईले ई आयी चुकेया रा, बिचार करने रिया खातर लिखी राखी। पौलुस ये बतांदे ऊए एसा तारणा खे सुदारोआ कि मसीह रे आऊणे ते पईले दुष्टता और बुराई आपणी चरम सीमा पाँदे ऊणी। ये एक गुप्त शासनो री अधीनता रे ऊणा, जेतेखे “पापो रा मद मतलब-विनाशो रा पुत्र” बोली राखेया, जेस मसीह रा विरोद करना।

प्रेरित एती एसा जरूरता पाँदे जोर देओआ कि सारे दुःख और कष्ट ऊँदे ऊए बी तेसखे पढ़ने वालेया खे आपणे विश्वासो रे पक्के बणेया रा रणा चाईयो, आपणे जिऊणे खे काम करदे रणा चाईयो जेड़ा कि पौलुस और तेसरे साथी करो थे और पलाई करने रे लगे रे रणा चाईयो।

??????

भूमिका 1:1, 2

स्तुति और तारीफ 1:3-12

मसीह रे दुबारा आऊणे ते जुड़ी री शिक्षा 2:1-17

मसीह चाल-चलणो ते जुड़े रा उपदेश 3:1-15

निचोड़ 3:16-18

??????

1 ये चिट्ठी पौलुस, सिलवानुस और तीमुथियुसो री तरफा ते ए। आसे एसा चिट्ठिया खे थिस्सलुनीकियों नगरो री मण्डलिया खे लिखणे लगी रे, जो म्हारे पिता परमेशर और प्रभु यीशु मसीह रे ए।

2 आसे प्रार्थना कहँए कि म्हारे पिता परमेशर और प्रभु यीशु मसीह रे तुसा खे कृपा और शान्ति मिलदी रओ।

??????

3 ओ साथी विश्वासियो, तुसा रे बारे रे आसा खे हर बखत परमेशरो रा धन्यवाद करना चाईयो और ये ठीक बी ए, कऊँकि तुसा रा विश्वास यीशु मसीह पाँदे बऊत बड़दा जाओआ और तुसा खे आपू बीचे प्यार बऊत ऊँदा जाओआ। 4 इजी बजअ ते आसे आपू बी परमेशरो री मण्डलिया रे तुसा रे बारे रे कमण्ड कहँए। कऊँकि तुसे सबर और विश्वासो साथे सबी किस्मा रे उपद्रव और क्लेश सईन करोए।

5 तुसे लोक दुःख सईन करोए और ये तुसा लोका खे परमेशरो रे राज्य रे जाणे जोगे बणाओए। इजी रा ये सबूत ए कि परमेशरो धार्मिकता ते न्याय करना। 6 और परमेशरो रा ये न्याय ए कि जो तुसा खे दुःख देओए, परमेशरो तिना खे बदले रे दुःख देणा 7 तेस तुसा लोका खे दुःख क्लेशा ते चैन देणी और परमेशरो आसा लोका खे बी चैन देणी। ये तेस बखते ऊणा जेबे प्रभु यीशु मसीह आपणे सामर्थी स्वर्गदूता साथे बऊत जादा सुलगदी ऊई आगी रे स्वर्गो ते प्रकट ऊणा। 8 परमेशरो तिना लोका खे सजा देणी जो तिना खे नि मानदे और म्हारे प्रभु यीशु मसीह रे सुसमाचारो पाँदे विश्वास नि करदे। 9 सेयो लोक प्रभुए रे सामणे ते और तिना री महिमामय सामर्था रे तेजो ते सदा खे लग किते जाणे। तेस तिना लोका खे अनन्त विनाशो री सजा देणी। 10 ये तेस दिने ऊणा, जेबे प्रभु

यीशु आपणे लोका बीचे महिमा पाणे वापस आऊणा और सब विश्वास करने वालेया लोका अचम्बा करना । इदे तुसे बी शामिल ए कऊँकि तुसे आसा रे संदेशो पाँदे विश्वास कित्तेया ।

11 इजी खे आसे तुसा री खातर लगातार प्रार्थना बी करूँए कि म्हारा परमेशर तुसा खे तेसा जिन्दगिया जोगा बणाओ जेतेखे जिऊणे खे तिने तुसे बुलाई राखे । से तुसा री हर एक खरी इच्छा खे पूरा करो और हर एक तेस कामो खे से सफल बणाओ जो तुसा रे विश्वासो रा नतीजा ए । 12 ईयां म्हारे प्रभु यीशु मसीह रे नाओ तुसा रे जरिए महिमा पाणी और तुसा तेसरे जरिए आदर पाणा । ये सब कुछ आसा रे परमेशरो रे और प्रभु यीशु मसीह री कृपा रे जरिए ऊणा ।

2

1 ओ साथी विश्वासियो, एवे आसे आपणे प्रभु यीशु मसीह रे दुबारा आऊणे और तिना साथे आसा लोका रा कटटे ऊणे रे बारे रे, तुसा ते विनती करूँए 2 कि तुसे अचाणक आपणे विवेको खे केसी भविष्यवाणिया, केसी उपदेशो या केसी एड़ी चिट्ठिया ते नि खोई देओ जेतेखे आसा रे जरिए लिखेया रा समजेया जाओआ और जेडा कि तिदे बताई राखेया ओ कि प्रभुए रा दिन आयी पऊँछी रा, तुसा रा मन पटकी नि जाओ । 3 इजी रे बारे रे कोई तुसा खे कियोँ बी तोखा नि देओ । कऊँकि प्रभु यीशुए रे वापस आऊणे ते पईले एक एडा बखत ऊणा जेबे बऊत सारे लोक परमेशरो रे खलाफ खडे ऊणे । और से दुष्ट मर्द जो परमेशरो पक्का ई नरको रे नाश करी देणा, प्रकट ऊणा । 4 तेस परमेशरो रा विरोद करना और हर एकी ते जेसखे परमेशर या पूजणे जोगा बोलेओ, आपणे आपू खे बडा ठईराणा । एथो तक कि तेस परमेशरो रे मन्दरो रे बैठी जाणा और आपणे आपू खे परमेशर ऊणे रा दावा करना ।

5 क्या तुसा खे याद निए कि जेबे आऊँ तुसा गे था, तो तुसा खे इना गल्ला बोलेया करूँ था? 6 तुसा खे ये बी पता ए कि तेस दुष्टो खे एस बखते किने आपणे वशो रे करी राखेया कि से आपणे ठराए रे बखतो पाँदे प्रगट कित्तेया जाओ । 7 तेस दुष्टो री तागत पईले तेई दुनिया रे गुप्त रूपो रे काम करने लगी री पर से एक ए जो तेसा शक्तिया खे रोकणे लगी रा । से तेस बखतो तक रोकदा रणा जदुओ तक कि तिजी खे एसा बाटा ते टाई नि देओ । 8 तेबे से दुष्ट मर्द प्रकट ऊणा, पर प्रभु यीशुए आपणी मुँओ री फूकरा तेई काई देणा । से प्रभुए रे वापस आऊणे रे महिमामय तेजो रे जरिए पूरे तौरो पाँदे नाश कित्तेया जाणा । 9 से दुष्ट मर्द शैतानो री तागता साथे आऊणा और तेस सबी प्रकारा री चूटी सामर्थ, बडे-बडे चिह्न और अचम्बे रे काम करने । 10 तेस सबी किस्मा रे बुरे काम करने और तिना लोका खे तोखा देणा जो अनन्त विनाशो री बाटा रिये । सेयो लोक नाश ऊणे कऊँकि तिने सच्चो रे प्यारो खे नि मानेया, जेते कि तिना रा उद्धार ऊँदा । 11 इजी वजअ ते परमेशरो तिना खे एक पटकाणे वाली सामर्थ पेजणी ताकि सेयो चूटो रा विश्वास करो । 12 परमेशरो तिना सबी लोका खे सजा देणी जिने सच्चे संदेशो पाँदे विश्वास नि कित्तेया पर दुष्टता रे कामो ते प्यार कित्तेया ।

13 ओ साथी विश्वासियो, एती तुसा खे परमेशरो रे सामणे आसा रा हमेशा धन्यवाद देणा सई ए । तुसे प्रभुए रे प्यारे ए कऊँकि परमेशर तुसे शुरूओ तेई पवित्र आत्मा रे जरिए पापो ते लग करी की और सच्चाईया रे तुसा रे विश्वासो री वजअ ते उद्धारो खे तुसे चुणी लयी रे । 14 परमेशरो तुसे लोक आसा रे ईश्वरीय सुसमाचार सुनाणे रे जरिए उद्धारो खे बुलाई राखे कि तुसे म्हारे प्रभु यीशु मसीह री महिमा रे शामिल ऊई सको ।

15 इजी री खातर ओ साथी विश्वासियो, स्थिर रओ और जो-जो गल्ला तुसे क्या वचन, क्या चिट्ठिया रे जरिए आसा ते सीखिया, तिना खे पकड़ी री राखो ।

16 आसे प्रार्थना करूँए कि म्हारे प्रभु यीशु मसीह और पिता परमेशरो आपू ई, जिने आसा खे प्यार कित्तेया और कृपा साथे अनन्त शान्ति और खरी उम्मीद दिती, 17 तुसा रे मनो खे शान्ति देओ और तुसा खे हर एक खरे कामो रे और वचनो रे मजबूत करो ।

3

????????????????????

1 आखरी रे ओ साथी विश्वासियो, आसा खे प्रार्थना करेया करो कि प्रभुए रा वचन इतणा चट फईलो और महिमा पाओ, जेड़ा तुसा रे ऊआ ²ये बी प्रार्थना करो कि परमेशर आसा खे टिट और दुष्ट लोका ते बचाई की राखो, कऊँकि हर एकी पाँदि विश्वास निए। ³पर प्रभु विश्वासो जोगा ए, तिना तुसे मजबूतिया साथे खडे करने और तेस दुष्टो ते बचाई की राखणे। ⁴आसा खे प्रभुए रे तुसा पाँदि विश्वास ए कि जो-जो आज्ञा आसे तुसा खे देऊँए, तिना खे तुसे मानोए और मानदे बी रणे। ⁵आसे प्रार्थना करूँए कि परमेशर तुसा रे दिलो खे ईश्वरीय प्यार और मसीह रे सबरो री तरफा खे तुसा री अगुवाई करो।

????????????????

6 ओ साथी विश्वासियो, आसे तुसा खे आपणे प्रभु यीशु मसीह रे नाओं ते आज्ञा देऊँए कि तुसे हर एक एडे विश्वासिये ते लग रओ, जो आलसी बणी की रओआ और जो शिक्षा तिने आसा ते पाई राखी, तिजी रे मुताबिक नि करदा। ⁷कऊँकि तुसे आपू ई जाणोए कि तुसा लोका खे कियाँ आसा री जी चाल चलणी चाईयो। जेबे आसे तुसा बीचे रऊँ थे तो आसे आलस नि कितेया पर मईणत किती। ⁸इतणा ई नि, आसे केसी रे एती रोटी मुफ्तो रे नि खाई, पर आसे मईणत और कष्टो साथे रात-दिन काम-तंदा करूँ थे, ताकि तुसा बीचा ते केसी पाँदि बी बोज नि बणूँ। ⁹ये इजी खे नि कि तुसा लोका ते मताद पाणी आसा रा अक्क निए, पर इजी खे कि आसे आपू तुसा रे सामणे आदर्श बणीए ताकि तुसे आसा री जी चाल चलो। ¹⁰एथो तक कि जेबे आसे तुसा बीचे थे, आसे तुसा खे ये आज्ञा देऊँ थे, “जे कोई काम नि करना चाओ तो तेसखे रोटी पनि देओ।”

¹¹आसे सुणूँए कि बऊत लोक तुसा बीचे आलसी बणी की रओए और कुछ काम नि करदे, पर ओरी रे कामो रे रुकावट पाओए। ¹²एडेया माणूआ खे आसे प्रभु यीशु मसीह रे आज्ञा देऊँए और विनती करूँए कि सेयो लगना साथे आपणे कामा पाँदि लगी जाओ और सेयो आपणी ई मईणती ते कमाई की रोटी खाया करो। ¹³और तुसे, ओ साथी विश्वासियो, पलाई करने रे इम्मत नि छाडो। ¹⁴जे कोई म्हारी एसा चिट्ठिया री गल्ल नि मानो, तो तेस पाँदि नजर राखो। तेसरी संगति नि करो, ताकि से शर्मिंदा ओ। ¹⁵तेबे बी तेसखे बैरी नि समजो, पर साथी विश्वासी समजी की खबरदार करो।

????????????????

¹⁶आऊँ प्रार्थना करूँआ कि प्रभु जो शान्तिया री सूबल ए, आपू ई तुसा खे सदा और हर प्रकारा री शान्ति देओ। आऊँ प्रार्थना करूँआ कि प्रभु तुसा सबी साथे रओ। ¹⁷आऊँ पौलुस आपणे आथे की नमस्कार लिखूँआ। हर चिट्ठिया रे मेरा ये चिह्न ए। मां ईयां ई लिखदे रणा। ¹⁸आऊँ प्रार्थना करूँआ कि म्हारे प्रभु यीशु मसीह री कृपा तुसा सबी पाँदि ऊँदी रओ।

1 तीमुथियुस तीमुथियुसो खे प्रेरित पौलुसो री पईली चिट्ठी भूमिका

तीमुथियुस एक जवान मसीह था, जो एशिया रा रणे वाला और यहूदणी माए और यूनानी पिते रा पाऊ था। से पौलुसो रे प्रचार करने रे कामो रे तेसरा साथी और तेसरा मददगार बणीगा था। तीमुथियुसो रे नाओं पौलुस प्रेरितों री पईली चिट्ठी तीन खास गल्ला पाँदे विचार करने खे लिखी राखी थी।

सबी ते पईले, ये चिट्ठी मण्डलिया रे चूठी शिक्षा रे विरोदो रे एक चेतावणी ए। से शिक्षा, जो कि यहूदी और गैर-यहूदी बिचारो रा मिश्रण थी, एते तारणा पाँदे आधारित थी कि भौतिक दुनिया ई बुरी ए और एक मांगू खास गुप्त ज्ञान और कुछ रीति-रवाज, जियाँ-कई खाणे रिया चीजा नि खाणिया और ब्या नि करना बगैरा, खे मानणे रे जरिए ई उद्धार मिली सकोआ। एसा चिट्ठिया रे मण्डलिया रे प्रबंद और आराधना ते जुड़े रे निर्देश बीए और साथे-साथे तेस चरित्रो रा बी वर्णन ए जो मण्डलिया रे अगुवे और मददगारा खे जरूरी ए। आखरी रे तीमुथियुसो खे ये सला देई राखी कि से कियाँ यीशु मसीह रा सेवक बणी सकोआ और कई विश्वासिया रे चूण्डो रे प्रति तेसरी क्या-क्या जिम्मेवारिया ए।

☞☞☞☞☞

भूमिका 1:1, 2

मण्डलिया और इजी रे अगुवे ते जुड़े रे निर्देश 1:3-3:16

तीमुथियुसो खे तेसरे कामो ते जुड़े रे निर्देश 4:1-6:21

☞☞☞☞☞

1 ये चिट्ठी मां पौलुसो री तरफा ते ए। आऊ आपणे उद्धारकर्ता परमेश्वर और यीशु मसीह री आज्ञा ते यीशु मसीह रा प्रेरित ए, जिदे आसा सबी खे उम्मीद ए।² आऊ ये चिट्ठी तीमुथियुसो खे लिखणे लगी रा जो विश्वासो रे मेरे सच्चे पाऊए जेड़ा ए। आऊ प्रार्थना करूँआ कि पिता परमेश्वर और म्हारे प्रभु यीशु मसीह री तरफा ते ताखे कृपा, दया और शान्ति मिलदी रओ।

☞☞☞☞☞☞☞☞☞☞☞☞☞☞☞☞☞☞

3 आऊ ताँते फेर बिनती करूँआ कि जेड़ा मे तूँ मकिदुनिया प्रदेशो खे जादे बखते समजयाया था कि तूँ इफिसुस नगरो रे रई की तिना चूटे उपदेश देणे वाले लोका खे आज्ञा दे कि सेयो गलत शिक्षा नि देओ।⁴ और तिना मनकइन्त काणियाँ पाँदे और अनन्त वंशाबलिया पाँदे मन लगाई की बखत बर्बाद नि करो। जिने कि बईस ओई और तेस परमेश्वरो री योजना रा ज्ञान नि मिलदा जो विश्वासो साथे रिश्ता राखोआ।⁵ एसा आज्ञा रा मकसद से प्यार ए जो साफ दिल, खरे विवेक और बिना कपटो ते पैदा ओआ।⁶ चूटे उपदेश देणे वालेया इना सबी खरे कामा खे करने ते रोकी ता रा और सिर्फ बेकार गल्ला करेया करोए।⁷ सेयो चूटे शिक्षक मूसे रा विधानो रे शिक्षक बणना तो चाओए पर जो गल्ला सेयो बोलोए और जेतेरे बारे रे सेयो मजबूतिया ते बोलोए, सेयो आपू ई तिजी खे समजदे ई नि।

8 आसे सब जाणूए कि मूसे रा विधान पली ए वशतें इजी रा इस्तेमाल सई टंगो रे कित्तेया जाओ।
9 आसे जाणूए कि मूसे रा विधान तर्मी मांगूए खे नि, पर अधर्मी, निरकुंशो, भक्ति ना करने वाले, पापी अपवित्र, और अशुद्ध, माया-बाओ खे काणे वाले, अत्यारे,¹⁰ ब्याभिचारी, समलैंगिक, मांगूआ खे बेचणे वाले, चूटे और चूटी कसम खाणे वाले और इना खे छाडी कि खरे उपदेशो रे सबी बिरोदिया खे ठराई राखी।¹¹ येई परमधन्य परमेश्वरो री महिमा रे तेस सुसमाचारो रे मुताबिक ए, जो मांगो सम्बाली राखेया।



12 आऊँ आपणे प्रभु यीशु मसीह रा जिने माखे सामर्थं दिती, धन्यवाद करूँआ कि तिने माखे विश्वासो जोगा समजी की आपणी सेवा खे ठराई राखेया। 13 आऊँ तो पईले निन्दा करने वाला, सताणे वाला और अन्दर करने वाला था, तेबे बी मां पाँदे कृपा ऊई, कऊँकि मैं अविश्वासो री दशा रे बिना समजी-बुजी की, यो काम कित्ते थे। 14 और म्हारे प्रभुए री कृपा, तेस विश्वास और प्यारो साथे, जो यीशु मसीह रे ए, बऊत जादा ऊई।

15 ये गल्ल सच और हर प्रकारो ते मानणे जोगी ए कि यीशु मसीह पापिया खे बचाणे दुनिया रे आयी रा और जिना बीचे सबी ते बड़ा पापी आऊँ ए। 16 पर मां पाँदे इजी खे कृपा ऊई ताकि मां सबी ते बड़े पापिए रे मसीह आपणी पूरी सईन शीलता दखाओ ताकि जो लोक तिना पाँदे अनन्त जीवनो खे विश्वास करोगे, तिना खे आऊँ एक आदर्श बणूँ। 17 एबे सनातन राजा अविनाशी, बिना देखे, एक मात्र परमेशरो रा आदर और महिमा जुगो-जुगो तक ऊँदी रओ। आमीनू।

18 ओ पुत्र तीमुथियुस, तिना भविष्यवाणिया रे मुताबिक, जो पईले तेरे बारे रे कित्ती थी, आऊँ ये आज्ञा सम्बालूँआ कि तूँ तिना रे मुताबिक अच्छी लड़ाईया खे लड़दा रओ। 19 और विश्वास और तेस खरे विवेको खे पकड़ी कि राख, जेतेखे दूर करने री बजअ ते बऊत जणेया रा विश्वासो रूपी जाहूज डूबी गा 20 तिना बीचा तेई हुमिनयुस और सिकन्दर ए, जो मैं शैतानो गे सम्बाली ते कि सेयो परमेशरो री निन्दा करना नि सीखो।

2




1 सबी ते पईले आऊँ तुसा ते ये आग्रह करूँआ कि सबी लोका खे प्रार्थना करो। परमेशरो ते माँगो कि से तिना री मताद करो और तिना खे आशीष देओ। तिना री तरफा ते बचोलेपणो री प्रार्थना करो। तिना लोका खे परमेशरो रा धन्यवाद करो। 2 राजा और सब ऊच्चे पद वालेया खे इजी री खातर प्रार्थना करो कि आसे आराम और चैना साथे सारी भक्तिया और सई तरके ते जीवन बिताईये। 3 ये म्हारे उद्धारकर्ता परमेशरो खे अच्छा लगोआ और टब्बो बीया। 4 परमेशर ये चाओआ कि सबी माणूआ रा उद्धार ओ और सेयो सच्चो खे ठीक-टंगो रे पछ्याणी लो। 5 कऊँकि परमेशर एक ईए और परमेशर और माणूआ बीचे बी एक ई बचोला ए, मतलब यीशु मसीह, जो एक माणूए रे रूपो रे पैदा ऊआ। 6 तिने आपणे आपू खे सबी खे छुड़ाणे रे दामो रे देईता। ये सेई संदेश ए जो परमेशरो दुनिया रे लोका खे ठीक बखतो पाँदे देईता। 7 आऊँ सच बोलूँआ, चूट नि बोलदा कि आऊँ इजी मकसदो ते सुसमाचार प्रचारक, प्रेरित और दूजी जातिया खे विश्वास और सच्चो रा उपदेशक ठराया।

8 आऊँ चाऊँआ कि हर जगा रे मर्द बिना रोषो रे और बिना बईसी ते पवित्तर आथो खे चकी कि प्रार्थना करेया करो। 9 तियाँ ई आऊँ ये बी चाऊँआ कि जवाणसा शर्म और संयमो साथे, सुहावने टालेया ते आपणे आपू खे सजाओ, ना कि बाल गूँदणे, सूईने, मोतियो ते और किमती टालेया ते, 10 पर खरे कामो ते। कऊँकि परमेशरो री भक्ति करने वाली जवाणसा खे येई ठीक बीए।

11 जेबे कोई मर्द विश्वासिया खे सिखाणे लगी रा ओ तो जवाणसा खे चुपचाप पूरी अधीनता साथे सिखाणा चाईयो। 12 मेरी आज्ञा नि ए कि जवाणस मर्दो खे उपदेश देओ और ना मर्दो पाँदे अक्क जताओ। जेबे आराधना रे कट्टे ओए तो सारिया जवाणसा चुपचाप रओ। 13 कऊँकि आदम पईले, तिजी ते बाद हव्वा बणाई। 14 इजी ते अलावा, से हव्वा ई थी जो शैतानो रे तोखे रे आई, ना कि आदम। ईयां हव्वा परमेशरो री आज्ञा खे तोड़ी की अपरादन ऊई। 15 तेबे बी जवाणसा बच्चा पैदा करने ते उद्धार पाणा, जे सेयो सबरो साथे विश्वास, प्यार और पवित्तरता रे बणी री रओ।

3



1 ये गल्ल सच्ची ए कि जो मण्डलिया रा अगुवा ऊणा चाओआ, तो से खरे कामो री इच्छा करोआ। 2 तो ये जरूरी ए कि मण्डलिया रे अगुवेया खे निर्दोष, एक ई लाड़िया रा लाड़ा, सबरखोर, सुशील, आदरो जोगा, पराऊणचारी करने वाला और सिखाणे रे निपुण ऊणा चाईयो। 3 से पियक्कड़ या मारपीट करने वाला नि ओ, बल्कि नम्र और शान्त ओ और चगड़ा करने वाला या लालची नि ओ। 4 आपणे कअरो रा अच्छा इन्तजाम करने वाला ओ और बाल-बच्चेया खे सारी गम्भीरता ते अनुशासनो रे राखणे वाला ओ। 5 जेबे कोई माणू आपणे ई कअरो रा इन्तजाम करना नि जाणो, तो परमेशरो री मण्डलिया री रखवाली कियॉ करनी? 6 फेर ये कि मण्डलिया रा अगुवा नया विश्वासी नि ओ, एड़ा नि ओ कि कमण्ड करी की शैतानो रा जा दण्ड पाओ। 7 और ये बी जरूरी ए कि मण्डलिया ते बाअरे से आदरो जोगा ओ, एड़ा नि ओ कि निन्दत ऊई कि शैतानो रे फेदे रे फसी जाओ।

?????????? ?? ???? (????)

8 तेड़ा ई सेवको खे बी गम्भीर ऊणा चाईयो, दोगला, पियक्कड़ और नीच कमाईया रा लोबी नि ओ। 9 पर विश्वासो रे पेतो खे शुद्ध विवेको साथे सुरक्षित राखो। 10 और ये बी पईले ई परखेया जाओ, तेवे जे निर्दोष निकलो, तो सेवको रा काम करो।

11 ईयां ई तिना री जवाणसा बी आदरो जोगिया ओ, ओरी री बुराई करने वाली नि ओ, पर सबरो वाली और सबी गल्ला रे विश्वासो जोगी ओ।

12 सेवक एक ई लाड़िया रा लाड़ा ओ और बाल-बच्चे और आपणे कअरो रा अच्छा परबंद करना जाणदे ओ। 13 कऊँकि जो सेवको रा काम ठीक टंगो रे करी सकौए, सेयो आपू खे अच्छा पद और यीशु मसीह रे आपणे विश्वासो रे बारे रे बड़िया इम्मता साथे बोलणे जोगे ऊई जाओए।

???? ?? (?????)

14 आऊँ तांगे चट आऊणे री उम्मीद राखणे पाँदे बी, इना गल्ला इजी खे लिखूँआ 15 कि जे मेरे आऊणे रे देर ऊई जाओ, तो तूँ जाणी लो कि परमेशरो रे कराने रे लोका रा बर्ताओ केड़ा ऊणा चाईयो। परमेशरो रा कराना जिऊँदे परमेशरो री मण्डली ए और सच्चो रा खम्बा और निऊँ ए।

16 इदे शक निए कि भक्तिया रा पेत गम्भीर ए,

मसीह माणूआ रे रूपो रे प्रगट ऊआ,

पवित्तर आत्मा रे जरिए सच साबित ऊआ,
और स्वर्गदूता खे दिशेया।

दूजी जातिया रे तेसरा प्रचार ऊआ,

दुनिया रे तेस पाँदे विश्वास किचेया

और महिमा रे ऊवे चकेया।

4

???? ??????

1 एबे पवित्तर आत्मा साफ-साफ बोलोआ कि आखरी बखतो रे कुछ लोका विश्वास करना छाड़ी देणा। तिना लोका भ्रमाणे वाली आत्मा और दुष्टात्मा री शिक्षा पाँदे मन लगाणा। 2 ये तिना चूटे शिक्षका री चूटी शिक्षा री बजअ ते ऊणा। तिना लोका रा विवेक जो सई गलत कामा बीचे फैसला करोआ ईयां मरी चुकेया रा जियां मानो बलदे ऊए लोए की डामी राखेया ओ। 3 एड़े लोका एड़ी शिक्षा देणी कि ब्या करना गलत ए और रोटीया री कुछ चीजा ते पोरे रणे री आज्ञा देणी। पर परमेशरो ए रोटी इजी खे बणाई कि विश्वासी और सच्चो खे पछ्याणने वाले तिजी खे धन्यवादो साथे खाओ। 4 कऊँकि परमेशरो री बणाई री हर एक चीज खरी ए और आसे कुछ बी खाई सकूँए, पर ये कि परमेशरो खे धन्यवाद करी की खाई जाओ। 5 कऊँकि सेयो चीजा परमेशरो रे वचने की और प्रार्थना साथे परमेशरो खे मानणे जोगी ऊई जाओईया।

???? ??????? ?? ??????? ?????

6 ओ तीमथियुस जे तूँ लगातार विश्वासिया खे इना गल्ला रे बारे रे बतांदा रएगा, तो यीशु मसीह रा अच्छा सेवक ठईरना और विश्वास और तेस खरे उपदेशो री गल्ला ते, जिना खे तूँ मानदा आयी रा, तेरा पालन-पोषण ऊँदा रणा। 7 पर बणावटी और मूर्खता री काणियां ते दूर रओ, इजी रे बदले तुसे आपणे आपू खे परमेशरो री भक्तिया खे त्यार करो। 8 कऊँकि शरीरो रे री कसरता ते कम लाब ओआ, पर भक्ति सबी गल्ला खे लाबदायक ए, कऊँकि एस बखतो री और आऊणे वाले जीवोनो रा बी येई वादा ए। 9 ये गल्ल सच और हर परकारो ते मानणे जोगी ए। 10 येई बजअ ए कि आसे कड़ी मईणत और कौशिश करदे रऊँए, कऊँकि आसे लोके जिऊँदे परमेशरो पाँदे परोसा राखी राखेया, जो सबी मांणूआ रा और खास करी की विश्वासिया रा उद्धारकर्ता ए।

11 इना गल्ला री मानणे री आज्ञा दे और सखयांदा बी रओ। 12 तुसा रा चाल-चलण एडा ओ कि जवान ऊणे पाँदे बी कोई तुसा खे तुच्छ नि समजो। पर आपणी गल्ला रे और चाल-चलणो रे, प्यार और विश्वासो रे और पवित्तरता रे मसीह विश्वासिया खे उदारण बणी जा। 13 जदुओ तक आऊँ नि आऊँ, तदुओ तक मण्डलिया रे पवित्तर शास्त्रो खे पढ़ने, उपदेश देणे और सखयाणे रे लगेया रा रओ। 14 तेस आत्मिक बरदानो खे जो तांदे मौजूद ए नजर अंदाज नि कर, जो ताखे भविष्यवाणिया रे जरिए, तेस बखते दितेया था जेबे मण्डलिया रे बुजुर्गें तां पाँदे आथ राखे थे।

15 तिना गल्ला खे करदा रओ, और इना रेई आपणा त्यान लगाई राख ताकि सब लोक देखी सको कि विश्वासो रे तेरी तरक्की ऊणे लगी री। 16 इना गल्ला रे चौकस रओ कि तेरा चाल चलण केडा ए और क्या उपदेश देणे लगी रे। इना गल्ला रे स्थिर रओ, कऊँकि जे एडा करदा रएगा, तो तूँ आपणे और आपणे सुणने वाले खे बी बचाणे री बजअ ऊणा।

5

XXXXXXXXXX XX XXXXX XXXXXXXXXXXXXXXX

1 केसी बी सयाणे मांणूए खे बेज्जतिया रे नजरिए ते नि बक, पर तेसखे पिता जी समजी की समजया। जवाना खे पाई मानी की समजा। 2 स्याणी जवानासा खे माए समजी की और जवान जवानासा खे पूरी पवित्तरता ते बईण समजी की समजया।

3 तिना बिदुआ रा, जो सच्चो खेई बिदुआ ए, आदर और मताद करो। 4 और जे केसी बिदुआ रे बच्चे या दोईते-पोते ओ, तो सेयो पईले आपणे ई कराने साथे आपणी जिम्मेवारी नवाई की परमेशरो रा भगत ऊणा सीखो और आपणे माए-बाओ री देखपाल करी की कर्ज चुकाओ। कऊँकि परमेशरो खे येई अच्छा लगोआ। 5 से जो सच्चो खेई बिदुआ ए और तेसा रा कोई निए, से परमेशरो पाँदे ई उम्मीद राखोई। से दिन-रात बिनती और प्रार्थना करदी रओई और परमेशरो ते मताद मांगदी रओई। 6 पर से बिदुआ जो भोग-विलासो रे पड़ी गी, से जिऊँदे जिऊए ई मरी गी री। 7 इना गल्ला री बी आज्ञा देया कर, ताकि सेयो निर्दोष रओ। 8 पर जे कोई आपणेया री और खास करी की आपणे परिवारो री देखपाल नि करो, तो से विश्वासो ते मुकरी गा रा और अविश्वासिया ते बी बुरा बणीगा रा।

9 बिदुआ री सूचिया रे सिर्फ तेसा रा ई नाओं लिखेया जाओ, जो साटा साला ते कम नि ओ और जो आपणे लाड़े रे विश्वासो जोगी रई ओ। 10 और से खरे कामा रे सुनाम रई ओ, जेसे बच्चे ठीक टंगो रे पाली राखे ओ, पराऊणेया री आओ-बैठ करी राखी ओ, परमेशरो रे लोका रे पैर तोए ओ, दुःखिया री मताद किती ओ और हर एक खरे कामो रे मन लगाया ओ।

11 तेसा सूचिया रे जवान बिदुआ रे नाओं नि लिखणा, जो मसीह रा बिरोद करी की सुख-विलासो रे पड़ी जाओईया और ब्या करना चाओईया। 12 सेयो दुबारा ब्या करी की आपू खे दोषी ठराओईया, कऊँकि तिने ब्या ना करने रा वादा तोड़ी ता। 13 और इजी साथे-साथे सेयो कअरे-कअरे फिरी की आलसी ऊणा सिखोईया। सेयो बस आलसी ई नि, पर ओरी रे बारे रे बक-बक करदिया रओईया और ओरी रे कामो रे आथ बी पाओईया और बेटंगी गल्ला करोईया। 14 इजी री खातर आऊँ ये चाऊँआ कि जवान बिदुआ ब्या करी लो और बच्चे पैदा करो और कअर बार सम्बालो और केसी बी बिरोदिया

खे बदनाम करने रा मोका नि देओ। ¹⁵ कऊँकि कई जणियां तो बईकि की शैतानो पीछे ऊई चुकी रिया।

¹⁶ जे केसी विश्वासणिया रे कअरे कोई बिदुआ ओ, तो सेयो ई तिना री मताद करो ताकि मण्डलिया पाँदे बोज नि ओ। तेवे मण्डलिया तिना बिदुआ री मताद करनी, जो सच्चो खेई कल्ली ए।

¹⁷ मण्डलिया रे वुजुर्ग जो आपणा काम ठीक टंगो रे करोआ तिना खे सई आदर और सई मजदूरी दिती जाओ, खास करी की सेयो जो परमेशरो रा वचन सिखाणे और पूरचार करने रे कड़ी मईणत करोए। ¹⁸ कऊँकि पवित्र शास्त्रो रे लिखी राखेया, “जोड़े रे बलदा रा मूँ नि बानो,” पवित्र शास्त्र एक ओरी जगा बोलोआ, “मजूरदार आपणी मजदूरिया रा अक्कदार ए।” ¹⁹ मण्डलिया रे केसी बी वुजुर्गो रे खलाफ आरोप नि सुणो। जदुओ तक दो या तीन गवा तेसखे ये नि बोलो कि तिने कुछ गलत करदे देखी राखेया। ²⁰ पर पाप करने वालेया मण्डलिया रे तिना वुजुर्गो खे सबी सामणे समजयाई दे, ताकि ओर लोक बी पाप करने ते डरो। ²¹ ओ तीमूथियुस, आँऊ ताखे परमेशर, यीशु मसीह और चूणे रे स्वर्गदूता खे आजीर जाणी कि खबरदार करूँआ कि तूँ दिल खोली कि इना गल्ला खे मानेया कर और केसी साथे पक्षपात नि कर।

²² मण्डलिया रे अगुवा बनाणे खे केसी पाँदे फटाफट आथ नि राखणा। जे तुसे बिना सोचे बिचारे तेस पाँदे फटाफट आथ राखी कि तेसखे अगुवा बणाओए और से पाप करो तो एड़ा करने पाँदे तुसे बी तेसरे पापो रे शामिल ओए। आपणे आपू खे पवित्र बणाई कि राख।

²³ एवुए ते बस पाणिए खेई पीणे वाला नि रओ, पर आपणे पेटो रे और आपणे बार-बार बमार ऊणे री वजअ ते, थोड़ा-थोड़ा दाखरस बी कामो रे ल्याया कर।

²⁴ आँऊ तुसा खे बोलूँआ कि अगुवा बनाणे रे जल्दी नि करो कऊँकि कुछ लोक सामणे-सामणे पाप करोए। एथो तक कि न्याय ऊणे ते पईले ई सेयो लोक विश्वासिया रे सामणे साफ तौरो पाँदे दोषी ए। हालाँकि कुछ लोका रे पाप पईले सामणे नि आऊँदे पर बादो ते सामणे आई जाओए।

²⁵ तियाँ ई जेवे कुछ लोक खरे काम करोए तो ओरी विश्वासिया रे जरिए साफ-साफ दिशोए। एथो तक कि जे सेयो साफ-साफ नि दिशो तेवे बी तिना रे जरिए महसूस किते जाओए।

6

¹ सेयो सब विश्वासी जो केसी रे गुलाम ए सेयो आपणे-आपणे मालको खे बडे आदरो जोगा जाणो ताकि परमेशरो रे नाओं री और आसे रे उपदेशो री निन्दा नि ओ। ² जेस गुलाम विश्वासिये रा मालक बी विश्वासी ए तो से गुलाम आपणे मालको खे इजी बजअ ते तुच्छ नि समजो कि तेसरा मालक बी मेरे जेड़ा विश्वासी ए। बल्कि से एवे तिना री सेवा ओर बी मन लगाई कि करो। कऊँकि जो तिना रे कामो ते फायदा पाओए सेयो साथी विश्वासी ए जिना ते सेयो प्यार करोए।

REPEATED PHRASE

इना गल्ला रे उपदेश करेया कर और इजी खे मानणे खे समजयांदा रओ। ³ जे कोई ओरी प्रकारा रा उपदेश देओआ और म्हारे प्रभु यीशु मसीह रे जरिए दिती री शिक्षा और परमेशरो री भक्तिया री शिक्षा ते सईमत नि ऊँदा, ⁴ तो से बऊत कमण्डी ऊईगा और कुछ नि समजदा। एडे लोका खे बईस ओर बेकारो रे शब्दा पाँदे तर्क-वितर्क करने रा रोग ए, इना गल्ला ते डाह, चगड़े, निन्दा री गल्ला और बुरे-बुरे शक पैदा ओए ⁵ इना लोका बीचे बेकार लड़ाई-चगड़े पैदा ओए। जिना रा दमाक खराब ऊईगा रा और सेयो सच्चाईया ते दूर ऊईगे रे। सेयो लोक समजोए कि परमेशरो री सेवा करना पैसा कमाणे रा जरिया ए।

⁶ पर आसा खे येई अच्छा ए कि आसे सई करिए जो परमेशरो खे अच्छा लगोआ और तिदे ई सन्तुष्ट रईए जो परमेशर आसा खे देओआ। ⁷ कऊँकि ना आसे दुनिया रे कुछ ल्याए और ना ई कुछ लयी जाई सकूँए। ⁸ ओर जे आसा गे खाणे खे और पईनणे खे आए, तो इना रेई सन्तुष्टी करनी चाईयो। ⁹ पर जो अमीर ऊणा चाओए, सेयो एड़ी परीक्षा और फंदे रे, बऊत मूर्खता और आनिकारक लालसा रे फसोए, जो माणूआ खे बिगाड़ी देओईया और नाशो रे समुद्रो रे डूबाई

देओईया । 10 कऊँकि पैसे रा लालच सब परकारा री बुराईया री जड़ ए । इजी रे लालचो रे पडी की कुछ लोक तो विश्वासो ते पटकी गे और आपणे आपू खे कई परकारो रे दुःखो री छानणी बणाईता रा ।

~~~~~

11 पर ओ तीमुथियुस परमेशरो रे सेवक, तू इना सबी बुरे कामा खे करने ते दूर नठ । जो सई काम ए तिजी खे हर तरअ ते करने री कोशिश कर । एड़ी जिन्दगी जी जेते की परमेशरो खे आदर मिलो । मसीह पाँदे परोसा राख । ओरी लोका साथे प्यार कर । मुसीबत आऊणे पाँदे इम्मत राख । ओरी लोका साथे नरमाईया साथे बर्ताव कर । 12 जिंयां एक अच्छा सिपाई जो आपणी लड़ाई नि छाडदा तियाँ ई तू बी आपणे परमेशरो पाँदे परोसा करना और तिना री आज्ञा मानणा नि छाड । तेस अनन्त जीवनो खे पकडी की राख, जेतेरी खातर तू बुलाई राखेया और बऊत सारे लोका सामणे अंगीकार कितेया था कि तुसे मसीह पाँदे विश्वास कितेया था । 13 परमेशरो खे आजीर जाणी की जो सबी खे जिन्दगी देओआ और यीशु मसीह खे आजीर जाणी की जिने राज्यपाल पुन्तियुस पिलातुसो रे सामणे अच्छी गवायी दिन्ती थी आऊँ तुसा खे ये आज्ञा देऊँआ 14 कि तू म्हारे प्रभु यीशु मसीह रे दुबारा वापस आऊणे तक निष्कलंक और निर्दोष रूपो ते आपणी जिम्मेवारी नवा । 15 परमेशर एक मात्र अधिपति जो तारीफा जोगा ए, से राजेया रा राजा और प्रभुए रा प्रभु ए तेस ई यीशु मसीह ठीक बखतो पाँदे प्रकट करने । 16 अमर सिर्फ सेईए जो अगम्य जोतिया रे रओआ और ना तो से किने मांणूए देखेया और ना ई कदी देखी सकोआ । तेसरी प्रतिष्ठा और राज्य जुगो-जुगो तक ऊँदा रणा । आमीन् ।

17 एसा दुनिया रे अमीरा खे आज्ञा दे कि सेयो कमण्ड नि करो और नाशवान पैसे पाँदे उम्मीद नि राखो, पर सिर्फ परमेशरो पाँदे उम्मीद राखो जो म्हारे सुखो खे सब कुछ बऊत जादा देओआ । 18 तिना लोका खे ये आज्ञा देओ कि सेयो पले काम करो और खरे कामो रे अमीर बणो और उद्धार और मताद करने रे आगे रओ । 19 ईयां तिना आपू खे एडा पैसा कटटा करना जेते की आऊणे वाली जिन्दगिया खे एक खरी निऊँ पाई सको जेतेरे जरिए तिना असली जिन्दगी पाणी ।

20 ओ तीमुथियुस, एसा अमानता री रखवाली कर जो परमेशरे तांगे सम्बाली राखी । जेस ज्ञानो खे ज्ञान बोलणा ई पूल ए, तिजी री अशुद्ध बकवास और बिरोदो रिया गल्ला ते दूर रओ । 21 कुछ लोक एस चूटे ज्ञानो खे मानी की और तिजी रे मुताबिक काम करी की मसीह रे विश्वासो ते पटकी गे रे । आऊँ प्रार्थना करूँआ कि परमेशरो री कृपा तुसा पाँदे ऊँदी रओ ।

## 2 तीमुथियुस तीमुथियुसो खे प्रेरित पौलुसो री दूजी चिट्ठी भूमिका

तीमुथियुसो रे नाओ पौलुस प्रेरितों री दूजी चिट्ठी, पौलुसो रे एक जवान साथी और मददगारो रे रूपो रे कामो रे लगे रे तीमुथियुसो खे पौलुसो री व्यक्तिगत सला ए। इजी रा खास विषय ए सईन शीलता। तीमुथियुसो खे सला और प्रोत्साहन देई राखेया कि सताव और बिरोदो रे ऊँदे ऊए बी से विश्वासो साथे यीशु मसीह री गवाई देदा रओ, सुसमाचार और पुराणे नियमो री सच्ची शिक्षा पाँदे पक्का बणेया रा रओ और एक शिक्षक और प्रचारको रे रूपो रे आपणे फर्जो रा गुजारा करदा रओ।

तीमुथियुसो री खास रूपो रे “मूर्खतापूर्ण और बेकारो री बईसा” ते उलजणे ते पैदा खतरे रे बारे रे चेतावणी देई राखी इजी ते कुछ फाईदा नि उँदा पर ये सुणने वालेया खे सर्वनाश ऊणे री बजअ ऊई जाओई।

इना सबी रे तीमुथियुसो खे आपू लेखको री जिन्दगी और मकसद-तेसरे विश्वास, सईनशक्ति, प्यार, सबर, और सताव रे बखते दुःख-रे उदारणो खे याद दलाई राखेया।

**XXXXXXXXXX**

भूमिका 1:1, 2

तारीफ और उपदेश 1:3-2:13

सला और चेतावणी 2:14-4:5

पौलुसो री आपणी स्थिति 4:6-18

निचोड़ 4:19-22

**XXXXXXXXXX**

1 ये चिट्ठी मां पौलुसो री तरफा ते ए। परमेशेरे आँऊ यीशु मसीह रा प्रेरित करी कि चुणी राखेया ताकि आँऊ तेस संदेशो रा प्रचार करी सकूँ जेते कि अनन्त जीवन देणे रा वादा परमेशेरे करी राखेया जो यीशु मसीह पाँदे विश्वास करने ते मिलोआ। 2 आँऊ ये चिट्ठी तीमुथियुसो खे लिखणे लगी रा जो विश्वासो रे मेरे सच्चे पाऊए जेड़ा ए। आँऊ प्रार्थना कहुँआ कि परमेशर पिता और म्हारे प्रभु यीशु मसीह री तरफा ते ताखे कृपा, दया और शान्ति मिलदी रओ।

**XXXXXXXXXX XX XXXXXXXXXXXXX**

3 ओ तीमुथियुस, आँऊ दिन-रात आपणी प्रार्थना रे ताखे याद करदे ऊए परमेशरो रा धन्यवाद कहुँआ, जिना री सेवा आँऊ आपणे बाप-दादेया री रवाजा पाँदे शुद्ध विवेको ते कहुँआ। 4 और तेरे आसूआ खे याद करी-करी की, दिन-रात तां साथे मिलणे री लालसा कहुँआ ताकि आँऊ खुश ऊई जाऊँ। 5 और माखे तेरे तेस निष्कपट विश्वासो री याद आओई, जो पईले तेरी नानी लोईस और तेरी आम्मा यूनीके रा था और माखे निश्चा ए कि ताँदे बीए।

6 इजी बजअ ते आँऊ ताखे याद दलाऊँआ कि परमेशरो रे तेस बरदानो रा इस्तेमाल कर, जो मेरे आथ राखणे ते ताखे मिली रा। 7 परमेशर आसा खे डरपोक नि बणांदा। बल्कि तेसरा आत्मा आसा खे मजबूत बणाओआ, स आसा खे ओरी साथे प्यार करने और सबर राखणे रे मताद करोआ।

8 इजी री खातर ओ तीमुथियुस, तूँ ना तो आसा रे प्रभु यीशु मसीह री गवाई देणे ते शर्मिदा ओ और ना ई मांते जो तेसरा केदी ए शर्मिदा ओ। पर परमेशरो री सामर्था पाँदे परोसा राखी की तूँ मां साथे सुसमाचारो री खातर दुःख उठांदा रओ। 9 परमेशेरे आसा रा उद्धार करी राखेया और पवित्र जिन्दगी जिऊणे खे बुलाई राखेया। तिने ये म्हारे केसी कामो रे मुताबिक नि, पर आपणे मकसदो और आपणी कृपा ते एड़ा करी राखेया। से कृपा सनातनो तेई यीशुए मसीह रे जरिए आसा खे राखी री थी। 10 पर एवे म्हारे उद्धारकर्ता यीशु मसीह रे प्रगट ऊणे रे जरिए परयासा ऊआ। यीशुए मौता रा

नाश कितेया और जीवन और अमरता खे तेस सुसमाचारो रे जरिए प्रकाशमान करी ता। <sup>11</sup>जेतेरी खातर आऊँ सुसमाचार प्रचारक, परेरित और उपदेशक बी टईरया। <sup>12</sup>इजी बजअ ते आऊँ एती कैदा रे दुःख उठाणे लगी रा पर आऊँ इजी ते शर्मिंदा नि ऊँदा कऊँकि आऊँ मसीह खे जाणूँआ जेस पाँदे में परोसा करी राखेया। माखे ये पूरा निश्चा ए कि से तेस दिनो तक मेरी अमानता री रखवाली करने रे पूरी तरअ सामर्था ए।

<sup>13</sup>जो सच्ची शिक्षा तें मांते पाई राखी तिना खे तेस विश्वासो और प्यारो साथे जो यीशु मसीह रे ए, आपणा आदर्श बनाई कि राख। <sup>14</sup>और पवित्र आत्मा री सामर्था रे जरिए जो आसा रे बसी रा, तेसा अच्छी अमानता री रखवाली कर जो तांगे परमेशरे सम्बाली राखेया।

<sup>15</sup>तूँ जाणेया कि आसिया प्रदेशो रे रणे वाले बऊत सारे विश्वासिये आऊँ छाडीता रा, जिना बीचे फूलीगुस और हिरमुगिनेस बी ए।

<sup>16</sup>आऊँ प्रार्थना करूँआ कि प्रभु उनेसिफुरूस रे कराने पाँदे दया करो। कऊँकि तिने बऊत वार मेरा कालजा ठण्डा कितेया और मांते शर्मिंदा नि ऊँआ जेबे आऊँ जेला रे था। <sup>17</sup>पर जेबे से रोम नगरो रे आया, तो बडी कोशिश साथे टोली की मां साथे मिलेया। <sup>18</sup>आऊँ प्रार्थना करूँआ कि प्रभु न्याय रे दिना रे उनेसिफुरूसो पाँदे आपणी बडी दया दखाओ। ओ तीमूधियुस, जो-जो सेवा उनेसिफुरूसे इफिसुस नगरो रे किती, तिजी खे बी तूँ ठीक टंगो रे जाणोआ।

## 2

~~~~~

¹ओ मेरे पाऊ तीमूधियुस, तूँ तेसा कृपा ते, जो यीशु मसीह रे ए, तागतबर ऊई जा। ²तें मसीह रे बारे से शिक्षा मांते बऊत गवाओ रे सामणे सुणी राखिया। तेबेई आऊँ चाऊँआ कि सेई शिक्षा तिना विश्वासो जोगे लोका खे सखया जो ओरी खे बी सखयाणे जोगे ओ। ³यीशु मसीह रे खरे योद्धा जेडे, मां साथे दुःख ऊठा। ⁴जेबे कोई सिपाई लड़ाईया खे जाओआ, तो इजी री खातर जाओआ कि जिने से परती करी राखेया, तेसखे खुश करो और आपू खे दुनिया रे कामो रे नि फसांदा। ⁵तेबे अखाडे रे लड़ने वाला जे नियमो रे मुताबिक नि लड़ो, तो मुकुट नि पाँदा। ⁶जो जिम्मीदार मईणत करोआ, फलो रा पाअग पईले तेसखे मिलणा चाईयो। ⁷तूँ मेरी शिक्षा पाँदे विचार कर। प्रभुए ताखे हर गल्ला री समज देणी।

⁸यीशु मसीह खे याद राख, से दाऊदो रे वंशो ते ऊआ। परमेशरे से मरे रेया बीचा ते जिऊँदा कितेया और ये सेई सुसमाचार ए जो आऊँ लोका बीचे प्रचार करूँआ। ⁹तेसी सुसमाचारो खे प्रचार करने री खातर आऊँ कुकर्मियो जेड़ा दुःख उठाऊँआ, एथो तक कि आऊँ कैद बीए। पर कोई बी केसी खे परमेशरो रा वचन प्रचार करने ते रोक़ी नि सकदा। ¹⁰इजी बजअ ते आऊँ चूणे रे लोका रे फाईदे खे इतणा दुःख सईन करूँआ, ताकि सेयो बी तेस उद्धारो खे जो यीशु मसीह रे ए, अनन्त महिमा साथे पाओ।

¹¹ये गल्ल सच्ची ए कि
जे आसे तेस साथे मरी गे रे,
तो तेस साथे जिऊणे बी।

¹²जे आसे सबरो साथे दुःख सईन करदे रऊँगे,
तो तेस साथे राज्य बी करूँगे,

जे आसे तेसरा इन्कार करूँगे,
तो तेस बी म्हारा इन्कार करना।

¹³जे आसे मसीह साथे विश्वासघात करूँए,
तेबे बी मसीह आसा खे विश्वासो जोगा बणे रा रओआ,
कऊँकि से आपू ई आपू खे ना नि करी सकदा


~~~~~

14 सबी लोका खे इना ई गल्ला री याद दलांदा रओ। परमेशरो रे सामणे सबी लोका खे सावधान करी दे कि सेयो शब्दो पाँदे तर्क-वितर्क नि करेया करो। इना गल्ला साथे कुछ लाब नि ऊँदा, बल्कि इजी ते सुणने वालेया रा नाश ऊई जाओए। 15 आपणे आपू खे परमेशरो खे ग्रईण करने जोगा और एडा काम करने वाला ठराणे री कोशिश कर, जो शर्मिंदा नि ओ और जो सच्चो रे वचनो खे ठीक टंगो रे कामो रे ल्याओआ। 16 बेकारो री और मूर्खता री गल्ला ते बचे रा रओ, कऊँकि एडे लोक ओर बी अभक्तिया रे बडदे जाणे। 17 एडिया गल्ला सडे रे जख्मो जेडिया फैलदिया जाणिया। हुमिनयुस और फिलेतुस तिना बीचा तेई एक ए। 18 इने लोके सच्चाईया पाँदे विश्वास करना छाडीता रा। सेयो बोलोए कि परमेशरे मरे रेया विश्वासिया खे अनन्त जिन्दगी देणे खे पईले ई जिऊँदा करी ता रा। नतीजन सेयो कुछ विश्वासिया खे मसीह पाँदे विश्वास करने ते रोकणे लगी रे। 19 पर परमेशरे जो पक्की निऊँ पाई राखी से मजबूत ए। तिजी पाँदे ये छाप लगी री, “प्रभु तिना लोका खे पछ्याणोआ जो तिना रे आपणे ए,” और “जो कोई प्रभुए रा नाओं लओआ, से पापो ते दूर रओ।”

20 केसी बी बडे कअरो रे ना सिर्फ सुईने-चाँदिए रेई, पर लकड़ी और माट्टिया रे बी पांडे ओए। कोई-कोई पांडे खास मकसदो खे और कोई-कोई आम इस्तेमालो खे ओए। 21 इयाँ ई विश्वासी बी जो आपणे आपू खे तिना सारी बुरिया गल्ला ते लग राखोगा तो से बी तेस किमती पांडे जेडा ठईरना जो खास मकसदो खे इस्तेमाल ओआ। तेसरी जिन्दगी पवित्तर और आपणे मालको खे हर पले कामो रे इस्तेमाल ऊणी।

22 ओ तीमुथियुस, जवानिया री बुरी इच्छा ते नठ। बल्कि तिना सबी लोका साथे धार्मिकता, विश्वास, प्यार और मेल-जोलो रा पीछा कर जो साफ दिलो ते प्रभुए रा नाओं लओए। 23 आँऊ फेर बोलूँआ मूर्खता और अनपढ़ता री बईसी ते दूर रओ, कऊँकि तूँ जाणया कि तिना ते चगडे ओए। 24 और प्रभुए रे दासो खे चगडालु नि ऊणा चाईयो, बल्कि सबी साथे मिलणसार, सईनशील और शिक्षा देणे रे निपुण ऊणा चाईयो। 25 और बिरोदिया खे नरमाईया रे समजयाओ, क्या पता परमेशर तिना खे मन फिरणे रा मन देओ कि सेयो बी सच्चो खे पछ्याणो। 26 सेयो सचेत ऊई जाओ और शैतानो रे तेस फेदे ते छूटी जाओ जिदे शैताने तिना खे आपणी इच्छा पूरी करने खे जकडी राखेया।

### 3



1 ओ तीमुथियुस, ये समजी लओ कि अंतो रे दिनो रे मसीह रे वापस आऊणे ते पईले कठण बखत आऊणा। 2 लोक मतलबी, पैसेया रे लोबी, त्वालिया मारने वाले, कमण्डी और निन्दा करने वाले ऊणे। तिना आपणे माया-बाओ रा कईणा नि मानणा। सेयो लोक मतलबी और अपवित्तर ऊणे। 3 सेयो लोक दया ना करने वाले, माफ ना करने वाले, ओरी पाँदे दोष लगाणे वाले और सबर ना राखणे वाले ऊणे। सेयो लोक कठोर और अच्छाईया ते बैर राखणे वाले ऊणे। 4 सेयो लोक विश्वासघाती, उतावले और कमण्डी ऊणे। सेयो लोक परमेशरो खे नि बल्कि सुख बिलासो खेई चाणे वाले ऊणे। 5 तिना भक्तिया रा पेष तो तरना, पर तिजी री सामर्थ नि मानणी जो तिना री जिन्दगिया खे बदली सकोई। एडिया माणूआ ते दूर रणा।

6 इना ई बीचा ते सेयो लोक ए, जो कअरे दवे पैरे कूसी कि आयी जाओए और तिना कमजोर जवाणसा खे वशो रे करी लओए, जो पापो ते दबी रिया और हर प्रकारा रिया बुरी इच्छा रे वशो रेईया। 7 एडिया जवाणसा सदा नईया-नईया गल्ला सीखदिया तो रओईया, पर परमेशरो रे सच्चे संदेशो खे कदी नि समजी सकदिया। 8 जियाँ यन्नेसे और यम्ब्रसे मूसे रा बिरोद कितेया था, तियाँ ई यो लोक बी सच्चो रा बिरोद करोए। यो तो एडे माणू ए जिना री बुद्धि प्रष्ट ऊईगी री और तिना रा विश्वास दखावटी ए। 9 पर इना खे कामयाबी नि मिलणी कऊँकि जेडी यन्नेस और यम्ब्रसो री मूर्खता सबी माणूआ सामणे आईगी थी, तेडी ई इना री मूर्खता बी सामणे आई जाणी।






10 पर ओ तीमथियुस, तूँ पक्का ई जाणोआ कि आँऊ क्या उपदेश देऊँआ और आँऊ कियां रऊँआ, मेरी जिन्दगिया रा मकसद क्या ए और आँऊ क्या विश्वास करूँआ। तूँ मेरे सबर, प्यार और सईन शीलता खे तो जाणेया। 11 तूँ ये बी जाणेया कि अन्ताकिया, इकुनियुम और लुस्तुरा जेडे नगरा रे मां पाँदे कितणा अत्याचार ऊआ और माखे दुःख दित्ते। मैं कितणे अत्याचार सईन कित्ते पर प्रभु तिना सबी ते मेरी रक्षा करदा रया। 12 ये बात सच ए कि जितणे यीशु मसीह रे भक्तिया साथे जीवन बिताणा चाओए, सेयो सब सताए जाणे। 13 पर दुष्ट लोक और बईकाणे वाले तोखा देदे ऊए और आपू तोखा खांदे ऊए लगातार नाशो रे गड्डे रे पडदे जाणे। 14 पर जेथो तक तेरा सवाल ए तूँ इना गल्ला खे जो तैं सीखी राखिया लगातार विश्वासो जोगा बणेया रा रओ और तिदे विश्वास करदा रओ। याद राख कि तैं किना लोका ते यो गल्ला सीखिया थिया। 15 और बचपनो तेई तूँ पवित्तर शास्त्रो खे जाणेया। ये ताखे मसीह पाँदे विश्वास करने ते, उद्धार पाणे खे अक्लमंद बणाई सकोआ। 16 पूरा पवित्तर शास्त्र परमेशरो री प्रेरणा ते रचेया राए। ये पवित्तर शास्त्र उपदेश देणे, गलती करने पाँदे डांठणे खे, सुदारने और धार्मिकता री शिक्षा खे फायदेमंद ए। 17 ताकि परमेशरो रा जन हर एक खरे कामो खे करने जोगा बणो और त्यार रओ।

## 4

1 आँऊ तुसा खे परमेशर और यीशु मसीह खे गावा करी की जेस जिऊँदे और मरे रेया रा न्याय करना और तेसरे राजे रे रुपो रे राज्य करने आऊणे री याद दलाई कि चेतावणी देऊँआ 2 कि परमेशरो रे वचनो रा प्रचार कर। बखत और बेबखत सदा त्यार रओ, सबी प्रकारा री सईन शीलता और शिक्षा साथे लवामे दे और बक और समजया। 3 कऊँकि एडा बखत आऊणा कि लोका खरा उपदेश नि सईणा, और आपणी मन पसंद गल्ला खे सुणने और तिना ते खुश ऊणे खे आपू खे बऊत उपदेशक कट्टे करी लणे। 4 तिना लोका सच्चाई नि सुणनी पर मनकइन्त काणियां पाँदे मन लगाणा। 5 पर तूँ सबी गल्ला ते सावधान रओ, प्रभुए खे दुःख सईन करी लओ, सुसमाचार प्रचारो रा काम कर और आपणी सेवा पूरी कर।

6 आँऊ ये आज्ञा तुसा खे इजी खे देऊँआ कि मेरी जिन्दगी और परमेशरो रा काम पईले ई खत्म ऊणे लगी रा कऊँकि आऊँ जाणूँआ कि मेरी मौत नेडे ए। 7 आऊँ अच्छी लड़ाई लड़ी चुकी रा, मैं आपणी दौड़ पूरी करी ली री, आऊँ आखरी तक विश्वासो जोगा बणेया रा रया। 8 एबे प्रभुए स्वर्गो रे माखे एक मुकुट राखी राखेया, कऊँकि मैं धार्मिकता ते जिन्दगी जि राखी। आसा रा प्रभु यीशु मसीह जो तर्मी न्याय करने वाला ए, जेबे से न्याय करने वापस आऊणा तेस दिने माखे से मुकुट देणा। पर सिर्फ आँऊ ई से निए जेसखे से इनाम मिलणा बल्कि हर एकी खे जो तेसरे वापस आऊणे रा बेसबिरया साथे इन्तजार करने लगी रे।



9 तुसे फटाफट मांगे आऊणे री कोशिश करो। 10 कऊँकि देमासे एसा दुनिया री गल्ला खे प्यारी जाणी की आऊँ छाडीता रा और थिस्सलुनीके नगरो खे चली गा रा और करेसकेंस गलातिया प्रदेशो खे और तीतुस दलमतिया प्रदेशो खे चली गा रा। 11 बस लुका ई मां साथे ए। जेबे तूँ आएगा तो मरकुसो खे बी आपू साथे लयी आया, कऊँकि सेवा खे से मेरे बऊत कामो राए। 12 तुखिकुस मैं इफिसुस नगरो खे पेजी ता रा। 13 आऊँदे बखते मेरा कोट बी लंदे आया जो आऊँ तुरोआस नगरो रे करपुसो रे गे छाडी आयी रा, और मेरी कताबा खास करी की चर्मपत्र लयी की आया।

14 सिकन्दर ठठेरे मां साथे बऊत बुराईया करी राखिया। प्रभुए तेसखे तेसरे बुरे कामो रे मुताबिक फल देणा। 15 तूँ आपू बी तेसते सावधान रओ, कऊँकि तिने म्हारी शिक्षा रा बऊत बिरोद कित्तेया।

16 जेबे आँऊ पईली बार आपणे बचाव खे कचैरिया रे गया था तेस बखते मां साथे कोई नि था बल्कि आऊँ सबी छाडीता था। आँऊ प्रार्थना करूँआ कि परमेशरो खे तिना इजी रा लेखा नि देणा पडो। 17 पर प्रभु मेरा मददगार रया और माखे सामर्थ दिती, ताकि मेरे जरिए सुसमाचारो रा पूरा-पूरा प्रचार ओ और सब दूजी जाति सुणी लो और तिने आऊँ मौता ते बचाया। 18 और प्रभुए

आऊँ हर बुरे कामो ते छुड़ाणा और आपणे स्वर्गो रे राज्य रे बचाई की पऊँछाणा, तेसरी ई महिमा जुगो-जुगो तक ऊँदी रओ। आमीन्।

~~XXXXXXXXXX~~

<sup>19</sup> बईण पिरस्किल्ला और तेसा रा लाड़ा अक्विला और उनेसिफुरूसो रे कराने खे मेरा नमस्कार। <sup>20</sup> इरास्तुस कुरिन्थुस नगरो रे रई गा और मैं तुरुफिमुस मिलेतुस नगरो रे छाडीता कऊँकि से बमार था। <sup>21</sup> टण्डी ते पईले आऊणे री कोशिश कर। यूब्लुस, पूदेंस, लीनुस और कलौदिया और सब विश्वासी पाईया रा ताखे नमस्कार। <sup>22</sup> आऊँ प्रार्थना करूँआ कि प्रभु तेरी आत्मा साथे रओ, तुसा पाँदे कृपा ऊँदी रओ।

## तीतुस तीतुसो खे प्रेरित पौलुसो री चिट्ठी भूमिका

तीतुस एक गैर-यहूदी मसीह था, जो पौलुसो रे प्रचारो रे कामो रे तेसरा साथी और मददगार बणीगा था। तीतुसो रे नाओं पौलुस प्रेरितों री चिट्ठी करते रे रणे वाले पौलुसो रे एस ई जवान मददगारो खे लिखी राखी, जो एती मण्डलिया रे काम करने रा देख-रेख करने खे राखी राखेया था। ये चिट्ठी तीन खास विषय रे बारे रे बताओई।

पईला-तीतुसो खे ये याद दलाई राखेया कि मण्डलिया रे अगुवे रा चरित्र केड़ा ऊणा चाईयो, खास करी की करते रे रणे वालेया रा बुरा चरित्र देखदे ऊए ये बोली राखेया। दूजा-तीतुसो खे ये सलाह देई राखी कि मण्डलिया रे आए रे कई चूण्डा खे कियोँ शिक्षा देणी चाईयो, मतलब-स्याणे मर्द, स्याणी जवाणसा (जो कम से कम जवान जवाणसा खे शिक्षा देई सको) जवान मर्द और दास। तीजा-लेखक तीतुसो खे मसीही आचरणो ते जुड़ी सलाह देओआ, खास करी की शान्तिया रे दोस्त बणने खे और नफरत और बईस और मण्डलिया रे गुटबंदिया ते बचणे रिया खातर।

**रूप-रेखा**

भूमिका 1:1-4

मण्डलिया रे अगुवे 1:5-16

मण्डलिया रे कई चूण्डो रे फर्ज 2:1-15

उपदेश और चेतावणी 3:1-11

निचाड़ 3:12-15



1 ये चिट्ठी मां पौलुसो री तरफा ते ए। आँऊ परमेशरो रा दास और यीशु मसीह रा प्रेरित ए। आँऊ परमेशरो रे तिना चूणे रे लोका रा विश्वास मजबूत करने खे पेजी राखेया और तिना खे सिखाणे खे कि सेयो सच्चे खे जाणो ताकि सेयो ईश्वरीय जिन्दगी जी सको।<sup>2</sup> नतीजन तिना परमेशरो साथे सदा री जिन्दगी जिऊणे री उम्मीद करनी। कऊँकि परमेशर कदी बी चूट नि बोलदा, तिने दुनिया बनाणे ते पईले ये वादा कित्तेया था कि तेसरे लोका सदा कालो री जिन्दगी जिऊणी।<sup>3</sup> और एबे एकदम ठीक बखतो पाँदे परमेशरे ए सुसमाचार आसा पाँदे प्रकट करी राखेया और आसे इजी खे सबी लोका खे प्रचार करूँए। परमेशर जो म्हारा उद्धारकर्ता ए तिने माखे ये जिम्मेवारी दिती कि आँऊ तिना खे ये काम करूँ।

4 आँऊ ये चिट्ठी तीतुसो खे लिखणे लगी रा जो विश्वासो रे मेरे सच्चे पाऊए जेड़ा ए। आँऊ प्रार्थना करूँआ कि परमेशर पिता और म्हारे उद्धारकर्ता यीशु मसीह री तरफा ते ताखे कृपा और शान्त मिलदी रओ।



5 आँऊ ताखे करते टापूए रे इजी खे छाडी आया था कि तूँ बाकि बची रिया गल्ला खे सुदारे और जेड़ा मै बोली राखेया तिजी रे मुताबिक नगर-नगरो रे बुजुर्गो खे ठराई दे।<sup>6</sup> ये जरूरी ए कि बुजुर्ग निर्दोष और एक ई लाड़िया रा लाड़ा ओ। तिना रे बच्चे विश्वासी ओ और तिना पाँदे लुचपण और आज्ञा ना मानणे रा दोष नि ओ।<sup>7</sup> कऊँकि एक अध्यक्ष परमेशरो रे कराने रा पण्डारी ओआ, इजी खे तेसखे पक्का ई निर्दोष जिन्दगी जिऊणी चाईयो। बुजुर्गो खे ना टीट, ना रोष करने वाला, ना पियक्कड़, ना मार-पीट करने वाला और ना ई नीच कमाईया रा लोबी ऊणा चाईयो।<sup>8</sup> बल्कि से पराऊणचारी करने वाला, ओरी री पलाई चाणे वाला, सबर राखणे वाला, न्यायी, पवित्र और आपू पाँदे काबू राखणे वाला ऊणा चाइयो।<sup>9</sup> से जरूर मसीह रे तेस संदेशो रा विश्वासो साथे पालण



आसा खे देईता कि आसा खे हर परकारा रे पापो ते छुड़ाई लो और शुद्ध करी की आपू खे एड़ी जाति बनाई लो, जो खरे काम करने खे आगे रओ।

15 ओ तीवृस, तू इना गल्ला खे पूरे अक्को साथे समजेया और सिखांदा रओ। कोई ताखे तुच्छ नि समजो।

### 3

????? ???-???

1 ओ तीवृस, आपणे विश्वासी लोका खे याद दला कि सेयो हाकिम और अधिकारिया रे अधीन रओ और तिना री आज्ञा खे मानो और हर एक खरे काम करने खे तयार रओ।<sup>2</sup> तिना लोका खे बताओ कि सेयो केसी खे बदनाम नि करो और चगाडालु नि बणो। पर तिना रा नरम सबाओ ओ और सबी माणूआ साथे नरमाईया साथे रओ।<sup>3</sup> कऊँकि एक एड़ा बखत था जेबे आसे बी पईले नासमज और आज्ञा ना मानणे वाले थे। आसे बी बईमो रे पडे थे और कईया परकारा री इच्छा और सुख-विलासो री गुलामिया रे थे। आसा री जिन्दगी दुष्टता और डाहू ते परी री थी और एकी दूजे ते बैर राखूँ थे।<sup>4</sup> पर फेर बी म्हारे उद्धारकर्ता परमेशरे आपणी दया और प्यार आसा पाँदे और सबी माणूआ पाँदे प्रकट कित्तेया।<sup>5</sup> तिने आसे म्हारे पापो री सजा ते बचाए। ये आसा रे धार्मिक कामो री बजअ ते नि ऊआ जो आसे आपू कित्ते पर तेसरी दया रे मुताबिक ऊआ। तिने आसा रा नये जन्मो रे जरिए और पवित्तर आत्मा रे नया बनाणे रे जरिए उद्धार कित्तेया।<sup>6</sup> परमेशरे खुले दिलो ते आसा खे पवित्तर आत्मा दित्तेया कऊँकि यीशु मसीह आसा रे पापो री खातर मरी की म्हारा उद्धार करने वाला बणेया।<sup>7</sup> ताकि आसे अनन्त जीवन पाणे री उम्मीद करी सकिए जेतेखे परमेशरे आपणे बच्चेया खे देणे रा वादा करी राखेया। कऊँकि परमेशरे आसे आपणी कृपा रे जरिए तर्मी ठराई राखे।<sup>8</sup> ये गल्ल सच ए और आऊँ चाऊँआ कि तू इना गल्ला रे बारे रे मजबूतिया साथे शिक्षा देओ, ताकि जिने परमेशरो पाँदे विश्वास करी राखेया, सेयो खरे कामो रे लगे रणे रे त्यानो रे रओ। यो शिक्षा पलिया और माणूआ रे लाबो रिया ए।

9 पर मूर्खता रे बईस, वंशावली, बैर-बिरोद और तिना चगडेया ते, जो मूसे रा विधानो रे बारे रे ओ, बचे रा रओ, कऊँकि सेयो निष्फल और बेकार ए।<sup>10</sup> जो माणू आपणे गलत विश्वासो रे जरिए फूट पाओआ तेसखे एक-दो बार चेतावणी देई कि तेसते लग रओ।<sup>11</sup> ये जाणी की कि एड़ा माणू सच्चाईया ते पटकी गा रा और आपणे आपू खे दोषी ठईराई की पाप करदा रओआ।

????????? ??????? ?? ????????

12 जेब आऊँ करते टापूए रे तांगे अरतिमास या तुखिकुसो खे पेजूँ, तो मांगे नीकुपुलिस नगरो रे आऊणे री कोशिश करनी, कऊँकि मैं तेथी ठण्ड बिताणे री ठाणी राखी।<sup>13</sup> जेनास वकील और अपुल्लोसो खे कोशिश करी की आगे पऊँछाई दे और देख कि तिना खे किजी बी चीजा री कमी नि ओ।<sup>14</sup> सिर्फ येई नि आपणे विश्वासिया खे सखयांदा रओ कि सेयो बी लोका री जरूरता खे पूरी करने खे खरे कामो रे लगे रे रओ, ताकि सेयो बी खूब फलो-फूलो।

15 जितणे बी विश्वासी एती मां साथे ए तिना सबी री तरफा ते ताखे नमस्कार। कुरते टापूए रे रणे वाले आसा रे साथी विश्वासी जो आसा साथे प्यार राखोए, तिना खे नमस्ते। आऊँ प्रार्थना करूँआ कि परमेशरो री कृपा तुसा सबी पाँदे ऊँदी रओ।

## फिलेमोन फिलेमोनो खे प्रेरित पौलुसो री चिट्ठी भूमिका

फिलेमोन एक खास मसीही था, जो कुलुस्से री मण्डलिया रा सदस्य और उनेसिमुस नाओं रे एक दासो रा मालक था। ये दास आपणे मालको रे कअरो ते नठी गा था और तेवे कियॉ बी करी की पौलुसो रे सम्पर्को रे आया, जो तेस बखते जेला रे था। पौलुसो रे जरिए उनेसिमुस एक मसीही बणीगा। फिलेमोनो रे नाओं पौलुस प्रेरितों री चिट्ठी फिलेमोनो ते ये प्रार्थना करोई कि से आपणे दासो साथे दुबारा ते मेल-मलाप करी लो, जेसखे पौलुस दुबारा ते तेसगे पेजणे लगी रा और ना बस एक माफ किते रे दासो रे रूपो रेई, बल्कि एक मसीही पाईए रे रूपो रे तेसरा स्वागत कर।

**रूप-रेखा**

भूमिका 1:1-3

फिलेमोनो री तारीफ 1:4-7

उनेसिमुसो खे प्रार्थना 1:8-22

निचोड़ 1: 23-25

**????????**

1 ये चिट्ठी मां पौलुसो री तरफा ते ए। आऊ कैदा रे ए कऊँकि आऊ यीशु मसीह रे सुसमाचारो रा प्रचार करूँआ। मेरा और आसा रे साथी विश्वासी तीमुथियुसो री तरफा ते ताखे नमस्कार। ओ फिलेमोन मां साथे काम करने वाले मेरे प्यारे दोस्त आऊ ये चिट्ठी ताखे लिखणे लगी रा।<sup>2</sup> आऊ ये चिट्ठी आसा री विश्वासी बईण अफफिया और पाई अरखिप्पुस जो प्रभुए री सेवा एक योद्धा जेड़ी करोआ और तेसा मण्डलिया के बी जो तुसा रे कअरे कट्ठी ओई लिखणे लगी रा।<sup>3</sup> आऊ प्रार्थना करूँआ कि म्हारे पिता परमेशोर और प्रभु यीशु मसीह री तरफा ते ताखे कृपा और शान्ति मिलदी रओ।

**???????? ?? ????? ?? ???????**

4 जेबे कदी बी आऊ ताखे प्रार्थना करूँआ तो सदा ताखे परमेशरो रा धन्यवाद करूँआ।<sup>5</sup> कऊँकि आऊ प्रभु यीशुए पाँदे तेरे विश्वास और परमेशरो रे लोका खे तेरे प्यारो रे बारे रे सुणने लगी रा।<sup>6</sup> आऊ प्रार्थना करूँआ कि तेरी से साजेदारी जो विश्वासिया साथे ए और बी बइदी जाओ। ताकि आसे सब ये जाणी सकिए कि आसे लोक मसीह पीछे चली की कितणे आशीषित ए।<sup>7</sup> ओ दोस्त, माखे तेरे प्यारो ते बऊत खुशी और शान्ति मिली, कऊँकि तेरे जरिए परमेशरो रे लोका रे मन खुश ऊईगे।

**?????? ?? ??????????? ?? ?????**

8 ओ फिलेमोन, आऊ तुसा ते एक निवेदन करूँआ हालाँकि आऊ मसीह रा प्रेरित ऊणे रे नाते तुसा खे जो करना चाईयो तिजी खे अक्को साथे एसा गल्ला खे करने री आज्ञा देई सकूँआ<sup>9</sup> तेवे बी मां स्याणे पौलुसो खे, जो एवे यीशु मसीह रा सुसमाचार सुनाणे री बजअ ते जेला रे कैद ए, ये ओर बी खरा लगेया कि प्यारो साथे तुसा ते विनती करूँ।<sup>10</sup> आऊ उनेसिमुसो खे विनती करूँआ जो मेरे पाऊए जेड़ा ए। से मसीह रे मेरा पाऊ बणीगा जेबे आऊ जेला रे था।<sup>11</sup> से पईले तो तेरे किजी कामो रा नि था, पर एवे तेरे ओर मेरे दूँई रे बडे कामो राए।

12 तेसखे ई, मतलब जो मेरे कालजे रा टुकड़ा ए, मैं से तांगे वापस पेजी ता रा।<sup>13</sup> तेसखे आऊ आपू गे ई राखणा चाऊँ था कि तेरी तरफा ते एसा कैदा रे जो सुसमाचारो री बजअ ते ए, मेरी सेवा करो।<sup>14</sup> पर मैं तेरी इच्छा ते बिना कुछ बी करना नि चाया, ताकि तेरी ये कृपा दबाओ रे नि पर खुशिया साथे ओ।<sup>15</sup> क्या पता उनेसिमुस इजी बजअ ते कुछ दिनों खे नठी गा ताकि से मसीह पाँदे

विश्वास करी सको और से ताखे सदा खे मिली जाओ। 16 पर आजो ते दासा जेड़ा नि, बल्कि दासो ते बी खरा, मतलब-पाईए जेड़ा रओ, जो मेरा तो खास प्यारा आए ई, पर एबे मांणूआ रे रूपो रे और प्रभुए रे बी, से तेरा खास प्यारा ओ।

17 जे तू माखे आपणा साथी समजेया, तो तेसखे ईयां ग्रहण करी लओ, जेड़ा माखे। 18 जे तिने तेरा कुछ नुकशाण करी राखेया या से तेरा कर्जदार ए, तो मेरे नाओं दे लिखी लो। 19 आऊँ पौलुस आपणे आथो साथे लिखूआ कि मां आपू ई तेसरा कर्जा परी देणा। इजी री बोलणे री जरूरत नि ए कि तेरी सारी जिन्दगी मेरी कर्जदार ए। 20 ओ मेरे प्यारे दोस्त, ये खुशी माखे प्रभुए रे तेरी तरफा ते मिलो। मसीह रे मेरे जिऊओ खे अरा-फरा करी दे। 21 आऊँ तेरे आज्ञाकारी ऊणे रा विश्वास करी की ताखे लिखूआ और ये जाणूआ कि जो कुछ आऊँ बोलूआ, तां तिजी ते बी केथी ओर बड़ी की करना।

22 और ये बी कि माखे रणे खे जगा त्यार राख, माखे उम्मीद ए कि तुसा री प्रार्थना रे जरिए परमेशरो तुसा री प्रार्थना रा जवाब देणा और आऊँ तुसा गे फेर आयी जाणा।



23 इपफ्रास जो मां साथे यीशु मसीह रा सुसमाचार सुनाणे री बजअ ते कैदी ए से ताखे नमस्कार बोलोआ। 24 और मरकुस, अरिस्तर्खुस, देमास और लूका जो मां साथे प्रभुए रा काम करने वाले ए, इना री ताखे नमस्कार।

25 आऊँ प्रार्थना करूआ कि म्हारे प्रभु यीशु मसीह री कृपा तुसा री आत्मा पाँदे ऊँदी रओ। आमीन्।

## इब्रानियों इब्रानी पाषा बोलणे वाले यहूदी विश्वासिया खे चिट्ठी भूमिका

इब्रानियों रे नाओं री चिट्ठी मसीहिया रे चूण्डो खे लिखी राखी थी, जो बड़दे ऊए विरोदो रिया बजअ ते आपणे मसीही विश्वासो खे त्यागणे रे खतरे रे थे। लेखक तिना खे आपणे विश्वासो रे बणे रे रणे खे उत्साहित करोआ। खास करी की ये बतादे ऊए कि यीशु मसीह ई परमेशरो रा असली और आखरी प्रकाशन ए। एड़ा करदे बखते से तीन सच्चाईया पाँदे जोर देओआ : (1) यीशु मसीह ई परमेशरो रा असली पुत्र ए, जिने दुःख उठाई-उठाई की पिते री सच्ची आज्ञाकारिता सीखी। परमेशरो रे पुत्रो रे रूपो रे यीशु पुराणे नियमो रे भविष्यबक्ता, स्वर्गदूत और मूसे ते बी श्रेष्ठ ए। (2) यीशु परमेशरो रे जरिए अनन्तकालो रा प्रदान पुरोईत घोषित करी राखेया, पुराणे नियमो रे प्रदान पुरोईता ते बी श्रेष्ठ। (3) यीशुए रे जरिए विश्वासी पाप, डर और मौता ते बचाई ला रा और यीशु प्रदान पुरोईतो रे रूपो रे सच्चा उद्धार देओआ, यहूदी तर्मो रिया तर्म-विदिया और डांगरा रिया बलिया रे जरिए जेतेरा बस पईलका आभास ई मिलोआ।

इस्राएली इतियासो रे कुछ मशुर माणूआ रे विश्वासो रे उदारण बतादे ऊए (पाठ 11), लेखक आपणे पढ़ने वालेया ते विश्वासो रे बणे रे रणे री प्रार्थना करोआ और 12 वे पाठो रे से आपणे पढ़ने वाले ते प्रार्थना करोआ कि सेयो अंतो तक विश्वासो रे बणे रे रओ और आपणी नजर यीशुए पाँदे लगाए रे राखो और जो दुःख और सताओ तिना पाँदे आओए तिना खे सेयो सबरो साथे सईन करो। ये चिट्ठी कुछ सलाह और चेतावणिया साथे खत्म ओई।

### रूप-रेखा

भूमिका : मसीह परमेशरो रा पूरा प्रकाशन 1:1-3

मसीह, स्वर्गदूता ते बी श्रेष्ठ 1:4-2:18

मसीह, मूसा और यहोशूओ ते बी श्रेष्ठ 3:1-4:13

मसीह रे पुरोईतो रे पदो री श्रेष्ठता 4:14-7:28

मसीह री वाचा री श्रेष्ठता 8:1-9:28

मसीह रे बलिदानो री श्रेष्ठता 10:1-39

विश्ववासो री श्रेष्ठता 11:1-12:29

आखरी उपदेश और निचोड़ 13:1-25

### XXXXXXXX XX XXX, XXXXXX XX XXXX

1 पुराणे जमाने रे परमेशरे बाप-दादेया साथे कई बार लग-लग तरीके ते भविष्यबक्तेया रे जरिए गल्ला कितिया। 2 पर इना आखरी दिना रे परमेशरे आसा साथे पुत्रो रे जरिए गल्ला कितिया। परमेशरे आपणे पुत्रो रे जरिए ई सारी सृष्टि रची और सेई सारी चीजा रा बारस ठराया। 3 पाऊ ई परमेशरो री महिमा रा प्रयासा ए। से तेसरे तत्वो री छाया ए। सेई सब चीजा खे आपणी सामर्था रे वचनो साथे सम्बाली राखोआ; से पापो खे तोई की स्वर्गो रे परमेशरो रे दाँणे कनारे जाई की बैठेया 4 और स्वर्गदूता ते तिथणा ई खरा ठईरिया, जितणा तिने तिना ते बड़े पदो रा बारस ऊई की खरा नाओं पाया।

### XXXXXXXX-XXXXXXXX XX XXXXXX

5 परमेशरे कदी आपणे कसी बी स्वर्गदूतो खे ये नि बोलेया,  
“तूँ मेरा पुत्र ए,  
आज आऊ ए एलान करूँआ कि तूँ मेरा पाऊ ए।”



और फेर तिने केसी बी स्वर्गदूतो खे ये नि बोलेया,

“आऊँ तेसरा पिता ऊणा  
और से मेरा पाऊ ऊणा।”

6 जेबे परमेशेर आपणा आदरणीय पाऊ दुनिया रे पेजेया तो से बोलोआ,  
“परमेशरो रे सारे स्वर्गदूता तेसगे माथा टेकणा।”

7 और स्वर्गदूता रे बारे रे एड़ा बोलोआ,

“परमेशर आपणे स्वर्गदूता खे अवा जेड़ा  
और आपणे सेवको खे बऊत जादा सुलगी री आगी जेड़ा बणाओआ।”

8 पर पुत्रो रे बारे रे बोलोआ,

“ओ परमेशर, तेरा सिंहासन जुगो-जुगो तक रणा।  
तेरे राज्य रा राजदण्ड न्याय रा राजदण्ड ए।

9 तैं तर्मो खे प्यार और बुरे कामा साथे बैर राखेया;  
इजी खे बजअ ते परमेशर, तेरे परमेशरे तेरे साथिया ते बड़ी की  
खुशिया रे तेलो साथे तेरा अभिषेक कित्तेया।”

10 से आपणे पाऊए ते ये बी बोलोआ,

“ओ प्रभु! शुरूओ रे तैं तरतिया री निऊँ राखी  
और स्वर्ग तेरे आथो री कारीगिरी ए।

11 सेयो तो नाश ऊई जाणे, पर तूँ बणे रा रणा  
और सेयो सब टालेया जेड़े पुराणे ऊई जाणे।

12 तां सेयो पट्टुए जेड़े लपेटणे  
और सेयो टालेया जेड़े बदली जाणे,

पर तूँ नि बदलणा

और तेरे सालो रा अंत नि ऊणा।”

13 और परमेशेर कदी बी केसी बी स्वर्गदूता खे ये नि बोलेया,  
“तूँ मेरे दाँणे कनारे आदरणीय जगा रे बैठ,

जदुओ तक आऊँ तेरे बैरिया खे  
तेरे पैरा रे थालली पीढ़ी नि बणाई देऊँ?”

14 फेर स्वर्गदूता रा क्या मकसद ए? क्या सेयो सब परमेशरो री सेवा-टईल करने वालिया आत्मा  
निए, जो उद्धार पाणे वालेया री खातर सेवा करने खे पेजिया जाओईया?

## 2

### परमेशर के सेवा

1 तेबई आसा खे जो कुछ सिखाई राखेया था तिजी खे मानणे खे आसा खे ओर त्यान देणा चाईयो।  
केथी एड़ा नि ओ कि आसे सच्चाईया ते पटकी जाईए। 2 जे स्वर्गदूता रे जरिए दित्तेया रा संदेश  
इतणा सच साबित ऊआ और हर एक लोक जिने आज्ञा नि मानी तिना खे ठीक-ठीक सजा मिली,  
3 तो आसे लोक एड़े महान् उद्धारो खे नजरअंदाज करी की कियों बची सकूँए? एस महान् उद्धारो  
रा एलान सबी ते पईले प्रभु यीशुए आपू कित्तेया। जिने लोके प्रभुए खे सुणेया तिने लोके तिना  
रे संदेशो खे सच साबित कित्तेया। 4 साथे ई परमेशर बी आपणी इच्छा रे मुताबिक चिह्न, अचम्बे  
रे काम, कई प्रकारा रे सामर्था रे काम और पवित्तर आत्मा रे बरदानो खे बांडणे रे जरिए इजी री  
गवाई देओआ।

### परमेशर के सेवा

5 परमेशर तेसा आऊणे वालिया दुनिया खे, जेतेरी चर्चा आसे करने लगी रे, स्वर्गदूता रे वशो रे  
नि कित्तेया, पर आपणे पाऊए रे वशो रे कित्तेया। 6 पवित्तर शास्त्रो रे केसी जगा रे कोई ये गवाई  
देओआ,

“माणू क्या ए कि तूँ तेसखे याद करो?

माणूआ रे बच्चे क्या ए कि तूँ तिना री फिकर करेया?

7 तैं से स्वर्गदूतो ते कुछ ई कम कित्तेया;

तैं तिना पाँदे महिमा और आदरो रा मुकुट राखेया।

8 तैं सब कुछ तिना लोका रे वशो रे करी ता।”

तेबे जबकि तिने सब कुछ तिना रे वशो रे करी ता, तो तिने कुछ पनि राखेया, जो तिना रे वशो रे नि ओ। सच्ची आसे एबे ये नि देखदे कि सब कुछ तिना रे वशो रे ए।<sup>9</sup> पर आसा खे परभु यीशु, जेसखे स्वर्गदूता ते थोड़े बखतो खे कुछ ई कम कित्तेया था, मौता रा दुःख उठाणे री बजअ ते, महिमा और आदरो रा मुकुट पईने रा देखूए, ताकि परमेशरो री कृपा ते से हर एक माणूए री खातर मरो।

10 सब कुछ परमेशरो राए और सब कुछ तिना री ई सामर्था रे जरिए बणाई राखेया, तेसखे येई खरा लगेया कि जेबे से बऊत पाऊआ खे महिमा रे पऊँछाओ, तो तिना रे उद्धारकर्ता खे दुःख उठाणे रे जरिए सिद्ध करो।<sup>11</sup> कऊँकि पवित्र करने वाला यीशु और जो पवित्र कित्ते जाओए, सबी रा एक ई पिता ए, मतलब परमेशर, इजी बजअ ते यीशु तिना खे पाई और बईण बोलणे ते नि शमाँदा।

12 मसीह परमेशरो ते बोलोआ,

“मां तेरा नाओं आपणे पाईया गे सुनाणा,

सभा बीचे मां तेरी तारीफ करनी।”

13 फेर से ये बोलोआ,

“मां तेस पाँदे प्रोसा राखणा”

और फेर से ये बी बोलोआ,

“आऊ एती तिना लोका साथे ए जिना खे परमेशरे माखे देई राखेया; सेयो बच्चेया जेडे ए।”

14 तेबेई जेबे परमेशरो रे बच्चे मांस और खूनो रे इस्सेदार ए, तो यीशु आपू बी तिना जेड़ा बणीगा, ताकि मौता रे जरिए तेसखे, जेसखे मौता पाँदे शक्ति मिली थी, मतलब शैतानो खे नकम्मा करी ता<sup>15</sup> और ईयां यीशुए जितणे मौता रे डरो रे मारे पूरी जिन्दगी गुलामिया रे फसी रे थे, तिना खे छुड़ाई लो।

16 कऊँकि यीशु तो स्वर्गदूता खे नि, बल्कि अब्राहमो रे वंशो खे सम्बालोआ।<sup>17</sup> तेबेई तो तेसखे चाईयो था कि सारिया गल्ला रे आपणे पाईया जेड़ा बणो, ताकि से तिना गल्ला रे जो परमेशरो साथे रिशता राखोईया, एक दया करने वाला और विश्वासो जोगा प्रदान पुरोईत बणो, ताकि लोका रे पापो खे प्राश्चित करो।<sup>18</sup> कऊँकि जेबे यीशुए परीक्षा री दशा रे दुःख उठायी, तो से तिना री बी मताद करी सकोआ, जिना री परीक्षा ओई।

### 3

**XXXXXXXXXX**

1 तो ओ साथी विश्वासियो! तुसे जो स्वर्गिय बुलाहटा रे इस्सेदार ए, तेस प्रेरित और प्रदान पुरोईत यीशुए पाँदे, जेसखे आसे अंगीकार करूँए, त्यान करो।<sup>2</sup> यीशु आपणे नियुक्त करने वाले परमेशरो खे विश्वासो जोगा था, जेड़ा मूसा बी परमेशरो रे सारे कअरो रे था।<sup>3</sup> पर यीशु मूसे ते इतणे बढी की महिमा जोगे समजे, जितणा कि कअर बनावे वाला कअरो ते बढी की आदर राखोआ।<sup>4</sup> कऊँकि हर एक कअरो खे कोई ना कोई बनावे वाला ओआ, पर जिने सब कुछ बणाई राखेया से परमेशर ए।<sup>5</sup> मूसा तो परमेशरो रे सारे कअरे सेवको जेड़ा विश्वासो जोगा र्या, ताकि जो गल्ला ऊणे वालिया थिया, तिना री गवाई देओ।<sup>6</sup> पर मसीह पुत्रो जेड़ा परमेशरो रे कअरो रा अक्कदार ए और तेसरा कअर आसे ए, जे आसे आपणी इम्मता साथे और आपणी उम्मीदा रे विश्वास बणाई की राखूँए तो आसे ई तेसरा कराना ए।

**XXXXXXXXXX**

7 तो जेड़ा पवित्र आत्मा बोलोआ,

“जे आज तुसे परमेशरो रा शब्द सुणो,

- 8 तो तिजी खे मानणे ते ना नि करो,  
जेडा कि रोष दलाणे रे बखते  
और परीक्षा रे दिने सुणसाण जगा रे कित्तेया था ।
- 9 जेती तुसा रे बाप-दादे आऊँ परखेया  
और चाली साल तक मेरे काम देखे ।
- 10 इजी बजअ ते आऊँ तेस बखतो रे लोका ते नराज रया  
और बोलेया, 'इना रे मन सदा पटकदे रओए,  
और इने मेरिया बाटा नि पछ्याणिया ।'
- 11 तेवे मै रोषो रे आयी की कसम खाई,  
'सेयो मेरे आरामो रे आई नि सकदे ।'
- 12 ओ साथी विश्वासियो, चौकस रओ कि तुसा रे एडा बुरा मन और अविश्वासिया रा मन नि ओ, जो जिऊँदे परमेशरो ते दूर टाई की लयी जाओ । 13 हर दिन एकी-दूजे खे समजयादे रओ; जदुओ तक तुसा गे मौका ए, एडा नि ओ कि तुसा बीचा ते कोई जणा पापो रे छलो रे आयी की जटर ऊई जाओ ।
- 14 जे आसे आपणे पईले परोसे रे आखरी तक मजबूतिया दे बणे रे रये तो आसे मसीह रे इस्सेदार बणे रे रणे । 15 जेडा पवित्र शास्त्रो रे बोलेया जाओआ,  
"जे आज तुसे तेसरा शब्द सुणो,

तो आपणे मनो खे जटर नि करो,  
जेडा कि रोष दलाणे रे बखते कित्तेया था ।"

16 पला किने लोके परमेशरो रा शब्द सुणी की तिना रा बरोद कित्तेया? क्या सेयो इस्राएली लोक नि जो मूसे रे जरिए मिसरो ते निकले थे? 17 और से चाली साल तक केस ते नराज रया? क्या तिना तेई नि, जिने पाप कित्तेया और तिना रिया लोधा सुणसाण जगा रेई पडी रिया रईया? 18 तिने किना लोका रे बारे रे कसम खाई की बोलेया था कि तुसे मेरे आरामो रे आई नि सकदे? क्या ये सिर्फ सेयो ई लोक नि थे जिने आज्ञा नि मानी थी? 19 ईयां आसे देखूँ कि सेयो अविश्वासो री बजअ ते आरामो री जगा रे आई नि सके ।

## 4

?????? ? ? ? ? ? ? ? ?

1 परमेशरो रे आरामो री जगा रे आऊणे रा वादा एबुए तक ए । तो आसे चौकस रईए कि तुसा बीचा ते कोई बी लोक नकम्मे नि ठईरो कि तिजी रे जाणे ते वंचित रई जाओ । 2 कऊँकि आसा खे बी इस्राएली लोका जेडा सुसमाचार सुणाया । पर तिना लोका खे सुणे रे वचनो ते कुछ फाईदा नि ऊआ, कऊँकि तिने लोके वचन विश्वासो साथे नि मानेया । 3 इजी खे आसे जिने परमेशरो रे वचना पाँदे विश्वास कित्तेया, तेस आरामो रे प्रवेश करना, जेडा कि ओरी खे परमेशरे बोलेया,  
"मै आपणे रोषो रे कसम खाई कि  
'सेयो मेरे आरामो री जगा रे आई नि सकदे ।' "

हालाँकि दुनिया री शुरूआता रे बखते तेसरे काम ऊई चुके थे । 4 कऊँकि सातुए दिनो रे बारे रे तिने केथी एडा बोली राखेया, "परमेशरे सातुए दिने आपणे सारे काम नपटयाई की आराम कित्तेया ।" 5 आसे ये बी पढेया कि तिने बादो ते ये बी बोलोआ, "सेयो मेरे आरामो री जगा रे आई नि सकदे ।" 6 ये पक्का ए कि कुछ लोका खे आरामो री जगा रे आऊणे री एवे बी खुली आजादी ए और जिना खे तेसरा सुसमाचार पईले सुणाया था, सेयो आज्ञा ना मानणे री बजअ ते तिदे नि जाई सके । 7 तेवेई तो से कोई खास दिन ठराई की इतणे दिन बाद दाऊदो री कतावा रे तिजी खे आजका दिन बोलोआ, जेडा पईले बोलेया,  
"जे आज तुसे तेसरा शब्द सुणो,

तो आपणे मनो खे जटर नि करो ।"

8 जे यहाशू इस्राएलिया खे परमेशरो रे वादे रे मुताबिक आरामो री जगा रे प्रवेश कराई लंदा तो तिजी ते बाद दूजे दिनो री चर्चा नि ऊँदी । 9 इजी री खातर जाणी लो कि परमेशरो रे लोका खे

एवे बी सातुए दिनो रा आराम बाकि ए। <sup>10</sup> कऊँकि जिने तेसरे आरामो रे प्रवेश करी राखेया तिने बी परमेशरो जेडे आपणे काम पूरे करी की आराम करी राखेया। <sup>11</sup> इजी री खातर आसे तेस आरामो री जगा रे आऊणे री कोशिश करिए, एड़ा नि ओ कि कोई जणा तिना जेड़ी आज्ञा ना मानी की रुड़ी जाओ।

<sup>12</sup> कऊँकि परमेशरो रा वचन जिऊँदा और प्रबल ए, से केसी दोधारी तलवारी ते बी बऊत पईना ए। से आत्मा और प्राण, गाठ-गाठ और गूढे-गूढे खे लग करी की वार-पार छेदोआ। से मनो री इच्छा और सोचा खे परखोआ। <sup>13</sup> और दुनिया री कोई बी चीज परमेशरो ते छिपी री निए। तेसरी आखी सामणे सब चीजा खुलिया और प्रकट ए। तेसखे ई आसा लेखा देणा पड़ना।

### XXXXXXXX XXXX XXXX

<sup>14</sup> तेवे जेवे आसा रा इतणा बड़ा प्रदान पुरोईत ए, जो स्वर्गो रिये ऊई की गया, मतलब परमेशरो रा पुत्र प्रभु यीशु; तो आओ आसे आपणे विश्वासो रे अंगीकारो खे मजबूतिया साथे पकड़ी की राखूँए। <sup>15</sup> कऊँकि आसा रा प्रदान पुरोईत एड़ा निए, जो म्हारी कमजोरिया रे आसा साथे दुःखी नि ऊई सकी, बल्कि से सबी गल्ला रे आसा जेड़ा परखेया, तेवे बी पापी नि निकलेया। <sup>16</sup> इजी री खातर आओ, आसे इम्मत बानी की परमेशरो रे नेडे चलूँए, जो कृपा ते परी रा। तेवे परमेशरो आसा पाँदे दया और कृपा दखाणी और जो जरूरता रे बखते म्हारी मताद करो।

## 5

<sup>1</sup> हर एक प्रदान पुरोईत माणूआ बीचा ते लया जाओआ और माणूआ खेई तिना गल्ला रे बारे रे जो परमेशरो ते रिश्ता राखोईया, ठराया जाओआ कि पेट और पाप बलि चढ़ाया करो। <sup>2</sup> कऊँकि से आपू बी कमजोरिया ते किये राए, तेवेई से अज्ञानिया साथे और पूले-पटकेया साथे नरमाईया ते व्यवहार करी सकोआ। <sup>3</sup> प्रदान पुरोईत ऊणे रे नाते तेसखे ये जरूरी ए कि जेड़ा लोका खे, तेड़ा ई आपू खे बी पाप बलि चढ़ाया करो। <sup>4</sup> ये आदरो रा पद कोई आपणे आपू ते नि लंदा, जदुओ तक हारूणा जेड़ा परमेशरो री तरफा ते नि ठराया जाओ।

<sup>5</sup> तियाँ ई मसीहे बी प्रदान पुरोईत बणने री बढ़ाई आपणे आपू ते नि लयी, पर तेसखे तिने ई दिती, जिने तेसखे बोलेया था,

“तूँ मेरा पुत्र ए,

आज आऊँ ए एलान करूँआ कि आऊँ तेरा पिता ए”

<sup>6</sup> ईयाँ ई से दूजी जगा रे बी बोलोआ,

“तूँ मलिकिसिदको रिया रीतिया पाँदे

सदा खे पुरोईत ए।”

<sup>7</sup> यीशुए एते दुनिया रे रणे रे दिनो रे ऊच्चे शब्दो रे आक्का पाई-पाई की और आसू बाहुई-बाहुई की परमेशरो ते जो तेसखे मौता ते बचाई सकी था, प्रार्थना और बिनती किती और भक्तिया री बजअ ते तेसरी सुणी। <sup>8</sup> हालाँकि यीशु परमेशरो रा पुत्र था तेवे बी तिने दुःख उठाई-ऊठाई की आज्ञा मानणी सीखी। <sup>9</sup> और सिद्ध बणी की, आपणे सबी आज्ञा मानणे वालेया खे सदा कालो रे उद्धारो री बजअ ऊईगा। <sup>10</sup> तेसखे परमेशरो री तरफा ते मलिकिसिदको रिया रीतिया पाँदे प्रदान पुरोईतो रा पद मिलेया।

### XXXXXXXX XX XXXX XXXX XX XXXXX

<sup>11</sup> इजी रे बारे रे आसा खे बऊत सारिया गल्ला बोलणिया, पर जिना रा समजयाणा बी कठण ए, कऊँकि तुसे ऊच्चा सुणने लगी गे रे। <sup>12</sup> सच्ची एस बखतो तक तो तुसा खे शिक्षा देणे वाला बणी जाणा चाईयो था। पर तुसा खे तो एवु बी केसी एंडे माणूए री जी जरूरत ए जो तुसा खे परमेशरो री शिक्षा री शुरुओ री गल्ला फेर सिखाओ। तुसा खे तो बस एवु दूद ई चाईयो, अन्न नि। <sup>13</sup> दूद पींदे बच्चे खे तो तर्मा री शिक्षा री पछ्याण नि ऊँदी, कऊँकि से बालक ए। <sup>14</sup> पर अन्न स्याणेया खे ए, जिना री समज खेर-बुरे रे पेट करने रे पक्की ऊईगी री।

## 6

1 इजी री खातर आओ आसे मसीह री शिक्षा री शुरूओ री गल्ला ते आगे बढी की सिद्धता री शिक्षा पाँदे चर्चा करने खे आगे बडदे जाऊँए। आसे बुरे कामो ते मन फिराणे जो मौता री तरफा खे लयी जाओए और परमेशरो पाँदे विश्वास करने री शुरूओ री शिक्षा री निऊँ फेर नि पाईए। 2 और तुसा खे बपतिस्मा रे बारे रे और सियो पाँदे आथ राखणे और मरे रेया बीचा ते जिऊँदे ऊणे और आखरी न्याय री शिक्षा री फेर गल्ल करने री जरूरत निए। 3 जे परमेशर चाओगा तो आसे सिद्धता री शिक्षा री तरफा खे आगे बडने।

4 जो लोक आपणा विश्वास छाडी देओए तिना खे फेर मन फिराणे खे वापस नि ल्याई सकदे। तिने एक बार सच्चाई पछ्याणी जो परमेशरो ते आओई और तिना खे स्वर्गिय बरदान मिलेया और तिने दूजेया लोका साथे पवित्तर आत्मा बी पाया। 5 सेयो परमेशरो रे खरे वचनो रा और आऊणे वाले जुगो री सामर्थ महसूस किती। 6 जे सेयो परमेशरो ते दूर ऊईगे, तो तिना खे मन फिराणे खे वापस ल्याऊणा नामुमकिन ए। कऊँकि सेयो परमेशरो रे पुत्रो खे फेर कूसो पाँदे चढाओए और सरआम तेस पाँदे कलंक लगाओए।

7 जो लोक खरी शिक्षा पाओए सेयो एड़ी जमीना जेडे ओए जो जमीन बर्खा रे पाणिए खे, जो तेसा पाँदे बार-बार पडोआ, पी-पी की, जिना लोका खे से बाई जाओई, तिना रे कामो रा साग-पात जमाओई, से परमेशरो ते आशीष पाओई। 8 और लोक एड़ी जमीना जेडे ओए जो जाड और कांडे-चीट जमाओई, तो से नकम्मी और सरापित ए और तेसा रा अंत फूकणा इए।

9 पर ओ प्यारेओ! तुसे लोक खरे काम करने लग्ये रे कऊँकि परमेशरे तुसे लोक पईले तेई बचाईते रे। ये चितौणी तुसा लोका रे बारे रे निए। 10 कऊँकि परमेशर अन्यायी निए कि तुसा रे काम और तेस प्यारो खे पूली जाओ, जो तुसे तिना रे नाओं री महिमा खे एडा दखाया कि परमेशरो रे लोका री सेवा किती और एवे बी करने लग्ये रे। 11 पर आसे चाऊँए कि तुसा बीचा ते हर एक माणुं, आखरी तक पूरी उम्मीदा खे, एड़ी ई कोशिश करदा रओ। 12 ताकि तुसे आलसी नि ऊई जाओ, बल्कि तिना रा पालन करो, जो विश्वास और सबरो रे जरिए वादे रे वारस ओए।

### \*\*\*\*\*

13 परमेशर जेब अब्राहमो ते वादा किचेया तो तिने आपणे ई नाओं री कसम खाई। कऊँकि तिना ते बडा कोई नि था जेसरा नाओं लयी की से कसम खाओ। 14 तिने बोलेया, “मां सच्ची ताखे बऊत आशीष देणी और तेरी ल्वादा खे अणगिणत बडाँदा जाऊँगा।” 15 अब्राहमे बऊत बखतो तक सबर राखणे ते बाद वादे रा फल पाया।

16 माणू तो आपू ते केसी बडे री कसम खाया करोए और तिना रे हर एक बईसी रा न्याय कसमे की पक्का ओआ। 17 येई बजअ ए कि परमेशरे बी कसम खाई थी। इजी रे जरिए परमेशर तिना लोका खे जिना ते तिने वादा करी राखेया था दखाणा चाओआ था कि से जो बी वादा करोआ तिजी खे से पूरा बी करोआ। 18 परमेशर इना दो ना बदलने वाली गल्ला रे जरिए मतलब वादा और कसमा रे चूटा साबित नि ऊई सकदा। इजी ते आसा खे जिने परमेशरो री शरण लयी राखी ये बड़ी प्रेरणा मिलीई की आसा खे जो उम्मीद देई राखी तिजी खे पकड़ी राखो 19 से उम्मीद म्हारे प्राणो खे एडा लंगर ए, जो पक्का और मजबूत ए और पडदे ते ऊई कि परमेशरो रे महा पवित्तर जगा तक पऊँछोआ। 20 जेती यीशुए मलिकिसिदको रिया रीतिया पाँदे सदा कालो रा प्रदान पुरोईत बणी की आसा री तरफा ते अगुवा रे रूपो रे आसा ते पईले ई स्वर्गो रे प्रवेश करी राखेया।

## 7

### \*\*\*\*\*

1 मलिकिसिदक शालेम नगरो रा राजा और परमप्रदान परमेशरो रा पुरोईत था। जेबे अब्राहम राजेया खे युद्धो ते अराई की वापस आऊणे लग्ये रा था, तो मलिकिसिदके तेस साथे मुलाकात किती और तेसखे आशीष दिती। 2 अब्राहमे मलिकिसिदको खे युद्धो ते जीती की ल्याई री सबी चीजा रा दसुआ इस्सा दिचेया। मलिकिसिदको रे नाओं रा मतलब “धार्मिकता रा राजा” ए। पर जबकि



26 एड़ा ई प्रदान पुरोईत आसा री जरूरता खे पुरा करी सकोआ, जो पवित्तर ओ, निष्कपट ओ, साफ ओ, पापिया रे असरो ते लग रणे वाला ओ और स्वर्गो ते बी ऊच्चा चकेया रा ओ। 27 और तिना प्रदान पुरोईतो जेड़ा जो लेविया रे गोत्रो रे थे यीशुए खे जरूरी निए कि हर रोज पईले आपणे पापो खे और तेवे लोका रे पापो खे बलि चढ़ाओ, कऊँकि यीशुए आपणे आपू खे बलिदान चढ़ाई की ये काम सदा खे एक ई बार नपटेई ता। 28 कऊँकि मूसे रा विधान तो कमजोर मांणूआ खे प्रदान पुरोईत नियुक्त करोई, पर परमेशरो रा वादे जो विधानो ते बाद असरदार ऊआ, आपणा पुत्र नियुक्त कित्तेया जो अनन्त कालो खे सिद्ध बनाईता।

## 8

### ११११११११ ११११११ ११११११

1 इना गल्ला रा निचोड़ ये ए कि आसा गे एक एड़ा प्रदान पुरोईत ए, जो स्वर्गो पाँदे परमेशरो रे महान् सिंहासनो रे दाँणे कनारे बैठेया राए। 2 आसा रा प्रदान पुरोईत महा पवित्तर जगा और तेस सच्चे तम्बूओ रे सेवक ए, जो किने मांणूए नि, बल्कि परमेशरे बनाई राखेया।

3 हर एक प्रदान पुरोईतो खे पापो री माफिया खे पेंट और बलिदान चढ़ाणे खे नियुक्त करेया जाओआ, इजी खे जरूरी ए कि आसा रे प्रदान पुरोईत यीशुए गे बी कुछ चढ़ाणे खे ओ। 4 जे यीशु मसीह तरतिया पाँदे ऊँदा तो से कदी पुरोईत नि ऊँदा, कऊँकि एती मूसे रा बिधानो रे मुताबिक पेंट चढ़ाणे वाले पुरोईत तो आए। 5 ये सेयो पुरोईत ए जो सिफ स्वर्गो रिया चीजा रे प्रतिरूप और टवावे री आराधना करोए। कऊँकि जेवे मूसा तम्बू बनाणे वाला था, तो तेसखे ये चेतावणी मिली, “देख जो नमूना ताखे सीने पाहूँडो पाँदे दखाया था, तिजी रे मुताबिक सब कुछ बनाणा।” 6 पर एवे जो पुरोईतो रा काम यीशु मसीह खे दित्तेया राए, से ओरी पुरोईता खे दित्ते रे पुरोईता रे कामो ते बऊत बढ़ी की ए। कऊँकि से ओर बी खरी वाचा रा बचोला ठईरया, जो ओर खरे वादे रे सहारे बानी राखी।

7 जे से पईली वाचा निर्दोष ऊँदी, तो दूजी वाचा री जरूरत ई नि ऊँदी। 8 पर परमेशर लोका पाँदे दोष लगाई की बोलोआ,

“प्रभु बोलोआ, देखो, सेयो दिन आओए

कि मां इस्राएलो रे लोका साथे

और यहूदा रे लोका साथे,

नई वाचा बानणी।

9 ये तेसा वाचा जेड़ी नि ऊणी,

जेड़ी मैं तिना रे बाप-दादेया साथे, तेस बखते बानी थी,

जेवे आऊँ तिना रा आथ पकड़ी की

तिना खे मिस्र देशो ते निकयाली की ल्याया,

कऊँकि सेयो मेरी वाचा पाँदे स्थिर नि रये

और मैं तिना री खबर-सम्बाल नि लयी।

प्रभु येई बोलोआ।

10 फेर प्रभु बोलोआ कि जो नई वाचा

मां तिना दिना ते बाद इस्राएलो रे कराने साथे बानणी,

से ये कि मां आपणा बिधान तिना रे मनो रे पाणी

और से तिना रे दिलो रे लिखणी

और आऊँ तिना रा परमेशर ठईरना

और सेयो मेरे लोक ठईरने

11 हर एकी आपणे देशवासियो खे और आपणे पाईया खे ये शिक्षा नि देणी

कि ‘तू प्रभुए खे पछ्याण।’

कऊँकि छोटे ते बड़े तक

सबी आऊँ पछ्याणी लणा।

12 कऊँकि मां तिना रे बुरे काम माफ करने

और तिना रे पाप फेर याद नि करने।”

13 नई वाचा री स्थापना रे तिने, पईली वाचा पुराणी ठराई और जो चीजा पुराणिया और खराब ऊई जाओईया, तिना रा खत्म ऊणा जरूरी ए।

## 9

२२२२ २२ २२२२ २२ २२२२ २२ २२२२

1 तेसा पईली वाचा रे परमेशरो री आराधना करने रे नियम थे और एसा तरतिया पाँदे परमेशरो री आराधना करने से एक जगा बी बणाई राखी थी। 2 एक तम्बू बणाया जेतरे दो इस्से थे। पईला, तम्बूओ रे बारले इस्से रे दिऊए, एक मेज और तेसा मेजा पाँदे पेटा रिया पवित्र रोटिया राखी जाओ थिया। तम्बूओ रे एते इस्से से पवित्र जगा बोलो थे। 3 दूजा, तम्बूओ रा पितरला इस्सा पड़दे रे पीछे था। तेस पितरले इस्से से परम पवित्र जगा बोलो थे। 4 तेस पितरले इस्से रे सुईने री तूपदानी और चऊँ कनारे ते सुईने की मड़े रा वाचा रा सन्दुक था। सन्दुको रे पितरे मन्ने की परे रा सुईने रा ब्याम और हारूणो री सोठी, जिदे कूले पत्ते आईगे थे और वाचा रिया पट्टिया राखी री थिया। 5 सन्दुको पाँदे तेजोमय पंखो वाले करूब बणाई राखे थे। जो प्राश्चितो रे टकणे पाँदे छाँएं कित्ते रे थे। पर एबु आसे इना गल्ला से एक-एक करी की समजयाई नि सकदे।

6 जेबे सब कुछ ईयां त्यार उई चुकेया, तेबे तम्बूए रे पईले इस्से रे पुरोईत हर बखते जाई की सेवा रे काम पूरे करोए। 7 पर तम्बूए री महा पवित्र जगा दे प्रदान पुरोईत सालो रे एक ई बार जाओआ और साथे जानवरा रा खून लयी की बी जाणा पड़ो था। जो से आपणी खातर और लोका रिया पूल-चूका रिया खातर चढ़ावा चढ़ाओआ। 8 इना गल्ला ते पवित्र आत्मा येई दखाओआ कि जदुओ तक तम्बूए रा बारला इस्सा खड़ा ए, तदुओ तक कोई बी सादारण लोक बड़ी पवित्र जगा रे जाई की परमेशरो री आराधना नि करी सकदे 9 तम्बूए रा से बारला इस्सा आज-काल के बखतो से एक उदारण ए। तम्बूए रे तेस बारले इस्से रे पुरोईत पेट और बलि चढ़ाओ थे। से पेट और बलि आराधना करने वाले लोका रे विवेको से साफ नि करी सकदे। 10 ये नियम सिर्फ खाणे-पीणे रिया चीजा और लग-लग नाह्ने री रवाजा रे बारे रे ए। ये सारे शरीरो ते सम्बन्ध राखणे वाले बाहूरी नियम ए जो सुदारो रे बखतो तक नियुक्त करी ते रे।

२२२२ २२ २२२२ २२ २२२२

11 पर जेबे मसीह आऊणें वालिया खरिया-खरिया चीजा रा प्रदान पुरोईत ऊई की आया। से स्वर्गो रे ओर बी बड़े और सिद्ध तम्बूए रे गया, से तम्बू आथो साथे बणाया रा निए और ना ई से एते दुनिया राए। 12 मसीह जानवरा रे खूनो रे जरिए नि, पर आपणे ई खूनो रे जरिए एक ई बार आसा सबी से पवित्र जगा रे गया और आसा सबी से सदा से पापो ते छुटकारा दितेया। 13 मूसे रा बिधानो रे मुताबिक पुरोईत जानवरा रा खून और बलिया री स्वा अशुद्ध लोका पाँदे तिना से शुद्ध करने से छिड़को थे, ताकि सेयो बाहूरी रूपो ते शुद्ध उई जाओ। जे इना जानवरा रे खूनो रे लोका से पापो ते पवित्र करने री सामर्थ ए 14 तो मसीह रा खून जिने आपणे आपू से सनातन आत्मा रे जरिए परमेशरो सामणे निर्दोष चढ़ाया, तुसा रा विवेक मरे रे कामो ते कऊँ नि शुद्ध करना, ताकि तुसे जिऊँदे परमेशरो री सेवा करो।

15 इजी बजअ ते मसीह परमेशर और लोका बीचे नई वाचा रा बचोला ए, ताकि बुलाए रे लोका से परमेशरो रे वादे रे मुताबिक, अनन्त जायदात मिलो। कऊँकि मसीह तिना रे पापो री सजा ते छुटकारा देणे से मरया जो तिने पईली वाचा रे अधीन कितेया था।

16 वाचा एक वसीयता जेड़ी ए। वसीयता रे मामले रे ये साबित करना जरूरी ए कि जिने वाचा बानी राखी, तेसरी मौत ऊई चुकी री। 17 कऊँकि एड़ी वाचा मरने पाँदे पक्की ओई और जदुओ तक वाचा बानणे वाला जिऊँदा रओआ, तदुओ तक वाचा कामो री नि ऊँदी। 18 येई बजअ ए कि पईली वाचा बी बिना खूनो ते असरदार नि ऊई। 19 जेबे मूसा सबी लोका से बिधानो री हर एक आज्ञा पढ़ी



की सुणाई चुकेया, तेवे तिने जानवरा रा खून पाणिए साथे मलाई की और लाल ऊना खे जुफा री डालिया रे लपेटी की तिजी साथे, तेसा विधानो री कताबा पाँदे और सबी लोका पाँदे छिड़की ता 20 और मूसे बोलेया, “ये तेसा वाचा रा खून ए, जेतेरी आज्ञा परमेशरे तुसा खे मानणे खे देई राखी।” 21 और ईयां ई मूसे तम्बू और सेवा खे इस्तेमाल ऊणे वाले सारे समानो पाँदे खून छिड़केया। 22 मूसे रा विधानो रे मुताबिक जादातर सारी चीजा खूनो रे जरिए शुद्ध कित्तिया जाओ थिया और बिना खून बाहए पापो री माफी नि ओ थी।

॥॥॥ ॥॥ ॥॥॥॥॥ ॥॥ ॥॥॥ ॥॥॥ ॥॥ ॥॥॥

23 पुरोईतो खे ए जरूरी ए कि तम्बू और तिजी रा सारा समान जो स्वर्गो रिया चीजा रा परतिरूप था तिजी खे जानवरा रे बलिदानो रे जरिए शुद्ध करेया जाओ। पर स्वर्गो री असली चीजा खे शुद्ध करने खे जानवरा रे खूनो ते बऊत बढ़ी की बलिदानो री जरूरत ए। 24 कऊँकि मसीह आयो साथ बणाई रिया तेसा पवित्तर जगा दे, जो स्वर्गिय पवित्तर जगा रा नमूना ए, गया नि। से स्वर्गो रेई गया, ताकि से एवे आसा री तरफा ते परमेशरो सामणे दिखो। 25 यहूदी प्रदान पुरोईत हर साल जानवरा रा खून लयी की महा पवित्तर जगा रे जाओआ। मसीह खे तियाँ ई बार-बार आपणे आपू खे चढ़ाणे री जरूरत नि ए। 26 जे एडा ऊँदा तो मसीह खे दुनिया री उत्पत्तिया ते लयी की तेसखे बार-बार दुःख सईन करना पड़दा। पर एवे जुगो रे अंतो रे से एक बार आयी रा, ताकि आपणी ई बलि देई की पापो खे दूर करी देओ। 27 जेड़ा माणूए खे एक बार मरना और तिजी ते बाद न्याय रा ऊणा नियुक्त ए, 28 तियाँ ई मसीह बी बऊत जणेया रे पाप ऊठाणे खे एक ई बार बलिदान ऊआ। से दूजी बार आऊणा पापो री बजअ ते नि बल्कि तिना लोका खे उद्धार देणे खे जो तेसखे न्यालने लगी रे।

## 10

॥॥॥॥ ॥॥॥॥॥

1 मूसे रा विधान आऊणे वालिया खरी चीजा रा सिर्फ एक ट्वांवा ए, ये ट्वांवा तिना रा असली रूप निया। तेसरे नियमा रे मुताबिक हर साल लगातार बलि ई बलि चढ़ाई जाओई। विधान तिना बलिदानो रे जरिए आराधना करने वालेया खे कदी बी सिद्ध नि करी सकदी। 2 जे से सिद्ध करी सकदा तो बलिदाना रा चढ़ाणा बंद ऊई जांदा। जे परमेशरो री आराधना करने वाले एक ई बार शुद्ध ऊई जांदे, तो तिना रा विवेक तिना खे पापी नि ठरांदा। 3 पर एवे तो तिना बलिया रे जरिए हर साल पापो खे याद करवाया जाओआ। 4 कऊँकि ये ऊई नि सकदा कि जानवरा रा खून पापो खे दूर करो।

5 इजी बजअ ते मसीह दुनिया रे आऊँदे बखते बोलोआ,

“बलिदान और पेंट तैं नि चायी,

पर मेरी खातर एक शरीर त्यार कितेया।

6 ऊम-बलिया और पाप-बलिया ते

तूँ खुश नि ऊँदा।

7 तेवे मैं बोलेया, “देख, आऊँ एती ए, पवित्तर शास्तरो रे मेरे बारे रे लिखेया राए

ओ परमेशर आँऊ आईगा रा कि तेरी इच्छा पूरी करूँ।”

8 मसीह पईले बोलोआ, “ना तैं बलिदान, पेंट, ऊम-बलिया और पाप-बलिया चाईया और ना ई तिना ते खुश ऊआ,” हालाँकि यो बलिदान विधानो रे मुताबिक चढ़ाए जाओ थे। 9 तेवे ये बी बोलोआ, “देख, आऊँ आईगा रा, ताकि तेरी इच्छा पूरी करूँ।” तिने पईलका बलिदान टाई ता और मसीह रे बलिदानो खे तिजी री जगा पाँदे राखी ता। 10 परमेशरो री तेसा ई इच्छा रे मुताबिक प्रभु यीशु मसीह रे शरीरो रे एक ई बार बलिदान चढ़ाणे रे जरिए सदा खे आसे पवित्तर किते।

11 पुराणी वाचा रे मुताबिक हर एक पुरोईत तो खड़े ऊई की हर-रोज सेवा करोआ और एक ई जेडे बलिदानो खे बार-बार चढ़ाओआ। पर ये बलिदान पापो खे कदी बी दूर नि करी सकदे। 12 पर आसा रा प्रदान पुरोईत यीशु मसीह पापो रे बदले एक ई बार सदा खे आपणे आपू खे बलिदान करी चुकी रा। एवे से परमेशरो रे दाँणे कनारे बैठीगे। 13 तेस बखतो तेई एकी खेई न्यालने लगी रा, ताकि तेसरे

सारे बैरी तेसरे पैरो निठली चौकी बणो। <sup>14</sup> कऊँकि मसीहे एक ई बलिदानो रे जरिए सेयो सदा खे सिद्ध बणाईते जो तिना खे लग कित्ते रे ए।

<sup>15</sup> पवित्तर आत्मा बी आसा खे येई गवाई देओआ। पईले प्रभुए बोलेया था,

<sup>16</sup> “प्रभु बोलोआ कि जो वाचा मां तिना दिना ते बाद

तिना साथे वानणी, से ये कि

मां आपणा विधान तिना रे दिलो रे लिखणी  
और मां तिना रे विवेको रे पाणी।”

<sup>17</sup> फेर से ये बोलोआ,

“मां तिना रे पाप और तिना रे बुरे काम

फेर कदी बी याद नि करने।”

<sup>18</sup> और जेबे पापो री माफी ऊईगी री, तो तेबे पापो खे केसी बी बलिदानो री जरूरत नि ए।



<sup>19</sup> ओ साथी विश्वासियो, एबे आसा खे पुरा परोसा ए कि आसे प्रभु यीशुए रे खूनो रे जरिए बड़ी पवित्तर जगा रे इम्मता साथे जाई सकोए। <sup>20</sup> यीशुए आसा खे आपणे शारीरिक पड़दे रे जरिए एक नई और जिऊँदी वाट खोली ती। <sup>21</sup> और इजी खे कि म्हाया एड़ा महान् पुरोईत ए, जो परमेशरो रे मन्दरो रा अक्कदार ए, <sup>22</sup> तो आओ आसे सच्चे मनो ते, पूरे विश्वासो साथे परमेशरो रे नेड़े जाऊँए कऊँकि आसे विवेको रा दोष दूर करने खे दिलो पाँदे मसीह रे खूनो रा छड़काओ लयी की और शरीरो खे साफ पाणिणए की तुलाईता रा ताकि आसे शुद्ध ऊई जाईए।

<sup>23</sup> और आपणी उम्मीदा रे अंगीकारो खे मजबूतिया रे पकड़ी की राखो। कऊँकि परमेशर जिने वादे कित्ते, से विश्वासो जोगा ए <sup>24</sup> आसे ये बी खास त्यान राखिए कि आसे आपू बीचे प्यार और खरे कामो खे करने खे एकी-दूजे खे औसला देया करो। <sup>25</sup> और आराधना रे एकी-दूजे साथे कट्टा ऊणा नि छाडो, जेडी की बऊत जणेया री रवाज ए, पर एकी-दूजे खे समजयादे रओ और जियाँ-जियाँ प्रभुए रे वापस आऊणे रे दिना खे नेड़े आऊँदे देखो, तियाँ-तियाँ ओर बी जादा एड़ा करेया करो।

<sup>26</sup> सच्चाईया खे पछ्याणने रे बाद जे आसे जाणी-बूजी की पाप करदे रऊँए, तो पापो खे फेर कोई ओर बलिदान नि ए। <sup>27</sup> आ, परमेशरो रे न्याय रे दण्डो री एक डराऊणी उम्मीद और आगी रा चराकड़ा बाकि ए, जेसा तेसरे सारे विरोदी स्वा करी देणे।

<sup>28</sup> तिना दिना रे मूसा रे बिधानो खे ना मानणे वाला दो या तीन जणेया री गवाईया पाँदे, बिना दया ते काया जाओ था। <sup>29</sup> एबे सोची लो कि से और बी कितणे बड़े-पारी दण्डो जोगा ऊणा, जिने परमेशरो रा पुत्र पैरो साथे केसेया और वाचा रे खूने की जेतेरे जरिए से पवित्तर ठराया था, अपवित्तर जाणेया और कृपा री आत्मा री बेज्जती किती। <sup>30</sup> कऊँकि आसे तेसखे जाणूँए, परमेशरे बोलेया, “बदला लणा मेरा काम ए, मां ई बदला लणा।” तेबे तिने ये बी बोलेया, “प्रभुए आपणे लोका रा न्याय करना।” <sup>31</sup> जिऊँदे परमेशरो रे आथो रे पड़ना डराऊणी गल्ल ए।

<sup>32</sup> पर तुसे तिना शुरूआता रे दिना खे याद करो, जिना रे तुसे मसीह री ज्योति पाई और बड़े पारी दुःखो रे बी टीके रे रये। <sup>33</sup> कदी-कदी तो एड़ा ऊआ कि खुले तौरो पाँदे तुसा री निन्दा ऊई और क्लेश सईन करदे ऊए तुसा रा तमाशा बणेया। कदी-कदी एड़ा ऊआ कि तुसे तिना साथे साजे ऊए जिना रा बऊत बुरा आल करो थे। <sup>34</sup> कऊँकि तुसे कैदिया रे दुःखो रे बी दुःखी ऊए और आपणी जायदात खुशिया साथे लुटणे दिती; ये जाणी की कि तुसा गे स्वर्गो रे एक ओर बी खरी और सदा रणे वाली जायदात ए। <sup>35</sup> इजी री खातर प्रभुए पाँदे आपणा विश्वास बणाए रे राखो। याद राखो कि इजी रा फल बऊत बड़ा ए।

<sup>36</sup> कऊँकि तुसा खे सब् र राखणा जरूरी ए, ताकि परमेशरो री इच्छा पूरी करी की तुसा खे वादे रा फल मिलो। <sup>37</sup> जियाँ कि पवित्तर शास्त्र बोलोआ,

“एबे बऊत ई थोड़ा जा बखत रई गा रा,

जेबे आऊणे वाला आऊणा

और तेस देर नि करनी ।

38 पर मेरा तर्मी माणू विश्वासो साथे जिऊँदा रणा  
और जे से माणू डरी की विश्वासो ते पीछे आटी जाओगा,  
तो मेरा मन तेसते खुश नि ऊणा ।”

39 आसे तिना लोका बीचा ते निए जो परमेशरो ते पीछे आटी की नाश ऊई जाओ। बल्कि आसे  
तिना लोका बीचा ते जो आपणे विश्वासो रे जरिए जिन्दगी पाओए ।

## 11

### ?????????? ?? ?????

1 एबे विश्वास उम्मीद किती रिया चीजा रा निश्चा और बिना देखी रिया चीजा रा सबूत ए ।  
2 आसा रे बुजुर्गा खे ये विश्वास था, सिर्फ इजी री बजअ ते परमेशर तिना ते खुश था । 3 विश्वासो  
तेई आसा खे पता लगी जाओआ कि सारी सृष्टि परमेशरो रे वचनो रे जरिए बणी । इजी खे आसे जो  
कुछ देखूँए, से तिना चीजा ते नि बणी, जो नि दिखदी ।

4 विश्वासो तेई आदमो रे पाऊ हाबिले आपणे बड़े पाई कैनो ते खरा बलिदान परमेशरो खे चढ़ाया  
और तिजी रेई जरिए परमेशरे से तर्मी जणे री तरअ अपनाया, और जो बलि हाबिले चढ़ाई थी  
परमेशर तेसरे तेस बलिदानो ते खुश था । हाबिल आपणे मरने ते बाद बी आसा खे सिखाओआ कि  
विश्वास कियो ऊणा चाईयो ।

5 विश्वासो तेई हनोक नाओं रा माणू जिऊँदा ई स्वर्गो खे चकी ता और से मरेया नि, और तेसरा  
पता केसी खे नि लगेया कि से केई चली गा । कऊँकि परमेशरे से स्वर्गो खे चकी ला था । तेसरे चकणे  
ते पईले तेसरे बारे रे ये गवाई दित्ती कि तिने परमेशर खुश कित्तेया ।

6 सिर्फ विश्वासो रे जरिए ई आसे परमेशरो खे खुश करी सकूँए, कऊँकि परमेशरो गे आऊणे  
वालेया खे विश्वास करना चाईयो कि से आए और सेयो जो तेसखे सच्चाईया ते टोलोए से टोलने  
वालेया खे फल देओआ ।

7 विश्वासो तेई जेबे नूह नाओं रे माणूँ खे परमेशरे तेसा बाढ़ा रे बारे रे चेतावणी दित्ती थी, जो  
तिने कदी नि देखी थी, चेतावणी पाई की आज्ञा मानी की आपणे कराने खे बचाणे री खातर जाहूज  
बणाया । नूह रे विश्वासो रे सामणे बचे रे लोके जिने विश्वास नि कित्तेया सेयो नाश ऊईगे । परमेशरे  
नूह खे तर्मी बणाया कऊँकि तिने तेस पाँदे परोसा कित्तेया ।

8 विश्वासो तेई अब्राहमो खे जेबे परमेशरे एकी जगा खे जाणे खे बुलाया तो से आज्ञा मानी  
की तेसा जगा खे निकली गा, जेती परमेशरो तेसखे तेसरी जायदात देणी थी और से नि जाणो था  
कि आऊ केई चली रा, पर फेर बी चली गा 9 जेते जगा रा परमेशरे वादा कित्तेया अब्राहम तेती  
परदेशिया जेड़ा तम्बूए रे रया । तेस साथे तेसरा पाऊ इसहाक और तेसरा पोता याकूबो जेसखे  
परमेशरो ते सेई वायदा मिलेया था सेयो बी तेती तम्बूआ रे रये । 10 कऊँकि अब्राहम तेती स्वर्गो  
रे नगरो रे रणे रा इन्तजार करने लगी रा था जो सदा खे बणेया रा रओआ, जेतेरा रचणे वाला और  
बनाणे वाला परमेशर ए ।

11 विश्वासो तेई अब्राहमो री लाड़िए सारे आपणे आपू स्याणी ऊई की बी गर्भ धारण करने री  
सामर्थ पाई, कऊँकि तेसे विश्वास कित्तेया कि परमेशरो आपणा वादा पूरा करना । 12 जेबे अब्राहम  
बऊत ई स्याणा था और मरेया रा जा था, तेबे तेसरे सर्गो रे तारे और समुदर रे कनारे रे बालूए बराबर,  
अणगिणत वंश पैदा ऊए ।

13 ये सारे लोक जिने परमेशरो पाँदे विश्वास कित्तेया तिना वादे किती रिया चीजा बिना आसिल  
कित्ते ई मरी गे । पर सेयो समजी गे थे कि परमेशरो आऊणे वाले बखतो रे क्या करना । सेयो ये बी  
समजी गे थे, “आसे तरतिया पाँदे परदेशी और बाअरा ते आए रे लोक ए ।” 14 जो एड़िया गल्ला  
करोए, कि सेयो तरतिया पाँदे परदेशी और बाअरा ते आए रे लोक ए, सेयो कब्जा करी कि ये दखाओए  
कि, “ये देश आसा राए ।”

15 जेस देशो ते सेयो निकली की आए थे, जे तेसरी खबर-सम्बाल लंदे तो तिना खे वापस जाणे रा मौका था। 16 पर सेयो एक खरे मतलब स्वर्गिय देशो रे इच्छुक ए, तेबेई तो परमेश्वर, तिना रा परमेश्वर बोलणे ते खुश ओ था, कऊँकि तिने तिना खे एक नगर बणाई राखेया।

17-19 जेबे परमेश्वर अब्राहमे परखेया तो विश्वासो रे जरिए से इसहाको री बलि चढाणे खे त्यार ऊआ। इसहाक अब्राहमो रा खास पाऊ था। परमेश्वर तेस पाऊए रे बारे रे अब्राहमो ते वादा कित्तेया था, “ये इसहाको रे जरिए ऊणा कि तेरे वंशो री गिणती ऊणी।” अब्राहमो खे पूरा विश्वास था कि परमेश्वर मरे रेया खे जिऊँदा करी सकोआ। ईयां ई अब्राहमो खे इसहाक मरे रेया बीचा ते जिऊँदा मिलेया।

20 विश्वासो तेई इसहाके आपणे दो पाऊ याकूबो खे और एसावो खे वादे री गल्ला रे बारे रे आशीष दिती।

21 विश्वासो तेई याकूबे मरदे बखते यूसुफो रे दूई पाऊआ बीचा ते एकी-एकी खे आशीष दिती और आपणे डण्डे रा सारा लयी की परमेश्वरो री आराधना कित्ती।

22 विश्वासो तेई यूसुफ, जेबे से मरने वाला था, तो इस्राएलो रे लोका साथे मिस्र देशो ते निकलने री चर्चा कित्ती और तिने तिना खे ये आज्ञा बी दिती कि, “जेबे तुसे मिस्र देशो ते जाओगे तो तुसे मेरे मरने ते बाद मेरी आइडिया खे आपू साथे लयी जाएओ।”

23 जेबे मिस्र देशो रे राजे इस्राएलो रे छोटि बच्चेया खे काणे री आज्ञा दिती तो विश्वासो तेई मूसे रे माए-बाओ तेसरे जमणे ते बाद तीन मीन्ने तक लकोई की राखेया; कऊँकि तिने देखेया कि बालक बऊत खास ए और सेयो राजे री आज्ञा ते नि डरे।

24 मिस्र देशो रे फिरौन राजे री बेटिये मूसे खे पाली पोषी की बड़ा कित्तेया। जेबे मूसा बड़ा ऊईगा तो से विश्वासो ते नि चाओ था कि लोक तेसखे राजकुमारिया रा पाऊ बोलो।

25 कऊँकि तेसखे पापो रे थोडे दिना रा सुख लणे ते, परमेश्वरो रे लोका साथे दुःख सईन करना जादा खरा लगेया। 26 तिने सोचेया मसीह री खातर दुःख सईन करना मिस्र देशो रे खजाने ते बऊत बड़ा ए। कऊँकि से जाणो था कि एड़ा करने ते तेसखे स्वर्गो रे परमेश्वरो ते इनाम मिलणा।

27 विश्वासो तेई राजे रे रोषो ते नि डरी की मूसे मिस्र देश छाडीता, कऊँकि तिने जाणी ला कि से बिना देखे परमेश्वरो खे देखणे लगी रा। 28 विश्वासो रे जरिए ई मूसे इस्राएली लोका खे आज्ञा दिती कि सेयो जानवरा रा खून दरवाजे पाँदे छिड़की कि फसह रे त्योआरो री रवाज पूरी करो। ताकि इस्राएलो री परईली ल्वादा रा नाश करने वाला दूत, तिना खे छुई नि सको।

29 विश्वासो तेई इस्राएली लोक लाल समुद्रो ते पार एडे उतरी गे, जेडे सूकी जमीना पाँदो ते। पर जेबे मिस्रिए बी एड़ा ई करना चाया, तो सब डूबी की मरी गे।

30 इस्राएली लोका रे विश्वासो तेई यरीहो नगरो री शहपनाह, जेबे सेयो साता दिना तक चऊँ कनारे तिजी रा चक्कर लगाई चुके, तो से टली गी।

31 विश्वासो तेई राहाब वेश्या परमेश्वरो री आज्ञा ना मानणे वालेया साथे नाश नि ऊई, कऊँकि तेसे इस्राएली पेतिया खे शरण दिती।

32 एबे माखे ओर कुछ बोलणे री जरूरत निए। कऊँकि बखत नि रया कि गिदोनो रे, वाराको रे, समसूनो रे, यिफतहो रे, दाऊदो रे, शमुएलो रे और भविष्यबक्तेया रे बारे रे बताऊँ। 33 इने विश्वासो रेई जरिए राज्य जीते। सच्चे फैसले साथे राज कित्तेया। वादे कित्ती रिया चीजा मिलिया और शेर तिना खे खाई नि सके। 34 आगी रिया लुपिया तिना खे फूकी नि सकिया, तलवारी री तेज तारा ते मरी नि सके, कमजोर ऊँदे ऊए बी तागतबर बणी गे, लड़ाईया रे सुरमे निकले, और दुश्मणा री फौज कूटी-कूटी की नटाईती। 35 कुछ जवाणसे आपणे मरे रे लोक फेर जिऊँदे पाए और कितणे तो मार खांदे-खांदे मरी गे। तिने लोके छुटकारा पाणे खे परमेश्वरो पाँदे विश्वास करना नि छाडेया कऊँकि सेयो मरने ते बाद परमेश्वरो साथे सदा खे जिऊँदे रणा चाओ थे।

36 कुछ लोका खे तो मजाक और कोड्या रा सामणा करना पड़ेया और कुछ लोक जंजीरे की जकड़ी की जेला रे पाईते। 37 कुछ लोका खे पाथर बाए। तिना रे ओर साथे चीरी कि दो टुकड़े करी



तो तेसखे नि दित्ती और आसू बाहई-बाहई की आशीष मांगणे पाँदे बी मन फेरने रा मौका तेसखे नि मिलेया ।

18 तुसे सीने पाहड़ो रे नेडे नि पऊँछे, जेतेखे देखी सको थे और छुँई सको थे । एती ना तो लूपिया जेड़ी बली री आग ए और ना काले बादल, ना बऊत न्हैरा और ना तूफान ए । 19 एती ना तो तुरहिया री आवाज और ना बोलणे वाले रे एडे शब्दो ए, जेतेखे सुणी की इस्राएली लोक बिनती करो थे कि, “एवे आसा साथे ओर गल्ला नि करो ।” 20 तिने लोके एड़ा इजी खे बोलेया कऊँकि सेयो तेसा आज्ञा खे नि सयी सके जो परमेशरे तिना खे बोली थी, “जे कोई डांगर बी पाहड़ो खे छुँओ, तो पात्थर बाए जाओ ।” 21 और से दर्शन एड़ा डराऊणा था कि मूसे बोलेया, “आऊँ बऊत डरूँआ और थरथराऊँआ ।”

22 तुसे लोक सिप्योनो रे पाहड़ो रे नेडे जो जिऊँदे परमेशरो रा नगर ए पऊँछी रे । ये सेई स्वर्गिय यरूशलेम ए जेती लाखो स्वर्गदूत खुशिया रा त्योआर मनाओए । 23 तुसे परमेशरो रे जेठे री सभा रे आई रे, जिना रे नाओँ स्वर्गो रे लिखे रे ए । तुसे आपू परमेशरो रे नेडे आयी रे जो सबी रा न्याय करने वाला ए । तुसे स्वर्गो रे तर्मी लोका री आत्मा गे आयी रे जिना खे सिद्ध बणाई राखेया । 24 तुसे यीशुए गे आयी रे जो आसा साथे नई वाचा रा बचोलापण करोआ और छड़काओ रे तेस खूनो रे नेडे आयी रे, जो हाबिलो रे खूनो ते बी जादा खरिया गल्ला बोलोआ ।

25 सावधान रओ, और परमेशरो री आज्ञा खे नि टालो जो तुसा के बोलणे लगी रा । कऊँकि जेवे मूसे इस्राएलो रे लोका खे चेतावणी दित्ती थी और तिने आज्ञा नि मानी तो सेयो लोक बी परमेशरो री सजा ते बची नि सके । तेवे आसे बी सजा ते नि बची सकदे, जे आसे बी तेसरी आज्ञा नि मानिए जो आसा खे स्वर्गो ते चेतावणी देओआ ।

26 जेवे परमेशरे सीने पाहड़ो ते गल्ल कित्ती थी तेस बखते तेसरे शब्दे तरती इलाई ती, पर एवे तिने ये वादा करी राखेया कि, “एक बार फेर मां बस तरती ई नि, बल्कि स्वर्ग बी इलाई देणा ।” 27 और ये वाक्य, “एक बार फेर” इना गल्ला खे दखाओआ कि बणाई रिया सारी चीजा इल्ली जाणिया और टाई देणियां, ताकि जो चीजा इलाईया नि जांदिया, सेयो अटल बणिया री रओ ।

28 आसा खे जो राज्य मिली रा तिजी खे ईलाया नि जाई सकदा । तेवेई आसे परमेशरो खे धन्यवाद देदे रईए और तेसरी इच्छा रे मुताबिक भंगित और आदरो साथे तेसरी आराधना करदे रईए जेते कि से खुश ओआ । 29 कऊँकि म्हारा परमेशर स्वा करने वाली आग ए ।

## 13

~~~~~

1 आपू बीचे पाई बईणा जेड़ा प्यार राखो । 2 तिना री बी पराऊणचारी करो जो जरूरतमंद मुसाफर ए, कऊँकि इजी रे जरिए कई लोके अणजाणे रे स्वर्गदूता री आओँ-बैठ कित्ती । 3 कैदिया री बी ईयां खबर-सम्बाल लओ कि मानो तिना साथे तुसे बी कैदी ए । जिना लोका साथे बुरा बर्ताओ कित्तेया जाओआ, तिना री बी ये समजी की खबर-सम्बाल लया करो जेडे कि तुसे बी तिना रे दुःखो रे साजी ए ।

4 ब्या सबी लोका रे आदरो री गल्ल समजी जाओ और एस रिशते रे दोनो आपू बीचे वफादार रओ, कऊँकि परमेशरो व्याभिचारिया रा और गन्दे काम करने वालेया रा न्याय करना । 5 तुसे आपणी जिन्दगी धन-दौलता रे लालचो ते दूर राखो, जो तुसा गे ए, तिदे ई सन्तुष्टी राखेया करो, कऊँकि परमेशरे आपू ई बोली राखेया, “मां तूँ कदी नि छाडणा और ना ई तूँ पूलणा ।” 6 तेवेई तो आसे परोसा करी की बोलूए,

“प्रभु मेरी मताद करने वाला ए, मां नि डरना ।

मांणू मेरा कुछ नि करी सकदा ।”

7 जो तुसा रे अगुवे थे और जिने तुसा गे परमेशरो रा वचन सुणाई राखेया, तिना खे याद राखो । त्यानो साथे तिना रे चाल-चलणो खे देखो कि तिने कियँ आपणी जिन्दगी जी, और सेयो मरने तक

परमेशरो रे विश्वासो रे वफादार बणे रे ए। इजी खे आसा बी एडा ई विश्वास करना चाईयो जेडा तिने कित्तेया था।⁸ प्रभु यीशु मसीह काल, आज और जुगो-जुगो तक कदी नि बदलणा।

⁹ इना सारे कई प्रकारा रे और नऊखे उपदेशा खे नि मानो जो तुसा खे बुरी बाटा रिये लयी जाओए। कऊँकि तुसा रे मनो खे अच्छा ए कि परमेशरो री कृपा रे जरिए मजबूत बणो, ना कि तिना नियमा रे मानणे रे जरिए जो खाणे रे बारे रे ए, जिना साथे काम राखणे वालेया खे कुछ फाईदा नि ऊँदा।¹⁰ म्हारी एक एडी वेदी ए जेते पाँदा ते खाणे रा अक्क तिना लोका खे नि ए, जो तम्बूओ री सेवा करोए।¹¹ पुराणे वादे रे मुताबिक हर साल प्रदान पुरोईत जानवरा रा खून पाप-बलिया खे बड़ी पवित्र जगा रे तिना रे पापो री माफिया खे लयी जाओआ, पर जानवरा रे बली कित्ते रे शरीर लोका रे तम्बूए ते दूर फूके जाओए।

¹² इजी बजअ ते यीशुए बी लोका खे आपणे खूनो रे जरिए पवित्र करने खे यरूशलेमो नगरो ते बारे दुःख सईन कित्तेया और मरी गे।¹³ तो आओ, एवे आसे यहूदी लोका रे बिधानो खे छाडी की, यीशु मसीह पाँदे विश्वास करी की ठीक तियाँ ई तेस साथे शर्मनाक दुःख सईन करिए।¹⁴ कऊँकि एते दुनिया रे म्हारा कोई बी सदा रणे वाला कअर नि ए। बल्कि आसे तेस स्वर्गिय कअरो री टोला रे ए जो सदा खे ए।

¹⁵ इजी री खातर आसे यीशु मसीह रे जरिए आपणे मुँओ ते परमेशरो री स्तुति और आराधना करदे रईए। जो परमेशरो खे बलिदान ए।¹⁶ और पलाई करने खे और एकी दूजे री मताद करने खे सदा त्यार रओ, कऊँकि परमेशर एडे बलिदानो ते खुश ओआ।

¹⁷ आपणे अगुवेया री मानो और तिना रे अधीन रओ, कऊँकि सेयो तुसा खे देखोए कि तुसे आपणी बाटा ते पटकी नि जाओ। तिना खे आपणी सेवा रा लेखा देणा पडना। तुसे तिना री आज्ञा मानो ताकि सेयो आपणे कामो खे खुश ऊई जाओ, ना कि उदास ऊई जाओ। ये तुसा खे बी फाईदे वाला ऊणा।

¹⁸ आसा खे प्रार्थना करदे रओ। आसा खे परोसा ए कि म्हारा विवेक शुद्ध ए और आसे सबी गल्ला रे जो आसे करूँए परमेशरो री महिमा करना चाऊँए।¹⁹ प्रार्थना करने खे आऊँ तुसा खे ओर बी औसला देऊँआ ताकि आऊँ चट-चारे तुसा गे फेर आयी सकूँ।

²⁰ एवे शान्ति देणे वाला परमेशरे म्हारे प्रभु यीशुए खे मरे रेया बीचा ते जिऊँदा कित्तेया। यीशु पेडा रा महान् रखवाले जेडा ए, जेसरा खून परमेशरे आपणे लोका साथे अनन्त वाचा बनाणे खे इस्तेमाल कित्तेया।²¹ परमेशर तुसा खे हर एक पत्नी गल्ला रे सिद्ध करो, जेते की तुसे तेसरी इच्छा पूरी करो और जो कुछ तेसखे अच्छा लगोआ, तिजी खे प्रभु यीशु मसीह रे जरिए आसा रे पुरा करो। जेसरी तारीफ जुगो-जुगो तक ऊँदी रओ। अमीन्।

²² ओ साथी विश्वासियो, आऊँ तुसा ते बिनती करूँआ कि एसा चिट्ठिया रिया गल्ला खे सबरो साथे सुणी लो, जो मैं तुसा खे इम्मत देणे खे लिखी राखी। मैं तुसा खे एसा चिट्ठिया रे बऊत गल्ला नि लिखी राखी।²³ तुसा खे ये याद ए कि तीमुथियुस म्हारा पाई जेला ते छूटी ग रा और जे से चट आईगा, तो मां तेस साथे तुसा खे मिलणे आऊणा।

²⁴ आपणे सबी अगुवेया खे और सबी पवित्र लोका खे नमस्कार बोलो। इटली देशो रे परमेशरो रे लोक तुसा खे नमस्कार बोलोए।²⁵ तुसा सबी पाँदे परमेशरो री कृपा ऊँदी रओ। अमीन्।

याकूब याकूबो री लिखी री चिट्ठी भूमिका

याकूबो री चिट्ठी जरूरी निर्देशो रा एक संग्रह ए, जो सारी दुनिया रे ओरे-पोरे ऊई की रणे वाले परमेशरो रे लोका रिया खातर लिखी राखी। लेखक मसीही चाल-चलणो खे जरूरी ज्ञान और मार्गदर्शनो ते जुड़े रे निर्देशो खे प्रस्तुत करने खे कई जिऊँदे उदारणा रा इस्तेमाल करोआ। से कई विषय पाँदे मसीह रे नजरिए ते विचार करोआ, जियाँ-अमीरी और गरीबी, परीक्षा, अच्छा चाल-चलण, पक्षपात, विश्वास और काम, जीवा रा इस्तेमाल, अक्लमंदी, लड़ाई-चगड़ा, कमण्ड और दीनता, दूजे पाँदे दोष लगाणा, त्वालिया देणा, सबर राखणा और प्रार्थना करना। ये चिट्ठी मसीहियत मानणे और विश्वासो साथे काम करने री खासियता पाँदे बी जोर देओई।

❖❖❖❖❖

भूमिका 1:1

विश्वास और अक्लमंदी 1:2-8

गरीबी और धन-दौलत 1:9-11

परख और लालच 1:12-18

सुणना और करना 1:19-27

पक्षपातो रे खलाफ चेतावणी 2:1-13

विश्वास और काम 2:14-26

मसीही और तेसरी जीव 3:1-18

मसीही और दुनिया 4:1-5:6

कई निर्देश 5:7-20

❖❖❖❖❖

1 आऊ याकूब जो परमेशर और प्रभु यीशु मसीह रा दास ए ये चिट्ठी तिना बारा गोत्रा खे लिखूँआ जो दुनिया रे ओरे-पोरे ऊई की रओए, मेरी तरफा ते नमस्कार।

❖❖❖❖❖ ❖❖ ❖❖❖❖❖❖❖❖

2 ओ प्यारे साथी विश्वासियो! जेबे तुसे कई परकारा री परीक्षा रे पड़ा, तो इजी खे पूरी खुशिया री गल्ल समजो, ³कऊँकि तुसे जाणो ईए कि जेबे तुसा रे विश्वासो री परख ओई तो तुसे परमेशरो पाँदे परोसा राखी की सबरो साथे ओर बी परेशानिया रा सामणा करोए। ⁴पर सबरो खे आपणा पूरा काम करने देओ ताकि तुसे पूरे और सिद्ध ऊई जाओ और तुसा रे केसी बी अच्छे, चाल-चलणो री कमी नि ओ।

⁵पर जे तुसा बीचा ते केसी खे बी दमाको री कमी ओ, तो परमेशरो ते माँगो, जो बिना लवामे ते सबी खे उदारता ते खुशिया साथे देओआ; और परमेशर सबी खे देओआ। ⁶पूरे विश्वासो साथे माँगो कि परमेशरो तेसखे देणा और कुछ शक नि करो, कऊँकि शक करने वाला समुद्रो री छालिया जेड़ा ए, जो अवा साथे हड़ोईया और उछलोईया। ⁷एड़ा माणू ये नि समजो कि माखे प्रभुए ते कुछ मिलणा, ⁸से माणू आपणा फैसला नि लई सकदा और आपणी सारी गल्ला रे पोला-पाला ए।

❖❖❖❖❖ ❖❖ ❖❖❖❖❖

9 विश्वासो पाई जो गरीब ए तेसखे खुश ऊणा चाईयो कि परमेशरो ते तेसखे इज्जत मिलणी। ¹⁰और अमीर आपणी नीच दशा पाँदे खुश ओ, कऊँकि तेसरा पैसा काओ रे फूलो जेड़ा जांदा रणा। ¹¹सूरज निकलदे ई कड़ाके री तूप पड़ोई और काओ खे सकोई देओई और तिजी रा फूल चढ़ी जाओआ और तिजी री शोभा जांदा रओई, ईयां ई अमीर आदमी बी आपणी जिन्दगिया रे कामा रे पाअग-दौड़ करदे ऊए तूड़ा रे मिली जाणे।



12 धन्य ए से माणू, जो परीक्षा रे टिके रा रओआ, कऊँकि तेस परीक्षा रे पास ऊई की अनन्त जिन्दगिया रा मुकट पाणा, जेतेरा वादा परमेशरे आपणे प्यार करने वालेया साथे करी राखेया। 13 जेबे केसी री परीक्षा ओ, तो से ये नि बोलो, “मेरी परीक्षा परमेशरो री तरफा ते ओई।” कऊँकि ना तो बुरी गल्ला रे परमेशरो री परीक्षा ऊई सकाई और ना ई से केसी री परीक्षा आपू करोआ। 14 पर हर माणू आपणी ई इच्छा रे खिंजी की और फसी की परीक्षा रे पडोआ। 15 तेबे इच्छा गर्भवती ऊई की पापो खे जमाओई और जेबे पाप बडी जाओआ तो मौता खे पैदा करोआ।

16 ओ प्यारे साथी विश्वासियो! तोखा नि खाओ। 17 कऊँकि हर एक अच्छा बरदान और हर एक खरा दान स्वर्गो तेईए और जोतिया रे पिते री तरफा ते मिलोआ। परमेशर सदा एक जेड़ा रओआ और ना ई टवांवे जेड़ा बदलोआ। 18 तिने आपणी ई इच्छा ते आसा खे सच्चो रे वचनो रे जरिए नया जीवन दितेया ताकि आसे तेसरे बणाए रे प्राणिया बीचा ते पईले फलो जेडे ओऊँ।



19 ओ प्यारे साथी विश्वासियो! ये गल्ल तुसे जाणी लो; हर एक माणू सुणने खे आगे, बोलणे रे धीरज वाला और रोषो रे सबरखोर ओ। 20 कऊँकि जेबे कोई माणू गुस्सा करोआ तो से तर्मा री जिन्दगी नि विताई सकदा जेड़ा परमेशर चाओआ। 21 इजी री खातर मनो रा सारा मईल और सारी दुश्मणदारिया खे दूर करी की परमेशरो रे वचनो खे नरमाईया रे अपनाओ, जो दिलो रे राखी राखेया और जो तुसा रे प्राणो खे बचाई सकोआ। 22 परमेशरो रे वचनो पाँदे चलणे वाले बणो, बस सुणने वाले ई नि, जो आपणे आपू खे तोखा देओए। 23 कऊँकि जो कोई वचनो खे सुणने वाला ओ और तिजी पाँदे चलणे वाला नि ओ, तो से तेस माणूए जेड़ा ए जो आपणी असली शकल शीशे रे देखोआ। 24 कऊँकि से आपणे आपू खे देखी कि चली जाओआ और फटाफट पूली जाओआ कि आऊँ केड़ा था? 25 पर से आदमी जो त्यानो साथे परमेशरो रा सिद्ध उपदेश जो लोका खे पापो ते छुड़ाई देओआ, तिजी रा त्यानो साथे मनन करोआ और तिजी खे मानोआ और पुलदा नि जो तिने सुणी राखेया, एडे लोका परमेशरो री तरफा ते आपणे कामा रे आशीष पाणी।

26 जे कोई आपणे आपू खे भगत समजो और आपणी जीवा पाँदे लगाम नि लगाओ, पर आपणे दिलो खे तोखा देओ, तो तेसरी भगित बेकार ए। 27 म्हारे परमेशर पिते रे नेडे शुद्ध और साफ निष्कलक भगित ये कि अनाथ और बिदुआ रे क्लेशो रे तिना री खबर-सम्बाल लओ और आपू खे दुनिया रे बुरे कामा ते बचाई की राखो।

2



1 ओ प्यारे साथी विश्वासियो! तुसे म्हारे महिमाय परभु यीशु मसीह रे चले ए इजी खे तुसा बीचे पक्षपात नि ओ। 2 मानी लो जे एक माणू सुईने रे छल्ले और सुन्दर टाले पईनी की तुसा री सभा रे आओ और कंगाल बी मईले-चिथडे टाले पईनी की आओ 3 और तुसे तेस सुन्दर टाले पईने रे खे बऊत इज्जती साथे बोलो, “तुसे तेती अच्छी जगा रे बैठो,” और तेस कंगालो खे बोलो, “तू एती खड़ा रओ या मेरे पैरो गे थाले बैठ,” 4 तो क्या तुसे आपू-बीचे भेद-भाव नि कित्तेया और बुरे बिचारो ते न्याय करने वाले नि ठईरे?

5 ओ प्यारे साथी विश्वासियो सुणो! क्या परमेशरे एसा दुनिया रे कंगाल नि चूणे कि विश्वासो रे तर्मी और तेस राज्य रे अक्कदार ओ, जेतेरा वादा परमेशरे तिना ते कित्तेया, जो तेसते प्यार करोए? 6 पर तुसे तेस कंगालो रा मजाक उड़ाया। क्या अमीर लोक तुसा पाँदे अत्याचार नि करदे, क्या सेयो ई तुसा खे कचैरिया रे कसिटी-कसिटी कि नि लयी जाँदे? 7 क्या सेयो यीशु मसीह रे खरे नाओ री निन्दा नि करदे, जेसरे तुसा खे बोलोए।

8 तेबे बी तुसे एस पवित्र शास्त्रो रे वचनो रे मुताबिक, “तू आपणे पडोसिये साथे आपू जेड़ा प्यार राख,” सच्ची तेस राज्य रे बिधानो खे पूरी करोए, तो अच्छा ई करोए। 9 पर जे तुसे पक्षपात करोए, तो पाप करोए और बिधान तुसा खे अपराधी ठराओए। 10 कऊँकि जो कोई सारे बिधानो खे

मानोआ, पर एक ई गल्ला रे चूकी जाओआ, तो से सबी गल्ला रे दोषी ठईरिया। ¹¹ कऊँकि जिने ये बोलेया, “तूँ व्याभिचार नि करना” तिने ई ये बोलेया, “तैं अत्या नि करनी।” इजी री खातर जे तैं व्याभिचार नि कित्तेया, पर अत्या कित्ती, तेवे बी तूँ बिधानो रा उलघनन करने वाला ठईरिया।

¹² तुसे तिना लोका जेडे वचन बोलो और काम बी करो, जिना रा न्याय आजादिया रा बिधानो रे मुताबिक ऊणा। ¹³ कऊँकि जिने दया नि कित्ती, तेसरा न्याय बिना दया ते ऊणा, दया न्याय पाँदे जयवंत ओई।

?????? ?? ??

¹⁴ ओ प्यारे साथी विश्वासियो! जे कोई बोलो कि माखे परभु यीशु मसीह पाँदे विश्वास ए, पर दूजे खे कोई अच्छा काम नि करदा, तो तिजी ते क्या फाईदा? क्या एड़ा विश्वास कदी तेसखे बचाई सकोआ? ¹⁵ जे कोई विश्वासी पाई या बईण नांगे-क्वाड़े ओ और तिना खे हर-रोज रोटिया री कमी ओ ¹⁶ और तुसा बीचा ते कोई तिना खे बोलो, “बेफिकर ऊई की जाओ, तुसे गरम रओ और रज्जे रे रओ,” पर जो चीजा शरीरो खे जरूरी ए से तिना खे नि देओ, तो क्या फाईदा? ¹⁷ तियाँ ई विश्वास बी, जे अच्छे कामो साथे नि ओ, तो से आपणे सबाओ रे मरे राए।

¹⁸ बल्कि कोई बोली सकोआ, “ताखे विश्वास ए और आऊँ अच्छे काम करूँआ।” पर आऊँ बोलूँआ, “तूँ आपणा विश्वास माखे अच्छे कामो ते बिना साबित कर और मां आपणा विश्वास आपणे अच्छे कामो साथे साबित करना।” ¹⁹ ताखे विश्वास ए कि एक ई परमेशर ए और तूँ अच्छा करेआ। पर दुष्टात्मा बी विश्वास करोईया और थरथराओईया। ²⁰ ओ नकम्मे माणू! क्या तूँ ये पनि जाणदा कि अच्छे कामो ते बिना विश्वास बेकार ए?

²¹ जेवे म्हारे पिते अब्राहमे आपणा पुत्र इसहाक बेदिया पाँदे चढ़ाया, तो क्या से कामो ते तर्मी नि ठईरिया? ²² तो तैं देखी ला कि विश्वासे तेसरे अच्छे कामो साथे मिली कि असर पाया और तेसरा विश्वास अच्छे कामो रे जरिए सिद्ध ऊआ। ²³ और पवित्तर शास्त्रो रा ये वचन पूरा ऊआ, “अब्राहमे परमेशरो पाँदे विश्वास कित्तेया और तेसरे विश्वासो रे जरिए परमेशरे से एक तर्मी माणूए रे रूपो रे मानेया।” और से परमेशरो रा दोस्त ऊआ। ²⁴ तो तुसे देखी ला कि माणू बस विश्वासो तेई नि, बल्कि अच्छे कामो ते बी तर्मी ठईरोआ। ²⁵ तियाँ ई राहाब वेश्या बी, जेवे तेसे संदेश देणे वाले दूता खे आपणे कअरे शरण दिती और दूजी बाटा रिये तिना के दुश्मणा ते बची की निकलने रे मताद कित्ती, तो क्या कामे की तर्मी नि ठईरी? ²⁶ इजी री खातर जियाँ शरीर आत्मा ते बिना मरे राए, तियाँ ई विश्वास बी अच्छे कामो ते बिना मरे राए।

3

???? ?? ?? ??

¹ ओ प्यारे साथी विश्वासियो! तुसा बीचा ते बऊत मण्डलिया रे उपदेशक नि बणो, कऊँकि तुसे जाणोए कि आसे उपदेशक ओर बी दोषी ठईरने। ² आसे सब कई बार चूकी जाऊँए, पर जो कोई बोलणे रे नि चूकदा, सेई तो सिद्ध माणू ए और से आपणे सारे शरीरो खे वशो रे करी सकोआ।

³ जेवे आसे कोड़ेया खे आपणे वशो रे करने खे तिना रे मुँओ रे लगाम लगाऊँए, तो आसे तिना रे सारे शरीरो खे बी फेरी सकूँए। ⁴ देखो जाहूज बी हालाँकि इतणे बड़े ओए, और तेज अवा रे चलाए जाओए, तेवे बी एक छोटी जी पतवारा रे जरिए मांझियो री इच्छा रे मुताबिक कुमाए जाओए। ⁵ तियाँ ई जीव बी शरीरो रा एक छोटा जा अंग ए और बड़ी-बड़ी त्वालिया मारोई। देखो थोड़ी जी आगी साथे कितणे बड़े बणो रे आग लगी जाओई। ⁶ जीव बी एक आगी जेड़ी ए, जीव म्हारे शरीरो रे अंगा रे पापो रा एक लोक ए और सारे शरीरो रे कलंक लगाओई और पूरी जिन्दगिया री गतिया रे आग लगाई देओई और जीव बी नरको री आगी जेड़ी फूकदी रओई।

⁷ हर प्रकारे रे बणो रे डांगर, पंछी, रंगणे वाले जन्तु और पाणि ए रे रणे वाले तो माणूआ रे वशो रे ऊई सकोए और ऊई बी गये रे। ⁸ पर जीवा खे माणूआ बीचा ते कोई बी वशो रे नि करी सकदा, से एक एड़ी बयाद ए, जो कदी बी रूकदी नि, से जान लणे वाले सापो जेडे विषे की फरी रिये। ⁹ इजी

जीवा साथे आसे प्रभु और पिते री स्तुति करूँए और इजी साथे माणूआ खे जो परमेशरो रे रूपो रे बणाई राखे, सराप देऊँए। ¹⁰ एक ई मुँओ ते धन्यवाद और सराप दोनो निकलोए। ओ प्यारे साथी विश्वासियो! एडा नि ऊणा चाईयो। ¹¹ क्या सूबला रे एकी ई मुँओ ते मीठा और खारा दोनो पाणी निकलोए? ¹² ओ प्यारे साथी विश्वासियो! क्या दाऊगले रे डालो रे जैतून या अँगूरा री बेला रे दाऊगले लगी सकोए? तियाँ ई खारी सूबला ते मीठा पाणी नि निकली सकदा।

~~~~~

<sup>13</sup> तुसा बीचा ते ज्ञानी और समजदार कूणे? जो माणू एडा ए, से आपणे कामो खे खरे चाल-चलणो ते तेसा नरमाईया साथे सामणे ल्याओ, जो ज्ञानो ते पैदा ओई। <sup>14</sup> पर तुसे आपणे-आपणे मनो रे कऊडी जलन और स्वार्थ राखोए, तो सच्चो रे बिरोदो रे कमण्ड नि करना और ना ई चूठ बोलणा। <sup>15</sup> ये ज्ञान से निए, जो स्वर्गो ते उतरोआ, बल्कि संसारिक, शारीरिक और शैतानी ए। <sup>16</sup> इजी री खातर जेती जलन और स्वार्थ ओआ, तेती बखेडा और हर प्रकारा रे बुरे काम ओए।

<sup>17</sup> पर जो ज्ञान स्वर्गो ते आओआ, से पईले तो पवित्र ओआ, तेबे मिलणसार, नरम, खरे बिचार, दया और खरे फले की परे रा और पक्षपात और कपटो ते बिना ओआ <sup>18</sup> और जो लोक मेल-जोल कारणे वाले ए तिना शान्तिया रा बीज बोणा और धार्मिकता री फसल बाडणी।

## 4

~~~~~

¹ तुसा बीचे लड़ाईया और चगड़े केथा ते आईगे? पक्का तिना बुरिया इच्छा ते जो तुसा रे अंगा रे लड़दे-चगड़दे रओए। ² जेबे तुसे इच्छा राखोए पर तुसा खे मिलदा नि तो तुसे अत्या करने खे त्यार ऊई जाओए। तुसे दूजे री चीजा हड़पणे री इच्छा राखोए और जेबे तुसा खे कुछ नि मिलदा, तेबे तुसे जली की लड़दे-चगड़दे रओए। तुसा खे इजी खे नि मिलदा, कऊँकि तुसे परमेशरो ते मांगदे नि। ³ तुसे माँगोए और फेर बी तुसा खे मिलदा नि, कऊँकि बुरी इच्छा ते माँगोए, ताकि आपणे भोग-बिलासो रे उडाई देओ।

⁴ ओ अविश्वासी लोको! क्या तुसे नि जाणदे कि दुनिया री चीजा साथे दोस्ती राखणी, परमेशरो साथे बैर राखणा रे बराबर ए? तो जो कोई दुनिया रा दोस्त बणना चाओआ, से आपणे आपू खे परमेशरो रा बैरी बणाओआ। ⁵ क्या तुसे ये समजोए कि पवित्र शास्त्र बेकारो रेई बोलोआ कि जिने परमेशरे आत्मा आसा रे पीतरे बसाई राखी, से बड़ी इच्छा राखोआ कि आसे सिर्फ तेसरी ई आराधना करिए। ⁶ से तो ओर बी कृपा देओआ, तेबेई तो पवित्र शास्त्रो रे ये लिखी राखेया, “परमेशर कमण्डिया रा बरोद करोआ, पर जो दीन ए तिना पाँदे कृपा करोआ।”

⁷ इजी री खातर परमेशरो रे अधीन ऊई जाओ और शैतानो रा मुकाबला करो, तो से तुसा गे ते नटी जाणा। ⁸ परमेशरो नेडे आओ, तो से बी तुसा रे नेडे आऊणा। ओ पापियो! आपणी जिन्दगिया ते पापो खे दूर करो और ओ दोगले लोको! आपणे दिलो खे पवित्र करो। ⁹ आपणे पापो री बजअ ते दुःखी ओ, शोग करो, रोओ। तुसा री आस्सी शोगो रे ओर तुसा री खुशी उदासिया रे बदली जाओ। ¹⁰ प्रभुए सामणे दीन बणो, तो तेस तुसे आदरो जोगे बणाणे।

~~~~~

<sup>11</sup> ओ प्यारे साथी विश्वासियो! एकी-दूजे री निन्दा नि करो, जो आपणे पाईया री निन्दा करोआ या पाईया पाँदे दोष लगाओआ, से विधानो री निन्दा करोआ और विधानो पाँदे दोष लगाओआ, तो तूँ विधानो पाँदे चलणे वाला निए, पर तेस पाँदे हाकिम ठईरया। <sup>12</sup> विधान देणे वाला और हाकिम एक ईए, जेसखे बचाणे और नाश करने री सामर्थ ए। तूँ कूणे जो आपणे पड़ोसिया पाँदे दोष लगाएया?

~~~~~

¹³ तुसे जो ये बोलोए, “आज या काल आसे केसी ओरी नगरो रे जाई की तेती एक साल बिताऊँगे और व्यापार करी की फाईदा ऊटाऊँगे।” ¹⁴ पर ये नि जाणदे कि काल क्या ऊणा। सुणी तो लओ कि तुसा री जिन्दगी आयी ई क्या? तुसे तो मानो प्वाफो जेडे ए, जो थोड़ी देरा खे दिशोआ और तेबे

राची जाओआ। ¹⁵इजी रे बदले तुसा खे ये बोलणा चाईयो, “जे प्रभु चाओगा, तो आसे जिऊंदे रऊंगे और ये कि से काम बी करूंगे।” ¹⁶पर एबे तुसे आपणी त्वालिया पाँदे कमण्ड करोए; एडा सारा कमण्ड बुरा ओआ। ¹⁷इजी री खातर जो कोई पलाई करना जाणोआ और करदा नि, तेसखे ये पाप ए।

5

????? ?? ????????

¹ओ अविश्वासी अमीर लोको! सुणी तो लओ! तुसे आपणे आऊणे वाले क्लेशो पाँदे चींगी-चींगी की रोओ। ²तुसा रा धन नाश ऊईगा और तुसा रे टालेया खे कीडे खाई गो। ³तुसा रे सुईने चाँदियो खे खई लगी गी और परमेशरो जेस दिने तुसा रा न्याय करना तेस दिने तेसा खईया तुसा रे खलाफ गवाई देणी और आगी जेडा तुसा रा मांस खाई देणा। तुसे आखरी जुगो रे धनो पाँदे धन कटटा करी राखेया। ⁴देखो जिने मजदूरे तुसा रे डोरू बाडे, तिना री मजदूरी, जो तुसे तोखा देई की राखी ली री, से परमेशरो रे नेडे तुसा रे खलाफ चींगणे लगी री और तिना मजदूरा री दुहाई जिने तुसा री फसल कटटी किती, सेनाओं रे प्रभुए रे कानो तक पऊँछी गी री। ⁵तुसे तरतिया पाँदे भोग-विलासो रे लगे रे रये और बडा पारी सुख पाया। तुसे आपणे पापो रा कअडा परी ता रा और आपू खे परमेशरो री सजा खे त्यार करी राखेया। ⁶तुसे बेकसुर लोक दोषी ठराई कि काई ते, से तुसा रे विरोद नि करदे।

??-?? ?? ????? ?????

⁷तो ओ प्यारे साथी विश्वासियो! प्रभुए रे आऊणे तक सबर राखो। देखो, जिम्मीदार तरतिया री किमती फसला री उम्मीद राखदा ऊआ, पईली और आखरी बरखा ऊणे तक सबर राखोआ। ⁸ईयां ई तुसे बी सबर राखो और आपणे दिलो खे मजबूत करो, कऊँकि प्रभुए रा आऊणा नेडे ए। ⁹ओ प्यारे साथी विश्वासियो! एकी-दूजे पाँदे दोष नि लगाओ, ताकि तुसे दोषी नि ठईरो, देखो, न्याय करने वाला द्वारो पाँदे खडी रा।

¹⁰ओ प्यारे साथी विश्वासियो! जिने भविष्यबक्ते प्रभुए रे नाओं ते गल्ला कित्तिया, तिना खे दुःख उठाणे और सबर राखणे रा आपू खे आदर्श समजो। ¹¹देखो, आसे सबर राखणे वालेया खे धन्य बोलूँए, तुसे तो अय्युबो रे सबरो रे बारे रे तो सुणी राखेया और प्रभुए री तरफा ते जो तेसरा फल ऊआ, से बी जाणी ला रा, जेते साथे प्रभुए री बऊत बडी करूणा और कृपा प्रगट ओई।

¹²पर ओ प्यारे साथी विश्वासियो! सबी ते बडी ये गल्ल ए कि कसम नि खाणी, ना स्वर्गो री, ना तरतिया री, ना किजी ओरी चीजा री, पर तुसा री गल्ल आ री आ और ना री ना ऊणी चाईयो, ताकि तुसे परमेशरो रे दण्डो जोगे नि ठईरो।

?????????? ?? ???? ?

¹³जे तुसा बीचा ते कोई दुःखी ओ तो से प्रार्थना करो। जे खुशिया रे ओ तो, से स्तुतिया रे भजन गाया करो। ¹⁴जे तुसा बीचे कोई रोगी ए, तो मण्डलिया रे बुजुर्गा खे बुलाओ और सेयो प्रभुए रे नाओं ते तेस पाँदे तेल मली कि तेसखे प्रार्थना करो। ¹⁵और प्रभुए रे विश्वासो री प्रार्थना रे जरिए रोगी बची जाणा और प्रभुए से ठवाली की ठीक करना और जे तिने पाप बी करी राखे ऊगे, तो सेयो बी माफ ऊई जाणे।

¹⁶इजी री खातर तुसे आपू-बीचे एकी-दूजे रे सामणे आपणे-आपणे पापो खे मानी लो और एकी-दूजे खे प्रार्थना करो, जेते की ठीक ऊई जाओ, तर्मी जणे री प्रार्थना रे असरो ते बऊत कुछ ऊई सकोआ। ¹⁷भविष्यबक्ता एलिय्याह बी तो आसा जेडा दुःख-सुख सईन करने वाला माणू था और तिने पूरे तनो-मनो ते प्रार्थना किती कि बादल नि बरसो और साडे तीन साल तक जमीना पाँदे बादल नि बरसे। ¹⁸तेबे तिने प्रार्थना किती तो सर्गों ते बर्खा ऊई और जमीना रे फसल लगी।

¹⁹ओ प्यारे साथी विश्वासियो! याद राखो, जे तुसा बीचा ते कोई सच्चो री बाटा ते पटकी जाओ और कोई तेसखे मन फिराणे रे मताद करी की फेरी की ली आओ, ²⁰तो से ये जाणी लो कि जो

कोई केसी पटके रे पापिए खे सच्चाईया री तरफा खे फेरी की ली आओगा, तेस एक प्राण मौता ते बचाणा और कई पापो पाँदे पड़दा पाणा ।

1 पतरस पतरसो री लिखी री पईली चिट्ठी भूमिका

पतरसो री पईली चिट्ठी मसीहिया रे नाओं लिखी थी, जिना खे एती परमेशरो रे चूणे रे लोक बोली राखेया, जो एशिया रे सारे उत्तरी क्षेत्रो रे ओरे-पोरे ऊई की रणे लगी रे थे। एते चिट्ठिया रा खास मकसद आपणे पढ़ने वालेया खे उत्साहित करना ए, जो कि आपणे विश्वासो रिया बजअ ते दुःख और सताव रा सामणा करने लगी रे थे। लेखक आपणे पढ़ने वालेया खे यीशु मसीह रा सुसमाचार याद दलाई की एड़ा करोआ, कऊँकि यीशुए री मौत, दुबारा जिऊँदा ऊणा और आऊणे री प्रतिज्ञा तिना खे उम्मीद देओआ। एते नजरा ते तिना खे आपणे दुःखो खे मानणा और सईन करना था, एते विश्वासो साथे कि ये तिना रे विश्वासो री सच्चाईया री परख ए और ये बी कि, “यीशु मसीह रे परगट ऊणे” रे दिने तिना खे इजी रा प्रतिफल मिलणा।

सताव रे बखते पुरोत्साहित करने रे साथे-साथे लेखक ये बी प्रार्थना करोआ कि तेसखे पढ़ने वाले तिना लोका जेड़ी जिन्दगी बिताओ जो मसीह रे लोक ए।

???????

भूमिका 1:1-2

परमेशरो रे उद्धारो खे याद दलाणा 1:3-12

पवित्र जिन्दगिया खे उपदेश 1:13-2:10

दुःखो रे बखते मसीही री जिम्मेवारिया 2:11-4:19

मसीही री दीनता और सेवा 5:1-11

निचोड़ 5:12-14

?????????

1 आँऊ पतरस एसा चिट्ठिया खे लिखणे लगी रा, जो यीशु मसीह रा प्रेरित ए। आँऊ ये चिट्ठी परमेशरो रे तिना चुणे रे लोका खे लिखूँआ, जो पुन्तुस, गलातिया, कप्पदुकिया, आसिया और बितूनिया रे प्रदेशो रे ओरे-पोरे ऊई की परदेशिया रे रूपो रओए।² पिता परमेशरो बऊत पईले ई तुसे आपणे लोक करी कि चुणी ले और पवित्र आत्मा रे कामो रे जरिए तुसे पवित्र कित्ते। परमेशरो ये इजी खे कित्तेया ताकि तुसे यीशु मसीह री आज्ञा खे मानो और तेसरे खूनो रे जरिए शुद्ध ऊई जाओ। आँऊ प्रार्थना करूँआ कि परमेशर तुसा खे बऊत-बऊत कृपा और शान्ति देओ।

?? ??????? ????????

3 म्हारे प्रभु यीशु मसीह रे पिता परमेशरो रा धन्यवाद ओ। तिन प्रभु यीशु मसीह खे मरे रेया बीचा ते जिऊँदे ऊणे रे जरिए, आपणी बड़ी दया ते आसा खे जिऊँदी उम्मीदा खे नया जन्म दित्तेया।

4 आसे तेसा जायदाता खे पाणे रा इन्तजार करने लगी रे जो परमेशरो आसा खे तयार करी राखेया। से कदी नि खत्म ऊणे वाली, कदी नि खराब ऊणे वाली और अजर जायदाता ए, जो परमेशरो तुसा खे स्वर्गो रे राखी री ए,⁵ परमेशर आपणी सामर्था ते तुसा री रक्षा करोआ कऊँकि तुसे यीशुए पँदे विश्वास करोए। तेस तुसा री मसीह रे वापस आऊणे तक रक्षा करदे रणा। तेवे तुसा जाणी लणा कि परमेशरो तुसा खे पापो ते और मौता ते उद्धार देई राखेया।⁶ इजी बजअ ते तुसे मग्न ओए, हालाँकि जरूरी ए कि एवे कुछ दिनों तक कई प्रकारा रिया परीक्षा री बजअ ते उदास रओ।⁷ ये इजी खे ओआ कि तुसा रा विश्वास परीक्षा रे खरा निकलो। नाशवान सूँदने खे बी परखणे और शुद्ध करने खे आगी रे तपाया जाओआ पर तुसा रा विश्वास नाशवान सूँदने ते केथी जादा किमती ए। ईयां तुसा रा परखेया रा विश्वास यीशु मसीह रे वापस आऊणे पँदे तारीफ, महिमा और आदरो री बजअ बणो।⁸ तेस साथे तुसे बिना देखे ई प्यार राखोए और एवे तो तेस पँदे बिना देखे विश्वास करी की

एड़े खुश और मग्न ऊई जाओए, जेतेरे बारे रे कुछ बोली नि सकदे और जो महिमा साथे फरे राए।
 9 और एस विश्वासो रा इनाम तुसा री आत्मा रा उद्धार ए।

10 इजी उद्धारो रे बारे रे सेयो भविष्यवक्ता और बी जादा जाणना चाओ थे। तिने लोके भविष्यवाणी किती कि परमेशरे तुसा लोका रा उद्धार करने खे केड़ी कृपा करनी जेते जोगे तुसे नि थे। तिने लोके त्यानो साथे इजी रा उतर टोलने खे जांच-पड़ताल किती। 11 मसीह रा आत्मा तिना भविष्यवक्तेया रे था और तिना लोका ते बोलणे लगी रा था कि मसीहे कियों दुःख सईन करना और तिजी ते बाद कियों महिमा दिती जाणी। ईयां तिने लोक ठीक-ठीक ये पता लगाणे खे कि मसीह कुण ऊणा और ये गल्ल कदी ऊणी जांच पड़ताल किती। 12 पर परमेशरे तिना भविष्यवक्ता खे बोलेया कि तिना रा ये संदेश आपू खे निए पर आऊण वाले दिना रे तुसा सबी खे ए। से संदेश यीशुए रे बारे सुसमाचार ए जेतेखे तुसे एबे सुणी चुकी रे। परमेशरे आपणा पवित्तर आत्मा लोका री मताद करने खे स्वर्गो ते पेजेया कि सेयो तुसा खे सुसमाचार सुणाओ। ये सब कुछ इतना नौखा ए कि स्वर्गदूत बी इना गल्ला खे त्यानो साथे देखणे लगी रे।

~~~~~

13 इजी बजअ ते आपणे-आपणे मनो खे एड़ा त्यार करो, जेड़ा लोक काम करने खे आपणा लक वानोए और ओशा रे रई की तेसा कृपा री पूरी उम्मीद राखो, जो परभु यीशु मसीह रे आऊणे रे बखते तुसा खे मिलणे वाली ए। 14 परमेशरो री आज्ञा मानो जियां अच्छे बच्चे आपणे बाओ री आज्ञा मानोए। बुरे काम मत करो जियां तुसे पईले करेया करो थे जेबे परमेशरो खे नि जाणो थे। 15 पर जेड़ा तुसा रा बुलाणे वाला पवित्तर ए, तियाँ ई तुसे बी आपणे सारे चाल-चलणो रे पवित्तर बणो। 16 कऊँकि पवित्तर शास्त्रो रे लिखी राखेया, “पवित्तर बणो, कऊँकि आऊँ पवित्तर ए।”

17 और जबकि तुसे ओ पिता बोली की तेसते प्रार्थना करोए, जो बिना पक्षपातो ते हर एकी रे कामो रे मुताबिक न्याय करोआ, तो जेबे तुसे तरतिया पाँदे परदेशिया रे रूपो रे रणे लगी रे तो परमेशरो खे जरूर आदर देई कि जिन्दगी बिताओ। 18 कऊँकि तुसे जाणोए कि तुसा रा नकम्मा चाल-चलण, जो बाप-दादेया ते चलदा आओआ, तिजी ते तुसा रा छुटकारा सुईने-चाँदी, मतलब-नाश ऊणे वालिया चीजा रे जरिए नि ऊआ। 19 पर निर्दोष और निष्कलंक मिन्द, मतलब-मसीह रे किमती खूनो रे जरिए ऊआ। 20 एसा दुनिया खे बनाणे ते बऊत पईले ई परमेशरे यीशु मसीह खे उद्धारकर्ता रे रूपो रे टराया। पर से आखरी जुगो रे तुसा री पलाईया खे प्रगट ऊआ। 21 कऊँकि यीशु मसीहे जो कितेया तेसरे जरिए एबे तुसे परमेशरो पाँदे विश्वास करोए, जिने से मरे रेया बीचा ते जिऊँदा कितेया और महिमा दिती, ताकि तुसा रा विश्वास और उम्मीद परमेशरो पाँदे ओ।

22 कऊँकि तुसे सच्चाईया खे मानणे रे जरिए पापो ते पवित्तर करी राखे तेबेई एबे तुसे साफ दिल और तन-मन लगाई की एकी-दूजे साथे प्यार करो। 23 तुसे नयी जिन्दगी परमेशरो री तरफा ते पायी राखी। तुसा लोका री ये जिन्दगी नाशवान बीजो ते नि पर अविनाशी बीजो ते मतलब परमेशरो रे जिऊँदे और सदा टईरने वाले वचनो ते ए। 24 कऊँकि पवित्तर शास्त्र बोलोआ,  
 “हर एक प्राणी काओ जेड़ा ए

और हर एकी री शोभा काओ रे फूलो जेड़ी ए,

काआ सूकी जाओआ और फूल चढ़ी जाओआ,

25 पर परभुए रा वचन जुगो-जुगो तक टीके रा रणा”

और ये वचन यीशु मसीह रा सुसमाचार ए, जो तुसा खे सुणाया था।

## 2

~~~~~

1 इजी री खातर तुसे लोक सब प्रकारा रा बुरा बर्ताव छाड़ी देओ। ओरी खे तोखा नि देओ, कपट्टी नि बणो। ओरी लोका ते जलन नि करो और ओरी री बुराई नि करो। 2 बल्कि नये जम्मे

रे बच्चे जेड़े साफ आत्मिक दूदो री उम्मीद करो, ताकि तेसरे जरिए उद्धार पाणे खे बड़दे जाओ।

3 जिंयां कि पवित्र शास्त्र बोलोआ, “तुसे स्वाद चाखी की जाणी ला रा कि प्रभु अच्छा ए।”

4 एबे तुसे यीशु मसीह गे आयी रे। से परमेशरो रे मन्दरो रा जिऊंदा पात्थर ए, जो मांणुए नकम्मा ठराई की निकयाली ता, पर से परमेशरो रा चूणे राए और से तेसखे बऊत किमती ए।⁵ तुसे आपू बी जिऊंदे पात्थरो जेड़े आत्मिक कअर बणदे जाओए, जेते साथे पुरोईता रा पवित्र समाज बणी की एड़े आत्मिक बलिदान चढाओ, जो प्रभु यीशु मसीह रे जरिए परमेशरो खे पसंद ओ।⁶ इजी बजअ ते पवित्र शास्त्रो रे बी लिखी राखेया,

“देखो, आऊँ सिय्योने दे कूणे रे सिरे रा चूणे रा

और किमती पात्थर लगाऊँआ

और जेस कसी तेस पाँदे विश्वास करना,

से कियौं बी शर्मिंदा नि ऊणा।”

7 तो तुसा खे जो विश्वास करोए, से पात्थर तो किमती ए, पर जो विश्वास नि करदे तिना खे

“जो पात्थर राजमिस्त्रए नकम्मा ठराया था,

सेई कूणे रा सिरा ऊईगा।”

8 और फेर पवित्र शास्त्र ये बी बोलोआ,

“ठेस लगणे रा पात्थर,


लोका खे टोकर खाणे री चट्टान ऊईगी।”

कऊँकि सेयो तो वचन ना मानी की टोकर खाओए और इजी खेई सेयो ठराए बी थे।


9 पर तुसे एक चूणे रा वंश और राजपदधारी, पुरोईता रा समाज, पवित्र लोक और परमेशरो री निज प्रजा ए, इजी री खातर जिने तुसे न्हैरे ते आपणी नऊखी जोतिया रे बुलाए, तेसरे गुण सामणे ल्याओ।¹⁰ पईले तो तुसे परमेशरो री प्रजा नि थे, पर एबे तेसरी प्रजा ए। पईले तो तुसा पाँदे दया नि ऊई थी, पर एबे तुसा पाँदे दया ऊई री।



11 ओ प्यारओ, आऊँ तुसा ते विनती करूँआ कि तुसे आपणे आपू खे परदेशी और यात्री जाणी की तेसा दुनिया री बुरी इच्छा ते जो आत्मा साथे युद्ध करोई, बचे रे रओ।¹² दुजिया जातिया बीचे तुसा रा चाल-चलण खरा ओ, कऊँकि जिना-जिना गल्ला रे सेयो तुसा खे कुकर्मी जाणी की बदनाम करोए, सेयो तुसा रे पले कामा खे देखी की तिना पले कामा री बजअ ते तिना रे आऊणे रे दिने परमेशरो री महिमा करो।



13 प्रभु यीशुए री ये इच्छा ए कि मांणुआ रे जरिए ठराए रे हर शासको रे अधीन रओ; राजे रे इजी खे कऊँकि से सबी रा प्रदान ए।¹⁴ और राज्यपालो रे बी अधीन रओ, कऊँकि से बुरे काम करने वालेया खे सजा देणे और खरे काम करने वालेया री तारीफ करने खे तेसरी तरफा ते पेजी राखे।¹⁵ कऊँकि परमेशर तुसा ते ए चाओआ कि तुसे खरे काम करने रे जरिए तिना मूर्ख लोका रे मुँओ खे बन्द करी देओ जो अज्ञानता री गल्ला बोलोए।¹⁶ तुसे लोक एबे पापो रे गुलाम निए कऊँकि प्रभु यीशुए तुसे पईले ई पापो ते आजाद करी ते रे। पर एसा आजादिया खे आपणे आपू खे बुराईया री आइ नि बणाओ। पर अच्छे काम करी की ये दखाओ कि तुसे सच्ची ई परमेशरे रे दास ए।¹⁷ सबी रा आदर करो, विश्वासी पाईया साथे प्यार राखो, परमेशरो ते डरो, राजे रा सम्मान करो।



18 ओ गुलाम विश्वासियो, हर प्रकारो ते पूरे आदरो साथे आपणे मालका रे अधीन रओ और ना बस अच्छे और पले मालका रे अधीन रओ, पर बुरे मालका रे बी अधीन रओ।¹⁹ कऊँकि जे कोई परमेशरो रे बारे रे ये सोची की कि परमेशरो री येई इच्छा ए अन्याय ते दुःख उठांदा ऊआ क्लेश सईन करोआ, तो ये तिना खे अच्छा लगेओ।²⁰ कऊँकि जे तुसे अपराध करी की मुक्के खाए और सव् राखेया, तो तिदे बडयाईया री क्या गल्ल ए? पर जे खरे काम करी की दुःख उठाओए और

सबर राखोए, तो ये परमेशरो खे अच्छा लगोआ। ²¹तुसे इजी खेई बुलाई बी राखे, कऊँकि मसीह बी तुसा री खातर दुःख उटाई की तुसा खे एक आदर्श देई गा रा ताकि तुसे बी तेसरे चिह्नो पाँदे चलो।

²²ना तो तिने पाप कित्तेया

और ना ई तेसरे मुँओ ते कोई छुलो री गल्ल निकली।

²³से गाली सुणी की गाली नि देओ था और दुःख उटाई की केसी खे बी तमकी नि देओ था, पर आपू खे सच्चा न्याय करने वाले रे आथो रे सम्बालो था। ²⁴जेबे मसीह मरेया तिने करूसो पाँदे आसे रे पापो री खातर सजा सईन कित्ती। तिने एड़ा इजी खे कित्तेया ताकि आसे पाप करना छाडी देईए और धार्मिकता खे जिऊणा शुरू करिए। तेसरे ई जख्मा साथे तुसे ठीक ऊए। ²⁵पईले तुसे लोक पटकी रिया पेडा जेडे थे, पर एबे तुसे आपणे प्राणो रे रखवाले और चरवाहे यीशु मसीह गे वापस आईगे रे।

3



¹ओ लाडियो! ईयां तुसे बी आपणेया लाड़ेया रे अधीन रओ। ताकि जे इना बीचा ते किने बी सुसमाचारो पाँदे विश्वास नि करी राखेया ओ तो सेयो तुसा रे कुछ बोले बिना ई तुसा रे सबाओ रे जरिए विश्वासो रे आयी सकणे, ²कऊँकि सेयो तुसा रे पवित्तर चाल-चलण और अच्छे सबाओ खे देखे रओए। ³तुसा रा शर्गार दखाऊटी नि ओ, जियां लग-लग किस्मा ते बाल गूँदणा, सुईने रे गईणे या कईया प्रकारा रे टाले पईनणा। ⁴बल्कि तुसा री छिपी री गुप्त इनसानियत, नरमाई, मनो री दीनता री अविनाशी सजाऊटा ते सज्जी री रओ, कऊँकि परमेशरो री नजरा रे इजी री कीमत बडी ए। ⁵पईलके जमाने रे पवित्तर जवाणसा बी, जो परमेशरो पाँदे उम्मीद राखो थिया, आपू खे ईयां ई सजाओ थिया और आपणे-आपणे लाड़ेया रे अधीन रओ थिया। ⁶जेडी सारा अब्राहमो री आज्ञा रे रओ थी और तेसखे स्वामी बोलो थी। तो जे तुसे बी खरा करो और केसी बी डरो ते नि डरो, तो तेसरी बेटिया ठईरनियां।

⁷तियां ई ओ लाड़ेयो, तुसे बी आपणी-आपणी लाडिया साथे समजदारिया ते जिन्दगी जिओ। तुसे ये याद राखो कि सेयो तुसा ते कमजोर ऊई सकोईया, इजी खे तुसे तिना रा आदर करो। कऊँकि तुसे दोनो तेस बरदानो रे इस्सेदार ए जो परमेशरे कृपा ते देई राखेया, और से बरदान अनन्त जिन्दगी ए। एड़ा ई करो ताकि परमेशर तुसा री प्रार्थना खे सुणो।



⁸आखरी रे ये कि तुसे सब के सब एक मन, दयालु, पाईचारे रा प्यार राखणे वाले, करूणामय और नम्र बणो। ⁹बुराईया रे बदले बुराई नि करो और ना गालिया रे बदले गाली देओ, पर इजी रे बदले आशीष ई देओ। परमेशरे तुसे इजी खे बुलाई राखे कि तुसे ओरी खे आशीष देओ। जे तुसे एड़ा करोगे तो परमेशरो तुसा खे बी आशीष देणी। ¹⁰कऊँकि पवित्तर शास्त्र बोलोआ,
“जो कोई जिन्दगिया री इच्छा राखोआ
और खरे दिन देखणा चाओआ,
से आपणी जीबा खे बुराईया ते

और आपणेया ओटा खे छल-कपटो रिया गल्ला करने ते रोकी की राखो।

¹¹से बुराईया रा साथ छाडो और पलाई ई करो,
से मेल-जोलो खे टोलो और तिजी री कोशिश रे रओ।


¹²कऊँकि प्रभुए री आखी तमिया पाँदे लगी री रओईया
और तेसरे कान तेसरी प्रार्थना री तरफा खे लगे रे रओए,
पर प्रभु बुराई करने वालेया ते दूर रओआ।”

¹³जे तुसे सदा पलाई करने रे आगे रओगे, तो तुसा री बुराई करने वाला कोई नि रणा? ¹⁴जे तुसे सच्ची ई धार्मिकता रे कामो री बजअ ते दुःख उटाओए, तो तुसे धन्य ए। जेडा कि यशायाह भविष्यबक्ता लिखोआ, “तिना लोका ते नि डरो जो तुसा खे तमकाओए और तिना गल्ला ते नि डरना

कि तिना लोका क्या करना।" 15 पर मसीह खे आपणे दिलो रे आदरो साथे परभुए रे रूपो रे बसाई लओ। जे कोई तुसा ते तुसा री उम्मीदा रे बारे रे कुछ पूछो जेतेरे आसे सब विश्वासी इस्सेदार ए, तो तेसखे जवाब देणे खे सदा त्यार रओ। 16 पर ये नरमाईया रे और डरो साथे करो और आपणा विवेक बी साफ राखो। ताकि जिना गल्ला रे बारे रे, तुसा री बेज्जती ओई, तिना रे बारे रे सेयो जो मसीह दे तुसा रे खरे चाल-चलणो री बेज्जती करोए, शर्मिदा ओ। 17 कऊँकि जे परमेशरो री येई इच्छा ए कि तुसे पलाई करने री बजअ ते दुःख उठाओ, तो ये बुराई करने री बजअ ते दुःख उठाणे ते खरा ए।

18 आँऊ ये इजी खे बोलूँआ कऊँकि मसीहे बी दुःख सईन कित्तेया और आसा रे पापो री खातर मरेया। से एक ई बार मरेया और इजी खे दुराणे री जरूरत निए। से एक तर्मी मांणू था जो पापिया री खातर मरेया ताकि आसा खे परमेशरो गे पऊँछाओ। से शरीरो ते तो काई ता, पर आत्मा ते जिऊँदा कित्तेया। 19 तेबे तेसरी आत्मे जाई की तिना कैदी आत्मा खे प्रचार कित्तेया जेतेखे परमेशरे तेते जगा रे कैद करी राखेया जेती मरे रे लोका री आत्मा ए। 20 ये सेई आत्मा ए जेसे तेस बीते रे बखतो रे परमेशरो री आज्ञा नि मानी। जेबे नूह आपणा जाहूज बनाणे लग्यो रा था तेस बखते परमेशर सबरो साथे ये देखणे खे इन्तजार करने लग्यो रा था कि यो लोक आपणा मन फिराओए कि नि। पर तेस जाहूजो रे सिर्फ आठ लोक ई खतरनाक जलप्रलय रे डूबणे ते बची सके। 21 से पाणी बपतिस्मे रा चिह्न ए जो एवे तुसा खे बी बचाओआ। बपतिस्मे रा मतलब शरीरो रा मईल तोणा नि बल्कि साफ दिलो ते आपू खे परमेशरो गे सम्बालना ए। पर ये बपतिस्मा यीशु मसीह रे मरे रेया बीचा ते जिऊँदे ऊणे रे जरिए आसा रा उद्धार करोआ। 22 और यीशु मसीह स्वर्गो रे जाई की परमेशरो रे दाँणे कनारे बैठी गा और स्वर्गदूत, अधिकारी और सामर्थी तेसरे अधीन करी ते।

4



1 इजी री खातर जेबे मसीहे आपणे शरीरो रे ऊई की दुःख उठायो, तो तुसे बी सेई इच्छा राखी की दुःख सईन करने खे त्यार रओ। कऊँकि जे तुसे मसीह खे दुःख सईन करने खे त्यार ओ, तो तुसे पाप करना छाडीता। 2 ताकि आऊणे वाले बखतो रे आपणा बाकि शारीरिक जीवन, मांणूआ री बुरी इच्छा रे मुताबिक नि, बल्कि परमेशरो री इच्छा रे मुताबिक बिताओ। 3 तुसे पईले ई आपणा बऊत बखत दुजिया जातिया जेडा बुरी इच्छा रे मुताबिक काम करने रे बबांद करी ता। सेयो बुरे काम ये ए लुचपणो री बुरी इच्छा, मतवालापण, लीलाकुरीडा, शराबी और घृणित मूर्तिपूजा, सेई बऊत ऊआ। 4 इजी री खातर सेयो हैरान ओए कि तुसे एडे पारी लुचपणो रे तिना रा साथ नि देंदे। तेबेई एवे सेयो लोक तुसा खे बुरा-पला बोलोए। 5 पर तिना लोका खे जिऊँदे और मरे रेया रा न्याय करने वाले परमेशरो खे आपणे चाल-चलणो रा लेखा देणा पड़ना। 6 येई बजअ ए कि मरे रेया खे बी मसीह रा सुसमाचार सुणायो। ताकि शरीरो रे तो मांणूआ रे मुताबिक तिना रा न्याय ओ, पर आत्मा रे सेयो परमेशरो रे मुताबिक जिऊँदे रओ।



7 सबी गल्ला रा अंत चट ऊणे वाला ए। इजी री खातर ओशा रे रओ और सबर राखो और प्रार्थना करदे रओ। 8 सबी ते बड़ी गल्ल तो ये ए कि एकी-दूजे ते जादा प्यार राखो, कऊँकि प्यार कई पापो खे टखी देओआ। 9 बिना कुडकुड़ाए एकी-दूजे री आओ-बैठ करो। 10 हर एकी खे परमेशरे ते बरदान मिली रा, से तेस बरदानो रा इस्तेमाल ओरी री मताद करने खे करो। सेयो इना बरदाना रा इस्तेमाल परमेशरो रे एक अच्छे दासो रे रूपो रे करो। 11 जे केसी खे प्रचार करने रा बरदान ए तो सेयो परमेशरो रा वचन प्रचार करो। जे केसी खे ओरी लोका री मताद करने रा बरदान ए तो सेयो तिजी खे तेसा शक्तिया साथे करो, जो परमेशर तिना खे देओआ। तेबे जो कुछ बी तुसे लोक करोगे तिजी ते यीशु मसीह रे जरिए परमेशरो खे महिमा मिली जाणी। सारी महिमा और सामर्थ जुगो-जुगो तक तेसरी ईए। आमीन।

~~~~~

12 ओ प्यारेओ, जो खतरनाक दुःख तुसे सईन करने लगी रे इजी ते हैरान नि ओ कऊँकि तुसे यीशु मसीह रे ओ। पर यो गल्ला ये दखाणे खे तुसा पाँदे इजी खे ऊणे लगी रिया कि तुसे परमेशरो पाँदे विश्वास करोए कि नि। इजी खे एड़ा नि सोचो कि तुसा साथे कुछ नौखा ई ऊणे लगी रा। 13 पर जियाँ-जियाँ मसीह रे दुःखो रे शामिल ओए, खुशी मनाओ। इजी बजअ ते जेबे जेस दिने यीशु मसीह सबी लोका पाँदे आपणी महिमा परकट करने वापस आऊणा तो सच्चो खेई तुसे बऊत खुश और मग्न ऊई जाणे। 14 जे मसीह रे नाओ खे तुसा री निन्दा करोए, तो धन्य ए। कऊँकि महिमा रा आत्मा, जो परमेशरो रा आत्मा ए, तुसा पाँदे छाँयाँ करोआ। 15 तुसा बीचा ते कोई माणू अत्यारा, चोर, बुरा काम करने वाला या ओरी रे कामो रे आथ पाणे री बजअ ते दुःख नि पाओ। 16 पर जे मसीह ऊणे री बजअ ते दुःख पाओ, तो शर्मिंदा नि ओ, पर इजी गल्ला खे परमेशरो री तारीफ करो। 17 कऊँकि से बखत आईगा रा कि पईले परमेशरो रे लोका रा न्याय कित्तेया जाओ और जबकि न्याय री शुरूआत आसा तेई ऊणी, तो तिना रा क्या अंत ऊणा, जो परमेशरो रे सुसमाचारो खे नि मानदे? 18 जेड़ा कि पवित्र शास्त्र बोलीआ,

“जे तर्मी माणू ई मुश्किला ते उद्धार पाओगा,

तो बिना भगित वाले और पापिया रा क्या टकाणा?”

19 इजी री खातर जो परमेशरो री इच्छा रे मुताबिक दुःख उठाओए, सेयो पला करदे ऊए आपणे-आपणे प्राणो खे विश्वासो जोगे आपणे बनाणे वाले परमेशरो रे आथो रे सम्बाली देओ।

## 5

~~~~~

1 ओ साथो बुजुर्गो, कुछ और गल्ल बी ए जो आँऊ तुसा खे बोलणा चाँऊआ कऊँकि आँऊ बी तुसा जेड़ा एक बुजुर्ग ए। मसीहे जो दुःख सईन कित्तेया आँऊ आपू तिजी रा गवा ए। जेबे से वापस आऊणा तो आँऊ बी तेसरी महिमा रा इस्सेदार ऊणा। साथी बुजुर्ग ऊणे रे नाते आँऊ तुसा ते बिनती करूँआ: 2 जियाँ पेडा चराणे वाला आपणी पेडा री रखवाली करोआ तियाँ ई तुसे बी परमेशरो रे तेस चूण्डो री रखवाली करो जो परमेशरे तुसा गे सम्बाली राखेया। ये काम आपणी इच्छा ते करो ना की केसी रे दबाओ ते। कऊँकि परमेशर बी येई चाओआ। ये काम नीच कमाईया खे नि करो, पर ये काम परमेशर और लोका री सेवा करने री इच्छा ते करो। 3 जो लोक तुसा गे सम्बाली राखे, तिना पाँदे अक्क नि जमाओ, बल्कि चूण्डो खे आदर्श बणो। 4 जेबे यीशु मसीह आसा रा प्रदान रखवाला वापस आऊणा तो तुसा खे महिमा रा मुकट देणा, जो मुरजाणा नि।

5 ईयाँ ई ओ नौजवानो, तुसे बी बुजुर्ग लोका रे अधीन रओ। तुसे सब के सब एकी-दूजे री सेवा खे दीनता साथे आपणा लक बानो, कऊँकि “परमेशर कमण्डिया रा बरोद करोआ,

पर जो दीन ए तिना पाँदे कृपा करोआ।”

6 इजी री खातर परमेशरो रे तागतबर आथो निटे आपू खे दीन बणाई की राखो ताकि से तुसा खे ठीक बखत आऊणे पाँदे बड़ाओ। 7 आपणी सारी चिन्ता तेस पाँदे ई सेटी देओ, कऊँकि से तुसा रा त्यान राखोआ।

8 ओशा रे रओ और जागदे रओ, कऊँकि तुसा रा बिरोदी शैतान, गर्जणे वाले शेर जेड़ा, इजी ताका रे रओआ कि केसखे फाड़ी की खाऊँ। 9 विश्वासो रे मजबूत ऊई की तुसे जरूर तेसरा बरोद करो। याद राखो कि तुसा रे विश्वासी पाई जो एते दुनिया रे जेती-केथी बी रओए, ईयाँ ई सेयो बी दुःख पुगतणे लगी रे।

10 एबे परमेशर जो सारी कृपा रा दाता ए, जिने तुसे मसीह रे आपणी अनन्त महिमा खे बुलाए, तुसा रे थोड़ी देर दुःख उठाणे ते बाद आपू ई तुसे सिद्ध और स्थिर और तागतबर करने। 11 तेसरा ई राज्य जुगो-जुगो तक रओ। आमीन।

~~~~~

12 मैं छोटी जी ये चिट्ठी लिखी और सिलवानुसो री मतादा ते ये तुसा गो पेजी। आँऊ तेसखे जाणुंआ से मसीह रे विश्वासो जोगा पाई ए। ये चिट्ठी लिखणे रा मेरा मकसद ये ए कि आँऊ तुसा खे औसला और परोसा दलाऊँआ कि तुसे लोक जो महसूस करोए से परमेशरो री सच्ची कृपा ए। एसा कृपा रे मजबूतिया ते बणे रे रओ। 13 बेबीलोन नगरो रे विश्वासी लोक जो तुसा ई जेड़े परमेशरो रे चूणे रे लोक ए, तिना री तरफा ते तुसा खे नमस्कार। मरकुस जो मेरे पाऊए जेड़ा ए तेसरी तरफा ते बी तुसा खे नमस्कार। 14 प्यारो साथे गले लगी की एकी-दूजे खे नमस्कार बोलो। आँऊ प्रार्थना कहुँआ कि तुसा सबी खे जो मसीह रे ए, शान्ति मिलदी रओ।

## 2 पतरस पतरसो री लिखी री दूजी चिट्ठी भूमिका

पतरसो री पईली चिट्ठी शुरूओ रे मसीहिया रे एक बऊत बड़े समुदाय रे नाओं लिखी थी। एते चिट्ठिया री खास चिन्ता रा विषय चूटे शिक्षका रे काम और तिना री शिक्षा ते पैदा बुरे चाल-चलणो रे खलाफ संघर्ष करना ए। इना समस्या रा उत्तर परमेशर और प्रभु यीशु मसीह रे सच्चे ज्ञानो रे बणे रे रणे ते मिलोआ, से ज्ञान जो तिना लोका रे जरिए पऊँछाई राखेया, जिने आपू प्रभु यीशु देखेया और तेसरी शिक्षा खे सुणेया। लेखक खास करी की तिना लोका रिया शिक्षा ते चिन्तित ए जो दावा करोए कि मसीह दुबारा ते वापस नि आऊणा। लेखक बोलीआ कि एड़ा लगेओ कि मसीह रे आऊणे रे देर ऊणे लगी री, पर सच्ची एड़ा इजी खे ऊणे लगी रा कऊँकि परमेशर नि चांदा कि कोई नाश ओ, बल्कि ये चाओआ कि सबी खे मन फेरने रा मौका मिलो।

??????

भूमिका 1:1, 2

मसीही बुलाहट 1:3-21

चूटे शिक्षक 2:1-22

मसीह रा आऊणा 3:1-18

??????

1 आँऊ शमोन पतरस एसा चिट्ठिया खे लिखणे लगी रा, जो यीशु मसीह रा दास और प्रेरित ए। ये चिट्ठी आँऊ तिना सबी लोका खे लिखणे लगी रा जिने म्हारे परमेशर और उद्धारकर्ता यीशु मसीह री धार्मिकता रे जरिए आसा जेड़ा बऊत किमती विश्वास पाई राखेया। 2 आँऊ प्रार्थना करूँआ कि जियां तुसे परमेशर और म्हारे प्रभु यीशु मसीह रे ज्ञानो रे बड़दे जाओए, परमेशर तुसा लोका खे ओर बी जादा कृपा और शान्ति देंदा रओ।

??????

3 परमेशरे आपणी ई सामर्था रे जरिए आसा खे से सब कुछ देई राखेया जो ईश्वरीय जिन्दगी जिऊणे खे जरूरी ए। आसे परमेशरो खे जाणूए और तिने ई आसे सब आपणे लोक करी की आपणी महिमा और अच्छे इरादे रे मुताबिक बुलाए। 4 परमेशरे आसा सबी खे तेसा ई सामर्था रे जरिए बऊत किमती और बड़े वादे देई राखे। ताकि इना वादे रे जरिए तुसे तिना गान्दे कामो ते छूटी की नठी सको जो दुनिया रे बुरी इच्छा ते ओए और ईश्वरीय सबाओ रे शामिल ऊई जाओ।

5 कऊँकि तुसे ईश्वरीय सबाओ रे शामिल ओ इजी खे सिर्फ तुसे मसीह रे विश्वास करने वाले ई नि बणो पर अच्छे चाल-चलणो ते बी जिओ। तुसे सिर्फ अच्छे चाल-चलणो तेई नि जिओ पर ये बी जाणो कि आसे कियां समजा साथे बर्ताव करिए। 6 तुसे सिर्फ समजा ते बर्ताव करने वाले ई नि बणो पर आपू पाँदे काबू राखणे वाले बी बणो। तुसे सिर्फ आपू पाँदे काबू राखणे वाले ई नि बणो पर दुःखो रे सबर राखणे वाले बी बणो। तुसे सिर्फ दुःखो रे सबर राखणे वाले ई नि बणो पर ईश्वरीय जिन्दगी जिऊणे वाले बी बणो। 7 सिर्फ ईश्वरीय जिन्दगी जिऊणे वाले ई नि बणो पर एकी दूजे री चिन्ता करने वाले बी बणो जियां पाई-बईण एकी दूजे री चिन्ता करोए। सिर्फ एकी दूजे री चिन्ता करने वाले ई नि बणो पर सबी लोका ते प्यार बी राखो। 8 जे तुसा रे यो सब गुण मौजूद ए और जे तुसा रे इना गुणा री बड़ोतर ऊणे लगी री तो इजी री बजअ ते तुसे आसा रे प्रभु यीशु मसीह रे पूरे ज्ञानो रे ना तो नकम्मे ऊणे और ना ई निष्फल ऊणे। 9 पर जेस कसी माणूए रे ये गुण मौजूद निए

तो से अन्दा ए या तेसखे तूँदला दिखोआ । से पूली चुकी रा कि परमेशरे तेसरा से सारा पाप माफ करी ता रा जो तिने मसीह रे आऊणे ते पईले करी राखेया था ।

10 इजी बजअ ते ओ साथी विश्वासियो, आपणे बुलाए जाणे और चूणे जाणे खे साबित करने खे ठीक-टंगो रे कोशिश करदे रओ । जे तुसे एड़ा करदे रओगे, तो कदी बी बाटा ते नि पटकणे । 11 ईयाँ ई तुसा रा म्हारे प्रभु और उद्धारकर्ता यीशु मसीह रे अनन्त कालो रे राज्य रे बडे आदरो साथे स्वागत कितेया जाणा ।

~~~~~

12 हालाँकि तुसे इना गल्ला खे जाणो ईए और मसीह री एसा सच्ची शिक्षा रे, जो तुसा खे सखाई राखी, तुसे बणे रे रओए । तेवे बी आऊँ तुसा खे इना गल्ला री याद दलाणे खे सदा त्यार रऊँगा ।

13 जदुओ तक आऊँ एस शरीर रूपी डेरे रे जिऊँदा ए तदुओ तक तुसा लोका खे याद दलाई की सावधान करना आपणी जिम्मेवारी समजूँआ । 14 कऊँकि आऊँ ये जाणुँआ कि आसा रे प्रभु यीशु मसीह रे बोले रे वचनो रे मुताबिक मेरे मरने रा बखत नेडे आईगा रा । 15 इजी री खातर मां एड़ी कोशिश करनी कि मेरे मरने ते बाद तुसे इना सबी गल्ला खे याद करी सको ।

~~~~~

16 जेवे आसे प्रेरिते तुसा लोका खे आपणे प्रभु यीशु मसीह री सामर्था रा और तिना रे वापस आऊणे रा संदेशा दितेया था, तो आसे चलाकिया ते गद्दी री मनकइन्त काणियां रा सआरा नि लया था । बल्कि आसे आपू ई आपणी आखी ते तेसरा प्रताप देखेया था । 17-18 पवित्तर पाहूँडो पाँदे तेस बखते आसे तेस साथे थे जेवे पिता परमेशरे तिना खे आदर और महिमा दिती । तेस बखते प्रतापमय महिमा बीचा ते ये आवाज आई, “ये मेरा प्यारा पुत्र ए जेसते आऊँ बऊत खुश ए ।” आसे आपू ई स्वर्गो ते ये आवाज आऊँदे ऊए सुणी ।

19 आसे ये बी जाणुँए कि भविष्यवक्तेया जो वचन मसीह रे बारे लिखी राखेया से एकदम सच ए और आसे तुसा लोका खे मसीह रे बारे रे जो सखाई राखेया था से इजी गल्ला खे साबित करोए । तुसे इना वचना खे आसा रे प्रभु यीशुए रे वापस आऊणे तक त्यानो साथे सुणो, कऊँकि जियाँ दिऊआ लोका खे न्हरे रे सई बाट दखाणे खे प्रयासा देओआ तियाँ ई एस वचनो तुसा खे समजणे रे मताद करनी कि सच क्या ए । तिना रा वापस आऊणा नये दिनो रे प्यागा रे प्रयासे जेड़ा ऊणा और से प्याणु तारे जेड़ा चमकणा । तेस बखते तिना री ज्योति तुसा रे दिलो रे चमकणी और तेस परमेशर तुसा पाँदे साफ-साफ प्रकट करना । 20 पर सबी ते पईले ये समजी लो कि पवित्तर शास्त्रो री कोई बी भविष्यवाणी केसी रे आपणे ई सोचणे ते पूरी नि ऊँदी 21 कऊँकि कोई बी भविष्यवाणी माणुए री इच्छा ते कदी पनि ऊई, पर भविष्यवक्ता पवित्तर आत्मा ते परी की परमेशरो री तरफा ते बोलो थे ।

## 2

~~~~~

1 बऊत दिन पईले जियाँ इस्राएली लोका बीचे चूटे भविष्यवक्ता थे, तियाँ ई तुसा लोका बीचे बी चूटे उपदेशका चूटी शिक्षा देणी । सेयो लोक तुसा बीचे आऊले-आऊले कूसी जाणे और तुसा ते परमेशरो रे बारे रे सर्वनाश करने वाला चूट बोलणा । एथो तक तिना मसीह खे बी आपणे प्रभुए रे रूपो रे मानणे ते ना करनी जिने तिना खे पापो ते छुटकारा देई राखेया । तिना एड़ा काम करी की आपू पाँदे चट ई सर्वनाश ल्याऊणा । 2 बऊत सारे परमेशरो रे लोका तिना चूटे उपदेशका री बुरी शिक्षा मानणी और तिजी रे मुताबिक बुरे काम करने । नतीजन, तिना रे बुरे कामो री बजअ ते ओरी लोका सच्चो री बाटा री निन्दा करनी । 3 ये चूटे उपदेशक बऊत लालची ऊणे और तिना तुसा खे मनकइन्त काणियां बणाई की तोखा देणा कि तुसा ते पैसे कमाई सको । परमेशर पईले तेई तिना लोका खे सजा देणे रा फैसला करी चुकी रा और से ये करने खे त्यार बी ए । परमेशरो पक्का ई तिना लोका रा सत्यानाश करी देणा ।

4 परमेश्वर तिना स्वर्गदूता से बी नि छड़ा डेया जिने पाप करी राखेया था। पर नरको रे पेजी की न्हरे कुण्डो रे पाई की जंजीरा साथे बानी ते। ताकि सेयो न्याय रे दिनो तक कैद रओ।⁵ और नूह रे दिना रे परमेश्वर दुनिया रे दुष्ट लोका पाँदे दया नि कित्ती। पर परमेश्वर महा जलप्रलय ते धार्मिकता रे प्रचारक नूह समेत कुल आठ लोका से बचाई की दुनिया रे सारे लोक नाश करी ते।⁶ और परमेश्वर सदोम और गमोरा रे नगरो से नाशो रा एड़ा दण्ड दित्तेया कि सेयो स्वा करी की स्वाई रे मलाई ते। ताकि सेयो आऊणे वाले बिना भगित्या रे लोका से उदारण बणो⁷ पर तिने सदोम नगरो से नाश करने ते पईले लूत तथा ते जाण दित्तेया जो एक तर्मी माणू था और ईयां से बचाईता। लूत पापिया रे बुरे चाल-चलणो ते बऊत दुःखी था।⁸ लूत जो तर्मी माणू था तिना लोका बीचे रंदे ऊए और तिना रे पापो रे काम देखी-देखी की और सुणी-सुणी की हर दिन आपणे सच्चे मनो से दुःखी करो था।⁹ जबकि परमेश्वर यो सब गल्ला करी राखिया, तो इजी ते साफ पता चलोआ कि परमेश्वर ये जाणोआ कि तर्मिया से कियां परीक्षा ते निकालेया जाओ और अधर्मिया से कियां न्याय रे दिनो तक सजा देण से राखेया जाओ।¹⁰ खास करी की परमेश्वरो तिना चूटे शिक्षका से सजा देणी जो गन्दी इच्छा रे पीछे शरीरो रे मुताबिक चलोए और परमेश्वरो रे अक्को से तुच्छ जाणोए। सेयो टीठ और हठी ए और तेजोमय स्वर्गिय प्राणिया से बुरा-पला बोलणे ते नि डरदे।¹¹ पर एथो तक कि स्वर्गदूत बी जो तिना चूटे शिक्षका ते शक्ति और सामर्था रे बऊत बडी की ए, परभुए रे सामणे तिना तेजोमय स्वर्गिय प्राणिया से पला-बुरा बोली की तिना पाँदे दोष नि लगादे।¹² पर यो चूटे शिक्षक बिना दमाक वाले डांगरा जेड़े ए। सेयो लोक पकड़े जाणे और नाश ऊणे खेई पैदा ऊई रे। जिना गल्ला से सेयो जाणदे ई नि, तिना रे बारे रे ओरी लोका से पला-बुरा बोलोए। पर सेयो आपणे बुरे कामो तेई नाश ऊई जाणे।

13 तिने लोके बुरा करी राखेया और तिना से तिजी रा फल बुरा ई मिलणा। तिना लोका से दिने-त्याड़े सुख-विलास करना खरा लगेओ। सेयो लोक तुसा बीचे कलंक और दोष ए। तिना लोका से तुसा री सभा री पाटटिया रे तुसा साथे खाणे रे बावजूद बी तुसा ते कपटो साथे गल्ला करने रे खुशी मिलोई।¹⁴ सेयो जेसा केसी बी जवाणसा से देखोए तेसा साथे व्याभिचार करना चाओए। सेयो पाप करने ते बिना रूकी नि सकदे। सेयो तिना लोका से तोखा देई की पापो रे पाई देओए जिना रा कमजोर विश्वास ए। कऊँकि तिना री बड़दी ऊई इच्छा री बजअ ते परमेश्वरो तिना से सजा देणी।¹⁵ सेयो सीदी बाटा से छाडी की पटकी गो रे और बओरो रे पाऊ बिलामो री बाटा रिये ऊईगे, जिने पापो री मजदूरी प्यारी जाणी।¹⁶ पर परमेश्वर बिलामो से तेसरे अपराधो री बजअ ते बकेया। एथो तक कि तेसरी अबोल गहूदीए बी माणूए री आवाजा रे से भविष्यवक्ता गलत काम करने ते रोकेया।

17 यो चूटे शिक्षक सुके कुँए और तूफानो रे उड़ाए रे बादल ए, तिना से अनन्त न्हरे ठराई राखेया।¹⁸ जेवे सेयो लोका से उपदेश देओए तो सेयो कमण्डो साथे परिया रिया बेकार गल्ला ते लोका से वासना री शारीरिक इच्छा रे फसाई देओए, जो बाटा ते पटकेया रे लोका बीचा ते एबु ई विश्वासो रे आई रे।¹⁹ सेयो चूटे शिक्षक लोका से आजाद करने रा वादा तो करोए, पर सेयो आपू ई पापी सबाओ री बजअ ते पापो रे दास ए। कऊँकि जो कुछ बी तुसा से आपणे वशो रे करी लओआ तो तुसे तेसरे दास बणी जाओए।²⁰ जे सेयो आसा रे परभु और उद्धारकर्ता यीशु मसीह रे सारे ज्ञानो रे जरिए दुनिया री कई प्रकारा रिया गन्दगिया ते छूटी की निकलने ते बाद फेर तिजी रेई फसी की तिजी रे वशो रे ऊईगे रे तो ये गल्ल साफ ए कि तिना री आज की दशा पिछली दशा ते ओर बी बुरी ऊईगी री।²¹ पला तो येई ऊँदा कि तिना से धार्मिकता री बाटा रा एहसास ऊआ ई नि ऊँदा बजाए एतेरे कि से तिजी से जाणने ते बाद जो पवित्र आज्ञा तिना से सम्बाली थी तिजी ते मूँ फेरी लंदे।²² तिना लोका पाँदे ये कहावत ठीक बैठोई, “कुत्ता आपणी ई कित्ती री ऊल्लिया से फेर खाओआ और नलवाई री सुंरनी चीकड़ो रे लेटणे से फेर चली जाओई।”

1 ओ प्यारेओ, तुसा लोका खे ये मेरी दूजी चिट्ठी ए। इना दूई चिट्ठिया रे जरिए आऊ तुसा खे याद दलाई की तुसा रे साफ मनो खे जगाऊँआ 2 मेरा मकसद ये ए कि तुसे तिना वचना खे याद राखो जो परमेशरो रे भविष्यबक्तेया रे जरिए बऊत पईले तुसा लोका ते बोली राखे। आसा रे प्रभु और उद्धारकर्ता यीशु मसीह री तिना शिक्षा खे बी याद राखो जो प्रेरिता रे जरिए तुसा खे दिक्ती थी।

3 सबी ते जरूरी गल्ल ये ए कि तुसे ये समजी लो कि अंतो रे दिना रे आस्सी और मजाक करने वाले आऊणे, जो आपणी ई बुरी इच्छा रे मुताबिक चलणे। 4 तिना लोका बोलणा, “प्रभुए रे दुवारा आऊणे रा वादा केई गया? कऊँकि आसा रे बुजुर्गा री मौता ते लयी की एबुए तक सब कुछ तेड़ा ईए, जेड़ा सृष्टिया री शुरूआता ते था।” 5 सेयो तो जाणी बूजी की ये पूली गे कि परमेशरो रे वचनो रे जरिए सर्ग पुराणे जमाने ते मौजूद ए और तरती बी पाणिए बीचा ते बणी और तिजी रे चऊँ कनारे पाणी ई पाणी ए। 6 एसी पाणिए रे जरिए तेस जुगो री दुनिया पाणिए रे डूबी की नाश ऊईगी। 7 पर परमेशरे एसी वचनो रे जरिए आजका सर्ग और तरती इजी खेई सम्बाली की राखी राखे, कि तिजी खे आगी साथे फूको। और यो बिना भगित वाले माणूआ रे न्याय और नाश ऊणे रे दिनो तक ईयाँ ई रणे।

8 ओ प्यारेओ, ये एक गल्ल तुसा ते छिपी री नि रओ कि प्रभुए रे कअरे एक दिन हजार सालो रे बराबर ए और हजार साल एक दिनो रे बराबर ए। 9 कुछ लोक सोचोए कि प्रभु वापस आऊणे रे आपणे वादे रे बारे रे देर करने लगी रा। पर प्रभु आपणे वादे रे बारे रे देर नि करदा। बल्कि से तुसा रे बारे रे सब् राखोआ और ये नि चांदा कि कोई नाश ओ, पर ये कि सबी खे पापो ते मन फेरने रा मोका मिलो।

10 पर प्रभुए रा दिन चोरो जेड़ा आऊणा। तेस दिने सर्ग बड़ी-पारी गिड़ने रिया री आवाजा ते नाश ऊई जाणा और तत्व बऊत गर्म ऊई की गली जाणे। तरती और तिजी पाँदले कित्ते रे काम प्रकट ऊई जाणे।

11 कऊँकि परमेशरो यो सब चीजा पक्का ई नाश करी देणियां जेड़ा कि मैं बोली राखेया, तो तुसे पवित् चाल-चलण और भगितया रे ईयाँ जिन्दगी बिताओ जेते की परमेशर खुश ओआ। 12 जेड़ा कि तुसे तेस दिनो रा बड़ी बेसबरिया ते इन्तजार करने लगी रे जेस दिने परमेशर दुनिया रा न्याय करने आऊणा और आपणी तरफा ते कोशिश करो कि से दिन चट आई जाओ। तिना दिना रे सर्ग आगी की गली जाणा और नाश ऊई जाणा और सर्गो रे गण बऊत जादा गर्म ऊई की गली जाणे। 13 पर आसे विश्वासी परमेशरो रे वादे रे मुताबिक एक नये सर्ग और नई तरतिया रा इन्तजार कइए। जिदे सिर्फ तर्मी लोका ई वास करना।

प्यारेओ रे प्यारेओ

14 इजी री खातर ओ प्यारेओ, जबकि तुसे इना गल्ला रा इन्तजार करोए, तो ईयाँ कोशिश करो कि तुसे लोक प्रभुए री नजरा रे निष्कलंक और निर्दोष ठईरो और तुसा रे शान्तिया रा वास ओ। 15 जे आसा रा प्रभु आपणी सईन शीलता री बजअ ते देर करो बी आ तो इजी खे आपणे उद्धारो रे मददगार समजो। ये सेई गल्ल ए जेतेखे म्हारे प्यारे साथी विश्वासी पौलुसे बी तुसा खे परमेशरो रे जरिए दिक्ते रे ज्ञानो रे मुताबिक चिट्ठिया रे लिखी राखेया। 16 तियाँ ई पौलुसे आपणी सबी चिट्ठिया रे बी इना गल्ला री चर्चा करी राखी। तिना चिट्ठिया रे कितणिया गल्ला तो एड़िया ए, जिना रा समजणा कठण ए। अनपढ़ और चंचल लोक तिना री चिट्ठिया री गल्ला खे पवित् शास्त्रो री गल्ला जेड़िया ई खिंजी-खांजी की आपणे ई नाशो री बजअ बणाओए।

17 ओ प्यारेओ, तुसे पइले ई जाणोए कि यो सारिया गल्ला ऊणिया। इजी खे चौकस रओ ताकि दुष्ट लोक तुसा खे आपणी चूटी शिक्षा ते बईकाई की तोखा नि देओ। जे तिना री चूटी शिक्षा खे मानोगे तो तुसा सच्चाईया पाँदे विश्वास करना बन्द करी देणा। 18 बल्कि तुसे लोक म्हारे प्रभु और उद्धारकर्ता यीशु मसीह री कृपा और पछयाणी रे बड़दे जाओ। तेसरी ई महिमा एवे बी ओ और जुगो-जुगो तक ऊँदी रओ। आमीन।

1 यूहन्ना

यूहन्ने री लिखी री पईली चिट्ठी

भूमिका

यूहन्ने री पईली चिट्ठिया रे दो खास मकसद ए: (1) आपणे पढ़ने वालेया खे परमेशर और तेसरे पुत्र यीशु मसीह साथे जिन्दगी बिताणे खे उत्साहित करना। (2) तिना खे चूठी शिक्षा खे मानणे, जेते साथे ये सहभागिता नाश ऊई जाणी, रे खलाफ चेतावणी देणा। ये चूठी शिक्षा एते तारणा पाँदे आधारित थी कि बुराई भौतिक दुनिया रे सम्पर्को रे आऊणे रा नतीजा ओई और इजी री खातर यीशु, परमेशरो रा पुत्र, सच्ची एक माणू ऊई नि सकदा। इना शिक्षको रा दावा था कि उद्धार पाणे खे एक माणूए खे एसा दुनिया ते जुड़ी री गल्ला ते आजाद ऊणा पड़ना और सेयो ये बी सिखाओ थे कि अच्छा चाल-चलण या आपणे पाईए साथे प्यार राखणे जेड़ी गल्ला रा उद्धारो ते कोई रिश्ता नि ए।

एसा शिक्षा रे खलाफ लेखक स्पष्ट रूपो रे ये बताओआ कि यीशु मसीह एक असली माणू था और से एते गल्ला पाँदे जोर देओआ कि सेयो जो यीशु मसीह पाँदे विश्वास करोए और परमेशरो साथे प्यार राखोए, जरूर एकी-दूजे साथे बी प्यार राखो।

२२२-२२२२

भूमिका 1:1-4

जोति और न्हेरा 1:5; 2:29

परमेशरो री ल्वाद और शैतानो री ल्वाद 3:1-24

सच और चूठ 4:1-6

प्यारो रा फर्ज 4:7-21

विजयी विश्वास 5:1-21

२२२२२२२२ २२ २२२

1 आस एक एडे माणू रे बारे रे लिखणे लगी रे जो जीवनों रा वचन ए। जो सृष्टिया रे शुरूओ ते था। से आसे सुणेया और आसे आपणी आखी ते देखेया, बल्कि से आसे त्यानो साथे देखेया और आपणे ई आथो साथे छूँया।² से जो जीवन देओआ, तरतिया रे आया और आसे से देखेया और तिजी री गवाई देऊँए और तुसा खे तेस अनन्त जीवनो रा समाचार सुणाऊँए, जो पिते साथे था और आसा पाँदे पूरगट ऊआ।³ जो कुछ आसे देखी राखेया और सुणी राखेया, तिजी रा समाचार तुसा खे बी सुणाऊँए, ताकि तुसे बी आसा साथे शामिल ओ। आसा री ये शामिलता पिते साथे और तेसरे पाऊ प्रभु यीशु मसीह साथे ए।⁴ इना गल्ला आसे इजी री खातर लिखूँए, ताकि म्हारी खुशी पूरी ऊई जाओ।

२२२२२२ २२ २२२

5 जो समाचार आसे यीशुए ते सुणेया और तुसा खे सुणाऊँए से ये कि परमेशर जोति ए और तिजी रे कोई बी न्हेरा नि ए।⁶ जे आसे बोलिये कि परमेशरो साथे आसा री संगति ए और फेर न्हेरे रे चलूँ, तो आसे चूठे ए और सच्चो पाँदे नि चलदे।⁷ पर जेड़ा परमेशर जोतिया रे ए, तियाँ ई आसे बी जोतिया रे चलि ए, तो आसे एकी-दूजे री संगतिया रे शामिल ए और तेसरे पुत्र प्रभु यीशु मसीह रा खून आसा खे सारे पापो ते शुद्ध करोआ।

8 जे आसे बोलिये कि आसा रे कुछ बी पाप नि ए, तो आपणे आपू खे तोखा देऊँए और आसा रे सच नि ए।⁹ जे आसे आपणे पापो खे मानी लऊँ, तो से म्हारे पाप माफ करने और आसा खे सारेया पापो ते शुद्ध करने रे विश्वासो जोगा और तर्मी ए।¹⁰ जे आसे बोलिये कि आसे पाप नि ए किन्ते रा, तो परमेशरो खे चूठा ठराऊँए और तेसरा वचन आसा रे नि ए।

2

११११ १११११ १११११

1 ओ मरे बालको! आऊँ इना गल्ला तुसा खे इजी खे लिखूँआ, ताकि तुसे पाप नि करो। जे कोई पाप करो, तो पिता परमेशरो गे एक म्हारा मददगार ए, मतलब यीशु मसीह जो तर्मी ए।² और सेई म्हारे पापो खे बलिदान ए और बस म्हारे ई नि, बल्कि सारी दुनिया रे लोका रे पापो रा बी।

3 जे आसे परमेशरो री आज्ञा खे मानूँगे, तो तिजी ते आसा खे पता लगी जाणा कि आसे तेसखे जाणूँए।⁴ जो कोई ये बोलोआ, “आऊँ तेसखे जाणी गा रा” और तेसरी आज्ञा खे नि मानदा, से चूटा ए और तेसरे सच नि ए।⁵ पर जो कोई परमेशरो रे वचनो पाँदे चलो, तेसरे सच्ची परमेशरो रा प्यार सिद्ध ऊई रा। आसा खे इजी तेई पता चलोआ कि आसे तेसरे ए।⁶ जो कोई ये बोलोआ कि आऊँ तेसरे बणेया रा रऊँआ, तेसखे चाईयो कि आपू बी तेडा ई चलो, जेडा यीशु मसीह चलोआ।

१११ १११११

7 ओ प्यारे साथी विश्वासियो! आऊँ तुसा खे कोई नई आज्ञा नि लिखदा, पर सेई पुराणी आज्ञा, जो शुरूओ ते तुसा खे मिली री; ये पुराणी आज्ञा से वचन ए, जो तुसे सुणी राखेया।⁸ फेर आऊँ तुसा खे नई आज्ञा लिखूँआ और ये तो मसीह रे और तुसा रे सच्ची ठईरोई, कऊँकि न्हारा मिटदा जाओआ और सच्चो री जोति एबु चमकणे लगी री।

9 जो कोई ये बोलोआ, “आऊँ जोतिया रे चलूँआ,” पर आपणे विश्वासी पाईए साथे बैर राखोआ, से एबुए तक न्हरे रेई चलोआ।¹⁰ जो कोई आपणे पाईए साथे प्यार राखोआ, से जोतिया रे चलोआ और टाकर नि खाई सकदा।¹¹ पर जो कोई आपणे पाईए साथे बैर राखोआ, से न्हरे रे ए और न्हरे रे चलोआ और ये नि जाणदा कि केयी चली रा, कऊँकि न्हरे तेसरिया आखी अंदिया करी ती रिया।

12 ओ बालको! आऊँ तुसा खे इजी खे लिखूँआ कि यीशु मसीह रे नाओं ते तुसा रे पाप माफ ओ।¹³ ओ पिताओ! आऊँ तुसा खे इजी खे लिखूँआ कि जो सृष्टिया ते ए, तुसे तेसखे जाणोए। ओ जवानो! आऊँ तुसा खे इजी खे लिखूँआ, कऊँकि तुसे तेस दुष्टो पाँदे जय पाई राखी। ओ बालको! मैं तुसा खे इजी खे लिखी राखेया कऊँकि तुसे पिते खे जाणी गे रे।¹⁴ ओ पिताओ! मैं तुसा खे इजी खे लिखी राखेया कि जो सृष्टिया ते ए, तुसे तिजी खे जाणी गे रे। ओ जवानो! मैं तुसा खे इजी खे लिखी राखेया कि तागतवर ओ और परमेशरो रा वचन तुसा रे बणेया रा रओआ और तुसे तेस दुष्टो पाँदे जय पाई।

१११११ ११ १११११ ११ १११

15 तुसे ना तो दुनिया ते ओर ना ई दुनिया रिया चीजा ते प्यार राखो, जे कोई दुनिया ते प्यार राखोआ, तो तेसदे पिता परमेशरो रा प्यार नि ए।¹⁶ कऊँकि जो कुछ दुनिया रे ए, मतलब-शरीरो री इच्छा, आखी री इच्छा, कमाईया रा कमण्ड, से पिता परमेशरो री तरफा ते नि ए, बल्कि दुनिया री तरफा तेईए।¹⁷ दुनिया और तेसा री इच्छा दोनो मिटदी जाओई, पर जो परमेशरो री इच्छा पाँदे चलोआ, से सदा बणेया रा रणा।


११११ १११११

18 ओ बालको! ये आखरी बखत ए और जेडा तुसे सुणी राखेया कि मसीह रा बिरोदी आऊणे वाला ए, तिजी रे मुताबिक एबु बी बऊत सारे मसीह रे बिरोदो रे उठी रे, इजी ते आसे जाणूँए कि ये आखरी बखत ए।¹⁹ सेयो मसीह बिरोदी तो आसा बीचा तेई निकले, पर सेयो आसा रे नि थे। कऊँकि जे आसा बीचले ऊँदे, तो आसा साथे रंदे, पर निकली इजी खे गये कि ये प्रगट ओ कि सेयो सब आसा बीचले नि ए।

20 पर तुसा रा अभिषेक तो तेस पवित्र यीशु मसीह रे जरिए ऊई रा और तुसे सब सच जाणोए।²¹ मैं तुसा खे इजी खे नि लिखेया कि तुसे सच्चो खे नि जाणदे, पर इजी खे कि तिजी खे जाणोए और इजी खे कि कोई चूट सच्चो री तरफा ते नि ए।²² चूटा कुण ए? बस से, जो प्रभु यीशुए रे मसीह ऊणे रा ना करोआ और मसीह रा बिरोदी सेईए, जो पिता परमेशर और पुत्रो खे ना करोआ।²³ जो कोई पुत्रो खे ना करोआ, तेसगे पिता परमेशर पनि ए, जो पुत्रो खे मानी लओआ, तेसगे

पिता परमेश्वर वी ए। ²⁴त्यानो साथे सुणो, जो कुछ तुसे शुरूओ ते सुणी राखेया, सेई तुसा रे बणेया रा रओ। जो कुछ तुसे शुरूओ ते सुणी राखेया, जे से तुसा रे बणेया रा रओगा, तो तुसे वी पुत्रो रे और पिता परमेश्वरो रे बणे रे रओगे। ²⁵जेतेरा तिने आसा साथे वादा कित्तेया, से अनन्त जीवन ए।

²⁶मैं तुसा खे यो गल्ला तिना रे बारे रे लिखी राखिया, जो तुसा खे भरमाओए। ²⁷और तुसा रा से अभिषेक, जो प्रभु यीशु मसीह री तरफा ते कित्तेया, तुसा रे बणेया रा रओआ और तुसा खे इजी ते मतलब निए कि कोई तुसा खे सिखाओ। पर जिंयाँ से अभिषेक, जो तेसरी तरफा ते कित्तेया, तुसा खे से सब गल्ला सिखाओआ जो तुसा खे सीखणे री जरूरत ए और जो कुछ से सिखाओआ से सब सच ए, चूटा निए और जेड़ा तिने तुसा खे सिखाया, तेड़े ई तुसे यीशु मसीह रे बणे रे रओए।



²⁸इजी री खातर ओ बालको! तेसरे बणे रे रओ, ताकि जेबे से आओ, तो आसा खे इम्मत ओ और आसे मसीह रे आऊणे पाँदे शर्मिदा नि ओऊँ। ²⁹जे तुसे जाणोए कि मसीह तर्मी ए, तो ये वी जाणोए कि जो कोई तर्मी रा काम करोआ, से परमेश्वरो रे बच्चे ए।

3

¹जरा सोचो तो सई कि पिता परमेश्वरो आसा ते केड़ा प्यार कित्तेया कि आसा खे परमेश्वरो री ल्वाद बोलो और सच्ची आसे तेसरी ल्वाद आए वी। पर जो लोक दुनिया रे ए से नि जाणदे कि आसे परमेश्वरो री ल्वाद ए, कऊँकि सेयो पिता परमेश्वरो खे वी नि जाणदे। ²ओ साथी विश्वासियो! एवु आसे परमेश्वरो री ल्वाद ए और एवुए तक ये निए पता कि आसे क्या कुछ ऊणे, इतणा जाणूए कि जेबे यीशु मसीह प्रगट ऊणा, तो आसे वी तेस जेड़े ऊणे, कऊँकि आसा से तेड़ा ई देखणा, जेड़ा से आए। ³जो कोई यीशु मसीह पाँदे ये उम्मीद राखोआ, से आपणे आपू खे तेड़ा ई पवित्र करोआ, जेड़ा से पवित्र ए।

⁴जो कोई लगातार पाप करोआ, से परमेश्वरो रे विधानो रा विरोद करोआ और विधानो रा विरोद करना ई पाप ए ⁵और तुसे जाणोए कि मसीह इजी खे आया कि पापो रा नाश करी देओ और तेसरे सबाओ रे पाप निए। ⁶जो कोई तेसदे बणेया रा रओआ, से पाप करदा नि रंदा, जो कोई पाप करोआ, तिने ना से देखी राखेया और ना से जाणी राखेया।

⁷ओ बालको! केशी रे भरमाणे पाँदे नि आओ। जो तर्मी रे काम करोआ, सेई मसीह जेड़ा तर्मी ए। ⁸जो कोई लगातार पाप करदा रओआ, से शैतानो री तरफा ते ए, कऊँकि शैतान शुरूओ तेई पाप लगातार करदा आयी रा, परमेश्वरो रा पुत्र इजी खे आया, ताकि शैतानो रे कामा खे नाश करो। ⁹जो कोई परमेश्वरो ते पैदा ऊई रा, सेयो लगातार पाप नि करदे, कऊँकि परमेश्वरो रा बीज तिना रे बणेया रा रओआ और सेयो लगातार पाप करी नि सकदे, कऊँकि सेयो परमेश्वरो ते जम्मी रे। ¹⁰इजी तेई परमेश्वरो री ल्वाद और शैतानो री ल्वाद जाणे जाओए। जो कोई तर्मी रे काम नि करदा, से परमेश्वरो ते निए और ना से जो आपणे पाईए साथे प्यार नि राखदा।



¹¹जो समाचार तुसे शुरूओ ते सुणेया, से ये कि आसे एकी-दूजे साथे प्यार राखूँ। ¹²और आदमो रे पाऊ कैनो जेड़े नि बणो, जो तेस दुष्टो ते था, तिने शैतानो री आज्ञा मानी और आपणा पाई हाबिल काया। से किजी बजअ ते काया? इजी बजअ ते कि तेसरे काम बुरे थे और तेसरे पाईया रे काम तर्मी रे थे। ¹³ओ साथी विश्वासियो! जे एसा दुनिया रे लोक तुसा ते बैर करोए, तो हैरान नि ओ। ¹⁴आसे जाणूए कि आसे मौता रे बन्दना ते छुटी की जिन्दगिया रे पऊँछी रे। कऊँकि आसे पाईया साथे प्यार राखूँ, जो प्यार नि राखदा, से मौता रे बन्दनो रे रओआ। ¹⁵जो कोई आपणे पाईए साथे बैर राखोआ, से अत्यारा ए और तुसे जाणोए कि केशी अत्यार रे अनन्त जीवन नि रंदा।

¹⁶आसे प्यार इजी तेई जाणेया कि यीशु मसीहे आसा री खातर आपणे प्राण देई ते। तेवेई आसा खे वी आपणे पाईया री तंई प्राण देणे चाईयो। ¹⁷पर जेस केशी गे वी दुनिया री सम्पति ओ और से आपणे पाईए खे कंगाल देखी की तेस पाँदे तरस नि खाणा चाओ, तो तेसरे परमेश्वरो रा प्यार कियोँ

बणी की रई सकोआ? 18 ओ मेरे प्यारे बालको! आसे वचन और गल्ला तेई नि, पर काम और सच्चो रे जरिए बी प्यार करिए।

XXXXXXXXXXXX

19 जेबे आसे दूजे ते प्यार करूए तो इजी तेई आसे जाणूंगे कि आसे सच्चो रे ए और आसा रे मनो रे परमेशरो रे सामणे आसा रे मनो रे शान्ति ओई। 20 तेबई जेते गल्ला रे म्हारा मन आसा खे दोष देओगा, कऊँकि आसे जाणूए कि परमेशर आसा रे मनो ते बड़ा ए और सब कुछ जाणोआ। 21 ओ प्यारेओ! जे म्हारा मन आसा खे दोष नि देओ, तो आसा खे परमेशरो सामणे इम्मत ओई 22 और जो कुछ आसे मांगूए, से आसा खे तेसते मिलोआ, कऊँकि आसे तेसरी आज्ञा खे मानूए और जो तेसखे अच्छा लगेओ, सेई करूए 23 और तेसरी आज्ञा ये कि आसे तेसरे पुत्र प्रभु यीशु मसीह पाँदे विश्वास करूँ और जेड़ी तिने आसा खे आज्ञा देई राखी, तिजी रेई मुताबिक आपू-बीचे प्यार राखिए। 24 जो परमेशरो री आज्ञा खे मानोआ, से तेसरे और परमेशर तिना रे बणेया रा रओआ और इजी तेई, मतलब-तेसा पवित्र आत्मा ते जो तिने आसा खे देई राखेया, आसे जाणूए कि परमेशर आसा रे बणेया रा रओआ।

4

XXXXXXXXXX

1 ओ मेरे प्यारेओ! हर केसी पाँदे विश्वास नि करो जो आत्मा रे जरिए बोलणे रा दावा करोए। बल्कि आत्मा खे परखो कि सेयो परमेशरो री तरफा ते कि नई, कऊँकि बऊत सारे चूटे भविष्यवक्ता दुनिया रे निकली की खड़े ऊई रे। 2 परमेशरो रा पवित्र आत्मा तुसे ईयां पछ्याणी सकोए कि जो कोई आत्मा मानी लओई कि प्रभु यीशु मसीह शरीरो ते ऊई की आयी रा, से परमेशरो री तरफा ते ए 3 और जो कोई आत्मा प्रभु यीशुए खे नि मानदी, से परमेशरो री तरफा ते नि ए और सेई तो मसीह रे बिरोदिया री आत्मा ए, जेतेरी चर्चा तुसे सुणी चुके रे कि से आऊणे वाला ए और एबे बी दुनिया रे ए।

4 ओ बालको! तुसे परमेशरो रे लोक ए और तुसे तिना चूटे भविष्यवक्तेया पाँदे जय पाई राखी, कऊँकि जो पवित्र आत्मा तुसा दे ए, तेस शैतानो ते बी बड़ा ए जो दुनिया पाँदे राज करोआ। 5 सेयो चूटे भविष्यवक्तेया दुनिया रे ए, इजी बजअ ते सेयो दुनिया रिया गल्ला बोलोए और दुनिया रे लोक तिना री सुणोए। 6 आसे परमेशरो रे ए, जो परमेशरो खे जाणोआ, से म्हारी सुणोआ, जो परमेशरो खे नि जाणदा, से म्हारी नि सुणदा, ईयां ई आसे बी सच्चो री आत्मा और बईमो री आत्मा खे पछ्याणी लऊँए।

XXXXXXXXXXXX

7 ओ मेरे प्यारेओ! आसे आपू बीचे प्यार राखिए, कऊँकि प्यार परमेशरो ते ए। जो कोई ओरी ते प्यार करोआ, से परमेशरो ते पैदा ऊई रा और परमेशरो खे जाणोआ। 8 जो कोई ओरी साथे प्यार नि राखदा, से परमेशरो खे नि जाणदा, कऊँकि परमेशर प्यार ए। 9 जो प्यार परमेशर आसा साथे राखोआ, से इजी ते प्रगट ऊआ कि परमेशरे आपणा एकलौता पुत्र दुनिया रे पेजे ता, ताकि आसे तेसरे जरिए अनन्त जिन्दगी पाऊँ। 10 प्यार इजी ते नि कि आसे परमेशरो ते प्यार कित्तेया, पर इजी रे ए कि तिने आसा ते प्यार कित्तेया और आसा खे पापो ते छुड़ाणे खे आपणा पुत्र बलिदान ऊणे खे पेजेया।

11 ओ मेरे प्यारेओ! जेबे परमेशरे आसा ते इतणा प्यार कित्तेया, तो आसा खे बी आपू बीचे प्यार राखणा चाईयो। 12 परमेशर कदी बी किने नि देखेया, जे आसे आपू बीचे प्यार राखूँ, तो परमेशर आसा रे बणेया रा रओआ और तेसरा प्यार आसा ते सिद्ध ऊईगा रा।

13 इजी तेई आसे जाणूए कि आसे तेसदे बणे रे रऊँए और से आसा रे, कऊँकि तिने आपणी पवित्र आत्मा आसा खे देई राखेया। 14 और आसे पुत्र देखी बी लया और गवाई बी देऊँए कि पिता परमेशरे आपणा पुत्र दुनिया रे लोका रा उद्धारकर्ता करी की पेजे राखेया। 15 जो कोई ये मानी लओआ कि

परभु यीशु परमेशरो रा पुत्र ए, परमेशर तेसदे बणेया रा रओआ और से परमेशरो रे 16 और जो प्यार परमेशर आसा साथे राखोआ, तिजी खे आसे जाणी गे और आसा खे तिजी पॉदे विश्वास ए कि परमेशर प्यार ए, जो प्यारो रे बणेया रा रओआ, से परमेशरो रे बणेया रा रओआ और परमेशर तेसरे बणेया रा रओआ। 17 इजी तेई प्यार आसा रे सिद्ध ओआ कि तेस आसा खे सजा नि देणी। जेड़ा यीशु मसीह ए, तेडे ई दुनिया रे आसे बी ए।

18 प्यारो रे डर नि ऊँदा, बल्कि सिद्ध प्यार डरो खे दूर करी देओआ, कऊँकि डरो ते तकलीफ़ ओई और जो डर करोआ, से प्यारो रे सिद्ध नि ऊँआ। 19 आसे इजी री खातर परमेशरो खे और ओरी खे प्यार कऱँए, कऊँकि पईले परमेशरे आसा ते प्यार कित्तेया। 20 जे कोई बोलो कि आऊँ परमेशरो ते प्यार राखूँआ और आपणे पाईए ते बैर राखो, तो से चूटा ए, कऊँकि जो आपणे पाईए ते, जो तिने देखी राखेया, प्यार नि राखदा, तो से परमेशरो ते बी, जो तिने देखी नि राखेया, प्यार नि राखी सकदा। 21 तेसते आसा खे ये आज्ञा मिली री कि जो कोई आपणे परमेशरो ते प्यार राखोआ, से आपणे पाईए ते बी प्यार राखो।

5

~~~~~

1 जेसरा ये विश्वास ए कि परभु यीशु ई मसीह ए, से परमेशरो ते पैदा ऊई रा और जो कोई पैदा करने वाले ते प्यार राखोआ, से तेसते बी प्यार राखोआ, जो तेसते पैदा ऊई रा। 2 जेबे आसे परमेशरो ते प्यार राखूँए और तेसरी आज्ञा खे मानूँए, तो इजी तेई आसे जाणूँए कि परमेशरो री ल्वादा साथे प्यार राखूँए 3 परमेशरो रा प्यार ये कि आसे तेसरी आज्ञा खे मानिएँ और तेसरी आज्ञा कठण निएँ। 4 कऊँकि जो कुछ परमेशरो ते पैदा ऊई रा, तेसखे दुनिया रे जय मिलोई और से जीत जेते कि दुनिया रे जय मिलोई, से म्हारा विश्वास ए। 5 दुनिया पॉदे जय पाणे वाला कूणे? बस से, जेस पॉदे विश्वास ए कि परभु यीशु ई परमेशरो रा पुत्र ए।

~~~~~

6 ये सईए, जो पाणी और खूनो रे जरिएँ आया, मतलब-परभु यीशु मसीह। से ना बस पाणिएँ रे जरिएँ, बल्कि पाणी और खून दूँई रे जरिएँ आया और जो गवाई देओआ, से पवित्र आत्मा ए, कऊँकि पवित्र आत्मा सच्ची ए 7 सच तो ये ए कि गवाई देणे वाले तीन ए; 8 आत्मा, पाणी, और खून ये तिनों एक ई गल्ला पॉदे सहमत ए। 9 जेबे आसे मांणूआ री गवाई मानी लऊँए, तो परमेशरो री गवाई तिजी ते बड़ी की ए और परमेशरो री गवाई ये कि तिने आपणे पुत्रो रे बारे रे गवाई देई राखी। 10 जो परमेशरो रे पुत्रो पॉदे विश्वास करोआ, से परमेशरो री गवाई आपणे मनो रे राखोआ, जिने परमेशरो पॉदे विश्वास नि कित्तेया, तिने से चूटा ठराया, कऊँकि तिने तेसा गवाईया पॉदे विश्वास नि कित्तेया, जो परमेशरे आपणे पुत्रो रे बारे रे दित्ती 11 और से गवाई ये कि परमेशरे आसा खे अनन्त जीवन देई राखेया और ये जीवन तेसरे पुत्रो रे ए। 12 जेसगे परमेशरो रा पुत्र ए, तेसगे अनन्त जीवन ए और जेसगे परमेशरो रा पुत्र निएँ, तेसगे अनन्त जीवन पनिएँ।

~~~~~

13 में तुसा खे, जो परमेशरो रे पुत्रो रे नाओं पॉदे विश्वास राखोए, इजी खे लिखी राखेया कि तुसे जाणो कि अनन्त जीवन तुसा राएँ 14 और आसा खे परमेशरो रे सामणे जो हियाव ओआ, से ये कि जे आसे तेसरी इच्छा रे मुताबिक कुछ मांगूए, तो से म्हारी सुणोआ। 15 जेबे आसे जाणूँए कि जो कुछ आसे परमेशरो ते मांगूए, से म्हारी सुणोआ, तो ये बी जाणूँए कि जो कुछ आसे तेसते मांगेया, से पाया।

16 जे कोई आपणे विश्वासी पाईए खे एड़ा पाप करदे ऊए देखो, जेतेरा फल मौत नि ओ, तो प्रार्थना करो कि परमेशर तेसखे, तिना खे, जिने एड़ा पाप करी राखेया, जेतेरा फल मौत निएँ, जीवन देओगा, पाप एड़ा बी ओआ, जेतेरा फल मौत ए, इजी रे बारे रे आऊँ विनती करने खे नि बोलदा। 17 सब प्रकारा रे बुरे काम तो पाप ए, पर कुछ एडे पाप बी ए, जेतेरा फल मौत निएँ।

18 आसे जाणूँए कि जो कोई परमेशरो ते पैदा ऊई रा, से लगातार पाप नि करदा, जो परमेशरो ते पैदा ऊई रा, तेसखे से बचाए रे राखोआ और से दुष्ट तेसखे छुँई नि सकदा। 19 आसे जाणूँए कि आसे परमेशरो ते ए और दुनिया तेस दुष्टो रे वशो रे पड़ी री।

20 और आसे ये बी जाणूँए कि परमेशरो रा पुत्र यीशु मसीह एते दुनिया रे आया और तिने आसा खे समज दिती कि आसे तेस सच्चे परमेशरो खे पछ्याणूँ और आसे तिदे जो सच ए, मतलब-तेसरे पुत्र प्रभु यीशु मसीह रे रऊँए, सच्चा परमेशर और अनन्त जीवन येईए। 21 ओ बालको! आपणे आपू खे मूर्तिया ते बचाई की राखो।

## 2 यूहन्ना यूहन्ने री लिखी री दूजी चिट्ठी भूमिका

यूहन्ने री दूजी चिट्ठी “बुजुर्गा” री तरफा ते “चूणी री जवाणस और तेसा रे बच्चेया” रे नाओ लिखी राखी थी। जेतेरा मतलब ए-एक स्थानिय मण्डलिया और तिजी रे सदस्य। संक्षेपो रे इजी रा संदेश ए, एकी-दूजे साथे प्यार राखणे री प्रार्थना और चूटे शिक्षक और तिना री शिक्षा रे खलाफ चेतावणी।

१११-११११

भूमिका 1:1-3

प्यारो री खासियत 1:4-6

चूटे तर्मसिद्धांता रे खलाफ चेतावणी 1:7-11

निचोड़ 1:12, 13

११११११

1 ये चिट्ठी मां बुजुर्गों री तरफा ते ए। आऊं ये चिट्ठी तेसा खास जवाणसा खे और तेसा रे बाल-बच्चेया खे लिखणे लगी रा जिना खे परमेशरे आपणे लोक करी की चूणी राखेया। आऊं तुसा सबी ते सच्चा प्यार करूँआ, बस आऊँ ई नि, बल्कि सेयो सब बी प्यार राखोए, जो सच्चाईया खे जाणोए। 2 आसे सब लोक तांते प्यार करूँए कऊँकि से सच्चाई जो आसा रे टीकी री रओई, और सदा आसा साथे अटल रणी। 3 पिता परमेशर और पिते रे पाऊ प्रभु यीशु मसीह री तरफा ते कृपा, दया और शान्ति आसा साथे सच और प्यारो रे बणी रणी।

११११११ ११ ११११११

4 आऊं बऊत खुश ऊआ कि मै तेरे कुछ बाल-बच्चे, तेसा आज्ञा रे मुताबिक, जो आसा खे पिते री तरफा ते मिली थी, सच्चाईया पाँदे चलदे ऊए पाए। 5 एवे ओ जवाणसे! आऊं ताखे कोई नयी आज्ञा नि, पर सेई जो शुरूओ तेई आसा गे ए, लिखूँआ। और तांते बिनती करूँआ कि आसे एकी-दूजे साथे प्यार राखिए 6 और प्यार ये कि आसे तेसरी आज्ञा रे मुताबिक चलिए। ये सेई आज्ञा ए, जो तुसे शुरूओ ते सुणी राखी और तुसा खे इजी पाँदे चलणा बी चाईयो।

7 कऊँकि बऊत सारे एड़े भरमाणे वाले दुनिया रे निकली की आयी रे, जो ये नि मानदे कि प्रभु यीशु मसीह शरीरो रे ऊई की आए। भरमाणे वाला और मसीह रा बिरोदी येई ए। 8 आपणे बारे रे चौकस रओ। जो मईणत आसे सब करी राखी, तिजी खे तुसे खोई नि देओ, बल्कि अनन्त जीवनो रा पूरा फल पाओ। 9 जो कोई मसीह री शिक्षा ते पटकी जाओआ और मसीह री शिक्षा रे बणेया रा नि रंदा, तेसगे परमेशर निए। पर कोई तेसरी शिक्षा रे टीके रा रओआ, तेसगे पिता बीए और पुत्र बी। 10 जे कोई तुसा गे आओ और मसीह री सच्ची शिक्षा नि देओ, तेसखे ना तो कअरे आऊणे देओ और ना ई तेसरी आदर-खातर करो। 11 कऊँकि जो कोई एड़े जणे री आदर-खातर करोआ, से तेसरे बुरे कामो रे साजा ओआ।

११११ ११११११११

12 माखे तुसा खे बऊत सारिया गल्ला लिखणिया ए, पर कागज और स्याईया ते लिखणा नि चांदा, पर उम्मीद ए कि आऊं तुसा गे आऊणा और आमणे-सामणे गल्ला करूँगा, जेते की आसा री खुशी पूरी ओ। 13 परमेशरो रे जरिए चूणी री तेरी बईणा रे बाल-बच्चे जो एती आसा साथे ताखे नमस्कार बोलोए।





## यहूदा यहूदे री लिखी री चिट्ठी भूमिका

यहूदा री चिट्ठी चूटे शिक्षकारे खलाफ चेतावणी देणे खे लिखी थी, कऊँक सेयो विश्वासी ऊणे रा दावा करो थे। एते छोटी जिया चिट्ठिया री गल्ला पतरसो री दूजी चिट्ठिया जेड़ी ए, इंदे लेखक आपणे पढ़ने वालेया खे उत्साहित करोआ कि तेस विश्वासो खे पूरी कोशिश करो जो पवित्र लोका मे एक ई बार सम्बाली राखेया था।

???????

भूमिका 1:1, 2

चूटे शिक्षकारा चरित्र, शिक्षा और अंत 1:3-16

विश्वासो रे बणे रे रणे री चेतावणी 1:17-23

आशीर्वचन 1:24, 25

???????

1 ये चिट्ठी मां यहूदा री तरफा ते ए। आऊ यीशु मसीह रा दास और याकूबो रा छोटा पाई ए। आऊ ये चिट्ठी तुसा लोका खे लिखणे लगी रा जो परमेशरे बुलाई राखे। पिता परमेशर तुसा लोका ते प्यार करोआ और तुसा खे यीशु मसीह रे सयी-सलामत राखोआ।<sup>2</sup> आऊ प्रार्थना करूँआ कि दया, शान्ति और प्यार तुसा खे बऊत जादा मिलदा रओ।

????? ??????

3 ओ प्यारेओ, आऊ तुसा लोका खे तेस उद्धारो रे बारे रे लिखणे री हर तरअ ते कोशिश करने लगी रा था जिंदे आसे सब शामिल ए जो परमेशरो री तरफा ते यीशु मसीह रे जरिए आसा खे मिलोआ। पर एवे आऊ एसा चिट्ठिया रे जरिए तुसा लोका खे ये समजयाणा जरूरी समजूँआ ताकि तुसे लोक मसीह रे विश्वासो रे बणे रणे रे ओर बी कठण कोशिश करो। परमेशरे ये विश्वास एक ई बार और आपणे सबी लोका खे देई राखेया और ये बदली नि सकदा।<sup>4</sup> आऊ ये चिट्ठी तुसा खे इजी खे लिखणे लगी रा कऊँक कुछ लोक चोरिए जे आसा बीचे आयी की मिली मे रे, जो यीशु मसीह रे विश्वास करने रा दखावा करोए। सेयो लोक बिना भंगित करने वाले ए और गलत तरीके ते ये शिक्षा देओए कि जेवे परमेशरे आसे रे पाप कृपा करी की माफ करी ते रे तो आसे बुरी जिन्दगी जि सकूँए। सेयो लोक यीशु मसीह खे ना करोए जो आसा रा एक मात्र स्वामी और प्रभु ए। पुराणे बखतो तेई पवित्र शास्त्रो रे लिखी राखेया कि परमेशरो तिना लोका खे सजा देणी।

5 आऊ तुसा खे इजी गल्ला री याद दलाणा चाऊँआ, हालाँकि तुसे लोक एसा गल्ला खे पईले तेई जाणोए कि परमेशरे इसराएली लोका खे गुलामिया ते छुड़ाया और मिस्र देशो ते बाअरे लयी की आया, पर परमेशरे बादो ते तिना सबी लोका खे सुणसाण जगा रे मारी ता कऊँक तिने लोके तेस पई विश्वास नि कित्तेया था।<sup>6</sup> ये बी याद करो कि परमेशरे कियॉ तिना स्वर्गदूता खे सजा दित्ती जिने आपणे अक्को रे पदो खे बणाया रा नि राखेया पर इजी री बजाए आपणे दित्ते रे पद और आपणी जगा छाडी ती। परमेशरे इना दूता खे न्हरे कुण्डो रे पाई की जंजीरा साथे बानी ता ताकि कोई बी तिना खे तेस भीषण दिनो रे न्याय ते बचाई नि सको।<sup>7</sup> तियाँ ई सदोम, गमोरा और तिजी साथले ओरले-पोरले नगर बी, जो इना जेड़े व्याभिचारी ऊईगे थे और पराये शरीरो पीछे लगी मे थे। परमेशरे तिना नगरा रा आगी रे जरिए सत्यानाश करी ता और ये आसा खे परमेशरो रे न्याय री अनन्त आगी रे बारे रे चेतावणी देओआ।

8 ईयाँ ई विश्वासो रा दखावा करने वाले लोक ये दावा करोए कि परमेशरे तिना खे दर्शणो रे प्रकट करी राखेया कि सेयो लोक आपणे शरीरो खे गन्दे काम करी कि अशुद्ध करोए। सेयो लोक परमेशरो

रे अक्को खे तुच्छ जाणोए और तेजोमय स्वर्गिय प्राणिया खे पला-बुरा बोलोए।<sup>9</sup> पर एथो तक कि मीकाईल जो परमेशरो रे प्रदान स्वर्गदूता बीचा ते एक ए तिने इना विश्वासो रा दखावा करने वाले लोका जेड़ा नि कित्तेया। जेबे मीकाईले शैतानो साथे भविष्यवक्ता मूसे री लोथा रे बारे रे बईस कित्ती, तो तेसखे पला-बुरा बोली की दोष लगाणे री इम्मत नि कित्ती। पर सिर्फ इतणा ई बोलेया, “प्रभु ताखे बको।”<sup>10</sup> पर यो लोक जिना गल्ला खे नि जाणदे, तिना खे पला-बुरा बोलोए, पर जिना गल्ला खे नासमज डांगरा जेड़े सवाओ तेई जाणोए, तिना रे आपणे-आपू खे पाप करने रे जरिए नाश करोए।

<sup>11</sup> धिक्कार ए तिना पाँदे, सेयो आदमो रे पाऊ कैनो जेड़े बुरी चाल चले, जिने आपणा छोटा पाई काया था। तिने लोक बिलामो जेड़ी सेई गलती कित्ती जिने पैसेया रे लालचो खे परमेशरो रे लोका खे पाप करने खे प्रेरित कित्तेया था। सेयो लोक कोरहो जेड़े नाश ऊई जाणे जिने मूसा रा बरोद कित्तेया था।

<sup>12</sup> जिंयां समुद्रो रे लुकी री चट्टान किस्तिया खे खतरनाक ओई तियाँ ई सेयो विश्वासो रा दखावा करने वाले लोक तुसा खे खतरनाक ए, जो प्यारो री पाट्टिया रे तुसा साथे विश्वासिया रे रूपो रे साजा करोए। सेयो लोक तेस वेशर्म रखेवाले जेड़े ए, जो सिर्फ आपणी ई देखपाल करोआ। सेयो लोक बिना पाणिए रे बादलो जेड़े ए, जिना खे अवा उड़ाई की लयी जाओई। सेयो लोक पतझड़ो रे बिना फलो रे डाला जेड़े ए, जो दो बार मरी चुकी रे और जड़ी ते पट्टी गे रे।<sup>13</sup> सेयो विश्वासो रा दखावा करने वाले लोक समुद्रो री प्रचण्ड लईरा जेड़े ए, जो आपणी गन्दगी चागो जेड़ी उछालोईया, तियाँ ई सेयो लोक आपणी शर्मा रा काम करोए। सेयो लोक बाटा ते पटके रे तारे जेड़े ए, जिना खे सदा कालो खे अन्दकूप न्हेरा राखी राखेया।

<sup>14</sup> हुनोके बी जो आदमो ते साती पीढ़िया रे था, इना लोका रे बारे रे ये बोलदे ऊए भविष्यवाणी कित्ती, “देख, प्रभु आपणे लाखो पवित्त्र स्वर्गदूता साथे आया,<sup>15</sup> कि सबी रा न्याय करो और दुष्ट लोका खे जो बुरे काम तिने बुराईया ते करी राखे और दुष्ट पापिया खे जिने परमेशरो रे विरोदो रे बुरे शब्दा रा इस्तेमाल करी राखेया, दोषी ठराओ।”<sup>16</sup> सेयो विश्वासो रा दखावा करने वाले लोक सदा परमेशरो रे विरोदो रे बुरिया गल्ला करोए और ओरी लोका दे गलती टोलदे रओए। सेयो आपणी ई इच्छा ते लगातार बुरे काम करना चाओए। सेयो लोक आपणे फाईदे खे मू देखी की तारीफ करोए।

### \*\*\*\*\*

<sup>17</sup> पर ओ मेरे प्यारोओ, तुसे इना गल्ला खे याद राखो, जो म्हारे प्रभु यीशु मसीह रे प्रेरित पईले बोली चुके रे।<sup>18</sup> सेयो तुसा खे बोलेया करो थे, “आखरी दिनो रे एड़ा मजाक करने वाले ऊणे, जो आपणी अभक्तिया री इच्छा रे मुताबिक चलणे।”<sup>19</sup> ये सेयो लोक ए, जो तुसा बीचे फूट पाओए। सेयो दुनिया री बुरी इच्छा रे वशो रे ए और परमेशरो रा आत्मा तिना रे निए।

<sup>20</sup> पर ओ मेरे प्यारोओ, तुसे आपणे बऊत पवित्त्र विश्वासो रे तरक्किया खे एकी दूजे री मताद करदे रओ। तुसे लोक पवित्त्र आत्मा री सामर्था री अगुवाईया रे प्रार्थना करदे रओ।<sup>21</sup> तुसे लोक अनन्त कालो रे जीवनो खे म्हारे प्रभु यीशु मसीह री दया री उम्मीदा ते इन्तजार करदे ऊए आपणे आपू खे परमेशरो रे प्यारो रे बणाए रे राखो।

<sup>22</sup> तिना लोका पाँदे दया करो जिना रा विश्वास मजबूत निए।<sup>23</sup> ओरी खे न्याय री आगी बीचे लमखी की निकयालो। बऊत सारे एड़े लोक ए जिना पाँदे जरूर दया करो, पर बऊत ई सावधानिया साथे एड़ा करो। तुसे तिना लोका रे टालेया ते बी नफरत करो जो शरीरो रे जरिए कलकित ऊईगे रे।

### \*\*\*\*\*

<sup>24</sup> सिर्फ परमेशर ई एवे तुसा खे ठोकर खाणे ते बचाई सकोआ और आपणी महिमा री भरपूरिया रे सामणे, मग्न और निर्दोष करी की खड़ा करी सकोआ।<sup>25</sup> तिने म्हारा यीशु मसीह रे जरिए उद्धार करी राखेया। तेसी एक मात्र परमेशरो री महिमा, गौरव, पराक्रम और अक्क सनातन कालो ते, एवे बी ओ और जुगो-जुगो तक रओ। आमीन्।

## प्रकाशितवाक्य सेयो गल्ला जो परमेशरे यूहन्ने गो प्रगट कित्तिया भूमिका

यूहन्ने रा प्रकाशितवाक्य एडे बखते लिखेया था, जेबे मसीहिया खे यीशु मसीह खे प्रभु और स्वामिए रे रूपो रे विश्वास करने रिया बजअ ते सताणे लगी रे थे। एतेरे लेखको री चिन्ता री खास बजअ आपणे पढ़ने वालेया रे उम्मीद, उत्साहो रा संचार करना और तिना ते ये प्रार्थना करनी थी कि सेयो एस दुःख और सताव रे बखते विश्वासो जोगे बणे रे रओ। एते कताबा रा जादातर पाअग प्रकाशन और दर्शनो री श्रृंखला रे रूपो रे ए, जेतेखे साअरे री पाषा रे प्रस्तुत करी राखेया, जो संभवतः तेस बखतो रे मसीहिया खे समजा रे आईगी थी, पर बाकि सबी लोका खे ये रहस्य ई रया। जियाँ गाणेया रे एक धुन ओई, तियाँ ई एसा कताबा री गल्ला बार-बार कई तरीके ते लग-लग दर्शनो री श्रृंखला रे जरिए दुराई जाओई।

हालाँकि एसा कताबा री विस्तृत व्याख्या रे बारे रे मतपेद ए, तेबे बी खास विषय साफ ए: परमेशरे प्रभु यीशु मसीह रे जरिए आपणे सारे दुश्मण, जिना बीचे शैतान बी शामिल ए, सदा खे पूरी रीतिया ते अराणे और जेबे ये जीत पूरी ऊई जाणी तेबे तेस आपणे विश्वास जोगे लोक नये सर्ग और नयी तरतिया री आशीषा ते परिपूर्ण करने।

###

भूमिका 1:1-8

शुरूओ रा दर्शन और सातो मण्डलिया खे चिट्ठी 1:9-3:22

सात मुहरा रे जरिए बंद चर्मपत्र 4:1-8:1

सात तुरहिया 8:2-11:19

अजगर और दो डांगर 12:1-13:18

दूजा दर्शन 14:1-15:18

परमेशरो रे प्रकोपो रे सात कटोरे 16:1-21

बेबीलोनो रा नाश, डांगर, चूटे भविष्यबक्ता और शैतानो री आर 17:1-20:10

आखरी न्याय 20:11-15

नया सर्ग, नयी तरती और नया यरूशलेम 21:1-22:5

निचोड़ 22:6-21

1 ये प्रकाशितवाक्य यीशु मसीह री तरफा ते ए, जो परमेशरे तिना पाँदे इजी खे प्रकट कित्तेया कि से आपणे दासा खे तिना गल्ला, जिना रा चट ऊणा जरूरी ए, दखाओ। मसीहे आपणा स्वर्गदूत पेजी की तेसरे जरिए ये प्रकाशन आपणे दास यूहन्ने खे बताया।<sup>2</sup> यूहन्ने सेयो सब गल्ला लिखिया जो तिने देखिया थिया मतलब परमेशरो री तरफा ते दित्तेया रा संदेश और से सब कुछ जो यीशु मसीहे बोलेया था।<sup>3</sup> धन्य ए से, जो एसा भविष्यवाणिया रे वचना खे पढ़ोआ और सेयो बी जो इना वचना खे सुणोए और इदे लिखी रिया गल्ला खे मानोए, कऊँकि बखत नेडे आयी रा।

#####

4 ये चिट्ठी माँ यूहन्ने री तरफा ते ए। आँऊ ये चिट्ठी आसिया प्रदेशो री सातो मण्डलिया खे लिखणे लगी रा। आँऊ प्रार्थना करूँआ कि तुसा सबी लोका खे परमेशरो री तरफा ते जो आए और जो था और जो आऊणे वाला ए कृपा और शान्ति मिलदी रओ। तिना सातो आत्मा री तरफा ते, जो परमेशरो रे सिंहासनो रे सामण ए, तुसा खे कृपा और शान्ति मिलदी रओ।<sup>5</sup> यीशु मसीह री तरफा ते बी तुसा सबी लोका खे जो विश्वासो जोगे गवा ए, कृपा और शान्ति मिलदी रओ। यीशु मसीह मरे रेया बीचा ते जिऊँदे ऊणे वालेया रे जेठा ए और से तरतिया रे राजेया रा हाकिम ए। से

आसा साथे प्यार राखोआ और तिने आपणे खूनो रे जरिए आसे पापो ते छुड़ाए।<sup>6</sup> यीशुए ई आसे आपणे पिता परमेशरो खे पुरोईता रा राजवंश बणाईते। तेसरी महिमा और पराक्रम जुगो-जुगो तक रओ। आमीन्।<sup>7</sup> देखो, से बादलो साथे आऊणे वाला ए और हर एकी आखी से देखणा, बल्कि जिने से ऊजेया था, तिना बी से देखणा और तरतिया रे सारे कुला तेसरी बजअ ते जोरे-जोरे की रोणा। आ, ये ऊणा। आमीन्।

<sup>8</sup> प्रभु परमेशर ये बोलोआ, “आऊँ ई पईला और आखरी ए, मतलब से जो आए और जो था और जो आऊणे वाला ए और जो सर्वशक्तिमान् ए।”

**XXXXXXXX XX XXXX XX XXXXX**

<sup>9</sup> आऊँ यहन्ना जो तुसा रा साथी विश्वासी पाई और यीशुए खे क्लेश सईणे और परमेशरो रे राज्य रे और सबरो रे तुसा रा साथी ए। आऊँ परमेशरो रे वचन और यीशुए री गवाईया री बजअ ते रोमी अगुवो रे जरिए कैदिया रे रूपो रे पतमुस नाओं रे टापूओ रे पेजी ता था।<sup>10</sup> प्रभुए रे दिने मतलब जेस दिने विश्वासी लोक आराधना करने खे कटठे ओए आऊँ तेस दिने पवित्र आत्मा ते परी गा और अचाणक में आपणे पीछे तुरहिया जेड़ी जोरो री आवाज सुणी।<sup>11</sup> तिने बोलेया, “जो कुछ तू देखेया तिजी खे कताबा रे लिखी की सातो नगरो री मण्डलिया गे पेजी दे; मतलब इफिसुस, स्मुरणा, पिरगमुन, थुआतीरा, सरदीस, फिलदिलफिया और लौदीकिया खे पेजी दे।”

<sup>12</sup> तेबे में तेसखे जो मां साथे बोलणे लगी रा था देखणे खे आपणा मूँ फेरया और पीछे कूमी की में सात दिऊए देखे।<sup>13</sup> तिना दिऊएया बीच माणू रे पुत्रो जेड़ा एक मर्द देखेया। से पैरा तक टाले पइने रे था और तिने छातिया पाँदे सुईने रा पटका बानेया रा था।<sup>14</sup> तेसरा सिर और बाल चिट्टिया ऊना जेड़े थे, बल्कि पाले जेड़े चमकणे लगी रे थे और तेसरिया आखी आगी री लुपिया जेड़िया धिया।<sup>15</sup> तेसरे पैर खरे पीतलो जेड़े थे मानो आगी री पट्टिया रे तपाई राखे और तेसरी आवाज मुखते पाणिए री छेड़ा जेड़ी थी।<sup>16</sup> तिने आपणे दाँणे आथो रे सात तारे लयी राखे थे और तेसरे मुँओ ते पईनी दोरी तलवार निकलने लगी री थी। तेसरा मूँ एड़ा चमकणे लगी रा था जेड़ा सूरज कड़क तूपा पाँदे चमकोआ।

<sup>17</sup> जेबे में से देखेया तो आऊँ तेसरे पईरा पाँदे मरेया रा जा पड़ी गा। तेबे तिने मां पाँदे आपणा दाँणा आथ राखी की ये बोलेया, “डर नि, आऊँ पईला और आखरी ए।<sup>18</sup> आऊँ सेईए जो जिन्दगी देओआ। आऊँ मरी गा था और एबे देख, आऊँ जुगो-जुगो तक जिऊँदा ए। मांगे ई मौत और नरको रिया कुँजियाँ ए।

<sup>19</sup> “इजी खे जो गल्ला तें देखिया और जो गल्ला उणे लगी रिया और जो इजी ते बाद उणे वालिया ए, तिना सबी लिखी लो।<sup>20</sup> तिना सातो तारेया रा पेत जो तें मेरे दाँणे आथो रे देखे थे और तिना सात सुईने रे दिऊएया रा पेत ये ए: सेयो सात तारे, सातो मण्डलिया रे स्वर्गदूत ए और सेयो सात दिऊए सात मण्डलिया ए।”

## 2

**XXXXXXXX XX XXXXX**

<sup>1</sup> तिने माखे ये बी बोलेया, “इफिसुस नगरो री मण्डलिया रे स्वर्गदूतो खे ये संदेश लिख: आऊँ सेईए जिने सातो तारे आपणे दाँणे आथो रे लयी राखे और सुईने रे साता दिऊएया बीच चलो फिरोआ। आऊँ ताखे जो बोलूँ आ से सुण: <sup>2</sup> आऊँ तेरे काम, परिश्रम और तेरा सबर जाणूँआ। आऊँ ए बी जाणूँआ कि तू बुरे लोका खे देखी नि सकदा। तें सेयो लोक परखी की चूटे पाए जो आपणे आपू खे प्रेरित ऊणे रा दखावा करोए।<sup>3</sup> तू सबर करोआ और मेरे नाओं री तँई दुःख सईदे-सईदे थकदा नि।<sup>4</sup> पर मां तेरे खलाफ ये बोलणा कि तें आपणा पईलका जेड़ा प्यार छाडीता रा।<sup>5</sup> याद करो कि तुसे केथा ते केथी आई की रुड़ी रे। इजी खे मन फेर और पईले जेड़े काम कर। जे तू आपणा मन नि बदलेगा तो मां तांगे आयी की तेरे दिऊए तेते जगा ते टाई देणे।<sup>6</sup> पर आहो, ताँदे ये अच्छी गल्ल तो आयी की तू नीकुलइयों रे कामा ते कृणा करेया, जिना ते आऊँ बी कृणा करूँआ।<sup>7</sup> जो समजी

सकोआ से तिजी खे त्यानो साथे सुणो और मानी बी लओ कि परमेशरो रा आत्मा मण्डलिया खे क्या बोलणे लगी रा । जो जीती जाणे, मां तेसखे तेस जीवनो रे डालो बीचा ते जो परमेशरो रे स्वर्गलोको रे ए, फल खाणे खे देणे ।

~~~~~

8 “स्मुरणा नगरो री मण्डलिया रे स्वर्गदूतो खे ये संदेश लिख: आऊ सेईए जो पईला और आखरी ए और जो मरी गा था पर एवे जिऊंदा ए । आऊ ताखे जो बोलूँआ से सुण: 9 आऊँ तेरे क्लेश और गरीबी जाणूँआ पर तूँ अमीर ए और जो लोक आपणे आपू खे यहूदी बोलोएँ और आएँ नि, पर शैतानो री सभा ए, तिना री निन्दा खे बी जाणूँआ । 10 जो दुःख ताखे सईन करने पडने, तिना ते नि डर । कऊँकि देखो, शैतान तुसा बीचा ते कईया खे जेला रे पाणा चाओआ, ताकि तुसे परखे जाओ और तुसा खे दसा दिना तक क्लेश सईन करना पडो । प्राण देणे तक विश्वासी रओ, तो मां ताखे जीवनो रा मुकट देणा । 11 जो समजी सकोआ से तिजी खे त्यानो साथे सुणो और मानी बी लओ कि परमेशरो रा आत्मा मण्डलिया खे क्या बोलणे लगी रा । जो जीती जाणे, सेयो दूजी बार कदी नि मरने ।

~~~~~

12 “पिरगमुन नगरो री मण्डलिया रे स्वर्गदूतो खे ये संदेश लिख: आऊ सेईए जेसगे दोरी और पैनी तलवार ए । आऊ ताखे जो बोलूँआ से सुण: 13 आऊँ ए तो जाणूँआ कि तूँ तेती रएया जेती शैतानो रा सिंहासन ए । फेर बी तूँ मेरे नाओं पँदि खडा रएया । तूँ मां पँदि विश्वास करने ते बी तिना दिना रे बी पीछे नि आटेया, जिना रे मेरा विश्वासो जोगा गवा अन्तिपास तुसा बीचे तेते जगा रे काया, जेती शैतान रओआ । 14 पर मां तेरे खलाफ कुछ गल्ला बोलणिया ए, कऊँकि तांगे कई जणे तो एडे ए, जो बिलामो री शिक्षा खे मानोए, जिने बालाको खे इस्राएलिया रे आगे टोकरा री बजअ ऊणा सिखाया, ताकि सेयो मूर्तिया पँदि बलिदान किती री चीजा खाओ और व्याभिचार करो । 15 ईयाँ ई तेरे एती कई एडे जो नीकुलईयों री शिक्षा खे मानोए । 16 तेवे मन फिरा! नई तो मां तांगे फटाफट आयी की आपणे मुँओ री तलवारे की जो मेरा वचन ए तिना लोका रे खलाफ लडना । 17 जो समजी सकोआ से तिजी खे त्यानो साथे सुणो और मानी बी लओ कि परमेशरो रा आत्मा मण्डलिया खे क्या बोलणे लगी रा । जो जीती जाणा, तेसखे आऊँ गुप्त मन्ने ते देऊँगा । तेसखे एक चीट्टा पात्थर बी देऊँगा और तेस पात्थरो पँदि एक नाओं लिखेया रा ऊणा, जो तेस पाणे वाले रे सिवाए कोई नि जाणी सकणा ।

~~~~~

18 “थुआतीरा नगरो रिया मण्डलिया रे स्वर्गदूतो खे ये संदेश लिख: मां परमेशरो रे पुत्र जेरिया आखी आगी री लुपिया जेडिया ए और जेसरे पैर खरे पीतलो जेडे ए । आऊ ताखे जो बोलूँआ से सुण: 19 आऊँ तेरे काम, तेरा प्यार, विश्वास, धीरज और सेवा खे जाणूँआ और ये बी जाणूँआ कि तेरे एबुए रे काम पईलकेया कामा ते बडी की ए । 20 पर मां तेरे खलाफ कुछ बोलणा कि तूँ तेसा जवाणसा इजेबेला खे रणी देओआ, जो आपणे आपू खे भविष्यवक्तणी बोलोई । से मेरे दासा खे व्याभिचार करने खे और मूर्तिया रे सामणे बलि किती रिया चीजा खाणा सिखाई की भरमाओ ई । 21 मैं तेसा खे मन फिराणे रा मौका दित्तेया पर से आपणे व्याभिचारो ते मन फेरना नि चाँदी । 22 देख, आऊँ तेसा खे बमारिया री शैय्या रे पाऊँआ और जो तेसा साथे व्याभिचार करोए, जे सेयो बी तेसा जेडे कामो ते मन नि फेरोगे तो मां सेयो बडे क्लेशो रे पाई देणे । 23 मां तेसा रे सारे बालक काई देणे । तेवे सारी मण्डलिया जाणी लणा कि दिल और मनो रा परखणे वाला आऊँ ईएँ और मां तुसा सबी जणेया खे तुसा रे कामो रे मुताबिक बदला देणा । 24 पर तुसे थुआतीरा नगरो रे बाकि लोका ते जितणे एसा शिक्षा खे नि मानदे और जिना गल्ला खे शैतानो रिया गईरिया गल्ला बोलोए, जाणदे नि, आऊँ ये बोलूँआ कि मां तुसा पँदि ओर बोज नि पाणा । 25 पर आ, जो तुसा गे ए, तिजी खे मेरे आऊणे तक सम्बाली की राखो । 26 जो जीती जाणे और मेरे मुताबिक आखरी तक काम करदा रओगा, मां तेसखे जातिया-जातिया रे लोका पँदि अक्क देणा । 27 और तेस लोए रा राजदण्ड लयी की तिना पँदि राज

करना और जियाँ कुम्हारो रे माट्टिया रे पांडे टूटी जाओए, मैं बी एड़ा ई अक्क आपणे पिते ते पाई राखेया 28 और मां तेसखे प्याणु तारा देणा । 29 जो समजी सकोआ से तिजी खे त्यानो साथे सुणो और मानी बी लओ कि परमेशरो रा आत्मा मण्डलिया खे क्या बोलणे लगी रा ।”

3

?????? ?? ?????

1 “सरदीस नगरो री मण्डलिया रे स्वर्गदूतो खे ये संदेश लिखः आऊ से ए जेसगे परमेशरो रिया सात आत्मा ए और सात तारे ए । से ये बोलोआ कि आऊं तेरे कामा खे जाणूंआ, तूँ जिऊंदा तो लगोआ, पर अया मरेया रा । 2 इजी खे सावधान ऊई जाओ और तुसा दे जो कुछ बाकि ए, से बी मरे रेया जेड़ा ए । तिदे नई जिन्दगिया री शुरूआत करो । कऊँकि मैं तेरे कोई बी काम आपणे परमेशरो रे नेडे पूरे नि पाये । 3 तेबे याद कर कि तैं केडी शिक्षा पाई राखी और सुणी थी और तिदे बणेया रा रओ और मन फिराई दे । पर जे तूँ जागदा नि रएगा तो आऊँ चोरो जेड़ा आयी जाणा और तां कदी पनि जाणी सकणा कि मां केस बखते तां पाँदे आयी की पड़ी जाणा । 4 पर आ, सरदीस नगरो री मण्डलिया रे कुछ एडे लोक ए जिने आपणे-आपणे टाले अशुद्ध नि कित्ते । सेयो सफेद टाले पईनी की मां साथे कूमणे, कऊँकि सेयो एते जोगे आये । 5 जो जीती जाणे, तिना खे सफेद टाले पणयाए जाणे और मां तिना रा नाओं जीवनी रिया कतावा ते कदी पनि मटयांणा, पर तेसरा नाओं आपणे पिते रे और तेसरे स्वर्गदूता सामणे मानी लणा । 6 जो समजी सकोआ से तिजी खे त्यानो साथे सुणो और मानी बी लओ कि परमेशरो रा आत्मा मण्डलिया खे क्या बोलणे लगी रा ।

???????????? ?? ?????

7 “फिलदिलफिया नगरो री मण्डलिया रे स्वर्गदूतो खे एड़ा संदेश लिखः आऊ से ए जो पवित्तर और सच्चा ए और जेसगे दाऊदो रिया कुँजियाँ ए । से जो कुछ बी खोलोआ, तेस खोले रे खे कोई बंद नि करी सकदा और से जो कुछ बी बंद करोआ तेस बंद कित्ते रे खे कोई खोली नि सकदा । आऊं ताखे जो बोलूआ से सुणः 8 आऊँ तेरे कामो खे जाणूंआ, देख, मैं तां सामणे एक द्वार खोली राखेया, जेतेखे कोई बंद नि करी सकदा । आऊं ये बी जाणूंआ कि तेरी सामर्थ थोड़ी जी तो आए फेर बी तैं मेरे वचन मानी राखे और मेरे नाओं खे ना नि कित्ती । 9 देख, मां शैतानो रे सेयो सभा वाले तेरे वशो रे करी देणे, जो यहूदी बणी बैठी रे, पर आए नि, बल्कि चूठ बोलोए । देख, मां एड़ा करना कि तिना आयी की तेरे पैरा पाँदे माथा टेकणा और तिना ये जाणी लणा कि मैं तांते प्यार राखी राखेया । 10 तैं मेरा वचन मानेया और सबरो साथे दुःख सईन कित्तेया । तेबेई मां बी तूँ परीक्षा रे तेस बखते बचाई की राखणा, जो तरतिया पाँदे रणे वालेया खे, परखणे खे, सारे दुनिया रे आऊणे वाला ए । 11 आऊँ फटाफट ई आऊणे वाला ए । जो कुछ तुसा गे ए, तेस पकड़ी की राख कि कोई तेरा मुकट छुड़ाई नि लओ । 12 जो जीती जाणे, से मां आपणे परमेशरो रे मन्दरो रे खम्बा बनाणे । से फेर कदी बारे नि निकलने । मां आपणे परमेशरो रा नाओं और आपणे परमेशरो रे नगर, मतलब-नये यरूशलेमो रे नाओं, जो मेरे परमेशरो गे ते स्वर्गो ते उतरने वाला ए और आपणा नया नाओं तेस पाँदे लिखणा । 13 जो समजी सकोआ से तिजी खे त्यानो साथे सुणो और मानी बी लओ कि परमेशरो रा आत्मा मण्डलिया खे क्या बोलणे लगी रा ।

?????????? ?? ?????

14 “लौदीकिया नगरो री मण्डलिया रे स्वर्गदूतो खे ये संदेश लिखः आऊ से ए जो आमीन् और विश्वासो जोगा और सच्चा गवा ए और परमेशरो री सृष्टिया री मूल बजअ ए । आऊं ताखे जो बोलूआ से सुणः 15 आऊँ तेरे कामो खे जाणूंआ कि तूँ ना तो ठण्डा ए और ना गर्म; पला ऊँदा कि तूँ ठण्डा या गर्म ऊँदा । 16 पर तूँ सिर्फ गुलमुला ए । तूँ ना ठण्डा ए और ना गर्म ए, तेबेई आऊँ ताखे आपणे मुँओ ते उगलने वाला ए । 17 तूँ जो बोलेया कि आऊँ अमीर ए और पैसे वाला ऊईगा रा और माखे किजी चीजा री कमी नि ए । पर ये नि जाणदा कि तूँ नबाग, तुच्छ, कंगाल, अन्दा और नांगा ए । 18 इजी री खातर आऊँ ताखे सला देऊँआ कि आगी रे तपाया रा सुईना मांते मोले लओ कि तूँ

अमीर ऊई जाए और सफेद टाले लयी लो कि पईनी की ताखे आपणे नांगे ऊणे री शर्म नि ओ और आपणी आखी रे लगाणे खे काजल लओ कि तू देखणे लगे।¹⁹ आऊँ जिना-जिना खे प्यार कऱूआ, तिना सबी खे लवामे और ताइना देऊँआ। इजी री खातर जोशीला ओ, और मन फेर।²⁰ देख, आऊँ द्वारो पाँदे खड़ेया रा खटखटाऊँआ। जे कोई मेरा शब्द सुणी की द्वार खोलोगा, तो मां तेस साथे पीतरे आयी की रोटी खाणी और तेस मां साथे खाणी।²¹ जो जीती जाणे, मां सेयो आपू साथे आपणे सिंहासनो पाँदे बठयालने, जेड़ा आऊँ बी जय पायी की आपणे पिते साथे तेसरे सिंहासनो पाँदे बैठी गा।²² जो समजी सकोआ से तिजी खे त्यानो साथे सुणो और मानी बी लओ कि परमेशरो रा आत्मा मण्डलिया खे क्या बोलणे लगी रा।”

4

XXXXXXXXXX

1 इना सबी गल्ला खे देखणे ते बाद जेबे मैं नजर दिती, तो क्या देखूँआ कि स्वर्गो रे एक द्वार खुले राए। तेबे तुरहिया री आवाजा जेड़ा मैं से शब्द सुणेया जो मैं पईले बी सुणेया था। तिने माखे बोलेया, “एती ऊबे आईजा और मां सेयो गल्ला ताखे दखाणियां, जिना रा इना गल्ला ते बाद पूरा ऊणा जरूरी ए।”² आऊँ तेबुई पवित्तर आत्मा ते परी गा। मैं स्वर्गो रे एक सिंहासन देखेया और तेस सिंहासनो पाँदे कोई बैठी रा था।³ जो तेस सिंहासनो पाँदे बैठी रा था से यशबो और माणिक्य रा जा दखाई देओ था। तेस सिंहासनो रे चऊँ कनारिये मरकतो रा जा मेघधनुष दखाई देओ था।⁴ मैं तेस सिंहासनो रे चऊँ कनारे चऊबी ओर सिंहासन देखे। इना सिंहासना पाँदे चऊबी बुजुर्ग सफेद टाले पईनी की बैठी रे थे और इना रे सिरा पाँदे सुईने रे मुकट थे।⁵ तेस सिंहासनो ते बिजली और गिइना निकलने लगी रा था। सिंहासनो रे सामणे सात दिऊए बलने लगी रे थे। यो परमेशरो रिया सात आत्मा ए।⁶ तेस सिंहासनो सामणे मानो बिल्लौरो जेड़ा काँचो जेड़ा समुदर था।

सिंहासनो बीचे और सिंहासनो रे चऊँ कनारे चार प्राणी थे, जिना रे आगे पीछे आखी ई आखी थिया।⁷ पईला प्राणी शेर जेड़ा था और दूजे प्राणिये रा मूँ बलदा जेड़ा था, तीजे प्राणिये रा मूँ मांणूए जेड़ा था और चौथा प्राणी उइदे ऊए उकाबो जेड़ा था।⁸ और चारो प्राणिया रे छे-छे पंख थे। चऊँ कनारे और पीतरे आखी ई आखी थिया और सेयो दिन-रात बिना आराम किचे ये बोलदे रओ थे,

“पवित्तर, पवित्तर, पवित्तर प्रभु परमेशर, सर्वशक्तिमान्,

जो था और जो आए और जो आऊणे वाला ए।”

9 जेबे सेयो प्राणी तेसरी जो सिंहासनो पाँदे बैठी रा था और जो जुगो-जुगो तक जिऊँदा ए, महिमा और आदर और धन्यवाद करोगे,¹⁰ तेबे चऊबी बुजुर्ग सिंहासनो पाँदे बैठणे वाले रे सामणे रुड़ी जाणे और तेसगे, जो जुगो-जुगो तक जिऊँदा ए, माथा टेकणा और आपणा-आपणा मुकट सिंहासनो सामणे ये बोलदे ऊए राखणा,

11 “ओ म्हारे प्रभु और परमेशर,

तूँ ई महिमा और आदर और सामर्थो जोगा ए,

कऊँकि तै ई सारिया चीजा बणाईया

और सेयो तेरी ई इच्छा ते थिया

और बणाईया गईया।”

5

XXXXXXXXXX

1 तेबे मैं तेसरे दाणे आथो रे एक कताब देखी, जो सिंहासनो पाँदे बैठी रा था। से कताब पीतरा-बारा ते लिखी री थी और तिजी खे सात मुहरा लगाई की बंद करी राखेया था।² तेबे मैं एक तागतवर स्वर्गदूत देखेया, जो जोरे की ये प्रचार करो था कि, “एसा कताबा खे खोलणे और इजी री मुहरा खे तोइने जोगा कुण ए?”³ पर ना स्वर्गो रे, ना तरतिया पाँदे, ना तरतिया ते थाले कोई तेसा कताबा

खे खोलणे या तिजी पाँदे नजर पाणे जोगा निकलेया कि तिदे क्या लिखी राखेया । 4 तेवे मेरिया आखी ते आसू निकलने लगे, कऊँकि तेसा कताबा के खोलणे या तिजी पाँदे नजर पाणे जोगा कोई नि मिलेया । 5 तेवे तिना बुजुर्गा बीचा ते एकी जणे माखे बोलेया, “रोओ नि, देख, यहूदो रे गोत्रो रा से शेर, दाऊदो वंशो रा मूल जयवंत ऊई रा । सेई एसा कताबा खे खोलणे और इना सात मुहरा खे तोइने जोगा ए ।”

6 तेवे मैं तेस सिंहासनो गे चारो प्राणिया और तिना बुजुर्गा बीचे एक मिन्दू खडेया रा देखेया । से मानो फाटेया रा मिन्दू था । तेसरे सात सींग और सात आखी थिया, यो परमेशरो रिया सात आत्मा ए, जो परमेशरे सारी तरतिया रे पेजी राखिया । 7 तिने मिन्दूए आगे आयी की जो सिंहासनो पाँदे बैठेया रा था, तेसरे दाँणे आथो ते से कताब लयी ली, 8 और जेबे तिने कताब लयी ली, तेवे सेयो चारो प्राणी और चऊबी बुजुर्ग, तेस मिन्दूए रे सामणे माथा टेकणे खे चुकी गे । हर एकी रे आथो रे बीणा और तूपे की फरे रे सुईने रे कटोरे थे, ये तो परमेशरो रे लोका रिया प्रार्थना ए । 9 तेवे सेयो ये नया गाणा गाणे लगे,
“तूँ एसा कताबा खे लणे

और इजी रिया मुहरा खे खोलणे जोगा ए,
कऊँकि तैं फाठी की आपणे खूने की हर एक कुल, पाषा, लोक
और जातिया बीचा ते
परमेशरो खे लोक मोले लयी राखे ।

10 और तिना खे म्हारे परमेशरो खे एक राज्य और पुरोईत बनाया
और सेयो तरतिया पाँदे राज करोए ।”

11 तेवे मैं फेर देखेया, और तेस सिंहासनो, तिना प्राणिया और तिना बुजुर्गा रे चऊँ कनारे ते बऊत सारे स्वर्गदूता रा शब्द सुणेया, जिना री गिणती लाखो और करोड़ो रे थी, 12 और सेयो जोरे-जोरे की बोलो थे,
“फाटेया रा मिन्दू ई

सामर्थ, पैसा, ज्ञान, शक्ति,
आदर, महिमा और तारीफा जोगा ए ।”

13 तेवे मैं स्वर्गो रे, तरतिया पाँदे, तरतिया ते थाले, समुद्रो रिया सब बणाई रिया चीजा खे और सब कुछ जो तिना रे ए, ये बोलदे ऊए सुणेया,
“जो सिंहासनो पाँदे बैठी रा, तेसरा
और मिन्दूए रा धन्यवाद और आदर,
महिमा और राज्य जुगो-जुगो तक रओ ।”

14 तेवे चारो प्राणिये “आमीन्” बोलेया और बुजुर्गे चुकी की माथा टेकेया ।

6

REVEAL THE SECRETS

1 तेवे मैं देखेया कि मिन्दूए तिना सात मुहरा बीचा ते एक खोली और तेवे तिना चारो प्राणिया बीचा ते एकी रा गिइने रा जा शब्द सुणेया, “आओ ।” 2 तेवे मैं नजर दिती और तेती माखे एक सफेद रंगो रा कोड़ा दिशेया और तेस पाँदे जो सवार था, तिने धनुष लयी राखेया था । तेसखे एक मुकट दित्तेया और से स्वर्गो ते तरतिया री तरफा खे एक जितणे वाले जेड़ा और बी जय पाणे खे निकलेया ।

3 जेबे मिन्दूए दूजी मुहर खोली, तो तेवे मैं दूजा प्राणी ये बोलदे ऊए सुणेया, “आओ ।” 4 तेवे मैं तेती एक ओर कोड़ा निकलदा ऊआ देखेया जो आगी जेड़ा लाली रंगो रा था । तेसरे सवारो खे ये अक्क दित्तेया कि तरतिया पाँदा ते मेल-जोल चकी दे, ताकि लोक एकी-दूजे खे फाटो और तेसखे एक बड़ी तलवार दिती ।

5 जेबे मिन्दूए तीजी मुहर खोली, तो तेवे मैं तीजा प्राणी ये बोलदे ऊए सुणेया, “आओ ।” तेवे मैं तेती एक ओर कोड़ा निकलदा ऊआ देखेया जो काले रंगो रा था । तेस सवारो रे आथो रे एक

ताकड़ी थी।⁶ तेबे मैं तिना चारो प्राणिया बीचा ते एक शब्द ये बोलदे ऊए सुणेया, “एकी दिनो री मजदूरिया री सेर परी कणक और एकी दिनो री मजदूरिया री तीन सेर जौ, पर तेल और अँगूरा रे रसो रा नुकशाण नि करना।”

⁷ जेबे मिन्दूए चौथी मुहर खोली, तो तेबे मैं चौथे प्राणिये रा शब्द ये बोलदे ऊए सुणेया, “आओ।”⁸ तेबे मैं तेती एक ओर कोड़ा निकलदा ऊआ देखेया, जो तोते रे रंगो जेड़ा था। तेसरे सवारो रा नाओं मौत ए और नरक तेस पीछे-पीछे आऊणे लगी रा था। तिना खे ये अक्क दितेया कि तलवार, काल, मरी और तरतिया रे बणो रे डांगरा रे जरिए लोका खे काआ।

⁹ जेबे मिन्दूए पांजी मुहर खोली, तो तेबे मैं बेदिया ते निठे तिना लोका रे प्राण देखे, जो परमेशरो रे वचनो रा प्रचार करने री बजअ ते और तेसा गवाईया री बजअ ते कि यीशु आसा रा प्रभु ए, जो तिने लोके दित्ती थी, फाटी ते थे।¹⁰ तिने लोके परमेशरो खे जोरे-जोरे की आक्का पायी की बोलेया, “ओ स्वामी तूँ पवित्र और विश्वासो जोगा ए! तां कदुओ तक न्याय नि करना और तरतिया पाँदरणे वालेया ते म्हारे खूनो रा बदला कदुओ तक नि लणा?”¹¹ तेबे तिना बीचा ते हर एकी खे सफेद टाले दिते और तिना खे बोलेया, “थोड़ी देर आराम करो, जदुओ तक कि तुसा साथले दास और विश्वासी पाई, जो तुसा जेडे फाटणे वाले ए, तिना री बी गिणती पूरी नि ऊई जाओ।”

¹² मैं मिन्दू छठी मुहर खोलदे ऊए देखेया। तेबे एक बड़ा ईल्लण ऊआ और सूरज काला ऊईगा और प्रयासा देणा बन्द करी ता और पूरा चाँद खूनो जेड़ा लाल ऊईगा।¹³ और सर्गो रे तारे तरतिया पाँद ईयां छुटणे लगे, जियाँ बडे तूफानो ते दाऊगले रे डालो ते काच्चे फल चढोए।¹⁴ तेबे सर्ग एड़ा गाईब ऊईगा, जेड़ी चिट्ठी लपेटणे ते सिकुड़ी जाओई और हर एक पाहड़ और टापू आपणी-आपणी जगा ते टली गे।

¹⁵ नतीजन, तेबे तरतिया रे राजे, प्रदान, सरदार, पैसे वाले, सामर्थी लोक, हर एक दास और हर एक आजाद, पाहड़ो रे डवारा रे और चट्टानी रे जायी की लूकी गे।¹⁶ तेबे पाहड़ो ते और चट्टानी ते बोलणे लगे, कि आसा पाँद पड़ी जाओ और आसा खे तेसरे मुंओ ते, जो सिंहासनो रे बैठी रा और मिन्दूए रे प्रकोपो ते लकोई देओ।¹⁷ कऊँकि प्रकोपो रा से डराऊणा दिन जिदे परमेशरो और मिन्दूए सबी खे सजा देणे आयी पऊँछी रा और तेसा सजा खे कोई बी सईन नि करी सकदा।

7

1, 44,000

¹ इजी ते बाद मैं तरतिया रे चारो कूणयां पाँद चार स्वर्गदूत खडे देखे। तिने स्वर्गदूते तरतिया री चारो अवा पकड़ी राखी थी, ताकि तरती या समुद्र या केसी डालो पाँद अवा नि चलो।² तेबे मैं एक ओर स्वर्गदूतो खे जिऊँदे परमेशरो री मुहर लयी की पूर्वी ते ऊबो खे आऊँदा ऊआ देखेया। तिने तिना चारो स्वर्गदूता ते, जिना खे तरती और समुद्रो रा नुकशाण करने रा अक्क दितेया था, जोरे की आक्का पायी की बोलेया,³ “जदुओ तक आसे आपणे परमेशरो रे दासो रे माथेया पाँद मुहर नि लगाई देऊँगे, तदुओ तक तरती, समुद्र और डाला रा नुकशाण नि करना।”⁴ और जिना पाँद मुहर लगाई, मैं तिना री गिणती सुणी कि इस्राएलो री त्वादा रे सारे गोत्रा बीचा ते एक लाख चवाली हजारा पाँद मुहर लगाई।⁵ स्वर्गदूते हर गोत्रो ते बारा हजारा लोका पाँद मुहर लगाई: यहूदा रे गोत्रो बीचा ते बारा हजारा पाँद मुहर लगाई, रूबेनो रे गोत्रो बीचा ते बारा हजारा पाँद, गादो रे गोत्रो बीचा ते बारा हजारा पाँद,⁶ आशेरो रे गोत्रो बीचा ते बारा हजारा पाँद, मनश्शह रे गोत्रो बीचा ते बारा हजारा पाँद,⁷ शमीनो रे गोत्रो बीचा ते बारा हजारा पाँद, लेविए रे गोत्रो बीचा ते बारा हजारा पाँद, इस्साकारो रे गोत्रो बीचा ते बारा हजारा पाँद,⁸ जबूलूनो रे गोत्रो बीचा ते बारा हजारा पाँद, यूसुफो रे गोत्रो बीचा ते बारा हजारा पाँद और बिन्यामीनो रे गोत्रो बीचा ते बारा हजारा पाँद मुहर लगाई।

1, 44,000

9 इजी ते बाद मैं नजर दित्ती और हर एक जाति, कुल, लोक और पाषा बीचा ते एक एड़ी बड़ी पीड़ देखी, जेतेखे कोई गिणी नि सको था। सेयो सफेद टाले पईने की और आपणे आथो रे खजूरो रिया डालिया लयी की सिंहासनो रे सामणे और मिन्दूए रे सामणे खड़ी रे थे। 10 और सेयो लोक जोरे की आक्का पायी की बोलणे लगी रे थे,
“म्हारे परमेशरो रा, जो सिंहासनो पाँदे बैठी रा
और मिन्दूए री जय-जयकार ओ
कऊँकि ये सेयो ईए जिने आसा रा उद्धार कित्तेया।”

11 और सारे स्वर्गदूत, तेस सिंहासन, बुजुर्ग और चारो प्राणिया रे चऊँ कनारे खड़ी रे थे। तेवे सेयो सिंहासनो रे सामणे मुँओ रे पारे रूड़ी गो और परमेशरो गो माथा टेकेया, 12 और बोलेया,
“आमीन्,
म्हारे परमेशरो री स्तुति,
महिमा, ज्ञान, धन्यवाद, आदर, सामर्थ
और शक्ति जुगो-जुगो तक बणी री रओ।
आमीन्।”

13 इजी ते बाद बुजुर्गा बीचा ते एकी जणे मांते पूछेया, “क्या तुसे जाणोए कि ये सफेद टाले पईने रे लोक कूणे? और केथा ते आयी रे?”

14 मैं तेसखे जबाब दित्तेया, “ओ श्रीमान् जी, आँऊ नि जाणदा पर तूँ ई जाणेया।”

तिने बुजुर्गे माखे बोलेया, “ये सफेद टाले पईने रे सेयो लोक ए, जो तेस बड़े क्लेशो ते निकली की आयी रे। इने लोके आपणे टाले मिन्दूए रे खूने की तोई की सफेद करी राखे। 15 इजी बजअ ते,
“सेयो परमेशरो रे सिंहासनो रे सामणे ए
और तेसरे मन्दरो रे रात-दिन सेवा करोए
और जो सिंहासनो पाँदे बैठी रा,
तेस तिना पाँदे आपणा तम्बू ताणना।

16 सेयो फेर पूखे-त्याये नि ऊणे

और ना ई तिना पाँदे तूप

और ना ई कोई तपन पड़नी।

17 कऊँकि मिन्दू, जो सिंहासनो रे बीचे ए,

तेस तिना री रखवाली करनी

और सेयो जीवनरूपी सूबला रे नेड़े लयी जाणे

और परमेशरे तिना री आखी ते सारे आसू टूसी देणे।”

8

~~~~~

1 जेवे मिन्दूए साती मुहर खोली, तेवे स्वर्गो रे आदे कंटे तक सन्गाटा छाईगा। 2 और मैं सेयो सात स्वर्गदूत, जो परमेशरो सामणे खड़े रे रओए, देखे और तिना खे सात तुरहिया दित्तिया।

3 तेवे एक ओर स्वर्गदूत सुईने री तूपदानी लयी की आया और बेदिया रे नेड़े खड़ा ऊईगा। तेस स्वर्गदूतो खे बऊत सारा तूप दित्तेया कि सारे परमेशरो रे लोका री प्रार्थना साथे, सुईने रिया तेसा बेदिया पाँदे, जो सिंहासनो रे सामणे ए, चढाओ। 4 और तेस तूपो रा तुआँ परमेशरो रे लोका री प्रार्थना साथे, स्वर्गदूतो रे आथो ते, परमेशरो सामणे पऊँछी गा। 5 तेवे स्वर्गदूते तूपदानी लयी की तिदे बेदिया री आग परी और तरतिया रे पाई ती, तेवे गिड़ना, आवाज, बिजलिया और इल्लण ऊणे लगे।

~~~~~

6 तेबे सेयो सातो स्वर्गदूत, जिना गे सात तुरहिया थिया, फूकर देणे खे त्यार ऊईगे। 7 पईले स्वर्गदूते तुरहिया रे फूकर दिती और खूनो साथे मिले रे ओले और आग पैदा ऊई और तरतिया रे पाई ती। इजी बजअ ते तरतिया रा तीजा इस्सा फूखी गा और डाला रा तीजा इस्सा फूखी गा और सारा अरा काआ बी फूखी गा।

8 जेबे दूजे स्वर्गदूते तुरहिया रे फूकर दिती, तेबे मानो आगी जेडा बलदा ऊआ एक बडा पाहूड समुद्रो रे पायी ता। इजी बजअ ते समुद्रो रा तीजा इस्सा खून ऊईगा। 9 और समुद्रो री एक तिहाई बणाई रिया चीजा, जिना रे जिऊ था, मरी गिया और जाहूजा रा तीजा इस्सा नाश ऊईगा।

10 जेबे तीजे स्वर्गदूते तुरहिया रे फूकर दिती, तेबे एक बडा तारा, जो मशाली जेडा बलो था, सर्गों ते टूटेया और नदिया रे तीजे इस्से पाँदे और पाणि ए री सूबला पाँदे आयी की पड़ी गा। 11 तेस तारे रा नाओं नागदौना था। इजी बजअ ते एक तिहाई पाणी जईरीला और कडुआ ऊईगा। बऊत सारे माणू तेस जईरीले और कडुए पाणी पीणे ते मरी गे।

12 जेबे चऊथे स्वर्गदूते तुरहिया रे फूकर दिती, तेबे सूरजो री तीजे इस्से पाँदे और चाँदो रे तीजे इस्से पाँदे और तारेया रे तीजे इस्से पाँदे मुसीबत आईगी। इजी बजअ ते तिना रा तीजा इस्सा काला ऊईगा और दिनो रे तीजे इस्से पाँदे न्हारा ऊईगा और तियाँ ई राती रे बी।

13 जेबे आँऊ ये सब देखणे ई लगी रा था, तो सर्गों रे बीचे एक उकाब उडदे ऊए देखेया और जोरे की ये बोलदे ऊए सुणेया: “तिना स्वर्गदूता री तुरहिया रे शब्दो री बजअ ते, जिना रे फूकर देणी बाकि ए, तरतिया रे रणे वालेया पाँदे हाय! हाय!”

9

1 जेबे पांजुए स्वर्गदूते तुरहिया रे फूकर दिती, तेबे मैं स्वर्गों ते तरतिया पाँदे एक तारा रुडदा ऊआ देखेया। तेसखे एडे डूगे गड्डे खे खोलणे री कुंजी दिती जेतेरी गईराईया रा कोई अंत नि ए। 2 जेबे तिने से डूगा गड्डा खोलेया, तेबे तेस गड्डे ते बड़ी पट्टिया जेडा तुआँ निकलेया और तेस गड्डे रे तुएँ ते सूरज और सर्गों रे न्हारा ऊईगा। 3 तेबे तेस तुएँ बीचा ते तरतिया पाँदे टिड्डिया निकलिया और तिना टिड्डिया खे तरतिया रे लोका खे बिच्छुआ जेड़ी डंग बाणे री तागत दिती। 4 तेबे तिना टिड्डिया खे बोलेया कि ना तरतिया रे काओ खे, ना केसी अरयालिया खे, ना केसी डालो रा नुकशण करो, बस तिना मांणूआ रा, जिना रे माथे रे परमेशरो री मुहर नि ए। 5 तिना टिड्डिया खे काणे रा तो नि, पर पाँज मीन्ने तक लोका खे पीड देणे रा अक्क दितेया और तिना री पीड एड़ी थी, जेड़ी बिच्छुआ री डंग बाणे ते मांणूआ खे ओई। 6 तिना पाँज मीन्नेया दे मांणूआ मौत टोलनी, पर मिलणी नि और मरने री इच्छा करनी और मौत तिना गे ते नठी जाणी।

7 तिना टिड्डिया रा आकार लडाईया खे त्यार कित्ते रे कोडेया जेडा था और तिना रे सरो पाँदे मानो सुईने रे जे मुकट थे और तिना रे मूँ मांणूआ जेडे थे। 8 तिना रे बाल जवाणसा जेडे लाम्बे थे और दाँद शरो जेडे मजबूत थे। 9 तिना रा शरीर मानो लोए री झिलमा ते टकी रा था। तिना रे पंखो री आवाज एड़ी थी, जेड़ी रथ और बऊत सारे कोडेया री ओई, जो लडाईया रे दौडोए। 10 तिना री पूँछ बिच्छुआ जेड़ी थी और तिना रे डंग थे और तिना खे पाँज मीन्ने तक मांणूआ खे दुःख पऊँछाणे री जो शक्ति देई राखी थी, से तिना री पूँछा रे थी। 11 जेते डूगे गड्डे री गईराईया अंत नि ए तेतेरा रा दूत तिना पाँदे राजा था। तेस राजे रा नाओं इब्रानिया रे अबदोन और यूनानिया रे अपुल्लयोन था।

12 पईली मुसीबत बिती चुकी, देखो, एबे इना ते बाद दो मुसीबता ओर ऊणे वालिया ए।

13 जेबे छठे स्वर्गदूते तुरहिया रे फूकर दिती, तो जो सुईने री बेदी परमेशरो सामणे ए, तेसा वेदिया रे चऊँ कूणयां रे सींगो बीचा ते आऊँदा ऊआ मैं एक शब्द सुणेया। 14 मानो कोई तेस छठे स्वर्गदूतो ते, जेसगे तुरही थी, बोलेया, “तिना चारो दूता खे, जो बड़ी नदी फराता गे बाने रे ए, खोली देओ।” 15 तेबे सेयो चारो दूत, जो एसा कअडिया, दिन, मीन्ना और सालो खे त्यार कित्ते थे,

माणूआ रे तीजे इस्से खे काणे खे आजाद करी ते । 16 और फौजा रे सवारिया री गिणती बी करोड़ थी, मैं तिना री गिणती सुणी ।

17 माखे एस दर्शनो रे कोड़े और तिना रे एड़े सवार दिखे, जिना री झिलम आग, धूमरकान्त और गन्धको जेड़ी थी । तिना कोड़ेया रे सिर शेरों रे सिरों जेड़े थे और तिना रे मुँओ ते आग, तुआँ और गन्धक निकलो थी ।

18 इना तिना महामारिया, मतलब-आग, तुआँ और गन्धका ते जो तेसरे मुँओ ते निकलो थी, माणूआ रा तीजा इस्सा काई ता । 19 तिना कोड़ेया री शक्ति तिना रे मुँओ रे और तिना री पूँछा रे थी । कऊँकि तिना री पूँछ सापो जेड़ी थी और तिना पूँछा रे सिर बी थे और इना तेई सेयो लोका खे दुःख देओ थे ।

20 और बाकि माणू जो तिना महामारिया ते नि मरे थे, आपणे आथो रे कामो ते मन नि फेरया कि दुष्टात्मा री, सुईना, चाँदी, पीतल, पात्थर और काठो री मूर्तिया री पूजा नि करो, जो ना देखी सकोई, ना सुणी सकोई और ना ई चली सकोई । 21 और जो खून, जादू-टोणा, व्याभिचार और चोरिया तिने किती थी, तिना ते मन नि फेरया ।

10

?????????? ?? ???? ???? ?

1 तेबे मैं एक ओर तागतबर स्वर्गदूत बादलो ते किरे रे, स्वर्गों ते उतरदे ऊए देखेया । तेसरे सिरों पाँदे बादलो रा मेघधनुष था और तेसरा मूँ सूरजो जेड़ा और तेसरे पैर आगी रे खम्बे जेड़े थे । 2 तिने आपणा दाँगा पैर समुद्रो रे और खूँजा तरतिया पाँदे राखेया । तेसरे आथो रे एक छोटी जी खुली री कताब थी । 3 तेबे से इतणी जोरे की चिंगेया, जेड़ा शेर गर्जोआ और जेबे से चिंगेया, तो गर्जणा री सात आवाजा सुणिया । 4 जेबे सातो गर्जणा री आवाजा सुणी चुकिया, तो आऊँ लिखणे वाला ई था, पर मैं स्वर्गों ते ये आवाज सुणी, “जो गल्ला गर्जणा रे तिना सात आवाजा ते सुणी राखिया, तिना खे गुप्त राख और लिख नि ।”

5 जेस स्वर्गदूतो खे मैं तरतिया पाँदे और समुद्रो रे खड़ेया रा देखेया था, तिने आपणा दाँगा आथ स्वर्गों री तरफा खे चकेया, 6 और तिने तेसरी जो जुगो-जुगो तक जिऊँदा ए और जिने स्वर्ग और जो कुछ तिदे ए, तरती और जो कुछ तिदे ए और समुद्रो खे और जो कुछ तिदे ए, बणाया, तेसरी ई कसम खाई कि बोलेया, “एबे तो ओर देर नि ऊणी । 7 तेस बखते जेबे सातुए स्वर्गदूतो तुरहिया रे फूकर देणी, परमेशरो आपणी गुप्त योजना पूरी करनी जेतेरा संदेश तिने आपणे दास भविष्यबक्तेया खे दित्तेया था ।”

8 जो आवाज मैं स्वर्गों ते बोलदे ऊए सुणी थी, से फेर मां साथे गल्ला करने लगेया, “जा, जो स्वर्गदूत समुद्र और तरतिया पाँदे खड़ी रा, तेसरे आथो री खुली री कताब लयी लो ।”

9 तेबे मैं स्वर्गदूतो गे जाई की बोलेया, “ये छोटी जी कताब माखे दे ।” और तिने माखे बोलेया, “लओ, इजी खे खाई दे और एसा तेरा पेट कडुआ तो करना, पर तेरे मुँओ रे सईतो जेड़ी मीठी लगणी ।” 10 तेबे आऊँ से छोटी कताब स्वर्गदूतो रे आथो ते लयी की खाई गा । से मेरे मुँओ रे सईतो जेड़ी मीठी तो लगी, पर जेबे आऊँ तेसा खे खाई चुकेया, तो मेरा पेट कडुआ ऊईगा । 11 तेबे माखे ये बोलेया गया, “ताखे बऊत सारे लोका, जातिया, पाषा और राजेया रे बारे रे फेर भविष्यवाणी करनी ऊगी ।”

11

?? ???? ?

1 तेबे मांगे नापणे खे एक नगल दित्तेया और तिने बोलेया, “उठ, परमेशरो रे मन्दर और बेदिया खे नापी लओ और तिदे भक्ति करने वालेया री गिणती करी लओ । 2 पर मन्दरो रा बारला आँगण छाड़ी दे, तिजी खे नि नाप कऊँकि से दुजिया जातिया खे देई राखेया । तिना लोका पवित्तर नगर यरूशलेम बयाली मीन्ने तक कसणा । 3 तेस बखते, मां आपणे दो गवाओ खे ये अक्क देणा कि सेयो

टाट टखी की एक हजार दो सौ साठ दिन तक भविष्यवाणी करो।”⁴ ये दोनो गवाह ई जैतूनो रे दो डाल और दो दिऊए ए, जो तरतिया पाँदे राज करने वाले प्रभुए रे सामणे खड़े रओए।⁵ जे कोई तिना खे नुकशाण पऊँछाणा चाओआ, तो तिना रे मुँओ ते आग निकली की तिना रे बैरिया खे स्वा करी देओई। जे कोई तिना खे नुकशाण पऊँछाणा चाओगा, तो जरूर ईयाँ ई काया जाणा।⁶ परमेशरे तिना खे ये अक्क देई राखेया कि तिना री भविष्यवाणिया रे दिना रे सेयो सर्गो खे बंद करी देओ, ताकि बादल नि बरसो। तिना खे ये अक्क बी मिलेया राए कि पाणिए खे खूनो रे बदली देओ और जेबे-जेबे चाओ तेबे-तेबे तरतिया पाँदे हर प्रकारा री मुसीबत ल्याओ।

⁷ जेबे सेयो दो गवा आपणी गवाई देई चुकणे, तेबे से डांगर, जो तेते डूगे गड्डे ते जेते री गईराईया रा अंत निए निकलना और तिना साथे लड़ी की तिना ते जीतणा और सेयो काई देणे।⁸ तेबे तिना दूँई गवा री लोथा जो काई राखे थे, तेस बड़े यरूशलेम नगरो रे चौको पाँदे पड़िया री रणियां, जेती तिना रा प्रभु बी करूसो पाँदे चढ़ाया था। चिह्नो रे तौरो पाँदे ये नगर सदोम और मिस्र नगरो जेड़ा ए।⁹ सब लोक, कुल, पाषा और जातिया बीचा ते लोक तिना दूँई गवा री लोथा साडे तीन दिन तक देखदे रणे, पर तिना री लोथा कबूरा रे कसी खे बी राखणे नि देणियां।¹⁰ मरने ते पईले ये दोनो गवा तरतिया रे लोका खे बऊत सताओ थे। जेबे तरतिया रे लोका ये सुणना कि सेयो दोनो काईते रे, तेबे सेयो लोक तिना रे मरने ते खुश और मग्न ऊणे और एकी-दूजे गे पेंट पेजणी।

¹¹ पर साडे तीन दिन बाद परमेशरो री तरफा ते जिन्दगिया री आत्मा तिना पाँदे बैठी गी और सेयो आपणे पैरो रे पारे खड़े ऊईगे और तिना खे देखणे वाले बऊत डरी गे।¹² तिजी ते बाद तिना दूँई खे स्वर्गो ते एक बड़ा शब्द सुणया, “एती ऊबे आओ।” और ये सुणी की सेयो बादलो पाँदे सवार ऊई की आपणे बैरिया रे देखदे-देखदे स्वर्गो पाँदे चढ़ी गे।

¹³ तेबे तेस बखते ई एक बड़ा-पारी भूकंप ऊआ और यरूशलेम नगरो रा दसुआ इस्सा टली गा और तेस ई भूकंपो ते सात हजार मांणू मरी गे, बाकि डरी गे और स्वर्गो रे परमेशरो री महिमा किती।

¹⁴ दूजी मुसीबत बिती गी, देखो तीजी मुसीबत चट ई आऊणे वाली ए।

???? ???? ?

¹⁵ जेबे सातुए स्वर्गदूते तुरहिया रे फूकर दिती, तो स्वर्गो रे इजी रे वारे रे बड़े-बड़े शब्द ऊणे लगे, “दुनिया रा राज्य म्हारे प्रभुए रा और तेसरे मसीह रा ऊईगा और तेस जुगो-जुगो तक राज्य करना।”

¹⁶ तेबे चऊबी बुजुर्ग, जो परमेशरो सामणे आपणे-आपणे सिंहासनो पाँदे थे बैठे रे, मुँओ रे पारे रूड़ी की, परमेशरो गे माथा टेकी की ¹⁷ ये बोलणे लगे, “ओ सर्वशक्तिमान् प्रभु परमेश, जो आए और जो था, आसे तुसा खे धन्यवाद करूँए तुसे बड़ी सामर्था खे कामो रे ल्याई की राज्य करी राखेया।”

¹⁸ तेबे दुजिया जातिया खे रोष आईगा और तुसा रा प्रकोप आयी की पड़ी गा और से बखत आयी पऊँछी रा कि मरेया रा न्याय किन्तेया जाओ और तुसा रे दास भविष्यबक्तेया खे, परमेशरो रे लोका खे और तिना छोटैया बड़ेया खे, जो तुसा रे नाओ ते डरोए, बदला दिन्तेया जाओ और तरतिया खे बगयाडने वाले नाश किन्ते जाओ

¹⁹ और परमेशरो रा मन्दर, जो स्वर्गो रे ए, से खोलेया और तेसरे मन्दरो रे तेसरी वाचा रा सन्दूक दिशेया। और तेती बिजलिया, आवाज, गर्जण और ईल्लण ऊणे लगे और बड़े-बड़े ओले पड़े।

12

१२:१२-१२:१२

1 इना गल्ला ते बाद स्वर्गो रे एक नऊखा नजारा दिशेया । मैं देखेया कि एक जवाणस सूरज टखे रे थी और चाँद तेसा रे पैरा निठे था और तेसा रे सियो पाँदे बारा तारेया रा मुकट था । 2 से जवाणस गर्भवती थी और चिंगणे लगी री थी, कऊँकि तेसा खे जमणे रिया पीड़ा लगी री थिया और से बच्चा जम्मणे रिया पीड़ा रे थी । 3 तेबे स्वर्गो रे एक ओर नऊखा नजारा दिशेया और देखो, एक बड़ा लाल अजगर था, जेसरे सात सिर और दस सींग थे और तेसरे सातो सियो पाँदे सात राजमुकट थे । 4 तेसरी पूँछे, सर्गो रे तारेया रा तीजा इस्सा खिंजी की तरतिया रे पायी ता । और से अजगर तेसा जवाणसा सामणे, जो बच्चे खे पैदा करने वाली थी, खड़ा ऊईगा, ताकि जेबे से बच्चा पैदा करो, तो से तेसा रे बच्चे खे खाई जाओ । 5 तेसा रे पाऊ ऊआ, जो लोए रा राजदण्ड लये रे, सबी जातिया पाँदे राज्य करने वाला था । और तेसा रा बच्चा परमेशरो गे और तेसरे सिंहासनो गे चकी की पऊँछाई ता । 6 और से जवाणस तेसा सुनसाण जगा खे नठी गी, जेती परमेशरो री तरफा ते तेसा खे जगा त्यार करी राखी थी, ताकि से तेती एक हजार दो सौ साठ दिना तक पाली जाओ ।

7 तेबे स्वर्गो रे लड़ाई शुरू ऊईगी । मीकाईल और तेसरे स्वर्गदूत अजगरो साथे लड़ने खे निकले, अजगर और तिना रे दूत बी तेस साथे लड़े । 8 पर से अजगर आरी गा और से और तेसरे दूत स्वर्गो ते निकयाली ते । 9 तेबे से बड़ा अजगर, मतलब सेई पुराणा साप, जेसखे शैतान बोलोए और सारे दुनिया खे भरमाणे वाला ए, तरतिया रे रूड़ाईता और तेसरे दूत बी तेस साथे रूड़ाईते ।

10 तेबे मैं स्वर्गो ते ये बड़ा शब्द आऊँदे ऊए सुणेया,

“एबे म्हारे परमेशरो रा उद्धार, सामर्थ, राज्य
और तेसरे मसीह रा अक्क प्रगट ऊई रा ।
कऊँकि म्हारे पाईया पाँदे दोष लगाणे वाला,
जो दिन-रात म्हारे परमेशरो सामणे,
तिना पाँदे दोष लगाया करोआ, रूड़ाई ता रा ।

11 और सेयो मिन्दूए रे खूनो री बजअ ते
और आपणी गवाईया रे वचनो री बजअ ते, तेस पाँदे जयवंत ऊए ।

कऊँकि तिने आपणे प्राण प्यारे नि जाणे,
एथो तक की मौत बी सयी ली ।

12 इजी बजअ ते, ओ स्वर्गो
और तिना रे रणे वालेयो मगन रओ,
ओ तरती और समुद्र, तुसा खे धिक्कार ए,
कऊँकि शैतान बड़े ई रोषो रे
तुसा गे उतरी की आईगा रा,
कऊँकि से जाणोआ कि तेसरा
थोड़ा ई बखत बाकि ए ।”

13 जेबे अजगरे महसूस कितेया कि आऊँ तरतिया पाँदे रूड़ाई ता रा, तो से जवाणस, जेसा रे पाऊ जम्मेया था, तेसा खे सताणे लगेया । 14 तेबे तेसा जवाणसा खे बड़े उकाबो जेडे दो पंख दित्ते, ताकि सापो गे ते उडी की सुनसाण जगा रे पऊँछी जाओ, जेती से एक बखत और बखतो और आदे बखतो तक पाली जाओ । 15 तेबे अजगरे तेसा जवाणसा पीछे आपणे मुँओ ते नदिया जेड़ा पाणी लटेया, कि तेसा खे एसा नदिया ते हड़ाई देओ । 16 पर तरतिये तेसा जवाणसा री मताद किती और आपणा मुँ खोली की, से नदी, जो अजगरे आपणे मुँओ ते बाहूई थी, पी ती । 17 नतीजन, अजगरो खे जवाणसा पाँदे रोष आईगा तेबेई तेसा री बाकि ल्वादा ते, जो परमेशरो रे ऊकमो खे मानोए और प्रभु यीशुए री गवाई देणे रे टीके रे थे, लड़ने खे गया । 18 और से अजगर समुद्रो रे कनारे पाँदे जायी की खड़ा ऊईगा ।

13



1 तेबे मैं एक डांगर समुद्रो ते निकलदा ऊआ देखेया, जेसरे दस सींग और सात सिर थे। तेसरे सातो सिरा पाँदे दस राजमुकुट थे और तेसरे हर सिरा पाँदे परमेशरो री निन्दा रे नाओं लिखी राखे थे। 2 जो डांगर मैं देखेया, से चीते जेड़ा था, तेसरे पैर पालूओ जेड़े थे, मूँ शैरो जेड़ा था। तिने अजगरे आपणी सामर्थ, आपणा सिंहासन और बड़ा अक्क तेसखे देईता। 3 मैं तेस डांगरो रे सिरा बीचा ते एकी पाँदे एक बड़ा-पारी जख्म देखेया, मानो से मरने वाला ए, तेबे तेसरे प्राण लणे वाला जख्म ठीक ऊईगा और सारी तरतिया रे लोक तेस पीछे-पीछे अचम्बा करदे ऊए चले। 4 तिने अजगरो री पूजा किती, कऊँकि तिने डांगरो से आपणा अक्क देईता था और ये बोली की डांगरो री पूजा किती कि, “एस डांगरो जेड़ा कूणे? कुण एस साथे लड़ी सकोआ?”

5 तेस डांगरो से त्वालिया मारने से और परमेशरो री निन्दा करने से अक्क दित्तेया। तेसखे बयाली मीन्ने तक काम करने रा अक्क दित्तेया। 6 तिने डांगरे परमेशरो री निन्दा करने से मूँ खोलिया कि तेसरा नाओं और तेसरा तम्बू, मतलब स्वर्गों रे रणे वालेया री निन्दा करो। 7 तेस डांगरो से ये अक्क दित्तेया कि परमेशरो रे लोका साथे लड़ो, तिना पाँदे जय पाओ। तेसखे हर एक कुल, लोक, पाषा और जातिया पाँदे अक्क दित्तेया। 8 तरतिया रे सब रणे वालेया तेस डांगरो री पूजा करनी मतलब सेयो लोक जिना रे नाओं दुनिया री शुरूआता तेई तेस मिन्दूए री जीवनी री कतावा रे नि लिखी राखे थे। से मिन्दू ईए जो काई राखेया था।

9 जो समजी सकोआ से तिजी से त्यानो साथे सुणो और मानी बी लओ।


10 जेसखे कैदा रे पड़ना ए,

से कैदा रे पड़ना,

जो तलवारी ते बाओगा,

जरूरी ए कि से तलवारी की काया जाणा,

परमेशरो रे लोका रा सब्ब और विश्वास इदे ई आए।



11 तेबे मैं एक ओर डांगर तरतिया ते निकलदे ऊए देखेया, तेसरे मिन्दूए जेड़े दो सींग थे और से अजगरो जेड़ा बोलो था। 12 ये तेस पईले डांगरो रा सारा अक्क तेस सामणे कामो रे ल्याओ था और तरती और तिदे रणे वालेया ते तेस पईले डांगरो री पूजा कराओ था, जेसरे प्राण लणे वाला जख्म ठीक ऊईगा था। 13 ये दूजा डांगर बड़े-बड़े चिह्न दखाओ था, एथो तक ई माणूआ सामणे सर्गों ते तरतिया पाँदे आगी री बरखा करी देओ था। 14 तिना बड़े-बड़े चिह्न री बजअ ते, जो तेस डांगरो सामणे दखाणे रा अक्क तेसखे दित्तेया था, से तरतिया पाँदे रणे वालेया से ईयां भरमाओ था कि तरतिया रे रणे वालेया से बोलो था कि जेस डांगरो रे तलवार लगी थी, से जिऊँदा ऊईगा रा, तेसरी मूरत बणाओ। 15 तेस दूजे डांगरो से तेस पईले डांगरो री मूरता रे प्राण पाणे रा अक्क दित्तेया, ताकि डांगरो री मूरत बोलणे लगी और जितणे लोक तेस डांगरो री मूरता री पूजा नि करो, तिना से काई देओ। 16 तेबे तिने दूजे डांगरे सबी लोका से छोटा या बड़ा, अमीर या गरीब और आजाद या दास सबी रे दाँणे आथो रे या तिना रे माथे पाँदे पईले डांगरो री छाप लगाणे के मजबूर कित्तेया। 17 ताकि तेसखे छाडी की, जेस पाँदे छाप, मतलब-तेस डांगरो रा नाओं या तेसरे नाओं रा अंक ओ और दूजा कोई लेण-देण नि करी सको। 18 इजी से समजणे से दमाको री जरूरत ए। पर जेसगे दमाक ए से ये पता लगाई सकोआ कि एस डांगरो रे अंको रा क्या मतलब ए। कऊँकि ये एक माणूए रा नाओं ए। और तेसरा अंक छे सौ छयाट ए।

14




1 तिना गल्ला ते बाद मैं नजर दिती और देखो, से मिन्दू सिय्योने रे पाहड़ो पाँदे खड़ी रा । और तेस साथे एक लाख चवाली हजार जणे ए, जिना रे माथे पाँदे तेसरा नाओं और पिते रा नाओं लिखी राखेया । 2 और स्वर्गों ते माखे एक एड़ी आवाज सुणी, जो बऊत सारे पाणिण् री और बड़ी गिड़ने री जी आवाज थी और जो आवाज मैं सुणी, से एड़ी थी, मानो बीणा बजाणे वाले बीणा बजाओए । 3 सेयो एक लाख चवाली हजार लोक सिंहासनों सामणे और चारो प्राणिया सामणे और बुजुर्गा सामणे, मानो ये नया गाणा गाणे लगी रे थे और तिना एक लाख चवाली हजार जणेया खे छाडी की, जो तरतिया पाँदा ते मोले लयी राखे थे, कोई से गाणा नि सिखी सको था । 4 ये एक लाख चवाली हजार सेयो लोक ए, जो जवाणसा साथे अशुद्ध नि ऊए, पर कुआँरे ए, यो सेयो ईए कि जेती केथी मिन्दू जाओ था, सेयो तेस पीछे चली पड़ो थे । यो तो परमेशर और मिन्दूए खे पईले फलो जेडे माणूआ बीचा ते मोले लयी राखे । 5 तिना रे मुओ ते कदी चूट नि निकलेया, सेयो निर्दोष ए ।



6 तेबे मैं एक ओर स्वर्गदूत सर्गों रे उड़दा ऊआ देखेया, जेसगे तरतिया रे रणे वालेया री हर जाति, कुल, पाषा और लोका खे सुनाणे खे सदा कालो रा ईश्वरीय सुसमाचार था । 7 और तिने जोंरे की बोलेया, “परमेशरो ते डरो और तेसरी महिमा करो, कऊँकि तेसरे न्याय करने रा बखत आयी पऊँछी रा । और तेसरी भक्ति करो, जिने स्वर्ग, तरती, समुदर और पाणिण् रिया सूबला बणाईया ।”

8 तेबे इजी ते बाद एक ओर दूजा स्वर्गदूत ये बोलदा ऊआ आया, “रूडी गा, से बड़ा बेबीलोन रूडी गा, जिने आपणे व्याभिचारो री कोपमय शराब सबी जातिया खे पलयाई ।”

9 तेबे इना ते बाद एक ओर तीजा स्वर्गदूत जोंरे की ये बोलदा ऊआ आया, “जो कोई तेस डांगर और तेसरी मूरता री पूजा करो और आपणे माथे रे या आपणे आथो रे तेसरी छाप लओ, 10 तो तेस परमेशरो रे प्रकोपो री छुदी शराब, जो तेसरे रोषो रे कटोरे रे पाई राखी, पीणी और पवित्तर स्वर्गदूता सामणे और मिन्दूए सामणे आग और गन्धको री पीड़ा रे पड़ना । 11 तिना री पीड़ा रा तुआँ जुगो-जुगो तक उठदा रणा और जो तेस डांगर और तेसरी मूरता री पूजा करोए और जो तिना रे नाओं री छाप लओए, तिना खे रात-दिन चैन नि मिलणा ।” 12 कऊँकि ये सारिया गल्ला ऊणे वालिया ए इजी खे परमेशरो रे लोका रा सबर इदे ईए, जो परमेशरो री आज्ञा खे मानोए और यीशुए पाँदे विश्वास करोए । 13 मैं स्वर्गों ते ये आवाज सुणी, “लिख: जो मुड़दे प्रभुए रे मरोए, सेयो एबुए ते धन्य ए ।” आत्मा बोलोआ, “आ, कऊँकि तिना खे आपणी मईणता ते आराम मिलणा और तिना रे काम तिना साथे ओए ए ।”



14 तेबे मैं नजर दिती और देखो, एक उजला बादल था और तेस बादलो पाँदे माणू रे पुत्रो जेड़ा कोई बैठी रा था, जेसरे सिरो पाँदे सुईने रा मुकट और आथो रे पैनी दराटी थी । 15 तेबे एकी और स्वर्गदूते मन्दरो ते निकली की तेसते, जो बादलो पाँदे बैठी रा था, जोंरे की आक्का पाई की बोलेया, “आपणी दराटी लयी की बाड, कऊँकि बाडणे रा बखत आईगा रा, कऊँकि तरतिया री फसल पाक्की चुकी री ।” 16 तेबे से जो बादलो पाँदे बैठी रा था, तिने तरतिया पाँदे आपणी दराटी लगाई और तरतिया री फसल बाडी ती ।

17 तेबे एक और स्वर्गदूत तेस मन्दरो ते निकलेया, जो स्वर्गों रे ए और तेसगे बी पैनी दराटी थी । 18 तेबे एक ओर स्वर्गदूत, जेसखे आगी पाँदे अक्क था, बेदिया ते निकलेया और जेसगे पैनी दराटी थी, तिने जोंरे की बोलेया, “आपणी पैनी दराटी लगाई की, तरतिया री अँगूरो री बेला रे गुच्छे बाडी दे, कऊँकि तिजी रे अँगूर पाक्की चुकी रे ।” 19 तेबे तिने स्वर्गदूते आपणी दराटी लगाई और तरतिया पाँदलिया अँगूरा रिया बेली रा फल बाडी की आपणे परमेशरो रे प्रकोपो रे बड़े रसकूण्डो रे पाईता 20 और नगरो ते बारे तेस रसकूण्डो रे अँगूर माण्डे और रसकूण्डो ते इतणा खून निकलेया कि कोड़ेया री लगामा तक पऊँछेया और से सौ कोह तक बईगा ।

15

~~~~~

1 इजी ते बाद में स्वर्गों रे एक ओर बड़ा और नऊखा नजारा देखेया, मतलब-सात स्वर्गदूत, जिना गे सातो आखरी मुसीबता थिया, कऊँकि तिना रे ऊणे ते परमेशरो रे प्रकोपो रा अंत ए।<sup>2</sup> और मैं आगी साथे मिले रा काँचो जेड़ा एक समुद्र देखेया और जो तेस डांगरो पाँदे, तेसरी मूरता पाँदे और तेसरे नाओं रे अंको पाँदे जयवंत ऊए थे, सेयो तेस काँचो रे समुद्रो रे नेडे परमेशरो री बीणा लयी की खड़े देखे।<sup>3</sup> सेयो परमेशरो रे दास मूसे रा गाणा और मिन्दूए रा गाणा गायी-गायी की बोलो थे,

“ओ सर्वशक्तिमान् प्रभु परमेशर,  
तेरे काम बड़े और नऊखे ए,

ओ जुगो-जुगो रे राजा,  
तेरी चाल ठीक और सच्ची ए।

4 ओ प्रभु, तांते कुण नि डरना  
और केस तेरे नाओं री महिमा नि करनी?

कऊँकि बस तूँ ई पवित्तर ए।

सारिया जातिया तांगे आयी की माथा टेकणा,  
कऊँकि तेरे न्याय रे काम प्रगट ऊईगे रे।”

5 इजी ते बाद मैं देखेया कि स्वर्गों रे मन्दर खोलेया और तिदे साक्षिया रा तम्बू था।<sup>6</sup> और सेयो सातो स्वर्गदूत, जिना गे सातो मुसीबता थिया, मलमलो रे शुद्ध और चमकदे ऊए टाल्ले पईनी की और छातिया पाँदे सुईने री पट्टिया बानी की मन्दरो ते निकले।<sup>7</sup> तेबे तिना चारो प्राणिया बीचा ते एकी जणे तिना सातो स्वर्गदूता खे परमेशरो रे, जो जुगो-जुगो तक जिऊँदा ए, प्रकोपो ते फरे रे सात सुईने रे कटोरे दिते<sup>8</sup> और परमेशरो री महिमा और तेसरी सामर्था री बजअ ते मन्दर तूँए की फरी गा। और जदुओ तक तिना सातो स्वर्गदूता रिया सातो मुसीबता खत्म नि ऊईया, तदुओ तक कोई मन्दरो रे नि जाई सकेया।

## 16

~~~~~

1 तिजी ते बाद मैं मन्दरो रे कोई जोरे की तिना सातो स्वर्गदूता खे ये बोलदे ऊए सुणेया, “जाओ, परमेशरो रे प्रकोपो रे सातो कटोरे तरतिया पाँदे लटी देओ।”

2 पईले स्वर्गदूते जाई की आपणा कटोरा लटी ता। और तिना माणूआ रे, जिना पाँदे डांगरो री छाप थी और जो तेसरी मूरता री पूजा करो थे, एक किस्मा रा बुरा और पीड़ देणे वाला फोड़ा निकलेया।

3 फेर दूजे स्वर्गदूते आपणा कटोरा समुद्रो बीचे लटी ता और से मरे रे जे माणूए रे खूनो जेड़ा बणीगा। और समुद्रो रे सारे जीव मरी गे।

4 तीजे स्वर्गदूते आपणा कटोरा नदिया और पाणिए री सूबला पाँदे लटी ता और सेयो खून बणी गे।⁵ और मैं पाणिए रे स्वर्गदूतो खे ये बोलदे ऊए सुणेया,

“ओ पवित्तर परमेशर, जो आए और जो था,
तूँ न्यायी ए और तैं ये न्याय कित्तेया।

6 कऊँकि तिने परमेशरो रे लोका रा और भविष्यबक्तेया रा खून बाहूई राखेया था
और तैं तिना खे खून पल्लयाया, कऊँकि सेयो इजी जोगे ईए।”

7 और मैं फेर बेदिया ते ये आवाज सुणी,
“आ, ओ सर्वशक्तिमान् प्रभु परमेशर,
तेरे फैसले ठीक और सच्चे ए।”

8 चौथे स्वर्गदूते आपणा कटोरा सूरजो पाँदे लटी ता और तेसखे माणूआ खे आगी साथे फूकणे रा अक्क दित्तेया । 9 माणू बड़ी-पारी गर्मिया ते फूखी गे और तिने लोके परमेशरो रे नाओं री, जेसखे इना मुसीबता पाँदे अक्क ए, निन्दा किती और आपणे पापो ते मन नि फेरैया और ना ई तेसरी महिमा किती ।

10 पांजुए स्वर्गदूते आपणा कटोरा तेस डांगरो रे सिंहासनो पाँदे लटी ता और नतीजन, तेसरे पूरे राज्य रे न्हेरा ऊईगा । और लोक पीडा रे मारे आपणी-आपणी जीब चबाणे लगे । 11 आपणी पीड और फोडेया री बजअ ते तिने स्वर्गो रे परमेशरो री निन्दा किती । पर तिने लोके आपणे-आपणे बुरे कामो ते मन नि फेरैया ।

12 छठे स्वर्गदूते आपणा कटोरा बड़ी फरात नदिया पाँदे लटी ता और नतीजन, तिजी रा पाणी सूकी गा, कि पूर्व दिशा रे राजेया खे बाट त्यार ऊई जाओ । 13 और मैं तेस अजगरो रे मुँओ ते और तेस डांगरो रे मुँओ ते और तेस चूटे भविष्यवक्ते रे मुँओ ते, तीन अशुद्ध आत्मा मिनके रे रूपो रे निकलदे ऊए देखी । 14 यो बड़े-बड़े चिह्न दखाणे वाली दुष्टात्मा ए, जो सारे दुनिया रे राजेया गे निकली की इजी खे जाओई, ताकि तिना खे सर्वशक्तिमान् परमेशरो रे तेस बड़े दिनो री लड़ाईया खे कट्टा करो ।

15 मसीहे बोलेया, “देख, आऊँ चोरो जेड़ा आऊँआ, धन्य ए से, जो जागदा रओआ और आपणे टालेया री चौकसी करोआ कि नांगा नि फिरो और लोक तेसखे नांगा नि देखो ।”

16 और तिने दुष्टात्मे राजेया खे तेसा जगा रे कट्टे कित्तेया, जेतेखे इब्रानी पाषा रे हर-मगिदोन बोलेए ।

17 और सातुए स्वर्गदूते आपणा कटोरा अवा रे लटी ता, और मन्दरो रे सिंहासनो ते ये बड़ी आवाज ऊई, “पूरा ऊईगा ।” 18 फेर बिजलिया, आवाज, गर्जन और एक एड़ा ईल्लण ऊआ कि जदुओ ते माणूआ री उत्पत्ति तरतिया रे ऊई, तदुओ ते एड़ा ईल्लण कदी नि ऊआ था । 19 इजी ते तेस बड़े नगरो रे तीन टुकड़े ऊईगे और जातिया-जातिया रे नगर टली गे और बड़े बेबीलोनो री याद परमेशरो रे एती ऊई, कि से आपणे रोषो री जलना री शराब तेसखे पलयाओ । 20 और हर एक टापू आपणी जगा ते टली गा और पाहडो रा कोई पता नि लगेया । 21 और सर्गो ते माणूआ पाँदे मण-मण परी की ओले पड़े, कऊँकि ये मुसीबत बऊत ई पारी थी, लोके ओलेया री मुसीबता री बजअ ते परमेशरो री निन्दा किती ।

17

ॐॐॐ ॐॐॐॐ

1 जिना सात स्वर्गदूता गे सात कटोरे थे, तिना बीचा ते एकी जणे मांगे आयी की बोलेया, “ओरे आओ, आऊँ ताखे तेसा बड़ी वेश्या रा दण्ड दखाऊँ, जो बऊत सारे पाणिए पाँदे बैठी री । 2 तेसा साथे तरतिया रे राजे व्याभिचार कित्तेया और तरतिया रे रणे वाले तेसा रे व्याभिचारो री शराबो ते नशेड़ी ऊईगे थे ।”

3 आत्मा री मतादा ते स्वर्गदूत माखे सुनसाण जगा रे लयी गा और मैं लाल रंगो रे डांगरो पाँदे जो निन्दा रे नाओं ते परेया रा था और जेसरे सात सिर और दस सींग थे, एक जवाणस बैठी री देखी । 4 एसे जवाणसे बैंगणी और लाल रंगो रे टाले पईने रे थे और सुईने, किमती मणि और मोतिए की सजी री थी । और तेसा रे आधो रे एक सुईने रा कटोरा था, जो घृणित चीजा ते और तिजी रे व्याभिचारो री अशुद्ध चीजा ते फरे रा था । 5 तेसा रे माथे पाँदे एक एड़ा नाओं लिखी राखेया था जो एक राज ए । तिने बोलेया, “बड़ा बेबीलोन तरतिया री वेश्या और घृणित चीजा री माता ।” 6 मैं से जवाणस परमेशरो रे लोका रा खून और प्रभु यीशुए रे गवाओ रा खून पीणे ते नशेड़ी देखी और तेसा खे देखी की आऊँ हैरान ऊईगा ।

ॐॐॐॐ ॐॐ ॐॐॐॐॐ ॐ ॐॐॐ

7 तिने स्वर्गदूते माखे बोलेया, “तू हैरान नि ओ । आऊँ ताखे एसा जवाणसा रा और तेस डांगरो रा, जेते पाँदे से सवार ए और जेसरे सात सिर और दस सींग ए, पेत बताऊँआ । 8 जो डांगर तँ देखेया, ये

पईले तो था, पर एबे निए और जेते डूगे गड्डे री गईराईया रा अंत निए तथा ते निकली की नाशो रे पड़ना। और तरतिया रे सब रणे वालेया, जिना रे नाओं दुनिया री शुरूआता रे बखतो ते जिन्दगिया री कताबा रे नि लिखी राखे, एस डांगरो री ये दशा देखी की कि पईले था और एबे निए और फेर आयी जाणा, अचम्बा करना।

9 “इजी खे समजणे खे दमाको री जरूरत ए। सेयो सात सिर सात पाहूड ए, जिना पाँदे से जवाणस बैठी री। 10 और सेयो सात राजा बी ए। तिना बीचा ते पाँज तो पईले ई मरी चुके रे। और तिना बीचा ते एक एबुए। और एक एबुए तक नि आयी रा। पर जेबे से आऊणा, तो तेस कुछ बखतो तक ई राज करना। 11 जो डांगर पईले था और एबे निए, से आपू आटुआ ए और तिना सातो बीचा ते पैदा ऊआ और नाशो रे पड़ना।

12 “जो दस सींग तैं देखे, सेयो दस राजा ए, जिने एबुए तक राज्य नि करी राखेया। पर तेस डांगरो साथे कअड़िया परो खे राजेया जेड़ा अक्क पाणा। 13 यो सब दस राजा एक मन ऊणे और तिना आपणी-आपणी सामर्थ और अक्क तेस डांगरो खे देणा। 14 से डांगर और दस राजा मिन्दूए साथे लड़ने और मिन्दूए तिना पाँदे जय पाणी। कऊँकि से प्रभुए रा प्रभु और राजेया रा राजा ए। और जो तेसरे बुलाए रे ए, चूणे रे ए और विश्वासो जोगे तिना साथे ए, तिना री बी जय ऊणी।”

15 तेबे तिने माखे बोलेया, “जो पाणी तैं देखे, जिना पाँदे वेश्या बैठी री, सेयो लोक, पीड़, जाति और पाषा ए। 16 जो दस सींग तैं देखे तिना और डांगरा वेश्या ते बैर राखणा और से मजबूर और नांगी करी देणी और तेसा रा मांस खाई देणा और से आगी रे फूकी देणी। 17 कऊँकि परमेशरो तिना रे मनो रे ये पाणा कि सेयो तेसा री इच्छा पूरी करो और जदुओ तक परमेशरो रे वचन पूरे नि ऊई लो, तदुओ तक एक मन ऊई की आपणा-आपणा राज्य तेस डांगरो खे देई देओ। 18 से जवाणस, जो तैं देखी, से बड़ा नगर ए, जो तरतिया रे राजेया पाँदे राज्य करोआ।”

18

परकाशितवाक्य 18:6

1 इजी ते बाद मैं एक स्वर्गदूत स्वर्गो ते उतरदे ऊए देखेया। से बऊत ई सामर्थी था और तरती तेसरे तेजो ते चमकी गी। 2 तिने जोरे की आक्का पाई की बोलेया, “टली गा, बड़ा बेबीलोन टली गा रा।

और से दुष्टात्मा री रणे री जगा,
हर एक अशुद्ध आत्मा रा अड्डा

और हर एक अशुद्ध

और घृणित पंछिया रा अड्डा ऊईगा।

3 कऊँकि तेसा रे व्याभिचारो रे
शराबो री बजअ ते सब जातिया टली गी रिया।
तरतिया रे सामर्थी राजेया तेसा साथे
व्याभिचार करी राखेया

और तरतिया रे बपारी तेसा रे बऊत जादा
सुख-बिलासो री बजअ ते अमीर ऊई रे।”

4 तेबे मैं स्वर्गो ते केसी ओरी री आवाज सुणी,
“ओ मेरे लोको, तिजी बीचा ते निकली की आओ!
कि तुसे तिजी रे पापो रे शामिल ना ओ
और तेसरी मुसीबता बीचा ते कोई बी तुसा पाँदे नि पड़ो,

5 कऊँकि तेसा रे पाप स्वर्गो तक पऊँछी गो रे
और तेसा रे बुरे काम परमेशरो खे याद आयी रे।

6 जेड़ा तिने तुसा खे देई राखेया, तेड़ा ई तेसखे बी देओ
और तेसरे कामो रे मुताबिक तेसखे दुगणा बदला देओ,
जेती कटोरे रे तिने परी ता था, तिदे ई तेसखे दुगणा परी देओ।

7 जितणी तिने आपणी तारीफ किती और सुख-बिलास कित्तेया,
तिथणी तेसखे पीड़ और शोग देओ,
कऊँकि से आपणे मनो रे बोलोई,
‘आऊँ राणी ऊईगी री, बिदुआ नि
और शोगो रे कदी नि पडुँगी।’

8 इजी बजअ ते एक ई दिनो रे तेसा पाँदे मुसीबता आऊणियां,
मतलब मौत, शोग, अकाल
और से आगी रे स्वा करी देणी,
कऊँकि तेसा रा न्यायी प्रभु परमेशर तागतबर ए।

9 “तरतिया रे राजा, जिने तेसा साथे व्याभिचार और सुख-बिलास कित्तेया, जेबे तेसा रे फूकणे रा
तुआँ देखणा, तो तेसा खे रोणे और छाती पीटणी। 10 तेसा री पीड़ा रे डरो रे मारे दूर खड़े ऊई की
बोलणा,

“ओ बड़े नगर बेबीलोन, ओ मजबूत नगर तुसा खे धिक्कार ए,
एकी कंटे बीचे ई ताखे सजा मिलीगी।

11 “तरतिया रे बपारी तेसा खे रोणे और शोग करना, कऊँकि एबे केसी बी तिना रा माल नि लणा,
12 मतलब सुईना, चाँदी, रत्न, मोती, बैंगणी, रेशमी और लाल टाले और हर प्रकारा री खुशबूदार
लकड़ी, आथी दाँदो रिया हर प्रकारा रिया चीजा, किमती लकड़ी, पीतल, लोआ और संगमरमरो रे
सब प्रकारा रिया चीजा, 13 और दालचीनी, मसाले, तूप, इत्र, लोबान, शराब, तेल, मैदा, कणक,
गाय, बलद, पेडा, बाकरिया, कोडे, रथ, दास और माणूए खे खरीदणे वाला कोई नि रया।

14 “बपारिए तेसा खे बोलेया, ‘एबे तेरे मनचाए फल तांगा गो ते चली गो और सुख-विलास और
पड़कीली चीजा तांते दूर ऊईगिया और सेयो फेर कदी नि मिलणिया।’ 15 इना चीजा रे बपारी, जो
तेसा रे जरिए अमीर ऊईगे थे, तेसा री पीड़ा रे डरो रे मारे दूर खड़े ऊणे और रोंदे और शोग करदे
ऊए बोलणा,

16 “ताखे धिक्कार ए, धिक्कार ए, से बड़ा नगर,
जो मलमल, बैंगणी और लाल टाले पईनी की था
और सुईना, रत्न और मोतियो साथे सजेया रा था,

17 थोड़े बखतो रेई तिजी रा एड़ा पारी धन नाश ऊईगा।

“हर एक माँझी, जलयात्री, मल्लाह और जितणे समुद्रो ते कमाओ थे, सब दूर खड़े ऊईगे।

18 और तेसा रे फूखणे रा तुआँ देखदे ऊए आक्का पाई की बोलणा, ‘कुण जा नगर, एस बड़े नगरो
जेड़ा ए?’ 19 तिना आपणे-आपणे सियो पाँदे तूड़ पाणी और रोंदे और शोग करदे ऊए चींगी-चींगी
की बोलणा,

“धिक्कार ए, धिक्कार ए, ये बड़ा नगर
जेतेरी जायदाता रे जरिए समुद्रो रे
सब जाहज वाले अमीर ऊईगे थे,

थोड़े बखतो रेई उजड़ी गो।

20 ओ स्वर्ग और ओ परमेशरो रे लोको और प्रेरितों
और भविष्यवक्तियो, तेसा पाँदे खुशी करो,
कऊँकि परमेशरे न्याय करी की
तेसा ते तुसा रा बदला लयी राखेया।”

21 तेबे एक तागतबर स्वर्गदूते एक बड़ी चाक्किया रे पूड़ो जेड़ा एक पात्थर चकेया और ये बोली
की समुद्रो रे सेटी ता,
“बड़ा नगर बेबीलोन एड़ी ई बड़ी तागता ते सेटेया जाणा
और फेर कदी तेसरा पता नि मिलणा।

22 बीणा बजाणे वाले, गाणे वाले, बंसी बजाणे वाले

और तुरहिया रे फूकर बाणे वालेया री
 आवाज फेर कदी तांदे नि सुणनी
 और केसी कामो रा कारीगर बी
 फेर कदी तांदे नि मिलणा
 और चाक्किया रे चलणे री आवाज
 फेर कदी तांदे सुणनी नि ।

23 दिऊएया रा प्रयासा फेर कदी तांदे नि चमकणा
 और लाड़े-लाड़िया री आवाज फेर कदी तांदे सुणनी नि,
 कऊँकि तेरे बपारी तरतिया रे प्रदान थे
 और तेरे जादू-टोणे ते सारी जातिया भरमाईया थिया ।
 24 भविष्यवक्ता, परमेशरो रे लोक
 और तरतिया रे सब काये रे रा खून तिदे ई मिलेया ।”

19

1 इजी ते बाद मैं स्वर्गों रे मानो बड़ी पीड़ जोरे की ये बोलदे ऊए सुणी,
 “हाल्लेलूय्या,
 उद्धार, महिमा और सामर्थ म्हारे परमेशरो री ए ।

2 कऊँकि तेसरे फैसले सच्चे और ठीक ए ।
 तिने तेसा बड़ी वेश्या रा,
 जो आपणे व्याभिचारो ते तरतिया खे प्रष्ट करो थी, न्याय कितेया ।
 और तेसा ते आपणे दासो रे खूनो रा बदला लया ।”

3 तेबे दूजी बार तिने फेर बोलेया,
 “हाल्लेलूय्या!

तेसा रे फूखणे रा तुआँ जुगो-जुगो तक उठदा रणा ।”

4 तेबे चऊबी बुजुर्गे और चारो प्राणिये थाले पड़ी की परमेशरो गे माथा टेकेया, जो सिंहासनो रे
 बैठी रा था । और तिने बोलेया,
 “आमीन्, हाल्लेलूय्या!”

~~~~~

5 तेबे सिंहासनो ते एक आवाज निकली,  
 “ओ म्हारे परमेशरो ते सब डरने वाले दासो,  
 क्या छोटे, क्या बड़े,  
 तुसे सब परमेशरो री स्तुति करो ।”


6 तेबे मैं बड़ी पीड़ा री जी, बऊत पाणिए री जी और गर्जणे री जी आवाज सुणी,  
 “हाल्लेलूय्या!

कऊँकि प्रभु म्हारा परमेशर सर्वशक्तिमान् राज्य करोआ ।

7 आओ, आसे खुश ऊई की मगन ओईए  
 और तेसरी स्तुति करिए,  
 कऊँकि मिन्दूए रा ब्या आयी पऊँछी रा  
 और तेसरी लाड़िए आपू खे त्यार करी ता रा ।

8 और तेसा खे शुद्ध और चमकदार  
 बरीक मलमल पईनणे रा अक्क दितेया ।”  
 कऊँकि तेस बरीक मलमलो रा मतलब,  
 परमेशरो रे लोका रे तर्मा रे काम ए ।

9 तेबे स्वर्गदूते माखे बोलेया, “थे लिखः धन्य ए सेयो, जो मिन्दूए रे ब्याओ री पाट्टिया रे बुलाई राखे।” तेबे तिने माखे बोलेया, “थो वचन परमेशरो रे सच्चे वचन ए।” 10 तेबे आऊँ तेसगे माथा टेकणे खे तेसरे पैरा पाँदे पड़ी गा। तिने माखे बोलेया, “देख, एड़ा नि कर। आऊँ तेरे जेड़ा ई परमेशरो रा दास ए, जो यीशुए री गवाई देणे रे टिके राए। परमेशरो गे ई माथा टेक।” कऊँकि यीशुए री गवाई, भविष्यवाणिग्या री आत्मा ए।



11 तेबे में स्वर्ग खुले रा देखेया। तेती मां सामणे एक सफेद कोड़ा था और तेस पाँदे एक सवार था, जेसखे विश्वासो जोगा और सच्चा बोलोए। और से धार्मिकता रे न्याय और लड़ाई करोआ। 12 तेसरी आखी आगी री लूपिया ए, तेसरे सिरो पाँदे बऊत सारे राजमुकट ए। और तेसरा एक नाओं तिजी पाँदे लिखी राखेया, जो तेसखे छाडी की ओर कोई नि जाणदा। 13 तिने खूनो बीचे डबोए रे टाले पईने रे थे और तेसरा नाओं परमेशरो रा वचन ए। 14 स्वर्गो री बऊत सेना सफेद कोड़ेया पाँदे सवार और शुद्ध मलमल पईनी की तेस पीछे-पीछे थी। 15 जातिया-जातिया खे काणे खे तेसरे मुँओ ते एड़ी चोखी तलवार निकलोई और तेस लोए रा राजदण्ड लयी की तिना पाँदे राज्य करना और तेस सर्वशक्तिमान् परमेशरो रे डराऊणे प्रकोपो री जलजलाहटा रे शराबो रे कुण्डो रे दाख माण्डणी। 16 तेसरे टाले और खुटिया रे ये नाओं लिखी राखेया: “राजेया रा राजा और प्रभुए रा प्रभु।”

17 तेबे में एक स्वर्गदूत सूरजो पाँदे खड़ेया रा देखेया, तिने जोरे की आक्का पायी की सर्गो रे बीचे उड़ने वाले सब मांस खाणे वाले पंछिया खे बोलेया, “आओ परमेशरो री पाट्टिया खे कट्टे ऊई जाओ। 18 ताकि तुसे राजेया रा मांस, सरदारा रा मांस, तागतबर मर्दा रा मांस, कोड़े और तिना रे सवारो रा मांस और क्या आजाद क्या दास, क्या छोटे, क्या बड़े, सबी लोका रा मांस खाओ।”

19 तेबे में तेस डांगरो खे और तरतिया रे राजा और तिना री सेना खे तेस साथे जो कोड़े पाँदे सवार था और तेसरी सेना साथे लड़ने खे कट्टे ऊँदे देखेया। 20 और से डांगर और तेस साथे से चूटा भविष्यवक्ता पखड़ी गा। तिने चूटे भविष्यवक्ते तेस डांगरो री तरफा ते बड़े-बड़े चिह्न दखाए थे और तिना सबी लोका खे तोखा दितेया था, जिने आपणे माथे पाँदे तेस डांगरो री छाप लयी थी और जो तेसरी मूरता री पूजा करो थे। यो दोनो जिऊँदे जिऊए तेसा आगी री झीला दे, जो गन्धको साथे बलो थी, पायी ते। 21 बाकि लोक तेस कोड़े रे सवारो री तलवारी ते, जो तेसरे मुँओ ते निकलो थी, कायी ते और सब पंछी तिना रे मासो की रज्जी गे।

## 20



1 तेबे में एक स्वर्गदूत स्वर्गो ते उतरदे ऊए देखेया, जेसरे आथो रे तेस डूगे गड्डे री जेतेरी गर्डरईया रा अंत निए कुँजी और एक बड़ी जंजीर थी। 2 तिने से अजगर, मतलब पुराणा साप, जो शैतान ए, पकड़ी की हजार साला खे बानी ता। 3 तेबे स्वर्गदूते से डांगर तेस डूगे गड्डे रे जेतेरी गर्डरईया रा अंत निए पायी की बंद करी ता। और तेस पाँदे मुहर लगाईती ताकि से हजार साल पूरे ऊणे तक जातिया-जातिया रे लोका खे नि भरमाओ। इजी ते बाद जरूरी ए कि से थोड़ी देरा खे फेर खोलेया जाओ।

4 तेबे में सिंहासन देखे, तिना पाँदे लोक बैठीगे और तिना खे न्याय करने रा अक्क दितेया। में तिना री आत्मा बी देखी, जिना रे सिर यीशुए री गवाई देणे और परमेशरो रे वचनो री बजअ ते बाडे थे और जिने ना तेस डांगरो री, ना तेसरी मूर्तिया री पूजा किती थी और ना तेसरी छाप आपणे माथे और आथो पाँदे लगाई थी। सेयो जिऊँदे ऊई की मसीह साथे हजार सालो तक राज्य करदे रये। 5 जदुओ तक ये हजार साल पूरे नि ऊए, तदुओ तक बाकि मरे रे जिऊँदे नि ऊए। ये तो पईला दुबारा जिऊँदा ऊणा ए। 6 धन्य और पवित्तर सेयो ए, जो एस पईले दुबारा जिऊँदा ऊणे रे शामिल ए, एड़ेया पाँदे दूजी मीता रा कोई अक्क निए। पर सेयो परमेशर और मसीह रे पुरोईत ऊणे और तेस साथे हजार साला तक राज्य करना।

?????? ?? ???

7 जेबे हजार साल पूरे ऊई जाणे, तेबे शैतान कैदा ते छाडी देणा। 8 सेयो जातिया जो तरतिया रे चऊँ कनारे ऊणिया, मतलब-भोग और मागोग जिना री गिणती समुदरो रे बालुओ रे बराबर ऊणी, तिना खे भरमाई की लडाईया खे कटटे करने खे निकलना। 9 तेबे तिना सारी तरतिया पदि फैली की और परमेशरो रे लोका री छावणी और प्यारा नगर केरी लणा और आगी स्वर्गो ते निकली की सेयो स्वा करी देणियां। 10 तेबे तिना खे भरमाणे वाला शैतान आग और गन्धको री तेसा झीला रे, जिदे से डांगर और चूटा भविष्यबक्ता बी ऊणा, पायी देणा। और सेयो दिन-रात जुगो-जुगो तक पीडे की तड़फदे रहे।

???? ???? ??????? ?? ???? ?????

11 तेबे में एक बड़ा सफेद सिंहासन, और से जो तिदे बैठी रा था, देखेया। जेसरे सामणे ते तरती और स्वर्ग नदीगे और तिना खे जगा नि मिली। 12 तेबे में छोटे-बड़े सब मरे रे सिंहासनो सामणे खड़े रे देखे, और कताबा खोलिया। तेबे एक ओर कताब खोली गयी, मतलब-जीवनो री कताब। और जेड़ा तिना कताबा रे लिखी राखेया था, तेड़ा ई तिना रे कामो रे मुताबिक मरेया रा न्याय किचेया। 13 समुदरे सेयो मरे रे, जो तिदे थे, देई ते, तेबे मौते और नरके सेयो मरे रे, जो तिदे थे देई ते और तिना बीचा ते हर एकी खे तिना रे कामो रे मुताबिक न्याय किचेया। 14 तेबे मौत और नरक बी आगी री झीला रे पाई ते, ये आगी री झील दूजी मौत ए। 15 और जेस केसी रा नाओं जीवनो री कताबा रे लिखेया रा नि मिलेया, से आगी री झीला रे पायी ता।

## 21

???? ????? ?? ??? ?????

1 तेबे में नया सर्ग और नयी तरती देखी, कऊँकि पईला सर्ग और पईली तरती खत्म ऊईगे थे और समुद्र पनि रया। 2 तेबे में पवित्तर नगर यरूशलेम स्वर्गो पाँदो ते परमेशरो गे ते उतरदे देखेया और से तेसा लाडिया जेड़ा था, जो आपणे लाड़े री तँई शूरंगार करोई। 3 तेबे में सिंहासनो ते कोई जोरे की ये बोलदे ऊए सुणेया कि देख, परमेशरो रा डेरा माणुआ बीचे ए, तेस तिना साथे डेरा करना, सेयो तेसरे लोक ऊणे, परमेशर आपू तिना साथे रणा और तिना रा परमेशर ऊणा। 4 तेस तिना री आखी ते सारे आसू टूसणे, इजी ते बाद मौत नि रणी, ना शोग, ना बिलाप, ना पीड़ रणी, पईलकिया गल्ला चली गिया।

5 जो सिंहासनो पाँद बैठी रा था, तिने बोलेया, “देख, आऊँ सब कुछ नया करी देऊँआ।” तेबे तिने बोलेया, “लिखी लो, कऊँकि यो वचन विश्वासो जोगे और सच्चे ए।”

6 तेबे तिने माखे बोलेया, “यो गल्ला पुरिया ऊईगी रिया। आऊँ पईला और आखरी ए, शुरूआत और अंत ए। मां त्याये खे जिन्दगिया रे पाणिए री सूबला ते मुफ्त पलयाणा। 7 जो जीती जाणे, सेई इना चीजारे बारस ऊणे और आऊँ तिना रा परमेशर ऊणा और से मेरे पाऊ ऊणे। 8 पर डरपोका रा, अविश्वासिया रा, बुरे काम करने वालेया रा, अत्यारे रा, व्याभिचारिया रा, जादू-टोणे करने वालेया रा, मूर्तिपूजा करने वालेया रा और सबी चूटेया रा इस्सा तेसा झीला रे मिलणा, जो आग और गन्धका साथे बलदी रओई। ये दूजी मौत ए।”

???? ???????

9 तेबे जिना सात स्वर्गदूता गे आखरी सात मुसीबता ते फेरे रे सात कटोरे थे, तिना बीचा ते एक मांगे आया और मां साथे गल्ला करी की बोलेया, “ओरे आओ, आऊँ ताखे लाडी, मतलब-मिन्दूए री लाडी दखाऊँआ।” 10 और तिने माखे आत्मा रे एक बड़े और ऊच्चे पाहड़ो पाँद लयी गा और पवित्तर नगर यरूशलेमो खे स्वर्गो ते परमेशरो गे ते तरतिया पाँद उतरदे ऊए दखाया। 11 परमेशरो री महिमा तिदे थी और तिजी री जोति बऊत ई किमती पात्थर, मतलब-बिल्लौरो जेड़ी और यशवो जेड़ी साफ थी। 12 तिजी री शहरपनाह बऊत ऊच्ची थी, तिजी रे बारा फाटक और बारा फाटको पाँद बारा स्वर्गदूत थे। और तिना फाटका पाँद इस्राएलिया रे बारा गोत्तरा रे नाओं लिखी राखे थे। 13 पूर्वा री तरफा खे तीन फाटक, उत्तरो री तरफा खे तीन फाटक, दक्खणो री तरफा खे तीन फाटक

और पच्छमा री तरफा खे तीन फाटक थे। 14 नगरो री शहरपनाह री बारा निऊँआ धिया और तिना निऊँआ पाँदे मिन्दूए रे बारा प्रेरिता रे नाओं लिखी राखे थे।

15 से स्वर्गदूत जो मां साथे गल्ला करने लगी रा था, तेसगे नगर, तिजी रे फाटक और तिजी री शहरपनाह खे नापणे खे एक सुईने रा गज था। 16 से नगर चकौर बसी रा था, और तिजी री लम्बाई, चौड़ाईया रे बराबर थी। और तिने तेस गजो ते नगर नापेया, तो से साढे सात सौ कोस निकलेया तिजी री लम्बाई, चौड़ाई और ऊच्चाई बराबर थी। 17 तिने तेसरी शहरपनाह मांपूए री, मतलब-स्वर्गदूतो रे नाओं ते नापी, तो एक सौ चवाली आध निकली। 18 तेसरी शहरपनाह यशबो री बणी री थी और नगर एडे चोखे सुईने रा था, जो साफ काँचो जेड़ा था। 19 तेस नगरो री निऊँआ हर प्रकारा रे किमती पाल्थरे की सजाई राखी थिया, पईली निऊँ यशबो री थी, दूजी नीलमणिया री, तीजी लालडिया री, चौथी मरकदो री। 20 पांजी गोमेदको री, छठी माणिक्य री, साती पीतमणिया री, आठी पेरोजो री, नऊई पुखराजो री, दसी लहसनिए री, ग्यारी धूम्रकान्तो री और बारी याकूतो री थी। 21 बारा फाटका बारा मोतिया रे थे और एक-एक फाटक, एक-एक मोतियो रा बणी रा था। और नगरो री सड़का साफ काँचो जेड़ी चोखे सुईने री थिया।

22 में तिदे कोई मन्दर नि देखेया, कऊँकि सर्वशक्तिमान् प्रभु परमेशर और मिन्दू तिजी रा मन्दर ए। 23 तेस नगरो रे सूरज और चाँदो रे प्रयासे री कोई जरूरत निए, कऊँकि परमेशरो रे तेजो ते तिदे प्रयासा ओआ और मिन्दू तिजी रा दिऊआ ए। 24 जातिया-जातिया रे लोक तेसरे प्रयासे रे चलणे-फिरने और तरतिया रे राजेया आपणा-आपणा आदरो रा सामान तिदे ल्याऊणा। 25 तिजी रे फाटक दिने कदी बंद नि ऊणे और रात तेती नि ऊणी। 26 जातिया-जातिया रे लोका एस नगरो रे हर प्रकारा रा महिमा और आदरो रा सामान ल्याऊणा। 27 तिदे कोई अपवित्तर काम करने वाला या वृणित काम करने वाला, या चूट बोलणे वाला कियाँ बी जाई नि सकदा। पर बस सेयो लोक ई जाई सकणे, जिना रे नाओं मिन्दूए री जीवनो री कताबा रे लिखी राखे।

## 22

1 तेवे स्वर्गदूते माखे बिल्लौरो जेड़ी छलकदी ऊई जिन्दगिया रे पाणिए री एक नदी दखाई, जो परमेशर और मिन्दूए रे सिंहासनो ते निकली की तेस नगरो रे बीचो-बीच बहुओ थी। 2 नदिया रे वार-पार, जिन्दगिया रा डाल था, तिदे बारा प्रकारा रे फल लगे थे, से हर मीन्ने फलो था। और तेस डालो रे पत्तेया ते जातिया-जातिया रे लोक ठीक ओ थे। 3 फेर सराप नि ऊणा, परमेशर और मिन्दूए रा सिंहासन तेस नगरो रे ऊणा और तेसरे दासा तेसरी सेवा करनी। 4 तिना परमेशर आमणे-सामणे देखणा और तेसरा नाओं तिना रे माथे पाँदे लिखे रा ऊणा। 5 और फेर रात नि ऊणी और तिना खे सूरज और दिऊए रे प्रयासे री जरूरत नि ऊणी। कऊँकि प्रभु परमेशरे तिना खे प्रयासा देणा और तिना जुगो-जुगो तक राज्य करना।



6 तेवे तिने माखे बोलेया, “यो गल्ला विश्वासो जोगिया और सच ए। और प्रभुए, जो भविष्यवक्तेया री आत्मा रा परमेशर ए, आपणा स्वर्गदूतो खे इजी खे पेजेया, ताकि आपणे दासा खे सेयो गल्ला जिना रा चट पूरा ऊणा जरूरी ए, दखाओ।”

7 “देख, आऊँ चट आऊणे वाला ए, धन्य ए से, जो एसा कताबा रिया भविष्यवाणिया री गल्ला खे मानोआ।”

8 आऊँ सेई यूहन्ना ए, जिने आपू ये सारिया गल्ला सुणिया और देखिया। ये सब सुणने और देखणे ते बाद आऊँ तेस स्वर्गदूतो रे पैरा पाँदे माथा टेकणे खे पड़ी गा, जिने माखे ये सब दखाया था। 9 पर तिने स्वर्गदूते माखे बोलेया, “देख, एडा नि कर। कऊँकि आऊँ तेरा और तेरे पाई भविष्यवक्तेया री और तेसा कताबा री गल्ला खे मानणे वालेया जेड़ा ई परमेशरो रा दास ए। सिर्फ परमेशरो गे ई माथा टेक।”



10 तेवे तिने माखे बोलेया, “एसा कताबा रिया भविष्यवाणिया रिया गल्ला बंद नि कर, कऊँकि बखत नेडे ए। 11 जो अन्याय करोआ, से अन्याय ई करदा रओ, जो मईला ए, से मईला ई बणेया रा रओ और जो तर्मी ए, से तर्मी ई बणेया रा रओ और जो पवित्तर ए, से पवित्तर ई बणेया रा रओ।”

12 तेवे प्रभु यीशुए बोलेया: “देख, आऊँ चट आऊणे वाला ए; और हर एकी रे कामो रे मुताबिक बदला देणे खे फल मांगे आए। 13 आऊँ ई पईला और आखरी, आगला और पिछ्ला, शुरूआत और अंत ए।

14 “धन्य ए सेयो, जो आपणे टाले तोई लओए, कऊँकि तिना खे जिन्दगिया रे डालो गे आऊणे रा अक्क मिलणा और सेयो फाटका रिये ऊई की नगरो खे जाणे। 15 पर कुत्ते, जादू-टोणा, व्याभिचारी, अत्यारे, मूर्तिपूजा करने वाले और हर एक चूठ बोलणे वाला और चाणे वाला बारे रणा।

16 “मै यीशुए आपणा स्वर्गदूत इजी खे पेजेया, ताकि तुसा रे आगे मण्डलिया रे बारे रे इना गल्ला री गवाई देओ। आऊँ दाऊदो रा मूल, वंश और प्याणु तारा ए।”

17 परमेशरो रा आत्मा और मिन्दूए री लाडी दोनो यीशुए खे बोलोए, “आ!” और सुणने वाला बी बोलो कि “आ!” और जो त्याया ए, से आओ और जो कोई चाओ से जिन्दगिया रा पाणी मुफ्त लओ।



18 माँ हर एकी खे, जो एसा कताबा री भविष्यवाणिया री गल्ला सुणोआ, गवाई देऊँआ कि जे कोई माणू इना गल्ला रे कुछ बड़ाओ, तो परमेशरे सेयो मुसीबता, जो इना कताबा रे लिखी राखिया, तेस पाँदे बड़ाणियां। 19 जे कोई एसा भविष्यवाणिया री कताबा री गल्ला बीचा ते कुछ निकयालो, तो परमेशरो तेस जिन्दगिया रे डालो और पवित्तर नगरो बीचा ते, जेतेरी चर्चा एसा कताबा रे ए, तेसरा इस्सा निकयाली देणा।

20 जो इना गल्ला री गवाई देओआ, से ये बोलोआ, “आ, आऊँ चट आऊणे वाला ए।” आमीन्। ओ प्रभु यीशु आयी जाओ! 21 आऊँ प्रार्थना करूँआ कि प्रभु यीशुए री कृपा परमेशरो रे लोका साथे रओ। आमीन्।